





225/3/c

18/5

Digitized by the Internet Archive
in 2018 with funding from
Wellcome Library

https://archive.org/details/b30413540_0001

SYNOPSIS
UNIVERSÆ
PRAXEOS MEDICÆ,
IN BINAS PARTES DIVISA.
TOMUS PRIMUS,

21290M Y 2

21290M Y 2

21290M Y 2

21290M Y 2

21290M Y 2

SYNOPSIS

UNIVERSÆ

PRAXEOS MEDICÆ,

IN BINAS PARTES DIVISA;

QUARUM prior omnium morborum conspectum exhibet;
altera verò rem medicamentariam, perpetuis commentariis
illustratam, sistit; cui subjungitur Liber DE CIBO ET POTU.

EDITIO POSTREMA,

*ULTERIUS elaborata; vel cæteris tùm Gallicis, tùm Latinis, multò
amplior, & accuratior.*

Auctore Jos. LIEUTAUD, Archiattrorum comite & primario stirpis Regiæ
Medico; Doctore Facultatis Medicæ Parisiensis; Academiae Regiæ Scientiarum,
& Societatis Regiæ Londinensis.

IMPERANTE, LUDOVICO XVI.
TOMUS PRIMUS.



PARISIIS,

Apud P. FR. DIDOT, juniorem, Sal. Facultatis Medicinæ Paris. Bibliopolam.

M. DCC. LXXIV.

Cum Approbatione, & Privilegio Regis.

272411012

2032489



172611111

P R O Æ M I U M.

QUAM miserâ mortalium conditio ! futuræ quidem fortis nescii , primas inter vagitus carpunt luminis auras ; homunciones ; vitamque incluctabili fato , seriùs ocyùs cohibendam ejulatibus auspicantur : nec placidè exiguum fugacis vitæ curriculum explent ; quin potiùs innumeris pertæsi ærumnis , inter quas dirum caput effert *portentosa morborum phalanx* , ætatem asperam molestè ferunt. Nec desunt qui atris curis , vel mœrore confecti animum planè despondent , ambiuntque mortali vinculo exsolvi : imò & eò sæpiùs res rediit , ut nonnulli nefando sydere afflati , sibi attulerint damnatas manus ; vel perditè ad laqueum confugerint. Hinc minime mirari subit si quidam improbi , ferendis quibus premebantur vitæ infortuniis impares , fatiscentem & caducam naturam temerè incusaverint ; supremumque rerum authorem , haud citrà piaculum , quasi increpaverint : sed virulentum retuderunt judicium , ne error latius serperet , saniores , æquioresque rerum naturalium , exploratores , qui hæc adversa consultiùs ducenda putarunt gentis humanæ flagitiis ; quæ scilicet has nusquàm luisset pœnas , ni à primo antehàc parentum vitæ genere deflexisset.

Equidem , dùm in orbe novo , coeloque recenti , frugibus nullâ arte corruptis , vescebantur rudes & agrestes homines ; humilesque tabernæ pecus & dominos coërcebant : dùm uxor pudica ab omni fuco aliena , vestes inconditas è pellibus contexebat ; & sylvestrem torum culmo & frondibus sternebat : tùm cultores ruris paterni & custodes ovium , ultrò demandatis muniis hærentes , probæque victûs rationi indulgentes , integris viribus senescebant. Ist hæc cum ità essent , jure duntaxat naturali continebantur homines ; nec curabant , vigente fide , legum enigmata solvere : de ortu & causis rerum , sedulâ & futili posterorum industriâ indagatis , parùm solliciti philosophiam naturalem sectabantur , quâ exploratis duntaxat rerum effectibus , rectum

ab obliquo , falubriaque à noxiis fecernere solebant : nec opus erat eximiâ vivendi ratione morbos arcentibus medicinæ problemata extricare ; adeò ut inauditâ medendi scientiâ , placidam agerent vitam , nullis ægritudinibus contaminatam & contractam , quo sanè nil æquè faustum putabant. Accedente verò canitie lætè ferebant senectutem virtute conspicuam , summis honoribus & religiosâ veneratione exceptam ; donec ætate inter acceptos & conducibiles labores consumptâ ; numerosâ , fanâque relictâ prole , impavidè migrarent ad superos.

Ubi verò , insaniente ævo , mortales corripuit inexplibilis auri fames ; adeò ut perversis moribus quasi degeneres negarint avorum vestigia premere : tunc temporis genere & divitiis dispares turpia cogitare cœperunt. Nescientes quantum sit in rebus inane , felicitati nusquàm assequendæ inhiabant : tantalitiis opibus diffluentes in ædes sumptuosas se recipiebant , & corpus amictu mollissimo , auro vel purpurâ fulgente velabant ; quibus solemne erat epulas lautissimas (1) , omni obsoniorum genere , ferculisque exquisitioribus conspicuas ; ac generoso nectare celebrandas , mirantibus exhibere. Quid moror ! quibuscumque *luxuriæ & ingluviei modis exhaustis* , omne in præcipiti vitium stetit : ac postremò omnia pessum abierunt , & sensim , processu temporis , ruerunt in deteriora. Quid mirum , si hâc grassante lue , omnes perverterentur sancitæ œconomix animalis leges , & atrox desipientibus incubuerit morborum cohors. Quibus ferendis invitos præbuerunt humeros malè feriati homines ; qui sanè suæ salutis tùm consulissent , si severiori lege proficientes , sapientiæ præceptis adhuc fluctuantem animum composuissent : sed luxurie soluti , vel falsâ cupidinum imagine decepti , de investigandâ hujusce cladis causâ , etsi improbæ vivendi rationis

(1) Nemo quidem , vel semi-doctus , non novit convivia sybaritica , vel syracusana , luxu & deliciis decantatissima ; cupediis feralibus , & stygiosis poculentis insignia.

conscii, minime curarunt; nec avertendis impendentibus morbis invigilarunt; sed illis tantummodò demulcendis & impugnandis omnem navarunt operam.

Intereà, premente durâ necessitate, remediorum inventrice & magistrâ, fortuita aut magis obvia explorabant, quorum proferos vel noxios effectus accuratè notabant: adeò ut ex hisce congestis observationibus emerferit *prisca illa & rudior medicina*, quam in Ægypto prima habuisse incunabula, è quâ ad Græcos migravit, neminem eruditum fugit. Inter postremos primus dispersas de morbis prænotiones collegit; ac excerpta è votivis tabellis Æsculapii fano appensis, in unum corpus redegit HIPPOCRATES (1), cujus scripta sanè quidem aurea, multùm tamen scorix & purgamenti admistum habent; ni legitima ab spuris, uti nonnulli conjiciunt, contaminentur. Temporum verò injuriâ, ævique barbarie, fortè periisset doctrina hippocratica; ni post sexcentos annos, hanc innumeris sectis divulsam, strenuis viribus instaurasset GALENUS; vir sanè nulli secundus, ni nauseoso battologismo sua scripta conspurcasset. Parùm dein profecit ars medica; nec meliorem expertæ sortem cæteræ scientiæ; usque ad septimum sæculum, sub quod totum ferè orbem devastarunt Arabes & Sarraceni; quibus scilicèt corruerunt Athenæ & Roma. Haud tamen medicinam despiciebant hie barbari, cui promovendæ nonnullam impenderunt operam: sed horum curâ quasi rediviva hæc scientia præstantissima, lentè in posterum processit; donec sæculo mox elapso, nostrâve ætate, prodierit stupendus librorum proventus; inter quos innumeri tenebris damnati blattis & tineis haud immeritò traduntur: plures, è quibus erat quod tollere velles, meris hypothefibus contexti, magnoque verborum ambitu prolixiores, tædium legentibus pariunt: pauci verò accuratis observationibus referti, & ære

(1) Multa etiam depromsisse HIPPOCRATEM ex Asclepiadum scriptis plures jure autumarunt.

perenniores, nescio quo fato, majorem medicorum partem plerumque latent: sed hanc qualemcumque librorum suppellectilem comparare vetat variorum res angusta domi; nec praxi incumbentibus, vel ægrotis crebrò assidentibus illos evolvere licet.

Hinc plures, haud infimi subsellii, de leniendis vel superandis hisce difficultatibus cogitarunt; nullumque non moverunt lapidem ut confragosum medicinæ iter explanarent; qui scilicet latissimam medendi scientiam, huc & illuc fusiori stylo exaratam, contrahere curarunt, ut librorum penuriæ consulerent: exindè prodierunt varia *medicinæ compendia*, publico usui jamdudum tradita; quæ magis doctrinæ specimen, quàm rectam medendi normam exhibent; & ideò, pace illustrium Authorum, legentium vota minime explent: nùm illorum vestigia premens felicius collimaverim? viderint qui abditos medicinæ clinicæ recessus accurato lustrarunt studio. Absit tamen ut à perspectis tot scriptis ejusdem argumenti, Iliada post Homerum canere insimulemur; cùm toto cœlo distet *nostrum propositum* à prædictis enchiridiis; & præcipua hujusce Synopses pars è proprio penu depromatur; è nostris scilicet adversariis tùm clinicis, tùm anatomicis; quorum nonnulla jam vetustiora, & cum situ certantia, ab interitu vindicavimus: nec illa integra, qualia in schedas perfunctoriè congerebamus; sed contracta, aut potius eorum duntaxat consuetaria tradidimus, ut legentium labori parceremus. Haud tamen hisce cancellis continetur *hæc epitome*; inter quàm concinnandam Penelopes telam retexere sæpiùs nobis contigit; sed fusiora famigeratorum practitorum opera, indefesso & tædioso labore, non citrà feram suscepti muneris poenitentiam, lustravimus; ut ad praxim tantùm pertinentia ex illâ immensâ librorum nube exciperemus, & nostræ scribendi rationi submitteremus.

Itaque ex his omnibus accuratè digestis, & dilucidiori, ni fallor, ordine dispositis; abjectis eruditis & merè curiosis, allucinationibus & commentis, recoctis & obsoletis, quibus
turgent

turgent cætera volumina ; vel omnibus rescissis mentis diverticulis, & à proposito alienis, hæc emerfit Synopsis, rerum ubertate conspicua ; non elementaris, vel, ut inquiunt, didactica ; sed meris observatis inter ægros & cadavera versando concinnata ; quam adauctam, ulteriùsque elaboratam, & bipartitam, iterùm recudere necessarium duximus. Quamobrem posthabitâ nomenclaturâ græcâ, ad putidam ostentationem à plerisque comparatâ, morbos cujuscumque commatis, inter quos nonnulli occurrunt hætenùs inauditi, distinctis sistimus capitulis, *in primâ SynopsEOS parte* : signa quibus innotescunt, & symptomata quibus stipantur, sedulò recensemus ; inordinatè verò, cùm alterutra seorsim memorare haud sinat accurata morborum historia ; quæcumque de hâc re in medium adduxerint varii Authores, quorum scripta magis ingenii solertiam quàm accuratam inter praxim observationem sapiunt. Neminem prætereâ fugit nunc pro signo, nunc pro symptomate, juxtâ clinicorum nutum & arbitrium haberi hæc *morboſa naturæ phenomena*, ægrè hinc ab invicem distinguenda. Insuper notare juvat quod non omnia, sub cujuscumque morbi titulo collecta, in singulis ægris se prodant ; sed hæc vel illa, seriùs ocyùs visenda se præbeant ; adeò ut generalia tantummodò de hâc re, vel incerta, & à vero planè aliena, proferre liceat. Neminem enim expertum latet morbos cognomines, vel ejusdem speciei, nusquàm sub unâ eâdemque facie in praxi occurrere, tam ob innumeras circumstantias à temperie, ætate, sexu, anni tempestate, cœli conditione, loco, &c. desumptas ; quàm propter vivendi rationem & curandi modum : quibus posthabitis, intelligitur cur tot fuitiles & ineptæ prodierint febrium, aliorumve morborum divisiones & differentix, quibus adornantur libri & obnubilatur ars medica (1).

(1) 'A recto deflectunt tramite, inutilemque operam ludunt qui omnia, quâvis horâ & singulis momentis contingentia accuratiori adnotant studio,

Jamdudum clamitant saniores practici medicinam luxurianti physico-medicorum ingenio depravari; & nil fermè in lucem prodire præter *hypothesēs*, vanissimo scholarum strepitu celebratas, sed altum medicinæ clinicæ vulnus infligentes; quæ scilicet ad lydium veritatis lapidem revocatæ mera audiunt commenta. Turpiter sanè allucinantur qui theoriam medicam ex hisce nugis exsurgere putant; cum potius versetur, prælibatis mathesi, physicâ experimentalis & chymîâ, historiâ anatomicâ & naturali, in ritè observatis naturæ viribus & phænomenis, tam in statu sano, quàm in morbofo; cui doctrinæ à nonnullis adumbratæ, sed à paucis excultæ, parcit annorum series; dum alia ingeniorum nutu mutabilis novam ferè quotannis faciem induit: nec impedit hoc pseudo-theoriæ infortunium quominus quisque præconceptæ opinioni obnixè hæreat, & unus alterum erroris arguat & criminetur: hinc acres controversiæ in similitates & odia sæpius exardescentes; atque misellis ægris plerumque lugendæ. Quapropter ab omni hypothesi planè alienus, de causis morborum proximis atrâ caligine immerfis, ne verbum quidem protuli; cum nullus dubitem quin oculatiorum indagini subtrahantur; quidquid de hâc re scripturierunt, quos nœnias venditare non puduit: sed remotas & evidentes, è quibus ritè pensitatis genuina sæpius eruitur morbi profapia, sedulò pro viribus exarandas curavi.

Quantum conferant ad obscuriorum morborum extricationem, & medicinæ incrementum, observationes ab *introspectis cadaveribus* desumptæ (1), quas jure pro tutissimâ praxeos cynosurâ habent solertiores, nemini haud obvium. Itaque selectiores historias ex acervo cadaverum, per viginti annos & ultrâ, cultro

argutamque sedulitatem in hoc illove conscribendo morbo assequi gestiunt: intelligentibus pauca.

(1) Vix concipere licet quomodò major scriptorum medicorum pars de extispiciis ne verbum quidem protulerit; vel hanc præstantissimam scientiam perfunctoriè tractaverit.

nostro anatomico subjectorum depromptas, pro instituti ratione contractas exhibemus. His subjungere lubuit quidquid de hâc re litteris consignarunt varii Authores, agmen claudente celeberrimo MORGAGNO (1): sed delectu opus fuit; cùm plures rerum anatomicarum nescii, vel suæ famæ consulentes, haud pleniorẽ de hâc re sibi concilient fidem. Quæcumque igitur dispersa eruimus ex hoc uberrimo fonte, contracto stylo recensemus; quod opus, arduum sanè & difficile, vel medicinæ proceribus non ingratum fore confidimus. Silentio tamen minime prætermittendum singulos morbos, vel graviores, haud semper conspicuam labem visceribus inferre; cùm sæpè sæpius lustrata post obitum interanea planè inculcata deprehendantur: quod benè notandum incumbit, ne articuli, in quibus prædictæ desiderantur historiæ, pro inexpletis vel mancis inconsultò habeantur.

Morborum prædictiones paucis perstrinxi, cùm futile & supervacaneum videatur sub singulis reponere morbis delirium, convulsiones, affectus comatosos, spirandi difficultatem, stertorem, lipothymias, sudorem frigidum, aliaque symptomata graviora, morbos luctuosos concomitari solita, infaustum exitum minari; quod sanè neminem, vel rudem & inexpertum latet. Sed nonnulla occurrunt quæ pro rerum conditione, nunc fausta, nunc calamitosa censerì debent; febres putà, eruptiones, hæmorrhagiæ, vomitus, alvi fluxus, &c. quæ sedulò recensere operæpretium judicavi. Haud fugit tamen exercitatiores clinicos incerta esse de vitâ & morte judicia, ob varias quibus submittuntur circumstantias, quas vix assequi licet. Cautè vaticinandum esse rectè monet HIPPOCRATES, candidè asserens nil certi de eventu in morbis acutis statui posse: ac fortè plus veri hoc effato tradidit

(1) Inter scriptores, qui de extispiciis ex professo egerunt, eminent BONETUS, MANGETUS & MORGAGNUS; quorum opera excepit *Historia nostra Anatomico-Medica*, nuperrimè publici juris facta, quæ thesaurum observationum locupletiorẽ, sed non omnibus numeris absolutum, præbet.

antiquissimus medicinæ antistes, quàm suis fusioribus circa prognosim operibus; è quibus tamen inter multa dubia & intricatissima, nonnulla scitu digna & exquisitiora, suo loco recensenda, depromi queunt. Sed hæc futurorum scientia, numeris platonice fortè obscurior, summis, nemine discrepante, premittitur difficultatibus, quas nequidem suspicantur tot balatrones & inepti qui de morborum exitu, quasi è tripode, pronuntiant.

Parùm, vel obiter, *diætæ* præceptis inhæremus; licèt præcipuus in horum observatione versetur curationis cardo: sed superflua de hâc re nobis visa sunt monita; cùm nullum medicum, vel bæotici ingenii, horumce immemorem arbitremur. Simili fermè ratione ductis haud lubuit *medicamina* methodicæ feriei submittere: sed eo ordine disponuntur ut omnia primo intuitu pateant; ac magis congrua præsentis rerum statui seligi queant: ut scilicet studio & praxi edocti prius nota, tradita, vel peracta in memoriam revocent; imò & nonnulla fortè nova per transennam addiscant. Ab insulsâ remediorum farragine alieni, selectiora tantùm vel pluries inter ægros explorata exhibemus; ut quisque pro variâ rerum conditione, probatiora & magis proficua ex hocce albo eruere valeat. Pauca sanè requiri medicamina, sub morbis acutis, uno ore fatentur exercitatiores; quibus solemne est, præmissis præmittendis, cunctari & superfedere, donec constet de morbi genere. Aliter se res habet inter morbos chronicos, ad quorum medelam iteratis tentaminibus vel cautâ exploratione, viam parare expedit. Ad summam, medicum esse naturæ spectatorem & ministrum, vel interpretem; cui duntaxat incumbit spontaneum ejus motum cautè dirigere; vel manca & inchoata ejus munia præsentissimis auxiliis explere & perficere, apud omnes in confesso manet. Aliàs demandato deest officio; si quidpiam contra naturæ leges molia-tur, morbosque hostili impetu, hâc reluctante, aggrediatur. Neminem insuper fugit plures decumbentes, post exhaustam medicorum scientiam, solo naturæ beneficio incolumes evasisse:

quod sanequidem altâ mente tenere debent plures inepti polypharmaci, qui ad inaudita vel abstrusiora se conferre; aut vulgatoria ad artis fastuosæ normam revocare, summo honori ducunt. Væ misellis agris! ni natura victrix morbum & noxia pharmaca superet.

Nemo nescit amplissimam esse rei medicæ supellectilem, & longè majorem esse *medicaminum copiam* quàm morborum proventum. Imò & conjicere nil vetat nullum esse affectum insuperabilem, si opportuno tempore & congruis telis impugnetur; sed hoc opus, hic labor est. Cautè tamen cum remediis, vel innoxiiis, mercari expedit; cùm inconcussum maneat quamplures esse ægritudines solis naturæ viribus judicandas; quæ verò ab intempestivâ vel præposterâ curâ exacerbari; imò & lethales evadere queunt. Temeritatis sanè infimulandi tot scioli agris assidentes, qui demandatis muniis obiter hærentes, litterarias quisquillas effutiunt, vel insulsè deblaterant, donec consilio præcipites, inextricatâ morbi indole, & vix explorato pulsu, ad remedia properent; dùm eruditi & experti ad judicium tardiores, nil nisi omnibus ritè pensitatis, agendum putant. Ratum enim apud omnes manet naturam esse optimam morborum medicatricem; & frequentiores affectus ipsi commissos, annuente SUPREMO VITÆ ET NECIS ARBITRO, spontè sanari: in aliis verò haud exiguum opem conferre artis præsidia, dummodò dosi congruâ præcipiantur, & tempestivè, vel lentâ festinatione exhibeantur: tardum enim, sub hâc re, celerem assequi multiplici experientiâ constat. Sin minùs quæ ad generis humani salutem comparata sunt, pessimâ & improbâ administratione funera accersunt (1).

Haud fortè omnibus arridebunt generalius tradita, circà

(1) Adeò ut quidam nasutuli pluries secum cogitaverint, bonine an malius attulerit hominibus ars medica; & hoc problema turpissimum posteris solvendum tradiderint.

morborum curationem : nec me latet nonnullos , haud infimi subfellii , medicos , rebus theoreticis plus æquo addictos , assensum denegasse nostræ parùm rationali , ut inquiunt , medendi methodo ; cùm de *indicationibus* perfunctoriè egerim , vel hanc doctrinam in scholis acceptissimam sicco pede nonnunquàm transierim. Sed illos monitos velim hanc translatitiam scribendi rationem consultò omisisse ; tùm ad fugiendam nauseosam prolixitatem ; tùm ad declinandam omnem hypothesim : equidem nemini haud obvium venæ sectionem indicari à plethorâ ; emetica & cathartica à saburrâ primarum viarum ; aperientia ab obstructionibus ; diuretica ab stagnante colluvie ferosâ ; emmenagoga à suppressis mensibus ; refrigerantia à sanguinis æstu , &c. quibus evidentibus immorari futile & supervacaneum fore judicavimus : ubi verò causæ in obscuris latent ; & meris duntaxat conjecturis illas assequi licet , nulla proferri potest indicatio quin hypothesi fulciatur. Hinc satius duxi inter hæc angustias remedium praxi comprobatum duntaxat recensere ; etsi non patet ejus agendi modus ; cùm clinicis illud duntaxat incumbat munus , ut morbum scilicet curent ; non verò exponant ; nec ipsis alia est meta laborum.

Ut nil desit praxim exercentibus ex eo quod humana præstare valet sedulitas , novum in *alterâ Synopses parte* , materiæ medicæ conspectum sistimus , qui inter morbos curandos egregiam opem conferre potest. Plura sanequidem de hâc re prostant opera ; sed pauca , ni fallor , medentium vota explent : nonnulla enim sunt merè chymica , in quibus scilicet referatur pyrotechniæ ars ; sed remediorum vires obiter enarrantur : alia fusioribus plantarum , mineralium & animalium descriptionibus referta , magis ad historiam naturalem quàm ad medicam spectant : quædam rerum cujusvis indolis extrà usum medicum positarum copiâ turgent ; & ideò solis naturæ curiosis arrident. Varia demùm numerosissimis formulis ad meram ostentationem plerumque conscriptis , ineptâ & solertioribus invisâ , rerum

farragine tumentibus, luxuriantur. In omnibus demùm id genus operibus altum de re cibariâ silentium; licèt, nemine refragante, haud parùm conferat probus alimentorum usus, tam ad præcavendos quàm ad curandos morbos.

Quantùm discrepat *nostrum opusculum* à libris ejusdem argumenti, viderint æqui rerum æstimatores: equidem præter nonnulla hætenus intacta, vel inaudita, quæ scilicet in cæteris promptuariis desiderantur; innumera ab authoribus tradita, quæ sparsim proluxioribus scriptis immerguntur, & quasi delitescunt, undique collegimus; ut amplissimam medicaminum selectiorum messem classibus ad praxim accommodatis annecteremus. Quibus benè perspectis fati superque patet providam naturam lautè prospexisse morbosæ hominum conditioni: tantùm enim abest ut medicamina deficient; quin potius horum copiâ quasi obruamur. Nemo non novit diversæ sortis *mineralia* quæ suppeditant patefacta telluris viscera; terras nempe, lapides, salia, sulphura, metalla, aliaque ad multiplices usus medicos aut domesticos comparata. Omnium expectationem superat vastissima *stirpium* sylva, quarum viginti circiter millia jam à curiosis naturæ scrutatoribus conspecta & descripta, haud certè dimidiam botanices partem præbet: ac in dies crescit antiquissimus plantarum usus: nec dubitare licet quin plurima adhuc lateant in vegetabilium classi præstantiora remedia, quæ fortè manent posterorum curas. Nec suis laudibus defraudanda *animalium* familia, minorem sanè medicaminum copiam suppeditans, sed fortè tutiorem & œconomix animali affiniorem. Nemo nescit innumera ex hoc triplici fonte depromi remedia, quæ non solum simplicia, vel diversimodè composita præcipiuntur: sed etiam variis elaborationibus chymicis & pharmaceuticis subijciuntur; ut hinc nova emergant mixta quæ suis viribus polent, & ad publicum commodum in officinis præstant.

Constat, ex antiquioribus monumentis, simplicia & domestica adhibuisse remedia primos medicinæ cultores; quæ vel

ipsimet parabant, vel quorumdam tironum curæ committebant donec fortè utrorumque intempestivâ vanitate, hæc præstantissima ars ad ineptos quosdam ablegata fuerit, qui tùm potius lucro quàm ægrorum saluti inhiantes, variis imposturis & portentosis venditationibus incautorum fidem ambiebant; adeò ut nasutiores, fraudem subolentes, atrocissimis conviciis, & ridiculis fannis, utramque artem prosciderint & laceraverint. Angustioribus cancellis continebatur *pharmacia* Græcis & Latinis exulta; quam instaurarunt Arabes, & fortè suprâ modum auxerunt: ac nullus fermè fuit in posterum qui ad hanc ampliandam suum symbolum conferre negaverit. Nec desit nostrâ ætate, hæc inconsulta quid inauditum tradendi prurigo: ubique enim occurrunt ardeliones qui fatuum popellum ludificantes, posthabitis probatissimis remediis, novum qualecumque, ut inventi gloriam assequantur, effingere moliuntur. Nec minorem medicaminum proventum præbet *chymia*, quæ licet vetustissima, in usum medicum rarò trahebatur: adeò ut vix caput extulerit circâ principium nuperrimi sæculi; sed parùm profecerunt veteres medico-chymici, qui sua scripta consultò obscurarunt; vel inaudita & barbara finxerunt vocabula, ut fatuorum admirationem sibi conciliarent; donec posterì, quorum potior pars ab omni fraude aliena, hanc præclaram artem illustraverint; utiliùs sanè ni avidiori animo semper ad nova properassent; & jam locupletissimis officinis varia futilia & superflua adjicere ambiissent: ad populum phaleras.

Hinc temporum lapsu ità crevit hæc *portentosa officinarum supellex*, ut vix quisquam, vel exercitatissimus, inter seligendum magis congruum, vel proficuum à noxio extricandum, in hâc uberrimâ messe haud anxius hæreat (1). Hoc est Augiæ ita-

(1) Nemo non novit MANGETI bibliothecam pharmaceuticam, JUNCKERI corpus pharmaceuticum, TRILLERI thesaurum, aliaque id genus nauseabunda opera, quæ, ut verum fatear, minùs genuinam medicinam quàm artem circulatoriam sapiunt.

bulum quod, experientiâ duce, repurgandum curavi: medicamina nempe, inter simplicia & composita quæ solertiores, vel exercitatiores coætanei in familiarem usum trahunt, vel ego met faustè adhibui, recensenda curavi; ac flosculos duntaxat huc & illuc sparsos è lustrato vastissimo chymix & pharmacix campo collegi. Hinc emerfit promptuarium, medicinæ tironibus expectatissimum; quod etiam diuturnâ praxi edoctis non ingratum fore putavi. Vix vicesimam medicaminum partem quæ prostant in libris ejusdem argumenti proposui; ne ex ampliori materiæ medicæ apparatu immensum & perspicacioribus invisum emerfisset opus. Quapropter nonnulla consultò prætermisi, etsi celebriora, quæ ratione penuriæ & caritatis, in officinis planè desiderantur; varia olim decantata, ad vanam artis ostentationem parata, quorum usus omninò exolevit; non secùs ac quædam nova, de quorum viribus nondùm constat; vel quorum periclitatio haud benè cessit; quamplurima quæ etsi tutò adhiberi queunt, superflua tamen, ob uberrimam succedaneorum copiam, cenferi debent: nonnulla demùm quæ ratione difficillimæ encheiresis rarò apprimè præparata, vel artificum fraude ut plurimum adulterata, occurrunt; licèt ab incautis vel stolidis stupendâ fiduciâ in usum quotidianum trahantur, qui de hisce technis, etsi summè periculosis, minùs laborant quàm de ranis palustribus.

Ut insuper unâ eâdemque fideiâ plures dealbemus parietes, rerum emporeticarum & officinalium tabulis, hâc methodo contractis, subjungere lubuit *medicamina*, ut inquiunt, *magistralia*, quæ scilicet, pro medici arbitrio, è vario simplicium, chymicorum & pharmaceuticorum connubio confici solent; ut praxim exercentes, vel incuntes, quidquid magis congruum præsentis rerum conditioni in promptu habeant. Hinc prodierunt formulæ medicæ numerosissimæ, ex libris sanè minime excerptæ, nec meris & incertis conjecturis innixæ; sed à solertioribus coætaneis exploratæ & comprobatæ, vel proficuè inter nostram

praxim adhibitæ; quarum exemplo alias pro re natâ cuivis concinnare licet: hâc nauseosâ ingredientium, sæpiùs mutuò colloquentium, farragine, quæ minùs præscribentium scientiam quàm horum imperitiam prodit, nusquàm turgent nostræ exaratae formulæ (1); sed simpliciores & ad œconomix animalis vires magis accommodatæ prostant. Nec omnibus fortè arridebunt familiariora & euporista remedia; cùm ea semper fuit pseudo-medicis innata vecordia ut indigena fastidirent, exotica laudarent, domestica despicerent & elaboratissima prosequerentur: abjectis scilicet omnibus obviis quæ suppeditat patrium solum, ad rara & pretiosa, ægrè comparanda, stultè se conferunt; ac fastuoso remediorum apparatu ducti, ea sola alto de prædicant supercilio quorum compositionem subeunt aurum, gemmæ, margaritæ, aliaque exotica rariora; quasi supremus opifex quædam præstantiora divitibus & magnatibus concesserit, quæ cæteris negavit. Stirpes enim pedibus calcamus quæ ratione virium omnibus remediis peregrinis, vel arte chymicâ elaboratis, magnisque titulis superbientibus, longè præstant. Quid opus est verbis! omnia vel simplicissima & vulgatiore remedia, opportunè adhibita saluberrima censeri debent; dùm rara & exquisitiora, arduis elaborationibus, vel egregiis compositionibus insignia, inertia & nociva deprehenduntur; imò & lethalia evadunt, si præposterè usurpentur: non secùs ac pigmentis vulgatoribus, rudioribusque penicillis, similitudines cum ipsâmet naturâ certantes effingunt in arte periti; dùm humilioris ordinis pictores, etiamsi rariora adhibeant, futilem in exprimendis imaginibus operam ludunt. Hinc singula cujusvis sortis remedia indigena vel exotica, simplicia vel composita, domestica vel

(1) Quis non mirabitur quamdam ipsiusmet HIPPOCRATIS mixturam ad phthisim, quam ingrediuntur ruta, anethum, opium, farina tritici & hordei; vetus caseum lactis caprini, in aquâ & vino rubro austero? neminem esse reor qui hanc insulsam farraginem audeat experiri; non secùs ac portentosas formulas quibus turgent opera MORELLI, TENCKE, GARNERII, &c.

officinalia , pro variâ administratione & medici solertiâ , laudes & vituperia mereri confectarium manet.

Rerum naturalium , officinalium & magistralium tabulas , ut nil intactum relinquatur , excipiunt *commentaria* , quibus singula cujuscumque ordinis totidem articulis ad peculiare examen revocantur : utrorumque natura & vires sedulò referantur ; dosesque fortè accuratius quàm in cæteris libris componuntur : nec prætermittitur rectior adhibendi modus. Quibus ità dispositis , quæcumque ad rem medicamentariam pertinent legentibus nitidè occurrunt ; quod objectum , quantulumcumque à nemine , ni fallor , hætenùs excogitatum. Cæterùm , haud ab instituto alienum putavi librum integrum , mantissæ instar , adjicere *de rescariâ* , quæ nemine refragante haud parvi refert ad morborum , præsertim chronicorum , medelam. Nec vigente sanitate , si morbis præcavendis studeamus , posthabenda recta ciborum ratio , ut indefinenti humorum motu , & reciproca organorum actione , deperdita ad amussim resarciantur ; ac restituta ab utrarumque partium indole minime recedant.

Hæc est universæ *Praxeos Medica Synopsis* , cujus beneficio , in promptu habere queunt clinici quidquid confert tam ad extricandam morborum indolem , quàm ad congrua administranda præsidia : nec in alio versatur genuina medendi scientia ; quæ scilicèt eo collimat ut spontanea dirigantur naturæ conamina , & nil hâc reluctantè moveatur. Aliàs à præpostero medicaminum usu hæc emergit medicina spuria , quæ exitialis & calamitosa jure censetur ; etiamsi quandòque , vel fortuitò , benè cedere videatur. Equidem ubique occurrunt agyræ & empirici , quos non pudet extrà rationis sphæram prætervolare ; qui scilicèt Tiresiâ cæciores , pro oculatioribus haberi gestiunt ; nec dubitant violentiora sub splendidis titulis adhibere pharmaca , ut inquit , polychresta ; quibus ità movetur corpus & concutitur ; tantique , haud sine præsentis vitæ discrimine , concitantur impetus , ut nil ferè de priori œconomix animalis conditione

remaneat : hinc patet cur nonnunquàm accidat , ut hâc portentosâ medicatione retundatur morbi ferocia ; ejusque fomes , licèt altè reconditus , everratur. Sic omnia audentes , & experimenta per mortem agentes , quosvis obvios morbos , vel pertinacissimos , quorum characterem nequidem subolfaciebant , aggrediuntur circulatores ; nonnunquàm evincunt & temeritatis præmio fruuntur ; dummodò tamen sinant ægrorum vires ; qui aliàs , uti crebrò evenit , spe vanâ delusi ad libitinæ rationem ducuntur ; ni ab infelici medelâ desistere cogantur ineptissimi ardelliones. Hinc intelligitur , cur fiat ut quæ ad ægrorum solatium , lautissimâ suâ benignitate , paravit SUPREMUS RERUM CONDITOR , in horum perniciem à tot audacibus empiricis , qui veram medicinam ne quidem à limine salutarunt , vertantur ; & fabulerrima ars , quæ inter cætera numinis beneficia par fortè non habet , medentium errore cladem præ se ferat.



I N D E X

CAPITUM TOMI PRIMI.

LIBER PRIMUS

MORBOS INTERNOS RESPICIENS.

SECTIO PRIMA.

DE GENERALIBUS ET INCERTÆ SEDIS.

F EBRES ,	I	Defluxiones & affectus catarrha-	
Febris continua simplex ,	15	les ,	70
putrida ,	17	Cachexia ,	73
ardens ,	21	Scorbutus ,	76
maligna ,	24	Lues venerea ,	81
Pestis ,	33	Scrophule ,	88
Sudor anglicus ,	39	Arthritis ,	93
Febres intermittentes ,	41	Rheumatismus ,	98
Febris quotidiana ,	48	Hypochondriasis ,	103
tertiana ,	50	Hydrops ,	108
quartana ,	52	Stagnatio sanguinis & puris ,	113
remittens ,	54		
Plethora ,	55	Infarctus & skirrhus ,	115
Æstus morbosus ,	57	Tumores interni ,	120
Virium exolutio ,	59	Phlogosis interna ,	123
Sanguinis inopia ,	61	Purulentia interna ,	127
Fluxuum & eruptionum retro-		Gangrena interna ,	132
cessus ,	64	Insecta & corpora extranea ,	134
Dolores ,	66	Venena ,	137

SECTIO II.

DE MORBIS INTERNIS CAPITIS.

V ERTIGO ,	143	Incubus ,	163
Apoplexia ,	145	Melancholia ,	164
Affectus soporosi ,	152	Mania ,	167
Tremor ,	154	Phrenesis ,	169
Paralysis ,	156	Convulsiones ,	172
Mentis & memoriæ segnities ,	159	Epilepsia ,	177
Pervigilium ,	161		

SECTION III.

DE MORBIS INTERNIS PECTORIS.

R AUCEDO,	183	Vomica,	213
Tussis & catarrhus pectoris,	184	Empyema,	215
Catarrhus suffocans,	189	Hydrops pectoris & pericardii,	217
Inflammatiō pectoris,	191	Cordis palpitatio,	221
Peripneumonia notha,	198	Oppressio cardiaca,	223
Asthma & morbi cognati,	200	Syncope vel animi deliquium,	226
Suffocatio,	204	Singultus,	230
Hemoptysis,	207		
Phthisis,	209		

SECTION IV.

DE MORBIS INTERNIS ABDOMINIS.

P RAVA digestio,	232	Vermes,	283
Vomitus,	238	Colica hepatica,	287
cruentus,	241	Hepatitis,	290
Fames canina,	244	Icterus,	293
Molestia stomachi,	245	Nephritis,	296
Inflammatiō abdominis,	248	Lithiasis,	299
Ileus,	251	Mictus cruentus,	305
Cholera,	253	purulentus,	307
Diarrhœa,	255	Dysuria & stranguria,	309
Alvi fluxus cruentus,	258	Ischuria renalis & vesicaris,	311
Tenesmus,	264	Diabetes,	314
Alvus adstricta,	265	Mictio involuntaria,	316
Colicus dolor,	267	Catarrhus vesicæ,	317
Flatulentia & tympanites,	278	Hydrops abdominalis,	318

LIBER SECUNDUS

MORBOS EXTERNOS SPECTANS.

SECTION PRIMA.

DE GENERALIBUS ET INCERTÆ SEDIS.

O BESITAS,	327	Hæmorrhagia,	332
Atrophia,	329	Phlegmone & abscessus,	335

INDEX CAPITUM.

xxij

<i>Ulcus & fistula</i> ,	338	<i>Sarcoma, verruca & cornua</i> ,	360
<i>Bubo</i> ,	342	<i>Animalium morsus & punctura</i> ,	
<i>Carbunculus vel anthrax</i> ,	344		362
<i>Furunculus & affines</i> ,	346	<i>Tarantismus</i> ,	366
<i>Œdema & emphyzema</i> ,	348	<i>Hydrophobia</i> ,	367
<i>Skirrhus & cancer</i> ,	350	<i>Contusio & vulnus</i> ,	371
<i>Aneurisma & varices</i> ,	354	<i>Ambustio</i> ,	375
<i>Tumores cystici</i> ,	358	<i>Gangrana externa</i> ,	378

SECTIO II.

DE MORBIS EXTERNIS CAPITIS.

C EPHALALGIA,	381	<i>Morbi oculorum</i> ,	393
<i>Insolatio</i> ,	384	<i>narium</i> ,	404
<i>Capitis contusio</i> ,	386	<i>aurium</i> ,	409
<i>Parotis</i> ,	388	<i>oris</i> ,	413
<i>Bronchocele</i> ,	390	<i>Deglutitio læsa</i> ,	420
<i>Gutta rosacea</i> ,	391	<i>Angina</i> ,	423

SECTIO III.

DE MORBIS TRUNCI ET ARTUUM.

P LEURITIS <i>notha</i> ,	429	<i>Morbi genitalium</i> ,	438
<i>Lumborum morbi</i> ,	430	<i>ani</i> ,	451
<i>Ventris intumescencia</i> ,	432	<i>artuum</i> ,	458
<i>Hernia & affines</i> ,	433	<i>ossium</i> ,	470

SECTIO IV.

DE MORBIS CUTANEIS.

S UDORIS <i>vitia</i> ,	476	<i>Impetigo</i> ,	487
<i>Phthiriasis</i> ,	478	<i>Lepra</i> ,	488
<i>Cutis macula & efflorescentia</i> ,		<i>Erysipelas</i> ,	491
	479	<i>Rubor scarlatinus</i> ,	493
<i>Herpes & pruritus</i> ,	482	<i>Morbilli</i> ,	494
<i>Scabies</i> ,	485	<i>Variola</i> ,	497

LIBER TERTIUS

MORBOS SEQUIORIS SEXUS ET INFANTUM COLLIGENS.

SECTIO PRIMA.

DE MORBIS VIRGINUM ET MULIERUM.

H YSTERIS,	503	<i>Morbi prænantium,</i>	519
<i>Pica & malacia,</i>	519	<i>puerperarum,</i>	527
<i>Chlorosis, vel febris alba virgi-</i>		<i>mammarum,</i>	533
<i>num,</i>	510	<i>genitalium,</i>	536
<i>Morbi à catameniis,</i>	511	<i>Graviditas notha,</i>	545
<i>Sterilitas,</i>	518		

SECTIO II.

DE MORBIS INFANTUM.

G ENERALIA,	550	<i>Ventris segnities,</i>	571
<i>Colostratio,</i>	555	<i>Vermes,</i>	572
<i>Febris,</i>	556	<i>Tumor, & inflatio abdominis,</i>	574
<i>Variolæ & morbilli,</i>	557	<i>Herniæ, & umbilici prominen-</i>	575
<i>Atrophia,</i>	558	<i>tia,</i>	575
<i>Hydrops & tumor aqueus spi-</i>		<i>Calculus,</i>	576
<i>nalis,</i>	559	<i>Ani prolapsus, & hæmorrhoides,</i>	577
<i>Icterus,</i>	560	<i>Aphthæ,</i>	580
<i>Lues venerea,</i>	562	<i>Dentitio,</i>	581
<i>Scorbutus,</i>	563	<i>Hydrocephalos,</i>	583
<i>Scrophulæ,</i>	564	<i>Rhachitis,</i>	584
<i>Tussis,</i>	565	<i>Morbus coxaris,</i>	586
<i>Anhelitus & suffocatio,</i>	567	<i>Morbi cutanei,</i>	589
<i>Vomitus,</i>	568		
<i>Tormina,</i>	569		
<i>Alvi fluxus,</i>	570		



PRAXEOS MEDICÆ PARS PRIMA.



LIBER PRIMUS.

MORBOS INTERNOS RESPICIENS.



SECTIO PRIMÆ.

DE GENERALIBUS, VEL INCERTÆ SEDIS.



FEBRES.

IN CIMMERIIS latet tenebris genuina febris indoles ; nec fortè dilucidiùs patent ejus differentiæ ; quidquid de hâc re in medium adduxerint nonnulli prioris notæ Authores ; inter innumeros sciolos qui de eodem argumento scripturierunt ; quorum plerique suis opinionibus physiologicis addicti, aliorumve vestigia prementes, sua scripta meris hypothesibus & commentis, vel intempestivâ eruditione contaminarunt ; adeo ut certa ab incertis, atque utilia à futilibus, in hâcce verborum luxurie, extricare

FEBRES.

arduum sit. Hinc plures haud infimi subsellii dubitarunt num satiùs foret cœptis abstinere, ac novis observationibus inhærere, è quibus benè perspectis & collatis sanior emergeret doctrina. Solertioribus lampada tradimus; & ea duntaxat quæ è praxi 30 annorum collegimus candidè, & absque magno verborum ambitu aperiemus.

Ut igitur à familiarioribus exordium capiamus; quatuor tantummodo, dùm ægrotis noctu diuque crebrò assidebamus, nobis innotuerunt febrium essentialium continuarum species; *continua* nempe *simplex*, à nonnullis continens vocitata; eo quod exacerbationis expers in eodem quasi statu perstet; quod cum grano salis accipiendum. De ejus stadio nil certi statuere licet: haud ultrà tamen quatuordecim dies protelatur; ni intempestivâ medelâ ejus subvertatur decursus. *Continua putrida*, quæ exacerbationibus conspicuis, gravioribusque symptomatibus stipatur; atque à quâdam sanguinis & humorum dyscrasiâ, ad putredinem vergente, pendere videtur: unde fit ut rarò desinat, ni præviâ quâcumque evacuatione, quâ sanguis & humores à pravis succis liberantur: imò & hæcce spontanea, vel critica purgatio febris putridæ characterem exhibet. *Ardens* quæ siti intensâ, & interaneorum æstu, ab aliis ritè distinguitur. Ac demùm *maligna* cujus symptomata atrociora cerebri & nervorum læsionem produnt; & sub hoc conspectu longè ab aliis distat; quidquid in contrarium adduxit HUXHAMUS qui putridam & malignam pro uno, eodemque morbo habebat: hanc postremam esse diuturniorem, & ut plurimum epidemicam, contagiosam, vel pestilentialem nemo nescit.

Rarò tamen certis & constantibus se produnt indiciis prædictæ febres: nunc enim placidè sua percurrunt tempora; aliàs majorem tyrannidem exercent; adeò ut finitimæ censerî debeant hæ diversæ species: cur fit ut sæpiùs ab invicem vix discrepare videantur. Hinc minimè mirari subit, si plures probæ fidei Scriptores, agmen ducente BOERHAAVIO, in eâ fuerint sententiâ quascumque febres varium duntaxat gradum unius & ejusdem morbi exhibere: nec huic opinioni adversatur febrium epidemicarum observatio, quæ inter eandem cœli & anni constitutionem sub diverso conspectu se præbent, vel variorum morborum typum mentiuntur: cur fit ut incauti, affinitate decepti, in errorem sæpiùs lethiferum præcipites ruant. Nec latet cognatas esse continuas & intermittentes, tam ratione exacerbationum & paroxysmorum quæ statis fermè temporibus invadunt; quàm respectu accessionis, periodi & criseos: perindè continuæ intermittentium naturam sæpiùs induunt; dùm intermittentes in continuas accessunt. Nihilominus quidquid sit de earum affinitate, indicatum ordinem inter illas recensendas sectabimur, ut infrà dicenda dilucidiora pateant.

Nec minoribus difficultatibus premitur conspectus febrium symptomaticarum, quæ dissimilem curationem expostulantes, ritè distingui debent ab essentialibus, quas fovet prava sanguinis diathesis. Equidem ab alio morbo sobolescunt *febres symptomaticæ*; & hinc dicuntur erysipelaceæ, inflammatoriæ, dysentericæ, catarrhales, rheumaticæ, arthriticæ, lacteæ,

lochiales, cachecticae, scorbuticae, &c. in propatulum sanè quidem veniunt febres quæ variolas, morbillos, ruborem scarlatinum, erysipelas, inflammationem, dysenteriam, catarrhos, rheumatismum, arthritidem, lactis genesim, suppressionem lochiorum; ac postremò dolores, contusiones, vulnera, ambustiones, &c. concomitantur. Sed in occultis plerumque latent quæ à plethorâ, cachexiâ, bile depravatâ, scorbuto, lue venereâ, scrophulis, affectibus hystericeis & hypochondriacis, cruoris æstu, ingluvie, pravis succis & vermibus in tubo intestinali nidulantibus, obstructionibus; purulentiâ & gangrænâ internis, stagnationibus, suppressis evacuationibus, eruptionum recessu, lacte devio, viribus exhaustis, animi pathematibus, insolatione, &c. ortum ducunt; de quibus suo loco. Sed hæc omnia hætenùs obscurè tradita manent posteros, qui in hæcce palæstrâ defūdare non gravabuntur.

Haud rectius collinearunt Authores qui à perspecto hoc vel illo symptomate futilia & absurda febrium nomina finxerunt. Vix enim intelligitur quid sibi velint per febres algidas, epialas, lipyrias, comatosas, phreneticas, siticulosas, sputatorias, oscitantes, singultuosas, famelicas, anhelosas, anxiosas, afodes, syncopales, vomitorias, torminales, cacatorias, sudatorias, ureticas, colliquativas, &c. Sed hisce deliramentis supersedemus, & ad abstrusiora devenimus; ad examen scilicet *febrium atypicarum*, quibus scilicet nullus est typus, quæ nec ad essentielles, nec ad symptomaticas referri queunt. Neminem enim practicum fugit dubiam esse invasionem non solum continuarum, sed etiam intermittentium; adedò ut earum natura sub primis temporibus atrâ caligine obruatur: febres præsertim mali moris, uti infrâ dicemus, in principio intricatissimæ sunt; nec quandoque in propatulo fiunt, nisi post elapsos 7. aut 12. primos dies: cur sit ut anxii hæreant, & iudicium cohibeant, qui extrâ vulgus sapiunt, ni publica constitutio epidemica in suppetias veniat. Nec hisce cancellis continentur curantium molestiæ; gravioribus enim premuntur sub examine febrium incongruo regimine, vel præposterâ curatione à proprio ingenio desciscientium, alienamque faciem induentium; quæ ideo *febres corruptæ* audiunt. Haud felicius postremò enodantur *febres complicatæ*; dùm scilicet sociantur continuæ & intermittentes, essentielles & symptomaticæ, acutæ & chronicae, &c. quibus anguntur etiam oculatiores; adedò ut sæpè sæpius Œdipo opus esset.

E prælibatis patet quàm difficile sit genuinam morborum indolem assequi: nec dilucidius innotescit eventus, quidquid de hæc re tradiderint HIPPOCRATES; & dein PROSPER ALPINUS, qui ejus doctrinam accuratiori methodo referavit; non secus ac innumeri veteres; & nonnulli recentiores, qui huicce vaticinandi arti promovendæ strenuam operam navarunt. Sed unum duntaxat colligere licet è tot inexhaustis laboribus, quod scilicet incertæ sint prædictiones; & ideo cautè sit ominandum: hoc est præclarum HIPPOCRATIS effatum, qui post maturiores cogitationes propria scripta quasi damnavit, candidæ fidei scriptor. Nonnulla tamen certiora

FEBRES.

circà instituendam in febribus *prognosim*, tum è veterum recentiorumque monumentis, tum è propriis nostris observationibus eruere licet, quæ breviter, ac distinctis articulis in medium proferre, haud abs re nostrâ fore putavimus.

Facies, ut à partibus superioribus exordium capiamus, medentium examini primò subjicitur: ex hâc enim bene perspectâ, varia mortis & salutis depromi queunt indicia, quæ sic se habent. Signorum exitialium classem subit *facies*, ut inquirunt, *Hippocratica*; quam produnt nares acutæ, oculi concavi, tempora collapsa, cutis sicca & plumbea, &c. Insuper vultus rubore inassueto perfusus, carotidum validior pulsatio, oculi flammei & torvi; ac demùm obtutus fixus & incertus, hæmorrhagiam vel delirium prænuntiant. Lux adversa (extrà variolas & morbillos); visûs hebetudo vel amissio, *oculi* immoti, caliginosi, inter dormiendum semi clausi & convulsi, infaustum ominantur eventum: è *lacrymis* etiam spontaneis, dum cætera in pejus ruunt, mortis auguria desumuntur. *Genarum* rubor, in acutis, exacerbationis est prodromus; aliàs pulmonum labem denuntiat; præsertim si narium alæ singulis inspirationibus moveantur. Vultus subtumidus in morbis acutis nil mali portendit, præter diuturnitatem. Eruptiones pruriginosæ, alteriusve sortis, circà labia & nares proximum & salutarem febris exitum spondent.

Nec minùs observatu digna conspiciuntur *in ore*; equidem haud levem metum incutit *sitis* intensa & clamosa, vel planè deficiens in acutis; sed ejus subitanea cessatio, in febribus ardentibus summum terrorem, variis cladibus confirmatum, injicit. Tremor *labiorum*, aphthæ lividæ & nigrae, ac difficilis deglutitio, inter prava symptomata numerantur. Idem esto judicium de *linguâ* siccâ, scabrâ, quasi ambustâ; vel fœdâ crustâ obductâ. Innocuus est *ptyalismus*; imò & salutaris censetur in variolis, nonnullisque febribus epidemicis. Nil certi statuere licet de *stridore dentium*, etiam extrà horrorem & rigorem febrium, ni priùs inquiratur, num vigente fanitate ægrotantibus inter dormiendum sit familiaris.

Nemo nescit, ut incœpta de *capite* prosequamur, cephalalgias acerbissimas, insomnia contumaciora, delirium, affectus comatosos, insultus convulsivos, & stuporem partium pro signis insalubribus & exitialibus haberi. Ubi *delirium* in somnolentiam facessit; imminet interitus: si *convulsiones* majora sanguinis profluvia excipiant; cogitandum de exequiis. *Hæmorrhagia narium* caput quandoque sublevat; aliàs innocua in plerisque cenferi debet, dummodò certis cancellis contineatur, ultrà quos sanè periculosa est alea. De *aurium tinnitu* parùm curant Practici; nec *surditatem*, inter vulgatiore febrium mali moris symptomata numerandam, magis expavent; præsertim si decresciente morbo contingat. Mentis demùm habitûs habenda est ratio; faciliùs enim evadere segnes & impavidos, quàm ingenio præstantiores & meticulosos, nemo it inficias: à terrore sanè quidem & pavore exsurgit morborum ilias: quid mirum si præsens ægritudo hâc causâ exasperetur. Stupendum mentis perturbationum effec-

tum exhibet *canities*, à mortis formidine paucis horis orta, quàm pluries sub hac rerum conditione accidisse, testantur historiae. Hinc pater quanti sit momenti, ut omnem mœrorem excutiant decumbentes; nec infimum in hoc versatur curantium munus.

Ritè perspectis quæ capiti congruunt, ad pectus deveniendum. Itaque vox deficiens & tremula, spirandi difficultas, stertor & singultus exitum minantur: nec minus imminet periculum ab anxietatibus circa præcordia, quæ agros in quovis situ excruciant. Haud tamen malè ominandum de hâc pectoris angustia, quæ criseos vel cujusdam eruptionis cutaneæ est prænuntia. Ad pectus etiam pertinet pulsus, Praxeos, ut inquit, cynosura, è quo ritè explorato innotescit genuinus cordis status; eruiturque febris & virium ratio, quam maximi esse momenti inter vaticinandum, nemini haud obvium. In propatulum venit pulsus frequens & tardus; nec later quid hinc sit inferendum; dummodò habeatur ratio ætatis & corporis altitudinis: scitur pulsus frequentior esse sub infantili ætate; sed haud omnibus notum tardior, cæteris paribus, explorari in proceribus, vel hominibus altioris staturæ. Nec captum humanum superant cætera pulsum discrimina, si certis cancellis contineantur. Pulsus igitur medio modo se habens inter plenum & vacuum, vehementem & languidum, durum & mollem; haud levem sanitatis recuperandæ spem parit: de ictuum æqualitate, proportionem & ordine, idem esto iudicium. Pulsus è contrà parvus & contractus, inæqualis & inordinatus, durus & celer, cujus gradum vix assequi licet, morbum graviorum & contumaciorum indicat. Intermittens in morbis acutis, saburram primarum viarum sæpiùs indicat: sub juvenili ætate, & statu, uti viderur, sano, mortem proximam plerumque denuntiat. Si debilior sit & intermittens, atque explorantis tactum fugiat, lipothymiâ frequentius recurrente, ad ultimum fatum properat æger. Arteriæ spasmo quodam correptæ, vel extrà solitum rhythmum vibrantes, nil boni præfagiunt. Pulsus demùm qui sanum mentitur, vel ad naturalem proximè accedere videtur, sævientibus gravioribus symptomatibus, funestum eventum minatur. Huc etiam pertinent *exacerbationes*, quæ nullo ordine vel alternis diebus recurrentes, nil mali præ se ferunt: sed pertimescentur quotidianæ vel ingeminatæ. Ubi verò quartâ duntaxat die exsurgunt, diuturnum morbum denuntiant: quod sanè quidem prodit affinitatem, quæ, uti supra notavimus, inter continuas & intermittentes occurrit. Insuper alia, inter explorandum pulsum, observanda veniunt; nempe insolitus tendinum subsultus, qui signum morbi luctuosi audit: tunc temporis etiam patent cutis ariditas, æstus vel frigus, è quibus pro re nata, vel aliorum signorum syndrome varia auguria desumuntur. Insolitus demùm manuum tremor, & incongrua horum motio, pro symptomatibus letho-finitimis habentur.

Plura adhuc, ut in orbitam redeamus, eruuntur signa prognostica è ritè observato imò ventre; cujus inflatio in febribus familiaris, vel intumescencia sub costarum limbum magis conspicua nil mali portendit. Si verò ultra

FEBRES.

modum exurgat hæc abdominis prominentia & dolore acerbissimo stipe-
tur ; ad ultimam rerum lineam ut plurimum ducit. *Vomitus* , ineunte
morbo , salubris audit : nec metuendum sub aliis morbi temporibus si foràs
eliminentur materies viscidæ vel biliosæ : aliàs periculosus censetur ; præ-
cipuè incassum adhibitis emeticis & catharticis : imò si erumpat saburra
nigra & fœtida ; ad tibicines mittere licet. Nil hariolandum de *alvi fluxu* ,
qui nonnunquam succurrit capiti : haud periculi tamen expers est si naturæ
limites prætergrediatur. Insuper dejectiones involuntariæ ; plus æquo
ferosæ , spumosæ , adiposæ , lumbricis refertæ , cruentæ , nigrae & ultra
modum putridæ grave curantibus faceffunt negotium.

Quoad *uroscopiam* , de quâ accuratè differuit clar. REGA , nemo nescit
parciorem , vel *suppressam urinam* cum sapore vinoso , capitis gravitate ,
& sopore , apoplexiam minari ; nec minùs periculosam esse in acutis , post
incautam refrigerationem. *Lotium copiosius* , cum solamine , sub morbis
acutis , æque ac in nephresi & hydrope , morbi solutionem indicat ; cujus
insolitus proventus , cum pingui hypostasi , febrem abire denotat : multum ,
album & crassum , imminente abscessu , optimum censetur : de diabete
suo loco. *Urina fœtida & nigra* , cujusvis sit consistentiæ in acutis , vesicâ non
laborante , mortis est prænuntia : similis est ominis , cæteris malè se haben-
tibus , *odoris* planè *expers*. Neminem insuper latet urinam fœtidam eva-
dere ab asparago , allio & aniso ; atque odorem violæ contrahere à tere-
binthinâ. *Urina limpida* , vel tenuis , & *excolor* in acutis & chronicis , in
febris continuis & intermittentibus , præsertim si primò fuerit saturata ,
haud levem metum incutit : talis verò in cerebri affectibus. sinistri est
augurii.

Scitur quò sanguinem esse fervidiorem , eò *urinam* excerni *rubicundio-
rem* , acriorem & spissiore ; atque lateritiâ mingi sub febris inter-
mittentibus ; non secus ac in scorbuto , atrophîâ , hydrope , &c. *saturatè
rubra* inter febrem , cum linguâ humidâ & inappetentiâ , signum præbent
crudioris humoris in primis viis : si verò lingua sit arida , cum calore acri
totius corporis ; cave phlogosin viscerum. *Flammea* sub febris acutæ prin-
cipio , morbum brevem , sed dubii eventûs indicat. *Biliosa* in acutis pe-
riculosa censetur : fulva & tenuis , sub eadem conditione diutiùs perma-
nens , ominosa. *Saturatè flava* , ad nigredinem vergens , in apyrexîâ , ob-
structum hepar prodit. *Rubicunda* non confidens , cum surditate , delirium
minatur ; præsertim sub morbo regio. *Cruenta* in pleuritide & variolis ,
lethalis. *Rubra* , cum tali subsidentiâ post judicationem , recidivam peri-
culosior minatur. Si *fulva* post solutum à sudore morbum , subsiden-
tiam albam deponat ; febris recurrere solet , quinto die judicanda. Rubi-
cunda cum florulentîâ æruginosâ mortem minatur. Si subrubra antè septi-
mum diem prodeat , faustum exitum pollicetur. Subrubra & crassa cum
tali sedimento , diuturnos morbos , sed sanabiles , indicat. Crassa & ru-
bra , paulatim fusa , periculosa censetur. *Mictus cruentus* spontaneus à re-
nibus ortum trahit ; à vesicâ verò , si comitem habeat stranguriam & dolo-

rem in hypogastrio. Postremò scire expedit urinas excerni coloratiores à vehementiori exercitatione, vigiliis, animi exandescentiâ, cibis calidioribus, & inediâ: quamdam etiam à betâ rubedinem contrahere solent.

FEBRES.

Urina viridis & nigra, in acutis, gangrænæ est prodromus. *Viridis* cum sedimento crasso nonnunquam excernitur in anxietatibus, alvi perturbationibus, doloribus iliatis, &c. notante BOERHAAVIO. Tenuis, livida, vel viridescens, cachexiam & mensium suppressionem patefacit. *Viridis* in pueritiâ spasmus minatur. *Atrovirescens*, morbum regium, febris expertem, sæpiùs solvit. *Porracea* cum subsidentiâ nigrâ & furfuraceâ, lethalis. Scitur prætereà quod à rheo, croco & curcumâ flavæ mingantur urinae, & ab oleribus virides. *Urina nigra & crassa*, si excipias lienosos, qui pluries intrâ annum talem fundere solent, nil boni portendit; in acutis verò, vesicâ inculpatâ, mortis est nuntia. *Enaorema* nigrum sub febre phrenitidem minatur: nubecula nigra minùs est pertimescenda: sed tale sedimentum periculosius judicatur. Lotium nigrum in quartanâ, morbi solutionem sæpiùs indicat. Nigrum sub febre malignâ inter crîsim, nonnunquam proficuum; non secus ac in solutione delirii melancholici. *Urinae* nigræ instar atramenti in morbis chronicis, sæpiùs profunt; præsertim lienosis & melancholicis. Atro-rubræ cum obscuro sedimento funestum phthisicis & hydropicis designant eventum. Nemo insuper nescit quod à pulpâ cassiæ ad colorem atrum vergant urinae; eundemque effectum præstant salsamenta. Postremò scitur lotium nigricare, vel à cruore vel à bile; sub primo casu atro-rubrum observatur; sub altero, atro-viride occurrit. Notare expedit urinas fuscas è longinquo adspicienti subnigras videri, & pro talibus ab incautis haberi.

Urina crassa & turbida, sub febre, quæ nec igne, nec quiete clarescit, est ominosa. *Turbida & confusa*, vel urinae jumentorum similis, in febribus, morbos capitis minatur; aliàs vertiginem & affectum spasmodicum prodit. *Turbida non alba*, sed alterius coloris, in febribus pestilentialibus, pessima. *Crassa & turbida*, post tenuem & limpidam, in febribus, morbi declinationem significat. *Turbida & limosa*, sub chronicis, ominosa censetur. *Turbida, crassa & albicans* in sanis, cruditatum primarum viarum suspicionem movet. *Lactea* in pueris vermium præsentiam indicat; in adultis verò renum & vesicæ calculum. *Urina crassa & alba*, cum subsidentiâ, in morbis articularibus, bona; & ineunte arthritide insultum brevioris fore indicat. *Urinam turbidam, cum sedimento*, post nephresim excerni nemo nescit. Qui phrenitide & convulsionibus laborant, urinam albam & turbatam mingunt, vel antea minxerunt. Quid cogitandum de *lotio purulento*, singulis obvium fit. Tenax & glutinosum, cum ramentis furfuraceis & squamosis, vesicæ desquamationem, vel exoriationem, indicat. *Urina pinguis* observatur in omnibus ferè febribus: extrâ febrem verò præsagit scorbutum vel calculos. *Urina cum cuticulâ pingui, & sedimento rubro*, incipiente macie, atrophiam & phthisim minatur. Scitur insuper urinam mulierum esse crassiusculam; puerorum verò albio-

FEBRES.

rem, crassiorem, copiosiorique sedimento, quàm ætate florentium. In senectute, alba & tenuis cum paucâ hypostasi redditur. Neminem postremò latet urinas turbulentas mingi à turionibus asparagi; & crassiores evadere ab otio, somno longiori, crapulâ, cibis frigidis, &c.

Sedimentum album, leve & æquale, in acutis, optimum censetur; vel crisin indicat. Urina, in acutis, haud subsidens, morbi longitudinem, abscessum, aliudve infortunium minatur. Lotium, quod post intermittentium paroxysmum non turbatur, pessimum audit; præcipuè si intempestiva præscribantur febrifuga; notante REGA. Si *nubecula rubra* quarto die conspiciatur, morbus septimo judicari solet. Urina sabulum rubrum deponens extrâ febrem, diathesim calculosam, arthriticam, vel scorbuticam indicat. *Subsidentia* biliosa, ineunte morbo, acutum declarat. Nubeculæ albæ, bonæ; nigræ verò, malæ: idem intelligendum de enæoremate. Sedimentum nigrum, vel viride, in acutis, pessimum. Subsidentia flocciformis, prodit catarrhos: farinacea morbum longum minatur: laminosa & surfuracea mali est ominis. Subsidentia mucosa & tenax, cum dysuriâ, vesicæ calculum, vel ulcus indicat: scire tamen expedit quod nonnunquam talis observetur, illasis vesicæ & renibus. Urina gravidarum deponit sedimentum instar lanæ carptæ. Fallax postremò est *uroscopia* ni habeatur ratio sexûs, temperamenti, ætatis, vitæ generis; omnium, uno verbo, circumstantiarum per quas urinæ immutari solent. Ex hinc intelligitur summis difficultatibus premi hanc doctrinam, quam ne per somnium quidem norunt tot balatrones quos stultè adit infima & inepta plebecula; qui è solâ urinæ inspectione quamvis morbum, partemque læsam dignoscere gloriantur; & hâc fraudulentâ vaticinatione rudem popellum decipiunt.

Instituitur etiam prognosis à benè perspecto *corporis habitu*: à sudore nimirum placidè vel confertim erumpente, ut plurimum, judicantur febres: si deficiat in intermittentibus, pertinaciores fiunt. Nonnunquam in symptomatum agmine recipiuntur sudores: si enim febris accessionem præcesserint, mali sunt augurii: copiosiores per morbi decursum, continui, glutinosi, & fœtidi nusquam periculo vacant: quò magis odore, consistentiâ, & colore ab statu naturali recedunt, eò magis metuuntur. A sudoribus postremò frigidis, præsertim faciei, fatum accelerari nemo nescit. Perperam deterrent exanthemata, pustulæ, aliæque *eruptiones cutaneæ*; cum euphoriâ sæpiùs accersant: *oris pustula*, uti jam innuimus, inter varias febres, sanitati præludunt: imò & à petechiis sub febribus malignis haud majus impendet periculum. *Horror & rigor* ineuntibus paroxysmis vel exacerbationibus febrilibus, nil mali portendunt: sed si plus æquo producantur; morbi diuturnitatem indicant: ubi verò inordinate recurrunt; delitescens purulentia suspicionem movent; vel delirium, aliudve gravissimum symptoma minantur. De *frigore* vel horripilatione ab affectibus hysterico-hypochondriacis; ab atrophia, aut quovis alio diuturno morbo, de quibus alibi, nil addimus.

Nunc proximum est ut de *doloribus* qui universum corporis habitum respiciunt

respiciunt breviter agamus. Itaque dolor febrilis cuivis parti hærens, dummodo à viscerum labe non sobolescat, nullius periculi est particeps: sed si incusentur infarctus, phlogosis, purulentia & gangræna; res est periculosa alea. Ubi dolor, cæteris haud meliùs se habentibus, subito evanescit; brevi ad superos migrabunt decumbentes. Sed ritè à febrilibus distinguendi veniunt dolores ab aliâ causâ oriundi, qui sæpiùs ab æstu febrili exasperantur: id genus sunt syphilidei, scorbutici, rheumatici, &c. qui sub morbis acutis plus terroris quàm periculi inferre solent. Hæc sunt *phenomena febrilia* è quibus salutis vel mortis auguria desumuntur: sed altâ mente tenendum semper ferè incerta esse de morbis acutis judicia; cur cautè fata canere expedit. Notandum postremò ergà tradita febrium phenomèna, plura occurrere quæ non impediunt quominùs solita ineatur medendi via; ac nonnulla luctuosa peculiarem medelam efflagitare; dùm cætera merè critica omnem curam respuunt. Sed hos salubres & spontaneos naturæ motus, è quibus curationis spes elucescit, à genuinis symptomatibus, quæ funeris metum incutiant, ritè distinguere arduum & difficile; ni accurata teneatur crìsum doctrina, quam ideo hisce generalibus subnectere haud incongruum fore judicavimus.

FEBRES.

Extra omnem dubii aleam positum manet varia esse inter enumerata phenomèna febrilia, inexercitatis summum terrorem sæpiùs incutientia, quæ *crìsim* constituunt; vel proximè futuram designant. Adeò ut asserere minimè dubitemus nullam ferè occurrere febrem acutam quæ quâcumque crìsi, plus minusve obvia haud judicetur; quidquid obganniant nonnulli inter recentiores, qui omnis cunctationis nescii, incongruâ & intempestivâ medicatione omnia subvertere solent. Juxtà tamen medicinæ procerum mentem, vel potius secundum ipsiusmet naturæ normam, nil aliud est *crìsis* quàm spontaneus laticis morboſi exitus, quam ut plurimum præit molestissimus, sed salutaris humorum impetus; vel quædam in œconomiâ animali perturbatio, cui avertendæ omnem, maximo ægrotantium damno, operam impendunt incauti; vel novis opinionibus obcæcati: cur minimè mirari subit si plures decumbentes, tam hoc naturæ molimine, quàm ab intempestivis remediis in vitæ discrimen trahantur, imò & ad interitum ruant. Multiplici enim & accuratiori observatione comprobatum manet, febres evacuatione, per quædam corporis emunctoria, vel quavis eruptione, solvi: hunc scilicet effectum præstant sputa, hæmorrhagiæ, vomitus, alvi fluxus; lotium copiosius, vel variis substantiis refertum; abscessus, bubones, anthraces, efflorescentiæ, vel pustulæ cutaneæ, &c. quibus rapitur jam subacta materia febrilis; cujus expulsionem omnia compescuntur symptomata. Ubi verò nec absoluta, nec legitima se proferunt hæc naturæ molimina, vel ab statuto tempore deflectunt; morbus protrahitur, vel exasperatur. Quæ, ut dilucidius innotescant; doctrinam dierum criticorum, in quibus scilicet crìses contingere solent, referare necessarium duximus.

Dies critici censentur juxtà præclarum scientiæ medicæ arbitrum HIPPO-
Tome I. B

FEBRES.

CRATEM, quartus ab invasione, septimus, undecimus, decimus quartus, decimus septimus, & vigesimus primus. Hinc obvium fit hasce periodos, diebus $3 \frac{1}{2}$ strictè contineri; quod sanè minimè congruit, uti nonnulli autumarunt, cum superstitiosis PYTHAGORICIS numeris. Nemo nescit varios febricitantes, etiam obstante præposterâ curatione, quarto, septimo, undecimo, decimo quarto, &c. die, vel sanitati restitui, vel in orci fauces præcipites dari. Hinc patet (nam unicuique suum tribuere expedit) accuratum esse HIPPOCRATIS computum, quod ad quadragesimum secundum diem; vel ad terminum duodecim periodorum, $3 \frac{1}{2}$ diebus constantium, protrahere licet. Scitur præterea tertianas legitimas rarò ultrà septimum paroxysmum, vel circuitum, protelari: febres inflammatorias quarto vel septimo die, ut plurimum, judicari: peripneumoniam quarto die resolutione expediri; vel in suppuratum abire, morbo ad septimum, decimum quartum, imò ad vigesimum unum, producto; febrem scarlatinam, morbillosam, & erysipelaceam numero septenario, ut plurimum, submitti: variolas à tertio ad quartum diem è primo insultu conspicuas fieri; & circa septimum pus confici. Innumerae demùm prostant historiae febrium epidemicarum, sub quibus sudor, cum euphoriâ, septimo die erumpebat. Sed in immensum cresceret pagina, si omnia harumce periodorum exempla hùc attexerem: unum duntaxat de epilepsiâ puerorum addere liceat; cujus diuturnitas, juxtà nonnullos, penès quos sit fides, septem mensibus, vel totidem annis continetur; ut de catameniis, quorum curriculum quinque septeniis concluditur, sileamus. Hæ sunt sancitæ à naturâ leges, juxtà quas febres sua percurrere solent tempora; quas tamen haud semper assequi, vel animadvertere licet, ob dubiam vel obscuram nonnullarum febrium invasionem, quâ sanè totus struitur calculus.

Exhinc colligitur, præstituto quodam tempore, materiam febrilem, ab organorum vitalium actione, subigi; & in hac actione versari laticis morborum, in recessu viscerum delitescens, *coctionem*, à veteribus ultrà modum fortè decantatam; & à neotericis inconsultò posthabitam. Haud me latet quidpiam incongrui præ se ferre coctionis vocabulum; sed aris signati, vel publicè recepti instar, illud accipiendum putamus. Notare expedit quod indicata crismum tempora haud semper immutabilibus legibus componantur: cœlum enim, anni tempestates, ætas, temperamentum, peculiaris medendi methodus, victûs ratio, aliaque innumera, naturæ vires, ad hoc opus congruas imminuere vel intendere; & idèò crismum retardare vel accelerare valent. Nonnunquam etiam evenit ut modo planè inconspicuo perficiatur, vel omninò deficiat; quod tamen non impedit quominus solertiores practici ad dies criticos attendant; ne intempestivo remedio omnia fusdeque vertant: nec ab hocce metu planè immunes sunt, quoad septimum diem, qui contrà crismum doctrinam acrius insurgunt. Accuratissimam de hac re historiam videre est in Lexico Gallico, quod Encyclopiam vocant; Authore clarissimo BORDEU, Medico Parisiensi celeberrimo.

Hinc obvium quanti sit momenti apprimè nosse hæc saluberrima naturæ conamina, ad ejectionem materiæ morbosæ; ne intempestivis remediis perturbentur expectatissimæ œconomix animalis vires; omnisque præpediatur excretio; vel alia, reluctante naturâ, moveatur: jure enim fertur naturam esse optimam morborum medicatricem. Sic ophthalmiæ contumacissimæ quovis spontaneo alvi profluvio sæpiùs solvuntur: nec aliâ ratione fugantur febres graviores ab erumpente abscessu, in quâvis habitûs corporis parte; ac pus confectum in capite, hepate, mesenterio, aliove viscere haud rarò evacuat per renes, vel sentinam intestinalein. Ideò intelligitur quomodò à præposterâ curâ protrahatur morbus, vel lethalis evadat; cùm devius latex morbosus, denegato proprio incerniculo, in hanc vel illam partem irruat, & lethalem labem ipsi impertiatur: nec rarum esse hoc infortunium norunt practici, docentque cadaverum sectiones. Non ex alio fonte prodit *metastasis*, tùm in morbis acutis, tùm in chronicis; vel translatio materiæ morbificæ ex unâ parte in aliam; quæ scilicet oberrans intrâ vasa omnibus partibus minatur. Sic à sufflamminatâ dysenteriâ colligitur materia purulenta, vel saniosa, in variis corporis recessibus: sic post variolas, morbillos, variasque febres mali moris, progerminatur abscessus in hâc vel illâ parte: sic materia arthritica varias partes peragrat; & ab artubus secedens in sinum massæ sanguineæ refunditur, visceraque sæpiùs impetit: sic in nonnullis surditas & dolor ischiadicus, nephritis & podagra, &c. alternatim invadunt: sic à retrò pulsus morbis cutaneis, pulmones, aliave viscera afficiuntur: sic à cohibitis catameniis, hæmorrhoidibus & fluore albo variæ sobolescunt ægritudines, priore morbo longè periculosiores: sic ab exsiccato veteri ulcere excandescit febris, & labefactantur viscera: sic erysipelas, relictâ priori sede, in aliam partem subrepat: sic demùm lac sanguini remixtum, ab ejus accubitu in hanc vel illam partem varias strages edit, &c.

E præfatis conjicere datur salubriorem sanè esse simplicem medendi methodum; quam in cauto usu venæ sectionum, emetico-cathartorum, diluentium, refrigerantium, temperantium, antiputridorum, diaphoreticorum, & sedantium, de quibus mox sigillatim agemus, versari nemo nescit. Sed delectu opus est; cùm haud semper tutò peragatur curatio ope prædictorum remediorum; quin potiùs noxam inferre soleant; si invitâ vel reluctante naturâ suos effectus edant: nemo enim, nisi rudis & inexpertus, non novit stupendas œconomix animalis vires, quibus vias sibi novas invenit, & cudit ad materiæ morbosæ exterminationem. Hinc rectè, quo natura vergit, inquit HIPPOCRATES, eò ducere oportet: hâc enim posthabitâ, nullis vel commentitiis innititur fundamentis remediorum administratio. Nil fortè salubres naturæ conatus magis juvat, quàm *dieta* tenuissima: imò & mera aqua affatim hausta, dummodo haud suâ mole stomachum laceffat; vel à sex ad duodecim libras intrâ nychthemeri spatium propinata; missis cæteris potionibus, per tres, quatuorve dies à primâ invasione, orgasmo febrili egregiè occurrit; pluresque ob-

FEBRES.

sequiosos, vel huicce regimini aqueo se faciliè præstantes, exhaustis morbi viribus, ab orci faucibus eripuit. Scitur monachum quemdam melitensem aquam frigidissimam pro omni potu & alimoniâ, per triginta dies, & ultrâ, in quolibet fermè morbo acuto, temerario sanè ausu, sed felici successu, exhibuisse. Nec impedit hæc copiosæ aquæ ingurgitatio, vel quisve largissimus potus, quominus tundatur vena, si sanguis nimio impetu feratur, vel plus æquo turgeant vasa; atque emetico-catharricis depleantur primæ viæ, si pravis fordibus inquinentur: multiplici experientiâ edocti, asserere minimè dubitamus sæpius hoc solo tenuissimo regimine, aliàs rationi consono, febrem planè fugari; vel futura symptomata, quibus per decursum exasperatur, leniri: ad summam, morbum quemvis acutum curatu faciliorem evadere. Huic methodo, in omnibus ferè morbis saluberrimæ, duntaxat officere queunt vires exhaustæ, debilis infantium habitus, & extremum senium; sub quibus circumstantiis haud opportunus sanè foret hic curandi ritus; ni ab alimentis cujuscumque fortis, vigente febre, & ore manente sordido, vires potiùs morbi quàm corporis intenderentur: innoxios esse sub hac rerum conditione fructus optimæ notæ, crudos vel coctos, asserit clarissimus TISSOT: sed hanc opinionem, pace tanti viri, cum grano salis accipiendam esse censemus. Nemo postremò nescit quid sit concedendum consuetudini, tempestati, regioni & arati.

Etiamsi *sanguinis missio*, quâ præcaveri queunt infarctus sanguinei, inter primaria præsidia, in febrium curatione adhibenda, jure recensetur; haud omnibus tamen congruit. Ne minimam quidem opem sæpius præstat; imò & pluries inconsultò repetita summam perniciem inferre valet. Haud dubitare licet quin febres inflammatoriæ cerrum venæ sectionum numerum efflagitent: nonnullæ tamen occurrunt febrium hujusce indolis constitutiones epidemicæ, sub quibus, norantibus HUXHAMO, aliisque celebrioribus practicis qui illas confidentiùs forte adhibebant, nocentissimæ deprehenduntur; præsertim ergà biliosos, qui numerosas venæ sectiones agrè ferunt: nec licet in febribus cujuscumque generis, venam tundere per totum morbi stadium: sanguinis enim missio post tertium vel quartum à primo insultu diem, rarò nisi in casu urgentiori proficua censi debet; quod altâ mente teneant clinici, ad venæ sectionem procliviores, si agrorum saluti consulant & nobilem aucupentur famam. His circà venæ sectionem traditis addere juvat quod parùm aut nihil inferre liceat ex autopsiâ sanguinis nunc fluidi, nunc compacti; cùm quotidie à perspicacioribus observetur quod sanguis guttatim diffluens crustam densiorem efformat, quàm is qui in arcum profilit; & sanguinem ejusdem sectionis, sæpius exhibere in primâ patellâ coagulum densissimum, & in aliâ nullum; vel vice versâ. Pro comperto enim manet apud exercitiores medicos sanguinem phlebotomiâ eductum variam nancisci consistentiam, non solùm à jactu valido, vel stillicidio; sed etiam à majori vel minori inflicto vulnere; à vasis, in quod recipitur, planitie vel altitudine; ab aeris diverso coloris & humiditatis gradu; à loco in quo

asservatur; ab agitatione vel quiete, aliisque consimilibus, quæ stupendam mutationem in sanguine, à quovis corporis vase misso, efficiunt.

FEBRES.

Ultrà omne dubium positum esse videtur, pace nonnullorum illustrium secus sentientium quod *emetico-cathartica*, sub primâ morbi invasione, incunctanter exhibita, dum primis viis prospicere expedit, præsentaneam opem ferant; posthabitâ enim hâc evacuatione in morbis acutis, febris singulis venæ sectionibus incandescit; eo quod depleta vasa liberiores ingressum concedunt pravis digestionum reliquiis; quod benè notandum. Sed aliter se res habet per morbi curriculum, intrâ quod summâ cautelâ præscribi debent hæc evacuantia, nisi absolutâ coctione; dùm scilicet organa obsequiosiora evadunt, vel pristinam flexilitatem recuperant: concocta enim medicari oportet, non cruda, inquit HIPPOCRATES; & lege cautum est medicâ, ne quid moliatur clinicus ante præviam hanc humorum spontaneam elaborationem: non solum enim inanem operam ludunt, qui, præmaturè exhibitis *catharticis*, alvum ducere tentant; sed sæpissimè inconditos motus cient, vel turbas concitant, vix paregoricis compescendas. Hæc est antiquorum medicinæ procerum doctrina, quotidianâ praxi confirmata, quam posthabere haud citrà piaculum licet: hanc sanè sectantur solertiores & præjudiciis liberi; dùm novis opinionibus obcæcati, & nil in febribus præter putriditatem circumsonantes, in contrarias, maximo ægrotantium damno, ruunt partes. Nec hanc controversiam dirimendam esse censemus, ni prius probè perpendantur præcipuæ horumce medicaminum vires: equidem in duplicem scopum institui catharsim, rationi & experientiæ consentaneum videtur; primò scilicet ut pravi succi, materies putridæ, vel ipsamet bilis depravata, in stomacho & tubo intestinali nidulantia, foras eliminantur; ne per vasa lactea ad sanguinem appellentia, ipsi labem inferant, & febrem periculosiorem vel contumaciorem excitent; sub hoc conspectu extemporanea illius saburræ evacuatio salutaris, & necessaria censetur; & ideo ineunte morbo, nullâ morâ interpositâ opportunam esse suprâ innuimus: secundò, ut latex morbosus sanguini & humoribus confusus ad sentinam intestinalem amanderetur: sed hæc materia prius organorum actione est subigenda, ut propriis compedibus solvatur, & ad purgationem sequacior evadat; vel facilius subtrahatur: aliàs hunc laticem elabi minimè sinunt vasa; huncque coercent organa, constrictione spasmodicâ correpta & catharticorum stimulo obsurdescentia. Hinc minimè mirum, si incassum hanc excretionem moliantur clinici; priusquam concoctionis notæ se prodant; atque intempestivâ hac medelâ graviora exoriantur symptomata, quæ summum incautis facessunt negotium.

Neminem latet, ut propositum persequamur, latissimum esse in febribus *diluentium* & *temperantium* usum. Scitur hæc præsidia, in singulis morbi temporibus proficua, efferum sanguinis motum compescere, humores impactos fluxiliores reddere, flacciditatem organis conciliare, & secretionibus favere. Nullum est dubium quin *inedia* ab omnibus me-

FEBRES.

dicis, tùm veteribus, tùm recentioribus jure celebrata, plus æquo minimè protracta, graviores morbos, acutos vel chronicos, superaverit. *Aqua simplicissima*, uti jam innuimus, decantata munia faustè obire valet; atque ptisanas, ni fallor, apozemata & juscula, ad hunc usum parata, antecellit; cùm prædicta medicamina ab ipsâmet aquâ, uti suprà inculcavimus, præcipuas vires mutuuntur. Haud desunt tamen qui aquam, ut inquit, crudam respuunt; cur sit ut, in hoc casu, nonnullis herbis temperantibus aliquantulum imprægnetur; vel ipsi addantur saccharum, mel, succus limonum, syrupus, &c. Cremor panis tanquam alimentum tenuissimum, cæteris præstat; præsertim si juscula è carnibus parata averfentur ægri. Pluris etiam habentur in foro medico *refrigerantia* & *anti-putrida* quæ humorum ferociam coercent; impetum sanguinis frangunt, huncque laticem à putredine vindicant, ac præcipuè medentur internis ignibus quibus sæpiùs exardescunt viscera: *diaphoretica*, cum cognatis, egregiam opem præstare queunt, si febris ad sudorem vergat; aliàs cautè cum illis mercari expedit; & cavendum ne illa suadeat hypothesis. Nec tutiùs adhibentur *narcotica*, ni solerti manu tractentur: etenim stuporem organis vitalibus inducendo, nonnunquam impediunt quominùs subigatur materia morbosa, & ad exitum sollicitetur: sæpiùs etiam, horum medicaminum actione, à propriâ indole desciscunt morbi & larvatam speciem præ se ferunt, quâ decipiuntur inexercitati. Scitur insuper quod hisce remediis in furorem sæpiùs rapiuntur phrenetici, vel sopore lethifero corripuntur.

Hæc sunt *medicamina generalia*, quibus febres profligari solent: pro votis succedunt, si parcâ & cautâ manu exhibeantur; & mandata fatorum rescindere liceat; exitialia verò evadunt, ubi majori copiâ, & indiscriminatim ab imperitis præbentur: nullus enim ambigendi locus quin truculentiora morborum symptomata ut plurimum artis, naturam præposterè subvertentis, opus censeretur debeant. Idque potissimum, monente SYDENHAMO, incumbit medico ut torpentes naturæ conatus excitet, vividiores moderetur, effrænès coerceat, inordinatos dirigat; ac demùm debitè procedentes intempestivis remediis nequaquam turbet. *Simpliciora* cæteris palmam præripiunt: nec immeritò exulant nostrâ ætate illæ formulæ tot ingredientibus, quorum pleraque mutuo colluctantur, infulsè refertæ, & ad meram ostentationem concinnatæ; quæ scilicet imperitiam potiùs quàm doctrinam sapiunt. Quid mirum? si salubrioribus naturæ viribus officiant tot incondita, & intempestiva remedia, invicem contrarientia; & ipsomet morbo magis reformidanda, tot clades & funera post se trahant. Væ sanè miseris ægris qui ineptis polypharmacis se committunt, & quidquid delirant, plectuntur. HOFFMANNUS, innumerique primi subsellii scriptores hancce luctuosam praxim claris verbis damnarunt; & hujusce inauspicatæ methodi Authores atrocioribus fortè conviciis lacerarunt. HIPPOCRATES nil fermè præter victum tenue in morbis acutis novit. ETTMULLERUS potui merè aqueo, primis morbi temporibus,

inhærebat. BAGLIVIVS contrà medicaminum multiplicem usum & farra-
ginem acriter insurgit ; atque asserere minimè dubitavit vehementiora
symptomata , potiùs ad pravam medelam , quàm ad morbum esse refe-
renda. Nemo nescit haud aliter sensisse clariss. REDI , COCCHI , aliosque
primi subseclii medicos. Prædictis animadversionibus consonant SANCTORII
observationes grassante peste. Nec refragatur famigeratiss. STAHL , qui
multiplici experienciâ edoctus , nil ad senectutem properans , præter tan-
tillum falis sibi commissis ægrotantibus præscribebat. Clariss. demùm
LOBB , ut cæterorum monita & testimonia missa faciamus , in hanc trala-
titiam medendi methodum plus æquo fortè sævit ; cùm nec venæsectio-
nibus , nec emeticis & catharticis parcat. E quibus colligitur atrâ & imper-
viâ caligine obrui naturæ morbosæ phænomena ; & ideò arduum & confra-
gosum esse Medicinæ iter. Hæ sunt artis angustiae , quas minimè suspicantur
tot imperiti , qui genuinam medicinam ne quidem à limine salutarunt , &
pecorum ritu aliorum vestigia calcant : sed minimè latent artis procures ,
qui ætatem inter ægros consumpserunt : nec fortè aliud est laboris &
doctrinæ præmium.

FEBRIS CONTINUA SIMPLEX.

SYN O C H A non putrida , ephamera , continens , &c. etiam vocitatur.
Pro febre putridâ mitioris indolis , vel infini gradûs à quibusdam
perperam habetur ; cùm nullam putredinis , nec coctionis notam præ se
ferat ; etiamsi peculiari quâdam crisi , vel spontaneâ evacuatione sæpiùs
judicari videatur. *Ephamera* , vel diaria nuncupatur ob ejus stadium
nychthemeri spatium plerumque coercitum , & rariùs ad plures dies pro-
telatum. Continentis titulum sibi vindicat apud Veteres , eo quod illam
remissionis & exacerbationis expertem esse existimarunt ; quod si ad
accuratius examen revocetur , haud semper veritati consonum deprehen-
ditur. Postremò *courbature* apud vulgus audit ; & à Gallo-Provincialibus
vocatur *mourfoundamen* ; quod nomen vernaculum morbi ingenium &
causam feliciter exprimere videtur. Sub primâ invasione vix discrepat à
cæteris febribus *continua simplex* ; imò & ab illis tùm distingui posse planè
negat HIPPOCRATES. In contrarium pugnat GALENUS ; asserens hancce
febrem haud dubiis signis se prodere. Si hancce litem inter tantos viros
componere fas esset ; utrumque à veri tramite aberrasse facile credidissim.
Nullus sanè ambigendi locus quin ægrè quandoque innotescat hæc febris
species , aliàs vulgatissima , & rarò ultrà triduum perennans ; sed sæpiùs
certis indiciis in propatulum venit , uti à sequenti adumbratione patebit.

A quodam frigore exordium ut plurimum capit ; uti solemne est in om-
nibus fermè febribus acutis : frigus nonnunquam tremulum , excipit
æstus , in adolescentibus & vegetis quandoque intensissimus : pulsus plenus

FEBRIS
CONTINUA
SIMPLEX.

& æqualis exploratur. De capitis, lumborum, alteriusve partis dolore ut plurimum conqueruntur ægri. Sæpius erumpunt efflorescentiæ pustulosæ: ac demum sudore vel hæmorrhagiâ solvitur continua simplex. Insuper uno quasi tenore sua percurrit tempora: nullis exacerbationibus, pravioribusque symptomatibus exasperatur: nec ultra aliquot dies protrahitur, raro ad septimum accedens. His addere juvat quod cæterarum febrium prodromi; ciborum scilicet fastidium, lassitudines spontaneæ, &c. hîc planè deficient: hæc est LOMMII observatio, nostrâ praxi pluries comprobata. Nil certi reverâ arguit hujusce febris stadium; cum planè consimiles occurrant febrium intermittantium paroxysmi; sed diversa est utrarumque solutio, cum febris ephemeræ finis, teste GALENO, brevis & expedita sit, nullasque reliquias post se trahat; dum intermittantium paroxysmi sensim delentur, etiam ultra absolutum sudorem. Attamen minimè reticendum obscuriora nonnunquam esse hæc indicia; cum, præter intermittentes, nonnullæ occurrant febres symptomaticæ, quæ ephemeræ speciem præ se ferunt; adeo ut, deficientibus signis pathognomonicis, anxii hæreant etiam exercitationes; ni morbi indolem ab antecedentibus, vel à genuinâ decumbentium constitutione expiscantur. Ad ephemeræ indolem proximè accedit febris lactea puerperarum, de quâ suo loco.


Animi pathemata, vigiliæ ultra modum protractæ, labor improbus, insolatio, æris inclementia, ingluvies, inedia insolita, &c. inter vulgatiore hujusce febris causas jure numerantur. *Ad ephemeram proni* censentur adolescentes, vegetiores, lautè victitantes, atque ab omni curâ soluti. Notavit FORESTUS, sacris addictos, ab Antistitibus ad Monachos, ad continuam simplicem esse proniores; quæ periculo vacat, ni præposterâ medelâ à proprio ingenio deflectat: illud enim altâ mente tenere debent inexercitati, rarissimè hîc profutura esse artis præsidia; quin potius haud levem noxam sæpius inferant: quod apprimè norunt experti, qui soli congruo victûs regimini committere solent curationis negotium; quo scilicet brevi extrâ aleam ponuntur ægri.

E quibus facile colligitur præcipuam hujusce febris *medelam* meris naturæ viribus absolvi, futilemque esse omnem opem medicam; ni vehementior sanguinis æstus, vel pravæ sordes in primis viis nidulantes, aliaque accidentia, nonnulla efflagitent præsidia; inter quæ primatum ducunt venæsectio & emesis; quæ etiam à nonnullis de naturâ morbi dubitantibus, haud inconsultò in usum trahuntur. Sed ut plurimum solâ diætâ, vel diluentibus & temperantibus, res tota peragitur: nec despicienda miriora diaphoretica; si incusetur præpedita perspiratio; proficua etiam censentur refrigerantia & nitrosa, dummodò nulla sit ad sudorem propensio. Alvus interea servanda est libera; catharticis tamen minimè sollicitanda, nisi post febris decessum; nec semper hæc purgatione opus est. Hisce cancellis minimè continentur, qui scientiæ medicæ elementa desidiose delibarunt animo; quin potius de gravi morbo susurrantes, credulis adstantibus terrorem incutiant: ideoque sanguinem liberali manu ducunt; & medicamina cu-

jusvis

jussus fortis, vel validiora præposterè adhibent; quibus scilicet nonnulli fatiscunt ægri; dum alii, solis œconomiae animalis viribus morbum, intempestivamque curationem superant: nec inexpectato morbi exitu, perturbari sinunt pseudo-Medici; quin potius perfriictâ fronte hunc felicem eventum suae egregiae medendi methodo adscribere minime dubitent.

FEBRIS
CONTINUA
SIMPLEX.



FEBRIS CONTINUA PUTRIDA.

QUID sit intelligendum per *Synocham putridam*, ex intricatissimis veterum scriptis vix definire licet. Nec dilucidius innotescit ejus profapia, quam in quadam humorum, ad alkalescentiam vergentium, labe versari conjicitur. Quidquid sit de abditissimâ illâ causâ, extrâ omne dubium positum esse videtur, quod exhinc emergat latex quidam morbosus, naturae viribus subigendus; ut per varia corporis emunctoria foràs eliminetur; atque hæce qualiscumque defœcatio, vel purgatio genuinum hujusce febris characterem exhibet; quam ideò *febrem depuratoriam* nominavit SYDENHAMUS, de praxi medicâ benè sane quidem meritis, qui accuratam variarum constitutionum epidemicarum historiam, paululum fortè contractam, litteris consignavit.

Rem acu se tetigisse putant, qui, *putriditatis* vocabulo decepti, veram in hac febre humorum corruptelam excogitarunt; huic opinioni nonnihil faventibus sudore, dejectionibus, & ipsomet lotio, vigente morbo, graveolentibus. Sed tales excretiones simillimum odorem spirantes observare licet in aliis febribus diversae indolis; ubi ne minima quidem exurgit humorum in vasis putrescentium suspicio. Nonnulli, quibus minime arridet hæc hypothesis, quamdam purulentiam in ipsismet sanguinis receptaculis commenti sunt; hisce ducti rationibus, quod urinæ & sputa puris naturam sæpiùs redoleant; quod à vero planè alienum putamus. Nec feliciùs collineant, qui dissolutionem sanguinis putridam suspicantur; hisce rationum momentis, quod sanguis sæpiùs in hocce morbo sua claustra transiliat, & hæmorrhagias crebrò recurrentes promoveat: præterquam quod phlebotomiâ eductus hic latex brevi putrescere videatur. Nec minùs allucinantur qui totam putredinem intrâ tubum intestinale recondi contendunt; quod, ut ipsis visum fuit, à teterissimo fæcum alvinarum odore abundè probatur.

Sed hæc sunt mera *commenta*; cum nusquam concipere liceat quomodò hoc morbo correpti, cum notis evidentioribus illius præconceptæ sanguinis corruptionis, non solum ad mortem minime properent, sed etiam in integram sanitatem brevi restituantur: quandoquidem omnem salutis spem excludere debeat vera sanguinis & humorum putredo; hæud sanè discrepans

FEBRIS
CONTINUA
PUTRIDA.

à mixti interitu ; quod nec naturæ viribus , nec arte medicâ restitui potest. Insuper nemo nescit plures vegetiori sanitate gaudentes , insignem , vel omnibus invisum , fœtorem ore & corporis habitu spargere. Adde quod , si ad vegetabilium familiam attendamus , innumera occurrant quæ pessimum odorem exhalant , salvo naturali & integro contextu : quid impedit igitur quominus viventium latices solutionis vel corruptelæ expertes , huncce characterem induant. Nec desunt denique Scriptores qui gangrænam , hanc febris speciem concomitari solitam , pro certissimo latentis putredinis indicio habent ; quod experientiæ planè adversatur : scitur enim nihil efficacius corporum putredinem arcere quàm ipsummet frigus ; quo tamen intensissimo , gangrænâ , vel ipsâmet sideratione , quasi illicò corripuntur animalia ; quod phænomenum cunctis obvium funditus , ni fallor , hanc evertit opinionem.

Notare tamen juvat , annuente clariss. VAN-SWIETEN , quod sanguis & humores hâc febre labefactati , ubi vitali calore orbantur , non secus ac partes sideratæ , ad putredinem sint procliviores : nemo enim nescit sanguinem & urinas in carillis & matulis sibi relicta brevi putrescere : nec mirum si BALLONIUS se in cruore educto , pluribus elapsis horis , vermium myriades observasse asseruerit. Hanc humorum alkalescentiam etiam produnt corporis æstus , oris graveolentia , sudoris , urinæ & sæcum alvinarum fœtor. His addere lubet cadavera hoc morbo denatorum celerius putrefieri ; adeò ut horum conspectum vix ferre valeant , qui illis perscrutandis incumbunt. Sed nil hinc inferendum ; cùm hæc omnia notanda occurrant in variis subjectis , ne minimo quidem prævio putredinis indicio. Hinc patet quanti sit momenti congrua nomina morbis imponere ; cùm ex illo fonte innumeri prodeant errores , ipsismet agrotantibus lugendi : etenim scitur illud *putredinis* vocabulum jampridem fuisse imperitorum confugium , qui quamvis obviam reconditæ indolis febrem , meram esse putridam haud cunctantes pronuntiant.

Huicce febris speciei *obnoxii* censentur sanguineâ temperie præditi , & opiparè viventes ; qui scilicet ambiunt alios amyctide vincere : sæpius etiam invadit intempestivo post pastum labori incumbentes ; nec parcit vino & veneri indulgentibus. Aliarum febrium instar , à rigore & horrore orditur *continua putrida* : *primam invasionem* plerumque concomitantur nausea & vomitus , cum interaneorum dolore ; cephalalgia , somnolentia vel delirium. Hæc excipit æstus intensior , qui dein paululùm mitescit ; iterùm postea invalescens. Pulsus sub primis temporibus æqualis & mollis exploratur : durus subindè & inæqualis , cum tendinum subsultu , & cute siccâ , deprehenditur. Exacerbatio singulis diebus exsurgit ; & alternis recrudescit. Cæterum periodis , 7 vel $3\frac{1}{2}$ diebus constantibus , ut plurimum submittitur ; adeò ut decimo quarto , vel vigesimo primo judicari soleat.

Præter dolorem capitis gravativum , ultramodum sæpius , per morbi tractum sævientem , alia exsurgunt procellosa *symptomata* ; sopor nempe ,

vel vigiliæ pertinacissimæ, delirium, convulsiones & hæmorrhagiæ exi-
riales. Dolores non solum in lumbis & artubus, uti solemne est in cæteris
febris, defiguntur; sed etiam pectori & hypochondrio dextro insident.
Nil addimus de illis qui à viscerum infarctu & phlogosi oriuntur, vel à
quovis morbo chronico sobolescentes, ex unâ parte in alteram serpunt,
& ideò febriles exasperant. Spirandi difficultate & febre in dies ingravescen-
tibus, & in eâdem ratione versantibus, ægotantium res in deterius ruunt.
Interim vires obruuntur, subsiliunt tendines, & majorem exercent sævitiam
anxietates. Os grave olens fœdâ amurcâ inquinatur: lingua primùm muco
obducta, tandem scabra & nigricans evadit. De anginâ spuria nonnulli
conqueruntur, vel quodam ptyalismo corripuntur. Lotium nunc flam-
meum, nunc limpidum; vel turbidum conspicitur; sed absque sedimento
antè decimum quartum diem. Turgent hypochondria & totum tumet ab-
domen: ultramodum denique fœtent dejectiones alvinæ; vel lumbricis
scatent. Ex hac signorum, vel symptomatum syndrome abundè patet fe-
brem, de quâ in præsentiarum, luctuosam evadere; vel ad malignam
proximè accedere: cur minime mirum si plures utramque habuerint pro
uno eodemque morbo: attamen putrida, si à suâ indole minime deflectat,
citiùs percurrit sua tempora, quæ rarò ad trigessimum vel quadragesimum
diem protelantur. Insuper quævis cerebri & nervorum læsio per totum
malignæ curriculum producitur; dùm temporaria & fugax in putridâ
observatur. Depuratio demùm in hac postremâ familiaris, planè desideratur
in malignâ.

Hic plurimum confert doctrina *Crisium*, ni intempestivis remediis fa-
tiscant œconomiae animalis vires; & omnia fusdeque se habeant. Salu-
briores & vulgatiores excretiones fiunt per renes & cutis spiracula: sed
harum nonnunquam vices explet hæmorrhagia. Urina circà decimum
quartum diem turbida, quiescens materiam quamdam faculentam elabi
sinit; & omnia tunc temporis mitescunt symptomata. Sudores critici eo-
dem ferme tempore, vel paulò tardiùs erumpunt: si citiùs prodeant, nil
boni spondent, ni fœtidi euphoriam quamdam accersant. Expectatissima
sunt sanguinis profluvia, dummodò tamen certis cancellis coerceantur.
Nonnunquam etiam sputis viscidis, crassis & albicantibus hac perficitur
depuratio; sed allucinantur qui illà purulenta esse autumant; quos etiam
haud absimilis naturæ esse urinarum fæces albicantes falsò sibi persuasisse
suprà notavimus. Quod ad vomitum attinet, rarò conducere, etiam criseos
tempore, quotidiana testatur experientia: magis confert imminente crisi,
diarrhœa; nec nociva censetur circà morbi declinationem: aliàs pro omi-
noso habetur fusior alvus, præsertim ferofus. Nil demùm certi statui potest
de sanguine venæ sectione educto, nunc fluido, nunc compacto; de erup-
tionibus erysipelaceis, pustulosis, &c.

E cadaveribus hoc morbo peremptorum, cultro anatomico subjectis,
pauca notanda eruuntur. Nonnullas tamen læsiones inter rimanda viscera
conspicere licet; id genus sunt vasa sanguine atro & faculento turgida;

FEBRIS
CONTINUA
PUTRIDA.

concretiones, ut inquirunt, *polyposæ* in cordis thalamis, quæ inter mortis luctamina efformari videntur; infarctus & phlogoses diversi gradûs; ac demùm putredines, tum purulentæ, tum gangrænosæ, pulmones, hepar, omentum, mesenterium, intestina, &c. deturpantes: quibus addere licet stagnationes ferofas, alteriufve sortis tam in capite quàm in pectore & abdomine. De vermibus etiam, nunc solitariis, nunc in intestinorum gyros confertim collectis, mentio subjicitur. Sed hæc extispicia enucleandæ febris putridæ naturæ imparia videntur, cùm mera exhibeant producta morbofa; vel tralatitias illas læsiones, omnibus fermè affectibus communes duntaxat prodant; ita ut genuina morbi, de quo in præsentiarum, causa perscrutantium oculis se subducatur.

Unâ aut alterâ venæ sectione, si nil obftet, inchoari solet hujusce febris *curatio*; ut declinentur scilicet infarctus phlogodei, qui grave sæpiùs clinicis facessunt negotium. Sed summam noxam inferunt numerosiores sanguinis detractiones, quibus vires organorum, ad morbi solutionem summè necessariae, labefactantur: quidquid in contrarium adducant qui genuinum morbi characterem ne quidem subolfaciunt. Summam, depletis vasis, opem præstat emeticum, quo everruntur pravae digestionum reliquiae, cum saburrâ biliosâ, vel quævis sordes in primis viis nidulantes; è quibus profapiam ducit alvi fluxus indomabilis; quo per integrum morbi tractum haud rarò conflictantur ægri, sæpiùsque divertuntur sudores critici, uti ex sexcentis observationibus constat. Nec minùs fortè pertimescenda nimia alvi adstrictio, cui enematribus congruis, vel mitioribus laxantibus, occurritur: genuina enim cathartica solitis peragendis muniis imparia censerì debent, ni organa stimulanda, obsequiosiora fiant, & humores morbidi, è tubi intestinalis parietibus eliciendi, præviâ coctione, ad purgationem sequaciores evadant; quod rarò, ut suprâ innuimus, ante decimum quartum diem contingit. Porrò summas laudes merentur diluentia, temperantia, refrigerantia, & nitrosa, quæ sanguinis impetum retundunt, alvumque sæpiùs subducere queunt: pluris habetur cremor tartari cujus repetitæ doses alvum etiam blandè solvunt. Nec minùs de prædicantur antiputrida acida, tum mineralia, tum vegetabilia; cùm nil fortè efficacius reperiatur ad præcavendam humorum alkalescentiam, quæ, abjectâ omni hypothefi, haud dubiis signis sub hocce morbo se prodit; & à commentitiâ putredine summè discrepat. Multis circâ finem morbi optimè cessit corticis peruviani usus; quo vires organorum, morbo fatifcentium, restitui valent. Nonnunquam etiam conducunt cardiaca & diaphoretica; ubi scilicet naturæ conamina subigendæ materiæ morbofæ imparia videntur. Summâ cautelâ in usum trahi debent narcotica, præsertim ante decimum quartum morbi diem, ne morbum quodam velamine obtegant: sed tutiùs exhibetur camphora, quæ, præter vim coercendi spirituum ferociam, sanguinem & humores à quâvis putredine vindicat. Si demùm symptomata à læso cerebro oriunda per morbi curriculum diutiùs protrahantur, vel ultramodum sæviant; capiti admoveri

queunt animalia viventia secta; vel in eundem scopum adhibentur pediluvia: quæ topica minimè sunt despicienda; cùm, experientiâ teste, plures fausto bearunt eventu: sed nil fortè caput citiùs subleuat quàm sinapismi & vesicatoria cruribus vel plantæ pedum imposita: eandem fermè opem præstant cucurbitulæ, quæ, nescio quo fato, ab usu ferè recesserunt.

FEBRIS
CONTINUA
PUTRIDA.



FEBRIS ARDENS.

CAUSUS audit apud veteres; ac nonnunquam etiam *Lipyria* vocatur: cætera nomina recensere futile & incongruum fore judicamus. Haud multis parasangis distat febris ardens à putridâ: facilè tamen distinguuntur prædicti morbi, vel contermini; si propria utriusque signa haud perfunctoriè perpendantur. Febris, de quâ in præsentiarum, præter graviora quibus stipatur symptomata, comitem habet æstum intensiorem, quo quasi extormentur interanea: prætereà morbus est acutior, vel celerius sua percurrit tempora; cùm circa septimum diem, imò & citiùs judicetur; ac rarò ad decimum quartum protrahatur. Sed notare expedit varias occurrere febres symptomáticas, biliosas nempè, inflammatorias, vulnerarias, &c. quæ ardentis faciem quadantenus referunt; quarum tamen alii sunt prænuntii; absimilis fit progressus, & planè diversum annotatur stadium; ut è sequenti febris ardentis adumbratione abundè patet.

Rigore & horrore, vel frigore tremulo adoritur hæc febris species: hunc statum excipit calor acris & mordax, præcipuè internus; cùm nonnunquam hoc vigente frigeat corporis ambitus: è quo symptomate emergit febris lipyria veterum. Pulsus primò durus & frequens, in dies inordinatus & debilis, cum defectu virium, observatur: exacerbationes quotidianæ diebus imparibus ingravescunt; atque ut plurimum prævio quodam frigore invadunt; adeò ut duplicis tertianæ typum præ se ferre videantur: imò & quamdam esse affinitatem inter utrumque morbum plures haud falsò suspicantur; cùm in nonnullis constitutionibus epidemicis, non nisi post aliquot præcessos intermittentes paroxysmos se proferat febris ardens. Intereà, ut in orbitam revertamus, urget sitis, nullis refrigerantibus compescenda; circa quam, notare expedit plures tantâ oris ariditate premi ut fluvium epotarent; qui tamen, accedente delirio, haud ampliùs sitiunt, licet aquam videant: os æstuans, amarore inficitur; arefcunt lingua & labia, quæ sensim nigredinem contrahunt, & variis fissuris deturpantur. Cephalalgia acerbissimâ torquentur ægri, vigiliis contumacissimis excruciantur; delirio, affectu comatoso, insultibus epilepticis, aliisve gravioribus symptomatibus affliguntur. Nonnulli bilem æruginosam evomunt vel infernè dejiciunt; ac tanto quandoque impetu per utramque viam prosilit bilis, ut ad ipsum cholera morbum accedat hæc evacuatio:

FEBRIS
ARDENS.

imò & acrior ac excandescens bilis, caustici instar, œsophagum & podicem quasi exurit. Hinc perspicuum fit, quanti sit momenti ut hicce latex foràs eliminetur; ne suâ morâ, vel appulsu ad sanguinem, summam inferat perniciem. Ex hoc fonte prodire videntur cardialgiæ & anxietates nulâ arte leniendæ; lipothymia luctuosæ, singultus contumaciores; phlogoses exitiales, tum ventriculi & tubi intestinalis, tum hepatis, pulmonis, &c. In quibusdam urget spirandi difficultas; renitent hypochondria, vel totum abdomen in tumorem molestissimum attollitur. Doloribus erraticis internis & externis nonnulli conflictantur. E vehementiori impetu, quo sanguis suos volvit vortices, hæmorrhagiæ emergunt exitiales, vel crebrò recurrentes. Urinæ flammeæ & lateritiæ conspiciuntur; vel quales ab ictericis minguntur. Cutis, in febribus malignis livida; subflava hîc deprehenditur: sudore nullum levamen conferente plerumque madet; atque variis efflorescentiis, & exanthematibus signatur.

Animi pathemata improba, vigiliæ diutiùs protractæ, labores immodici, edulia acria, vel acuti saporis; vinum & aquæ ardentes, &c. hunc morbum progignere solent; suum symbolum conferentibus atate vegetiore, temperamento cholericò, cœli constitutione & anni tempestate. In genuinam malignam quandoque facessere videtur febris ardens; vel maligna primis diebus ardentis faciem præ se fert. Vomitus & alvi fluxus circa quartum aut septimum diem erumpentes, salubriores & critici censentur. In ancipiti versatur iudicium de urinis, rarò aliàs sedimentum deponentibus: nec certiora eventûs indicia à sudoribus & hæmorrhagiis desumuntur. Convulsiones demùm, delirium, lethargus, impedita deglutitio, parotides, sputa cruenta, anxietates, singultus, urina nigricans, vel sanguine tincta; sudor faciei, &c. inter exitialia symptomata, nemine refragante, numerantur. Plures hoc morbo correpti ad ultimum fatum properant; tertio scilicet vel quarto die; rariùs verò septimo rapiuntur. Si ulteriùs proteletur morbus, haud levis elucescit salutis spes; præsertim in adolescentibus qui hujusce morbi sævitiam faciliùs ferunt, quàm senes. Nec semper res est in vado post absolutum hujusce febris stadium; cum nonnunquam facessat in genuinam intermittentem, agrè fugandam; vel in febrem lentam, quæ ægrorum ærumnas protrahit; illosque ad ultimam rerum lineam sæpiùs ducit.


Plura, ut ad *extispicia* deveniamus, exempto cranio, notanda occurrunt in capite; nempe phlogoses, purulentia & putredines, tum in ipsâ cerebri substantiâ, tum in ejus involucris: plexus choroides vascula diffracta & varicosa exhibet: obvia demùm fit serosa, vel saniosa colluvies tam in anfractibus, quàm in aliis cerebri recessibus. Eandem fermè labem recondit pectus: conspiciuntur nimirum stagnationes ichorosæ & purulentæ non solum in utrâque pectoris camerâ; sed etiam in ipsomet pericardio, quod cæteroquin diversimodè læditur: cernuntur pulmones livore affecti, tabidi, infarcti, maculis gangrenodeis conspersi, & partibus ambientibus accreti. Cor corrugatum & tabe quasi consumptum, pericardio

accretum & purulentum deprehenditur; ejus thalami & auriculæ sanguine fæculento, concreto, vel ut inquiunt, polypofo, replentur; hinc fit ut in immensam molem sæpiùs affurgat prædictum viscus. Patefacto abdomine, hepar purulentiâ & putredine cum notis gangrænosus contaminatum invenitur; interdum colore croceo intus & extus imbutum, ac mole amplissimum annotatur; adeò ut à fursum repulso diaphragmate, cavum pectoris angustius evadat: aliàs skirrhosum, durum, contractum, corrugatum, nigricans vel plumbeum, in conspectum venit; ut nil addam de hærentiis morbofis cum vicinioribus partibus. Patet vesicula, nunc exinanita, nunc bile porraceâ vel nigricante plus æquo turgens; & proximiores partes à transudante latice coinquinans; spurios demum lapides diversæ molis recondens. Eadem ferme vitia, sed rariora, in renibus aliisque visceribus observantur; non secus ac fœdissimæ stagnationes. Vasa postremò in venam portæ coeuntia, sanguine picis instar nigerrimo turgida, passim oculis subjiciuntur.

Conducit *venæ sectio* primo invasionis die, si nil obstat: sed haud ultra progrediendum; ni urgeant phlogosis & plethora; cum repetitæ sanguinis missiones, rectè notante clarissimo VAN-SWIETEN, vehementiora symptomata, vel ipsasmet convulsiones, uti mihi observasse contigit, etiam nondum sufflaminato sanguinis per phlebotomiam rivulo, accersere soleant. Ab illis igitur abstinere expedit, quidquid in contrarium adducant nonnulli clinici, qui ad adstantium nutum se componere solent; & nusquam, dummodò ægrorum fidem sibi concilient, ab infausto rerum exitu deterrentur. Hic obiter notandum, quod turpiter allucinentur, qui, sanguinis detractioe, spontaneorum & criticorum sanguinis profluviorum vices explere perperam sibi persuaferunt: cum centies in singulis morbis observatum fuerit magis proficere hæmorrhagiam quamcunque criticam, quàm numerosæ venæ sectiones: adde quod hæmorrhagia in hacce febris specie sit ut plurimum exitialis. Emetica, etsi magis proficua, non nisi summâ cautelâ exhiberi debent; mitioraque sunt eligenda, & copioso potu diluenda; aliàs ab hocce stimulo ulteriùs excandescit sanguis; solidaque ad contractiones spasmodicas proniora evadunt; ac uno verbo currenti calcar additur. Haud dissimili ratione, si ad bilem exuperantem evocandam purgatione opus sit; manna, cassia & tamarindi in fero lactis, vel jusculo pulli, ceteris catharticiis palmam præripiunt. Haud tutiùs usurpantur enemata stimulantia; quin potiùs solâ demulcentia cum lacte, butyro, oleo amygdalarum dulcium fero lactis, &c. parata, injicere liceat. Hypnotica, quæ primâ fronte congruere videntur, ob suavissimam animi lætitiâ quâ perfunduntur insomnes, hic angue pejus sunt fugienda. Idem esto judicium de cardiacis, etiam prostratis viribus, cum sub hoc casu minime deficient; sed duntaxat obruantur. Haud me fugit plures scripsisse se felici successu prædicta remedia exhibuisse: sed usu receptum, uti pluries inculcavi, ut semper cuicunque vel præpostera curationi faustum morbi exitum insulsè referant auram popularem captantes: nemo enim nescit plures ægros

 FEBRIS
ARDENS.

morbum & incongruam medendi methodum, solis naturæ viribus superare. Postremò pluris jure habentur, in hujusce febris curatione, diluentia, demulcentia, refrigerantia & acidula; quorum salutares effectus faciliè enodantur: nec exiguam laudem merentur nitrosa, quæ tanquam sedantia in subsidium opportunè vocantur. Serum lactis vel aqua pulli, quæ pro omni potu primis diebus præcipi solent, præsentaneam opem ferunt. Nec despicienda julapia acida, succus limonum aquâ temperatus, emulsiones, aliaque id genus sub æstuantibus humoribus summè proficua. Quoddam ultimò juvamen afferunt magnesia alba, aliaque absorbentia; quæ bilis in abdomine debacchantis efferos motus compescere queunt.



FEBRIS MALIGNA.

QUID sibi velint Authores per febrem malignam, vix eorum fusioribus scriptis patet: nec dilucidior est praxi incumbentium mens; cum pro nutu & arbitrio varias febres reconditæ indolis, dummodò gravioribus stipentur symptomatibus, hoc nomine insigniant: adeò ut hicce morbus pro mero problemate, extricatu difficillimo, haberi queat. Ab accurate tamen perspectis signis & symptomatibus, faciliè, ni fallor, innotescit hujusce morbi deterrimi genuina indoles. *Malignitatis* verbum, licet absurdum, admittere lubet, ne à tritâ viâ recedamus: sed absit ut, imperitorum more, huncce characterem impertiamur cuivis obvio morbo mali moris, vel insuetis & gravioribus symptomatibus stipato; aut præposterâ curatione degenerare; cum curandi ritus ab hâcce præconceptâ opinionè, maximo ægrotantium damno, ut plurimum eruatur: rectè enim notavit SYDENHAMUS magis fortè exitiale fuisse mortalibus commentitum *malignitatis* vocabulum, quàm pulvis pyrii inventum. Juxtà tamen antiquorum mentem has duntaxat febres sic vocitare licet, in quibus naturæ vires obruuntur; adeò ut nec pulsûs velocitas, nec symptomatum vehementia, morbi pernicipiei consonent; quasi clancularias vitæ strueret insidias: cur minime mirum si plures ægri, clinico omnis metûs experte, ad fatum properent. Nec tamen omnes hujusce sunt commatis febres malignæ; cum plures occurrant, quæ suam in proparulo exercent sævitiam; uti *febres castrenses*, vel *ungaricæ*; atque nonnullæ epidemicæ procellosæ; quæ scilicet se produnt æstu intensiori & validiori pulsu, variisque symptomatibus summum terrorem incurientibus. Eandem fermè faciem nonnunquam præ se ferre febrem ardentem jam suprà inculcavimus: cur minime mirari subit, si plures inexperti hanc pro illâ inconsultò habuerint. Sed absimilis est harumce febrium periodus; febris enim ardens sua citiùs percurrit tempora; ac ut plurimum intrâ septem dies continetur; dum maligna nusquam ante vigesimum primum solvitur, & plerumque ad quadragesimum & ultrâ protrahitur; cæterum epidemicè grassatur & per contagium

contagium propagatur hæc postrema ; à quâ , gradu duntaxat , discrepare videtur pestis ; cujus historiam dilucidioris methodi gratiâ mox seorsim trademus.

FEBRIS
MALIGNA.

Ultrâ omnem dubii controversiam positum esse videtur febrem malignam, quæ plerumque epidemicè grassatur, magnamque stragem edere solet, præcipuam *sedem* habere *in cerebro & nervis* ; quorum munia, hâc vigente, nusquam lucida perstant, nec sub alio conspectu à cæteris febribus ritè distingui potest. Haud tamen, ut verum fatear, generi nervoso parcunt aliæ febres ad certum gradum devectæ : sed læsiones exin oriundæ fugaces & temporariæ, vel merè symptomaticæ occurrunt ; dùm perstant per totum malignæ decursum. Hujus veritatis argumentum eruere licet ex ipsismet subjectis, quorum plerique mœrore, qui, uti nemo nescit, est maiorum ferax, conficiebantur ; ærumnis conflictabantur ; vel inopiâ aliisque angustiis premebantur, priusquàm in hunc morbum inciderint. Nec mirum si mente affectâ, vel lymphatâ, ad hancce febris speciem sint procliviores ; cùm neminem fermè lateat summam noxam corpori inferre cujuscumque fortis animi pathemata vehementiora ; & hinc oriri morbos truculentiores, ægrè præsidiiis medicis impugnandos. Narrant historici quemdam postero die patibulo affigendum, intrâ noctis spatium, ob ingentem terrorem, mortisque proximæ formidinem, canum factum fuisse ; quod sanè prodit stupendum mentis imperium in omnes partes ; cùm intrâ brevissimum tempus tantam mutationem concitet in parte siccâ, & sensationis experte. Innumera demùm prostant exempla, non solum morborum procellosiorum, sed etiam mortis subitanæ à terrore, mœrore & tristitiâ ; non secus ac à summâ animi lætitiâ. Alias tamen, ut in orbitam revertamur, *causas evidentes* recensere licet, nempe solutam vivendi normam ; ac præsertim immodicum carniû usum ; vel harum, non secus ac piscium, putrescentiam, quâ nihil virulentiùs excogitari potest ; acrem inquinatum nosocomiorum, carcerum & navium ; putrida paludum effluvia, &c. quibus diversimodè afficitur, vel in consensum trahitur systema nervosum : ut de febribus alteriùs notæ, intempestivâ & incongruâ medicatione ad malignitatis gradum evectis, quales haud ex se extitissent, sileamus.

Rarò derepentè *invadit* febris maligna : sed lassitudines spontaneæ, vel membrorum stupor ; dolor capitis gravativus ; insomnium, vel molestus & turbulentus somnus ; os inquinatum, cum linguâ muco obductâ & subalbicante ; nausæ & anxietates, frigoris & caloris vicissitudines, &c. sunt vulgarissimi hujusce febris prænuntii : imò & sic se res habet per plures dies ; rarò per hebdomadas ; dùm scilicet morbus delitescit ; vel dubiis obscurisque signis se prodit ; donec in propatulum veniat, & ægri decumbere cogantur. Tunc temporis horrore & rigore, uti solemne est in omnibus ferè febribus, plerique corripiuntur : hoc frigus tremulum excipit pulsus frequens, cùm calore mitiori ; adeò ut morbi pernicies adhuc lateat ; ni constitutio epidemica malignitatis suspicionem moveat. Nonnunquam tamen summum terrorem incutit prima invasio, quam graviora concomi-

**FEBRIS
MALIGNA.**

tantur symptomata, nempe lipothymia, affectus comatosi ab insultu apoplectico vix absimiles; convulsiones, cholera, & sævissimi interaneorum dolores, qui colicæ hepaticæ vel nephriticæ faciem præ se ferunt. In quibusdam epidemiis haud se profert febris maligna, nisi post varios febris intermittens vel remittens paroxysmos, nullo ordine recurrentes, vel prætermo- dum protensos. De aliis invadendi modis nil addimus; cum accurata horum enumeratio nostram potius historiam obscuraret, quàm elucidaret; uti patet ex scriptis eorum, qui hanc materiam penitus exhaustisse videntur.

Procedente morbo ulterius prosternuntur vires; sæviunt dolores acerbi & contundentes per universum corporis habitum. Caput deleterio afflatum nutat; ingruit cephalalgia immanis, cum molestâ carotidum pulsatione, capitis tremore & visûs hebetudine. Nonnulli sævissimo, in fundo orbitæ, dolore; aliove solitario per varias partes serpente plectuntur: oculi suo splendore destituti, lumen refugiunt. Facies livida, plumbeo & fædo colore inficitur: ac non rarò erumpit hæmorrhagia narium vix cohibenda. Interea mens obnubilatur, vel mortis formidine perturbatur. Insomnes ægri falsa rerum simulacra se objiciunt, & absurda deblaterant; imò & furore perciti compedibus sunt constringendi. Nonnulli in stuporem & lethargum incidunt; adeò ut verbis se expedire nequeant, & soluto morbo asserant se nil doloris per totum morbi decursum percepisse: alii tremore & convulsionibus corripuntur. Lingua primùm muco albescente obducta arefcit, & exasperatur; nigricans quasi adusta, hiulca & tremula conspicitur. Os sordidum fœtet; torrentur labia, à faucibus asperis impeditur deglutitio; referantur salivæ fontes; impeditur respiratio; sæviunt cardialgiæ, quas sæpiùs sequuntur lipothymia, cordis palpitationes, molestissima corporis jactatio, &c. *Pulsus* plerumque languidus, debilis, inæqualis, vel inordinatus, cum tendinum subsultu, observatur; nonnunquam à naturali vix recedens, vel vehementior & velocior deprehenditur: exacerbationes semel, vel bis, singulis diebus, sed statis temporibus minime insurgunt.

Abdomen, rarò doloris expers, per totum morbi decursum præminet; ac sæpiùs ultra modum distenduntur hypochondria. Urinæ nunc ubertim fluunt, nunc agrè subeunt propria incernicula; vel in vesica coercentur: in nonnullis, à nativo colore minime recedunt; in aliis, tenues, subalbicantes, flammeas vel saturato-rubras, nigricantes, & confusas se præbent: tetrum quandoque odorem exhalant; rarò verò subsident: sed notare per transfennam expedit quod ab illarum vel accuratiori examine nil certi de eventu statui possit. Bilis à propriâ indole degener, vel exandescens, varias in abdomine turbas concitat; hinc nausæ, vomitus, alvi fluxus, cardialgia, anxietates, singultus, tormina, &c. Alvus solvitur insciis ægrotantibus qui urinâ & fæcibus sese, lectumque conspurcant: dejectiones summè fœtent, atque lumbricos nonnunquam devehunt. Nunc *dysenteria epidemica* & exitialis inter febris malignæ affectas sit numeranda?

vel morbus audiat per se, ad malignitatem vergens, multum controversatur: & adhuc sub iudice lis est. Facile tamen crediderim, ne a symbolis videar, hunc morbum implicitum meram esse dysenteriam gravioribus symptomatibus stipatam, vel malignitatis, ut inquiunt participem: variolas enim, morbillos, febrem catarrhalem, &c. eadem notâ in nonnullis constitutionibus signari nemo nescit. Sudores, raro salubres, tanto proventu in quibusdam erumpunt, ut plures clinici, hoc symptomate decepti, febrem de quâ in præsentiarum ad sudorem Anglicum perperam referant: summum in plerisque fœtorem spargunt; quandoque frigidi occurrunt, &c.

Alia observatu digna conspiciuntur *in cute*; petechiæ nempe, vel maculæ exiguæ, nec asperæ, nec prominentes, vel morsui pulicum planè similes; quæ per totum corporis ambitum, exceptis facie & manibus disseminantur: seriùs ocyùs quarto scilicet, septimo, nono, undecimo, vel decimo quarto die erumpunt prædictæ maculæ, à crisi planè alienæ, & post triduum sensim extinguuntur, & in plerisque evanescunt: tanto sæpiùs agmine pectus & dorsum occupant, ut his quasi coadunatis cutis intensè rubeat; sed nulla ex harum accessu salutis vel mortis auguria desumuntur: si tamen latiores, lividas & nigras se præbeant; res periculosa est aliter. Aliud est eruptionis genus, quod miliare vocant, & à pravo calidiori regimine, annuente SYDENHAMO, promoveri solet: sunt pustulæ quædam exiguæ vesiculares vel crystallinæ, & per totum corporis habitum dispersæ; quæ primò pellucidæ, dein albescunt: cur fit ut incongruo purpuræ albæ (*pourpre blanc*) nomine salutentur. Sudores ut plurimum excipiunt prædictæ papulæ; ac tardiùs quàm maculæ petechiales; vel nullo servato ordine per totum morbi curriculum efflorescunt: comitem habent pruritus; & ferofum quemdam laticem elabi sinunt: diutiùs quàm petechiales protrahuntur; & pluries in morbi decursu recurrere queunt: tùm auram frigidam caveant ægri, qui plerumque, dum ad necessaria erigere corpus gestiunt, animo linquntur. In nonnullis demùm constitutionibus epidemicis pustulæ miliares, & exanthemata febrilia, simul vel alternatim, prodeunt.

E præfatis colligere licet, nil ex hisce eruptionibus febrilibus, merè symptomaticis, circà morbi indolem inferendum esse; & idè perperam distingui *febres purpuratas, petechiales & miliares* à cæteris malignis: quin potiùs hæ efflorescentiæ symptomaticæ pendere duntaxat videantur à certo caloris gradu, & à quodam sudoris proventu, vel à præposterâ curatione; quod multiplici experienciâ fretus satis superque probavit clar. DE HAEN; aliave quâlibet causâ, quæ nostræ subtrahitur indagini; cùm, uti suprâ innuimus, faciei & manibus, aëri frigido magis patentibus, parcant: dum ex adverso eruptiones essentielles, quæ morbi scilicet characterem produnt; ut variolosæ, morbillosæ, scarlatinæ & erysipelaceæ, non solum universum corporis habitum adoriuntur; sed confertim ingruunt in faciem & manus. Insuper neminem latet exanthemata petechialia &

 FEBRIS
MALIGNA.

miliaria, in aliis morbis, vel febris expertibus, se offerre; ac utraque sæpius conspici in variolis, febre ardente, dysentericâ & catarrhali. Scitur præterea pustulas miliares familiariores esse puerperis; è gravi morbo convalescentibus, &c. Nec hisce cancellis continentur febris malignæ symptomata cutem respicientia: nonnulli enim decumbentes de pruritu, nullâ patente efflorescentiâ, conqueruntur: in aliis obvia fiunt erysipelata, exanthemata cum phlyctænis, alteriusve fortis; maculæ gangrænosa, &c. erumpunt postremò parotides quæ ægrè in suppuratum abeunt; exsurgunt anthraces, &c. Hæc sunt vulgatiora hujusce febris *phænomena*, quibus benè perspectis expiscatur morbi indoles.

Febrem malignam cæteris acutis diuturniorem esse jam inculcavimus; sed nulli computo submitti potest hujusce morbi stadium; cum ægrè sæpius discernantur exordium & finis. Asserere tamen nil vetat hancce febris speciem nusquam ante vigesimum primum diem judicari, & vulgò diutius protelari; nempè ad quadragesimum, sexagesimum & ultrà: unde allucinantur qui se vidisse febrem malignam septem dierum asserunt; quæ fortè nil aliud erat quàm febris ardens gravioribus stipata symptomatibus. *Ægrotantium ærumna* sæpius morbo decrecente exasperantur; imò & ipsis gravius portendit periculum: si enim febris circà hæc postrema tempora solito contumacior domari recuset; metus est, non secùs ac à tumorum retroversione, ne materiæ morbosa reliquiæ ad viscera irruant; ac congestionem purulentam in pulmonibus, hepate, mesenterio, &c. deponant. Alia impendent infortunia, etiam sublato morbo; nonnulli enim memoriâ planè orbantur; nec sui ipsiusmet nominis recordantur; dum alii immemores duntaxat fiunt omnium quæ in morbo contigerunt. Quidam per quoddam tempus, vel per totum vitæ curriculum desipiunt: plures surditate aliquandiù conficiantur, vel cæcutiunt. Sunt qui in febrem hæcticam, aliosque affectus chronicos curatu difficiles, & tædio molestos, delabuntur. Præterea malignam excipit in nonnullis constitutionibus febris intermittens, tertiana simplex vel duplex; solitis præsidiis ægrè cedens. Nulli demùm ex hoc morbo evadentes pristinae sanitati brevi restituuntur; sed tædio insuperabili, ærumnisque diuturnis conficiantur; nec desunt qui, licet incolumes, animum despondent; antea impavidi, dùm mors erat in propinquo. Aliud postremò imminet periculum, quod versatur circà morbi reditum; qui præsertim respicit illos qui ineunte valetudine è rectâ vivendi normâ deflectunt.

Ut recta instituaturs *prognosis* in hoc ancipiti affectu, præteritis in memoriam revocatis, habenda est ratio virium, tum mentis, tum corporis: quo minùs enim debilitantur, eò major salutis spes affulget; sed à pavore & terrore, ab animi abjectione, vel inexpugnabili mortis formidine, infustum ducitur omen. Pro variâ etiam corporis conditione, è sanguinis & humorum labe, petitâ, diversum eruitur præfagium: periculosior enim hæc censetur febris, si scorbuticum invadat; hanc ægrè superant cachectici, &c. Hisce præmissis generalibus, ad accuratius symptomatum examen

deveniamus : visûs obnubilatio , tremor linguæ , molesta deglutitio , aphthæ lividæ , &c. morbi perniciem & diuturnitatem arguunt. Nil mali portendit surditas , quæ successu temporis spontè evanescit : nec peioris est ominis cæcitas ; sed plures visum nusquam recuperant : prodest Ptyalismus ; nec minùs conferunt pustulæ circà labia , decrescente morbo , erumpentes. Falsa salutis auguria desumuntur à calore miti ; à pulsu ad naturalem accedente ; ex urinâ citrinâ ab illâ sanorum haud absimili ; cùm plures , his sic se habentibus , è medio brevi tollantur. In vitæ discrimine versantur qui inscii se permingunt ; qui noctu diuque inepta effutiunt , floccos legunt , lintea attrahunt , &c. Alvus plus æquo soluta , vel constricta haud levem metum injicit : dejectiones lientericæ , cruentæ , subnigræ , vel supramodum fœtidæ grave curantibus facessunt negotium. Petechiæ vel pustulæ miliares subatræ , vel solito citiùs erumpentes haud levem terrorem inferunt ; ab earum verò retrocessu subitaneo lethum imminet. Hamorrhagiæ , quovis tempore accedant , funestum præfagiunt eventum , variis cladibus confirmatum. Postremò nemo nescit singultum , lipothymias , convulsiones , delirium obscurum & triste , inconditas manuum motiones , affectus comatosos , præsertim post phrenitidem , &c. symptomata esse letho finitima. Nonnulli ultimum fatum subeunt circà septimum morbi diem : in aliis numero pluribus à duodecimo ad decimum quintum accedit ; rariùs verò ad quadragesimum. Quoad crism ; neminem practicum fugit imparia esse huic movendæ in hoc morbo naturæ conamina : quid tamen simile circà septimum diem in nonnullis observatur ; sed illud inchoatum opus nusquam absolvitur ; quod tamen non impedit quominùs alvi fluxus naturæ limites non prætergrediens ; & urinæ sedimentum præbentes maximum in quibusdam epidemiis juvamen præstent. Idem esto iudicium de sudoribus , præsertim si roscido perspirationis halitu madeat cutis. Nec minor quandoque spes affulget à parotidibus ; circà quas notatu dignum occurrit , quod prædicti tumores ad resolutionem vergentes sint , vigente febre malignâ , contrà consuetum rerum ordinem , cæteris auspiciores. Abscessus extûs erumpentes criseos vices etiam supplere valent : sed interni ratione sitûs ægrum ut plurimum conficiunt , vel tabem accersunt ; ni materia puris per tracheam , tubum intestinalem & vesicam egressum sibi paret ; sed merum hoc est naturæ opus , ac nullâ arte promovendum ; è quibus omnibus prolatis colligere datur , fortunatiores ægros haud citrà molestissimos labores , & summa pericula , emergere.

Paucas naturæ scrutatoribus suppeditant observationes *extispicia* , cùm ut plurimum nil spectatu dignum occurrat : vel cadaverum sectiones , pro summo fœtore , aut contagii metu , raptim & festinanter instituantur. Nihilominùs phlogoses & abscessus pluries exhibuit caput apertum , tùm in interioribus cerebri claustris , tùm circà hujusce visceris ambitum ; non secùs ac stagnationes saniosas & purulentas in cerebri anfractibus , aliisque recessibus ; non secùs ac in cavitate tympani post soporem & surditatem. Eadem vitia , sed rariùs in pectore conspiciuntur : pulmones à nativo

FEBRIS
MALIGNA.

colore recedentes varias maculas lividas & gangrænosas exhibent; ac putredine nonnunquam confecti, tactu faciliè rumpuntur. Cor nil vitii præ se ferre videtur; sed cruor intrà ventriculos, auriculas & majora vasa coacervatus, nunc fluidissimus & quasi solutus reperitur, nunc crassus & in concreta, ut inquirunt, polyposa abiens: in nonnullis inflammatum, pustulosum & gangrænosum occurrit prædictum viscus. Abdominis viscera crebriùs labefactata observantur: epiploon putredine absumptum oculis sæpius subjicitur; quam labem haud rarò impertitur hepati, lieni, aliisque visceribus, quibus annectitur. Cystis fellea bile atro-viridi ultrà modum tumet; quâ etiam scatent ventriculus & intestina. In immensam molem, ut plurimum assurgunt hæc postrema viscera, quæ etiam phlogosi & exulcerationibus tacta conspiciuntur; vel maculis gangrænodeis afficiuntur, & escharâ deturpantur; in nonnullis subjectis siderata intestina dilacerantur, ac facibus alvinis egressum largiuntur. Postremò, hoc morbo extinctorum cadavera ultramodum intumescunt, & maculis atropurpureis latissimis ab obitu defœdantur; brevi putrescunt & teterrimum odorem spargunt: hinc minime mirum si, perfunctoriè introspectis visceribus, sepulturæ tradenda citò relinquantur.

Quoniam obscura est febris malignæ invasio; ægrotantes imminentis periculi nescii, rarò primis diebus, vel nonnisi post certum morbi progressum opem medicam efflagitant; cur sit ut plures curâ prophylacticâ, quæ in diætâ tenuissimâ vel merè aqueâ potissimum versatur, defraudentur; quâ tamen morbus quasi in ovo nonnunquam suffocatur: etenim multiplici experienciâ nobis compertum manet varios, grassante hac febris specie, suprà traditis morbi prodromis commonefactos, diætâ tenuissimâ, cœli mutatione, vel simplicioribus & generalibus remediis imminentem morbum declinasse, & planè incolumes evasisse. Ad efficaciora prope-
randum, ubi in propatulo se sistit febris maligna: haud tamen una & eadem *curandi methodus* cunctis congruit; cum sæpiùs urgentioribus symptomatibus sit obtemperandum; vel epidemiæ grassantis indoli sit attendendum; cum neminem expertum lateat has constitutiones epidemicas rarò sibi similes observari. Jam diù invaluit mos, ut prædictæ febris medela sanguinis missione ineatur; de quo tamen dissentiunt Aucthores. Hanc ut plurimum proficuum censemus, si vires ferant: sed haud nisi summâ cautelâ iterari debet; etsi inflammatio, dolores acutissimi, delirium & spirandi difficultas illam suadere videntur; cum pluries nobis observasse contigit, quod ab illis repetitis morbus truculentior evadat, imò & fatum acceleretur. Saphenæ sectione impeditum caput sublevari vulgatissima fert opinio; sed negant SYDENHAMUS, VAN-SWIETEN, alique exercitiores practici; quibus assentitur accuratissimus rerum morbosarum scrutator PRINGLE, qui tradidit numerosas venæ sectiones inanem opem conferre in delirio; quin potius illud sæpiùs exsuscitent, tam sub febre malignâ, quàm in aliis speciebus. Si quid de hac re in medium adducere liceat; multiplici experienciâ edocti asserere minime

dubitamus, quod delirium à sapientiae sectione sapientius exacerbetur; ne dum compescatur. Sed præconcepto, & tralatitio judicio obistere, in casu ancipiti, arduum sane & difficile videtur: cur fit ut nonnulli clinici propriæ famæ, potiùs quàm decumbentium salutem, consulentes, (quidquid de hac re censuerint) adstantium præjudiciis, vili & abjecto animo, haud cunctanter subijci patiantur; & misellorum ægrotantium vitam hujusce periclitationis discrimini committere minime recusent.

Vomitoria post primum morbi incessum, præmissâ sanguinis missione, inter præstantiora remedia recenseri debent: quorum ope bilis è suis propriis conceptaculis exprimitur; vel foràs egeritur saburra in primis viis nidulans, quæ aliàs brevi cum chylo, vehiculi vices explente, ad sanguinem appellens, per omnes vasorum orbes distribuitur; & summam, inter morbi curriculum, perniciem infert. Pluries nobis fuit facultas observandi in nosocomiis, grassante febre malignâ, quantum discrimen ab adhibito, vel posthabito hoc præsidio emergeret; quod, ut verum fatear, omnem fermè fidem superat. Imò & emeticum, delapso opportuno tempore, vel in quâvis morbi ætate, usque scilicet ad decimum vel duodecimum morbi diem & ultrâ præcipere minime dubitabat SYDENHAMUS. Nec latet præxi edoctos, quod plures somnolenti, circa morbi acmen, vel supremum gradum, hocce remedio, omni aliâ spe præcisâ, ex orci faucibus evaserint. Imò & expedit sub hoc urgentissimo casu, stomacho huicce stimulo obsurdescente, ut majori dosi exhibeatur, vel pluries repetatur, donec suum effectum exeruerit, vel saburram biliosam expulerit. Hæc est clava Herculeæ quâ sapientius evincitur hæc dira febris species: nec ab hacce auspiciatissimâ methodo recedunt solertiores clinici; ni planè obstat peculiaris, sed rarissima, morbi grassantis indoles; quod nonnunquam se vidisse in quibusdam epidemiis asserit Clar. DE HAEN, fortè plus æquo addictus opinioni BOERHAAVII qui emeticorum usum in acutis rariùs adhibebat.

Laxantia, cassia nempe, tamarindi & manna, quibus sociatur cremor tartari, crebrò elapsis septem primis diebus usurpari queunt: ab illis tamen abstinendum ineunte quâcumque eruptione; vel ubi nonnulla se produnt signa imminētis inflammationis in abdomine: sed nusquam posthabenda enemata emollientia, per totum morbi decursum proficua. Genuina verò *cathartica* nusquam sunt propinanda, nisi decrescente morbo; quo tempore, etiam repetita, faustè adhibentur. Haud desunt tamen qui novis hypothesibus ducti in contrariam sententiam abeunt; & vetustissima medicinæ præcepta, haud sine maximo ægrotantium damno, convellere gloriantur. Conducunt absorbentia & anthelmintica, si saburræ acidæ, vel verminosæ progeniei quædam moveatur suspicio. Sed plures habentur per totum morbi tractum diluentia, temperantia, & nitrosa; quæ ferum humorum impetum compescunt, & variis excernendis laticibus vehiculum impertiuntur. Summè demùm deprædicantur acidula, & antiseptica; aqua scilicet, vel ptisana spiritu sulphuris aut vitrioli imprægnata; qua

**FEBRIS
MALIGNA.**

forte nil efficacius reperitur ad impugnandam alkalinam sanguinis, & humorum labem. Circà hæcce postrema præsidia notare juvat familiarem & saluberrimum olim fuisse aceti usum apud milites Romanos, ad aver- tendos morbos castrenses; qui ante inventum illud prophylacticum sum- mam stragem in exercitibus edere solebant.

Decantatissima sunt, ut incæpta prosequamur, *cardiaca & alexiteria* in curatione febrium malignarum; id genus sunt vinum generosum, theriaca aliæque confectiones ejusdem commatis; lilium Paracelsi, salia volatilia ex animalium familiâ deprompta, &c. suas sanè laudes merentur in nonnullis febribus mali moris hæc remedia; materiæ morbosæ per cutis spiracula elu- triandæ apta: sed haud cunctis, uti autumat insulsa plebecula, congruunt: opportunè sæpiùs cathartici sociantur; vel in usum trahitur kermes mine- ralis, qui utrumque effectum præstare valet. Pro paregorico & antiseptico exquisitiori habetur camphora, præsertim acidis nupta. Egregiè se gerit sal sedativum, vigente delirio: sed cautè sunt usurpanda *narcotica*, etiam favientibus doloribus & urgente alvi fluxu: prætereà horum usu sub hoc rerum statu, spirituum impetum rarissimè reprimi, imò & delirium exa- cerbari, jam suprà innuimus. Hinc infida censerì debent hæc, apud veteres celebratissima, antidota, theriaca nempe, mithridatium, orvietanum, &c. quæ præcipuas vires mutuuntur ab opio. Cortex Peruvianus à nonnullis, inter quos eminet clar. DE HAEN; summis laudibus extollitur: ac non solum vis antiseptica ipsi adscribitur; sed etiam alexiteria & diaphoretica: ab aliis tamen tanquam nocivus abdicatur: si hæc lis ad nostræ experientiæ examen revocetur; rarò profuturum esse hoc remedium sub nostro cælo, ni solertissimâ manu tractetur, asserere minime dubitamus: summam re- verà opem conferre potest, imminente gangrænâ; dummodò haud plus æquo incandescat sanguis: aliàs cum illo cautè mercari expedit; nec opi- nor quemquam fore apud nostrates, qui hoc vadium sæpiùs tentare audeat; ni febris maligna post vigesimum diem in legitimam intermittentem abeat; vel ultrà quadragesimum protracta, sed mitior, ratione ordinis exacerba- tionum ad intermittentes accedat: utrumque observari in nonnullis consti- tutionibus epidemicis nemo nescit. Injurius sanè forem erga laudatum Authorem, si morborum historias quas candidâ fide tradidit in dubium re- vocarem: sed nùm faustus eventus post exhibitum stupendâ dosi corticem peruvianum, inter vigentem febrem malignam, huicce præsidio, potiùs quàm aliis remediis vel naturæ viribus referri debeat, jure, ni fallor ambigitur.

Vesicatoria, ut ad *externa* deveniamus, dummodò bilis haud plus æquo excandescat, ponè aures, scapulis, coxis vel cruribus admota, haud exiguum laudem merentur: cùm plures qui pro mortuis lugebantur horum beneficio veluti ab inferis remearunt; materiam enim morbosam ad caput irruentem quasi alliciunt; hinc fugatur delirium, abigiturque somnolentia, Sed omni ope enitendum, ut exhinc oriundæ colluviei expurgatio diu- tiùs protrahatur, inflicto vulnus notissimâ arte fovendo; aliàs levem vel
inanem

inane opem conferunt prædicta topica; quibus succedaneæ sunt scarificationes, in prominentiâ à cucurbitularum applicatione exortâ celebratæ. Saluberrima præsertim hæc utraque audiunt præsidia, post eruptionum febrilium retrocessum, quo morbum exasperari, graviolemque metum incuti, neminem latet: sub quibus circumstantiis, acetum quoddam saccharo-camphoratum intus exhibendum proponit clariss. VAN-SWIETEN; circa quod vide prædicti Authoris *Medicinam Castrensem*. Hirudines temporibus admotæ, citius & tutius ipsimet venæ sectionibus, cephalalgiam atrociolem compescunt. Eadem munia obire valent pediluvia, non secus ac sinapismi, aliave cataplasmata stimulantia planta pedum imposita. Dolores demum in tumente abdomine sævientes, topicis emollientibus vulgatissimis leniri nemo nescit. Coronidis loco addere juvat quod nil magis febris malignæ, aliarumve mali moris, curationi officit, quam aer inquinatus: hinc patet quanti sit momenti ut sæpius renovetur, vel quocumque alio modo emendetur. Imò & expedit ut non plus æquo inter lecti cortinas includantur ægri; & sub stragulis quasi sepeliantur: quin potiùs pulvinaribus dorso & capiti substratis identidem sedeant; vel lecto si vires ferant, eximantur; bono demum esse animo jubeantur.

P E S T I S.

STRAGE horrendâ, contagio summum terrorem incutiente, & eruptionibus peculiaris notæ, à cæteris acutis sat distinguitur nefandus hicce morbus, & reconditissimæ indolis; quem plures cœlitus dimissum autumant. Varias formas induit *pestis*, non solum in diversis epidemiis, sed etiam sub unâ & eadem constitutione; adeò ut accuratam illius *descriptionem* tradere arduum sanè & difficile: quod abundè patet ex historiâ pestis quæ anno 1720, dirum in modum Massiliæ depopulabatur, & totam fermè Gallo-Provinciam peragrabat; quam jubente Ludovico XV, publici juris fecit clar. SENACUS Archiætorum Comes. Hanc ferinam luem in quosvis obvios se spargentem, cordi & nervis infensissimum & generi humano bellum indicentem, ex Orientalibus plagis, à coinquinatis farcinis, pannis, telis xylinis, aliisque mercibus, ad nos deferri vulgatissima fert opinio; cui tamen plures, etiam prioris notæ, refragantur; hisce adducti rationibus quod stupendus erucarum, locustarum, aliorumque insectorum proventus; annonæ penuria, &c. pluries hujusce cladis fuerint prodromi: adeò ut ab utrâque causâ ortum mutuari conjicere liceat. Si obscurus sit pestis ortus, haud clariùs innotescit ejus genuinus character; nec dilucidius patet recta curandi methodus: cur minime mirari subit, si Medici, vel solertiores, qui pestis furori se impavidos objecerunt, in hoc intricatissimo morbo planè, ni fallor, cæcutierint.

Evidentioribus fortè *signis*, quàm febris maligna, se profert pestis,
Tom. I, E

PESTIS.

quâ grassante omnes ferè alios morbos siluisse, pluries observatum fuit. Quanto terrore percutiantur hâc lue tacti, promptius est animo sentire, quàm verbis exprimere. Hanc quandoque prænuntiant inappetentia, nausea, lassitudines spontaneæ, virium prostratio, vertigines, &c. sed ut plurimum, derepentè insidiatur horrore; & integrâ animi abiectione, quæ brevi delirium vel soporem accersit. Plures tunc temporis de dolore axillarum vel inguinum conqueruntur; imò & in glandulis inibi degentibus visenda se præbet intumescencia, plus minusve conspicua. Pestis, in nonnullis epidemiis, febris intermittens faciem præ se fert, cujus tertius paroxysmus ægros è mediò tollit. Insuper dolor capitis gravativus, oculi torvi, visûs obnubilatio, dolores dorsi & pectoris, tremor & convulsio, anxietates quibus corpus perpetuò versant decumbentes; lipothymia mortis finitimæ, singultus, aliaque febris malignæ *symptomata*, pestem etiam crebrius concomitantur. Nonnulli saburram atro-viridem & graveolentem evomunt; vel vermes per utramque viam abjiciunt. Interdum os summe foetet; lingua copiosiori muco obducta, nonnunquam nigricat. Siti intensiori, mordaci præcordiorum æstu, molestissimâque cordis angustia, torquentur peste afflati. Sudores teterrimum, infensissimumque odorem spargunt; quo omnia supellectilia, quæ in ægrotantium usum adhibentur, infestantur. Lotium nonnunquam cruentum meitur; nec rarò sputa eandem labem contrahunt. Pulsus in quibusdam à naturali vix absimilis, vel languidus, debilis & contractus, deprehenditur; in aliis vehementior, velocior, inordinatus & inæqualis observatur. Febris demùm, cum diverso caloris gradu, innumeros sortitur modos, à mitiori ad intensiorem: intrâ quatuor vel quinque dies quandoque continetur; aliàs ad duodecimum vel decimum quartum accedit: nusquam verò ulterius protelatur, nisi aliis accedentibus causis; inter quas primum locum tenent tumores, qui ægrè sæpius in suppuratum abeunt. A veri tramite deflectunt qui febrem pro mero pestis symptomate habent; eo quod calor, pulsûs frequentia & velocitas in nonnullis desiderentur: sed fallacem illam apyrexiam observare quoque licet, uti suprâ notavimus, in febre malignâ, in variolis, quibusdamque aliis affectibus mali moris; quos tamen febrem semper comitem habere uno fatentur ore Medici: hinc nullam esse pestem absque quâcumque febre consecrarium videtur.

Exanthemata & pustulæ diversæ sortis, atque parotides rariùs in peste quàm sub febre malignâ erumpunt: sed familiariùs occurrunt *bubones* & *anthraces*: primi adoriuntur glandulas inguinales, axillares, cervicales, aliasque per corporis ambitum disseminatas: nunc primum morbi incessum presso pede sequuntur bubones; nunc in aliis morbi temporibus prodeunt; imò & post febris decessum. Nonnunquam brevi in suppuratum abeunt; aliàs non nisi post viginti vel triginta dies, pus in ipsis conficitur; quandoque tamen resolutione judicantur, maximo ægrotantium periculo. Anthraces erysipelacei, vel phlegmonodei omnibus partibus indiscriminatim minantur; imò & intrâ fauces haud rarò exsurgunt: nunc furunculi instar,

prominent, & in acumen elewantur; nunc sub pustularum acervatim congestarum formâ, quibus areola phlegmonodea basim præbet, se proferunt bubones: haud desunt denique qui in immensam molem accrescunt, vel ovi magnitudinem superant. Sphacelus quo brevi corripuntur prædicti tumores, suppurationis nescii, horum characterem prodit. Diuturniori egent medelâ anthraces; cur sit ut integra morbi pestilentialis curatio ab horum proventu ad menses proteletur. Hæc sunt naturæ salubria conamina quibus miasmata virulenta in peste, non secus ac in variolis, foras sensim abiguntur; & ideò intelligitur cur, sæviente peste, ex hâcce benè se habente sanguinis depuratione, salutis auguria desumantur.

Licet truculentus hicce morbus, qui non solum contactu, sed proximiori ad ægros aditu contrahitur, nemini parcat; ultra tamen dubii controversiam positum manet, rarò aggredi impavidos, qui scilicet contagii metu minime deterrentur, nec mortis formidine torquentur; non secus ac tenui victui addictos, & munditie studentes. A multis traditur macilentos, phthisicos, arthriticos, fluxui hæmorrhoidali obnoxios; fonticulos & vetustiora ulcera gestantes, &c. rarò hujusce luis esse consortes: contagium è contra minatur meticulosus, helluonibus, obesis, inopibus, &c. Robustiores hoc morbo correptos in majori vitæ discrimine versari; gravidas verò & puerperas rarò hunc morbum eluctari, omnes ferè tradiderunt Authores. Cæterum pulsus validior, & vehementiora symptomata, quæ nil arguunt in febre malignâ, *funestum* sub peste *exitum* denuntiant. Haud tamen periculo vacat fallax alcyonium status, cùm innumeris historiis compertum maneat, plures quibus à mitioribus symptomatibus maxima spes affulgebat, brevi ad superos migrasse; dùm alii, quibus pro extremâ morbi perniciæ lethum imminebat, ad vivorum numerum revocarentur. Natura, grassante peste, criticam evacuationem rarò molitur: sunt enim hæmorrhagiæ ut plurimum exitiales: diarrhœa omnes ferè ad ultimam rerum lineam ducit. Si sudores spontanei circa quartum diem faustum polliceantur exitum; in aliis temporibus nullius sunt emolumenti; imò ubi primis diebus erumpunt; succedente delirio, brevi lustricâ opus erit. Tremor linguæ & manuum, oculi ignei & torvi, raucedo, rigor nullo ordine recurrens, &c. sunt totidem symptomata letho finitima. Sed omnem fermè salutis spem excludunt mentis & corporis stupor, & crebra animi deliquia; quibus addere licet sternutationem contumacem, & singultum nullâ arte compescendum, quæ pro mortis præconibus etiam habentur. Nil inferendum è cutis efflorescentiis, quæ sub vulgatissimo conspectu se præbent: sed si nigrescant, mors est in propinquo. Bubones auspicatissimi censentur; quod ad anthraces attinet, res in ancipiti versatur: majorem metum incutiunt postremi, si ante quartum diem se prodant. Febris vehemens & graviora symptomata remittuntur ab eruptione bubonum, carbunculorum & parotidum: sed major salutis spes, si se proferant prædicti tumores, omnibus antea mitescentibus; ubi bubones quarto die exoriuntur, felicem eventum hariolari licet; sed aliter se res habet, si tardius

PESTIS.

erumpant. Anthraces magis sunt pertimescendi, præsertim si bubonibus affigantur. Cervicis tumores, sive sint bubones, sive anthraces, majus portendunt periculum; præcipuè si febris vehemens, aliudve grave symptoma, horum eruptioni obstat: si retrocedant, conclamatum est; ni urinæ ab hoc recessu materiam quandam purulentam deponant; quod rarò evenisse omnes testantur. Postremò, peste correpti occumbunt singulis morbi temporibus; sed sæpiùs intrà biduum rapiuntur: nec defunt qui haud ultrà sex horas cum morte colluctantur; vel nullo, uti videtur, prævio morbo subitò extinguuntur.

Scitur ab exaratâ *cadaverum historiâ*, partes internas eodem modo labefactari: conspiciuntur nempe, tum in visceribus, tum in membranis maculæ purpureæ, & atro-lividæ. Annotantur tumores & abscessus ab anthracibus & bubonibus externis parùm discrepantes. Reperiuntur phlogoses, stigmata gangrænosa & sphacelata: nec ab hac labe immune est ipsummet cor. Nonnunquam obvia fit amplissima cordis & hepatis moles: horum receptacula, & vasa sanguine nigerrimo, faculento & congrumato turgent: occurrit bilis æruginosa, & atro-viridis, majori copiâ aggesta, non solum in vesiculâ felleâ & tubis biliferis; sed etiam in ventriculo & fistulâ intestinali. Insuper varia hoc morbo extinctorum cadavera latissimis, nigrisque exanthematibus, ut si fustibus cæsi fuissent, defœdantur. Plura demùm occurrunt quæ tetrum & virosum exhalant odorem; adeò ut horum sectionem nemo citrà valetudinis dispendium aggredi audeat: nonnullos enim novi Chirurgos, qui in postremâ peste Massiliensi curiositatis pœnas luerunt. His addere licet minime defuisse cadavera, quæ, licet diligenter intùs & extùs perlustrata, nil notatu dignum exhibuerunt.

E præhabitâ hujusce sævissimæ luis prognosi, cuivis pater quanti sit momenti *cura prophylactica*, quæ præcipuam laudem meretur, inherere. Sub hoc conspectu inquinatus aër, vel miasmate pestilentiali refertus, emendari solet variis suffumigiis cum pulvere pyrio, aceto, nicotianâ, succino, sulphure, & variis substantiis aromaticis, paratis; quibus contagium repelli, vel extinguì posse vulgò fertur. Summis laudibus extollit DIEMERBROECKIUS, propriâ experientiâ edoctus, fumum tabaci, notissimâ fistulâ ore attractum & demissum; qui plurimùm, inquit, conferre valet ad arcenda infensissima pestis miasmata. Pluris habetur odor aceti prophylactici, vulgò *des quatre voleurs*: acetum simplex, vel rutaceum, à noxiis etiam effluviis tueri valet. Summè deprædicatur apud Orientales; & à nostratibus minime posthabetur, usus internus succi limonis, vel mali citrei: illius vires æmulatur, & forte superat acetum intùs haustum, annuente SYLVIO DELEBOE, qui contagium hoc solo præsidio avertisse narrat: ejusque summam efficaciam experti sunt plures in nuperrimâ peste Massiliensi. Nec despicienda sunt theriaca, mithridatium, aliaque antidota & alexiteria vulgatiora; inter quæ allium haud fortè infimum gradum tenet; quorum ope plures pestis aculeos deflexisse, vel retudisse nobis

compertum manet. Sed nil magis arcet contagium quàm mens ab omni curâ, sollicitudine & metu soluta, non secus ac recta vivendi norma; proba enim victus ratio SOCRATEM è peste, quæ frequenter Athenas depopulabatur, immunem & illæsum servavit. Summè etiam deprædicantur munditiæ & nitor, tum corporis, tum ædium & oppidorum: scitur enim pestem olim apud Londinenses ob aërem inquinatum angiportuum fordiorum sæpissimè grassantem, ab urbe, post incendium anni 1666, restitutâ, pro latiorum vicorum & platearum munditiæ, prorsus profligatam fuisse. Laudantur, hâc grassante lue, vestes sericeæ, nec immeritò. Cauterium denique brachiis & cruribus inustum à pluribus summè deprædicatur; & fortè cæteris prophylacticis palmam præripit; eo quod miasmata pestilentialia sanguinem inquinantia per apertum fonticulum, unâ cum tabo exitum sibi parant; priusquam viscera impetant.

Ad curam præsentem devenimus, quæ nusquam rectè instituitur, ni prius attendatur ad genuinam grassantis pestis indolem; quæ pro variâ constitutione epidemicâ, monentibus famigeratissimis practicis, summè discrepat. Equidem sexcentis constat historiis Medicos, vel in arte medendi peritiores, primos peste afflatos adeuntes, pluries experimenta per mortes egisse: adeò ut sæpius cunctari & superfedere satius sit, quàm dubiis telis hunc infensissimum hostem aggredi. Egregiè sanè conducit, inter hæc angustias, HIPPOCRATIS effatum; (quò natura vergit, eò ducere oportet.) Quod altâ mente tenere debent, quibus hæc demandantur munia. In hoc enim benè perspecto spontaneo molimine versari debet curationis cardo; cum ex innumeris propemodùm observationibus constet ab eruptionibus pus conficientibus, quas solæ œconomix animalis leges promovent, hunc morbum feliciùs solvi, quàm à quâcunque aliâ evacuatione: ideò nil non movendum, cæteris consentientibus, ut deleterium sanguini confusum ad corporis peripheriam alliciatur; & hoc est præcipuum curantis munus. Superfluous est, imò & exitialis major remediorum apparatus, simpliciora & vulgatiore duntaxat requiruntur; inter quæ diaphoretica, experienciâ duce, deprædicantur: præter enim auspiciatissimos quos movent sudores, salubrioribus eruptionibus etiam famulantur: imò & à solo manante sudore, tum calore lecti, tum naturæ viribus concitato, plures præsidiiis medicis planè defraudatos, sed congruæ victus rationi addictos incolumes evasisse testantur historiæ.

Hisce generalibus prælibatis, singula præsidia quæ feliciùs usurparunt solertiores prosequi juvat; inter quæ nonnullam opem ferre queunt, sub primo morbi incessu, *sanguinis missio*, *emesis* & *catharsis*, dummodò vires ferant & sinant eruptiones: sed haud citrà periculum adhibentur sub aliis morbi temporibus; imò & omninò improbantur à DIEMERBROECKIO; etiam vigente inflammatione, & urgente alvi fluxu. Egregiè se gerunt diluentia, dummodò haud plus æquo solvatur alvus: plurimùm etiam decantantur temperantia, nitrosa, & antiputrida: nec posthabenda, si res expostulet, absorbentia: sed latius celebrantur & supra modum extolluntur

PESTIS.

cardiacà & alexiteria, quibus specifica quadam vis vulgò tribuitur : haud omnibus tamen congruunt hæc medicamina ; imò & noxam inferunt , si sanguis plus æquo excandescat : quo in casu , ut vulgi præjudiciis nonnihil obtemperent , alexiteria acidis tum vegetabilibus , tum mineralibus sociare solent experti clinici : liliū , theriaca & cognatæ confectiones , pulvis viperinus , acetum theriacale , &c. usitatoria & efficaciora audiunt ; præsertim si primis morbi temporibus præcipiantur. De bezoardicis nil addimus , quandoquidem horum usus , olim celebratissimus , jam diū , nec immeritò , exoleverit. Pluribus optimè cessit *camphora* , quæ præter vim antiputridam & diaphoreticam , efferum spirituum motum sedare valet : sed cautè cum narcoticis mercandum ; quorum tamen usus in nuperrimâ peste fuit , fortè plus æquo , familiarior : nonnullum tamen auxilium præstant in alvifluxu , dummodò mitiora præscribantur , qualia sunt diascordium , theriaca , mithridatium , syrupus de papavere albo , aliaque ejusdem sortis. Cathartica apprimè congruunt in fine morbi ; aliàs ab expertis planè abdicantur. Præsentaneam opem ferunt vesicatoria & cucurbitulæ , quorum ope deleterium deorsum revellitur , vel quædam pars eximitur : ac horum præsidio plures mortem effugisse constat. Aliud proponit topicum DIEMERBROECKIUS , sacculum nempe arenâ celefactâ repletum , inguinibus , axillis , pedibusque admovendum ; quod sanè suas meretur laudes.

Exaratâ probatissimâ curandi methodo , silentio premere minime debemus plures practicos prioris notæ candidè scripsisse *imparia* fuisse exquisitiora *remedia* superandæ lui , cujus indolem atrâ caligine obvolvitur omniscius ; adeò ut dubitare liceat num ex hocce truculentissimo morbo , qui ab hisce adjunctis copiis vix debellari patitur , arti vel naturæ viribus salutem debeant convalescentes : præter quam constet , uti jam innuimus , plures ab omni auxilio destitutos feliciter evasisse. Tradidit SANCTORIUS agros , quibus nil , præter opem medicam , deficiebat , feliciter cæteris juxtâ artis medicæ præcepta curatis , mortem effugisse : quod pluries etiam evenisse inter clades & funera pestis Massiliensis testabantur , dum viverent , Medici , qui huic summè periculoso inhæserunt ministerio. Coronidis loco addere juvat proborum virorum monitum ; adversus luem , tum allatis mercibus hærentem , tum in aëre latitantem ; cum ultrò citròque idem immineat periculum ; ut quisque scilicet curis publicis solutus , subitanè & maturâ fugâ suæ salutis consulat : inter varia prophylactica nil tutiùs excogitari potest , inquit RAMAZZINI , quàm celerior fuga à loco infecto , profectio ad longinquas regiones , & tarda reversio : quod consilium , salubriores Medicorum formulas longè antecellens , hoc versiculo exprimitur :

Mox , longè , tardè ; cede , recede , redi.



SUDOR ANGLICUS.

SUDOR
ANGLICUS.

INTER morbos acutos & breviores, fortè periculosissimus Sudor Anglicus (*la Svette*) haud ultra nychthemeri spatium plerumque protelatur: hinc haud malè definitur *febris ephemera pestilentialis*; quam nonnulli ad febrium putridarum classem infulsè referunt. Circà finem sæculi decimi quinti, referente WILLISIO, cui tamen illam observasse haud contigit, in Angliâ grassabatur antea inauditus hic morbus sui generis, & postea Daniâ, Norwegiam, aliasque regiones septentrionales peragravit, quem nescio quo fato paucis abhinc annis ad nos transmissum identidem observari fertur. Unum enim duntaxat virum triginta annorum hoc morbo correptum me vidisse memini in nosocomio regio Versaliensi, qui è levi morbo convalescens, dum de suo egressu latè cogitabat, in hunc sævissimum sudorem subitò incidit, quo intrà quatuordecim horas, variis frustra tentatis, raptus fuit. Nusquam per contagium latè propagatur, atque constitutio epidemica rarissimè ultra trēs menses protrahitur; hinc multum abest quin tantam stragem, ac pestis, edat; licet fortè sit indomabilior; cum ferè dimidiam ægrorum partem è medio tollat; præsertim si inexperorum curæ committantur. Ad hunc morbum proclives censentur, vigente constitutione, è febre inflammatoriâ convalescentes: subitò & crebrius invadit robustiores, ætatis viridæ, & viragines: sed rariùs attingit infantes, senes, macilentos & imbecilles.

Exordium capit hic apud nos insolens, & ancipitis naturæ morbus ab integrâ virium prostratione, vel animi deliquio. Nonnulli *primo incessu* rigore, vel tremore spasmodico concutiuntur, etsi interiora cæco carpuntur igne. Utramque invasionem excipiunt sudores uberrimi, qui hujusce morbi indolem, vel perniciem patefaciunt; & decumbentes sæpius brevi vel intrà viginti quatuor horarum spatium, illuc mittunt undè negant redire quemquam. Haud tamen, ubi diutius protrahitur morbus, omni periculo vacat; sed ut plurimum secundis avibus judicatur; præsertim si ad quartum vel quintum, imò ad septimum diem accedat. Hoc correpti, viribus mentis & corporis planè deficientibus, æstu vehementiori torquentur & sudore diffluunt, nonnunquam erumpentibus variis cutis efflorescentiis. De dolore lumborum conqueruntur, & siti intensiori excruciantur: ac demùm respiratione difficili, & anxiosâ premuntur. Quidam gravioribus cordis palpitationibus laborant: plerique cardialgiâ vexantur; anxietatibus etiam & lipothymiis crebrò recurrentibus conteruntur. Pulsus, sub hâc rerum conditione, varias mutationes subit; nunc velox & plenus deprehenditur; nunc tardus & obscurus, ac plerumque inordinatus exploratur. Interea mortis formidine anguntur miselli agrotantes; donec ad incitas redacti in delirium, vel soporem lethiferum incidant. Rarò inter

SUDOR
ANGLICUS.

hujusce sævissimi morbi curriculum sanguis è naribus vel ore profilit : sed sæpiùs se produnt variæ cutis efflorescentiæ , à pustulis morbillofis quandoque haud absimiles. Nonnulli demùm sublato morbo , haud integræ sanitati restituuntur ; sed per plures menses sudoribus nocturnis tenentur , quos sæpiùs concomitantur diversæ cutis eruptiones à levissimo frigore , nullo imminente periculo , retrocedentes. Quamdā observari febris malignæ speciem , quâ corpus etiam copioso sudore diffluit , jam suprâ notavimus ; addere licet hanc ab inexpertis , affinitate deceptis , pro mero sudore anglico perperam haberi : sed summè discrepant prædicti morbi , ratione invasionis , processûs & finis ; nec una & eadem curatio ipsis competit. Accuratam videre licet historiam hujusce febris speciei in diario medico mensis Aprilis , anni 1760.

Eò collimare debet *curandi methodus* , ut sudores per viginti quatuor horas foveantur : illosque remittentes promovere expedit ; ne latex pestilens , per cutis spiracula exitum moliens , intùs retrocedat. Sub hoc scopo omnis potus , duobus primis trihoriis , denegatur ; quibus elapsis conceditur , & nihil amplius movetur per diem integrum. Itaque stragulis ritè cooperti calidè in lecto se componant ægri , & à congruo situ minime dimoveantur ; nec auram frigidam captent : nequidem manus , solatiû causâ , aëri frigido committant , atque somnum omni arte arceant ; quibus sanè quidem non citrà summam molestiam obtemperant. Si sudor haud ex voto effundatur , hunc sollicitare expedit , frictionibus cum linteis , vel pannis calidis ; in hunc finem etiam intùs adhibentur diaphoretica , vel cardiaca exquisitiora ; summâ tamen cautelâ exhiberi debent hæc postrema medicamina , quæ noxam inferre queunt. Parùm , nemine ferè reluctante , conducit venæ sectio : hanc tamen vel repetitam faustè successisse in epidemiâ quâdam Bellovacensi (*de Beauvais*) asserere videbatur experientissimus BOYER Medicus Parisiensis ; qui tamen meliùs consultus prædictam constitutionem alterius esse indolis candidè declaravit. Cathartica nusquam ante integram morbi solutionem propinare fas est. Hoc cæterum morbo soluto , frigus vel leve angue pejus aliquandiù fugiant ægri : plures enim , hâc posthabitâ cautelâ , alvi fluxu periculoso corripiebantur ; vel in eundem morbum primo insultu sæviorem incidebant.



FEBRES INTERMITTENTES.

FEBRES
INTERMIT-
TENTES.

NEMINI, vel rudi & inexperto haud innotescit febris intermittens, quæ varias sub se complectitur differentias: nec latet oscitationes, pandiculationes & lassitudines spontaneas; frigus cum extremorum pallore, anxietates & nauseas pro hujusce *febris prænuntiis* haberi. Rigorem, quo totis artubus contremiscunt, plerique patiuntur; ac tanto nonnulli frigore corripiantur ut crura admotum ignem minime sentiant. Pulsus interea, sub algore febrili obscurus, sensim evolvitur; calor per totum corpus diffunditur; caput, vel cætera membra dolent; erumpunt in nonnullis exanthemata variæ indolis, & plerumque pruriginosa; aliave exsurgunt symptomata, nunc mitiora, nunc graviora; donec erumpente sudore omnia ad alcyonium statum redigantur; vel subsequatur apyrexia. Urinæ, decresciente vel victo paroxysmo, lateritiæ occurrunt; vel fæces deponunt pulveris laterculorum æmulas. Hic est vulgarissimus *intermittentis* essentialis *processus*: sed sub eodem conspectu sæpius se produnt symptomatice, etsi alterius indolis; febres scilicet catarrhales, hysterice & verminosæ; febres à reconditâ purulentiâ, ab obstructionibus; aliæque benè multæ, de quibus alibi, nonnunquam idem schema præ se ferunt; adeo ut vel oculatiores decipiantur, innumerique emergant errores misellis ægrotantibus lugendi. Varias etiam formas induit *genuina intermittens*; ac sæpius alterius morbi faciem mutuatur; cujus tamen periodi, consueto intermittentium ordine, recurrunt. Hujusce commatis observantur cephalalgia; oculorum, dentium, aliarumve partium dolores, ophthalmia, insultus comatosi, vel convulsivi; hemiplegia, orthopnoea & ferociiores cordis palpitationes; nausea & vomitus cum anxietatibus molestissimis; dolores colici, alteriusve indolis, alvi profluvium, &c. Notare expedit, quod horumce morborum cognatorum paroxysmi, statis temporibus reduces, nullo sæpius calore febrili conspicuo designentur. Nonnulli demùm Authores, penes quos sit fides, se observasse testantur febres quasdam partiales; in dimidiâ scilicet capitis parte, in uno vel altero brachio, &c. Notissima sunt alia *intermittentium discrimina*: neminem enim fugit febrem quolibet die recurrentem esse vel quotidianam, vel duplicem tertianam, vel triplicem quartanam: febrem alternis diebus invadentem tertianam vocitari: si verò hujusce postremæ accessio duplex stato die observetur, aliam duplicis tertianæ, sed rariorem, speciem constituit. Ubi paroxysmus tertio duntaxat die insurgit, febris quartana audit: si verò è tribus diebus, unus tantum sit febris expers, duplicis quartanæ exemplum præbet. Febris demùm singulis diebus accedens, alternisque duplex; hemitritis vel semi-tertiana dicitur. Postremò haud reticendum quod Authores de aliis speciebus mentionem subjiciunt; quæ scilicet die

FEBRES
INTERMIT-
TENTES.

quintâ , sextâ , septimâ vel octavâ recurrunt ; aut singulis mensibus , annisve redeunt : sed hæc mira , & à publico rerum ordine aliena , consultò prætermittimus.

Nostræ sanè quidem indagini subtrahitur proximâ febrium intermittentium *causa* : sed nemo nescit hoc morbi genus à fructibus immaturis vel horæis , ab aëre caliginoso vel vento imbrifero , locis paludosis , &c. plerumque sobolescere. Primi *paroxysmi* febriles mitiores , ut plurimum , observantur ; sed vires acquirunt eundo : hos antecedunt , uti suprà innuimus , oscitationes , pandiculationes & lassitudines , variarum partium dolores ; manuum & labiorum pallor , unguum livor , frigus nasi & extremorum , rigor & horror. Quibus accedit æstus febrilis , sudore plus minusve conspicuo judicandus. Haud desunt tamen accessiones febriles à calore , nullo prævio frigore , initium fumentes ; dùm aliæ absque sudore & cute planè siccâ solvuntur. Plerique ægotantes , ingruente paroxysmo , nausæâ & vomitu vexantur ; alii somnolentiâ tenentur , vel doloribus interaneorum torquentur. Urinæ in potiori parte , vigente vel cessante sudore , lateritium colorem referunt : imò & à nonnullis habentur pro signo pathognomonico febrium intermittentium ; vel morbi cujusdam à causâ febrium intermittentium ortum ducentis ; adeò ut dubium circà febris indolem urinæ lateritiis plerumque solvatur ; præsertim ubi prima invasio colicam spasmodicam , vel apoplexiam æmulatur. Si urinæ post paroxysmum non turbentur , præsertim inter intempestivum febrifugorum usum , pessimæ audiunt. Haud leve portendunt periculum nubeculæ nigræ. Procellosi nonnunquam occurrunt insultus febriles ; non solum acerbissimo rigore per plures horas producto , quem excipit æstus vehementior ; sed etiam atrocissimo capitis dolore , delirio , aliisque gravioribus symptomatibus. Febres intermittentes , continuarum instar , inordinatas vel anomalas sæpiùs observari , jam suprà inculcavimus ; adeò ut earum characterem assequi vix liceat ; ni apprimè attendatur ad invadendi modum , ad quemdam paroxysmorum typum , aliaque antecedentia vel conjuncta , quæ ritè pensitata febris indolem prodere queunt : sed scire juvat intermittentes inordinatas esse utplurimum spurias , vel merè symptomaticas : id genus sunt scorbuticæ , febres quæ à puris confectione , vel aliâ viscerum labe ordiuntur , nocturnæ copiosioribus stipatæ sudoribus , aliæque de quibus jam mentionem subjecimus. Postremò febres intermittentes aliis affectibus quandoque sociantur ; undè emergunt morbi impliciti & ferè inextricabiles , qui grave curantibus facessunt negotium.

Intermittentes legitimæ à propriâ indole hand deffectentes ; quæ scilicet , juxtà consuetum ritum , frigore incipiunt & in sudorem desinunt , succedente apyrexia vel lucido intervallo , periculo vacant ; ni febricitantes extremo senio , vel morbo quodam chronico sint confecti : imò & sæpiùs salutare audiunt ; cùm ab harum accessu nonnulli affectus diuturni fileant , vel planè exulent. *Hyemales* & *vernales* , æstivis & autumnalibus breviores , & curatu faciliores jure censentur : primæ , quæ peculiari ingenio

gaudere videntur, fugantur dum cætera caput exerunt: alternis vicibus ab ineunte vere depelluntur postrema. Vernales tamen pertinaciores fiunt, imò & typum, vel accessionum ordinem, commutant, pristinamque faciem exuunt, si æstas sit frigidior & humidior: autumnales verò ab æstuoso hyeme invalescunt. Paroxyfmi breviores, statas horas antecedentes, morbum mox desitutum indicant. Idem esto iudicium, si secundam vel quartam accessionem molestissimam excipiat remissior; tùm quarta vel septima agmen claudere solet. Abdominis inflatio in infantibus, intumescencia crurum œdematosa in adultis; pustulæ circa labia erumpentes, &c. sanitati præludunt. Haud perfectam sanationem *hariolari* licet à sublatâ febre nisi post viginti dies, vel integrum mensem elapsum; cùm sæpiùs ab insolatione, aëre nebuloso, aurâ matutinâ frigidiori, vespertinis vaporibus, vel rore serotino; ab acetariis, fructibus crudis pravæ notæ, incongruoque regimine; à labore improbo, lapsu ab alto; à lucubrationibus; ab irâ, terrore, aliisque animi pathematibus; ab intempestivâ venæ sectione, inopportuno cathartico, balneo, &c. recrudescat. Insuper si valetudinariorum pallor post febris decessum in eodem statu perstet; si appetitus haud redintegretur, nec vires reficiantur; si caput doleat, erumpant sudores nocturni, &c. morbi mineram haud ritè fuisse extirpatam conijcere licet: hinc intelligitur cur febris post quatuordecim vel viginti dies absque causâ manifestâ revirescere soleat. Sopor, nonnunquam apoplexiæ prodromus, pessimum audit febris intermittens symptoma in senibus; qui etiam à rigore febrili in vitæ discrimine versantur. Intermittentes contumaciores, & quarum perturbatur accessionum ordo, in icterum, hydropem, aliumve affectum chronicum facessere neminem practicum fugit. Intermittentes, præsertim autumnales in continuas vel pravi moris haud rarò degenerant: cæteroquin continuas in intermittentes transire; & febres malignas intermittens faciem præ se ferre, suprà notavimus. Postremò plures alias mutationes, sed minoris momenti, subeunt intermittentes; nimirum tertiana simplex & legitima in duplicem tertianam, quartanam simplicem vel duplicem, sæpiùs facessit: quod sanè arguere videtur omnes intermittens species haud absimilis esse indolis, vel meros esse modos unius & ejusdem affectûs.

Nil ferè præter productum morbosum exhibere *secta cadavera*, è propriis observationibus, & aliorum naturæ rimatorum relatu, colligitur. In hunc censum venit cruor ater & crassus cordis receptacula, & majora vasa replens, in rigore febrili extinctis. Post diuturniores intermittentes, affectusque pedissequos; deteguntur infarctus skirrhosi, phlogoses, siderationes, & abscessus, plerumque in hepate quod sæpiùs mole portentosum occurrit; sed rariùs in pancreate & mesenterio. Lien sub diverso conspectu se præbet; nunc exsiccatus & corrugatus reperitur; nunc mole amplissimus, cum propriâ capsulâ hiulcâ; aliàs putredine correptus, & fæcum vini instar contrectatu diffluens. Occurrunt quandoque hæc viscera tantummodò contracta; vel à nativo colore recedentia, & quasi adusta: sed

FEBRES
INTERMIT-
TENTES.

epiploon putredine, quoad præcipuam partem, absumptum prius ante oculos versatur. Vena portæ sanguine ut plurimum sæculento turgēt : vasa bilifera latice atro-viridi ultramodum replentur. Inter cætera demum notatu digna recensentur pseudolapides in vesiculâ felleâ, flatulentia & coarctationes in tubo intestinali, prominentes tumores in peritonæo & mesenterio : variæ stagnationes, cor inane cum aquâ in pericardio, intestina lumbricis scatentia, &c.

Intermittentium *curatio* minime est festinanda; jure enim vituperandi, qui moræ impatientes febris sufflaminatiōem haud citrà feram pœnitentiam moliuntur. Equidem si febris juxtà nonnullorum mentem sit peculiaris sanguinis fermentatio, quam prodit celerior hujusce laticis æstuantis motus; & excipit, morbo desinente, quædam depuratio, vel præcipitatio; sequitur haud citrà periculum salubriorem huncce naturæ motum intempestivis remediis perturbari. Itaque ad specificum notissimum non nisi post tertium quartumve paroxysmum devenire licet; ut, ritè prius pensitato febris processu, nullum sit dubium circà ejus indolem. Nec futilis est hæc cunctatio; cum tunc temporis, celebratâ venæ sectione & institutâ emesi, vel catharsi, propinentur diluentia & temperantia; haud sanè posthabito, congruo victus regimine. Non solum his præmissis tutior est specifici usus; sed sæpius prævio hocce curandi ritu exulat febris, imò & pluries mihi observasse contigit aquam simplicissimam per triduum & ultrâ, affatim, vel ad sex vel octo libras singulis diebus haustam, non solum febres recentes, sed vetustiores, aliisque præsidiis domari nescias, incantamenti instar profligasse: hinc haud ineptè fertur famem hujusce ægritudinis præclarum esse remedium. Præmissâ igitur venæ sectione, si vires ferant, quæ, nonnunquam jubente plethorâ, iteratur, emeticum opportuno tempore propinatum sæpius, causam morbi extirpando, omnem causam absolvit: præsertim, si à copiosâ bilis porraceæ & æruginosæ evacuatione inaniatur cystis fellea; quæ fortè recondit genuinum morbi fomitem: quod centies observasse memini. Tanti æstimatur à solertioribus hoc remedium ut plerumque iteretur, dum vigent febres autumnales; vel ubi lingua muco obducta, oris amaror, & nausæ illud suadent. A venæ sectione & vomitorio abstinendum sæviente paroxysmo; quidquid obgannient, qui à calcato tramite recedere gloriantur, ut fatuorum admirationem sibi concilient. Venam tamen, tunc temporis, tundere licet si æstus febrilis sit intensior, si dolor capitis sit acerbissimus; vel id genus alia, vigente plethorâ urgeant symptomata; nec tùm vetatur vomitorium, si ægrotantes nausæâ ultramodum divexentur: aliàs nil movendum, *procedente insultu* febrili; sed sanguinis æstui prospiciendum diluentibus, temperantibus & nitrosis: his sedulò peractis, ad specificum devenire licet; si res expostulet. Latissima est, in alterâ hujusce operis parte traditâ, febrifugorum classis: nemo nescit quid valeant radices pentaphylli, enulæ campanæ, & gentianæ; folia cardui benedicti, fumaris, chamædryos, absinthii & centaurii minoris; flores calcitræ & chamæmeli; aquæ

minerales, &c. quibus omnibus febrifugis, quæ ferè jam in defuetudinem abierunt, palmam sanè præripit *cortex peruvianus*: sed haud omnibus congruit, nec innoxius censetur, si inopportuno tempore exhibeatur. Rarò opus est kinâkinâ in febribus vernalibus, quæ ut plurimum diætæ & diluentibus cedunt: quoad cæteras; non nisi post plures insultus, quibus latex febrilis quasi diffatur, tutò præscribitur illud febrifugum: etenim hâc posthâbitâ cautelâ, non solum nullum juvamen præstat, sed noxium evadit hoc medicamen, etsi febris coercetur. Norunt sanè in arte periti plures febricitantes à præmaturo, vel intempestivo kinâkinæ usu, in graves morbos incidisse; in icterum nempe & obstructions; in hydropem, asthma, affectus comatosos & convulsivos, aliosque fugatâ febre contumaciores & periculosiores: adeò ut sapiùs præstet in hoc casu febrem revocare; ad quod opus nonnulli adhibent venæ sectionem, catharticum; vel spiritum salis ammoniaci. Insuper haud tutò exhibetur laudatum specificum; ineunte vel vigente paroxysmo; nec magis congruit paulò ante febris invasionem. Si pluribus benè cesserit hæc methodus: aliis, teste SYDENHAMO, summam noxam intulit.

Nusquam dubitare licet quin sanguis & humores sudorum beneficio à materiâ febrili sensim liberentur: hinc intelligitur cur ab intempestivo corticis peruviani usu varii emergant morbi coercitâ febre longè periculosiores: hæc est celebriorum pragmaticorum opinio; quæ, vel tralatitiâ experienciâ; quotidie comprobatur. Ab hâcce *curandi normâ* nonnunquam tamen deflectere licet; imò & expedit ubi scilicet ab insultibus vehementioribus jam effecti ægrotantes, vel senio confecti, in vitæ discrimen trahuntur. Sub quâ rerum conditione, consultius est anceps, ut inquiunt, experiri remedium; vel nullâ interpositâ morâ, urgentiori succurrere: aliàs haud nisi post tres quatuorve paroxysmos opportunè exhibetur laudatum febrifugum. Cerris etiam cancellis contineri debet kinâkinæ usus; ne pessimo pseudo-Medicorum more, qui tandiù huicce cortici hærent, quandiù protrahitur febris, ægrotantium res in pejus ruant: vix enim tutò ultra duas vel tres uncias, partitis vicibus, per totum morbi decursum hoc præcipere licet. Aliàs, uti pluries nobis vidisse contigit, ab immodico febrifugi usu, varii emergunt morbi chronici; obstructions nempe, hydrops, hæmoptysis, &c. Ideò ubi febris designatâ dōsi minime obtemperat, alia est ineunda medendi via: ad cætera scilicet amara vegetabilia; ad aperientia, martialia, aquas minerales, &c. confugiendum. Cæterum maximi est momenti ut hic cortex eligatur legitimus vel prioris notæ; cum spurius vel adulteratus, quo nonnullæ scatent officinæ, summam noxam inferat; nedum expectatum effectum edat; quod altâ mente tenere debent qui rem medicam perfunctoriè tractare solent. Nondum constat de regimine ægrotantium, inter corticis peruviani usum; cum in contrarias sententias de hâc re abeant Authores: partim plenum victum agris concedendum esse autumant; partim tenuissimo inharendum esse cogitant: utramque methodum

FEBRES
INTERMIT-
TENTES.

feliciter successisse pro comperto habemus ; sed tutiorem esse postremam , nulli dubitamus.

Ergà decantatum *febrifugum exoticum* , cui sæpiùs faustè sociatur camphora , observare juvat , illud incassum sæpiùs adhiberi , si paroxysmi febriles diutiùs quàm par est protrahantur ; vel solito tardiùs recurrant : iners etiam judicatur adversùs accessiones febriles , frigoris & sudoris expertes. Periculosum censetur si rubræ & supra modum tinctæ maneant urinæ , annuentibus BAGLIVIO & HOFFMANNÒ. Sub utroque casu proficue usurpantur temperantia ; cichorium nempè , lapathum , & lingua cervina ; crystallus mineralis , sal Glauberi , arcanum duplicatum , & similia ; quibus scilicet tempestivè exhibitis minime denegantur vires febrifugæ. Nec semper ex voto succedit cortex peruvianus in intermittentibus legitimis , etiamsi solertiori manu tractetur ; cur sit ut pluries in subsidium vocentur alia febrifuga ; flores nempè chamæmeli ; sal ammoniacum aquâ tepidâ solutum ; infusum salviæ , vel serpentariæ virginianæ ex vino albo ; aliaque ejusdem commatis , quæ profectò exquisitiora audiunt remedia ; si unâ vel alterâ horâ ante paroxysmum propinentur. Pluris etiam habentur succus limonum aquâ temperatus ; theriaca ; piper integrum , pulvis viperinus , &c. Nemo non novit gentianam , absinthium minus , aliasque plantas amaras ; quæ , priusquam innotuisset kinakina , in vulgatissimum usum , haud sine successu , trahebantur. In eundem censum etiam venit urina pueri vel adolescentis , quæ manè ad cyathum , singulis diebus , propinata , sibi par fortè non habet ad eradicandas febres contumaciores ; quod remedium sanè pluries profuisse novi : pluris etiam habetur sal ammoniacum , dummodò stomachi vires ferant. Hæc munia postremò obeunt aquæ minerales , tam frigidæ , quàm thermæ ; quæ , cæteris præsidiiis incassum adhibitis , curationem ut plurimum feliciter absolvunt. Nonnullis etiam arridet cortex fraxini , cui addunt sal absinthii ; sed huicce febrifugo , non secùs ac aliis innumeris quibus turgent libri minime fidendum. Nonnunquam tamen juvat singula cujusvis fortis nosse , cum pro re natâ hæc vel illa ab expertis faustè usurpari queant. Silentio minime prætermittenda sunt hypnotica ; aliquot horis ante frigus exhibenda , quorum usus sub hac conditione antiquissimus à pluribus primis subsellii recentioribus laudatur.

Si futurus *rigor febrilis* , uti nonnunquam evenit , respectu senum & debilium , *mortem minetur* ; nil non movendum , ut præcaveatur vel leniatur , largo haustu aquæ tepidæ per duas vel tres horas antè frigoris exortum. In eundem scopum præcipitur ptisanna è sarsaparillâ ; decoctum borraginis & bardanæ , infusum cardui benedicti ; & florum sambuci ; sal ammoniacum , aliaque diaphoretica ; quibus tempestivè usurpatis , plures ex orci faucibus ereptos vidi. Suas laudes etiam meretur narcoticum , haustum , si nil obstat , horâ integrâ ante rigorem febrilem ; quod remedium opportunè exhibitum inter præstantiora remedia à quibusdam numeratur. Haud inutilem opem in hisce angustiis conferre valet oleum cinnamomi , vel

caryophyllorum, quod linimenti instar scrobiculo cordis admoveatur. Illud tamen notare expedit, circa remedia stimulantia, procedente morbo, exhibita, quod nonnunquam intermittentem in continuam convertant. Idem infortunium accersere valet ambitus corporis calidior à cottinis & stragulis, quibus praposterè quasi sepeliuntur decumbentes: nec minorem perniciem infert sufflaminata perspiratio à suscepto frigore, quo febris contumacior & periculosior evadit; quod sæpius experiuntur qui haud absolutâ diaphoresi, quâ materia febrilis diffilari solet, è lecto, quem molestè ferunt, citiùs quàm par est surgunt. Cæterum haud inconsultò exhiberi debent cathartica post sublatam febrem; ne revitescat, & ægri recidivam patiantur; quod sæpius evenisse testantur SYDENHAMUS, aliique primi subsellii Authores, quibus assensum denegare vetat propria experientia: imò nec tutò, sub hoc rerum statu, injici posse enemata plures cogitarunt: innoxia tamen censerì debent utraque remedia; si febris spontè desierit; vel cautè proteletur usus febrifugi, cui sociantur purgantia per alvum. Si demùm intermittens in continuam vel remittentem facesserit, pristinum typum à sectâ venâ, vel à propinato cathartico recuperare valet.

Porro *cortex peruvianus*, veluti cætera febrifuga, haud minùs congruit febribus intermittentibus larvatis, quæ scilicet sub alterius morbi facie occultantur, quàm iis quæ se sistunt in propatulo: dummodò morbi magis conspicui haud posthabeatur ratio; intermiscendo nempe kinækinæ, vel succedaneis, remedia huic postremo dicata; nimirum cephalyca in affectibus comatosis & paralyticis, antispasmodica in convulsivis, bechica in pulmonum læsionibus, cardiaca in lipothymiis, demulcentia ad varios insultus colicos, non secùs ac pro doloribus cæterarum partium; qui etiam efflagitant hypnotica, venæsectiones, &c. hisce remediis, pro se natâ usurpandis, sociatus cortex febrifugus, dummodò præmittantur jam indicata generalia, & solitæ adhibeantur cautelæ, egregium effectum præstat: imò & expedit ut largiori manu, in nonnullis casibus, exhibeatur febrifugum; ad præcavendos scilicet, vel compescendos graviore paroxysmos, cor, cerebrumve impetituros; hinc pro mortis præconibus nonnunquam habendos.

Quandoquidem *pueri corticem peruvianum* ob ingratum saporem *aversantur*: ex illo paratur extractum quoddam siccum, quod salis DE LA GARRAYE nomine venit; & succedanei instar, minori dosi exhibendum in usum trahitur: vel conficitur syrupus horum palato magis arridens: & eandem fermè opem præstans. Si demùm hæc quæcunque medicamina ore sumenda pertinaciter ab ipsis respuantur; ad *enemata febrifuga*, quæ iisdem viribus pollere videntur confugere juvat. Nec inutilia censerì debent hæc enemata pro nonnullis adultis, quibus invisus est cortex peruvianus; dummodò unciam integram hujusce corticis recipiant & ter quaterve per diem injiciantur; donec debelletur febris; quâ fugatâ aliquandiù horum usus est protelandus juxtâ solitam methodum; ut

FEBRIS
INTERMIT-
TENTES.

præcaveatur paroxysmi reditus : adeò ut ad integram curationem sesqui-
libra prædicti corticis hâc methodo usurpetur. Alia contusa carpiſ manuum
vel plantis pedum alligata summè à quibusdam deprædicantur. Nec levi-
ter culpandæ nonnullæ consuetudines, longo usu probatæ ; etiamsi harum
ratio nos lateat. Innumera demùm , uti neminem latet , occurrunt *topica
empirica* , ab insciâ plebe comprobata , quæ à clinicis planè despiciuntur.
Viribus tamen medicis haud omninò defraudantur ; imò interdum pro-
fuisse constat ; num à certâ ægrotantium fiduciâ suam virtutem mutuen-
tur , dubitare licet. Nonnullos enim vidimus gestantes chartulam con-
tractam , & signatam , cui antea vultu composito , & ridiculo quodam
spectaculo , inscribatur sententia à quovis poëtâ fortuito deprompta ,
pristinæ valetudini præter adstantium spem restitutos. Insuper nemo nescit
gaudium , iram , terrorem , cæteraque animi pathemata , (quæ aliàs sunt ,
ut neminem fugit , totidem causæ , quæ , uti suprà innuimus , extinctam
febrem revocare queunt ;) sæpiùs febrem fugasse. Lapsus ab alto , aliudve
infortunium , eundem quandoque effectum præstare experienciâ com-
pertum manet. Minime sanè mirum ! cùm neminem Physico-Medicum
fugiat , quid valeant mentis perturbationes in œconomiam animalem :
nec parvi sæpiùs refert , ut hæc naturæ phænomena , etsi à publico rerum
ordine aliena , assequantur clinici ; ut ab his benè perspectis curandi ju-
diciuſ dirigatur.



FEBRIS QUOTIDIANA.

PRÆMISSIS quæ ad febrem intermittentem generatim spectant ,
superest ut vulgatiôres , notissimasque species breviter recenseamus. In
hoc censu perperam collocatur *febris quotidiana* , vel singulis nychthe-
meris recurrens ; cùm ratione indolis toto cœlo distet à genuinis inter-
mittentibus ; & causam pertinaciorem , pravam nempe sanguinis diathe-
sim , vel labefactata viscera agnoscere videatur : sed ordinem omnibus
acceptissimum prosequi nil vetat. Cæteris intermittentibus rariùs occurrit
quotidiana legitima , quæ verè ut plurimum se profert , & nonnunquam
quasi epidemicè grassatur. Paroxysmis æqualibus & statâ horâ redeunti-
bus , sat discrepat à duplici tertianâ & triplici quartanâ : equidem nemo
nescit primum , tertium & quintum paroxysmum duplicis tertianæ esse
in eâdem ratione ; & parem ordinem observari erga primum , quartum
& septimum duplicis quartanæ. Insuper à levi frigore *initium* ducit quo-
tidiana , succedentibus calore & pulsus velocitate remissioribus , & parco
sudore judicandis. Breves ut plurimum paroxysmi , rarissimè duplices ,
ab horâ sextâ matutinâ ad septimam ingruentes , nonnunquam capitis
dolore , cardialgiâ , inflatione abdominis , &c. stipantur. Ad menses &
annos protelatur hæc febris species ; imò fertur quemdam , qui fatis cessit
ætatis

ætatis anno nonagesimo quinto, hâc per sexaginta annos laborasse. Notare expedit quotidianam sæpius larvatam incedere; sub facie scilicet doloris capitis, arthritici, rheumatici, colici, &c. & ejus accessiones nonnunquam ad duodecim vel quindecim horas & ultrâ accedere. Quartanam in quotidianam quandoque abire nonnulli tradiderunt: num triplicem quartanam pro quotidianâ habuerint dubitare licet? cùm nullam esse affinitatem inter utramque jam suprà declaravimus. Quædam febres symptomaticæ, nempe ab hysteri, mensibus suppressis, &c. quotidianam etiam mentiuntur; sed earum paroxysmi haud statim horis exsurgunt, & nullo ordine recurrunt.

FEBRIS
QUOTIDIANA.

Quotidiana, licet cæteris intermittentibus diuturnior, *periculo* ut plurimum *vacat*; ni præposterâ medelâ, proprios limites transcendens in continuam vel lentam facessat: hinc congruâ institutâ victûs ratione, cunctari & supersedere expedit; donec certò constet de morbi genere. A perspectis hujusce febris phænomenis, conjicere licet ejus fomitem, uti suprà innui, in primis viis, vel in visceribus digestionis famulantibus delitescere. Ideò saburræ stabulanti in stomacho & tubo intestinali primò, sub dilucidis intervallis, prospiciendum *vomitoriis* & *catharticis*; quidquid reclament qui curationem à venæsectione auspicandam esse autumant. Haud tamen veratur sanguinis missio, ubi sanguis præfervidus in vasis redundat; sin minus omittendam esse, apud saniores practicos ratum manet. Foràs eliminatis pravis digestionum reliquiis, ad referandas viscerum obstructions, quæ hoc morbi genus fovere videntur, converti debent clinicorum curæ: ideò omnem implent paginam *aperientia* & *martialia*; quorum vires æmulantur, imò & superant tonica. In subsidium etiam vocantur stomachica & amara, sub infarctis visceribus summè proficua: nec despicendus est, observatis legibus medicis, cortex peruvianus, quem præter virtutem febrifugam, hanc febris speciem minime respicientem, vi stomachicâ & roborante pollere, nemini haud obvium. Sed legitimam curandi methodum nequidem per somnium norunt, qui juxtâ aliarum febrium intermittentium normam, huicce cortici febrifugo præposterè hærent.



FEBRIS
TERTIANA.

FEBRIS TERTIANA.

HÆC inter congeneres vulgatissima, haud dilucidè se prodit, nisi post tres elapfos dies; cùm invadendi modo, vix à cæteris discrepet; vel sæpiùs graviozem morbum mentiatzr. Alternis diebus accedit, vel à primo insultu, tertio quoque die, statts temporibus, vel aliquantò antè; ac sæpissimè matutinis horis recurrit. Ejus *paroxysmi*, præeunte frigore, à sex ad duodecim horas, erumpente sudore, judicantur: nonnunquam tamen ad viginti imò & triginta horas protrahuntur. Quartus vehementior & longior observari solet; sed sequentes mitiores & breviores plerumque evadunt. Validiores & æstuosos paroxysmos excipit genuina apyrexia: si verò debiles sint, quidpiam febrile, intermedio tempore, præ se fert pulsus. Quò breviores sunt, eò sudor uberiùs erumpit: parciùs verò se præbet, vel planè deficit post longiores. Febrem malignam sub specie febris tertianæ sæpiùs produci, jam suprà notavimus: hoc imminet periculum; ubi insultus, ultrà præfixos limites protensi, nullo ordine recurrunt; ac præsertim si diebus intercalaribus, de cephalalgia, anxietatibus, virium lapsu, &c. nonnullo remanente febris vestigio, conquerantur ægri. Insuper plures febres symptomaticæ; hystericae nempe, verminosæ, aliæque de quibus suprà, tertianam æmulantur; sed peculiare habent prodromos singulæ illæ febrium species; quibus ritè pensitatis, errorem deflectunt exercitatiores. Paroxysmi alternis diebus recurrentes *tertianam legitimam* produnt: ubi verò singulis diebus redeunt, *tertiana duplex* audit. Bini insultus intrà nychthemeri spatium exsurgentes, cum die intercalari, alteram duplicis tertianæ speciem præbent. Aliam commemorat TULPIUS, penes quem sit fides; cujus scilicet paroxysmi bis singulis diebus insurgunt, hinc quadruplex tertiana vocitatur. Porro inter congeneres numeratur *semi-tertiana*, vel hemi-tritis, quæ si ad accessionum reditum rudiori modo attendatur, è quotidianâ & simplici tertianâ constare videtur; cùm quolibet die redeat accessio; & alternis diebus duplex evadat: sed id febris genus à tertianæ indole planè recedere videtur; quin potiùs ob truculentiora quibus stipatur symptomata ad febrem malignam vel pestilentialem spectet: adde quod per contagium propagetur, & sæpiùs epidemicè grassetur in Italiâ & Germaniâ hic morbus Herculeus; aliàs in nostris regionibus rarissimus.


Tertiana legitima, & præsertim vernalis, septem ut plurimum circuitibus judicanda; & cujus materia morbosa solito caloris gradu subigitur, non solum *periculi est expers*, sed sæpiùs salutaris evadit; ejus scilicet auxilio nonnunquam averruncantur obstructions, cachexia, insultus convulsivi, alii que affectus chronici etiam exquisitoribus præsidii obscurdescetes. Paroxysmi solito tardiores febris decessum ominentur: si citiùs

pro more accedant, metus est ne tertiana, à proprio ingenio desciscens, in continuam faceſſat. Inſultus longiores & inordinatos, cum intermiſſionibus moleſtis, haud minorem formidinem incutere ſuprà notavimus. Pro merâ evacuatione criticâ habetur ſudor in hâcce febris ſpecie; quo ſufflaminato vel impedito, majorem ſævitiem exercet futurus paroxyſmus. Sudoris vices nonnunquam ſupplent vomitus & alvi profluviū: ſed urinae hâc munia rariffimè obeunt. Puſtulæ circa labia erumpentes ſanitati præludunt; potiſſimùm ergà febres vernales. Tertiana demùm diuturna, vel præpoſterâ curatione impugnata, affectus chronicos ſæpiùs poſt ſe trahit. Duplex tertiana ſolutu difficilior cenſeri debet, ob breviores intermiſſiones quæ anguſtius tempus præbent ad exhibenda ſpecifica. Hemitritis, vel ſemi-tertiana, febris malignæ planè ſuppar; quæ ut plurimùm comitem habet phlogoſim; & cujus paroxyſmi ad viginti quatuor vel triginta horas & ultrà accedunt, inter morbos exitiales jure numeratur. Si præter ſpem ex hoc diro affectu evadant ægri; caveant ejus reditum ſolitum eludere Medicorum artes. Eviſcerata cadavera hoc morbo extinctorum nil præter infarctus, phlogoſes, putredinem & necroſim exhibent. Omentum præcipuè abſumptum & gangrænoſum conſpicitur.

A venæ ſectione, ſi vires ferant, ut plurimùm ſuſcipitur variarum tertianæ ſpecierum *curatio*: dein primis viis emetico proſpicitur; & poſtero die, ni obſtet paroxyſmus, propinatur catharticum, ut ſordes in digeſtionum receptaculis nidulantes, quæ hunc morbum fovere ſolent, prorsùs everrantur. Ab exhibito poſteà ſpecifico, cujus agendi modus in obſcuris latet, facilè coercetur quintus vel ſextus paroxyſmus. Præter corticem peruvianum, cæteraque febrifuga amara, quæ peculiari contrà hancce febrem efficaciâ pollent; alia uſurpantur præſidia; tonica nempe, diaphoretica, aperientia & diuretica; inter quæ nitroſa haud inſimum locum tenent: ſed hæc omnia ſuperflua cenſeri debent in tertianâ legitimâ & vernali, quæ ut plurimùm ſpontè deſinit, vel generalibus remediis fugatur. Si tertiana ad febrem malignam vergat, alia ſuperiùs tradita ineunda eſt medendi via: nec abſimilem expoſtulat methodum ſemi-tertiana; febris, uti jam inculcavimus, malignæ cognata: conducunt ſcilicet, præmiſſis præmittendis, temperantia, nitroſa & antiputrida, diaphoretica, abſorbentia, cathartica, aliaque de quibus ſuprà: inefficacem, vel noxium eſſe adverſùs hancce poſtremam, corticem peruvianum ex obſervatis colligitur. Inſuper laudantur ſalia neutra, ut ſpiritus Mindereri, ſal abſinthii cum ſucco limonum, &c. adverſùs febres anomalas, ad intermiſſiones, vel remiſſiones regulares, ſeu typicas, reducendas. Coronidis loco addere juvat quod aqua ſimpliciſſima egregium præbeat hujusce remedii ſuccedaneum: hæc enim per tres, quatuorve dies pro omni potu, vel affatim hauſto, citiùs & tutiùs ipſomet cortice, vel exquisitiori, tertianam ſimplicem vel duplicem abigere ſolet. Prætereà kinakina inferioris notæ, vel præpoſterè exhibita ſæpiùs haud levem perniciem infert: aqua verò, ni vires planè deficient, ſemper innocua cenſeri debet. Neminem poſtremò

 FEBRIS
TERTIANA.

practicum fugit, quod sæpiùs ab usu corticis specifici febris tantummodò sopiatur, denuò reversura: ac ne minimum quidem reditûs periculum incurrunt, qui aquæ beneficio curantur. Sed proh dolor! paucis arridet remedium vulgatissimum & nullius pretii: nec desunt delicatuli qui, inconsultâ experienciâ, hanc diætam tenuissimam, haud citrà periculum adhiberi posse, per plures dies, existiment; quibus nil aliud præter PLINII effatum objicimus: qui volunt decipi, decipiantur.



FEBRIS QUARTANA.

SUPRA traditis de hâc pertinacissimâ febris specie addere licet *paroxysmum*, ratione frigoris & caloris, haud vehementem, tertio quoque die, ut plurimum post meridiem, recurrere; nec ultrâ sex horas protelari: imò successu temporis brevior evadit; adeò ut intrâ horam nonnunquam contineatur; atque in sudorem parcum, ni planè deficiat, desinit. Notare tamen expedit quod nonnulli ægrotantes, post septimum paroxysmum, de sudoribus nocturnis quotidianis conqueruntur, qui ultrâ mensem rarò protrahuntur. Insuper *quartana*, ob ingentem ciborum appetitum, cui plerique obtemperant, indomabilior evadit. Nec reticendum sanguinem venæsectione eductum crustâ quâdam exalbidâ vel subflavâ obduci; quam perperam pro inflammationis indicio haberi, per transennam observare juvat. *Duplicis quartanæ* paroxysmos primo & altero die; quarto & quinto; septimo & octavo; & sic deinceps, ingruere supra notavimus. In *triplici* verò *quartanâ* quolibet die insurgit accessio: sed in utrâque febre paroxysmus quarto die invadens primo respondet; ac tertio quoque die eâdem ratione, in posterum redit: atque hâcce notâ ritè distinguitur triplex quartana à quotidianâ.

Scitur *quartanam* nonnunquam *ad plures annos*, cum tamen variis dilucidis intervallis, protelari; præsertim in senibus & melancholicis: etenim quartanam viginti annorum se vidisse testatur BLAW. Hinc minime mirum, si tum ægri, tum medentes longioris curæ pertæsi, ejus diuturnitatem ægrè ferant. Hancce febris speciem haud bis invadere in toto vitæ curriculo perhibent; quod experienciæ, ni fallor, nequaquam adversatur. Longioribus tamen intermissionibus duarum scilicet vel trium hebdomadarum, & ampliùs, interfecatur quartana; quæ induciæ ægros se incolumes existimantes sæpiùs decipiunt. Insuper facillimâ arte intercipitur paroxysmorum series; vel longiora obtinentur interstitia; sed seriùs ocyùs, à variis accidentibus; vel à posthabitatâ rectâ vivendi normâ, recurrunt insultus. Per urinas nigras nonnunquam judicatur hæc febris species. Constat è clinicorum choro, partum, fluxum hæmorrhoidalem, peripneumoniam, variolas, aliumve morbum acutum, sæpiùs quartanam profligasse: sed si plures agritudines sint quartanæ remedium, hæc invicem epilepsiam,


hypochondriasm, nephritidem, arthritidem, aliosque morbos domari nescios, radicitus evulsi. Quartanam demum vitam longiorem polliceri vulgò fertur: haud rarò tamen hæc febris, faviente rigore, debiles vel extremo senio confectos è medio tollit; contra adagium antiquissimum Gallo-Provinciale, quod sic se habet: *Febre cartano n'a jamai fa souna campano*; febris scilicet quartana neminem unquam ad libitinæ rationem duxit. Nihilominus hæc febris species, cui obnoxii sunt cachectici & melancholici varia post se trahit infortunia, icterum nempe, hydropem, infarctus skirrhosos viscerum abdominalium, quæ nonnunquam purulentiâ defœdantur: tussis chronicam, asthma, verminosam progeniem, &c. Idem esto iudicium, de duplici, & triplici quartanâ; quæ species etiam *contumaciores* censentur; ni pristinam formam, quartanæ scilicet simplicis, recuperent.

Tradit SYDENHAMUS se nunquam vidisse in Angliâ quartanam ante septimum mensem curatam: sed aliter rem se habere in nostris regionibus, experientiâ edocti, asserere minime dubitamus. Haud tamen festinanda est *curatio*; nec nisi summâ cautelâ exhibendus est cortex peruvianus, qui summam sub hâcce febre noxam inferre valet; præsertim si, uti crebrò accidit, labefactatum sit hepar. Nec magis congruit hoc febri-fugum, quartanæ symptomaticæ, quæ scilicet à lue venereâ, scorbuto, cachexiâ, aliisque morbis, qui absimilem curam efflagitant, ortum trahit. Quoad quartanam legitimam; primò impugnatur diætâ, diluentibus & temperantibus, quæ humoribus crassioribus fluiditatem & organis rigidioribus flacciditatem impertiri valent. Venæ sectio rarò congruit; sed præsentaneam opem confert emeticum; cuius efficaciam egregiè favet, haustum postero die catharticum, nec ulterius procedente morbo exhibenda sunt hæc evacuantia, nisi necessitas urgeat. Quod ad corticem peruvianum attinet, hunc minime usurpandum censemus, nisi post septimum saltem paroxysmum: nec coercitâ febre supersedendum, quin potius aliquandiù ejus protelandus sit usus. Rarò tamen, ut verum fateamur, præcaveretur reditus hoc solo febri-fugo; cur sit ut aliis præsidiiis opus sit; roborantibus nempe, & aperientibus, quæ morbi causam magis respiciunt. Inter prima laudantur salvia, betonica, abrotanum, acorus, cinnamomum, aliaque id genus: sed hæc omnia longè antecellit cascarilla, quæ pro hâcce febre, specifici titulo quasi gaudet.

Omnibus aperientibus officinalibus, quæ hîc recensere fastidiosum esset opus, palmam præripiunt aquæ minerales, tam frigida, uti Vallenses, Merienses & Vefullenses; quàm Thermales, Vicienses nempe, Bellilucanæ, Vervonenses, Borbonenses, Anselmienses, Granenses, &c. quarum beneficio latex morbosus ex intimis vasorum recessibus excutitur, & reliqua completur curatio: adeò ut æger harum ope à recidivæ metu fermè liberetur: quapropter, cæteris nil proficientibus, ad hæcce remedia, tanquam ad sacram anchoram, confugere expedit. Nec desunt alia præsidia quæ etiam suas laudes merentur; antimonium nempe, aquila alba,

FEBRIS
QUARTANA.

aliaque præparata mercurialia; sal ammoniacum, magnesia, cæteraque absorbentia; amara, diaphoretica & hypnotica, de quibus suprà, quæ non solum quartanæ exquisitæ, sed etiam duplici & triplici apprimè congruunt. Haud leve denique auxilium præstant balnea, villicatio, peregrinationes, &c. Coronidis loco addere lubet, quod si totum curationis negotium naturæ committatur, ferius ocyus solis œconomia animalis viribus desinit hæc pertinacissima febris species: quo felici eventu nonnumquam beantur ægri inter usum inertium remediorum, quibus tamen hæc spontanea curatio semper tribuitur: hinc tot insulsæ & spuria observationes quibus scatent libri.



FEBRIS REMITTENS.


VARIA ipsi induntur nomina; à quibusdam enim *subintrans*, à nonnullis *synecha*, ab aliis *continens*, &c. vocitatur remittens, quæ inter continuas & intermittentes medium quasi locum tenet; sed ad postremas propius accedere videtur; cum à benè perspecto remissionum ordine pateat typus tertianæ, duplicis tertianæ, quartanæ, &c. præterquam quod intermittentes sæpius in remittentes abeant; & hæ postremæ in intermittentes facessant. Nonnullæ tamen febres, de quibus in præsentiarum, continuarum characterem assequi videntur; adeò ut illas ad proprium genus referre vix liceat; ni in subsidium veniat examen lotii cujus color lateritius intermittentium indolem prodit. Febris, sub hoc genere, ab invasione ad solutionem, ægrum non dimittit; sed statis plerumque temporibus frigore, horrore, oscitatione, aliove præludio spasmodico, intermittentium instar, exacerbatur, nullâ obviâ causâ evidente. A levi frigore *orditur* febris remittens; cujus æstum rarò mordacem excipit sudor plus minusve conspicuus. In nonnullis, procedente paroxysmo, ptyalismus erumpit; sed plerique urinam profundunt flammeam, quæ tempore remissionis sedimentum quoddam deponit. Id genus febris, vomitu, diarrhœâ, cholerâ, convulsionibus, &c. plerumque stipatur; præsertim si inordinatæ sint periodi. Hanc etiam concomitantur dolores, huic vel illi parti infixi; & à pleuriticis, colicis, rheumaticis, &c. vix discrepantes.

Remittens legitima, cui suum jus plerumque restituitur, haud majorem metum incurrit, ac intermittens; sed in ancipiti versatur inordinata & anomala, cujus scilicet paroxysmi nulli temporum normæ submitti queunt. Epidemicè grassans, comitem sæpius habet inflammationem, imò & malignitatem, ut inquiunt, adsciscit; hinc jure inter morbos graviores, & ancipitis eventus numerari solet. Remittens quartanæ typum referens, *pertinacior* & *periculosior* censetur, cum in febrem hecticam sæpius abeat, vel marasmm, hydropem, &c. post se trahat. Evacuationibus criticis haud planè defraudatur febris remittens; cum sexcentis historiis constet

fudores erumpentes, vel manantem salivam haud exiguum levamen præstitisse: imò & urina sedimentum diversæ indolis præbens, nonnunquam etiam confert.

Ut ad curationem deveniamus, præmissis venæsectione & vomitorio, blandioribus remediis, diluentibus nempe & temperantibus est auspicanda; æquè ac sub aliis febrium intermittientium legitimarum speciebus: sed cautè & parcè præscribi debent cujuscumque sortis medicamina. Quam enim noxam inferat tumultuosa remediorum administratio, multiplici profectò experientiâ compertum manet. Opportunè sæpiùs usurpantur antiputrida, haud rarò juvant amara & stomachica, nec expertis invisæ sunt diaphoretica mitiora; sed solerti manu pertractari debent hæc præsidia; cùm genuina hujusce morbi causa, è quâ depromi solent indicationes, inobscuris lateat. Cortex demùm peruvianus, temperantibus sociatus, pro votis plerumque succedit; dummodò alvus haustibus laxantibus, vel enematibus congruis, fuerit, uti par est, soluta. Cùm demùm febris remittens, naturæ intermittientium & continuarum particeps esse videtur, non absimili fermè curandi methodo, habitâ ratione circumstantiarum, subjicitur: ideò plura non addimus, ne recoctam crambem apponamus. Sed si hæc de febribus intermittentibus & remittentibus exarata plus æquo contracta videantur, adire licet tractatum anonymum de hac re nuperimè typis Tornæsiensis evulgatum, cujus Author, latissimâ famâ nulli secundus, rei medicæ promovendæ strenuam operam navat.

FEBRIS
REMITTENS



PLETHORA.

VITAM desidem & umbratilem, somnum longiorem, & liberaliorem exquisitissimarum dapum usum; cui plerumque indulgent, qui ambiunt alios amyctide vincere, *plethoram* sub ætate potissimùm viridi accersere, nemini haud obvium. Sed ab aliâ causâ quandoque *sobolescit*, ni sit congenita, à sufflaminatis nempe diuturnis vel assuetis profluviiis, tùm spontaneis, tùm arte concitatis, quorum beneficio servatur fortè consensus inter solida & liquida, quo deficiente imparia videntur viscera demandatis muniis ritè adimplendis, quæ in perpetuâ continentium & contentorum reciprocatione versantur: sed hisce atrâ caligine immerfis, & per transfennam adductis, haud diutiùs inhæremus; ne deturpetur opus meris observatis contexendum. Inter causas plethoræ juvenum recenseri debent crebriores hæmorrhagiæ; vel plus æquo repetitæ venæ sectiones; cùm apud solertiores raturum maneat eò plus sanguinis confici sub floridâ ætate, quò plus demitur. Ut igitur in orbitam revertamus: præter tradita antecedentia, è quibus benè perspectis, haud levis emergit plethoræ suspicio: *aliis notis* se prodit sanguis in corpore prædominans; pulsu scilicet pleno, venarum amplitudine, pro variis corpulentia gradibus, plus minusve


PLETHORA.

conspiciâ; colore cutis florido, totius corporis æstu, propensione ad venerem, vultu rubore perfuso & oculis flammeis: somno profundiori & dolore capitis gravativo, haud rarò recurrente; spirandi difficultate, quæ ascensu ad loca acclivia, vel quovis alio motu exacerbatur; artuum stupore & lassitudine spontaneâ; vires enim à luxuriante sanguine obruuntur: proclivitate demùm ad febrem, phlogosim, hæmorrhagias, &c. Plenior corporis habitus pro dubio *plethoræ signo* haberi debet; cùm haud rarò accadat ut obesi sanguinis profluvia difficiliùs ferant, quàm macilenti, eò quòd vasa sanguifera, adipi immerfa, certam crassitiem, præ ambientium compressione, assequi minime valeant: nec magis fidendum cutis colori florido, qui nonnunquam à peculiari, vel insolitâ corporis constitutione potiùs pendere videtur, quàm à sanguinis exuberantiâ. Rite distinguenda etiam venit plethora vera, quæ haud nisi pedetentim incrementum sumpsit, ab spurâ, vel illâ vasorum turgescentiâ, quasi subitanâ, merum variorum laticum rarefcentiæ effectum sistente: hanc postremam crebrò oriri ab æstu febrili, insolatione; à cursu, alioque incondito corporis motu; ab ingluvie, vel à liberaliori haustu liquorum ardentium, quæ variis titulis apud bibones superbiunt, &c. neminem vel inexpertum latet. Nùm plethora inter morbos recenseri debeat, vel in causarum ordine collocari? aliis examinandum relinquimus: sed illud nobis incumbit munus, ut accuratam *symptomatum* nonnunquam mortis prænuntiorum, hujusce corporis conditionis pedissequorum historiam tradamus. In hunc censum veniunt vertigines, insultus convulsivi, apoplexia, cephalalgia, ophthalmia pertinacior, febris, phlogosis, hæmoptylis, aliæque sanguinis eruptiones; catarrhus suffocans, cordis palpitatio, arthritis; alique morbi periculi nequaquam expertes, à congestione vel ab stagnatione oriundi, qui licet peculiarem & diversam indolem præ se ferre videantur; haud absimili tamen curandi methodo impugnantur; quæ eò præsertim collimat, ut minuatur sanguinis moles.

In hoc solo cardine versatur *plethoræ curatio*; quæ non solùm sanguinis missione, sed etiam accurato regimine peragitur; victu scilicet tenui, labore vel quovis alio corporis motu, somno breviori, &c. Hæc præcipuè conferunt, si massæ sanguineæ exsuperantia nullam labem visceribus intulerit; vel hocce fluentum nondum extrà propria vasa eruperit. Ubi verò de suppressâ quâdam evacuatione constat; maximi est momenti, ut quâvis arte, & nullâ morâ, revocetur, & in integrum restitatur. Haud debitis tamen laudibus est defraudanda venæ sectio, quâ scilicet brevi tramite deplentur plus æquo turgida sanguinis receptacula, & sic obviamitur hujusce laticis excessui: hæc potissimum proficuè adhibetur in juvenibus & prægnantibus: sed haud plus æquo repetenda, ne vasa, fracto solidorum elatere, debiliorem appellentibus succis objiciant resistantiam: cur fit ut humores, solitâ elaboratione orbari, suis obeundis muniis impares evadant. Præterea constat variis experimentis summâ industriâ captis sanguinis uncias sexdecim venæ sectione eductas, intrâ quinque dierum spatium

spatium restitui in homine ætatis floridæ : hinc confectarium manet repetitam venæ sectionem nonnunquam , uti suprâ innui , ad plethoram disponere. Caveant igitur qui , pessimo more , numerosioribus venæ sectionibus indulgent , ne alios morbos misellis ægrotantibus lugendos promoveant. Nec omnibus plethoricis congruit venæ sectio , cum plures occurrant , vel habitûs athletici , qui quamlibet sanguinis detractionem minime ferre valent : nec desunt , qui hanc ita expavescunt , ut ab aspectu phlebotomi animo linquantur : admoveri queunt in utroque casu hirudines ; quorum beneficio cruor pro lubitu educitur , nullo succedente incommodo. Imminutâ , quâvis arte , sanguinis copiâ , haud propterea inutilia censerent cathartica , diuretica , diaphoretica , aliaque evacuantia ; quibus quædam subducitur humorum sanguini confusorum portio ; & eâdem ratione deplentur vasa : sed incassum adhibentur hæc medicamina , nisi præmissis venæ sectionibus , diluentibus & congruo regimine , ipsis sternatur via. Si postremò sanguinis exsuperantia cum pravâ humorum diathesi implicetur ; cachexiæ habendam esse rationem , evidens est. De *plethora spuria* medelâ nihil addimus , cum neminem fugiat , hanc diætâ , diluentibus & temperantibus facillè eximi ; nec aliam curam sibi vindicare.

PLETHORA.



ÆSTUS MORBOSUS.

Hoc ægritudinis genus , sub ætate juvenili familiarissimum ; de quo tamen ne verbum quidem mutierunt Authores ; crebrò *invadit* temperie sanguineâ vel biliosâ , necnon mente præfervidâ præditos. Febrem ephemeram nonnunquam antegreditur ; & non secus ac hæc febris species , *courbature* apud plebeculam audit : nec absimilis est naturæ hic corporis status , quem vocitant Gallo-Provinciales , & Occitani , *mourfoundamen*. A merâ sanguinis incalescentiâ , vim febrilem sæpius æquipollente , ordiri huncce morbum vulgò ferrur ; sed haud fugit artis proceres genus nervosum in hocce promovendo præcipuum symbolum conferre. Excubiæ nocturnæ , vel lucubrationes immodicæ ; helluationes vel insolitus cupediarum usus , liberalior vini & liquorum ardentium potus , exercitatio immodica , labor arduus & improbus , meditationes profundæ , studium pertinacissimum , castra veneris , &c. sunt totidem huiusce affectûs *causæ evidentiores*. Ægrè discernitur hæc adversa valetudo intrâ certos limites subsistens ; adeò ut hæc correpti , qui vix ægrotare videntur , rarò Medicos acciant : aliter se res habet , si ad certum gradum evehatur ; sed *hunc statum* produnt lassitudines spontanæ , dolor capitis , somnus interruptus , &c. Interea exardescunt caput & viscera , vel internis ignibus æstuant : sed hicce calor rarò per habitum corporis se profert ; hinc minime mirum si ab admoto axillis vel inguinibus thermometro , haud innotescat : quod tamen non impedit quominus ignis è variorum cute excutiatur & coruscent scintillulæ. Lingua

ÆSTUS
MORBOSUS.

interdum sicca observatur, & sæpissimè sitis urget. Pulsus inter naturalem & febrilem quasi medio modo se habet. Plures de sudoribus nocturnis à vehementiori calore conqueruntur: in nonnullis alvus solvitur; & lotium mingitur flammeum. Languet utplurimum appetitus, vel planè deficit; ac tardiores & molestæ fiunt digestiones. Haud rarò denique erumpunt variæ cutis efflorescentiæ, & ipsemet sanguis extrà pulmonum, renum, &c. claustra exilit. Licet æstus morbosus pro primo *febris ephemera* gradu, vel prodromo, uti jam innuimus, haberi queat; solutu tamen difficilius haud immeritò censetur: nil mali enim portendit febris ephemera æstum morbosum excipiens; imò & salutaris plerumque evadit; cùm ejus beneficio primus quasi judicetur morbus; qui aliàs contumacior, nec periculi expers censeretur debet: quandoquidem ex sexcentis historiis constet, quod è posthabito æstu morbofo, non solum sobolescant jam enumerati affectus; sed etiam variæ emergant febres inflammatoriæ, vel alterius fortis, quæ ægrotantes in vitæ discrimen trahunt: quod tamen non impedit quominus *secundis avibus* judicetur hæc ægritudinis species, si rectâ & tempestivâ curandi methodo impugnetur; vel totum negotium congruâ accedente victûs ratione, naturæ relinquatur. Aliter se res habet si humores ad alkalescentiam vergant, quam produnt æstus corporis, oris graveolentia, atque insolitus sudoris, urinæ & fæcum fætor.

Seçta cadavera, post æstum morbosum, passim exhibuerunt phlogoses & purulentias, tum in pectore, tum in abdomine: pericardium cordi adnatum in nonnullis annotatur. Ventriculus occurrit inflammatus, crassus & contractus, bile scatens & ductum choledocum nonnunquam recipiens; ac purulentiâ defædatum. In conspectum veniunt intestina, ac præsertim colon putrefacta, invicem hærentia & in glomeramen circumvoluta. Hepar, lien & pancreas infarcta & scirrhusa se præbent; lien præcipuè cartilagineam duritiem assequitur; ut de aneurismate, aliisve tumoribus diversæ indolis & variæ sedis fileamus.

Inter efficaciora *præsidia* insignem locum obtinet venæ sectio; si vires ferant: nec inutilem opem præstant laxantia mitiora, cum eâdem cautelâ propinata: aliàs humectantibus, refrigerantibus, temperantibus, obtundentibus; imò & depurantibus, si cujusdam latentis materiæ morbosæ sit suspicio, inhærendum: scitur ex hisce parari ptisanas, apozemata, juscula, emulsiones, &c. quibus affatim haustis morbus in ipsis quasi incunabulis sæpius præfocatur. Inter cætera; summis laudibus jure extolluntur plantæ cichoracæ; nitrosa & acida, quæ, experientiâ judice, multum valent ad domandos ferocios humorum impetus. Multum etiam depradicatur serum lactis; vel ipsummet lac, ni obstat debilius stomachus. Nec minori successu adhiberi solent aquæ Vallenfes, Monferinenses, Meinenfes, Reginenses, Vesullenses, aliæque innumeræ frigide minerales ejusdem indolis; quæ aliorum medicaminum vires æmulari, vel superare videntur. Nonnunquam conducunt sedantia, imò & hypnotica; dummodò non nisi præmissis generalibus præcipiantur

Haud inanem postremò operam ludunt enemata refrigerantia crebrò injecta; nec ab expertis abdicantur balnea, quibus sæpius reliqua quasi completur curatio.

ÆSTUS
MORBOSUS.

VIRIUM EXOLUTIO.

LICET hic morbus à postremo vix discrepare videatur, & cum illo sæpius implicetur; à rectâ tamen institutâ *diagnosi* faciliè distinguitur; cùm unus lento gressu incedat, nec nisi sensim incrementum sumat; dùm alter brevi à recensitis causis contrahi potest. Præterea *virium exolutio*, nostratibus *épuisement*, peioris est ominis, absimilemque curam expostulat. Nec huc coincidit virium prostratio symptomatica, quæ lipothymiam, paralysem, aliosque graviores morbos concomitatur; cùm vires exhaustæ, de quibus in præsentiarum, morbum, ut inquiunt, per se referant. Alimentorum penuria, enormes hæmorrhagiæ; larga per alvum, renes, cutem, &c. profluvia; cursitationes longiores; labores improbi, studium immodicum; amoris æstus in rabiem quasi versus; onanismus, vel hæc nefanda consuetudo quæ astu funesto semper occultatur, &c. virium lapsum accersere solent; qui ratione fontis & gradûs, nunc periculi expers; nunc gravis & *ancipitis eventûs*; aliàs exitialis & letho finitimus judicatur.

Et si à perspectis jam memoratis causis sæpius in propatulo se sistit hoc ægritudinis genus; peculiaribus etiam *signis* innotescit, quæ sic se habent. Itaque hoc morbo correpti vix pedibus stare queunt, vel gradu cespitante ambulant: contabescentium mens sensim obnubilatur; & artus quodam stupore afficiuntur: in varias febrium species incidunt, delirio, lipothymia, aliisque truculentioribus symptomatibus stipatas: somnus, quo recreantur vires, arcetur; impediuntur organa respirationi famulantia: alvus ut plurimum stricta manet; aliæque excretiones ægrè perficiuntur. Haud rarò erumpunt hæmorrhagiæ è naribus, ore, &c. vix cohibendæ: stillidium ejusdem commatis per urethram, suâ diuturnitate funeris metum incutiens, in quodam ganeone observasse memini. Sub hac *calamitosâ rerum conditione* sanguinem suis particulis balsamicis orbari & mortem esse in propinquo faciliè colligitur. Nec desunt qui priusquam de morbo constiterit ab ingruente syncope, subitâ nece extinguuntur. Nonnulli demùm morbo ad acmen perducto, lecto perpetuò affixi, vitam trahunt tædio & ærumnis exasperatam; & tractu temporis ab libitinæ rationem veniunt. Nonnunquam tamen ad incitas redacti, & pro deploratis habiti, ad vivorum numerum quasi revocantur; hæc curationis spes elucescit, si viscera nullam labem contraxerint. Hinc variam pro morbi gradu & diversis phænomenis, instituendam esse *prognosim* consectarium manet. Præterea nil certi de eventu statui potest, ni recta causæ remotæ habeatur

**VIRIUM
EXOLUTIO.**

ratio ; quæ tamen , pessimo ægrotantium consilio , sæpiùs atrâ caligine immergitur.

Inter *perscrutationem* hoc morbo denatorum , conspiciuntur phlogoses & purulentia ; atque stagnationes diversæ sortis. Reperiuntur cerebrum tabo conspurcatum ; processus falciformis osseus : pulmones putridi costis hærentes , cum mediastino nonnunquam inflammato ; sanguis concretus in bronchiis : cor sanguine concreto turgens , purulentia tactum , concretionibus lapideis inquinatum ; valvulæ osseæ : pericardium cordi accretum , vel sterni morbosè hærens , aquâ turgens , purulentia defædatum , vel lapides continens : ventriculus inflammatus , sanguinem concretum continens , ulcusculis exesus & gangrænosus : hepar durum & infarctum , putridum ; cum cystide felleâ inani : lien marcidus , ingens , cartilagineus & putris : renes putridi ; & lithiasis renum & vesicæ : præter aneurismata in abdomine , tumores steatomatosos & cysticos ; sanguinem stagnantem , &c. quibus addere licet peritonæum crassissimum , vel absumptum.

Blandioribus remediis oppugnari debet hic affectus ; ideò parùm in hoc casu conducunt cardiaca , analeptica , aliaque cognata stimulantia , vel roborantia , apud vulgus decantatissima ; quæ vires potiùs proritant , quàm refarciunt. Cardiaca enim exquisitiora , sub hâc rerum conditione , follium munia , ergà vulgatissimum ignem , accuratè æmulantur ; cùm hoc remedii genere ignis vitalis lucidior fiat , sed citiùs absumatur & extinguatur. Hinc totum ferè negotium , congruo composito regimine , naturæ est committendum : huic obsecundat mentis & corporis quies , quæ ad vires refocillandas non immeritò deprædicatur. Nec parvi habetur æris permutatio , multiplici experientiâ comprobata ; cujus beneficio plures , nullâ aliâ adhibitâ curâ , pristinae sanitati restituuntur. Fessis interea succurritur alimentis euchymis ; sed sæpiùs obstant febris & prava stomachi dispositio ; adeò ut primum tunc temporis incumbat munus , ut diluentibus & temperantibus compescatur febris ; atque blandioribus catharticis everrantur sordes in ventriculo nidulantes ; cujus tonus debito dein stomachicorum usu instauratur. Nemo non novit alimenta exquisitiora ; juscula nempè vel succum è coctis carnibus expressum ; gelatinas , cibum album , aliaque sexcenta artem culinarem , potiùs quàm medicam spectantia : sed plerisque latet , hanc alimoniam speciem haud semper ritè coqui in stomacho ob defectum scilicet salivæ , quæ solâ masticatione elicitur ; adeò ut plures occurrant , qui pane & carnibus , absque incommodo , vescuntur ; quorum stomachus , quod benè notare expedit , ab ipsomet jusculo gravatur.

Hinc patet quanti sit momenti ut ritè perpendantur stomachi vires , & magis congrua seligantur alimenta , ne à præposterâ horum elaboratione ægrorum res in pejus ruant. Nec una eademque methodus competit macilentis & obesis : primi enim omnes evacuationes ægrè ferunt quæ aliis optimè cedunt. Emaciatis præterea proficuè adhibentur alimenta euchyma , rarò obesis profutura. Solum lac , cæteris consentientibus , utrisque

emolumento esse, experientia docuit: sed parùm neutris conferunt analeptica, è pharmacorum penu deprompta; ac præsertim cardiaca, quæ fugacem tantummodò effectum præstant: hæc enim cujuscvis sortis stimulantia, sanguinis excandescentiam fovere; & hinc summam perniciem inferre queunt; ni solerti manu tractentur. Verumtamen ritè indagatis morbi causis & phænomenis; ac congruâ institutâ diætâ, manus auxiliatrices præbere valent prædicta medicamina, præsertim in phlegmaticis, & ætate provectis, quorum sanguis minus ad effervescentiam pronus jure censetur.

Hîc tamen non est subticendum martialia & ipsummet corticem peruvianum summis laudibus extolli à clarissimo TISSOT de praxi medicâ benè merito: hæc enim sæpiùs profuisse in hoc affectu à nimîâ seminis profusione contracto, asserit egregius Author, qui suam de hâc re mentem ad experientiæ incudem sæpiùs revocavit. De horum tamen remediorum viribus ulteriùs, pace laudati Authoris, inquirendum esse censemus; cùm sub hâc rerum conditione, humorum excandescentiam infensissimam concitare queant. Quod ad venæ sectionem attinet, nullus ambigendi locus quin huicce morbo officiat; ideò à sanioribus planè abdicatur, ni urgeant immanis cephalalgia, febris vehementior, vel hæmorrhagia, nullâ aliâ arte cohibenda. Haud minùs pertimescenda sunt cathartica; quæ tamen adhibere licet, urgente necessitate: conducunt enim, ut jam innuimus, hæc postrema in pravis digestionibus; quas, viribus exhaustis, luctuosas quandoque evadere neminem clinicum latet. Posthabitis demùm hisce monitis, futilem fore probam & rationalem vivendi normam cuivis obvium.

SANGUINIS INOPIA.

NIL aliud est hic affectus, de quo altum apud Authores silentium, quàm *inanitas vasorum sanguineorum*. Semper ferè delitescit hoc haud infrequens morbi genus; quod per sectionem cadaverum in aprium venit; nec ex alio fonte depromemus, quæ de hâc re nobis sunt dicenda. Hunc morbum *intricatissimæ indaginis* meris conjecturis assequi licet post inediam insolitam; vel immodica sanguinis profluvia, tam per venæ sectiones, quàm ab hæmorrhagiis: sed dubia & fallacia sunt hæc indicia, cùm nonnunquam accadat, ratione peculiaris corporis constitutionis, quâ omnes excretiones quasi sufflaminantur, ut post inediam diutiùs protractam, emergant febres solis venæ sectionibus fugandæ; quod sanè quidem arguere videtur haud ultra modum, sub hoc casu, depleta & exinanita fuisse sanguinis receptacula. Nec huncce morbum magis in propatulo sistit stupendum sanguinis profluvium; cùm nonnunquam accuratori observatione compertum fuit, quòd è maximo hujusce laticis

SANGUINIS
INOPIA.

dispendio, non solum non minuatur ejus moles, sed è contrà augeatur; & emergat plethora; cujus phænomeni modum jam suprà extricavimus. E quibus colligere datur quòd etiam post defectum alimonix, vel diuturniora sanguinis profluvia, de sanguinis penuriâ nondum liquido constet. Hinc sequitur spissioribus tenebris obvolvi huncce morbum; nî præcesserint exarata causæ, & à solâ vitiatâ hamatosi pendeat, quod haud semel observasse mihi contigit in nonnullis cachecticis, & præsertim virginibus chloroticis in quibus sufflaminabantur catamenia, quod sanè notatu dignum occurrit.

Hinc patet quantis difficultatibus prematur hujusce morbi *diagnos*; adeò ut sapiùs *Œdipo* opus esset. Inter hasce angustias, nonnulla è proprio penu deprompta candidè aperiemus; quæ, si animum veritatis avidum minime expleant, suspicionem saltem hujusce latentis affectûs injicere queunt. Itaque hoc abditissimo morbo afflicti, viribus sensim orbantur; & de pertinaciori aurium sibilo conqueruntur: appetitus languet vel planè deficit, & faciei nitor sapiùs obscuratur. Plerique alvi fluxu conflictantur, vel diabete laborant: alii sudoribus diù noctuque diffluunt. Nonnulli, ad lipôthymias proni, subitò rapiuntur. Interdum tument tibiæ; atque dein in pectoris & abdominis cavum effunditur latex serofus. *Procedente morbo*, ut plurimum insomnes ægri, alta ducunt suspiria, & omnem ferè recuperandæ sanitatis spem deponunt. Nec desunt qui mœroribus confecti, vel perpetuâ mortis formidine pressi, planè desipiunt; donec seriùs ocyùs rebus humanis vale supremum dicant. Si sub hâc rerum conditione de inediâ, vel immani sanguinis profluvio constet, haud falsò infertur vasa sanguinea inaniri: sed nonnunquam, ut verum fatear, desiderantur prolata signa; & deficiunt prænuntii; adeò ut planè tunc occultetur hic morbus exitialis, qui vel oculatiores fugit.

Fidem sanè superant quæ pluries inter rimanda *cadavera* hoc morbo extinctorum observavimus; nonnulla vidimus quasi exanguia, adeò ut etiam apertis capite, thorace & abdomine, ne quidem guttam sanguinis funderent; non secùs ac si partes sectæ è merâ cerâ conficerentur. Diligentiùs perscrutata vasa exilia omninò depleta reperiiebantur; majoribus verò semivacuis se præbentibus: utraque flatu turgida occurrebant; qui, trans pellucas cerebri venas & arterias, oculis facilè subiciebatur: insuper aërem intra prædicta receptacula sæpissimè reperiri, minime fugit, qui numerosis sectionibus interfuerunt. Ne minimum ferè cruoris vestigium vidimus in cerebro cujusdam virginis, subitâ nece extinctæ; cui intra annum centies, nescio quâ ratione, vena secta fuerat. Idem fermè phænomenum observavimus, haud procul abhinc annis, in cadavere viri nobilis, ætatis floridæ, qui inexpectatâ syncope occubuerat, post restitutam ferè valetudinem à peripneumoniâ; quâ vigente, numerosissimas venæ sectiones passus fuerat: ex institutis enim solitis dissectionibus, ne quidem cruoris guttam stillabat; ac vasa cerebralia mero flatu turgida apparebant: imò & cordis receptacula, mirum sanè dictu, vix sanguinis

vestigium præbebant. His adnectere lubet curiosam observationem clar. DE HAEN, de quodam arthritico omnis morbosæ evacuationis planè immunis; cujus pulsus semper fuerat fortis & durus; nisi morte jam præforibus adstante. Reperiit egregius vir in exenterato cadavere arterias & venas amplas, sed flaccidas & inanes, si excipias filum, vel chordam tenuem, albam & polyposam, crassitudine inæqualem, quæ in majori suâ diametro vix sesqui lineam habebat. Cor etiam crassum, pallidum & vacuum, pauculum grumosi vel polyposi cruoris continebat. Alium de hâc re casum tradit laudatus Author, respicientem quamdam feminam debilissimam, cujus pulmones à diù hausto metallurgorum vapore tabefacti deprehendebantur; cujus scilicet corpus ita exangue fuit, ut quamvis aorta, vena cava & alia majora vasa aperirentur, nullâ spongiâ ad imbibendum sanguinem opus fuerit. In quâ historiâ, de quovis inter vitam sanguinis dispendio, altum silentium.

SANGUINIS
INOPIA.

Parvi sane quidem refert mentionem injicere de *remediis* quibus, dum viverent, utebantur hoc morbo denati: inter illos verò qui incolumes evaserunt, de morbi indole haud benè constitit; cùm nusquam evidentioribus signis se protulerit sanguinis inopia; adeò ut nil certi de hâc re in medium adducere liceat. Variis tamen observationibus instructi asserere minime dubitamus futilia esse pleraque remedia; si excipias illa quæ digestionibus prospiciunt, & organorum vitalium tonum blandè instaurare valent; inter quæ præcipuum locum obtinent rhabarbarum & martialia, quæ, cæteris consentientibus, haud inefficacia censerì debent. Quoniam verò imparia sunt instaurandæ massæ sanguineæ prædicta medicamina; in subsidium sunt vocanda alimenta euchyma: ideò danda est opera, ut congrua seligantur, atque debitâ copiâ ingerantur: in hoc sanè præcipuus versatur curationis cardo; cùm hîc plus victûs rationi quàm Pharmacîæ tribuendum esse nemo non intelligat. Summam insuper opem conferunt deambulationes amœnæ, pergratæ peregrinationes, aliæque cujusvis fortis lepidæ exercitationes; quæ animum exhilarando, organa digestionis & hæmatosi famulantia firmant: nec in aliò versatur totius curationis cardo. Coronidis loco, addere juvat hunc morbum rarò simplicem esse; sed ut plurimum aliis implicitum: hinc difficilior ad curationem aditus.



FLUXUUM
ET ERU-
PTIONUM
RETRO-
CESSUS.

FLUXUUM ET ERUPTIONUM RETROCESSUS.

QUANTI sit momenti hoc familiarissimum ægritudinis genus apprimè nosse, neminem practicum fugit. Complectitur, ut patet ex ipso titulo, suppressas evacuationes naturales; sufflaminatas eluvies morbosas, sanguineas nempe, purulentas, alteriusve sortis; & retrocessum tumorum & eruptionum diversi generis. Itaque ab *impeditâ perspiratione* emergunt febres, ut plurimum ephemeræ, dolores, defluxiones vel inflammationes in variis partibus, diarrhœa, &c. *Inhibita sputa*, tam in acutis quam in chronicis, graviora accersunt symptomata; quod intellectu assequi facillimum. Haud minorem metum inferunt *sufflaminata urinæ*. Obstructa bilis incernicula variorum affectuum sunt prænuntii. *Lac devium* varia post se trahit incommoda. Debacchatur in corpore *retentus sanguis* per catamenia, hæmorrhoides & hæmorrhagias elabi solitus. Maximam perniciem inferunt *resorpta lochia*; vel colluvies purulenta à solitâ sentinâ revulsa: & sic de aliis stillicidiis & transudationibus, ex oculis, naribus, auribus, ore, genitalibus, ano, capite, axillis, pedibus, &c. è quibus impeditis, vel repulsis exsurgit morborum ilias; quibus affectibus debellandis futile impenditur opus, ni horum genuini fontis habeatur ratio; quæ tamen inexpertos, & imperitos plerumque latet. De cohibitâ perspiratione, de obstructâ alvo, de suppressis sputis, urinis, hæmorrhoidibus, lacte, mensibus & lochiis, seorsim suo loco agere consultius visum fuit. Itaque de hisce tantummodo ægritudinum speciebus, quæ ad prædictos articulos minime pertinent hîc commemorabimus; in quarum censum veniunt *hæmorrhagarum* consuetarum *cessatio*; ulcerumque diuturnorum, tum spontaneorum, tum artificialium exsiccatio: variorum stillicidiorum, diversis partibus prospicientium, suppressio; ac demùm tumorum, aliarumque cutis eruptionum retrocessus.

Varios & graviores exhinc emergere morbos, vel læsiones organicas, ut plurimum indomabiles, docet autopsia cadaverum. Passim enim occurrunt infarctus, phlogoses & purulentia; siderationes, &c. in conspectum venit colluvies serosa intrâ & extrâ cerebrum; deteguntur abscessus in hoc viscere, & ossa cranii carie læsa. Reperiuntur pulmones sanguine infarcti, inflammati, purulenti, indurati, putridi: cor sanguine obrutum, variis fissuris hians; pericardium aquam vel sanguinem colligans: mediastinum effuso cruore turgens; & hydrops pectoris. Conspiciuntur in abdomine ventriculus inflammatus, tabo conspurcatus & sideratus: hepar ingens, scirrhum, putridum, vicinioribusque partibus annexum: pancreas infarctum & induratum: omentum scirrhum, purulentum & exesum: mesenterium obstructum, & steatomata huic adnata. Præterea annotantur in

in imo ventre colluvies serosa vel subcruenta ; abscessus variæ sedis , tumores anomali ingentes , quibus addere licet viscera adipe obruta.


Si *hæmorrhagiæ* quæ in consuetudinem abierunt , non secus ac hæmorrhoides & menses , *statis temporibus minime recurrant* , quædam pedetentim emergit plethora , è quâ sæpiùs suboriuntur febres acutæ , cephalalgia , ophthalmia , angina vera & spuria , erysipelas , spirandi difficultas , hæmoptylis ; phlogoses internæ , & præsertim pleuritis & peripneumonia ; aliique affectus mali moris , qui ægros in vitæ discrimen trahunt. Plurimum conducere in hocce casu *venæ sectiones* , nemo non videt ; nec minorem opem præstat opportuna victûs ratio : suumque symbolum etiam conferunt diluentia , cathartica mitiora , diaphoretica blandiora , aliaque evacuantia , quæ pro re natâ feliguntur , & diversâ methodo subministrantur. *Ex ulceribus exhaustis* prodeunt graviora infortunia , quæ etiam funeris metum incutiunt ; si nullâ interpositâ morâ haud revocetur pristina purulentia ; vel novum cudatur ulcus ; ut materia quâ conspurcatur sanguis , è vasis excutiat ; atque ad hanc sentinam amandetur prædictum tabum ; quod aliàs ad hepar , pulmones , cerebrum , &c. irruere solet ; uti patet è traditâ cadaverum historiâ. Hunc pessimum & exitialem inhibere valent exitum *venæ sectiones* ; cùm pluribus emolumento fuisse hæmorrhagias spontaneas rectè notarint practici : sed hæc munia feliciùs obeunt *cathartica* & *diuretica* , naturæ magis consentanea ; cùm pluries observatum fuerit quod materia purulenta devia & sanguini confusa per sedes & urinas , mero œconomix animalis motu , exitum sibi paraverit.

Transfusiones verò , quæ nec sanguinis nec puris naturam redolent , à solito alveo *revulsæ* , minus portendunt periculum ; & eandem fermè curam sibi vindicant ; quæ scilicet versatur circâ venæ sectiones , cathartica , diuretica , diaphoretica & salivantia , quorum beneficio materia morbosa , ad varia colatoria appellens , è vasis subtrahitur : sed tutiùs incedunt qui omni ope moliuntur pristina eluviei redintegrationem ; cùm sæpiùs futilia deprehendantur alia præsidia ; uti pluries mihi observasse contigit post sufflaminatum invisum pedum sudorem , ab intempestivè admotis adstringentibus : quam præposteram medelam presso pede sequuntur vertigines cum aurium tinnitu ; spirandi difficultates , cardialgiæ , dolores varias partes respicientes , quibus vexantur maleferiati ægri ; donec in integrum restituatur pristina transfusio. Uno verbo in omni evacuationum suppressione eò collimant saniores practici , ut solitæ revocentur ; vel aliam quamcumque moliuntur purgationem , quæ fluxûs prohibiti vices explere valeat ; ac sub hoc conspectu sæpiùs conducere depurantia ipsis jure persuasum fuit.

Haud absimilis fermè methodus est adhibenda post retrogressas eruptiones cutaneas , vel repulsos tumores : scitur primarum recessum periculosa esse alex in morbis acutis ; morbillis nempe , variolis ; febre erysipelaceâ , scarlatinâ , purpuratâ , &c. ni illicò succurratur ægris per diaphoretica ,

FLUXUUM
ET ERUPT.
RETROCESS.

balnea tepida, vesicatoria, aliaque consimilia quibus declinari potest re-
formidanda metastasis. Licet regressus eruptionum chronicarum; achorum
nempè, scabiei, herpetis, &c. haud imminens exitium minetur; periculo
tamen minime vacat: cum exhinc varii emergere queant affectus, qui
grave curantibus facessunt negotium; febres scilicet mali moris, deliria
cum furore, epilepsia, convulsiones, cephalalgia, cæcitas, surditas,
suffocationes, dolores interaneorum acerbis, &c. quibus præcavendis &
avertendis omnem operam impendere expedit, tempestivâ præsidiorum
jam memoratorum administratione, nimirum venæ sectione, catharticis,
diureticis, aliisque cujuscvis fortis evacuantibus: nec posthabenda cathære-
tica cuti imposita, quorum efficacia celebriorum Medicorum praxi confir-
matur: ni satiùs sit pristinum morbum quâvis adhibitâ arte revocare.
Quantum immineat periculum à retrogressis tumoribus, veluti parotidi-
bus, bubonibus, anthracibus, &c. neminem fermè latet: tùm nil non
movendum ut præcaveatur metastasis; & materia morbosa ad quæcum-
que corporis incernicula devolvatur; ad quod opus conferunt indicata
auxilia; nec absimilis est hæc adhibendi modus.



D O L O R E S.

SUB diversis gradibus se proferunt dolores; nullique corporis viventis
parti parcunt. Acutissimi nempè sæviunt in caput, dentes, aures, ventri-
culum, tubum intestinale, renes, lumbos, artus, &c. minorem tyran-
nidem exercent hepatis, pulmonibus, lieni, cæterisque ejusdem fabricæ
visceribus impacti. Multifariam se produnt partibus carneis & membra-
naceis insidentes; qui rheumatismi, arthritidis, luis venereæ, hypochon-
driasis, scorbuti, cachexiæ, &c. plerumque sunt soboles. Hæc insuper
molesta sensatio, in quâcumque parte defigatur, diversos subit modos;
alia enim est gravativa, alia pulsans, pungens, lancinans, erodens vel
ulcerosa, æstuosa vel urens; pruriginosa, &c. *Dolor gravativus* caput, re-
nes, aliaque viscera abdominalia sæpiùs dilaniat: *pulsans* sævit circà cranii
compagem, & in singulis partibus, ubi pus conficitur; atque hæc præcipuâ
notâ conjiciuntur abscessus interni. *Dolore pungitivo & lancinante* dis-
cruciantur partes membranosæ; qui eò acerbior evadit quò majori tensione
gaudent: id genus sunt dolores pleuritici, lumbares, ischiadici, colici;
spinæ, ut inquiunt, ventosæ, &c. *Dolor erodens*, exulcerationum comes,
pulmonibus, renibus, utero, &c. infigitur. *Urens* erysipelata concomita-
tur: *pruriginosus* demùm cuti insidet. His addere licet hunc doloris sensum
obscurum circà præcordia, vel hanc cordis angustiam, quæ *anxietas* audit.
Insuper omnibus innotescunt dolores illi spasmodici; vel hic *torpor mo-
lestissimus*, qui vulgò *crampe* dicitur. Nec minùs nota hæc in iisdem
partibus obscura & tædiosa, nec infrequens, sensatio, quam *inquietudines*

nocturnas vocitant. Haud prætermittenda hæc fugacis doloris species, vulgò *chatouillement*; à plantæ pedum, vel limbi costarum spuriarum titillatione concitata; licet cachinnum sæpiùs moveat. Sunt postremò dolores pressio-
nis, contusionis, distensionis, vulneris, ambustionis, frigoris, &c. pe-
dissequi, qui innumeros modos subeunt. Hinc colligere licet è duplici
fonte generatim prodire dolorum discrimina, à naturâ scilicet causæ la-
cessentis, & à peculiari partis contextu.

DOLORES.

Dolor nullam *causam* externam agnoscens, in quamcumque partem
incumbat, rarò essentialis audit. Quandoquidem ab alio primario morbo
acuto, vel chronico, ut plurimùm pendeat. Si truncum impetat, vel in
artus ingruat sub acutis; de quodam motu critico cogitandum: continuus
verò pectoris & abdominis visceribus incumbens, phlogosim, suppuratio-
nem vel gangrænâ minatur. Hunc dolorem sanos & agrotantes indiscri-
minatim invadentem, cuicumque parti insidentem, qui intermissionibus
gaudet, vel ex uno loco serpit in alterum; à quâdam affectione nervo-
rum spasmodicâ oriri conjicere nil vetat. Sed illud altâ mente tenendum
dolores illos familiarissimos quibus conflictantur tùm valetudinarii, tùm
sani, è *quadruplici fonte* sæpiùs altè recondito, plerumque prodire, rheu-
matico nempe, arthritico, scorbutico & venereo; de quibus satis super-
que suo loco. Nec desunt tamen dolores ejusdem commatis, qui aliam
originem mutantur; vel ab animi pathematibus, ab affectibus convulsivis,
ab impeditâ perspiratione progerminantur. Occurrunt ultimò alterius for-
tis dolorum iliades ab obstructionibus, tumoribus, alterâve viscerum labe;
à quâvis colluvie, à corporibus extraneis, &c. de quibus alibi.

Quoniam in obscuris sæpiùs latet genuina dolorum indoles, minime
mirum si nil certi de *eventu* plerumque statui possit. Nonnunquam tamen
ominari fas est: dolores scilicet capitis, dorsi & artuum, vigente febre,
periculi expertes censentur; cùm ut plurimùm sublato morbo evanescant;
vel futuram crîsim polliceantur: hæmorrhagiam enim salutarem prænun-
tiant, qui oculis, temporibus & cervici infiguntur. Dolores erraticos
internos sæpiùs sequuntur evacuationes conducibiles; lumbis impacti, fu-
turum menstruorum, hæmorrhoidum, vel urinæ fluxum indicare solent.
Immanes capitis dolores, qui nullas dant inducias, delirium vel affectum
comatosum præfagiunt. Si interni vehementiores, inter viscerum infar-
ctum, phlogosim & purulentiam, subitò evanescant; haud levis de gan-
grænâ emergit suspicio. Vagi & intermittentes rarò sunt ominosi; sed in
ancipiti versantur induciarum nescii, & cuivis parti pertinaciter hæren-
tes. Haud inanem postremò metum incutiunt dolorum metastases in pleu-
ritide spurîâ, arthritide & rheumatismo, &c. Plura de hac re, passim in
hoc opere evolvenda, non addimus; ut nonnulla de *doloris sede* in medium
adducamus. Itaque non solùm atrâ caligine immergitur genuina variorum
dolorum natura; sed etiam sæpiùs de læsâ parte minime constat; adeò
ut utrumque meris conjecturis vix assequi liceat: notare enim expedit
quòd morbus haud semper sedem habeat in parte dolente: dolor enim

DOLORES.

capitis sæpiùs pendet à pravis digestionibus : è pulmonum labe glottis in consensum trahitur : ex obstructis visceribus abdominalibus nonnunquam prodeunt dolores dorsi & pectoris : calculo vesicæ vel phlogosi prostaticarum laborantes de dolore in extremo pene conqueruntur : tenesmus pariunt varii intestinorum affectus , ab ano remotissimi. Innumera de hâc re passim prostant historiæ ex autopsiâ cadaverum depromptæ , quas contractas hùc colligere expedit.

Referato *capite* patent variæ læsiones , quæ totidem causæ audiunt dolorum capitis , de quibus fusè suo loco. Nec minorem stragem exhibet *pectus* : conspiciuntur enim pulmonum hærentiæ , infarctus , phlogoses , purulentiæ & putredines : occurrunt pulmones præduri , tumidi , crustâ obducti , lapillis fœti ; vel vesiculis sero turgidis infarcti. Trachea & bronchia osseam duritiem nonnunquam contraxerunt ; non secùs ac aorta , aneurismati aliàs obnoxia. In propatulum venit cor ingens ; vel sanguine distentum , marcidum , purulentum , ulcere exesum , tuberculis obsitum , excrescentiis deturpatum ; vel è sede depulsum. Reperitur mediastinum crassum , sanguine turgens , aliove modo labefactatum : ut de hydrope pectoris , pericardii & mediastini sileamus. His subjungere expedit varias hepatis , cystidis felleæ , ventriculi & lienis vitiosæ dispositiones & defædationes , quarum dolores falsò pectori adscribebantur.

Fecundissima est cadaverum historia respiciens *abdomen* : in apricum enim venit stomachus , instar intestini , contractus ; skirrhosus , inflammatus , purulentus , sideratus , ulcere exesus & perforatus ; sanguine vel saburrâ nigrâ turgens , flatibus distentus ; materiam mucosam , æruginosam vel saniosam recondens ; lapides fovens ; ac nonnunquam è sede depulsus : se offerunt hujusce visceris tumores skirrhosi , & cancrofi ; non secùs ac abscessus : in ipso reperiebantur vermes , lapides , pilulæ , zingiber ; aliave corpora præposterè ingesta. Cernitur pylorus laxior , vel plus æquo constrictus ; skirrhosus , ulcere erosus , vel corpore extraneo obstructus. Obvia fiunt intestina flatulenta , pituitâ vel fæcibus infarcta ; inflammata , purulenta , erosa , perforata & gangrænosa ; intorta & convoluta ; effuso sanguine scatentia , lapides recondentia ; skirrhosa & tuberculosa ; ultra modum dilatata ; mirè coarctata & callosa ; lumbricos & tæniâ foventia ; invicem demùm , partibusque ambientibus annexa. Deprehenditur hepar exangue , exiguum ; ingens , obstructum , skirrhosum , tuberosum , steatomatosum , hydatidibus fœtum , & calculosum ; pus colligans , ulcerosum & putridum ; diaphragmati & costis hærens. Occurrit cystis fellea bile tumens , calculis fœtâ & purulentiâ conspurcata. Detegitur vena portæ ultra modum distenta , vel partim ossea. Patet lien ingens , abscessum recondens , putris , dilaceratus ; exiguus , induratus , skirrhosus , cartilagineus , lapidescens , appendicibus instructus , ac partibus circumambientibus accretus. Oculis subjiciuntur pancreas inflammatum , skirrhosum , purulentum putridum , lapidesque recondens ; ductus pancreaticus verme obturatus ; omentum crassum , skirrhosum , absumptum , marcidum

& partibus vicinis accretum; mesenterium tabidum, obstructum, hydatidibus refertum, lapidescens, materiâ caseosâ infarctum, inflammatum, purulentum, & putre; peritonæum phlogosi tactum, putridum, erosum vel granulofum; ac demum diaphragma disruptum. Quibus addere licet stagnationes serosas, cruentas, sordidas & ichorosas; flatus extrâ intestina; hydropem peritonæi, ovariorum; aliumve cysticum; tumores diversæ indolis è visceribus erumpentes, corpori celluloso accretos, processibus membranosis hærentes, vel vertebrae adnatos; aneurismata variæ sedis; herniam intestinale, epiploicam, & vesicæ; viscera invicem accreta, transposita; vertebrarum lumbarium cariem, &c. renum, vesicæ, genitalium, vicinarumque partium læsiones, de quibus alibi, consultò missas facimus.

E prolatis colligitur *curationem* ad morbi causam, quæ tamen atrâ caligine plerumque immergitur, esse dirigendam; quod sanè grave sæpius negotium curantibus facessit: sed plerique huic indagini perfunctoriè hærentes; vel planè posthabitâ inextricabili morbi causâ, curæ merè palliativæ, vel generali quamcumque impendunt operam; donec dilucidius innotescat morbus: vel spontaneis naturæ viribus solvatur. Sub hoc conspectu, haud exiguam laudem meretur venæ sectio; quæ tamen teste quotidianâ experientiâ, non in omnibus casibus congruit: sed cuius dolori opitulari solent diluentia & demulcentia affatim epota. Conducunt etiam, præmissis præmittendis, anodyna, imò & hypnotica; dummodo nulla sint infarctûs, phlogoseos & gangrænæ indicia: horum etiam usus tam externus, quàm internus vetatur, sub doloribus arthriticis & rheumaticis; aliisque pluribus morbis organicis; cum, stuporem inducendo, morbi causam sæpius figunt & contumaciorem reddunt; adeò ut, cessante narcotici operatione, graviores nonnunquam & ferociore occurunt dolores. Aliàs haud exiguam laudem merentur narcotica; licet intus fumantur, vel extus admoveantur. Ope corticis peruviani, alteriusve febrifugi sæpius debellari dolores intermittentes jam suprâ innuimus: sed haud nisi summâ cautelâ præscribi debet illud specificum: cum haud rarò occurrant febres dilucidis intervallis quiescentes, qui hocce præsidio domari minime patiuntur; quin potius exasperentur, vel prorogentur; quod altâ mente tenere debent ægrorum saluti incumbentes. Sed nil magis prodest in variorum dolorum medelâ, quàm revulsio, quâ sanguinis, humorum, vel succi nervei motus ad aliam partem dirigitur; quod opus evacuatione, & irritatione peragitur: ideò præter venæ sectionem, quæ in hunc scopum sæpius præcipitur; opportunè admoventur hirudines; cucurbitulæ siccæ, vel scarificatæ, vesicatoria & caustica; nec despicendum cauterium actuale, moxâ, vel quâvis aliâ arte paratum; cujus usum antiquissimum summè deprædicant Sineses, aliique populi Orientales. Insuper haud inutilem opem sæpius præstat ergà cephalalgiam atrociorē, incassum adhibitis aliis præsidiis, simplex pediluvium tepidum; nec sub hoc casu suis viribus defraudantur frictus artuum. Ad summam nil proficitur,

DOLORES.

uti jam suprà inculcavimus , inter dolorum curationem ; ni priùs causæ , è naturæ gremio eruendæ , habeatur ratio. Examinandum nempè an à vitio quodam organico pendeant dolores ; nùm ad alium primarium morbum , scorbutum nempè , luem venereum , &c. sint referendi ; utrùm quædam pars è genuinâ sede dimoveatur , ut in distorsionibus , luxationibus , fracturis , herniis , &c. à quibus benè perspectis & trutinatis curandi judicium dirigitur.



DEFLUXIONES VEL AFFECTUS CATARRHALES.

EVIDENTIORIBUS *signis* se proferunt humorum defluxus , caput , cervicem , nasum , aures , labia , dentes , fauces , glottidem , laryngem , bronchia & pulmones impetentes : sed haud dilucidè se produnt ; vel alium morbum mentiuntur , qui in alias partes ingruunt ; licet tamen febre sui generis stipentur ; hinc fit ut plures spurio schemate decepti , inopportunis remediis hujusce morbi curationem ineant. *Exordium* verò capiunt genuini affectus catarrhales à levi frigore , per vices recurrente , quod excipit febris continua , vel intermittens ; nunc mitis , nunc vehemens ; inappetentiâ , anxietatibus & spontaneis lassitudinibus stipata ; quæ cæterum ad plures dies vulgò protrahitur. Exsurgunt intereà dolores , qui non solùm parti primò affectæ insident ; sed etiam ad cæteras , vel remotiores , propagantur. Si partes pervias , nares putà , tracheam & bronchiam impetat humorum decubitus ; quoddam emergit profluvium , quo materia morbosa exitum sibi parat : sin aliter ; suboriuntur infarctus , plus minusve conspicui , vel intumescentiæ ad phlogosim vergentes. Oculorum , nasi , faucium & labiorum defluxiones visu percipiuntur : tussi & raucedine se prodit laryngis & pulmonis affectus catarrhalis. Gravedo , dolores capitis , cervicis , aurium , &c. è relatu ægrotantium innotescunt : faciei verò , oculorum , oris & cervicis intumescentiæ ante oculos versantur , vel digitis contrectantur. Quanquam prima destillationum catarrhalium tempora , quæ intrà biduum continentur , nonnunquam sint procellosa ; levem tamen metum incutiunt ; etiamsi febris catarrhalis ad plures dies , duodecim scilicet vel quatuordecim haud rarò prorogetur.

Præter fluxiones catarrhales simplicissimas & vulgatissimas de quibus hætenùs , aliæ grassantur *prava indolis* ; vel , ut inquiunt , mali moris : id genus sunt *febres catarrhales* malignæ , angina phlogodeæ vel gangrænosæ , infarctus pulmonum inflammationis finitimi , faciei erysipelata , defluxiones rheumaticæ , insultus apoplectici , aliæque innumeræ alterius morbi faciem induentes , quâ sanè minime decipiuntur solertiores , & experti ; cùm prædicti affectus febrem catarrhalem comitem semper habeant ; & hocce indicio à consimilibus distingui queant. Insuper è defluxionum

albo expungendus est catarrhus suffocans, qui, tametsi eamdem nomenclaturam sibi vindicat, ab enumeratis speciebus toto cœlo distat.

Accessu aëris frigidi, quo impeditur perspiratio, natales sumere omnes affectuum catarrhalium species; vulgò perhibent. Dubitare profectò licet nùm ad materiæ cujusdam heterogeneæ in aëre latitantis ingressum, trans cutis & pulmonum porulos, potiùs non sint referendi, quàm ad meram sufflaminationem humoris innoxii; qui aliàs, teste quotidianâ experientiâ, per renes, sedes, & cætera corporis colatoria, exitum facillimè sibi parare valet. Nec me movent influxus catarrhales, hyeme crebriùs invadentes, illos qui æstuentes aëri frigido se credunt; præsertim si frigus luculento foco expugnare soleant; cùm morbi grassantis typus & gradus frigoris haud in eâdem versentur ratione. Præterea nemo nescit affectus catarrhales nonnūquam æstate, vel ardente syrio sævire, & epidemicè grassari: scitur quoque huncce morbum minime parcere meticulosis, qui in conclavi calido se recipiunt, imò & lecto tenentur; quod sanè extrà omne dubium, ni fallor, arguit sufflaminatam perspirationem haud jure incusari. Exhinc colligitur huncce morbum à *peculiari aëris constitutione*, thermometro nusquam expiscandâ, ut plurimum pendere. Haud tamen inficiamur, hanc materiam quamcumque heterogèneam, quâ scatet aër, à frigore nonnullas vires sumere; & ejus effectus tunc temporis pertinaciores & graviores plerumque evadere. Cæterùm *febres catarrhales malignæ*; angina gangrænosa; defluxiones pulmonum exitiales; &c. delèterium quoddam produnt, quod bibulis cutis vel pulmonum porulis exceptum, & sanguini immixtum summam perniciem inferre solet, quam soli aëris frigiditati, corporis spiracula præcludenti, referre absurdum foret: præterea huic opinioni, licet acceptissimæ, adversari videntur varia constitutionum epidemicarum phænomena; quibus constat materiam morbosam, fortè domari nesciam, solis evacuationibus evinci; narium nempè stillicidio, anacatharsi, sudoris proventu & alvi solutione: quibus addere licet ipsummet lotium, quod sæpiùs, sub hâc rerum conditione, crassum & turbidum cum ægrorum emolumento observatur.

Eviscerata cadavera eorum qui defluxionibus catarrhalibus fuerant obnoxii, varias læsiones, strages & stagnationes exhibent. Familiarissima est aqua in thecâ cranii; non secus ac in ventriculis, aliisque cerebri recessibus. Sæpiùs annotatur cerebrum sero spongiæ instar imprægnatum. Patent pulmones inflammati, putridi, pure infarcti & erosi; nec rarò vomica recondentes. Cor sanguine coagulato, vel concretionibus, ut inquiunt, polyposis distentum observatur; cum pericardio in nonnullis purulento. Viscera abdominalia purulentia vel putredine defædantur. Hepar ingens se sistit; atque cystis fellea bile inspissatâ, vel pseudo-lapidibus turget. Aqua insuper, nunc limpida, nunc fordida, stagnat in pectore & in abdomine. His addere licet quod nonnullorum vasa, aliave receptacula sanguinem crassum & concretum contineant.

Si insultus catarrhales ab intùs susceptâ, per cutis, alteriusve partis

AFFECTUS
CATARR-
HALES.

AFFECTUS
CATARR-
HALES.

perviae porulos, materiâ quâdam, in aëre delitescente, oriantur; *salubriorem fore evacuationem* per eadem spiracula confectarium videtur; nec adversatur experientia. Illam, servatis servandis, promovere solent spontaneæ œconomiae animalis vires: alioquin mitiora exhibentur *diaphoretica*, diluentibus & demulcentibus sociata, quorum beneficio fovetur insensibilis perspiratio; donec blandus sudor erumpat; cui, à quâcumque causâ promoveatur, favent ægotantes, si ad lectum se conferant & leges diæteticas servant. Præterea vapores & suffitus in eundem scopum etiam faustè adhiberi nemo nescit. Nec inutiles cenferi debent dejectiones alvinæ; licet alvus spontè solvatur, vel notissimis auxiliis sollicitetur: sed cautè dirigenda est hæc evacuatio, ne alteri obstat. Laudem etiam merentur in nonnullis constitutionibus epidemicis *emetica*; quorum ope, morbi fomes in primis viis latitans, foràs everritur; vel ipsemet morbus, quod sanè quidem mirum, in ipsis quasi incunabulis præfocatur. Opportunè nonnunquam adhibentur theriaca, aliæve ejusdem commatis confectiones cardiacæ & anodynæ, haud immeritò, sub nonnullis constitutionibus epidemicis, deprædicatæ; quæ scilicet humores subagitando perspirationi favent. Nec posthabenda sunt narcotica, dummodò expeditæ sint primæ digestionum viæ; sin minùs, nauseosa & nociva, à peritioribus abdicantur: infesta etiam censentur, si caput gravetur & adstricta sit alvus; cautè demùm cum hisce remediis mercari debent senio confecti; ne intempestivâ somnolentiâ ad fatum properent. De venæ sectione, vigente catarrho, multùm controvertitur apud Medicos; & adhuc fortè sub judice lis est: multiplici tamen experientiâ ratum manet hanc ægritudinis speciem epidemicè grassantem, post missum sanguinem, diutiùs in plerisque protrahi; imò & nonnunquam luctuosam evadere; nedum compescatur & eximatur; ita ut ad hocce præsidium haud nisi summâ cautelâ confugere liceat; quidquid obganniant hi, qui ad declinandam phlogosim summè necessariam esse deprædicant: nonnunquam tamen ad sanguinis missionem confugere licet, si immanis sæviat febris, urgeat spirandi difficultas, aliaque graviora vigeant symptomata. Ad summam, in immensum cresceret pagina, si omnia medicamina adversus morbos catarrhales adhiberi solita hùc attexeremus: inane sanè & superfluum emergeret opus; cùm de peculiaribus defluxionibus seorsum suo loco agere cogat instituti ratio.



C A C H E X I A.

CACHEXIA.

Hoc nomine insigniri hanc sanguinis & humorum dyscrasiam, vel pravam conditionem, quam profert fœdus corporis color, neminem vel inexpertum fugit. Huic obnoxii censentur pueri & senes, non secus ac à longo morbo convalescentes. *Essentialis* audit quæ ab aëre inquinato, à pravis eduliis & à peculiari humorum vitio ortum ducit. *Symptomatica* verò vocitatur quæ vigentis cujusdam morbi est soboles, scorbuti nempe, infarctus viscerum skirrhosi, putredinis, congestionis purulentæ, alteriusve sortis; vel cujuscumque labis viscerum tum pectoralium, tum abdominalium: se l ægrè sæpius in praxi internoscitur hæc differentia. *Cachexiam* insuper accersere solent hamorrhagiæ immodicæ, & numerosissimæ venæ sectiones: similem effectum exerunt profluviorum sanguineorum suppressio; præpostera intermittentium medela; intempestiva quartanæ sufflaminatio, &c. Cachexiam decoloratione conspicuam, leucophlegmatia finitimam esse, apud omnes in confesso manet; sed multum discrepat à chlorosi, quæ eandem fermè faciem præ se fert; cum conjugium hanc brevi solvat; & illam econtrà exasperet. Alterius etiam est indolis icterus, licet vitiata sanguinis crasim sæpè comitem habeat; cum morbus regius intrà breve tempus debellari queat; & cachexia haud nisi diuturniori curationi cedat. Nec rectius collineant qui scorbutum ad cachexiam referunt, vel pro extremo hujusce morbi gradu habent; cum haud desint scorbutici cachexiæ planè expertes; & plures occurrant cachectici quos nunquam attingit labes scorbutica. Notare tamen expedit quod prædicti morbi sæpius reipsâ implicentur; & hic fortè genuinus fuit erroris fons.

Calor faciei lividus, subviridis & plumbeus, totius corporis pallor; macies, vel levis cutis intumescencia, magis conspicua in facie, palpebris; & extremis artubus, qui impressa digitorum vestigia nonnunquam servant; sunt totidem signa quæ cachexiam produnt. Crebrò frigent ægri, atque de spirandi difficultate à quocumque corporis motu conquerruntur. Pulsus tardus & compressus exploratur, accedente serotinis horis febriculâ; nonnunquam inæqualis & intermittens, cum cordis palpitatione, observatur. Hæc excipiunt inapperentia & flatulentia, cum torminibus & hypochondriorum intumescencia; ex eodem fonte prodeunt ructus & crepitus, præsertim post assumptum pabulum erumpentes; cum alvo variâ & inæquali. Interea urinæ turbidæ & subalbicantes, sub hac adversâ valetudine, annotantur: ingruunt lassitudines spontaneæ; torpent artus cum totius corporis subtumidi segnitie. Mens quasi obnubilatur; & somnus fit profundior. Tument crura primò vespere; dein œdema in eodem statu mane persistat. In nonnullis demùm sudores fœtent, & erumpunt variæ

CACHEXIA.

cutis efflorescentiæ; quæ licet sæpiùs domari recusent, leve tamen incommodum pariunt.

Rarò exitium minatur hic morbus, si illibata sint viscera; aliàs vix curationem admittit; hunc enim omnem Medicorum artem eludere, si à vitio quodam organico, & insanabili ortum ducat, cuivis etiam rudi & inexperto obvium. Præterea quò tardiores fuerunt progressus, eò *pertinacior* censetur: ubi vice versâ brevi incrementum sumpsit, faciliùs profligari solet. Cæterùm ab inconsulto cohibitâ febre quartanâ, alterâve intermittente contractus hic morbus; solo febris reditu; irritis antehàc exquisitioribus præsiidiis, fugatur. Postremò cachexia in ætate provectâ, etiam fartis tectis visceribus, scorbutum, marasmm & hydropem post se trahit; vel horumce exitialium morborum typum præ se fert.

Ex *observationibus anatomicis*, tum è proprio penu, tum ex aliorum scriptis depromptis, colligitur, majora vasa, præsertim hepatica, sanguine concreto, atro & fœculento turgere: nec ex alio fonte scaturiginem ducit diversa interaneorum labe: conspiciuntur enim viscera livore affecta, arida, corrugata, skirrhusa, putredine absumpta, tuberculis vel hydatidibus obsita. Reperiuntur abscessus & tumores anomali, cum costarum & vertebrarum carie. Occurrunt demùm stagnationes serosæ, purulentæ, fœtidæ, &c. Præmissò generali læsionum conspectu, ad peculiare vel singulis partibus proprias devenimus: hepar scilicet adinvenitur decolor, subalbicans, plumbeum, maculis conspersum, vel granulis & tuberculis exasperatum; nunc mole magis, nunc contractum congestiones diversæ naturæ recondens, & nonnunquam hydatidibus refertum: ejus vesicula bile turget, nunc viridi & acerrimâ, nunc aqueâ & infulsâ; atque pseudo-lapillos felleos recondit. Lien in quibusdam ingens; in aliis compressus & corrugatus, durus & quasi lapideus deprehenditur. Epiploon mole varium, infarctum, vicinioribus partibus coalescens; vel putredine confectum, oculis subjicitur. Iisdem fermè læsionibus defœdantur pancreas, mesenterium & intestina, quæ sæpiùs verrucosa deprehenduntur. Non absimilem labem præ se ferunt renes pluribus calculis nonnunquam scatentes. Eadem vitia, infarctum nempe, phlogosim, purulentiam, putredinem & adhesionem morbosas haud rarò exhibet pectus: reperitur alteruter pulmo pure absumptus. Nonnunquam semiputridum reperitur pericardium; quod aliàs latice limpidò vel sanioso, cum erosione turget: cor maximum conspicitur, etsi ejus thalami & auriculæ sanguine orbantur; vascula majorum arteriarum, & ipsæmet valvulæ, cartilaginis, ossis vel lapidis speciem referentia, annotantur. Dirutis demùm cerebri munimentis; nonnunquam deteguntur, tum in ejus anfractibus, tum in aliis recessibus, stagnationes serosæ, cruentæ & saniosæ; concretiones gelatinosæ; hydatides plexibus vasculosis adnatæ: cerebrum in nonnullis spongiæ instar aqua turget, &c. quæ tamen omnia futile oculorum ministerium præbent, ni mentis acumine ad morbi phænomena dirigantur.

Nullam peculiarem *curationem* sibi vindicat cachexia, quæ à quovis vi-
gente alio morbo primario fovetur ; cum hoc sublato brevi restituitur
sanguinis crasis : sed ubi à nullo alio pendet , vel ab affectu jam prægresso
sobolescit ; peculiarem medelam efflagitat. Itaque si à suppressis mensibus ,
hæmorrhoidibus , aliisque consuetis sanguinis profluviiis suboriatur ; omni
ope revocari debent prædictæ evacuationes : ad quas supplendas proficue
etiam instituuntur venæ sectiones cautè celebratæ ; ne , plus æquo depletis
vasis , fatiscant œconomix animalis vires. Ubi econtrà ab hisce immo-
dicis profluviiis scaturiginem mutuatur ; his cohibitis , congruèque obser-
vatâ victûs ratione , totum ferè negotium naturæ committendum : expe-
rientia enim pluries docuit non solum inertia fuisse in hoc rerum statu
remedia ; sed etiam nociva sæpius evasisse. Si demùm à scabie , alterâve
cutis efflorescentiâ repulsâ exordium capiat cachexia ; ad curandi ritum
suprà exaratum , confugere expedit.

E præhabitis patet quanti sit momenti , inter curandam sanguinis &
humorum dyscrasiam , ut accuratè primis digestionibus prospiciatur ; ne
perenni pravi chyli appulsu foveatur morbus. Sub hoc conspectu præscri-
buntur primò *emetica* & *cathartica* , tùm mitiora , tùm hydragoga , &
dein stomachica , quibus probæ alimentorum coctioni prospicitur. His
præmissis , haud posthabita diætâ faustè adhibentur temperantia , hepa-
tica & amara ; depurantia & antiscorbutica , quæ vitiatæ sanguinis crasi ,
extricatâ quantum licet morbi causâ , egregiè occurrunt. Nec minus con-
ducunt aperientia , diuretica , sudorifica quæ humorum moleculas ad ex-
cretionem paratiores movent : laudantur præsertim in specie , & crebro
usu invalescunt rhabarbarum , cremor tartari , arcanum duplicatum , an-
timonium diaphoreticum , & antihecticum Poterii. Sed omnibus fortè pal-
mam præripiunt martialia & roborantia ; quæ si tempestivè & præmissis
præmittendis , in usum trahantur , aperientium exquisitiorum munere fun-
guntur. In subsidium etiam , ad restituendam hæmatosin , haud improspere
vocantur aquæ Granenses , Vicienses , Bagnerienses , Cauterienses , Aman-
dinæ , Aquenses , Mottenses , aliæque minerales calidæ ejusdem indolis ;
nec minùs profunt frigidæ martiales , Forgienses nempè , Passienses , &c.
quæ singulæ interiora corporis penetralia lustrando , humorum dyscrasiam ,
obstructionibusque exhinc oriundis , mederi queunt. Pluris postremò ha-
bentur aer purus in loco aprico , exercitationes gratæ , &c. Coronidis loco
addere juvat cachexiam rarò tumultuosæ curationi cedere ; & ideò blandio-
ribus duntaxat medicaminibus opus esse ; accedente victu congruo , cui
plus tribuendum quàm arti pharmaceuticæ : præsertim si à morbo quodam
organico latente foveatur hic affectus. Hinc à recto deflectunt tramite , qui
suis hypothesibus obcæcati , huncce morbum solis catharticis , & diurêticis
oppugnandum esse existimant ; & nil aliud inter hanc curationem vident ,
quàm materiam morbosam ad sentinam intestinale devolvendam , vel ad
renes ablegandam : hoc est plebis medicæ commentum , quod plerique
ægrotantes luunt.

SCORBUTUS

S C O R B U T U S.

GRASSATUR hæc cachexiæ, ut inquiunt, putridæ species apud gentes septentrionales & tractuum paludosorum incolas; crebrique invadit nautas, milites, aliosque abjectæ plebis, qui salubrioribus esculentis, aliisque vitæ commodis planè carent. Haud immunes tamen censerì debent divites & magnates opiparè viventes; nec parcit ipsismet infantibus. Facillimè contrahitur *Scorbutus* post graviores morbos; præsertim post hydrargyrosim: ad hunc vergunt litterati & lucubrantès, hunc accersunt mœror & tristitia, gravesque curæ. Insuper pro ultimo affectionis hypochondriacæ gradu à pluribus primi subfellii Medicis habetur; num rectè? viderint experti quos non fugit scorbutum etiam per contagium propagari, vel à variis causis notissimis, pravis scilicet eduliis, aëre hominum frequentia inquinato, uliginoso; ab humore navium, spurcitie carcerum, &c. proficisci: præterquam quod infantes melancholiæ planè expertes hoc morbo sæpius tenentur. EUGALENUS, haud ignobilis Author, cui tamen cauta adhibenda est fides, multum insudavit ad perquirenda in singulis ferè morbis latentis scorbuti semina: suam hypothesim, fucum ignaris facientem, ambabus ulnis amplexi sunt nonnulli clinici, quibus arridet quamvis obvium morbum in quo planè cæcutiunt hoc titulo insignire. Sed validioribus argumentis hanc impugnavit opinionem clariss. LIND; qui multiplici experientia instructus hunc affectum ita familiarem esse, ut vulgò fertur, planè negavit; hancque materiam penitus exhaustisse videtur, ne variorum affectuum affinitate decepti in errorem, sæpius lethiferum, præcipientes ruant medentes. Aliud subest dubium circa hanc constitutionem scorbuticam, de qua primus, ni fallor, mentionem iniecit RIVERRIUS, quæ crebrò invadit lautè victitantes & in otio recumbentes: vix concipere licet hanc corporis conditionem gradu duntaxat discrepare ab hoc scorbuti genere, quod navigatione contrahitur, & solo reditu ad littora fugatur. Verum quidem est quod iisdem fermè notis, nempe oris læsione & exanthematibus se prodat uterque affectus; & eadem expostulare videatur remedia: sed si accuratiori examini subjiciantur prædicti morbi cognomines, & ritè perpendantur eorum causæ evidentes, longè dissimilem naturam habere, primum erit credere: sed illud dubium oculatioribus solvendum tradimus. Scorbutum nunc esse calidum, nunc frigidum vulgò perhibetur; sed hæc nuperrima divisio haud ex alio fonte prodit quam ab ætate & temperie: pro calido enim habetur in juvenibus, sanguineis & biliosis; frigidus verò audit in senibus, melancholicis & pituitosis. Hinc patet rationalis medendi via; atque intelligitur cur refrigerantia singulis minime congruant.

Gingivarum latione, peculiaribus cutis efflorescentiis, & doloribus lancinantibus per varias partes disseminatis, genuinus in apricum venit scorbutus: sed in quibusdam desiderantur prædicta *indicia*; vel dubia occurrunt: cur fit ut alia sint inquirenda, è quorum syndrome expiscari potest prædicti morbi diagnosi. Omnes ferè ut spectabilia recenseamus, scorbuto correpti inexpugnabili anguntur mœrore, mortisque formidine premuntur: insomnes, vel somnolenti, vertigine tentantur: plerique ad lipothymiam proclives, de cephalalgia acerbissima, atque artuum debilitate torpore & tremore conqueruntur. Interea subtumida facies pallet, os fœtet, dentes vacillant, tumentes gingivæ extrà dentium seriem prominent, à nativo colore recedunt, sanguinem elabi sinunt; atque exulceratione vel putriditate defœdantur: nec cæteris oris partibus parcat hæc labes: hinc minime mirum, si in consensum trahantur salivæ incernicula; quæ ideò majorem hujusce laticis malè olentis, & sanie conspurcati proventum præbent, qui haud levem decumbentibus molestiam infert. Dein, procedente morbo, oris putredo sæpiùs per tracheam ad pulmones serpit; & ab hac novâ accedente causâ halitus graviùs olet. Pulsus in plerisque tardus, inæqualis & intermittens exploratur: interdum velocior evadit & emergit *febris*, ut inquiunt, *scorbutica*; quæ nullo ordine recurrens dubium typum præ se fert: hæc vigente nonnunquam se produnt exanthemata, pulicum morsui simillima & brevi evanescentia; quæ ab ignaris, vel incautis, petechiarum nomine salutantur: sub intermittentium schemate plerumque se profert prædicta febris; sed paroxysmi crebriùs, nec stâtis horis recurrunt.

Plures ægri, ut incepta prosequamur, de familiarioribus cordis palpitationibus conqueruntur: nonnullos urgent sub corporis motu pectoris angustia; vel dolores acuti sterni, costis & dorso insidentes, atque pleuriticos æmulantes. Majorem profectò sævitiam exercet virus scorbuticum in viscera abdominalia: à labefactato nimirum stomacho emergunt ructus fœtidi, singultus; & regionis epigastricæ, vel totius abdominis, post pastum, intumescencia insolita. In quibusdam ità constringitur œsophagus, ut esculenta, vel ipsemet potus, ægrè ad stomachum appellant. Lien sæpius offenditur; hinc *dolores* gravativi, vel acuti in hypochondrio sinistro, sæpiùs tumente, qui plerumque ad alterum latus serpunt. Inter varia ventris tormina, majorem tyrannidem exercet dolor colicus atrocissimus, qui nunc insultum nephriticum, nunc colicam saturninam æmulatur; ac nonnunquam paralysem post se trahit. Alvus in potiori ægrorum parte solvitur, cum dejectionibus putridis vel dysentericis. Urina mingitur lateritia vel intensè rubens & fœtida; in nonnullis sabulum rubrum & friabile lateribus matulæ hæret; ac supernatat crusta pinguis & oleosa fœtorem spargens: nec suaviùs olent sudores. Interea dolores vagi, artus & præsertim crura obsident; & non secùs ac venerei, noctu recrudescent; qui etiam vigente febre exacuuntur. De hisce doloribus sub titulo arthriticis vagæ & scorbuticæ differuerunt nonnulli Authores: alii rheumaticis

SCORBUTUS

cognatos esse declararunt : nùm utrique affinitate decepti , à veri tramite recesserint ? solertioribus examinandum relinquimus. Interea vix pedibus stare queunt scorbutici ; ægrè gradiuntur , imò & claudicant ; donec crura planè deficient , tam ab atoniâ , quàm à retractione musculorum ; vel à tumente & impedito genu ; quod præcipuè infantibus accidit. In nonnullis rore synoviali defraudantur ossium connexiones ; cur fit ut quâdam partis motione crepitent : imò & hoc vitio etiam corripi vertebrae , plures tradiderunt.

Cutis scorbuticorum sensim aridior , maculis nunc rubris vel purpureis ; nunc lividis vel nigris , si faciem & manus excipias , signatur : nonnunquam exiles , petechiarum , uti suprà notavimus , instar , & numerosissimæ observantur ; sed sæpiùs latiores ad palmæ manuum dimensionem accedunt ; nec desunt in cruribus multò magis expansæ. Erumpunt interdum *pustula* , præsertim in infantibus ; dum senes pruritu vix compescendo divexantur. In quibusdam protuberant *tumores* ovi columbini magnitudinem æquantes ; qui , capiti plerumque incidentes , post biduum , triduumve recedunt ; & crebrò recurrunt. Nonnunquam erumpunt erysipelata fugacia , quæ etiam frequentem reditum portendunt. Crura ulceribus longè latèque prorepentibus , & pertinacissimis infestantur , quæ nil præter fæniem fundunt , & in quibus succrescunt luxuriantes carnes , quæ horum coalescentiam impediunt. Sanguis demùm vix cohibendus sæpiùs profilit , tam ex ulceribus , quàm è naribus , ore , stomacho , intestinis , &c. de quo latice coronidis loco addere licet , hunc sponte fluentem , vel venæ sectione eductum , colore livido , subviridi , vel nigricante infici ; & ità linteis hære , ut vix lixivio eluantur.

Hæc sunt præcipua *signa vel symptomata* , sub diathesi scorbuticâ , observari solita , quæ parùm sanè discrepant ab iis quæ lues veneream concomitantur ; cur minime mirum , si utriusque morbi diagnosi grave sæpiùs , vel oculatioribus & exercitatissimis , faceßat negotium. Si tamen antecedentia , sedulâ , sagacique mente perpendantur ; & in memoriam revocetur invadendi modus : si oris cæterarumque partium læsiones accuratiori examini subjiciantur ; utriusque morbi characterem ex ipsomet naturæ gremio eruere licet. Enim verò scorbutus , ut ab ore exordium capiamus , dentes & gingivas invadit ; lues verò venerea ingruit in uvulam , tonsillas & palatum : dolores scorbutici ex unâ parte serpunt in alteram , nec altè defigi videntur ; venerei econtrâ partibus obnoxii hærent & profundiores judicantur : scorbutus abdomen diversimodè afficit ; lues venerea caput præcipuè , & artus impetit : ulcera demùm scorbutica syphiliticis sordidiora & humidiora videntur , &c. Sed atrâ caligine obvolvi utriusque diagnosim , si , uti crebrò evenit , implicentur prædicti affectus , è prolatis faciliè colligitur.

Scorbutum per contagium propagari ; imò & hoc modo contractum majorem sævitiam exercere docet experientia ; asseruntque Authores exercitatissimi ; quod tamen nonnulli haud inferioris notæ planè negant ; tantum

difficile est verum à falso extricare. Quò vetustior est scorbutus, eò *curatu difficilior* evadit: sed majorem molestiam curantibus affert, si lui venereæ societur. Adventitius, qui scilicet à navigatione, aliâve causâ fugaci & accidentali scaturiginem mutuatur, brevi artis subsidio sedatur & eximitur: insitus verò, & congenitus; vel à peculiari corporis constitutione sobolescent, exquisitorum præsidiorum vires eludere solet: sub hocce commate sæpius se proferre in hysterics & hypochondriacis norunt sanè clinici. Nil ominandum de maculis cutaneis, dummodò ad lividitatem vel nigredinem minime vergant: fertur proficuum esse profluvium hæmorrhoidale: inter periculosa symptomata recensetur spirandi difficultas. Nil certi statui potest de alvi fluxu; cùm nonnullis infestus, aliis emolumento sit: tormina vehementiora gangrænæ, in tubo intestinali, metum incutiunt: tumores brevi succrescentes & decrescentes membrorum resolutionem minantur: ulcera scorbutica, contumacissima audiunt: genuum contractura vix expugnari patitur: gangrænâ visu conspicuam cohibere arduum sanè & difficile. Ad summam scorbutus qui altas egit radices, hydropem, marasimum, phthisim, apoplexiam, paralytim & convulsiones post se trahit: nonnulli demùm scorbutici adveniente syncope, cui, uti jam innuimus, obnoxii sunt, in orci fauces præcipientes dantur.

Cadavera maculis atropurpureis, latissimisque, defædantur; & brevi putrescunt; cur sit ut raptim sæpius aperiantur: perfunctorio tamen examini subjecta, maximam stragem in visceribus abdominis, cum stagnationibus saniosis, hærentiis morbosis, &c. patefaciunt. Si verò singulæ partes diligentius perlustrentur; hepar diversimodè labefactatum reperitur; siccum scilicet & exangue, skirrhosum & quasi lapideum: ejusque ambitus variis tuberculis exasperatus se præbet. Lien in plerisque contractus, corrugatus & quasi cartilagineus vel lapidescent; aliàs tumens & mole maximus, nec rarò putredine confectus deprehenditur: notare expedit circa hocce viscus, quod apud plures pro morbi sede perperam habeatur; cùm sæpius nil vitii præ se ferat, & omninò inculpatus occurrat. Abdominis vasa sanguinea, ac præsertim hepatica & splenica concretiones tartareas nonnunquam recondunt. Mesenterium infarctum, skirrhosum & purulentiam conspurcatum oculis subjicitur; ejusque vasa ut plurimum se offerunt varicosa: epiploon nusquam ferè illæsum apparet; sed skirrhosum, putredine correptum vel planè absumptum observatur: stomachus & intestina maculis gangrænosus signata obvia fiunt: stomachus in nonnullis callosus & contractus: intestina subputrida in unum globum coalescunt: intacta deprehenduntur in plerisque pectoris viscera: nonnunquam tamen reperiuntur pulmones corrupti, fœtidissimis ulceribus deturpati; cor ulcerosum & putridum; pericardium cordi accretum vel penè absumptum; ut fileamus de cerebro nonnunquam fœtido, ulceribus, purulentiam, excrecentiis deturpato, &c. Varia demùm notatu digna exhibent ossa; connexiones nempe siccas, fractas epiphyses, ligamenta erosa, luxationes, costas à suis cartilaginibus dimotas, &c: mirari quandoque subit ossa

SCORBUTUS

mollia & quasi cartilaginea ; sed hoc infrequens phænomenum luem etiam veneream respicere plures autumant : exostoses verò & caries , huicce postremo morbo familiarissimæ , rarissimè observantur in scorbuto.

Nemo non novit , ut ad curationem deveniamus , nasturtium , cochleariam , raphanum rusticum , cæteraque antiscorbutica , de quibus satis superque in materiâ medicâ , quæ jure specificorum titulo designantur : sed plures latet hæc plantas sæpiùs incassum adhiberi ; vel noxam inferre , ni sapientiæ præceptis regatur harum dosis ; sanguis enim à diuturniori antiscorbuticorum usu excandescit ; undè emergunt febris lenta , phthisis , marasmus , &c. Hinc patet cur sæpiùs aliis præsidiiis auspicanda sit curatio : hæc versatur circà diluentia & temperantia ; lapathum scilicet , cichorium , fumariam , affinesque plantas subamaricantes. Haud exiguum opem præstat tartarus vitriolatus ; nec minorem laudem meretur nitrum , ubi præsertim imminet hæmorrhagia. Succus limonum , æquè ac alia acida vegetabilia , non solum valet ad præsentem impugandum morbum ; sed etiam inter prophylactica principem locum sibi vindicat ; quod sanè apprimè norunt navigantes : plures scorbuticos usu acetosæ , inter alimenta , curatos se vidisse testatur MORINUS ; nec adversatur propria nostra experientia. Plurimum etiam deprædicantur turiones abietis , & aqua picea. Suppetias ferunt diaphoretica , dum urgent dolores & vigent exanthemata ; inter quæ cæteris antecellunt diaphoreticum minerale , antihæcticum Poterii , sal volatile succini , spiritus salis ammoniaci , elixirum proprietatis , &c. sed solerti manu tractari debent hæc remedia , quæ præposterè adhibita summam noxam inferre solent. Haud inutilem quandoque opem , præmissis præmittendis , conferunt martialia ; raro tamen , contra consuetum rerum ordinem , profutura , si obstruantur viscera. Crebro demùm usu recipiuntur aquæ minerales frigidæ , vel aqua simplicissima affatim hausta ; lac , serum lactis , &c. Cathartica sæpiùs pro re natâ emolumento esse liquet : sed cautè sunt præscribenda , blandioraque seligenda. A nonnullis laudatur cortex peruvianus , nec fortè immeritò ; notare tamen expedit quod diuturnus hujusce corticis usus , inter curandas intermittentes , non impediverit quominus plures ægri , sublatâ febre , in scorbutum delapsi fuerint. Haud citra periculum adhiberi queunt narcotica : si tamen planè insomnes sint ægrotantes , vel summam tyrannidem exerceant dolores ; urgentiori succurrere licet. Idem esto judicium de venæ sectione , haud minùs reformidandâ ; ideò exulare debet , ni graviora & truculentiora symptomata illam expostulent. Summam infert perniciem hydrargyrus , præsertim si pryalismum moveat ; hinc à sanioribus medicis abdicatur : etsi haud defunt qui hocce præsidio scorbutum se fugasse contendunt ; quos luem veneream pro scorbuto habuisse , credere par est. Remediis tamen antivenereis inchoanda est curatio , si implicentur prædicti affectus : sed testitudineo gressu in hocce casu incedendum , ne irritentur crabrones.

Inter remedia externa primatum sanè ducunt gargarismata ex specificis ,
detergentibus

detergentibus & adstringentibus parata; è nasturtio scilicet, cochleariâ, hyssopo, semine aquilegiæ, balauistiis, rosis rubris, lignis guaiaci & lenrisci, cortice granatorum, vel Winterano, camphorâ, succino, fale ammoniaco, alumine, aliisque acidis mineralibus; quibus accedunt tinctura gummi laccæ, vel myrrhæ, spiritus cochleariæ, &c. Nonnullis arridet ad eundem usum hydromel cum aquâ hordei paratum: alii nasturtium, cochleariam, acetosam, fructus berberidis, &c. mastica præbent. Camphora extûs adhibetur ad arcendam gangrænam. Summè ad artuum contracturam decantatur usus internus & externus illius sedi minoris speciei, quam vermicularem vocant. Calidè admovetur sal marinum cruribus œdematosi, nec infelici successu. Balnea demùm, morbo ad finem propèrante, curationem complere solent.

SCORBUTUS

L U E S V E N E R E A.

SUB omnium ferè morborum schemate se profert *Proteiformis hic affectus*, qui diutiùs quandoque delitescit, & usu, uti fertur, tum interno, tum externo aquarum thermalium venit in propatulum: benè tamen notandum haud omnibus successisse hanc periclitationem. Innumeris propèmodum *signis* se prodit lues venerea; vel tanto *symptomatum* agmine stipatur, ut vel levem ejus adumbrationem solitis, pro instituto, cancellis vix coercere liceat. Remissius tamen, minùsque procellosum & truculentum videtur nostrâ ætate hoc ægritudinis genus; sive eundo ejus exhauriantur vires, uti nonnulli autumarunt; sive ab inventâ, haud multis abhinc annis, tutiori methodo faciliùs & familiariùs impugnetur: adeò ut hoc correpti confidentiùs ad notissima præsidia confugiant; priusquam morbus altas egerit radices, & certam perniciem intulerit; quod sanè magis rationi consentaneum videtur. Circà finem sæculi decimi quinti, ab Hispanis ex Americâ reducibus, in Europam traductam fuisse, illatenùs inauditam luem veneream, vulgò fertur: verum quidem est hanc primò circà hæc tempora palàm in nostro orbe profiliisse: sed num antea pro leprâ, tunc familiarissimâ, nunc admodum rarâ, haberetur haud leve emergit dubium; quod aliis solvendum relinquimus.

Primum luis venereæ *signum* ex agrotantium, flagitia haud celantium, candido relatu depromi debet. Apertiùs enim elucescit hicce morbus tantâ varietate ludens, si habeamus fatentem reum: sin minùs, intricatissima sæpiùs est ejus diagnosi. Brevi post compressam mulierem inquinatam, ut plurimum se prodit hic affectus; aliàs haud nisi post plures menses, imò & annos, in propatulo se sistit, diù latens in sanguine sine noxâ. Plerique tamen post concubitum impurum, de æstu genitalium, cum stranguriâ, conqueruntur; & post triduum circiter profilit gonorrhœa; de quâ infra agemus. Præputium & nonnunquam balanus, phlogosi,

L U E S
VENEREA.

corripiuntur : penem non secus ac vulvam impetunt ulcuscula , pustulæ , cristæ , porri , &c. Gravioris infortunii periculum incurrit membrum genitale ; nempe inflammationis , quæ ad certum gradum devectora , gangrænam minatur. Tument in pluribus testes quibus impendit phlogosis , & ex hoc fonte prodeunt in posterum hydrocele , sarcocoele , & varicocoele : protuberant bubones , de quibus suo loco. Anum obsident ficus , mariscæ , condylomata , rhagades & scissuræ ; vel ipsamet fistula : tument furentes hæmorrhoides , sæpiusque in suppuratum abeunt ; vel occallescentes carcinomatis naturam redolent. Hæc sunt *signa* luis venereæ *spectabiliora* , quæ tamen infida censerī debent ; cum haud rarò accidat ut gonorrhœa , bubones , pustulæ , ulcera genitalium , infarctus testium , &c. ab alio fonte prodeant : sed latentis virûs haud levem suspicionem movent prædicta symptomata , si solitis præidiis minime cedant ; vel si quâlibet arte fugata , nullâ intermediâ spurcicie , recurrant. *Febre anomalâ* , quandoque stipatur lues venerea ; nunc acutâ , nunc lentâ , continuâ vel intermittente. Nonnulli demum , ut hisce generalibus finem imponamus , de æstu , haud dubiâ apyrexia , in volâ manuum & plantâ pedum conqueruntur.

Præcipuam *in capite* exercet sævitiem virus venereum : parit enim cephalalgias atrociores , insultus convulsivos , vertigines , tremores & paralyfes. Protuberant in facie & cute capillatâ ; non secus ac in alis narium , & commissurâ labiorum , pustulæ sui generis , quarum series in fronte quamdam refert corollam , quæ singulis obviis morbum prodiit. Exsurgunt è pericranio tumores cystici , quibus subjectum os carie læditur. Ingruunt ophthalmiæ , lippitudines , alique multigeni oculorum affectus. Mali etiam consortes fiunt aures , quæ tinnitu , surditate , dolore , phlogosi & ulceribus conflictantur. Sed os latentis virûs certiora profert indicia ; fauces enim , uvula , tonsillæ , palatum , & rariùs gingivæ , ulceribus latè serpentibus depascuntur. Nec feriantur nares ; quæ etiam simili modo confodiuntur , cum subjacentium ossium carie : ibidem erumpunt polypi , nunc occallescentes , nunc canceri naturam redolentes : procedente morbo palati fornix ossea , in quibusdam exeditur ; hinc emergit foramen , nullâ arte conglutinandum ; undè vox , ut inquiunt , nasalis. Ex hisce diversis oris & narium defædationibus emergere halitum fœtidissimum , faciliè colligitur : hunc etiam fovet *pulmonum* labes , quæ à raucedine , hæmoptysi , phthisi & asthmate faciliè dignoscitur. Nec inter hancce rerum conditionem illæsum manet cor , uti è palpitationibus , lipothymiis crebrò recurrentibus jure conjicitur.

Rarò in consensum trahuntur *abdominis* viscera , si excipias uterum , aliæque utriusque sexûs organa , quæ diversimodè læduntur ; infarctu nempe , phlogosi , skirrhis , exulcerationibus , &c. Insuper sæpiùs tument , uti jam innuimus glandulæ inguinales ; undè suboriuntur bubones , in hocce morbo vulgarissimi : rariùs glandulas cervicales & axillares obsidet virus venereum : sed ex eodem feminio prodeunt *tumores* cystici diversæ molis , & in variis partibus , non secus ac in capite , protuberantes ; ac demum

tubercula tendinibus & ligamenti infidentia. Plures *doloribus*, in artubus nonnūquam acerbissimis, conflictantur; qui scilicet tam altè defiguntur, ut ipsamet ossa attingere videantur. Noctu exacerbantur prædicti dolores, qui hanc vel illam partem obnixè dilaniant; vel in varias disseminantur, ab arthriticis vagis planè dissimiles. Intereà erumpunt in pluribus exostoses molles, vel renitentes; indolentes, vel molestæ, quibus labefactantur partes circumambientes: carie etiam crebrò afficiuntur *ossa*; undè enascuntur ulcera fœtidissima & contumacissima. Hiant rhagades in volâ manuum & plantâ pedum: extremi digiti paronychiis impediuntur: decidunt ungues, capilli, supercilia, &c. *Cutis* demùm diversimodè afficitur; ulceribus phagedæneis scilicet exeditur; diversiformibus maculis atropurpureis, vel lividis signatur; atque scabie, herpete, aliisque pustulis siccis, humidis, squamosis, &c. defœdatur. Notare demùm expedit quòd hæc omnia signa, vel phænomena hancce luem affectari solita, nusquam in omnibus se prodant; sed singula in singulis, pro innumeris circumstantiis, summè variant.

De discrimine quod occurrit inter scorbutum & luem veneream, è signorum syndrome, vel symptomatum congerie eruendo, jam suprà actum fuit: sed prolatis addere juvat, partes per quas contagium syphiliticum propagatur; genitalia nempe utriusque sexûs, post concubitum impurum; labia procorum & amasiarum ferventibus basiis inquinata; os lactentium, papillæ nutricum; ac demùm cutis alumnorum qui in utero materno hoc vitium contraxerunt; primò ulcusculis, pustulis, vel quovis alio modo affici. In hunc censum etiam veniunt gonorrhœa & testium intumescencia, non secùs ac bubones qui pudendorum vicinia occupant. Infantes à viru matris & nutricis sæpissimè inquinari, apud omnes in confesso manet: sed de aliis luem contrahendi modis dubitare licet: etiamsi variæ circumferantur historiæ obstetricantium, qui manu in uterum adactâ, & aliquandiù in hisce latebris versante, luis semina recepisse arbitrabantur. Notandum incumbit signa hætenùs prolata, utrumque sexum; habitâ ratione genitalium, respicere; sed alia occurrunt ad mulieres duntaxat pertinentia; tumores nempe cancrofi mammarum; catameniorum suppressio, vel profluvium immodicum; uteri infarctus, ulcera, &c. pleræque insuper fiunt steriles; crebrò abortiunt utero gerentes; vel partum edunt rubore erysipelaceo perfusum; diversisque pustulis aut ulcusculis oblitum.

E præhabitis perspicuum fit luem veneream *periculi ferè expertem* esse, si nullam molestiam creet, nec obsit functionibus: *ominosam* econtrà existimari, ubi læduntur partes internæ; ac numerosa, gravioraque exsurgunt symptomata. Difficilem curam admittit, si cum scorbuto & scrophulis implicetur: ubi jam diuturnior, altas egit radices; vix expugnari patitur: indomabilis demùm censetur si præcipua viscera, vel organa vitalia certam labem contraxerint. Periculosioris est res alex, in infantibus & senibus. Leve incommodum parit luem venerea,

L U E S
VENEREA.

mulieribus menstruatis; sed stipato agmine se proferunt symptomata, ubi desinit, statâ ætate, lunare profluvium. Lues demùm solis naturæ viribus commissa, & quasi sui juris facta, in hydropem vel marasimum plerumque abit.

Ab exaratâ *cadaverum historiâ* colligitur, musculos uvidos quodam latice pituitoso imbui; organorum involucra, non secùs ac cæteras membranas, variis pustulis vel tuberculis conspergi; viscera multigenis infarctibus, & quâcumque collectione contaminari; cavitates & recessus stagnationibus serosis vel saniosis repleri. In *capite* referato, accuratiorique examini subjecto, detegitur caries in ossibus cranii, faciei & aurium: conspiciuntur exostoses in facie internâ pyxidis osseæ: obvii fiunt tumores duræ matri, ejusque propaginibus adnati. Occurrunt vasa concretionibus, ut inquiunt, polyposis distenta: in apicem venit plexus choroïdes varicosus, & hydatidibus refertus: passim demùm observantur purulentia, putredines, &c. Varia etiam spectatu digna exhibet *pectus*, cultro anatomico subjectum; pulmones nempe infarctos & skirrhosos, tuberculis obstitos, abscessus recondentes, ulcere exesos, putredine absumptos & necrosi correptos; tracheam & bronchia quasi carie erosa; thymum skirrhum, purulentia defædatum, vel putridum; œsophagum sæpiùs in consensum trahentem: cor tuberculis scatens, mole ingens: diaphragma pustulis oblitum, &c. Haud minorem ostendit labem *imus venter*: sedulò enim perlustratæ glandulæ, præsertim mesentericæ, infarctæ, occallescentes vel putredine conspurcatæ reperiuntur. Nodosa vasa lymphatica hùc & illuc perreptantia nudis oculis subjiciuntur. Passim occurrunt hydatides, phlogoses, abscessus, exulcerationes, tumores skirrholi, anomali, &c. Perindè pessundantur in nonnullis hepar; lien & pancreas: sed hisce vitiis crebriùs infestantur uterus, ovaria, vesiculæ seminales, prostata, aliæque partes ad generationem comparatæ. Varia deprehenduntur ossa, tum trunci, tum artuum, carie confecta, ipsammet medullam diversimodè contaminatam attingente. Nonnullæ comperiuntur exostoses, vel asperitates; quæ antea delitescabant. De ossium mollitie mentionem subjecerunt varii Authores; sed num rarissimum illud phænomenum, luis venereæ, potiùs quàm scorbuti, sit referendum suprà dubitavimus. Nec illæsa sunt ligamenta & tendines, quæ ossium instar, nunc tument, nunc carie tentantur. Se obtulit demùm mercurius vivus, in his præsertim qui inter hydrargyrosim animam exhalarunt; non solum in basi concavâ cranii, sed etiam in ligamentis artuum capsularibus, ac in ipsomet ossium cavo; quod sanè benè notandum venit.

Neminem fugit, ut ad *curationem* deveniamus, mercurium secretiora corporis adyta penetrantem, specificum esse luis venereæ remedium, & usitatius; sive per cutis porulos ad sanguinem appellat, ope unguentorum, emplastrorum, vel suffumigiorum; sive intus sumatur per os sub formâ ptisanæ, pulveris, pilularum, &c. Hinc innumeræ emergunt methodi, quæ suas laudes merentur; dummodò eò collimetur, ut mercurius

sanguini confusus diù intrà vasa retineatur & ad intimiores corporis recessus blandè feratur. Danda est opera ut absque impetu effectum suum exerat, ne ptyalissimum aut alvi profluvium moveat: hæ enim evacuaciones, accurato studio, declinari debent; cùm non modò inutiles & supervacaneas esse; sed integræ virûs eradicationi obstare, præcipuam hydrargyri quantitatem per os, vel alvum, devolvendo, millenis observacionibus constat.

E variis medendi methodis hætenùs notis sibi parem non habere videtur ea quæ ab admoto *unguento Neapolitano*, & frictus ope intrà cutis porulos adacto, tempestate congruâ peragitur: sed nil moliendum donec, expeditis viis, humores inquinati mercurii viribus obtemperent. In hunc scopum præmissis venæ sectione & catharsi, præcipiuntur temperantia, lac, serum lactis, balnea, &c. nec posthaberi debent prædictæ cautelæ in aliis curandi ritibus; qui aliàs inertes vel noxii evaderent. Ab hæcce normâ nonnunquam tamen deflectere licet; si urgentissimus casus præparationis moras minime pariat: sed diatæ semper habenda est ratio: lacteam, si nil obstet, magis congruam esse pluries experienciâ didici.

Mercurii uncia circiter duæ, è quibus parantur unguenti uncia quintæ vel sextæ adhiberi debent pro integrâ illitione, habitâ ratione virium: imò & nonnunquam refringitur hæc dosis; raròque augetur. Frictiones, tertio quoque die iterandas, haud ultrà duodecim vel sexdecim per totum curationis stadium celebrari debent, quod intrà quadraginta vel quinquaginta dies ut plurimum continetur. Dorso & artubus duntaxat admoveri debet unguentum Neapolitanum: primò scilicet obliniuntur pedes, postea crura, dein genua, &c. nec immutantur lintea per prædictam mercurii administrationem. Si mercurius irruat ad os, aliudve grave incommodum pariat, inunctionibus supersedere expedit: imò & mundum conceditur indusium; aliaque induuntur tibialia, &c. quibus induciis haud ritè succedentibus, ad cathartica confugiendum; ut humores qui caput impetunt ad inferiora divertantur. Fluentibus catameniis, vel tempore graviditatis, à frictionibus abstinendum. Pro tenellis infantibus inquinatis, nutricum sanguis mercurio imprægnari solet, ut lac antivenerereum ipsis præbeant; atque hoc solo præsidio plures sanantur. Verumtamen mercurius quocumque modo usurpetur, nonnunquam impar est eradicandæ lui veneræ: hinc fit ut post administratam hydrargyrosim, ad sudorifica, quæ curationem complent, deveniant solertiores: ad guaiacum scilicet, chinam radicem & sarsaparillam; quibus posthabitis sæpiùs recrudescit morbus, alteri hydrargyrosi, rarò feliciori, iterùm submittendus: quod sanè altâ mente tenere debent, qui ægrorum saluti consulunt.

Ubi cutis læsiones impediunt quominùs peragantur frictiones mercuriales, explorare licet *suffumigiorum* vires; cum eâ cautelâ, ut caput à fumo, oculis, dentibus, & pulmone infenso, tueatur. In hunc finem adhibentur cinnabaris, athiops mineralis, mercurius saccharo extinctus; alterave mercurii præparatio: nonnulli ipsis addunt olibanum succinum,

L U E S
V E N E R E A .

styracem , mastichen , terebinthinam , aliaque consimilia ; quorum ope parantur tabellæ , trochisci , &c. Definitor suffumigationis spatium , à tribus , quatuorve minutis , ad horæ quadrantem , pro ægri viribus ; & recipitur pro quâque suffitione cinnabaris drachma una aut altera , interposito triduo vel quatruiduo : adeò ut pro toto curationis stadio , quod intrâ quadraginta vel quinquaginta dies etiam continetur , haud ultrâ uncias circiter duas cinnabaris usurpentur. Hanc curandi methodum haud periculi expertem , nec illitionibus tutiorem esse , innumeris periclitationibus jamdiù constitit : haud tamen despicienda ; cum nonnunquam respectu circumstantiarum , & accidentium , ceteros medendi ritus antecellat : defœdationibus præsertim cutaneis apprimè medetur ; & sub hisce casibus multis optimè cessit ; sed inanem sæpiùs operam ludere ergà labem viscerum , ratum apud expertos manet. Suffitiones ægrè patiuntur debiles & macilenti : has absque noxâ admittere minime valent phthisici , quâcumque arte præcaveatur fumi accessus ad pectus : imò & nonnullos suffitos , quorum antea illæsi erant pulmones , in phthisim incidisse experientiâ constat.

Interea impar sæpiùs censetur utraque methodus subigendæ materiæ morbosæ ; nec felicior fuit secunda , tertiave periclitatio ; cur ad aliam se conferre expedit , quæ duplex innotescit , & versatur circa *mercurium* sub diversâ formâ *ore sumptum* , vel *sudorifica* è vegetabilibus petita. Ex alterutro fonte depromunt agyræ & empirici , Medicis audaciores , liquores , ptisanas , pulveres , pilulas , aliaque arcana , quæ nonnunquam agrotantium vota explent. Nec despiciunt circulatores remedia quædam obsoleta , quorum usus olim notissimus & probatissimus , nescio quo fato , eviluit. Præstò sunt panacea , arcanum corallinum , aquila alba , turpethum minerale , præcipitatum rubrum , & innumera alia præparata , à Chymicis excogitata , quæ intus sumpta ad sanguinem per vasa lactea appellant , & suas vires exerunt in virus venereum ; quod hydrargyro per cutem immisso sæpiùs obsurdescens , his planè subigi valet. Simplex est utendi modus : panacea scilicet , quæ erit instar omnium , singulis diebus , præmissis præmittendis , exhibetur , ad dosim primò minimam , à granis scilicet quatuor ad sex ; sensim adaugetur hæc dosis donec ad scrupulum unum accedat ; & dein paulatim eadem ratione imminuitur ; adeò ut ultima primam minime superet. Panaceæ drachmæ circiter sex adhiberi solent ad absolvendam curationem ; quâ procedente sedulò cavendum , respectu dosium , non secùs ac in aliis methodis , ne ptyalisimus moveatur ; præsertim si nonnulli hujusce excretionis prodromi in ore percipiantur : hæc enim est pyxis nautica quæ solertiorum sistit gressus. Insuper haud cæteris expeditior est hæc methodus ; easdemque cautelas , & præparationes expostulat. Illud notare juvat , ergà quamvis mercurii administrationem , quod ad amissim minime definire liceat necessariam mercurii quantitatem , ad extirpandam luem ; nec indicare numerum dierum , quibus coerceri , vel protelari debet curatio ; cum virus venereum ,

nunc facîle evincatur , nunc contumaciùs evadat. Sed à benè perspectis agri viribus , atate , sexu & temperie ; morbi diuturnitate & gradu , infortuniis & accidentibus ; nec posthabitâ omnium symptomatum , successu temporis evanescentium , accuratâ observatione , curandi iudicium dirigitur. Cave tamen ne sopitum duntaxat deleterium citiùs ocyùs recrudescat ; quod pluries evenissè , omnibus uti videbatur ritè succedentibus , iis etiam , qui novæ contrahendæ luis nullum periculum adierint , neminem practicum fugit.

Inter varia præparata mercurialia , *sublimatum corrosivum* magis reformidandum esse , nullus fermè ambigit ; cùm inter venena caustica primatum ferè ducat. Hoc tamen hætenùs invisum remedium in familiarem & auspiciatissimum usum traxit celeberrimus VAN-SWIETEN : atque numerosissimis observationibus jam constat hanc materiam , aliàs summè noxiam , solerti manu tractatam exquisitissimum , & planè innocuum antivenereum præbere ; adeò ut laudatus Author hoc cæteris anteponeere minime dubitet. Nec difficilis est utendi modus ; solvuntur nempè sublimati corrosivi grana duodecim in spiritûs frumenti semel rectificati libris duabus : propinatur serò & manè illius solutionis cochlear unum vel alterum , superbibendo singulis vicibus decocti hordei , cum lactis tertiâ parte , libram unam ; quod decoctum , potum ordinarium etiam præbet. Haud nisi præmissis præmittendis , & solitis servatis cautelis usurpari debet illud remedium ; quod protelatur donec evanuerint luis symptomata ; & res ad alcyonium statum redigantur. Si morbus occurrat levis , nec altas egerit radices , haud ultra tres septimanas exhibetur , ad designatam parcissimam dosim , illud euporistum : sed ubi impugnanda occurrit lues ferina & vetustior ; augetur dosis , & diutiùs protelatur curatio. In hacce demùm methodo , non secùs ac in aliis , invisus est ptyalismus ; hinc concedendæ sunt induciæ , ubi imminet.

Jam diù exolevit , & immeritò abdicatur *sudorificorum* , olim celebratissimorum , usus ; guaiaci nempè , sassafras , chinæ radices , & sarsaparillæ : verùm tamen eorum efficacia ad extirpandam luem veneream innumeris propemodum , & accuratissimis observationibus constat : nec solertiores practicos latet hoc solo præsidio , perperam hodiè posthabito pluries radicatus evulsum fuisse deleterium syphilideum ; post incassum administratam & repetitam hydrargyrosim : imò & ab expertis , uti jam innuimus , sæpiùs in usum vocatur ad tutiùs absolvendam curationem à mercurio inchoatam , vel uti videtur peractam. Cæteris congeneribus præcellit guaiacum , & ideò illis præfertur à potiori clinicorum parte : nec difficilis est utendi modus ; ejus nempè decoctum ad cyathos duos vel tres , singulis diebus , per quadraginta vel quinquaginta dies & ultra , pro re natâ , propinatur ; inter quem usum tenuissimus requiritur victus ; & æger è lecto assurgere minime debet. Alterum ejusdem ligni decoctum , quod bochetum nuncupant , pro potu ordinario , ptisanæ instar paratur ; ipsiusque usus ultra prædictum terminum , vel ad mensem integrum , post

L U E S
VENEREA.

absolutam curationem, protenditur. Notare tamen juvat, macilentos & debiles ægrè ferre sudorificorum vires; hinc necessum est ut sub hoc casu cautâ & refractâ dosi adhibeantur. Narrat BOERHAAVIUS se curasse juvenem lue aphrodisiacâ, cum ossibus cariosis, planè confectum; post incassum adhibita mercurialia exquisitiora, solo decocto guaiaci pro potu ordinario præcepto; faventibus sudoribus, ex spiritûs vini vapore promotis; nec posthabito victu tenuissimo.

Scire expedit nonnulla symptomata, etiam post eradicatum à quâvis methodo morbum, moras trahere & aliquandiu manere: sed nullum recidivæ merum incutiunt expertis; cum extincto morbi fomite, facillimâ arte fugentur; vel successu temporis spontè desinant. Gonorrhœa, inter alias *reliquias*, pertinacior audit: levi tamen marte eximitur ope lactis, aliorumve demulcentium; aquarum mineralium acidularum & martialium; ac demùm balsamicorum & roborantium. Dolores etiam, nonnunquam antivenereorum vim eludunt; sed in posterum evanescent; etiam conferentibus lacticiiniis, temperantibus, & aquis mineralibus; quibus inanem operam ludentibus, proficue adhiberi solent diaphoretica: nec posthabenda topica emollientia, demulcentia & anodyna, quæ saltem inducias agunt, donec cætera præsidia curationem claudant. Si supersint scabies, herpes, ulcera, caries ossium, &c. quod tamen rarò accidit; nil præter tralatitiam medelam, nullâ habitâ ratione primariæ causæ, efflagitant. Hæc sunt, plus æquo fortè contracta, quæ de lue venereâ nobis dicenda erant: qui plura ambiunt; adeant tractatum peritissimi, & disertissimi ASTRUC, qui nullis pepercit laboribus, ut hanc materiam penitus exhauriret.



S C R O P H U L Æ.

VIRUS scrophulosum, venerei instar, diù in corpore sæpiùs delitescit; vel cum aliis morbis complicatur; adeò ut atrâ caligine tum obvolvatur ejus *diagnos*is: adde quod scrophulæ (*les Ecouelles*) lue venereæ affines esse videantur; ni sint hujusce postremi affectûs mera progenies; pluries enim observatum fuit parentes syphiliticos, imò & scorbuticos genuisse prolem scrophulosam. Insuper remedia luis venereæ specifica, mercurialia nempè & sudorifica; apprimè etiam congruunt scrophulis: eandem postremò faciem nonnunquam præ se ferunt prædicti affectus, vel planè comparibus stipantur symptomatibus; adeò ut nil ferè certi de eorum discrimine proferre liceat. Alia tamen se prodit scrophularum profapia: ratum enim manet apud clinicos, has sæpiùs ortum mutuari à pravis eduliis, ab aquis lutosiis & putridis; à lacte nutricis utero gerentis, &c. Prætereà ultrâ omnem dubii aleam positum esse videtur, scrophulas ex traducè propagari, vel simplicij contagio contrahi: undè colligitur huncce affectum,

affectum, nunc esse congenitum, nunc adventitium: maximique momenti, ut sub hoc duplici conspectu innotescat.

Tumoribus foris erumpentibus ut plurimum se produnt scrophulæ; quæ hinc audiunt apud vulgus *Humeurs ou Tumeurs froides*. Haud immunes tamen censerì debent partes internæ, & præsertim glandulæ mesentericæ; uti ex infrà tradendis de autopsiâ anatomicâ abundè patebit. Larvatus quandoque incedit morbus; priusquam in propatulo se sistat tumoribus, quæ glandulis lymphaticis, salivaribus, & tyroïdi insident: in artus etiam incumbunt hæ prominentiæ; craniumque impetunt, quod carie haud rarò exeditur: spissoque agmine protuberant in cervice, propè aures, infrà maxillam inferiorem, & suprà tracheam quæ etiam carie afficitur. Crebrò invadunt axillas, inguina & mammas; nec parcunt oculis, naso, labiis; cubitis, poplitibus, genibus, manibus, pedibus, utrorumque digitis. Adnascuntur prædicti tumores membranis, tendinibus, ligamentis & ipsismet ossibus quæ ideò intumescunt & carie læduntur; unde emergunt dolores acerbissimi; & hoc truculentum symptoma, sub diathesi scrophulosâ familiariùs barbaro *spina ventosa* nomine venit.

Tumores scrophulosi, qui suâ naturâ inter phlegmonem & skirrhum, medium quasi locum tenent, firmiter subjectis partibus hærent; adeò ut immobiles plerumque observentur: nunc ad certam molem superficie inæquali assurgunt, & quasi conglomerati videntur: aliàs concatenatim dispositi circà cervicem disseminantur. Cuti ut plurimum concolores, agrè phlogosim concipiunt, & in suppuratum abeunt: sed ut plurimum occallescentes, duritiem quasi lapideam nonnunquam mentiuntur. Ulcera mali moris quæ exindè oriuntur, è quorum diurnitate in febrem hecticam & marasimum delabuntur infantes, haud rarò canceri naturam redolent; vel in fistulam fœdissimam facessunt: prominentia & inversa horumce ulcerum labra dolent & occalescunt; atque agrè ad mutuum contactum ducuntur: si verò post longum & tædiosum opus ferruminentur; albicantes manent cicatrices, hinc summè conspicuæ & nullâ arte delebiles. Aliud occurrit horumce tumorum genus, cysticorum nempe, qui materies diversæ fortis, vel meram aquam limpidam & inodoram recondunt: in hunc censum quandoque venit bronchocele, tyroïdem glandulam occupans; quæ suâ mole haud rarò tracheam, ipsumque œsophagum comprimit. Absit tamen ut omnes tumores anomalos, qui *Gouetres* vulgò audiunt, laryngi vel cæteris partibus incumbentes, pro symptomate scrophuloso, uti nonnulli perperam cogitarunt, habeamus; cum hos ab innumeris aliis causis sobolescere luce clariùs pateat. Haud rectiùs collineant, qui rhachitidem; defluxiones in artus, vel eorum tumores œdematosos, ulcera fistulosa, achores, &c. nonnunquam, ut verum fatear, luis scrophulosæ symptomata; semper & indiscriminatim ex hocce fonte prodire aurumant; quod sanè rationi & experientiæ adversatur.

Nec hisce cancellis, uti jam innuimus, continetur *lues scrophulosa*, quin potiùs in plerisque pariat tumores sublinguales, tonsillarum infarctum;

SCROPHU-
LÆ.

polypum & ozænam narium, ophthalmias, ægilopem, aliasque oculorum læsiones. Sæpiùs etiam irruit ad pectus; hinc sarcoses in tracheâ & bronchiis, hæmoptysis, phthisis, asthma, &c. Nec parcat abdomini, ut plurimum intumescenti, virus scrophulosum; præter enim mesenterium, quod præcipua morbi sedes jure censetur; hepar, lienem, omentum, &c. afficit. Sub hisce angustiis contabescunt ægri, rarò febris expertes; vel in hydropem, paralyfimve delabuntur; qui postremi morbi ad certum gradum deveci plures ad libitinæ rationem ducunt.

Infantes *invadere* solent scrophulæ à quarto ætatis anno ad pubertatem, ultra quam rarò protelantur: si hos limites transgrediantur, cachexiam vel arthritidem, aliumve morbum chronicum, solitum eludere Medicorum artes, post se trahunt. Ubi scrophulæ scaturiginem ducunt ab aquis, alimentis & contagio, vel à quâvis aliâ causâ externâ & evidenti, secundis avibus ut plurimum judicantur; secùs verò evenit si sint congenitæ; cum labes hæreditaria, cujuscumque sit indolis, vix expugnari se patiat. Huic affectui magis obnoxios esse infantes qui ingenio præcoci pollent, plures autumarunt; nec reluctatur experientia. Ritè succedere potest curatio erga tumores molles & recentes, mobiles & doloris expertes: nec minor spes affulget, si sint phlegmonodei, & à suppuratione minime alieni: sed immobiles, skirrholi, dolentes, lividi & inveterati pertinacissimi audiunt; tracheæ & majoribus vasis incumbentes, non secùs ac tendinibus, ligamentis & ossibus accreti gravius facessunt negotium: calamitosi demùm censentur qui canceri naturam redolent. Ulcera quæ exhinc oriuntur, sordida & virulenta difficillimè sanantur; vel si indefesso labore coeant; sufflammatum virus in aliam partem irruit; inibique novum cuditur ulcus, priori planè suppar. Summam postremò molestiam creat caries ossium manuum, pedum, maxillæ, &c. Ut demùm hæc omnia in unum contraham, à diuturnitate morbi, non secùs ac à naturâ partium læsarum erui debet *prognosis*; aliàs semper ominosa, si virus visceribus impactum marasimum vel hydropem accersat.

In tumoribus externis, *cultro anatomico* subjectis reperitur ichor fluidus, subcruentus, vel amurca quædam flava: concretiones tophacæ, & hydatides. Circà horum vicinia conspicitur materia quasi adiposa, concreta & carnosa; lardo quandoque simillima: qualis plerumque observatur in cancris; cum ossibus subjacentibus carie læsis. Deteguntur series minorum glandularum, racematim congestarum, quæ totidem scrophularum semina, seriùs ocyùs progerminassent, &c. Haud minorem labem contraxisse partes internas è lustratis visceribus liquet; aperto enim abdomine, deteguntur glandulæ mesentericæ mole majores; quæ nonnunquam nucis juglandis, imò & pugni virilis magnitudinem assequuntur: skirrholæ, callosæ & ferè lapideæ quandoque observantur; vel tumorum anomalorum instar, materiam quamdam sebaceam, caseosam, vel purulentam colligunt: in consensum trahuntur vasa lactea, receptaculum pequetianum, & ductus thoracicus; quæ multifariam lædi solent; sed in plerisque

materiâ quasi gypseâ infarciuntur. Occurrunt sarcomata polyposa ventriculo, tuboque intestinali, intus & extus, adnata; consimiliaque rarius exhibet vesica. In apicem venit hepar, nunc corrugatum, aridum & contractum; vel skirrhosum, tuberculis refertum & oblitum; imò & quasi lapideum; nunc mole amplissimum, & abscessus amurcam albam & cruentam continentes recondens: in nonnullis demum deforme, & à naturali situ recedens, cum vesiculâ bile diversæ indolis & consistentiæ, supramodum distentâ, conspicitur. Simili modo labefactatur lien, qui etiam putredine confectus, adeò ut instar pultis diffuat, imò & planè absumptus deprehenditur. Eisdem patiuntur defædationes omentum, pancreas, uterus, ovaria, &c. cur fit ut vulgatissimæ sint in abdomine stagnationes serosæ, saniosæ, purulentæ & fœtidæ. Nec parcit interno pectori virus scrophulosum: thymus enim in omnibus ferè skirrhosus & stupendæ molis; vel calculos fovens, invenitur: obvium fit pulmonis involucrium crassum & callosum: patet substantia ejusdem visceris skirrhosa, tuberculis referta, pure conspurcata & putrida; imò & in quibusdam alteruter hujusce visceris lobus absumptus planè deficit; vacuum replente materiâ quâdam albicante & quasi gypseâ. Insuper ante oculos versantur pleuræ exulcerationes; tumores huic membranæ accreti cum costæ vicinioris carie. Idem vitium præ se fert pericardium; quod aliàs cordis peripheriæ annectitur, vel aquâ turgidum se præbet. Nec desunt aliæ hærentiæ morbosæ, atque stagnationes diversæ sortis, serosæ scilicet, lixiviosæ, lutulentæ, ramentis sanguineis intermixtæ, &c. circa prædicta viscera fluctuantes. De ossium tumoribus, carie, aliisque vitiis ante obitum notissimis nil addimus.

Præcipuus *curationis* cardo circa incidentia & sudorifica versatur: sed inertia vel nociva deprehenduntur hæc medicamina; ni præmissâ venæ sectione, si nihil obstet, & expeditis primis viis; emendandæ sanguinis diathesi ope feri lactis, aliorumque diluentium, temperantium, depurantium, antiscorbuticorum & blandè aperientium, primum prospiciatur. Præclarum sub hoc conspectu effectum sæpius præstant lacticia; sed haud omnibus congruunt: in eundem scopum pluris habentur radices brusci, scrophulariæ & polypodii; non secus ac folia tussilaginis, rutæ murariæ, nasturtii, cochleariæ, &c. Laudatur in hoc primo curationis stadio ipecacuanha: sed egregiem opem conferunt per totum morbi curriculum pluries repetita cathartica; ne humores ab appellente pravo chylo ulterius inquinentur. Quibus præmissis ad efficaciora deveniendum medicamina; nimirum ad millepedes, martialia, gummosa, & saponacea. Inter absorbentia & amara, nonnullis proficua, præstantiora censentur magnesia, & cortex peruvianus, à quibusdam plurimum decantatus. Ex incidentium serie, aquila alba, panacea, æthiops mineralis, aliaque præparata mercurialia probatissima audiunt; quæ ideò diù & refractâ dosi usurpata multis optimè cedunt. His addere licet aquam calcis, quæ cautè exhibita in pretio jamdudum fuit. Inter sudorifica selectiora recensentur viperæ, sassafras,

SCROPHU-
LÆ.

antihecticum Poterii; aliaque ejusdem commatis. Nec posthabendæ aquæ minerales, Plumberianæ nempè, Baregieneses, Bonenses, Vervonenses, Dinieneses, &c. Spongia calcinata ad drachmam unam circiter, serò & manè, diuque sumpta inter specifica à quibusdam numeratur: iisdem viribus pollere videntur pumex, cæteraque absorbentia. Summis etiam laudibus deprædicatur remedium *Rotrou*; quod tamen paucis arridet ob difficiliorem encheiresim, quâ fit ut in majori officinarum parte desideretur. Nec desunt qui vulgatissimas illitiones mercuriales suadent; sed ulteriori experientiâ comprobari debet hoc remedii genus, quod haud feliciter successisse experientiâ novimus. Summis laudibus nuperrimè extolluntur vires plantaginis extûs admotæ; & nil impedit quominus explorentur. Pluribus demùm suppetiantur cauterium & setaceum; præsertim sub ophthalmiâ scrophulosâ, quæ aliàs solita præsidia expostulat; venæ sectiones nempè, cucurbitulas, hirudines, vesicatoria, &c. de quibus suo loco.

Suam curam sibi vindicant *tumores externi*, quæ versatur circà resolventia & maturantia: à benè perspecto horum schemate, ad alterutram methodum se conferunt medentes; attamen à resolventibus prima ut plurimum auspicantur tentamina. Inter innumera quæ pro singulorum arbitrio usurpantur, præstantiora censentur folia ebuli sub cineribus cocta; cataplasmata è radicibus bryoniæ & cucumeris sylvestris; fots ex aquâ calcis; suffitus ex olibano, karabe & tacamahacâ; emplastrum diachylum cum gummis, de Vigo, de cicutâ, diabotanum, &c. Quibus incassum adhibitis, ob tumorem resolutionis nescium, maturantia explorari solent; cataplasmata scilicet emollientia & digestiva vulgatiora, quorum beneficio tabum quandoque conficitur, & paratur abscessus; cujus, vel maturi & fluctuantis, sectio minime festinanda ut puris morâ integrè exedantur glandulæ scrophulosæ. Simili ratione minime properandus est ulceris ex hinc emergentis coalitus; quin potiùs in usum trahenda sunt catharetica; inter quæ, solutio sublimati corrosivi in aquâ plantaginis deprædicatur: digestivis & detergentibus sociata hæc postrema remedia eradicare valent scrophularum reliquias; quæ aliàs post laborum ferruminationem superstites, iterùm procul dubio progerminantur: nec à solertioribus posthabentur ipsamet caustica, quæ si ad genuinum fomitem attingant, præclara obeunt munia. Si verò prædicti tumores integri vel aperti, venis circà ambitum tumentibus, canceri naturam induant; omnibus vel exquisitioribus topicis obsurdescunt: ideò nil tùm præter demulcentia & anodyna admoveere licet; ni illos ferro abscindere fas sit; quæ operatio Chirurgi solertiam & dexteritatem expetit; nec periculo vacat, si glandulæ affectæ, etiamsi mobiles, vicinioribus nervis, & majoribus vasis hæreant. Tutiùs sanè simplici ligaturâ illas prominentes aggredi licet; sed ubi altè defiguntur, planè abdicatur utraque curandi methodus. Addere lubet, priusquam manum è tabulâ amoveamus, molestissimam scrophularum curationem, ut plurimum, ad annos protelari; cùm hicce morbus rarò domari patiatur, nisi accedente pubertate, ultrà quam per totum vitæ curriculum, sub

diverso conspectu, sæpiùs protrahitur. Pluribus optimè cessisse connubium experienciâ constat. Nil postremò omittendum eorum quæ profutura videntur.

SCROPHU-
LÆ.

A R T H R I T I S.

OMNIBUS sanè patet hic morbus, (*la Goute*) si in pedes, vel manus cum tumore, dolore & calore irruat. Sed aliter se res habet sub levioribus insultibus, qui vix nisi ab expertis ægrotantibus innotescunt. Intricator evadit hæcce *diagnos*s; si materia arthritica alias partes, & præsertim viscera, nullo alio prævio paroxysmo, impetat, sub alterius morbi facie, quem incauti, ne minimâ genuinæ indolis subortâ suspicione, intempestivâ medelâ sæpiùs aggrediuntur. Arthritis rarò *invadit* infantes ante pubertatem, & castratos; parcit sequiori sexui, priusquam menstrua erumpant; si excipias chloroticas ad hanc procliviores: sed increbrescit apud senes, præsertim corpulentos & magnates, maturè canescentes; sæpiùsque adoritur hypochondriacos & hystericas; præsertim si sufflammentur hæmorrhoides & catamenia. Hanc post se trahunt, præter labem hæreditariam, vita deses & umbratilis, lautissimus victus & cupediæ, diuturnæ comestiones, & liberalior vini & aquarum ardentium potus; ac demùm castra veneris. Nemo nescit calculum ab iisdem causis progerminari; & binos hosce morbos ex eodem fonte prodire: cur sit ut plures ab arthritide & nephritide alternatim excrucientur; & senes utroque morbo ut plurimùm conflictentur; hinc patet cur nonnulli arthritici lotium mingant intensè rubrum, cum sedimento crasso & copioso. Ad dolores arthriticos proximè accedunt rheumatici & ischiadici, qui ab iisdem causis suboriri videntur: sed alterius sunt commatis dolores scorbutici & venerei, qui sæpiùs arthriticos & rheumaticos æmulantur; atque horum typum ita mentiuntur, ut vel solertiores decipere queant.

Arthritis tendinibus & ligamentis defixa sævitiem suam exercet in pedes, manus, genua & cubitos: haud tamen continuò ægros dilaniat; sed per paroxysmos rarò febris expertes recurrit. *Pars affecta* dolens & tumida, nunc levi phlogosi quasi corripitur cum calore, rubore & quâdam pulsatione; nunc œdematosa & quasi flatulenta, cum torpore & quiescentibus doloribus videtur; hinc arthritidis divisio in calidam & frigidam. Dolor idèò sub variis gradibus se profert; nunc mitis & obscurus, de quo vix conqueruntur ægri; nunc acerbissimus tantam tyrannidem exercet, ut à tactu levioris straguli mirum in modum exacerbetur. Sub diluculo ut plurimùm compescitur & planè desinit; dummodò ab intempestivo motu haud acriùs recrudesca. Partem primò affectam sæpiùs deserit materia arthritica; ut in aliam partem irruat, genua nempè, manus, &c. sic protrahuntur ægrotantium æumnæ, donec accedente pruritu, paroxysmi ad finem properantis spes affulgeat.

ARTHRITIS

Insultus arthritici pedes obsidentes, haud ultra quatuordecim circiter dies protelantur in juvenibus & vegetis; sed diuturniores fiunt, ad plures scilicet menses producuntur in senibus & debilibus: victus tamen ratione, aliisque innumeris circumstantiis varios modos, respectu durationis & intensitatis, patiuntur. Quò vehementior est dolor, eò citius præterlabitur paroxysmus, & hinc longior est intermissio; & vice versâ; adeò ut dolor sævissimus sub hoc statu amarissimum hujusce morbi remedium audiat. De accessionum interstitiis, vel diebus intercalaribus, nequaquam constat; sed ut plurimum statis temporibus redeunt, plerumque vere & autumno; ni animi pathematibus, vel solutâ vivendi normâ turbentur solitæ periodi: parùm abest quin planè obliterentur in arthritide chronicâ; cum dolores, mitiores quidem, fiunt continui; ni inducias quasdam impertiantur dies caniculares. Morbo senescente utrorumque artuum digiti impediuntur, incurvantur, diversimodè torquentur; ac suis exequendis muniis impares evadunt. Protuberant è phalangibus occallescentiæ, à materiâ quâdam cretaceâ ligamentis, tendinumque involucris impacta, subortæ; quarum ratione *arthritidis* dicitur *nodosa*: quæ tubercula nonnunquam hiulca prædictis concretionibus exitum largiuntur. Arthritis tamen primâ vice invadens senes haud acerbos dolores infert; nec ordinatis periodis subjicitur. Addere juvat quod, ubi hic affectus in singulis ætatibus, cognato rheumatismo sociatur, uti crebrò evenit, postremus hicce morbus prædominium obtinere videtur.

Ructibus & flatulentia, alvi adstrictioni & hæmorrhoidibus, stranguaria, ischuria, &c. obnoxios esse arthriticos, ratum apud omnes manet: sed majora incurrunt infortunia à metastasi materiæ arthriticæ, quæ ab artubus secedens visceribus minatur: itaque si ad cerebrum transmittatur, suboriuntur cephalalgia, delirium, vertigines, lethargus, apoplexia, paralysis & tremor: si capitis partes externas impetat, sobolescent ophthalmiæ, otalgia, dolor dentium, angina, &c. Si irruat ad pectus, concitat catarrhos & inflammationes; phthisim & hæmoptysim, asthma, anxietates, lipothymias, &c. Si incidat in viscera abdominalia, emergunt nauseæ, vomitus, inappetentia, alvi fluxus, dysenteria, ardor stomachi, vel cardialgia sævissima; dolor colicus, nephriticus, ischuria, &c. quibus sic se habentibus lotium quieti traditum sedimentum quoddam gypseum elabi sinit. Prætereà plures podagrici quamdam in ore ventriculi molestiam ante paroxysmum experiuntur, quam ventositatem vocant: nonnulli de quâdam adstrictione circâ ilia & hypochondria; vel molesto interaëneorum sensu conqueruntur. Ubi arthritis sub hisce faciebus occultatur; post prægressum insultum vulgatissimum facilè expiscatur morbi indoles; sed in obscuris latet, ni prævia in pedibus, manibusve accessio illam prodiderit: quod sæpiùs evenire; ætate ingravescente, neminem clinicum fermè fugit.

Arthritis congenita, vel à pueritiâ contracta, *immedicabilis* censetur: adventitia recens nonnunquam domari patitur; sed chronica & altissimis

radicibus defixa à quâvis causâ processerit, ægrè in fugam vertitur. Exemplo sit SYDENHAMUS, coætaneorum Practicorum sanè Princeps, qui huncce morbum, quo laborabat, graphicè depinxit: asserit enim vir candidæ fidei, omnibus per triginta annos incassum exploratis, se non secus ac illos qui remedia detrectantes, vel sumptibus parcentes nullum Medicum acciunt; arthritide pertinacissimâ affectum fuisse. Ubique insuper occurrunt, qui per totum vitæ curriculum cum podagrâ luctantur. Quod ad paroxysmum spectat; dolores acutissimi spondent breviorē, dilucidiusque intervallum; adeò ut pro salutari naturæ molimine, nonnullis delicatulis tamen inviso, habeantur. Urina crassa, ineunte insultu arthritico, hunc breviorē fore indicat. Benè etiam *ominandum* de partis dolentis intumescentiâ, ad inflammationem proximè accedente; quæ defluxionis criticæ instar, proximas inducias pollicetur. Imminentem paroxysmi exitum etiam prænuntiant urinæ crassæ, turbidæ & lutulentæ; quarum examen minime despiciēbant Veteres in singulis connexionum affectibus. Arthritis senescens debilior evadit; sed diutiùs protrahuntur paroxysmi; adeò ut sensim ægri & præsertim podagrici solitis intermissionibus planè defraudantur. Multiplici experientiâ compertum manet ingruentem arthritidem emolumento fuisse febre quartanâ, asthmate vel hydrope laborantibus; & senes arthriticos longæviores fuisse: sed caveant sub hâc conditione ne evanescat prædictus morbus; consuetudo enim, ut vulgò fertur, est altera natura, cujus mutatio, etsi à pravis ad salutaria vergere videtur, periculosissima censerī debet. Periculo vacat hoc ægritudinis genus; si solis artubus insideat materia morbosa: sed res in ancipiti versatur, ubi præposterâ medicatione, diætæ vitio, aliâve causâ, ab exterioribus ad interiora vergens materia arthritica viscera, cerebrum nempe cum nervis, cor & pulmones odoritur. Minorem terrorem incurrere debet, si primas vias laceffens, vomitum, alvi fluxum, vel ipsammet dysenteriam promoveat; cùm hæc evacuationes sæpiùs proficuas fuisse testetur observatorum chorus.

Autopsia anatomica exhibet, in ossium connexionibus nodosis, materiam quamdam cretaceam vel tophaceam, quâ non modo obducuntur tendinum involucra & ligamenta, sed etiam ipsamet ossa, à propriâ sede nonnunquam dimota, obvestiuntur; notare tamen expedit, quod nulla reperiatur in capsulis artuum ligamentosis. Reperitur sanguis effusus in ventriculos cerebri. Pulmones se sistant humore viscido infarcti, inflammati, putridi & exesi. Obviæ fiunt lapidescentiæ in cerebro, corde, pulmonibus, &c.: deprehenduntur arenulæ & calculi in omnibus urinæ receptaculis. Oculis subjiciuntur renes contracti & corrugati: lien occallescent; hepar granulofum, inflammatum & putridum; lien obstructus & putris; pylorus occallescent; prostata tumida, &c. ut de cæteris sileamus quæ ad omnes ferè morbos spectant.

Haud defunt *remedia* prophylactica & palliativa ad arthritidem; quæ aliàs, uti jam innuimus, ægrè eradicatur; præsertim in senibus quorum

ARTHRITIS

contracta cutis spiracula solitis perspirationis effluviis egressum denegant. Ab omni curatione abstinere præstat, *vigente paroxysmo*; & totum negotium naturæ, vel victui tenuissimo committendum; ni dolorum acerbitas lenientium & emollientium usum suadeat. Haud citrà periculum adhiberi posse venæ sectionem, ineunte insultu, facile crediderim: hanc enim, rarò profuturam etiam in plethoricis, morbi stadium sæpiùs protraxisse; ægrosque haud rarò ad ultimam rerum lineam duxisse sexcentis constat historiis. Haud me fugit sanguinis missionem, *vigente paroxysmo*, è pede affecto dolorem incantamenti instar, nonnunquam profligasse: sed nùm temera hæc methodus, cum naturæ viribus colluctans, periculi expers sit? iis quos non latet plures diversi generis ægros hæc intempestiva levamina capite in posterum luisse, examinandum relinquimus. Cathartica haud nisi urgente necessitate præscribi debent; sed nil vetat quominus enematum præsidio alvus servetur libera. A narcoticorum usu, cui fortè ægrorum querulis & ejulatibus auscultans, plus æquo inhærebat SYDENHAMUS, arthritidem pertinaciorem evadere testatur quotidiana praxis; quæ docet insuper dolorem esse amarissimum naturæ remedium, non sine periculo deflectendum; cùm sæpiùs eveniat ut cicuratis doloribus ingruant nodi, tophi, tumores œdematosi, & ipsamet paralytis. Absit tamen ut illos insimulemus qui laudati authoris vestigia premendo, urgentiori inter furentes dolores obtemperant. Tutiùs sub hoc rerum statu adhibetur theriaca, quæ notante *Riverio* cæteris hypnoticis præstat; dummodò certo judicio usurpetur; nec diutiùs ejus protelatur usus.

Topica, quæ adversùs arthritidem proponuntur, indiscriminatim usurpare nefas: ab intempestivè enim admotis repercutientibus & narcoticis sæpiùs ab artubus secessit materia morbofa: hinc subortæ sunt metastases, è quibus mortis auguria defumebantur. Sed haud vetantur emollientia & resolventia; inter quæ probatissimum est cataplasma utriusque vis particeps, è lacte, micâ panis & floribus sambuci vel chamæmeli paratum. A nonnullis deprædicantur folia bardanæ, penes quos sit fides. Suppetiantur cineres calidè admoti. Nec despiciendus est fots ex ipsâmet aquâ tepidâ simplicissimâ, quæ fortè cæteris topicis præstat; cujus ope resolvi potest ipsamet materia podagricorum calcaria. Præsentaneam opem haud rarò ferunt vesicatoria. Cæteris demùm præcellere videtur cauterium actuale à *Moxâ Sinenfium* paratum; quod pluribus optimè successisse experienciâ novi. Linum carptum, aliamve materiam vegetabilem tomentosam in eundem finem usurpabant Veteres; qui nemine discrepante hoc ambustionis genus debitis præconiis celebrarunt.

Sublato paroxysmo, nil urgentius clinico esse debet quàm ejus reditum præcavere: hanc peroptatam metam attingere queunt, qui congruæ victûs rationi indulgent; & à carnibus & vinis abstinent. Durtam merè lacteam cæteris prophylacticis palmam præripere multiplici constat experienciâ. Vir quidam nobilis sexaginta annorum, omni deliciarum genere perditus, jamdudum arthritide divexatus, adeò ut nec pedibus insistere, nec manibus apprehendere

apprehendere posset; divino fidere afflatus, pravos mores exuere, & è libidinum cœno emergere decrevit; virtutisque viam insequi necessarium duxit, ut iratum placaret numen, & flagitia serâ pœnitentiâ redimeret: ideò abjectis voluptatibus & cupediis, nil aliud præter phaseolos nullo condimento coctos, panem & aquam ad omnem alimoniam sibi concessit: quâ vivendi ratione non modò salutis æternæ, annuente qui intimos mentis humanæ recessus perscrutatur, prospexit; sed sensim jam inveteratam & nodosam arthritidem planè fugavit, radicitusque incogitans evulsit. Variis etiam historiis constat nonnullos arthriticos lautè priùs victitantes, ad summam inopiam adversâ fortunâ redactos, adeò ut nil præter panem & aquam ipsis offerebatur, arthritidem cum paupertate commutasse: tantum valet tenuis & parvus victus ad profligandos diuturniores affectus; præsertim sub arthritide, cujus fomitem & mineram latere in primis viis apud omnes in confesso manet.

Sapo, ut in orbitam redeamus, inter præstantiora remedia recenseri debet; & pro adeundis altioribus corporis penetralibus, vasisque obstructis blandè referendis sibi par fortè non habet; dummodò congruo regimine ejus vis nociva infringatur. Opportunè exhibentur amara & stomachica; in quorum censum veniunt cortex peruvianus, gentiana, aristolochia rotunda, centaurium minus, tanacetum, chamædrys, chamæpitys, epithymum & theriaca. Nec posthaberi debent sudorifica vel antimonialia, quæ solerti manu exhibita nonnullos fausto bearunt eventu. Haud in minori pretio jamdudum fuit aquarum thermalium usus internus vel externus. Porro plurimum conducit quævis corporis exercitatio: nec inutilem opem conferunt frictus; non quidem tempore vigentis vel imminētis paroxysmi; sed planè silente morbo. Pluris habentur indusia è panno tenuissimo, (*flanelle*) conflata. Nonnullos voti compotes vidi, dum utebantur noctu diuque, udonibus laneis vel calceaminibus è pellibus villosis coagmentatis. Aliquid fert auxilii balneum è vinaceis paratum: pluribus podagricis proficius fuit præceptus aquæ uberrimæ lapsus moletinarum. Nonnullis demùm arridet linimentum ex oleo terebenthinæ & spiritu salis confectum; vel balsamum sulphuris antimoniatum HOFFMANNI, quod ex sale scoriarum reguli antimonii simplicis, superinfuso oleo terebenthinæ & juniperi paratur; & præsertim valet ad tophos præcavendos & discutiendos in senili podagrâ: ut de generalibus quamvis methodum respicientibus nihil addam.

Alia ineunda medendi via *ad materia morbosæ metastasim*, quam vocant arthritidem anomalam, *goute remontée* vulgò dictam. Huic infortunio an- sam præbere topica narcotica & repercutientia, helluationes, iracundiam, aliaque graviora animi pathemata, &c. jam suprà declaravimus. Nulla est viventis corporis pars interna vel externa, cui hæc devia materia haud infigi queat; unde emergit morborum ilias: sed crebriùs impetit cerebrum, pulmones, stomachum, tubumque intestinale, renes, &c. quibus primarii morbi consortibus ægrotantium res in ancipiti versantur: cur nil

ARTHRITIS

non movendum ut latex arthriticus sanguini remixtus ad artus revocetur. In hunc scopum illicò tunditur vena, & præsertim pedis; saphenæ enim sectione hanc deviam materiam pristinam sedem petiisse haud semel experientiâ novimus: quod sanè arguit infidum esse illud præsidium sæviente podagrâ. Præsentaneam opem ferunt cathartica quorum ope materia morbosa ad sentinam intestinale amandatur; quapropter, his ritè succedentibus de reditu arthritidis ad artus parùm curant clinici; quos præterea non latet alvi fluxum tam sub paroxysmo, quàm in diebus intercalaribus, potiori arthriticorum parti proficuum fuisse.

Purgantium vires supplere valent diaphoretica è triplici regno deprompta. Eundem effectum præstant roborantia, tum aromatica, tum amara, nux nempè moschata, zedoaria & cortex peruvianus, quæ congeneribus præcellere videntur. A nonnullis etiam deprædicatur moschus, ubi materia arthritica stomacho insidet. Nonnunquam tamen opportunè exhibentur alkool martiale, aliaque innumera medicamina, quæ pro re natâ & diversis symptomatibus suum symbolum conferre valent: quibus recensitis nonnunquam egregiè obsecundant hypnotica, quæ tamen exulare debent, si mens obnubiletur, & impediatur respirationis organum. Prioribus minime cedunt topica stimulantia, vesicatoria nempè si res urgeat; sinapismi, aliaque id genus vellicantia. Sunt qui solam admovent picem Burgundiam, quæ sæpiùs blandè & sine molestiâ vesicantium vices explet. Alii pedes in aquam tepidam demergunt, vel hos pelle ovis, alteriusve pecudis recens mactatæ, accuratè obvolvunt. Haud exiguam laudem merentur frictiones cum pannis asperis celebratæ. Nec posthaberi debent hirudines vasis hæmorrhoidalibus admotæ; quas sæpiùs mira præstasse meminimus. Quibus tamen minime proficientibus, nil tutius novi quàm repetitis catharticis inhærere. Pluribus demùm prodest decubitus in lecto, benè recto corpore; ut blanda foveatur diaphoresis, juvante quovis potu calido; nec posthabita diætâ tenuissimâ.



RHEUMATISMUS.

LICET rheumatismum ab arthritide minime disjungan veteres ante Ballonium; & ab unâ eâdemque causâ pendere videantur cognati, vel finitimi hinc morbi, ut inquiunt, articulares; ritè tamen distingui debent, tam ratione partis affectæ, quàm respectu eventûs & curationis: *Rheumatismus* in membranas & involucra incumbens faciliùs evincitur; *arthritis* verò ligamentis insidens contumacior evadit; sed unus facillimè in alium faceffit; vel ambo simul suam in eodem subjecto tyrannidem exercent; undè emergit quædam arthritis anomala, quam nostrates vocant *rheumatisme gouteux*. Morbus de quo in præsentiarum, & cujus vehementia rarò ultrâ quatuordecim dies protelatur, adoritur artus, cervicem,

dorsum, maxillam, scapulas, pectus & abdomen: nunc totam musculofam compagem corripit, vel repentè peragrat; nunc peculiari parti infigitur, quâ relictâ, in aliam subrepat. *Torticolis*, vulgatissimo vel barbaro idiomate, audit hic postremus; si cervicis musculos impediat; adeò ut caput velut obstipum maneat. *Pleuritis spuria*, *fausse pleurésie*, dicitur; si pectoris musculis incumbat. Lumborum musculis implantatus *lumbago* vocitatur: atque *ischiadis* titulo innotescit; si partem cognominem, vel coxam vicinioreque partes occupet; de quibus suo loco. Susceptum frigus, corpore æstuante, ædes humidæ vel recens constructæ, vita iners & otiosa; helluationes & castra veneris; menses & hæmorrhoides, aliave consueta sanguinis profluvia sufflaminata; eruptiones repulsæ, &c. sunt totidem *causæ* rheumatismi. Usui corticis peruviani diutius protracto indulgentes ad hunc morbum procliviores esse autumavit SYDENHAMUS; sed refragatur experientia.

Dolores rheumatici, arthriticorum instar, variis gradibus subjiuntur. Si intensiores evadant, muscoli suis obeundis muniis fiunt impares, vel ægri ab omni motu temperant, ne cruciatus exasperentur. Frigidus à nonnullis dicitur hic morbus; si nullam febrem comitem habeat. Calidus verò audit, si febre stipetur; quod per transennam notare expedit. Ut plurimum tamen *exordium* capit ab *horrore & febre*; nec ante biduum, triduumve dolores emergunt, qui nonnunquam repentè in omnes partes irruunt; vel unam duntaxat partem impetunt; ac sæpiùs mobiles ex hac in aliam propagantur; adeò ut in eodem paroxysmo per plures partes divagentur; quod crebrò evenire sub juvenili ætate nemo non novit. Hunc typum etiam præ se fert rheumatismus arthritidis particeps, qui hinc *arthritidis vaga* apud nonnullos audit; in quâ pars affecta subrumida, rubore, veluti in genuinâ arthritide, perfunditur. *Febris rheumatica*, quâ carent insultus leviores, nunc mitis, nunc vehemens; continua vel intermittens intrâ breve tempus coercetur: sed dolores diutius protrahuntur, ac sæpiùs sublatâ febre exarcebantur, & non nisi post triginta vel quadraginta dies fugantur; imò & ad annos, vel per totum vitæ curriculum protelantur.

Dolores rheumatici, venereorum & scorbuticorum instar, noctu ingravescent: ut plurimum arthriticis perstant remissiores; si excipias lumbaginem fortè ferociorem, quæ ideò ab incautis nonnunquam pro nephritide habentur; præsertim si quâvis aliâ causâ, vel fortuitò, vomituriant ægri. Notandum tamen haud rarò sociari prædictos affectus; quod sanè minime mirum, ob notam affinitatem inter arthritidem, rheumatismum & calculum. Porro scire expedit vetustissimos dolores rheumaticos ut plurimum foveri à viru venereo vel scorbutico; imò & dolores hujusce commatis sæpiùs sub facie rheumatismi pertinacissimi delitescere; quod altâ mente tenere debent inexperti. Postremò ad accurationem rheumatismi *diagnosim* addere juvat sanguinem venæ sectione eductum crustâ subviridi obduci, ceu in pleuritide: ex hac similitudine crassissimus emerit

RHEUMATISMUS.

error, cujus pœnas luerunt innumeri ægrotantes: sibi enim persuaserunt complures, rheumatismum morbum esse inflammatorium, solâ hinc multiplici venæ sectione domandum: ac tandiù huicce præposteræ mendendi methodo inhæserunt clinici, quandiù invaluit hæc, jam obsoleta, hypothesis.

Periculo plerumque *vacat* rheumatismus, ni ab incongruâ victûs ratione, vel præposterâ medelâ, latex morbosus ad cerebrum, pulmones, aliaque viscera, relictâ genuinâ sede, irruat; undè suboriuntur symptomata, quæ veluti in arthritide anomalâ, haud levem terrorem incutiunt. Universali sudore sæpiùs, & nonnunquam eruptionibus cutaneis judicatur: vel lotii, mensium, hæmorrhoidumve profluvium, evacuationem criticam mentitur. *Pertinacior* censetur; si peculiari cuidam parti defigatur; sed rarò quid mali portendit. Utriusque induciæ, vel intermissiones morbum curatu faciliorem indicant: secùs verò evenit; si deficient. Inveterascente morbo, non secùs ac arthritide; aridis & decurtatis musculis flectuntur digiti, & protuberantibus nodis torquentur: imò & ossa è propriâ sede nonnunquam dimoventur, vel ferruminantur: hinc patet cur artus suis exsequendis muniis impares evadant; imò & motu planè orbentur; ac nonnulli ægri ad lectum se conferre cogantur. Rheumatismus demùm faciliùs, ut suprà inculcavimus, quàm arthritidis eximitur; etsi enim rheumatismus familiarior est; frequentiùs tamen occurrere veteres arthriticos neminem fugit.

Cadavera cultro anatomico subjecta exhibent musculos ita contractos & exsiccatos, ut tendinum speciem referant. Obvia fit materia quædam, nunc gelatinosa, nunc tophacea, membranis & aponeurosis accreta. In conspectum veniunt ossa invicem coalescentia, vel ferruminata, necnon ex acetabulis repulsa. Cæteras læsiones, de quibus suprà dùm de arthritide, consultò missas facimus. Sedulò tamen animadvertendum quod tradita, de seniori duntaxat rheumatismo intelligi debeant: in recenti verò nulla patet læsio; vel labes contracta oculorum aciem fugit; cur sit ut nil notatu dignum præbeant artus, etiam accuratiori examini subjecti.

Curatio vigente febre à sanguinis missione est auspicanda; præsertim ubi partes affectæ tensione & rubore afficiuntur; imò & iteranda quandoque venit, inter tres quatuorve dies à primâ invasione; ultrà quos ab illâ abstinere expedit, ne morbus diutiùs proteletur: nec ultràmodum fundatur sanguis intrâ constitutos limites; cùm ter, quaterve ad summum venam tundere sufficiat; quidquid obganniant, qui tandiù cruorem esse mittendum, quandiù persistat febris, & sæviunt dolores, perperam volunt; hisce rationibus ducti quod sanguis eductus morbum inflammatorium prodat: quod merum esse commentum jam suprà declaravimus. Narrat MARQUETUS Author candidæ fidei, se diù, instar aliorum, creberrimas venæ sectiones adversùs rheumatismum adhibuisse: sed experienciâ novisse huncce morbum hâc methodo pertractatum ad menses & annos prorogari: ideò meliùs consultum ad cathartica & sudorifica se contulisse; quorum subsidio,

missis numerosis venæ sectionibus, morbum antehac contumacissimum intrà paucos dies profligabat; quod sanè observatu dignum occurrit.

Nonnunquam expedit à primâ celebratâ venæ sectione, *vomitum* ciere; ut saburra nidulans in stomacho brevi per viam regiam foràs eliminetur. Cathartica, haud urgente necessitate, ad finem morbi sunt ableganda; si excipias blandiora laxantia quæ, non secùs ac enemata, lubricam alvum servant; quod maximi in hocce morbo esse momenti, multiplici observatione satis superque constitit. Faustè usurpantur, persistente paroxysmo, diluentia, refrigerantia & temperantia; serum nempè lactis; ptisana vel apozemata nitrosa; pulvis temperans, cremor tartari, &c. nec minùs profunt diuretica, depurantia, & diaphoretica mitiora: nec nisi summâ cautelâ, vigente præsertim febre, validiora in usum trahi debent, ne irritentur crabrones; vel febris rheumatica in inflammatoriam faceßat; quod sæpiùs evenisse incondito terebenthinæ, antimonii diaphoretici, spiritûs cornu cervi & viperarum, aliorumque ejusdem commatis stimulantium usu, meminerunt Authores; quibus experienciâ edocti lubenter assentimur.

Quod ad *hypnotica* attinet; haud magis congrua videntur in rheumatismo, quàm in arthritide; etsi dolores compescere & ægros solari queunt: naturæ enim vires excretionem criticam nonnunquam molientis infringere, & hinc morbum protrahere valent; imò & quandoque materiæ morbosæ ad cerebrum, vel ad pulmones, impetui, haud citrà maximum ægrorum periculum, favent. Nihilominùs camphora, inter sedantia locum sibi vindicans, tutò exhiberi potest; nec immeritò multis laudibus affertur apud prioris notæ clinicos; cùm præter vim anodynam, diaphoresim movere, viresque organorum refocillare queat. Postremò proficuè nonnunquam adhibentur lapilli cancrorum cornu cervi præparatum, aliaque absorbentia, quæ pro nonnullis symptomatibus quibus stipantur paroxysmi, in aliorum medicaminum subsidium veniunt. Sed alia expostulat præsidia *rheumatismus chronicus*, continuus vel intermittens; inter quæ primatum ducunt demulcentia, roborantia, aperientia, incidentia & sudorifica; lacticia nempè, rheum, cortex peruvianus, bacca juniperi & aqua picea; aquæ minerales, sapo & mercurius dulcis; ac demùm decoctum guaiaci lacte temperatum, juscula viperina, &c. quæ totidem etiam prophylactica audiunt. De radice bardanæ quam nonnulli tanquam specificam deprædicant, ulteriùs inquirendum. Plura demùm remedia in arthritide usurpari solita, proficua etiam esse in curatione rheumatismi nemo ambigit.

Suam etiam opem præstant medicamina externa, in quorum censum veniunt balnea frigida, quæ ad fugandum recentem rheumatismum tanquam efficacissima à nonnullis deprædicantur: haud omnibus tamen profuisse experienciâ freti afferere minime dubitamus: nec desunt qui haud citrà periculum illa adhiberi posse crediderint. Balnea verò tepida, ritè depletis vasis, egregiam, nemine fermè discrepante, opem conferunt. Inter

RHEUMATISMUS.

topica usitatiora recenseri debent axungia humana & ursina ; medulla cervina ; unguentum de althæâ ; oleum laurinum , lumbricorum & chamæmeli ; cataplasma è micâ panis , &c. nec improbantur animalia viventia secta , parti dolenti admota ; vesicæ lacte tepido semi-turgidæ ; lagenæ stannæ fervidâ aquâ repletæ , aquæ ferventis vapor quâvis arte ad partem læsam ductus ; furfur calidum , &c. ubi verò furunt dolores , ad balsamum tranquillans , cæteraque narcotica externa confugere licet ; sed cautè cum illis mercari expedit. Si demùm partis intumescencia & rubor venæ sectionibus minime obtemperent ; hirudines admoventur parti affectæ , quæ materiam fortè morbosam unâ cum sanguine sugunt. Hanc etiam allicere valent vesicatoria , quibus nil efficacius & expeditius experiri creditur.

Quod attinet ad *rheumatismi chronici* medicationem externam ; gestantur indusia è panno molliusculo (*flanelle*) conflata : summis laudibus extolluntur , nec immeritò , sudatoria : faustè adhibentur balnea aquarum thermalium , Plumberianarum nempè , Viciensium , Borbonensium , Arcimbaldicarum , Bellilucanarum , Dinensium , Aquisgranensium , &c. immerguntur agri in vinacea ; admoveretur lutum aquarum mineralium : celebrantur frictus cum linteis & pannis calidis. Nec silentio sunt præmittenda cauteria & setacea , quæ præclaros sæpiùs effectus edunt. Si demùm morbus parti cuidam infigatur , nullum fortè præsentius remedium novi quàm motum voluntarium partis affectæ ; quo sanè quidem exasperantur dolores : sed contractione musculari attritus latex morbosus brevi ut plurimùm difflatur ; dummodò non adoleverit morbus. Cervicis musculis hærens , solo calore ab admotâ lanâ succidâ , aliisque modis impetrato ; aut suffitu ex olibano , karabe , &c. excitato , facillimè mitescit & fugatur. Coronidis loco addere lubet quod , ubi dolores rheumatici à cohibito quocumque profluvio , vel à repulsâ quâvis eruptione originem ducunt ; omni ope moliendum ut revocentur solitæ evacuationes , pristinæque efflorescentiæ ; quæ recurrentes omnem curam absolvere queunt : quod altâ mente tenere debent , qui perfunctoriè evidentes morborum causas perscrutantur ; & intempestivis remediis commentitium morbi fomitem impugnando laterem plerumque lavant.



HYPOCHONDRIASIS.

HYPO-
CHONDRIASIS.

SATIS superque notum est huncce affectum spasmodico-flatulentum nomen mutuari ab hypochondriis, quæ pro genuinâ morbi sede habentur; & præsertim incusari venarum propagines, quæ reducem sanguinem ex omnibus visceribus chylificationi dicatis excipientes, in venam portæ hepatis prospicientem coeunt; ut de melancholiâ humoralis, vel cacochymîâ atrabilariâ, de quâ apud veteres, sileamus; quorum opiniones de humore melancholico & atrabilario, jam obsoletas nuperrimè restauravit clar. LORRY, theoriæ & praxeos diligentissimus excultor. Quidquid sit de hisce dubiis; apud omnes in confesso manet in spasmodicorum agmine recipi huncce morbum, qui non solum, stupendâ nervorum mobilitate, vel irritabilitate, totum corpus subagitat; sed etiam menti minime parcit: undè fit ut clinici qui auram popularem captant, & fatuos ludificare minime renuunt, à proprio nomine indecoro & probroso temperent, ac latissimo, insulsoque vaporum (*les vapeurs*) titulo hypochondriasm, seu cognatum morbum hystericum, designent. Frequens ingruit *hypochondriasis* à vigesimo ætatis anno ad quinquagesimum, ultrâ quem in scorbutum vel arthritidem facessere videtur. Hypochondriaci ingenio ut plurimum præditi & ineditabundi, vix à rebus seriis dimoveri patiuntur, mœrore suffusi, à sinistro nuntio toti contremiscunt, atque hominum, vel familiarium, congressum fugiunt: sui anxii, metu imminentis gravioris mali torquentur, vel perenni mortis formidine premuntur. A parentibus in prolem nonnunquam propagatur hoc ægritudinis genus: sed *natales* plerumque ducit à rei familiaris angustîâ, à gravibus curis, variisque infortuniis; à studio intensiori, vel labore improbo; adeò ut pro miseris litteratorum stipendiis habeatur: ab exhaustis tum mentis, tum corporis viribus. Nec parcit illis qui vitam trahunt curarum expertem, cum hunc morbum etiam accersant vitæ deses & otiosa, ingluvies, solutaque vivendi norma. Contrahitur ab emeticorum, cathartico- & hypnoticorum usu immodico: in nonnullis fovetur à materiâ deviâ arthriticâ: progerminatur demùm à coercito femine, à suppressâ gonorrhœâ, à cohibito alvi fluxu; ab intempestivâ febrium intermittentium sufflamine, &c.

Flatulentia quâ præsertim afficitur ventriculus, cum œsophago; quâ tument hypochondria, totumque inflatur abdomen cum intestinorum rugitu; atque erumpentes rictus & crepitus, cum alvo adstrictâ, primam affectionis hypochondriacæ suspicionem movent. Exsurgit in nonnullis, crebrò spuentibus, vomitus materiarum mucosarum, fuscæ & foetidarum, acriæ & acidarum; quibus postremis, non secus ac ructibus ejusdem indolis, læduntur dentes. Plures ab hac colluvie acidâ, æstu viscerum abdominalium, vel fame quâdam spurîâ laborant, quam horis

HYPOTHOCHONDRIASIS.

insolitis, noctu diuque compescere coguntur: alii anorexiâ vel cibi fastidio conflictantur. Pulsatio in abdomine, quæ ad cœliacam referri solet, tactu in quibusdam percipitur. De doloribus circâ limbum costarum spuriarum omnes ferè conqueruntur; imò quandoque de interaneorum cruciatibus, paroxysmorum more recurrentibus; qui colicam intestinale, hepaticam, vel nephriticam, situ & sævitie æmulantur. Complures ægros angunt anxietates cum lipothymix metu. Urinæ subalbida crebrius quàm par est minguntur, nec rarò cum stranguriâ, etsi copiosiores excerni solita: aliàs fusca colorem cervisix referunt; imò & nigra instar atramenti quandoque observantur in lienosis, qui melius ab hac excretionem se habent: plerique demùm de ventre segniori conqueruntur. Pectus constrictione quâdam spasmodicâ arctatur; nec rarò urget tussis sicca. Cor palpitatione & tremore tenetur. Pulsus parvus & tardus, intermittens & tremulus observatur; nonnunquam succedentibus animi deliquiis. Caput dolore & torpore gravatur; ac cum vertigine luctatur: faciei & capitis muscoli nonnunquam convelluntur; sæpius accedente aurium tinnitu. Somnus est molestissimus; vel planè deficit: nec desunt qui ad diluculum plerumque insomnes, lecto se committere renuant; vel agrè haud exutis vestibis illum petant. Mens sæpius obnubilatur, imò & perturbatur; adeò ut ægri nunc tristitiâ obruti illacryment; querelas ingeminant, & se mori perpetuò exclament: aliàs ad hilaritatem compositi risu ilia dissolvunt. Nunc dolorum impatientes, & impavidi, mortem aucupant; nunc meticulosi, & de obnubilato sensorio communi queruli, ab imminente, ut ipsis videtur, ultimo fato, perperam torquentur.

Traditis signis accedunt torpor variarum partium, convulsiones, tremores, musculorum palpitationes & subsultus, artuum strepitus; singultus, oscitationes, & pandiculationes. Auditus ab aurium tinnitu, vel ab strepitu quasi cujusdam rivuli, obtunditur. Defcendant nitidus faciei color, & oculorum splendor; præsertim in lienosis: pluresque pyralismo laborant. Pharynx & œsophagus ita spasmodicè quandoque afficiuntur ut difficilior evadat deglutitio, vel planè impediatur. Mordacis acidi sensus in stomacho famem sæpius importunam, & insolitam, concitat. Alia annotantur symptomata ab hepate læso; cum mirus sit hujusce visceris consensus cum sensorio communi; & vice versâ. Hinc intelligitur cur melancholia hepar sensim labefactet; & hypochondriasis cerebrum afficiat. Nonnulli in febrem erraticam incidunt; atque de frigore, æstusque alternatim exsurgentibus conqueruntur; non secus ac de variis doloribus, qui in diversas partes musculosas propagantur; & audiunt vernaculè *points de côté*, si ad pectus externum pertingant. Plures etiam torquet lumbago rheumatica, quæ ad femora protenditur. Signorum vel symptomatum agmen claudunt hæmorrhoides, nunc sicca, nunc fluentes; quæ haud rarò largum cruoris proventum, quo ægri sensim emaciantur, elabunt. Præfatis addere juvat huncce morbum quandoque recrudescere; vel sub accessionum procellosarum conspectu caput exerere. Proindè ratione
variorum

variorum morborum quibus sociatur, numerosissima emergunt symptomata, quæ perperam ab Authoribus hypochondriaci adscribuntur; adeo ut morborum ilias videatur hic status. Hinc intelligitur quàm arduum sit, sub læsione totius nervorum syntaxeos, propria hujusce ægritudinis signa & phænomena ab spuriiis extricare.

Hypochondriasis, non fecüs ac hysteris, cùm inter utrumque morbum sit arcta affinitas, intrà certos limites subsistens, tædio potius quàm dolore molesta, *falsum* ægrotantibus *terrorem* incutere solet. Difficilè, etsi recens, curatur; ubi verò altas egit radices, vel materiæ arthriticæ sociatur, nullâ ferè arte evinci potest: adeo ut ejus diuturnitati æquo animo ferendæ impares sint, tùm ægrotantes, tùm clinici. Nec tamen periculo vacat, cùm sæpè sæpiùs judicium perturbet; vel in scorbutum, cachexiam, hydropem, asthma, febrem lentam & marasimum abeat; vel tumores cancriferos, gangrænam, aliamve stragem post se trahat; præsertim si prædominium obtineat atrabilis: dum scilicet ejicitur materia quædam atra & picea; fœtens, & atramento quasi simillima, quæ diluta virescit; dum urinæ simili colore tinctæ excernuntur. Quibusdam profuisse fluxum hæmorrhoidalem spontè erumpentem, vel insultum arthriticum, variis constat observationibus: nec minori emolumento quandoque fuisse vomitum sanguinis, aliàs calamitosum, apud omnes prioris subsellii Medicos ratum manet. Liquet porro hypochondriacos à morbis epidemicis, vel ipsâmet peste immunes fuisse: sed ipsis minime benè vertit hæc fortuna; cùm ex animi acerbitate & perpetuâ mortis formidine miseram trahant vitam, quâ tandiù anguntur, quandiù mente constant.

In *evisceratis* hoc morbo *extinctis* reperiuntur vasa in venam portæ abeuntia, infarcta & turgida; illam me vidisse memini in hunc modum dilatatam & ampliatam, ut genuini intestini molem, faciemque assequeretur. Annotantur præterea obstructions, skirrhi, purulentia, putredo & sphacelus, in hepate, liene, pancreate, omento, mesenterio, & renibus succenturiatis. Nonnunquam occurrunt pseudo-lapides in vesiculâ felleâ. Lien nunc turgidus & mole amplissimus, adnatifque appendicibus deformis observatur: nunc durus & lapidescens vel ita contractus deprehenditur, ut vix ad unciam unam pondere accedat; imò & traditur illum planè defecisse. Circà prædictum viscus notare expedit nullum esse ambigendi locum quin in plerisque hypochondriacis labefacteretur; sed ratum manet, apud omnes naturæ scrutatores, haud rarò illæsum & inculpatum reperiri; licet alia organa diversimodè contaminata se præbeant; quod sanè quidem arguit hoc viscus immeritò pro morbi fomite, vel sentinâ, ut inquiunt veteres, humoris melancholici, haberi. Pylorus, ut eò redeamus undè digressi sumus, obstructus, skirrhusus & cartilagineus apparet. Stomachus, plerumque inflatus, saburrâ subnigricante & fœtidâ scatet. Colon in quibusdam ultra modum dilatatur; similem extensionem rariùs patiuntur cætera intestina. Pancreas infarctum, purulentum, vel calculosum occurrit. Passim demùm se offerunt in abdomine tumores anomali, præcipuam

HYP-
CHONDRIA-
SIS.

in mesenterio sedem habentes. Pectus apertum exhibet pulmones corrugatos, infarctos, vix à vicinioribus citrà lacerationem avellendos. Cor contractum, aridum, pericardio accretum; ejus ventriculos nunc atro & concreto cruore turgidos; nunc seroso & fœtido latice scatentes; ut de valvulis osseis & commentitiis polypis fileamus. Deteguntur abscessus in auriculis: oculis subjiciuntur aneurismata in aortâ, ejusque propaginibus, quæ nonnunquam osseæ deprehenduntur: pericardium aquâ turgens, &c. Referato capite, patent vasa cerebrum perreptantia, atro & crasso sanguine repleta, gelatinâ obducta; variæ defœdationes purulentæ & putridæ; stagnationes serosæ, saniosæ, mucosæ. Tumores skirrhusi plexui choroïdeo adnati; meninges osseæ; venæ varicosæ, &c. Colluviem insuper serosam in varios corporis recessus effusam; hydatides acervatim aggestas; aliaque vitia ad morbos quos post se trahit hypochondriasis pertinentia consultò prætermittimus.

In immensum cresceret pagina; & nauseosum emergeret opus, si omnia remedia ab Scriptorum choro tradita hùc attexerem; qui scilicet nil fermè ex inexhaustis materiæ medicæ fontibus intactum reliquerunt: cur missis futilibus, selectiora duntaxat & magis comprobata recenserebimus. Scire expedit in primo limine præcipuum *curationis* momentum in eo versari, ut diluatur sanguis crassior, ægréque circuitum suum peragens; ut rigidioribus vasis, ac plus æquo vibratilibus nervis flexilitas concilietur; ut demùm lymphata mens ad hilaritatem componatur. Venæ sectio, ni illam urgentiora suadeant, frustranea vel nociva censi debet; præter quam quod plures hypochondriaci quamvis sanguinis detractionem horrent. Vomitoria & cathartica sæpiùs conferunt; sed cautè & opportunè exhiberi debent; præsertim rheum & polypodium, quæ alvum antea siccam ulteriùs restringere solent; quod sanè neminem clinicum latet; præterea ventriculorum nonnunquam lacescunt; flatusque mordaces gignunt cathartica: cur sit ut plurimum ægrorum hæc ambientium votis obtemperare minime liceat. Haud vetantur tamen nonnulla laxantia, pruna scilicet Damascena, sal Epsomienſe vel Sedlicenſe in largo aquæ potu solutum; dilutum cassiæ, aliaque consimilia. Nec posthabenda sunt enemata lubricantia & emollientia, tam sub paroxysmo quàm in diebus intercalaribus, quorum auxilio alvus blandè solvitur. Plurimum deprædicantur, nec immeritò, diluentia & temperantia, quorum usitatiora depromuntur è sero lactis, & cichoraceis; capillaribus herbis, fumariâ, nasturtio aquatiko; è cancris fluviatilibus, &c. Omne porrò fert punctum lac aquis Sedlicensibus dilutum, vel pro omni alimonia exhibitum.

Juvant martialia; dummodò refractâ dosi præcipiantur, atque largo potu & obambulatione obsecundentur. Suas laudes merentur *aperientia* mitiora, uti radices graminis, asparagi, &c. quæ scilicet blandè & sine molestiâ vasa obstructa referare valent; undè abdicanda veniunt bacce alkekengi, millepedes, antimonialia & mercurialia. Nonnullis profunt amara: nec rarò proficuè adhibetur cortex peruvianus: sed aloe, etsi usu

recepta, paucis congruit. Juvamen præstant magnesia, cæteraque absorbentia; præcipuè si catharticiis misceantur. Suppetias ferunt stomachica; radix nempe helenii, cascarilla, catechu, extractum juniperi, aqua florum aurantiorum, &c. Inducias impertiuntur antispasmodica, radices scilicet valerianæ & pæoniæ, folia melissæ & menthæ, flores tilia & gallii lutei; pulvis de gutteta, & id genus alia, quæ vi quâdam sedativâ, debiliori fanè, sed innocuâ pollent. Aliter se res habet circa usum narcoticorum, à nonnullis ægrotantibus obnixè efflagitatorum, quæ capiti infesta haud rarò observantur, vel alvum segniorem reddunt: sed horum vires, nullo discrimine, supplere valet camphora, quam pluribus optime cessisse multiplici experientiâ novi. Postremò inter exquisitiora præsidia recenferi debent aquæ minerales, Vallenenses nempe, Montferinenses, Passienses, Forgienenses, Cranenses, Spadanæ, Sedlicenses, Merienses, Baregienenses, Amandinæ, &c. Plures fausto beavit eventu usus diuturnus balneorum frigidorum, præsertim in fluminibus: nec inutilia censerì debent balnea domestica tepida; imò & irrigationes capitis cum aquis thermalibus, vigentibus faciei & cervicis motibus spasmodicis. De commentitiis hellebori viribus nil addimus, cùm de his satis superque in materiâ medicâ.

Alia ineunda est medendi via dùm urget *paroxysmus*: danda scilicet est opera ut primò compescatur efferus spirituum animalium motus. Varia externa in hunc scopum præscribi solent, acetum putà acerrimum, ruta, castoreum, assa fœtida, aqua melissæ composita, spiritus salis ammoniaci, oleum succini, sal anglicanum, aliaque volatilia quæ naribus admota plurimùm conferunt. Simili modo adhibentur fumus chartarum, plumarum, veterum coriorum, &c. Insultum nonnunquam fugat crurum immersio in aquam tepidam: horum frictus eundem effectum edere valet. Quibus nil proficientibus ad efficaciora deveniendum; ad interna scilicet medicamina: probatiora sunt camphora, aqua florum aurantiorum, tinctura castorei, guttæ anglicanæ, spiritus volatilis salis ammoniaci, vel aqua dicta *de Luce*, quæ temperatior proximè ad illum accedit; salia volatilia, aliaque benè multa in affectu hysterico, hypochondriaci cognato, usurpari solent.

Hæc sunt remedia, quæ à celebrioribus Practicis in usum quotidianum vocantur; inter alia innumera quibus turgent libri; & de quorum selectu anxii hærent clinici, vel solertiores: sed hîc non est subticendum illa rarò profutura, ut plurimùm vitio verti; nec latet qui extrà vulgus sapiunt, quod hicce morbus, quem haud insulsè vocant flagellum Medicorum, in plerisque haud expugnari se patiatur; imò ab inconditâ remediorum farragine sæpiùs exasperari. Tradunt enim candidæ fidei scriptores, ac experientiâ triginta annorum nobis innotuit, innumeros hypochondriacos tandiù cum morte colluctasse, quandiù, consiliis medicis religiosè parentes, medicaminibus cujuscumque fortis indulserant; ac meliùs se habuisse, imò & nonnullos sanitati restitutos fuisse, ubi pertæsi longioris

HYPOTHOCHONDRIASIS.

curæ, omnibus vale dixerunt; vel simplicissimum extremis labris admove-
vere detrectarunt: quæ, pace secus sentientium, silentio premere nequi-
vimus. Quapropter nil forte efficacius reperitur adversus hunc morbum,
tædio potius quam dolore molestum, congruo regimine, potu aqueo largâ
manu exhibito, jucundis exercitationibus, tum animi, tum corporis.
Danda præsertim est opera ut ad meliorem spem erecti ægrotantes omnem
mœrorem excutiant: sollicitudines angue pejus fugiant: omnem uno verbo
curationem naturæ committant; vel Medicos, juxta MONTANI consilium,
& medicamina fugiant: sed nescio quo fato, nùm sit morbi symptoma?
omnem spem in umbrâ medicinæ reponunt; adeò ut non solum cuivis
obvio medico se credant; sed etiam Barbitonforibus, & Circulatoribus
confidunt; è quorum præceptis ne lato ungue discedunt: quod haud citrà
cordolium millies mihi notasse contigit.



H Y D R O P S.

PALAM se prodit *colluvies serosa* per totum corporis habitum diffusa.
In propatulum venit ascites: tactu percipitur tumor aqueus & cysticus
peritonæo, ovariis, &c. insidens, & ad certam molem evectus: sed ægrè
innotescit hydrops pectoris & pericardii; atque in obscuris latet aquæ
collectio in cerebro & medullâ spinali. De hydrope duntaxat generali, vel
leucophlegmatia hîc agendum nobis incumbit, quippè de aliis speciebus,
pro instituti ratione alibi differemus. Colluviei serosæ obnoxii censentur;
qui vitam umbratilem ducunt; & qui loca paludosa habitant: ad hanc
proclives existimantur helluones & potatores: familiaris est sequiori sexui;
nec parcat infantibus, uti dicemus suo loco. Hanc post se trahunt febris
ardens & maligna, variolæ & morbilli, alique morbi acuti: illam comi-
tem habent obstructions, cachexia, icterus, scorbutus, arthritis, febris
quartana, cæterique affectus chronici. Insuper pressio pede sequitur collu-
vies serosa, larga sanguinis profluvia, tum spontanea, tum arte parata:
hûc coincidit menstruatio ultra solitum periodi naturalis terminum pro-
ducta. Eundem effectum exerunt diuturniores alvi fluxus, aliæve evacua-
tiones immodicæ: imò & harum jam consuetarum intempestiva sufflami-
natio, idem infortunium minatur. Ortum demùm trahit hydrops à præ-
maturâ febrium intermittentium curatione; à repulsis efflorescentiis vel
eruptionibus cutaneis; ab arefactis ulceribus & fistulis; ab ischuriâ &
dysuriâ; ut nil addam de tumoribus, skirrhis, abscessibus, exulcera-
tione & putredine internis, quæ vulgatissimum hujusce morbi fomitem
præbent.

Anasarca vel *leucophlegmatia* à pravâ humorum indole orta, cachexiam,
uti solemne est in singulis fermè colluviei serosæ speciebus, excipit. Ineunte
morbo & serotinis horis malleolas circumambit œdema, quod manè

obliteratur. Respiratio haud liberè perficitur, præsertim inter ascenden-
dum. Nonnulli sub hisce primis temporibus de siti & tussiculâ conquerun-
tur. *Procedente morbo* tumor œdematosus totos pedes obvolvitur & sensim
ad crura diffunditur; dein ad coxas, cæterasque partes, quasi ex traduce
propagatur. Nec pro certo hydropis signo haberi debet *œdema crurum*;
hoc enim incurrunt longioribus equitationibus fracti; nec non diutius
quàm par est pedibus stantes. Familiaris est hæc intumescentia in ætate
provectâ: sæpius obtingit chloroticis & utero gerentibus; atque in hisce
casibus nil mali portendit. Nec tamen semper ab artuum inferiorum œde-
mate exordium capit anasarca: si enim ab ascite vel quâvis labe viscerum
scaturiginem mutuetur; abdomen externum, lumbos, pectoris ambitum,
faciem & brachia nonnunquam invadit œdema; priusquam crura & pedes
adoriatur. Scrotum in utroque casu in immensam molem sæpius assurgit;
similique modo afficitur penis, cuius præputium in hunc modum sæpius
tumet, ut liber mictus præpediatur. *Consistente morbo* urinæ minori copiâ
fluunt; sedimentum lateritium deponunt, præsertim ubi afficitur hepar;
vel quævis stagnatio in abdomine delitescit. Sudor tunc temporis vel planè
deficit, vel parciore proventu erumpit.

Facile evincitur leucophlegmatia à nimio sanguinis profluvio, aliâve
causâ fugaci, natales habens; sed contumacior censetur ubi à suppressâ
quâcumque solitâ evacuatione, vel regressis eruptionibus cutaneis ortum
ducit. Curatu facilis evadit, si asthmatis, febris acutæ vel intermittentis
sit soboles: sed periculosa res est alea, si ab affectu chronico & præser-
tim à labefactatis visceribus oriatur; etsi solitis præsidii obtemperare vide-
tur; quandoquidem seriùs ocyùs recurrere solet. Haud levis curationis
spes elucescit in juventute, vel ætate vegetâ: secùs evenit in senio.
Insuper exitium portendit hydrops; si lingua sit arida, tussis crebra; &
respiratio ita impedita ut urgeat suffocationis periculum; si pulsus sit debi-
lis & vires deficient; si demùm lotium & sudores à naturali normâ plus
æquo recedant. Nil metuendum de alvi fluxu circâ prima morbi tempora:
sed aliter se res habet, morbo jam senescente; præsertim si nullas inducias
concedat; cùm non impediat quominus serosa colluvies circâ abdominis,
pectorisve labefactata viscera effundatur. Postremò periculi, uti jam
innuimus, expers censetur crurum tumor œdematosus, casu obtingens:
haud ominosus audit in convalescentibus, cùm à resarcitis viribus spontè
evanescat. Nec quidpiam mali portendit facies subrumida in morbis acu-
tis, quæ sæpius inexpertis inanem metum incutit.

Præter varias diluvies internas quæ passim occurrunt ab scrutatione *hoc*
morbo denatorum; in aprium veniunt viscera colore nativo orbata,
obstructa, skirrhusa, arida, pus recondentia, putrida, &c. Detegun-
tur tumores cystici & vesiculares, multiformes, diversæque molis; variis
partibus accreti. Reperiuntur in *abdomine* tubercula skirrhusa, vasis
hepaticis & splenicis adnata; venæ atro & quasi adusto cruore turgidæ,
in quibus quandoque delitescunt concretiones tophaceæ. Annotatur hepar

HYDROPS.

HYDROPS.

nunc contractum, nunc mole amplissimum; decolor, albicans vel exanguis; nigrum, plumbeum, quasi torrefactum, variis maculis signatum; superficie inæquali, granulosa, tuberculis, hydatidibusque exasperata; skirrhosum, aridum, lapidis instar durum, putridum; abscessus, steatomata, hydatidesque acervatim aggestas recondens, &c. Vesicula fellea nonnunquam inanis observatur: in plerisque bile atro-viridi turget; vel repletur in nonnullis latice limpido, lacteo, saporisque experte; concretionibus biliosis, &c. Ante oculos versatur lien, nunc exilissimus, nunc mole portentosus; putredine ita confectus, ut instar pultis contrectatus diffuat; skirrhosus, tuberculisque nonnihil lapidescentibus refertus. Obvium fit epiploon nunc crassissimum & skirrhosum, tuberculosum, vel coluviem colligens; nunc emaciatum vel putredine absumptum. Conspiciuntur intestina phlegmonodea, skirrhosa, ulcerosa & siderata, invicemque coeuntia. Eadem infortunia subeunt mesenterium, renes, uterus & ovaria. Alia demum memorabilia exhibet imus venter; tumores nempe anomalos, purulentiam vel putredine tactos; vertebri carie excisis accretos; hydatides diversæ molis; sarcosæ ex hepate, pancreate, alterove viscere affurgentes, &c.

Reserato pectore, patent pulmões œdematosi vel insufflati, infarcti & inflammati; crustâ obducti, lapillis scatentes, tubercula vel abscessus recondentes, pleuræ agglutinati, tabo vel putredine pessumdati, &c. Cor nonnunquam exiguum; aliàs mole stupendum deprehenditur; in plerisque vacuum reperitur; in aliis cruore scatet; concretiones, ut inquiunt, polyposas continet. Valvulæ utriusque thalami arteriales cartilaginis, ossis, lapidisve duritiem, in quibusdam, assequuntur. Cor nonnunquam ulcere erosum conspicitur; sed rariùs notatur abscessus in cordis & auricularum ambitu: pericardium verò ingentem aquæ copiam, serumque fœtidum coercens, vel planè siccum, imò & cordi auriculisque agglutinatum observatur. Se demum vidisse, tam in leucophlegmatia, quam in pectoris & abdominis hydrope disruptum ductum thoracicum, nonnulli tradunt Auctores; quod nusquam notasse memini. De capite, quod nil ultra productum morbosum exhibet, parùm curarunt Anatomico-Practici: in hoc tamen, vel perfunctoriè lustrato sæpiùs reperiuntur purulentia & putredines, tam in ipso cerebro, quam in ejus involucris; tumentia plexûs choroidis vascula, varicosa & hydatidibus intermixta: cæterùm deteguntur stagnationes serosæ, saniosæ & fœtidæ in singulis cerebri recessibus; concretiones lapideæ; meningum coalitus, &c.

A venæ sectione auspicari licet *curationem*, si hæmorrhoides, aliave consueta sanguinis profluvia sufflammentur: nec inefficax censetur, ineunte morbo, sub ætate juvenili & vegetâ: aliàs haud citrà periculum celebrari posse crediderim. Inducias sanè fert phlebotomia, urgente spirandi difficultate; sed morbus, annuentibus primi subsellii clinicis, dein exasperatur, contumaciorque evadit. Subticendum tamen non est haud deesse nonnulla exempla curationum à repetitis venæ sectionibus, vel spontaneis

hæmorrhagiis peractarum; sed ab hoc inopportuno præsidio fatum in pluribus accelerari, satis superque etiam notum est. *Vomitorium* sub primis morbi incunabulis faustè usurpatur; nonnullam opem etiam præstare valet; illo jam adolescente, dummodò vires ferant: imò & liquet ex accuratè observatis, multos repetitis emeticis, vel spontaneis vomitionibus sanitati restitutos fuisse. Aliàs summam noxam inferre potest; constat enim variis historiis nonnullos hydropicos animam inter vomendum exhalasse. Inter hæc angustias ab omnibus ritè perspectis & trutinatis, curandi judicium dirigitur. Pluris habentur in foro medico *cathartica* & præcipuè *hydragoga* per totum morbi curriculum exhibita; quibus nidulantes latices è parietibus intestinorum elici queunt: inter usitatiora recensentur rheum, jalapium, radix ireos & cortex sambuci; succus foliorum ejusdem arboris cum lacte; gummi gutta, elaterium, diacrydium, sal polychrestum, aquila alba, syrupus de rhamno cathartico; aqua vitæ germanica, &c. nec dubitare licet quin plures horumce medicaminum præsidio ex orci faucibus erepti fuerint: rarò tamen proficiunt, si morbus jam altas egerit radices, & adsint stagnationes in pectore vel abdomine. Sub hisce dubiis, multiplici experientiâ de hac re instructi asserere minime dubitamus periculosa fore hæc remedia, ubi inter horum usum nullæ impetrantur induciæ: tùm his supersedere consultiùs visum fuit, ne hoc intempestivo stimulo intestina phlogosi vel gangrænâ corripiantur; quod pluriès evenisse sexcentis constat historiis.

Suas laudes merentur *hepatica* vel *aperientia*, quæ sanguinis dyscrasiam emendare, vasa obstructa referare, & renes emungere queunt. Sed si morbus certum gradum assequatur; inertia ut plurimum deprehenduntur hæc medicamina; quorum probatiora sunt lingua cervina & herbæ capillares, plantæ cichoraceæ, fumaria, agrimonia & pimpinella; radices apii & asparagi sylvestrium, fœniculi, rubiæ tinctorum, eryngii, brusci, anonidis, &c. *Diuretica* verò, nemine fermè discrepante, cæteris palmam præripiunt: in hunc censum veniunt radices raphani, bryoniæ & scillæ, fructus alkekengi, nitrum, salia lixivialia, vel ipsummet lixivium è cineribus genistæ, absinthii, juniperi & sarmentorum paratum; arcānum duplicatum, terra foliata tartari; vinum vel oxymel scilliticum, aselli, terebinthina, &c. Nonnullis optimè cessit pulvis bufonum ad scrupulum unum & ultrà in vino albo exhibitus. Nec reformidandus, sub casu urgentiori, pulvis ipsarummet cantharidum à grani quartâ parte ad grānum unum vel alterum; quo, si nil obstat, copiosa urina prolicitur: constat enim plures ab orco revocasse hoc remedium, à circumforaneo quodam venditatum; idèò neminem esse reor qui imminente interitu, omnibusque frustra tentatis, illud experiri recuset. Plures, penes quos sit fides, narrant se observasse feliciores successus ab usu sudorificorum. Postremò traditur spontaneum ptyalismum nonnullis proficuum fuisse; sed nùm hæc evacuatio arte promota eandem præstitisset opem? dubitare licet.

E præhabitis colligere juvat cum grano salis admittendas esse hæc di-

HYDROPS.

versas *curandi methodos*. Variis quidem periclitationibus de hâc re edocti, candidè declaramus nullos vidisse ægros hydropicos sudorificorum internorum ope curatos; paucos verò catharticoꝝ præsidio; sed benè multos opportuno diureticoꝝ usu: postremorum vires æquant & fortè superant *roborantia*, amara nempe, stomachica, & martialia; quorum selectiora audiunt folia absinthii & centaurii minoris; radices helenii & angelicæ; cassia lignea, bacca juniperi, catechu, alkool martiale, aliaque chalybeata, elixirium proprietatis, &c. A quibusdam summè deprædicatur allium, nec fortè immeritò, cum tonicorum vires æmuletur. Prætereà minime posthabendæ aquæ minerales, tum frigida, tum thermæ; inter quas eminent Plumberianæ & Borbonienses anselmenses: quæ tamen, etsi aliorum plurium affectuum chronicorum curam absolunt, huic morbo jam consenscente inutilem operam sæpiùs ludunt. Licet hypnotica morbi causam minime aggrediantur, nonnunquam tamen in usum vocantur ad coercendum aliorum remediorum impetum; vel ad promovendum sudorem, si natura illuc vergere videatur; nec desunt exempla variorum hydropicorum, qui inter horum usum incolumes evaserunt. De antiscorbuticis nil addimus cum hydropem duntaxat scorbuti sobolem respiciant.

Omniis remediis, de quibus hætenùs, aliisque id genus sexcentis, si omnia persequi luberet, incassum tentatis, pluribus optimè cessit *cujusvis potûs abstinentia*; & illud regimen ad plures menses, vel ad annum, protractum fuit; sub quo si urgeat sitis, illam fallere solent cum pane tosto aquâ vitæ irrorato, & linguæ admoto, vel quâvis aliâ arte; dummodò nil liquidi deglutitur. Hanc victûs rationem non solum conferre in anasarca; sed etiam in ascite, aliisque hydropis speciebus variæ testantur historiæ. Parùm profuisse sudores à medicaminibus internis excitatos, jam suprà notavimus: sed aliter se res habet, ubi à rebus externis promoventur; ab aëre scilicet tepido sudatorioꝝ; à balneo aquarum thermalium; ab admotis sale, arenâ, furfure, &c. solis radiis vel furno excalescentis; à frictu cum pannis molliusculis, benzoini, thuris, mastiches, succini, &c. fumo imprægnatis: ab arduis demùm corporis exercitationibus, quibus stagnantes latices subigi, & per cutis spiracula foras amandari queunt: sed hæc omnia prorsus inutilia fore, si labefactentur viscera, rationi & experientiæ confectarium videtur.

Silentio prætermittere minime debemus crurum, ultràmodum tumens, cutem sæpiùs dilacerari, & per hæc fissuras fieri quoddam aquæ, intrà partium contextum stagnantis, stillicidium, quo non solum sublevantur nonnulli ægri; sed pristinae sanitati planè restituuntur. Eundem effectum edere valent vulnera ab ambustione, vel quovis alio modo inflicta; quod semel vidisse memini in mulierculâ, quæ omnibus frustra adhibitis ad ineluctabile fatum properabat; dum lectum excalescentis incuriâ ustis cruribus emerferunt vulnera, quorum beneficio serum per totum corporis ambitum

ambitum diffusum exitum sibi paravit ; quo scilicet profluvio brevi præter omnium expectationem ad vivorum numerum fuit revocata. Hisce observationibus instructi Medici consimilem fluxum moliri tentarunt , tam simplicissimis *scarificationibus* , quàm *vesicatoriis* , vel ipsomet cauterio : sed nescio quo fato secus evenit ; pars enim vulnerata gangrænâ sæpius correpta fuit ; hinc fit ut hæc curandi via omnibus ferè fuerit invisa ; quam tamen haud omninò abjiciendam censemus ; ubi morbus ad cætera præsidia furdus domari recusat ; & agrotantes in extremum vitæ periculum adducuntur ; cùm in hisce angustiis meliùs sit (inquit CELSUS) anceps experiri remedium quàm nullum. Prætereà hæc vulnera minùs pertimesceri debent , si cuti laxiori & flexiliori , nempè coxarum vel scroti infligantur ; & imminens gangrænæ periculum notissimis præsidiis avertatur.

Parergi loco , præhabitis addere licet quod omnia cujuscvis sortis remedia , hætenùs tradita , & ad hydropis curationem prosperè usurpata , hujus morbi *reditum* etiam præcavere queunt. Neminem enim practicum latet plures convalescentes , morbo uti videbatur sublato , recidivam ut plurimum exitialem , seriùs ocyùs passos fuisse. Hinc solertiores clinici , & ægrorum saluti consulentes , omnem curam impendere solent , ut cautâ medicaminum suprà traditorum administratione , hoc infortunium declinetur. Cathartica identidem usurpata , aperientia , diuretica , &c. in hunc scopum præscribuntur : sed multiplici experienciâ edoctus , nil sub hæc rerum conditione præsentius novi quàm tonica vel roborantia , quæ solidorum contextum firmando novam aquæ stagnationem tutiùs præpedire valent. Hæc de colluvie ferosâ dicta sufficiant ; circa quam selectiora veterum & recentiorum monumenta inexhausto labore collegit , & contraxit clar. MONRO.

STAGNATIO SANGUINIS ET PURIS.

UTERQUE morbus , ut plurimum immedicabilis , rarò in aprium venit ; nisi à sectione cadaverum : imò de illo quidpiam tradere inane & supervacaneum foret ; ni quandoque innotesceret , & opportunis auxiliis obsecundaret. Neminem fugit sanguinem illicò extrà vasa emissum in cerebri recessus , brevi necem inferre ; nec ab aliâ causâ è medio tolli apoplexiâ sanguineâ perculsos ; uti abundè patet ab exaratâ historiâ anatomico-practicâ : nec minùs ominosum esse sanguinem in cavum pectoris vel pericardii pleno gurgite irruentem , tùm à disruptione vasorum conspicuorum , tùm à dilaceratione aneurismatis : sed nonnulla spes affulget ab stasi sanguinis in abdomine , quæ imi ventris tumore ante oculos versatur ; vel fluctuans digitis contrectatur. Prædictæ *stagnationum species* minùs *exitiales* censentur , si à vasorum transfudatione , vel exquisitissimorum capillarium erosione pendeant ; cùm sub hisce circumstantiis morbus

STAGNA-
TIO
SANGUINIS
ET PURIS.

tardigradus diutius protrahatur ; & hinc opportuna adhiberi queunt præsidia ; dummodò abdita colluviei quædam emergat suspicio ; & morbi sedes haud omnem curationis spem amoveat. Insuper reperitur *cruor stagnans* in osseis capitis sinubus , in aure internâ , in ventriculo & tubo intestinali ; in vesicâ & utero ; in tumoribus cysticis & præsertim in hydrocele. Nonnunquam diffunditur intrâ contextum corporis cellularis : hunc majori copiâ , vel ad libras circiter tres , intra laminas muscutorum abdominalium detegisse memini in cadavere cujusdam ab alio morbo extincti ; qui dum viveret vix de dolore obscuro in parte affectâ conquerebatur. Nulla est demum corporis viventis pars post vulnera , contusiones , ictus vel casum ab alto , in quâ cruor haud seriùs ocyùs effundi queat.

Omnibus praxi edoctis innotescere queunt *stagnationes purulentæ* , vel *saniosæ* , præ morâ lutulentæ vel fœtidæ ; ortum ducentes à disrupto abscessu in capitis , pectoris , abdominisve cavo ; vel in peculiaribus viscerum , aliarumque partium latebris ; cum horum suspicionem moveant prævia phlogoseos & suppurationis indicia. Sed in obscuris latent quædam tabi stases , quæ aliam originem mutuuntur , nimirum à peculiari viscerum exudatione , doloris experte , nullâ prægressâ phlogosi conspicuâ ; nullo præexistente abscessu ; vel absque quâvis exulceratione quam sæpiùs inter rimanda cadavera me observasse contigit in ambitu cerebri , pulmonum , cordis , intestinorum , &c. Certis terminis consistens hæc colluvies purulenta rarò distinguitur ab aliis stagnationum speciebus ; & solâ cadaverum sectione è tenebris ut plurimum eruitur.

Serum in quâvis corporis parte nidulans vasorum porulis sæpiùs resorberi apud omnes practicos inconcussum manet : sed hunc felicem exitum hariolari minime licet sub sanguinis vel puris stagnatione ; adeò ut nulla alia occurrat *curationis via* , præter morantis liquidi evacuationem , cui promovendæ impares sunt naturæ vires ; & ideò solâ arte impetrari potest. Hæc tamen spontaneo œconomix animalis molimine sæpiùs absolvitur in partibus perviis ; auribus putà , sinubus frontalibus , pulmonibus , stomacho & intestinis , vesicâ & utero , &c. Sed ubi nidulant prædicti latices in capitis pyxide osseâ , in pectoris & abdominis cavo , aliisque partibus imperviis , ad *præsidia* merè *chirurgica* , si nil obstat , confugiendum. De hisce variis stagnationum speciebus , & de curandi methodo suo loco acturi , nil hisce generalibus adjicere ; ne crambem repetitam apponamus , consultiùs nobis visum fuit.



INFARCTUS ET SKIRRHUS.

INFARCTUS

ET

SKIRRHUS.

VISCERUM *obstructio*, etsi vulgatissima, in obscuris plerumque latet, ni ad certum gradum provecta in propatulum veniat. Nec dilucidius patet hujusce morbi indoles; ni in subsidium vocetur exarata *cadaverum historia*; è quâ, non secus ac è nostris propriis observationibus, tradenda depromere haud incongruum fore putavimus. Ex his itaque benè perspectis, didicimus *infarctus* passim occurrentes, tam in pectore, quam in abdomine, diversam naturam redolere: alii enim merè *sanguinei* videntur; alii verò *lymphatici* audiunt: primi scilicet, missâ omni hypothesi, ab impeditis vasis sanguineis sobolescere, jure conjicitur; alii verò ab obstructis utriusque sortis tubulis lymphaticis ortum mutuari, vulgò existimatur. *Infarctus sanguinei*, ad quos proclives sunt juvenes & plethorici, à suppressis quibuslibet profluvii sanguineis originem sæpiùs ducentes, pulmonibus & hepatis plerumque insident, subitò aggrediuntur, ac dolore & calore stipantur: nunc vigente *apyrexia* adoriuntur; nunc febrem comitem habent; atque nonnunquam facessunt in genuinam phlogosim; cujus fortè primum gradum exhibent. *Infarctus lymphatici*, à lymphâ, aliove latice orti, familiares sunt melancholicis, phlegmaticis, cachecticis, scrophulosis & scorbuticis: crebrò invadunt febre quartanâ, aliove morbo chronico detentos: imò & nonnunquam infarctui sanguineo, vel ipsimet phlogosi, natales debent. Infarctus, qui *obstructionum* titulo insigniuntur, sub primis temporibus doloris expertes, vel dolore obscuro stipati, lento gressu procedunt; & leve plerumque incommodum pariunt: sed si ulteriùs progrediantur & certum incrementum capestant, in skirrhum abeunt; cujus prodromi jure censentur: viscera & glandulas ad hancce infarctûs speciem proniora esse, nemo non novit. Hæc sunt generalia infarctuum discrimina quæ non solum ex autopsiâ cadaverum, sed etiam à variis effectibus quos exerere solent, sat dilucidè se produnt. Cæterùm nonnulli occurrunt impliciti, utriusque naturæ participes, qui ratione ægri temperiei, & præposteræ medicationis, nunc phlogoseos, cui sunt finitimi, characterem induunt; nunc in merum skirrhum facessunt, è nostris observationibus tum anatomicis, tum clinicis colligimus.

Sanguis intra vasa redundans, vel plus æquo excandescens, labor corporis improbus, ciborum calidiorum esus, diurnæ comestationes, vinum liberaliùs sumptum, &c. sunt totidem *causæ evidentes* infarctûs sanguinei. Ex alio fonte prodeunt lymphatici, à congenitâ scilicet humorum dyscrasiâ, vel à parentibus transmissâ; à vitâ desidè; gravibus curis, attentivæ cogitationibus, & ab incongruâ vivendi normâ: quibus addere licet chocolati usum diuturniorem, vel immodicum, quo plerumque hepar læditur. Hos demùm accersere queunt consuetorum tum naturalium, tum morbo-

INFARCTUS
ET
SKIRRHUS.

forum fluxuum sufflaminatio, eruptionum cutanearum retrogressus, &c. De infarctibus duntaxat internis in præsentiariarum acturi, quidquid attinet ad phlogoses, vel skirrhos oris, glandularum salivarium, cervicis, mammarum, inguinum, axillarum, aliarumque partium externarum, consultò prætermittimus; cùm de his singulis, juxtà instituti rationem, alibi differemus.

Obscura est *diagnosis* infarctuum sanguineorum, quorum signa parùm discrepant ab inflammationum indiciis; præsertim si mitior phlogosis nulla gravia post se trahat symptomata: sed diversus horumce affectuum incessus: infarctus enim sanguineus intrà biduum, citiùsve resolvi potest; quod nusquam evenit in genuinâ phlogosi. Hæc prætereà ante septimum diem resolutione vel suppuratione judicari solet; ille etsi plerumque brevior, haud rarò tamen contumacior evadit. Atrâ caligine sæpius immerguntur obstructions recentes; nec dilucidius quandoque patent vetustiores: licet enim viscera obstructa ampliora & duriora in plerisque evadant; haud semper tamen explorantibus digitis se præbent; præsertim in corpulentis & obesis: delitescit etiam, vel obscure per sentitur, illud vitium, si altè immergatur viscus affectum, & à naturali mole parùm recedat. Quidquid demùm inter hæc indaganda, à medicorum plebe in medium adducitur, mendacium sæpius sapit. Tactû tamen faciliè percipiuntur in macilentis hepar & lien; sed obscurius deteguntur pancreas, mesenterium, &c. Insuper haud semper, adauctâ mole, prominent viscera obstructa vel skirrhosa; quin potiùs nonnunquam contrahuntur & marcescunt; quod sæpius evenire ergà ipsummet hepar neminem anatomicum fugit. Hinc colligitur parùm sæpius conducere solitam tactûs ope explorationem; cur sit ut ad alia signa è variis læsionibus, infrà enarrandis, deprompta confugere necesse sit. Nec magis constat de genuinâ *morbi sede*, etiamsi tactu se prodatur, ob varias partes, plus minusve immerfas, quæ prementi digito respondere queunt. Subest prætereà dubitare, utrum corpus renitens sit organum affectum? an tumor quidam huic accretus, vel in corpore cellulari progerminatus? quæ omnia meris duntaxat conjecturis sæpius assequi licet.

E præhabitis colligere datur in ancipiti sæpius versari *indicia*, quæ ab explorantibus digitis desumuntur; hinc sedulò inquirendæ sunt aliæ notæ, quibus se produnt obstructions & skirrhî; ut ex illorum syndrome quid certi statui queat. Itaque, præter molestam & obscuram sensationem, quæ tactu exacerbatur, & à corpore gravi vel premente in plerisque excitari videtur; prominet imus venter; pallida tumet facies: pedes obliteratis malleolis œdemate obvolvuntur: respiratio nonnunquam offenditur; tussisque movetur, non solum ab obstructis pulmonibus; sed etiam ab affectis hepate & liene. Quibus addere licet anxietates, cordis palpitationes; cibi fastidium, oris siccitatem, pravæ digestionis, flatulentiam ructibus & inflatione stomachi sat conspicuam; alvum ut plurimum solutam; ac demùm urinas albicantes. Intereà *procedente morbo*, vires

prosteruntur, somnus deficit, exsurgit febricula, quæ à pastu exacerbatur. Hæc sunt indicia generalia, quibus ut plurimum se prodit infarctus tum pectoris, tum abdominis: sed alia peculiariora occurrunt quæ morbi sedem patefaciunt; deglutitio nempe impedita tumoris skirrhusi, pharyngi vel œsophago intidentis, suspicionem movet: urgens suffocatio pulmonis infarctum prodit: icterus lationem hepatis in propatulo sistit: scorbuti signa cum hypochondrii sinistri renitentiâ, lienem respiciunt: ex alvi fluxu & atrophîâ incusatur mesenterium, præsertim in infantibus: vomitus diuturnus & indomabilis, ut plurimum, sobolescit à læsis ventriculo, pyloro vel pancreate: sævientibus ileo & dysenteriâ tubum intestinale labefactari proclive est cogitare, &c. Circà morbi indolem disquirendum incumbit; nùm quoddam virus in sanguine lateat, venereum nempe, scorbuticum, scrophulosum, cancrum, &c. quanti enim sit momenti hæc vulgatiores chronicorum causas evolvere, quantum licet, nemini haud obvium.

INFARCTUS
ET
SKIRRHUS.

Licet infarctus sanguinei curatu sint faciles; imò & sæpiùs spontè desinant; haud semper tamen *periculo* vacant; si perfunctoriè, vel præposterâ medicatione impugnentur: ex illis enim, ut suprà inculcavimus, non modò prodeunt conterminæ phlogoses; sed etiam obstructions & skirrhi; quod sanè quidem arguit affines esse singulos hosce morbos; etsi progressu temporis multum ab invicem discrepare videntur. Neminem latet senescentes obstructions & præsertim skirrhus, in plerisque indomabilia esse; vel præter expectationem averruncata sæpiùs recurrere: sed facile debellantur obstructions recentes; dummodò sat citò curantibus innotescant; quod rarò evenire candidè fatemur. Haud mirum, si aliter se res habeat, ubi jam altas egerint radices; vel tantam duritiem contraxerint, ut remediis vel exquisitioribus planè sint imperviæ: haud fugit enim, qui numerosis sectionibus interfuerunt, viscera intùs & extùs tuberculosa, cartilaginea, tephacea, imò & friabilia sæpiùs deprehendi; quæ sanè, sic labefactata, omnibus præsidiiis obsurdescere evidens est.

Obstructions & skirrhi ad certam molem provecta, viciniora premendo, inflammationi, purulentia, putredini & lidenationi ansam præbent; quibus accedentibus omnia in pejus ruere confectarium manet. Notare tamen expedit plures quorum obstructa & skirrhusa sunt viscera, cæteris benè se habentibus, congruâ victûs ratione longiorem vitam protrahere. Ubique enim occurrunt agrotantes utriusque sexûs obstructionibus conflictati, qui per quindecim vel viginti annos & ultra vitali aurâ fruuntur. Haud tamen institui debet *prognosis*, nisi benè perspectâ morbi sede: scitur enim levem metum incutere infarctum lienis; longè periculosius esse hepar hac labe affectum; summè perimescendam censerî obstructionem mesenterii, plerumque virûs scrophulosi sobolem. Infarctus skirrhusi, quibus partis moles accrevit faciliùs eradicantur, illis qui contrarium effectum, emaciationem nempe exeruerunt. Quædam curationis spes elucescit, dum dolent; immedicabiles verò censentur, si nullius sensationis sint participes. Nihilominus

INFARCTUS
ET
SKIRRHUS.

skirrhi qui utero, aliisque visceribus perviis, exquisitiori sensu donatis, insident; brevi cancri, uti fertur, naturam induere solent. Infarctus demùm skirrhusi; quamcumque partem impetant, atrophiam & hydropem sæpiùs post se trahunt. De *autopsiâ cadaverum*, è quâ jam tradita depromuntur, nil addimus.

Infarctuum sanguineorum *medela* inchoari solet venæ sectione, quam etiam iterare licet, si nil obstet, & vires ferant: sed diluentia, demulcentia & temperantia præcipuam opem conferunt: nec omittenda sunt laxantia. Plerique tamen ægotantes solo victu tenui, vel largo aquæ potu, interpositâ quiete, hunc affectum superare queunt: nec fortè tutior & magis naturalis proponitur medendi methodus. Aliter verò se res habet ergà obstructions & skirrhos, quibus domandis impares forent naturæ vires; ni opportunis remediis, habitâ semper ratione partis affectæ, obscundarentur. Licet hæc infarctuum chronicorum genera pro morbi prægressi vel subsistentis producto sæpiùs haberi debeant; nil tamen urgentius esse debet clinico, quàm illud evincere; & præcipuum curandi scopum in hunc finem dirigere. Itaque mittendus est sanguis, si catamenia, hæmorrhoides, aliave consueta sanguinis profluvia, sufflaminentur: nonnunquam etiam sub aliis circumstantiis conducit venæ sectio, ineunte morbo: sed inutilis vel noxia censetur ubi inveterascit obstructio, vel in merum skirrhum facessit. Ne minimum quidem levamen afferunt cathartica; imò & morbum exasperare solent: urgentiori tamen succurrere licet; si sordes in primis viis nidulentur; sed mitiora tunc temporis in usum vocari debent.

Diluentia, temperantia, *hepatica* & *aperientia* proficuè per totum morbi curriculum usurpantur; inter quæ selectiora audiunt serum lactis; radices lapathi, helenii, asparagi, apii, brusci, eryngii & chelidonii, herbæ cichoraceæ, lingua cervina, capilli veneris & nasturtium; quibus addi debent rheum & aloë; borax, sal ammoniacum, sal vegetabile, tartarum vitriolatum vel chalybeatum, sal de duobus, aselli, &c. quorum ope dilui & subigi crassiores succos; ut fluidiores facti solitum alveum petant; & sic referari obstructa organa, credere par est: nùm actionem suam exerant in ipsummet viscerum contextum vasculosum? dubitare licet. Hæc per transennam dicta sufficiant circà horum agendi modum, qui ut verum fateamur, atrâ caligine obruitur; quidquid obganniant scioli, qui hisce quisquiliis scholasticis plus æquo indulgent. *Incidentia*, ut in orbitam revertamus, quæ cuncta permeare videntur, haud immeritò ab exercitatissimis deprædicantur: probatiora sunt nonnulla gummata, saponæ, antihecticum Poterii; ac demùm panacea, vel aquila alba: hæc sunt quæ in vulgatissimum usum cedunt & intimiora corporis penetralia adeundo, præclara munia obire valent; dummodò summâ cum cautelâ usurpentur; viscerisque læsi recta habeatur ratio: diversa enim congruunt pulmonibus, hepati, utero, &c.

Insuper mos invaluit, nec inconsulto, ergà incidentium usum, ut ipsis intermiscerentur *diluentia*, demulcentia & temperantia; sub hoc scilicet

scopo, ut impedian quominus viscera illæsa laceffantur. Imò & identidem concedendæ sunt induciæ, ne sanguis jam præfervidus, accelerato impetu haud plus æquo incalescat: sed aquæ minerales, cuncta etiam permeando, utrorumque munia egregiè obire valent; cùm primatum ducant inter diluentia, temperantia, hepatica, aperientia, & ipsamet incidentia. Decantantur, inter frigidas, Vallenfes, Passienfes, Forgienfes, Cranenfes & Sedlicenfes: cæteris thermalibus antecellunt Plumberianæ, Vicienfes, Vervonenfes, Baregienfes & Montis aurei: horum præsidio id genus morbos, aliis cujufvis fortis, vel exquisitoribus medicaminibus obsurdefcentes, sæpius eradicari, apud omnes in confesso manet. Pluris habentur declinante morbo tonica & martialia; quæ aliàs imparia superando morbofo obici, inanem operam ludunt, vel noxia evadunt: quod altâ mente tenere debent, qui vulgi præjudiciis obcæcati ferrum pro polychresto remedio habent. Solertioribus demùm invisa sunt sedantia, & præsertim narcotica. quæ dolores compescendo, somnumque conciliando; in facie salutem, in tergo verò funus gerunt.

Ex illâ *ingenti remediorum supellectili* minime inferendum numerosa fore adhibenda; quin potiùs pro re natâ, & agri temperie selectu opus sit. Nec diutiùs etiam exquisitoribus inhærendum; cùm horum vires longiori usu infringantur. Proindè nova sæpius sunt excogitanda; & assuetis superfedendum; plura enim remedia quæ jampridem emolumento fuerunt, inefficacia in dies, imò & nociva deprehenduntur; cur ad aliam methodum se conferre expedit; quæ è superiùs adductis depromi potest. Quæcumque igitur adhibeantur præsidia; horum sæpius mutuò se oppugnantium incondita vitanda est farrago. Congruæ insuper victûs rationi inhærendum; è cujus sanè quidem errore, molestissima sæpius emergere symptomata, neminem practicum fugit. Addere licet, priusquam manum è tabula amoveamus, in hoc versari præcipuum curandi ritum, ut accuratè prospiciatur sæpius delitescenti cuicumque deleterio; venereo nempè, scorbutico, scrophuloso, alteriusvè indolis; intermiscendo scilicet remediis suprà exaratis, horumcæ ægritudinum specifica; è quorum connubio morbus, ni sit planè immedicabilis, non solum domatur; sed etiam radicitus evellitur. Postremò minime posthaberi debent balnea & femicupia; non secùs ac foci emollientes, quorum ope nonnullæ impetrantur suppetiæ: sed topica resolventia vel exquisitiora planè inertia à pluribus haud infimi subsellii existimantur; ac quidquid de eorum præclaris viribus in medium adducitur pro meris commentis; vel anilibus fabellis habetur; quod tamen cum grano salis accipiendum esse censemus. Cùm nonnunquam variorum topicorum simplicium & compositorum, inter mulierculas celebratissimorum, haud in prosperum effectum nobis, vel reluctantibus, observasse contigit: hinc nil impedit quominus explorentur vires quorundam remediorum, è quibus nil mali pertimescendum.

INFARCIUS
ET
SKIRRHUS.

TUMORES
INTERNI.

TUMORES INTERNI.

FORIS nonnunquam prominentes *tumores interni*, visu & tactu percipiuntur: aliàs in intimis corporis recessibus reconditi haud nisi *cadaverum extispiciis* in propatulum veniunt: situm sæpiissimè habent in abdomine: quandoque intra pectus latitant; sed rariùs in capitis pyxide osseâ, vel medullæ spinalis thecâ occluduntur. Diversam naturam obtinent; sunt enim skirrhosti, vel sarcomatosi; cystici vel anomali: ac demùm aneurismata; ut de inflammatione & abscessu, de quibus infrà, sileamus. *Tumores skirrhosti*, ritè distinguendi à visceribus hâc labe tactis, diversi coloris & variæ duritiei, sunt quædam sarcofes visceribus, membranis, vasis, &c. accretæ, vel corpori celluloso adnatæ; nullo dolore stipatæ; nisi ratione partium quibus incumbunt, aut quas comprimunt. Explorantes digitos minime fugiunt prædicti tumores in abdomine; ni tamen altiùs immergantur: sed ægrè sæpiùs distinguuntur ab infarctis visceribus. Haud desunt tamen nonnulla *indicia*, è nostris propriis observationibus, tùm clinicis, tùm anatomicis deprompta, quæ utrumque affectum prodere queunt; & sic se habent. Infarctus viscerum, qui non secùs ac tumor solitarius, tactu percipitur; nusquam huncce gradum assequitur, nisi prægressis diuturnioribus ægritudinibus; pro quorum producto jure habetur; celerius verò incrementum sumunt, & adolescunt tumores; & præter omnium expectationem, haud adversâ, uti videbatur, valetudine, sæpiùs palàm profluunt. Insuper obstructio viscerum comitem utplurimum habet faciem pallidam & subtumidam; vel cachecticos invadit: tumores verò skirrhosti hos plerumque adoriuntur, qui faciem floridam præ se ferunt, & vegetiori sanitate frui videbantur: quod paucis ab hinc annis vidisse memini in quodam Helvetio staturæ proceræ & formæ, ut nil suprâ, viginti annos nato; cujus tumor atrocissimis doloribus, ob mesenterii cui accreverat distractionem, stipatus, in tantam molem intrâ breve tempus surrexit; ut ipsismet oculis perciperetur; quem sectione cadaveris purulentia & putredine tactum deprehendimus.

Haud dilucidius innotescunt *tumores cystici*, lentiùs incrementum accipientes, variis partibus annexi; & ab externis vulgatissimis vix discrepantes; nunc doloris expertes, nunc acerbissimis cruciatibus, paroxysmorum instar nonnunquam recurrentibus, sævientes; ob phlogosim quam concipiunt; & vicinioribus partibus impertiuntur; quæ scilicet progressu temporis canceri naturam induere solet. Per viginti annos & ultrâ sæpiùs gestari obstructiones viscerum skirrhostas, jam suprâ inculcavimus: sed aliter se res habet, de tumoribus solitariis, tùm skirrhostis, tùm anomalis; quorum incrementum celerius perficitur; cur sit ut inflammationem, purulentiam, putredinem, gangrænam, stagnationes, &c. post se trahant. Utriusque fortis

tumores

tumores interni à peculiari, & delitescente viru ut plurimum prodeunt; sed nonnunquam à prægresso morbo notissimo sobolescent. Quæcumque postremò sit alterutrorum prosapia; pro *calamitosis & immedicabilibus* habentur.

TUMORES
INTERNI.

Hinc obvium fit *futilia & supervacanea* fore omnia *aperientia & incidentia*, vel selectiora, quæ experientiâ teste, nè minimum quidem auxilium præstant. Haud efficaciora sunt ipsamet latentis virûs specifica; quæ non solum ad partem affectam minime appellant, sed etiam huicce labi evincendæ planè imparia existimantur. Hinc, ubi constat de morbi genere, ad *curam* merè *palliativam* se conferunt peritiores Medici, rectâ tum diætæ, tum remediorum generalium administratione. Nec major ferè spes affulget ab arte Chirurgicâ; cujus solo præsidio averruncari posset hic luctuosus affectus; si candidè sui obliviscerentur, ii quibus hoc grave incumbit onus: per transfennam enim notare expedit sæpiùs in morbis exitialibus faustè successisse novas & inauditas, vel *temeras periclitationes*; ubi nullus alius patet curationis aditus: quandoquidem temeritas nonnunquam efficit, inquit CELSUS, quod prudentia nequiverit. In hisce angustiiis, nonnullas inducias impetrare queunt cauteria vicinioribus partibus inusta, quorum ope nonnihil materiæ morbosæ demitur; quâ sanè sublatâ tumor tardiùs incrementum sumit; ni faventibus œconomiae animalis viribus planè exhauriatur; quod tamen nusquam me vidisse, vel legisse memini.

Haud faciliùs expugnari se patiuntur *aneurismata*, ut plurimum, conspicua, quæ, uti neminem latet, curam tantummodò palliativam admittunt. Satis superque notum est ab arteriarum dilatatione oriri has tumorum species, quasi tunicatas; quæ scilicet variis sicci & compacti sanguinis tunicis sibi invicem incumbentibus, vel cepæ instar lamellatim dispositis turgent; remanente in medio, vel axi tumoris, canale utrimque pervio, sanguinem, post obitum, nigricantem & grumosum recondente: quo antehac liberum circuitum edebat prædictus latex. Mirari profectò subit arteriarum hoc morbo correptarum involucra, etsi ultramodum expansa, majorem firmitatem, crassitiemque adipisci; imò & nonnunquam cartilaginum; ipsorumque ossium duritiem, contrahere. In stupendam quandoque molem attolluntur aneurismata: occurrunt enim quæ mediam ferè pectoris partem replent, vel qui à supernâ sterni parte ad maxillam protenduntur. Aneurismatis acceptissima est divisio in verum & spurium; externa duntaxat, de quibus suo loco, respicit. Aneurismata interna, de quibus in præsentiarum, originem vulgò trahunt à quodam violento conatu, inter massam ponderosiores movendam; vel inter clamandum, tussendum, egerendum, parturiendum, &c. Saltus & concussio ferocientis equi; tubæ inflatio, casus ab alto, aliæve contusiones hunc dirum affectum etiam accersere valent. De *cordis aneurismate* mentionem perperam subjecerunt nonnulli Authores, quibus hoc titulo insignire lubuit vulgatissimam thalamorum dilatationem, quæ toto cælo distat à genuino aneurismate; cum planè deficient crustacæ sanguinis concreti lamellæ, aliæ aliis incumbentes,

TUMORES
INTERNI.

quæ hujusce tumoris speciei indolem produnt. Præterea symptomatibus planè dissimilibus stipatur hæc cordis dilatatio ; quæ etiam alio modo procedit ; aliumque habet exitum. Arteriæ duntaxat hujusce visceris coronariæ , hoc morbo , sed rarissimè , tentantur ; quo sanè quidem immune prædictum circulationis organum , multiplici autopsiâ anatomicâ edocti , asserere minime dubitamus.

Sedem ut plurimum habent aneurismata in pectore , è quo ad superiora in nonnullis propagantur ; atque intumescentiâ foris conspicuâ sæpissimè produnt , tum in cervice , tum in anticâ pectoris parte , imò & posticâ : eo quod viciniora ossa & cartilagine fracta & comminuta , vel carie confecta ipsis egressum quasi largiantur. Hinc in plerisque prominet tumor diversæ molis , & cuti concolor , mollis & tactui cedens cum sensu doloris urentis ; atque pulsationem , cordis ictibus synchronam , comitem habens ; & cujus ambitus circumscribitur. Hisce *notis* se produnt aneurismata carotidibus , subclaviis , intercostalibus & aortæ superiori insidentia. Sed aneurismata in aortam inferiorem & iliacas incumbentia ut plurimum occultantur ; quibus postremis , vertebræ etiam carie læduntur. Qui hoc morbo in pectore , vel circa pulmonum vicinia sito conflictantur , de indefinente spirandi difficultate , vel gravi pectoris repletionem , conqueruntur ; decubitus pavent ob suffocationis metum ; plures ægrè deglutiunt ; ac demum nonnulli , à levi corporis motione , lipothymiâ corripuntur ; quibus aliàs pulsus rarus & vibratus exploratur.

Aneurisma internum , rarè duplex , dolores acutissimos concitat , qui nonnunquam paroxysmorum more exacerbati misellos ægros , haud sine adstantium terrore , in vitæ discrimen trahunt : plerique ingentis tumoris pulsationem intus persentiunt. Pulsus interea contractus , renitens , convulsivus , & intermittens observatur , præsertim in brachio viciniore : quandoque saliant arteriæ in jugulo ; urget tussis ; & cutis citrinum colorem induit , vel subtumida annotatur , ut in cachexiâ. Ingruunt , *procedente morbo* , palpitationes , lipothymiis crebrò recurrentibus ; dolor lumborum , &c. Sin verò venæ reducem sanguinem è capite excipientes comprimantur ; emergunt cephalalgiae , vertigines , convulsiones , delirium , &c. Melancholici , nullâ sæpiùs præviâ causâ evidente , in huncce dirum morbum sunt proclives ; quem exitialem esse nemo nescit ; cum marasimum , gangrænam , cachexiam & hydropem , præsertim pectoris , accersat ; ni ægri præmaturâ morte rapiantur ; à scilicet disrptione , vel dilaceratione aneurismatis in pectore siti ; quâ sanguis pleno gurgite irruit in cavum pectoris , vel pericardii ; uti pluries inter *rimanda cadavera* nobis observasse contigit. Ad annos tamen ut plurimum protelatur hic morbus ; sed nullâ arte evinci potest , & planè *incurabilis* ab omnibus habetur. Hinc nulla alia cura , præter *palliativam* , adhiberi solet : hæc versatur circa venæ sectiones , identidem repetitas ; & accuratissimam vivendi normam : quibus benè perspectis præcaventur graviora symptomata & imminens lethum tantisper repellitur.

PHLOGOSIS INTERNA.

PHLOGOSIS
INTERNA.

DE inflammationibus internis sigillatim, vel totidem capitibus acturi, nonnulla generalia præmittere haud inconsultum fore judicavimus, quæ non solum affectibus inflammatoriis suo loco exarandis; sed etiam quibuscumque aliis extrà viscera insidentibus congruere queunt. Præter nobiliora corporis & notissima organa; glandulæ, membranæ, & præcipuè corpus cellulosum ad phlogosim prona esse nemo ambigit: nec immunes sunt muscoli abdominales; uti nonnunquam me observasse contigit. Exercitationes immodicæ, labores ardui, erysipelatis retrocessus, arthritidis anomala, devia rheumatismi materia & sanguini remixta, consuetorum sanguinis profluviorum suppressio, calidiorum ciborum & cupediarum esus, vinum liberaliùs sumptum, aquarum ardentium usus, &c. *hunc affectum parere solent.* Eundem nonnunquam adducunt emetica, cathartica, drastica & venena: concitatur ab intestini strangulatu in herniâ; à quâvis compressione, contusione, &c. Hoc ægritudinis genus familiare est plethoricis; sæpiùs attingit juvenes, & temperie sanguineâ præditos; nec parcit biliosis.

Phlogosis interna, ni intrâ angustissimos limites coercetur, comitem semper habet *febrem*: dolore plerumque stipatur, nunc miti, nunc acuto, nonnunquam pungente: aliàs lancinante & pulsatorio; ratione scilicet partis fabricæ, morbi incrementi & propagationis; ac demùm propensione ad puris confectionem. *Dolor inflammatorius* quandoque quiescit; sed fallaces sunt induciæ; cum ferius ocyùs recrudescat. De æstu & dolore circa morbi sedem conqueruntur ægri, levissimos rigores sæpiùs patiuntur, præsertim si lecti impatientes situm commutent. Sanguis venæ sectione eductus sub primis temporibus à nativâ fluiditate vix recedit; sed *procedente morbo*, crassitiem contrahere videtur; ac concretus & fœculentus, crustâ flavescente vel subviridi in patellis cooperitur. Haud tamen pro certo inflammationis *indicio* haberi debet hæc morbosa sanguinis constitutio; cum in quibusdam per totum inflammationis evidentioris curriculum planè deficiat: nec morbus tum, uti nonnulli perperam sibi persuaserunt, calamitosior evadit: prætereà sanguis ejusdem indolis, vel prædictâ crustâ obductus, sæpiùs mittitur, absque phlogoseos, vel levioris, suspicione; quod notare debent qui vulgi opinionibus inconsultam fidem adhibent. *Febris inflammatoria*, ut è diverticulo in viam redeamus, sæpiùs ab ardente vix discrepat, & etiam ab horrore & rigore exordium capit: pulsus validus, durus, sæpiùsque inæqualis deprehenditur: dolet caput, urgetque sitis cum linguâ aridâ, nonnihil nigricante. Quibus addere licet æstum ad viciniora partis affectæ pertingentem, anxietates in præcordiis, insomnium, delirium, aliaque graviora febrium symptomata,

PHLOGOSIS
INTERNA.

quæ truculentiora fiunt ; si membranæ , pleura nempe , mediastinum , diaphragma , stomachus , intestina , mesenterium , &c. phlogosi corripiantur.

Inflammationes internæ , uti jam inculcavimus , ægrè sæpiùs *innotescunt* ; si excipias peripneumoniam , quæ sputo cruento in propatulum venit : sed nonnunquam clanculùm subrepat partium abdominalium , cæterarumque phlogosis , quam meris duntaxat conjecturis assequi licet. Nonnullis tamen *signis* mox enumerandis internoscitur quorundam viscerum inflammatio ; sed dubiis indiciis se proferunt aliæ imi ventris phlogoses. Ex *abdominis* sanè quidem renitentia dolore & febre stipatâ , *phlogosim* adesse vel imminere arbitrari fas est : sed arduum sæpiùs est inquirere quanam pars afficiatur. Phlogosis ventriculi dolore atrocissimo in epigastrio , deglutiendi difficultatè , vomitu & singultu , anxietatibus molestissimis & extremorum frigore sat dilucidè se prodit. A dolore acuto circà umbilicum , à genuinâ colicâ vix discrepante , abdominis tumentis renitentia , vomitu , ac alvo occlusâ ; intestina phlogosi tentari conjicere datur. Dolor gravativus , circà lumbos , accedentibus cæteris signis , læsionis mesenterii suspicionem movent : si dolor eandem partem occupans sit acutior , in mentem veniunt renes. Tactûs opè deprehenditur hepar inflammatum ; simili exploratione dignosci potest lien affectus : sed aliter se res habet , si pancreas , aliæque abdominis partes phlogosi teneantur ; imò & obscurè sæpiùs distinguitur inflammatio viscerum vel corporis cellulosi , ab illâ musculorum abdominalium ; sub quâ tamen postremâ acerbioribus cruciatibus torquentur ægri ; præsertim inter tussim , aliæque munia quibus exequendis inserviunt hæc motûs organa. Peripneumonix & pleuritidis signa alibi trademus. Meningum & cerebri phlogosim concomitantur cephalaugia , tam vehemens ut vix effari possit ; delirium ; quo in furorem adiguntur ægri ; aliæque truculentiora symptomata. Sed turpiter allucinantur qui , merâ hypothesi ducti , quodvis delirium febrile ad inflammationem cerebri vel ejus involucrorum referunt ; quod falsum inter *rimanda cadavera* quotidie deprehenditur.

Nusquam *periculo* vacant phlogoses internæ , ni angustioribus terminis coërceantur ; sed plus minusve *ominosa* censerì debent ratione partis affectæ & symptomatum sævitiei : citòque sua percurrunt tempora , ni in morbum chronicum , genuinum scilicet skirrhum , è quo prodeunt febris lenta , marasmus & hydrops , faceßant. Nulla ferè extrà resolutionem curationis spes affulget , si viscus impervium phlogosi impediatur : aliter se res habet de pulmonibus , ventriculo & tubo intestinali ; renibus & aliis quæ , propriis ductibus , foris hiant. Hæmorrhagiæ & sudores circà septimum diem erumpentes nonnullis emolumento sunt : sed in plerisque mæra audiunt symptomata , quæ nil boni spondent. Urinæ circà quartum vel septimum diem subsidentes salutarem quandoque exitum denuntiant ; aliàs ex horum examine nil certi de eventu statui potest. Quibusdam prodest alvi fluxus ; sed si saburra nigricans egeratur , vel vomitu foràs deturbetur ; cogitandum

de exequiis. In phlogosi resolutionis nesciâ, pus ut plurimum conficitur, & hinc emergit abscessus vel ulcus: aliàs gangrænâ post se trahit, quæ ægros ad ultimam rerum lineam brevi ducit. Suppuratio à quarto ad septimum diem accedit: si pus, tam in abscessu quàm in ulcere, ratione fabricæ & sitûs partis affectæ exitum sibi parare possit, nonnulla salutis spes affulget; aliàs lethum imminet. Levis horror, crebrò & inordinatè recurrens, dolor pulsatorius, haud deficientibus cæteris signis, sunt vulgatissimæ *abscessûs notæ*. Dolor lancinans ad ulcus vel erosionem spectat. Imminentem gangrænâ indicat dolor urens & acutus: hunc lethalem exitum declarat doloris subitanea cessatio; sævientibus febre, aliisque gravioribus symptomatibus. Si demùm jam præterito suppurationis tempore, nulloque prævio purulentæ indicio; de dolore obscuro, gravativo & quasi distrahente conquerantur ægri, infarctum inflammatorium in merum skirrhum abiisse, proum est credere: hæc omnia docet *autopsia anatomica*.

Pro deterrimâ habetur pleuræ, hepatis & uteri inflammatio: sed ferocior fortè est *ventriculi phlogosis*, frequentior sanè quàm vulgò existimatur; quæ tertio plerumque quartove die gangrænâ accersit, funestum sanè præfagientem eventum, variis cladibus confirmatum: vel skirrhî naturam induit; è quo suboritur vomitus pertinacissimus, ac planè inmedicabilis; etsi medicamina ad partem affectam proximè appellunt. Rarò inibi conficitur pus, per vomitum vel secessum, abscessûs disruptione, foràs eliminandum; relicto ulcere quod ægrè domari patitur. E *mesenterii* inflammatione haud infrequenti emergit abscessus, cujus materia per tubum intestinalem quandoque foràs elutriatur; aliàs intrâ abdominis cavum effunditur; & circum viscera fluctuans, ipsis exitialem labem impertitur. Minùs pertimescendam esse pulmonum, renum, aliorumque viscerum foris patulorum inflammationem, ob liberum puris egressum, jam suprà innuimus: sed de cæteris partibus felicem *eventum* à solâ resolutione harrariolari licet; quod dubium intrâ paucos dies solvitur.

Quandoquidem omnis *salutis spes*, pro partibus quibus nullus est aditus; circâ resolutionem versatur, in aliis casibus etiam auspiciatissimam; nil non movendum ut opportunis remediis impetretur. In hunc scopum nullâ cunctatione rûnditur vena, & pluriès iteratur *sanguinis missio*: sed circâ illud præsentissimum præsidium notare juvat, quod certis cancellis contineri debeat, ne majori quàm par est copiâ sanguine educto, accersatur gangræna; præsertim si partes membranosæ afficiantur; quod non rarò in praxi observavi. Ideò venæ sectionem haud ultrâ ter, quaterve, aut ad summum sexies repetendam esse, multiplici experienciâ edocti, asserere minime dubitamus. Nec indiscriminatim, uti pessimus mos invaluit, in omnibus morbi temporibus celebrari debet; cum tertio, quartove die elapso, planæ inutiles vel nocivæ, ni urgentiori sit succurrendum, à peritioribus censeantur. Prætereà nullum est dubium quin confectioni puris officiant; cum ad opus requiratur quædam arteriarum renitentia, quâ

PHLOGOSIS
INTERNA.

sanè defraudantur prædicta vasa, si ultra modum depleantur. Cur minime mirum, si à nimia illius laticis detractiōe hoc depurationis genus agrè absolvatur, vel planè deficiat; & infarctus sanguineus in merum skirrhum faceſſat; quod docet exarata *cadaverum historia*. His addere lubet quod pariori manu fundendus sit sanguis in inflammatione, febrium putridarum & malignarum adolescentium symptomate; imò & sæpiùs sub hoc casu venam secare minime licet; quidquid clamitent inconfulti, qui ab usu perperam recepto nusquam dimoveri patiuntur.

Emeticum ineunte morbo post unam vel alteram venæ sectionem, egregiam sæpiùs opem præstat: sed angue pejus fugiendum, si venter tumeat & doleat; ne irritentur crabrones. Nec tutiora sunt cathartica: *laxantia* duntaxat, cassiam nimirum, mannam, tamarindos, oleum amygdalarum dulcium, &c. cautè usurpare fas est. Alvus interea per totum morbi stadium fervetur libera, enematum præsidio, quæ laxantibus, haud tutò semper adhibendis, supplere valent. Multum conferunt, uti neminem latet, diluentia, *demulcentia* & temperantia; in quorum censum veniunt aqua pulli, serum lactis, emulsiones vulgatissimæ, herbæ cichoracæ, flores malvæ & althææ, semina lini, &c. Haud tamen plus æquo refrigerantibus inhærendum; ne calor, tum ad resolutionem, tum ad suppurationem, apprimè necessarius restinguatur. Plurimum deprædicantur diaphoretica mitiora, quæ nonnihil materiæ morbosæ demere valent, veluti borago & buglossum, scorfonera, scabiosa, carduus benedictus, &c. hujusce commatis esse videtur sanguis hirci præparatus, qui non modò in peripneumoniâ, sed etiam in phlogosi cæterarum partium, proficuè adhiberi potest. Inter resolventia interna, cerefolium aliis antecellere videtur, si scriptoribus sit fides. A nonnullis commendantur absorbentia: sed nùm hypothesis hæc suadeat? solertioribus examinandum relinquimus. Sanioribus clinicis invisa sunt narcotica, cum organis vitalibus ad morbi solutionem conferentibus, torporem impertiri, & morbum quodam velamine obtegere soleant: insuper haud citrà periculum hæc adhiberi queunt, ubi vel levis subest gangrænæ metus: sed paregorica, nitrosa scilicet, sal sedativum, camphora, liquor anodynus mineralis, &c. sæpiùs faustè usurpantur.

Quod ad *remedia externa* attinet; nonnullam opem præstare valent fofus & cataplasmata emollientia; vesica lacte tepido semi-turgida; animalia viventia secta, eorumque pelles nativo calore præditæ, &c. quæ præter vim rigidiora laxandi, & hinc dolores compescendi, resolventium & maturantium munere, pro re natâ, fungi videntur. Quandoque profunt hirudines vasis podicis admotæ; præsertim si solitum hæmorrhoidale profluvium coërceatur. Haud exiguam laudem merentur vesicatoria circa viciniam partis affectæ imposita, quorum ope quædam materiæ morbosæ pars eximitur. Hæc munia præsertim obire prædicta topica, in pleuritide & peripneumoniâ, neminem practicum latet. Haud minùs demùm prohibentur narcotica extùs admota, quàm intùs exhibenda; nec nisi in urgentissimis casibus ad illa solatia confugere licet.

PURULENTIA INTERNA.

PURULEN-
TIA
INTERNA.

PHLOGOSIM excipere solet *puris confectio* ; tanta est inter utrumque morbum affinitas ut vix unus ingruat , quin alter presso pede sequatur. Familiarissimam esse purulentiam internam , de quâ in præsentiarum , haud fugit sanè illos qui *cadavera* perscrutari haud gravantur ; & hic est fons è quo depromimus , quæ de hâcre dicenda habemus : missis scilicet omnibus de hoc naturæ conamine commentis , quibus scatent libri ; quæ pace illustrium virorum qui in hâcce palæstrâ desudarunt , superfluam & inanem potiùs quàm genuinam doctrinam sapiunt. *Quatuor* occurrere *suppurationis interna species* è propriis nostris observationibus , tum clinicis , tum anatomicis colligimus : *primam* exhibet abscessus , vel apostema , sub quo pus peculiari quodam folliculo coërcetur : *secundam* præbet ulcus : *tertia* pater à crustâ quâdam albicante , & quasi gelatinosâ , quâ intactum , uti videtur , viscus obducitur : *quarta* verò nihil aliud est , quàm purulentus viscerum infarctus .

Ut à *primâ* & notissimâ purulentia specie exordium capiamus : à quarto ad septimum morbi inflammatorii diem pus confici jam suprà declaravimus ; sed addere juvat præmaturum illud naturæ munus nonnunquam inchoari , circâ tertium imò & secundum phlogoseos diem : quod sedulò animadvertendum ; ne intempestivis turbetur remediis. Nemo nescit quod vigentibus febribus putridis & malignis , variolis & morbillis ; affluxus purulentos sæpiùs intrâ brevissimum tempus in pulmones , hepar , mesenterium , &c. nullo prævio phlogoseos indicio illabatur. Vulgatissimum prætereà esse hoc infortunium à metastasi ; ubi scilicet ab exhaustis ulceribus externis , materia purulenta sanguini remixta in hanc vel illam partem irruit ; nullo alio accedente prænuntio , satis superque notum manet. *Apostasis* , gallis *dépot* , audit hæc puris collectio in quamvis partem , nullâ præviâ inflammatione ; qua hinc ægrè innotescit. In suppuratum quandoque abeunt tumores anomali vel cystici , qui non solum pus inibi collectum , sed diversas alias materies , lapides putà , ossa , cartilagines , squamas , &c. recondunt. Diversam esse ratione partis fabricæ , vel morbi causæ , *abscessuum internorum* molem nemo non intelligit. Quemdam olim me vidisse memini , in hepate stupendæ magnitudinis , qui puris haud pravæ notæ libras octo continebat : hoc morbo detenta muliercula staturæ humilis , maximâ spirandi difficultate , dum viveret , premebatur , ob repulsum diaphragma ad tertiam costam , à claviculis numero ducto ; adeò ut mirari subiit quomodo cor & pulmones in hoc angustissimo spatio , vitâ superstitè , coërcerentur. Alium abscessum fortè ingentiozem observavi in eodem viscere , cujus pus fœculentum & fœtidissimum exitum sibi paravit , trans diaphragma & pulmones , per bronchia , & tanto proventu ad os

PURULEN-
TIA
INTERNA.

irruit hæc diluvies, ut planè suffocatus ager, aliàs habitûs athletici, diem extremum clausit.

Secunda suppurationis *species* infrequentior, si excipias vulnera ad quæ etiam pertinet; sede duntaxat morbi à primâ discrepare videtur: si enim pus in superficie, limbove viscerum, vel in eorum cavo conficiatur, proprium visceris involucrum, vel membranam cavum obvestientem erodit; hinc superato hoc obice, pus colligi nescium extrâ funditur; undè emergit *ulcus*, quod nonnunquam latè diffunditur; vel quamdam visceris partem depascitur; imò & integrum, horrendo sanè spectaculo, absumit: quod de alterutro pulmone, sæpiùs accessisse norunt sanè qui pluribus dissectionibus interfuerunt. Cor totum ulcerosum sæpiùs deprehenditur; sed in solâ superficie prorepens erosio haud inferiorem visceris contextum attingit. Simili fermè modò læditur facies interna laryngis, & bronchiorum, renum & vesicæ, stomachi & tubi intestinalis, uteri, &c. quæ viscera, ratione ductuum foràs hiantium, materiæ purulentæ egressum largiuntur.

Tertia occurrit suppurationis *species* quæ solâ transudatione peragitur, absque abscessu; nulloque existente ulcere. Pus scilicet blandum, & acridinis, uti videtur, expers, è viscere quasi expressum; nunc fluidum stagnationi purulentæ ansam præbet; non secùs ac in aliis purulentæ speciebus: nunc viscidum & glutinosum ambitui partis læsæ hæret, instar *crustæ gelatinosæ*; quâ sublatâ integrum conspicitur viscus, cùm tamen evidentibus inflammationis notis, hæc phlogoseos & suppurationis species non solum respicit morbos acutos; sed sæpiùs etiam post chronicos observatur in pulmonibus, corde, intestinis, &c. cur fit ut nonnulli de verâ illius materiæ indole dubitaverint. Nec, ut verum fatear, liquidò constaret de hoc inflammationis affectu; ni sæpiùs reperiretur prædicta substantia concreta puri fluido & optimæ notæ intermixta; tùm in stagnationibus, tùm in ipsismet abscessibus; quod, ni fallor, ejus naturam sat apertè prodit.

Quarta demùm vulgatiores purulentæ *species* observatur; cùm totus viscerum contextus tabo imprægnatur, vel imbuitur, sine ullâ conspicuâ erosionem, nulloque ut plurimum existente abscessu; ni hoc nomine veniant innumera conceptacula passim occurrentia, quæ tantillum puris recondunt. Hic est primus putredinis gradus, cui proclivia sunt pulmones, hepar, lien & pancreas: ipsumque omentum hâc labe sæpissimè consumptum deprehenditur. Viscera compacta hoc vitio correpta, primo examini sæpiùs inculcata videntur: sed ubi cultrum in hæc adigitur, pus intrâ eorum substantiam coacervatum protinùs erumpit, & undique diffluit. Hæc sunt quæ in apricum veniunt *inter rimanda cadavera* hisce affectibus denatorum, & atrâ sæpiùs caligine obruta, dùm in vivis agerent.

Præter jam tradita phlogoseos *signa*; puris collectio innotescit dolore pulsatili, lancinante & gravativo; atque algore quodam febrili inordinate recurrente; pulsu duro, intermittente vel oblitterato; lipothymiâ, extremorum frigore, &c. Si abscessus pectus occupet, recrudescit spirandi difficultas,

difficultas, & proritur tussis: si in capite latitet post casum ab alto, quamlibetve contusionem, concitantur cephalalgia atrocissima, mentis torpor, insultus apoplectici, convulsiones, &c. difficilius internoscitur abscessus in abdomine reconditus, ni in subsidium veniat tactus exploratio; aliàs ita sapius occultatur, ut nequidem in suspicionem veniat. *Procedente abscessu*, vel ad maturitatem, ut inquiunt, accedente, miriora fieri solent symptomata; pulsusque flexilior evadit, ni dolores exasperentur à tumoris mole, proximiores partes comprimente; vel à pure erodente, quod foveas intrà partes exquisitiori sensu donatas sibi cudit. Abscessus à materiae purulentæ *metastasi* sobolescentes, ut plurimum putridi & saniosi; raro doloris sunt participes, febremque concitant: hinc minime mirari subit, si solis cadaverum extispiciis in apicem veniant. Aliter se res habet ergà illos qui circa ultima febrium biliosarum vel mali moris tempora conficiuntur; qui scilicet dolorem & renitentiam post se trahunt, si in hepar, mesenterium aliaque abdominis viscera ingruant; tussimque & suffocationem movent, si pulmonibus infideant. E. disruptis abscessibus prodire ulcera vulgarissima nemo nescit: sed alia, uti jam innuimus, nascuntur nullâ præviâ puris collectione. *Ulceræ* situm habentia in visceribus cavis, puris evacuatione facile dignoscuntur; cætera meris conjecturis assequi licet; etsi haud suis signis defraudantur; in quorum numerum veniunt dolor lancinans, cum ardore in parte affectâ; febris lenta, sudores chronici, tabes, &c. Quod attinet ad alias purulentia species, de quibus altum apud Authores silentium, nullis indiciis hætenus notis se produnt; nec quid certi de hac re statuere licet à propriis nostris observationibus è solâ *cadaverum* inspectione depromptis: cur sit ut nisi à benè perspectis antecedentibus in suspicionem venire queant.

Supereft ut de *febre* lentâ quadragesimum scilicet diem excedente, quæ licet ab omnibus fermè morbis chronicis foveatur, præcipuum tamen purulentia internæ symptoma audit, breviter agamus. Hanc primò clanculariè invadentem, comitem habet quævis suppuratio interna, tardo gradu incedens. Pulsus in primis temporibus vix à solito, & naturali rhythmo recedit; sed increfcente labe, & contabefcente agro palàm proflit *febris*, quæ sapius ita excandescit ut pro febre acutâ ab incautis habeatur; quam maximo ægrotantium damno venæ sectionibus debellandam existimant. Ubi in propatulum venit *febris* hectica, exacerbationem post pactum, horisque ferotinis patitur: tum æstus jam perennis intenditur; acriorque & mordax ad volam manuum propagatur: rubent genæ; arefcit lingua & muco subalbicante obducitur. Interea ingruunt horrores inordinatè recurrentes; vel de simplici & fugaci extremorum refrigeratione conqueruntur ægri. Prosternitur appetitus, vel proritur fames: somnus deficit vel turbatur; languent vires; sensim emaciantur ægri & collabuntur tempora, contrahitur imus venter, quasi inanis esset: urina sapius pinguis & crassa, vel putrida observatur. Sudores demum, præsertim inter dormiendum, uberiori proveniunt erumpentes; alvi fluxus, ut inquiunt, colliquativus; &

PURULEN-
TIA
INTERNA.

ad quavis remedia surdus; cutis sicca & squalida; nares acutæ; oculi concavi; capillorum defluvium, &c. pro mortis præconibus habentur.

Nonnunquam evenit ut *abscessus* pectoris, vel abdominis extrinsece promineat; quod pluries in affecto pectore vidisse memini; è quo felici & inexpectato exitu futuram, vulgarissimâ arte, sanationem hâriolari fas esse, cuivis obvium. Pus præterea, in quamvis partem colligatur, haud rarò foras amandatur *per sputa, vomitum, sedes & urinas*: nec hic faustus eventus solam pulmonum, stomachi, rubi intestinalis & renum purulentiam respicit; sed etiam ad abscessus viscerum planè imperviorum spectat; quorum materia purulenta viciniora erodendo aditum sibi parat in cavum prædictorum emunctoriorum; vel sanguini spontaneo naturæ motu remixta aut resorpta ad hæc incernicula circuitûs lege appellit: nec planè despondendum ab abscessu intrâ cranii pyxidem recondito; cum, exelisis cerebri involucris, & ipsimet ossibus, nares vel aures materiæ purulentæ egressum sæpè largiuntur. Postremò notare expedit laticem purulentum in quamvis partem, intrâ febrium curriculum, clanculariè collectum, vel ab exsiccato ulcere hùc metastasi adductum, ut plurimum ad putredinem, brevi in proximiores partes transmittendam, vergere; undè ad tibicines mittere licet. Minus portendit periculum abscessus internus à genuinâ phlogosi ortus, cum præter indicatas evacuationis vias, pus optimæ notæ & minori copiâ aggestum suam fluiditatem quandoque amittat, & in corpus durum facessat, quod in posterum leve incommodum parit, inibique hospitatur circâ vitæ discrimen: hoc docet *sectio cadaverum*.

Ægrè sanè medentur, etiam exercitatissimi, ulceribus internis bronchia, ventriculum, intestina, renes, vesicam & uterum obsidentibus; sed planè *insanabilia* censentur quibus nullus patet aditus. Utraque *febre hæctica* stipantur, quæ sudores & diarrhæam quibus corpus quasi diffluit, post se trahit; hinc marasmus quem haud rarò excipit hydrops. Cancris naturam sæpiùs induere videntur prædicta ulcera, præsertim viscerum concavorum: sed mos invaluit ut hoc nomine duntaxat insignirentur uterum obsidentia. Ulcera pulmonum, renum, uteri aliorumque viscerum perviorum non impediunt quominus vita per plures annos protrahatur, ob liberum puris effluxum: sed ubi nullus patet aditus, fatum acceleratur. Suppurationis species quæ fit per exsudationem haud fortè omnem præcludit *sanationis spem*: sed de hac re nil certi in medium adducere licet; cum hoc ægritudinis genus nusquam nisi post obitum innotescat. Haud dissimili ratione dubius censeretur debet eventus ab stasi puris intrâ viscerum contextum; longè tamen periculosior censeretur debet hæc labes, quæ uti suprâ inculcavimus, primum putredinis, semper exitialis, gradum exhibet. Addere lubet quod hæc postremæ purulentæ species partes viciniores in consortium trahat; ne præmaturâ morte rapiantur ægri: quæ omnia visenda præbent *dissectiones anatomicae*.

E præhabitis colligere datur quod rarò pateat quidam ad purulentæ internæ *curationem* aditus; non solum quia remedia huicce domando affectui

Imparia sunt ; sed etiam quòd plerumque occultetur , & ne quidem incurantium mentem veniat. Apud omnes tùm Medicos , tùm Chirurgos in confesso manet venæ sectiones , inchoata suppurationi officere : nec hinc sequitur illas magis congruere , ubi pus in parte quâdam haud perviâ conficitur , denegatâ spe futuri egressûs ; cùm in hocce casu gangrænâ accersere , vel skirrhi generationi favere valeant ; qui morbi majorem *funeris metum* incutiunt , quàm pus in parte etiam imperviâ coacervatum ; quod uti jam innuimus , viam sibi parare valet versûs tubum intestinale , aliaque corporis receptacula ; vel resorberi ; circulationisque beneficio ad excretionum organa appellere : qui duplex exitus prioribus morbis planè denegatur. *Laxantia* mitiora , si nidulent sordes in primis viis , tutò exhiberi queunt ; sed præcipuum morbum nullo modo respiciunt. Opportunè usurpantur *diluentia* & *demulcentia* ; inter quæ selectiora audiunt serum lactis vel ipsummet lac ; oriza , hordeum , sagutum , aliaque ejusdem commatis , quæ acriora obvolvendo , vel obtundendo , naturæ viribus obsecundare queunt. Haud minorem opem præstant *vulneraria* , detergentia & balsamica ; in quorum censum veniunt pervinca , veronica , hederâ terrestris , fanicula , hypericum & alchymilla ; mel Narbonense , balsamum Peruvianum , vel Canadense , terebinthina Chia , aqua picea , balsamum Lucatelli & id genus alia , quæ pluribus emolumento fuere. Nec posthabendæ aquæ minerales materiebus balsamicis imprægnatæ ; Bonenses nempe , Bagnerienses , Baregienses , Montis aurei , &c. de acidularum viribus , quæ à nonnullis proponuntur , dubitare licet.

Quoad *remedia externa* ; nullus ambigendi locus quin plurimùm conferant emollientia & maturantia ; si abscessus foris promineat ; vel fluctuatione prementibus digitis deprehendatur. Nec minùs patet injectionum detergentium efficacia , si ad locum ulcere affectum impelli queant. Sed cauteria cæteris auxiliis longè antecellere apud prioris subsellii practicos ratum manet : notis enim haud infrequentibus materiæ purulentæ metastasibus , facilè intelligitur quomodò puris devii & sanguinem conspurcantis motus versûs hanc sentinam dirigatur ; vel salutarî naturæ molimini faveatur ; quod experientia quotidiana testatur. Nil præstant cauteria adversùs stagnationes purulentas abdominis , pectoris & capitis , ob crassitiem à morâ contractam , resorberi nescias : cur ad aliam methodum se conferre expedit , quæ versatur circâ evacuationem arte chirurgicâ , si nihil vetet , promovendam : exitialem enim nonnullis fuisse , haud latet clinicos ; præsertim respectu pectoris ; ubi scilicet planè absumpto alterutro pulmone , pus hujusce visceris pristinam sedem replet : quo in casu neminem esse reor qui illam audeat experiri.

PURULEN-
TIA
INTERNA.



GANGRÆ-
NA
INTERNA.

GANGRÆNA INTERNA.

AB exaratâ cadaverum historiâ abundè patet partes internas, non secùs ac corporis ambitum, ad gangrænâ procliviores esse: nec minùs obvium, huncce dirum morbum alterutras partes impetentem, excipere *sphacelum*, vel *siderationem*, quâ pars, innato calore planè extincto, nigra, arida vel mollis, gravè olens, putrisque evadit. Nemo nescit *gangrænâ* extûs conspicuam, aliam esse *siccâ*, aliam *humidâ*: idem fermè discrimen notare licet in intimioribus corporis recessibus; quod, etsi anceps, admittere consultum duximus; ne quæ dicenda veniunt, novâ nomenclaturâ, obscuriora evadant. Prima vel *siccâ*, inter rimanda *cadavera*, se prodit maculis lividis & nigricantibus, quæ pleuram, peritonæum, mesenterium, stomachum & intestina, aliasve partes membranaceas, involucri vices replentes, vel cavitatum latera succingentes, haud infrequenter impetunt. Secunda vel *humidâ*, putridæ dissolutionis exordium, in ipso viscerum contextu cernitur: pulmones, hepar, lien, pancreas, omentum, &c. hâc labe tacta sæpissimè deprehenduntur. Utramque gangrænæ speciem, in *sphacelum* abituram, ab unâ eâdemque causâ prodire; quæ ratione partis fabricæ, alterutrum effectum edit, credere par est. *Alia gangrænâ*, ni fallor, *species* haud infrequens, *seçãoe cadaverum* in conspectum venit, & à cæteris multùm discrepare videtur: sub pelliculæ albicantis schemate se profert, quæ escharæ instar facilè avellenda, viscerum superficiei hæret: *cor*, suprà alia viscera, huic labis generi obnoxium deprehenditur: haud rarò tamen occurrit in stomacho & intestinis; nec parit hepatis, aliisque visceribus. Macularum instar, vix ultrà visceris superficiem prominentium; primo intuitu se præbent prædicta stigmata; quæ nunc exigua, nunc longè latèque diffusa observantur: in nonnullis solitaria conspiciuntur: in aliis numerosa repertiuntur; quæ postrema stipato agmine sæpiùs cor obsident; adeò ut pro hujusce visceris exfoliatione, vel desquamatione, haberi queant: circâ quam obiter notandum haud ex alio fonte fortè prodire hæc ramenta membranacea, quæ tussi ejiciuntur; vel cum fecibus alvinis, lotiove foràs elutriantur; quæ nil aliud esse quàm membranæ interioris trachæ, bronchiorum, tubi intestinalis & vesicæ segmina eodem deleterio detracta haud falsò conjicitur.

Prima gangrænâ species, vel *siccâ*, à phlogosi, pressione, nimîâ partium dilatatione, vel distractione ut plurimùm suboritur. Aliàs est morbus quasi sui generis, licèt haud primariò vel per se existat; cùm scilicet à vitiatâ humorum, vel sanguinis, crasi progignatur. Hanc gangrænæ speciem comitem sæpiùs habent variolæ, febres malignæ, aliive morbi acuti. Eadem etiam animadvertitur in cadaveribus scorbuticorum, phthysicorum, hydropicorum, aliove affectu chronico denatorum. Nec absimilem

postremò pariunt animi pathemata graviora, aër halitibus virulentis inquinatus; venena intus sumpta, vel morsu animalium sanguini indita, &c. *Secunda gangræna species*, vel humida, ab infarctu purulento, uti jam innuimus, sæpissimè producitur: sed ab aliis causis etiam promovetur, quæ hætenus nostræ indagini subtrahuntur. *Tertiæ speciei* à cæteris planè discrepantis causa & indoles in cimmeriis latent tenebris; nec præsciri potest eventus; licet viscera hæc labe affecta, tum in acutis, tum in chronicis, suis obeundis muniis haud imparia videantur: quapropter ulterius de hæc re inquirendum esse censemus.


Gangrænam imminuentem indicat dolor urens & acutus; cuius subitanea cessatio hujusce infortunii, vel sphaceli præsentiam arguit. Natales plerumque sumit à phlogosi; sed minime dubitare licet quin etiam à variis aliis causis procedat; quæ vel atrâ caligine obruuntur, vel meris duntaxat conjecturis attingi queunt. Gangræna interna partes extus conspicuas haud rarò in consensum trahit; & hæcce notâ, cæteris consentientibus, jure suspicatur; quod sæpius evenire in senili ætate haud fugit sanè clinicos. Sed ubi hæc conspicua *indicia* desunt; à benè perspectis antecedentibus extricari valet hujusce morbi diagnosi. Nil certi inferre licet de pulsu debili & intermittente, de anxietatibus, virium prostratione, sudoribus frigidis, &c. quibus stipatur; cum hæc symptomata omnes ferè morbos respiciant. E. dejectionibus nigris, ichorosis & fœtidissimis, si cætera præcesserint signa, facilè colligitur tubum intestinalem gangrænâ & sideratione, silentibus doloribus, infestari. Hæc labe tacta prædicta viscera membranacea *dilacerationis* periculum incurrere sat abundè patet: nonnunquam enim ileum observasse memini ex hæcce causâ prodeuntem; à disrupto scilicet intestino foràs prorumpere alimentorum reliquiæ, quæ sensim in abdominis cavum aggestæ, inferiora intestina obruebant; hinc vomitus nullâ arte sedandus, qui vitam ægris eripuit. Alium casum rariorem, nec minùs horrendum nostris adversariis commisimus: versatur circà stomachi & proximioris diaphragmatis dilacerationem, quâ ingesta in pectus irruentia tantam intulerunt suffocationem, ut illicò ad superos migraverit decumbens.

Gangræna interna cognitu difficillima, haud *curatu* facilior occurrit. Nemo nescit roborantia, cardiaca, alexiteria & diaphoretica pluris haberi in foro medico adversùs gangrænâ externam: iisdem præsidiiis impugnandam esse gangrænâ intus reconditam; rationi & experientiæ consonum videtur. Sed cæteris palmam præripiunt antiseptica, quibus, licet diversæ indolis, haud denegantur vires specificæ; etsi genuinum horum agendi modum haud in promptu est exponere. Selectiora & usitatiora audiunt camphora, cortex peruvianus, spiritusque salis dulcis; quæ opportunè exhibita, vel solerti manu tractata plures, nî ad ultimum gradum proventus morbus domari planè recuset, ab orco revocant.

GANGRÆ-
NA
INTERNA.

GANGRÆ-
NA
INTERNA.

Sed rarò , ut verum fateamur , proficuè adhiberi queunt prædicta medicamina adversùs labem , quæ clanculùm insidiatur ; nec priùsq̃uam altas egerit radices innotescit ; quæ demùm in plerisque , haud nisi post obitum vel à *sectione cadaverum* , in aprium venit.



INSECTA ET CORPORA EXTRANEA.

DE lumbricis , aliisque notissimis vermium speciebus in primis viis hospitantibus alibi seorsim agemus ; non secùs ac de vermibus cutaneis , qui præsertim infantes respiciunt , de quibus suo loco. Idè de hisce *insectis multiformibus* , quæ passim occurrere queunt in corpore humano , nonnulla in præsentiarum tradere operæpretium judicavimus ; missis tamen fortè innumeris , quæ oculorum aciem fugiunt. Cum granofalis accipiendas esse censemur innumeras propè modum , quæ de hocce argumento prostant observationes ; cùm pleræque à meris nebulonibus turpi lucro inhiantibus in medium adductæ fuerint , ut celebrarentur , & fatuorum admirationem sibi conciliarent : nec desunt mulierculæ quæ subtili sanè quidem artificio , portentosa fingunt , vel machinant ; ut miræ de se narrentur. Hinc fit ut difficile sit verum à falso extricare. Haud dubitare tamen licet quin progignantur *vermes* ; vel *quædam animalcula* ipsis cognata in omnibus corporis viventis partibus. Delitescunt enim in cerebro , qui cephalalgiam atrocissimam , delirium , convulsiones , &c. accerfunt. Summam sævitiam exercent aurium , sinuumque nasalium incolæ. Molestissimi evadunt quæ in bronchiis & pulmonibus progerminantur ; ni cum sputo foràs projiciantur. Inter rariores & nocentissimos recensentur reperti in ipsismet cordis ventriculis , auriculis & pericardio. Pro vulgarioribus habentur & minùs reformidandis , nidulantes in hepate , liene , pancreate , mesenterio , renibus & vesicâ ; non secùs ac in variis tumoribus , folliculis , &c. Quod ad horumce insectorum formam & molem attinet ; à traditâ eorum historiâ constat alia esse glabra , alia pilosa : nonnulla pedibus insident , qui cæteris negantur : ratione magnitudinis , ut plurimùm exilia ; aliàs ingentia deprehenduntur. Juxtà demùm varios Authores , penès quos sit fides ; nonnulla occurrunt quæ millepedum , hirudinum , gryllorum , scarabæorum , scorpionum , ranarum , lacertarum , anguium , &c. faciem sat accuratè referunt. Notare expedit miratu , inter hæc , digniora per vomitum aut sedes , uti ferebatur , foràs profuisse ; quod sanè haud levem fraudis suspicionem movet. Insuper tenuiora alterius sortis animalcula deteguntur , non solùm ope microscopii ; sed etiam oculis nudis in sanguine , salivâ , urinâ , &c. haud tamen reperiuntur hæc corpuscula viventia , si excipiantur vermiculi spermatici , in

hisce laticibus recens eductis; sed post aliquam duntaxat moram, vel quamdam putrefactionem, observanda se præbent: hinc sequitur haud talia extitisse, uti plures autumarunt, in vasis sanguineis, aliisque corporis viventis conceptaculis. Haud minùs allucinantur, qui vermes crassiusculos per vulnus phlebotomo inflictum foràs prorupisse testantur: sed incautis, vel circulatoriarum artium nesciis, arident hæ fabulæ stupendæ: nec desunt qui nánias venditare, & fidem præbere mendacio, minime erubescunt.

Haud magis liquet de nonnullis historiis circà *lapides & corpora extranea* traditis: licet nullus sit ambigendi locus quin hæc concreta passim occurrere queant in corpore humano; ut de calculo renum & vesicæ, de quibus suo loco, sileamus. Crebrò deteguntur lapides in variis cerebri recessibus: fabulosa ut plurimum deprehenditur glandula pinealis; imò & totum cerebrum arenulis refertum nobis sæpius inter *rimanda cadavera* observasse contigit: quam vitiosam cerebri constitutionem haud exitium intulisse, pro certo habuimus. Sed calamitosi censerì debent lapides certæ molis in quâvis cerebri parte reconditis; cùm hinc emergant cephalalgie acerbissimæ, delirium, lethargus, vertigines, convulsiones, cæcitas, &c. Frequentiores sunt concreciones tophaceæ pulmonibus, bronchiisve impactæ, quæ tussis ope foràs sæpius detruduntur; nec minùs ominosæ censerì debent, cùm concitent raucedinem & tussim indomabilem; spirandi difficultatem, hæmoptysim; aliaque symptomata, quæ tabem pulmonarem vel marasimum post se trahunt. Ipsummet cor etiam concrecionibus lapideis circà valvulas sitis impeditur; è quibus emergunt, præcipuè in senili ætate, cordis palpitationes & syncope.

Haud rariùs obvii fiunt *lapides* in imo ventre: procreantur enim in contextu hepatis, & præcipuè in ejus ambitu; undè prodeunt dolores, aliaque phænomena variis morbis communia; adeò ut sæpiùs planè occulteretur hoc ægritudinis genus: vel nequidem in curantium mentem venit. Pari fermè caligine obruitur concrecionum biliosarum diagnosi; ni è vesiculâ felleâ delapsæ ductum choledocum obturent; & liberum bilis fluxum præpediendo, colicam, ut inquiunt, hepaticam infligant. Nec in solâ cystide felleâ concrescunt prædicti pseudo-lapides; sed sæpiùs in tubo intestinali progerminantur, qui ad ovi columbini imò & gallinacei molem accedunt; & per podicem egeruntur. Alterius indolis nonnunquam deteguntur lapides in liene & pancreate: rariùs comperiuntur in mesenterio; ni hoc nomine perperam insigniantur infarctus skirrholi, qui lapidis duritiem quandoque æmulantur.

Numerosissimæ, ut propositum persequamur, prostant observationes circà *lithiasim* primarum viarum; quæ ut plurimum innotescit à lapidibus foràs per os vel podicem prorumpentibus; sed cave fraudulentorum artes. De lapidibus genitis in testibus, vesiculis seminalibus, utero & placenta nullum subest dubium: haud minùs constat hos nonnunquam recondi intrâ corpus cellulosum, & ipsosmet musculos, nec vasa sanguinea immunia

INSECTA.

cenferi debent. Porro concrefcunt lapides in margine palpebrarum: in naribus, earumque cavernulis coacervantur, radici linguæ implantantur; cæterasque oris partes obfident. Erumpunt in nonnullis phthificis fudores fabulofi: materia arthritica & rheumatica artubus impacta merè tophacea videtur. Postremò reperiuntur in tumoribus anomalis & quibusdam abſceſſibus corpora lapidea multiformia; non ſecùs ac ſubſtantiæ offeæ & cartilagineæ: ibidem obvia fiunt corpora extranea deglutita, vel quovis alio modo corpori intromiſſa; acus nempe; clavi, globuli plumbei, nummi; ſemina plantarum, nuclei, ſpicæ, feſtucæ, fragmenta lignea, & vitrea; oſſa deglutita, piſcium ſpinæ, plumæ, &c. Omnem fermè fidem ſuperant, quæ nonnulli narrant de cultris integris, forficibus, cochlearibus, tridentibus eſcariis, aliisque conſimilibus, in abſceſſibus quoque repertis. Mantiffæ inſtar addere lubet lapides etiam generari in diverſorum animalium corporibus: innumera enim proſtant in naturæ curioſorum muſæis corpora bezoartica è capri-cervis orientalibus & occidentalibus, damis, aliisque quadrupedibus exoticis extracta: ſua præbent bufones, ſerpentes & cancri fluviatiles: ſimilia rariùs reperiuntur in bove, ariete, equo, cervo, &c. ut de agagropilis in boum & caprarum ſtomacho compaginatis ſileamus. Nec deſunt hiſtoriæ plantarum progerminantium in corpore animalium; quod idè microcoſmi inſtar recondere videtur rerum animalium, vegetabilium & mineralium rudimenta, quæ non ſolùm ſub variis circumſtantiis evolvuntur; ſed etiam incrementum ſumunt. Hæc ſunt ludentiſſimæ naturæ phænomena in quibus exponendis vires experiri vetat mentis humanæ tenuitas.

E præfatis colligere datur arduam & intricatiſſimam eſſe multiformium affectuum ab infectis & corporibus extraneis ſoboleſcentium *curationem*, ſoli utplurimum naturæ commiſſam. Opportunis ſanè præſidiis impugnari queunt infecta aures, ſinus frontales, palpebras, dentes, &c. obſidentia: opportuno naturæ molimine foràs deturbari poſſunt bronchiorum, ſtomachi & inteſtinorum, renum & veſicæ incolæ: ſed furilia ſunt artis & naturæ conamina adverſus animalcula, cerebrum, cor, hepar, aliaque organa impervia laceſſentia. Idem fermè judicandum de lapidibus, aliisque corporibus extraneis in diverſis corporis viventis partibus hoſpitantibus: equidem tuſſis ope exitum per tracheam nonnunquam ſibi parant concretiões pulmonum tophaceæ: urinæ impetui ſapiùs cedunt exigui renum & veſicæ calculi: egreſſum largiuntur os & anus lapidibus, alteriusque fortis materiebus in primis viis nidulantibus: ſed nulla fermè ſpes affulget, ſi incarcerentur prædicta concreta in cerebro, hepate, pancreate, liene, &c. Haud tamen in ſingulis hiſce caſibus planè deſpondendum; cùm experiri liceat vires tum anthelminticorum, tum incidentium lithontripticorum, quæ eſſi ſuperando morboſo obici imparia eſſe videntur, nonnullam opem, faventibus naturæ viribus, præſtare queunt.

V E N E N A.

VENENA.

ETRIPLICI regno depromuntur *venena*, æquè ac medicamina, & solâ administrandi ratione ab invicem discrepare videntur; quandoquidem *toxica* magis reformidanda, *cicuta* nempe, *stramonium*, *œnanthe*, *belladonna*; *sublimatus corrosivus*, *cantharides*, &c. quotidie à prioris notæ clinicis in usum medicum, sed refractâ dosi trahuntur. Varius est *venenorum* gradus; missis quæ ad animalium morsum, de quo alibi, spectant; alia deterrimæ indolis truculentiora excitant symptomata; quæ brevi, vel illicò mortem inferunt; alia tardiora, haud nisi per aliquot elapsos dies, menses vel annos suum effectum exerunt; adeò ut diù silentia, clancularias vitæ struant insidias hæc postrema; intricatissimumque ac lentum morbum mentiantur, qui in dies recrudescit; donec exhaustis viribus & absumptis carnibus misellos ægros jam ærumnis confectos ad ultimam rerum lineam ducat. E promptissimo & stupendo effectu quem edunt utriusque orbis Indorum sagittæ, quodam veneno imbutæ, versatissimos esse hosce barbaros in hâc nefandâ arte facile intelligitur; absit tamen ut hanc exitialem industriam ipsis invidemus: mirari profectò subit hæcce tela venenata, præsertim bantamensia, etiam post multos annos, levi inflicto vulnere brevi enecare. Quænam sit genuina *venenorum* *indoles* arduum est inquirere: atque nil certi de hâc re arguere licet è variis tentaminibus in animalium corporibus peractis; cum ab similem effectum in diversis animalibus præster unum & idem venenum: *amygdalæ*, verbi gratiâ, *amaræ*, & *petroselinum*, quæ inter alimenta numerantur, aves enecant; quæ aliàs *cicutâ*, uti fertur, & *helleboro* pinguescunt. *Cicutam* etiam innoxie pabulantur suæ: *tithymalus*, quem avidè depascunt capræ, piscibus, hominibusque est exitialis: inter toxica canum, aliorumque animalium domesticorum jure recensetur *nux vomica*, quam tamen alexiterii instar nonnulli exhibent, ut alia fortè innumera hujusce phænomeni exempla silentio prætermittamus.

Sat dilucidè patet *nonnullorum venenorum natura*, pulverem vitri, crystalli & adamantis modo merè mechanico suum effectum exercere; angulosis scilicet fragmentis, quasi totidem pugiunculis, ventriculi tunicas vulnerare & perfodere, primum est arbitrari: *arsenicum* & *auripigmentum*, *sublimatum corrosivum*, *viride æris*, *cantharides*, &c. acria esse corrosiva haud falsò conjicitur: nullum est dubium quin spiritus nitri, sulphuris, aluminis & vitrioli, acidorum causticorum classẽ subeant: liquet porrò *stramonium*, *hyoscyamum*, *mandragoram*, *solanum*, *belladonam*, &c. narcoticorum gradum consequi. Satis superque compertum manet, prima, vel caustica, præcipuam perniciem exercere in stomachum & intestina; alia verò vel narcotica, suam labem inferre sanguini &

VENENA.

humoribus. Sed haud liquidò constat agendi modus cicutæ, ænanthes, aconiti, lauro-cerasi, fungorum, variorumque vegetabilium, quæ in toxicorum agmine locum habent : ut sileamus de animalium rabidorum, viperæ, serpentis caudifoni, tarantulæ, scorpionis, bufonis, aliorumve consimilium veneno, cujus indoles atrâ caligine obvolvitur. Aliud dubium angit clinicos ; nùm scilicet hoc vel illud venenum à scelestis porrectum fuit ; quod tamen nosse magni refert, ad opportuna exhibenda remedia : sæpius enim post accuratiorem indaginem, nil præter conjecturas assequi licet ; cum è signorum, ab affectibus desumptorum, quotquot adsunt, syndrome ; nil certi de intus assumpti toxici naturâ inferre liceat.

Plura sanè quidem erui possunt è relatu ægrorum & adstantium circa indolem veneni fortuitò, errore vel incuriâ hausti : sed aliter se res habet si incusentur malè ambulans fides, & nequitia ; vel patrati sceleris opus : cum in hisce angustiis nihil præter suspiciones profari liceat. Attamen veneficium cujusvis sortis *numerossimis signis* se prodit ; cephalalgia nempè, vertigine & visus obtenebratione, oculis torvis, delirio, tremore & convulsione ; labiorum, linguæque intumescentiâ & nigredine ; respiratione interruptâ, cordis angustia, palpitationibus & lipothymiis ; anxietatibus, singultu, dolore æstuante ventriculi, torminibus, vomitu, passione iliaca, cholera morbo, dejectionibus cruentis, hypochondriorum inflatione, &c. pulsus interea debilis, obscurus, intermittens, tremulus vel convulsivus observatur : porro obruuntur vires, vel planè deficiunt ; torpent artus & algent ; erumpunt sudores frigidi ; totum corpus tumidum evadit ; cutis maculis gangrænosus signatur ; nigrescunt ungues, &c. sed hæc *indicia* omnibus fermè toxicis, cujusvis sint naturæ, congruere videntur : hinc alia indaganda veniunt quæ veneni naturam dilucidius prodant ; quæ sic se habent. Ardor œsophagi & ventriculi, faucium inflammatio, sitis ardens, cruciatus interaneorum, sedes cruentæ, ileus, cholera, syncope, &c. toxicorum, tum acrium, tum acidorum, vel aquarum stygiarum effectus audiunt. Vertigo, lethargus, delirium cum furore, convulsiones, nausæ, vomitus, &c. veneni narcotici haud infida sunt indicia.

Hisce generalibus nonnulla addere juvat circa cicutam & fungos noxios, quæ sæpius nostro victui, errore lethifero immiscentur. *Cicuta*, quæ nunc pro radice pastinacæ ; nunc pro foliis petroselini, ob similitudinem, ab incautis habetur, innumera & procellosa movent symptomata ; inter quæ frequentius occurrunt totius corporis stupor, nonnunquam subitaneus ; vertigines, visus obnubilatio, delirium, virium defectus, convulsiones, vomitus, singultus, æstus & dolor interaneorum ; regionis epigastricæ intumescencia, sanguinis ex auribus profluvium, oris spuma, &c. Hinc intelligitur nostram cicutam toto cælo discrepare ab illâ veterum ; quæ merè narcotica mortem blandam inferebat : cum nostra, annuente WEPFERO, præcipuam actionem exerceat erga ventriculum, è quo vellicato, inflammato, atque eroso ; imò & escharam sectione anatomicâ exhibente, atrociora emergunt symptomata. *Fungi* venenosi, quos cavere debent qui

cupediis delectantur, tardiùs vel post diem integrum virulentia notas exhibent; quarum spectabiliores sunt nausæ & vomitus horrendus, cholera, sanguinis ejectio cum fecibus & lotio, cardialgiæ, tormina, sitis intensior, mentis perturbatio, pectoris angustia, inflatio hypochondriorum, aortæ vel cœliacæ vibrationes insolitæ, anxietates, virium lapsus, pulsus creber, humilis, depressus, &c.

Sed silentio minime prætermittere debemus quod hæc *tradita signa* cicutam, fungos, aliave toxica respicientia, *haud in omnibus similia* se proferant: etenim ratione dosis, materierum ingestarum quibus immiscentur, aliarumque innumerarum circumstantiarum, diversas obtinere vires evidens est. Prætereà vomitu promptiori vel tardiori, alvo plus vel minùs solutâ; major, minorve materiæ virulentæ pars eximitur; foràsque deturbatur: hinc minime mirum si symptomata inum ventrem respicientia nonnunquam mitiora & obscura evadant. Idem esto iudicium de hâc veneni cujuscvis parte, quæ pariori vel uberiori proventu ad sanguinem per vasa lactea appellens, nunc circulationis organis subigitur, & per diversa corporis incernicula foràs elutriatur; nunc sanguini intimè sociatur, & à suis compedibus solvi nesciâ nervos sensim lædit; hinc torpores, paralySES, contracturæ, aliaque chronicorum symptomata quæ ægros in vitæ discrimen trahunt. Hæc non solùm de cicutâ & fungis virulentis; sed etiam de omnibus aliis toxicis intelligi debent; in quorum censum revocari debent lithargyrus, qui ad edulcorandum immaturum vinum pessimo more usurpatus, summam perniciem inferre solet; & ærugo quam excipiunt edulia in vasis ærariis parata, è quibus emergit colica pictorum vel saturnina, de quâ suo loco.

SupereSt ut breviter recenseamus signa quæ ab *autopsiâ anatomicâ* desumi solent. Corpora venenò peremptorum ut plurimùm tumida observantur; abdomen præcipuè ultrâ modum inflatur; cutis & ungues maculis atro-lividis defœdantur: lingua nigricans & tumens extrâ os plerumque exeritur: vix hærent capilli, &c. Referato abdomine conspiciuntur stupendæ tubi intestinalis dilatationes, totidem strangulationibus, si sic loqui fas sit, finitimæ. Passim occurrunt phlogosès, erosiones & gangrænæ. Oesophagus, stomachus & intestina in nonnullis se præbent inflammata, livida, hîc & illîc erosa, sphacelata, multifariam hiulca; atque haud citrà lacerationem contrectanda: ac post plures elapsos à veneno annos, conspicitur ventriculus contractus & durus, excrescentiis fungosis intùs exasperatus. Hepar nonnunquam deforme, contractum & quasi adustum, vel necrosi correptum deprehenditur. Insuper deteguntur exulcerationes in renibus & vesicâ. Maculæ demùm, quæ spisso agmine omnes partes obsident, lividæ & atro-rubentes oculis subjiciuntur: quibus addere licet colluviem gelatinosam, nigram & putrem in cerebri ambitu & receptaculis. E collatis hisce notis cum prægressis symptomatibus; omnibusque ritè pensitatis & trutinatis, quidpiam terti circâ latentem interitûs causam eruere licet; quod

VENENA.

pro forensi renuntiatione dilucidis verbis exprimendum incumbit ; ne decipiantur rerum capitalium iudices.

Ex eo quod ingens sit toxicorum diversæ sortis numerus , facile infertur diversam esse illa impugnandi methodum. Omnia *medicamina* adversus venena adhibita huc attexere , futile & fastidiosum opus : cur selectiora duntaxat tradere operæpretium judicavimus. Hæc sub *tribus classibus* comprehendendi queunt ; quarum *prima* exhibet *emetica* , cæteraque primas vias evacuantia ; quæ festinanter vel opportuno tempore hausta genuinum morbi fomitem foras expellere valent ; & sic ægros ex orci faucibus quasi eripere. Ad venena præsertim narcotica , præsentaneam opem ferunt hæc evacuantia ; nec minùs proficuè adhiberi queunt adversus venena corrosiva ; dummodò celeriter & nullâ interpositâ morâ exhibeantur ; priùsq̃am scilicet venena certam stomacho intulerint labem , quâ horrendus concitatur vomitus. Itaque obvium fit frustranea fore in hoc casu emetica ; quæ currenti , ut inquiunt , calcar adderent : ni concitaretur vomitus oleo , butyro fuso , vel pharyngis titillatione. Nec posthabenda est venæ sectio ; si vires ferant : curatio præsertim à sanguinis missione est auspicanda , si incusetur opium ; si sævissimi dolores imminentem inflammationem denuntient , ad quam declinandam nil sanè quidem non movendum : nec vetatur illud præsidium procedente morbo , si urgeat necessitas : sed haud nisi summâ adhibitâ cautelâ sanguis est educendus per totum morbi curriculum ; ne ingruente gangranâ fatum acceleretur ; quod pluriès accidisse testantur historia.

Secunda classis colligit *diluentia* , refrigerantia & *demulcentia* ; in quorum censum veniunt aqua sincera tepida , vel succo limonum , alterove cognato , imprægnata ; quæ acida vegetabilia præcipuè conferunt ad venena narcotica : emulsiones , aqua pulli vel vituli , decoctum althææ & orizæ ; lac , butyrum , mel , olea & juscula pingua ; quorum postremorum beneficio irretiuntur & obvolvuntur molecule acriores ; vel tanquàm injectis vinculis detinentur & figuntur. Suum symbolum etiam conferunt enemata è lacte , decocto omasorum , butyro , oleo , melle , &c. parata. Id genus remedia quæ adversus omnia venena haud improspere usurpari solent , longè efficaciora censerì debent , experienciâ teste , contra aquas stygias , vel venena acria , stimulantia & corrosiva , quorum spicula à substantiis viscidis pinguibus & oleosis obvolvi queunt. Per transennam notare juvat , nil sero lactis magis aptum natum esse ad rerundendam cantharidum , à perditissimis scortatoribus intus assumptarum , virulentiam. Diluentibus & demulcentibus addere licet hypnotica , quæ haud inutilem opem præstant , urgentibus acerbissimis cruciatibus , post assumpta venena acria vel acida ; dummodò primæ viæ debitis evacuantibus antehac expediantur. Neminem postremò latet quanta sit efficacia salis tartari , lapillorum cancrorum fluviatilium , aliorumque absorpentium ; ubi veneni acidi virulentia est impugnanda ; quo in casu demulcentium vires explere manifestum evadit.

Tertia classis respicit *cardiaca*, alexiteria & diaphoretica; inter quæ principem locum obtinent, theriaca, orvietanum, mithridatium, & diascordium; allium, pulvis viperarum, salia volatilia, &c. Nonnulli addunt bezoartica, olim celebratissima, quorum usus jamdudum, nec inconsultò, exolevit. E præhabitis tamen colligere datur parùm proficere adversus venena acria hæc alexiteria medicamina, etsi ab agyrtis & circumforaneis decantatissima, ab insciâ plebe comprobantur: quibus sanè deleteria horumce venenorum vires intenduntur; nedùm ipsis reluctentur. Nemo nescit postremò quid valeant acetum, & spiritus volatiles naribus admota; non secùs ac enemata stimulantia, præmissis solitis evacuationibus, contrà venena narcotica; vel ipsummet opium, quod largiori dosi haustum haud infimum gradum inter toxica sibi vindicat.

Nonnulla, ut incepta prosequamur, circà cicutam & fungos venenatos seorsim tradere expedit. Itaque nil urgentius esse debet clinico post esum *cicutæ*, aliarumque consimilium plantarum, olerum faciem præ se ferentium, quàm vomitum & catharsim haud cunctanter promovere. Sapiùs etiam conducit venæ sectio; si, uti jam innuimus, nil obstat: vinum, cæteraque alexiteria plures fausto bearunt eventu: sed omnibus prælaudatis remediis fortè antecellunt diluentia, refrigerantia & demulcentia, quæ uti pluriès inculcavimus, singulis toxicorum speciebus congruere videntur. Quod ad *fungos* attinet: licèt intricatissima sit eorum natura, ab affectibus tamen mox adductis, & à juvantibus remediis, materiâ acri & stimulante pollere, proclive est arbitrari. Hinc miris laudibus jure efferuntur aqua pulli, infusum althææ, lac, butyrum, oleum, aliaque demulcentia, adversus venena corrodentia usurpari solita: faustè adhibentur cathartica blandiora, enemata laxantia; fœtus emollientes & balnea: quibus præmissis, sedatisque truculentioribus symptomatibus, ad cardiaca & alexiteria devenire nil vetat, quæ aliàs intempestivè adhibita noxam inferre solent. Mantissæ instar addere lubet nonnulla esse venena, sublimatum nempè corrosivum, cicutam, belladonam, stramonium, aconitum, solanum, &c. quæ paucis abhinc annis in usum medicum trahuntur à nonnullis Medicis primi subsellii, haud sanè improspéro successu: sed nùm hæc remedia, etsi conducibilia, si solertiorum manu pertractentur, omnibus obviis, vel vulgò Medicorum, Chirurgorum & Pharmacopœorum, tutò committi possint? sanioribus politicis examinandum relinquimus.



DE MORBIS INTERNIS CAPITIS.

V E R T I G O.

INTER morbos qui sacram Palladis arcem aggrediuntur, nullus sanè vertigine familiarior. Hic affectus nonnunquam idiopathicus, & signis cerebrum respicientibus stipatus; in plerisque alteriùs agitudinis symptoma audit. Objecta in quibusdam videntur circumvolvi, vel in gyrum verti; in nonnullis murmur insonat auribus, veluti delabentis cum strepitu fluminis; vel tanquam ventus vela percutiens; aut stridor plaustris currentis: in aliis visus obnubilatur; multi verò de utroque phænomeno queruli, pedibus stantes titubant; vel in terram nutantes concidunt, ni sibi caveant. Hinc prodit *vertiginis divisio* in scholis acceptissima, sed à sanioribus practicis posthabita, in gyrosam scilicet, tenebricosam vel caliginosam, & titubantem vel caducam; quæ nil aliud sunt quàm gradus uniùs & ejusdem morbi: miror sanè hisce tribus commentitis speciebus, quartam, nempe soporosam non adjecisse Authores; quâ, sanè haud rarò, ægri sensibus aliquantisper orbantur.

Nemo nescit vertigini *obnoxios* esse hypochondriacos; ad cordis palpitationes & flatulentiam pronos; æquè ac mulieres hystericas & utero gerentes. Ad hanc vergunt litteris addicti, & meditationibus profundis indulgentes; in otio recumbentes, & quorum alvus est adstricta; inædiâ exhausti; non secus ac helluones & viño dediti, qui manè duntaxat & jejuno ventriculo, hoc morbo liberantur. Attingit cælibes & ab omni salacitate planè alienos; nec parcit admissariis, vel qui impuberes veneri petulantiùs se addixerunt. Hanc accersunt profluvia sanguinis immodica, vel consuetorum suppressio; saburræ in ventriculo nidulantes, flatulentia, vermes, &c.; insuper contrahitur à largiori liquorum ardentium potu; à pane loliaceo, à tabaco funali formâ compacto & pro naribus crassiusculè trito; ab ejusdem fumo fistulâ congruâ hausto; ab aëre, vapore carbonum inquinato; ut de lapsu ab alto, de capitis vehemente percussione, insolatione, &c. sileamus. Vertiginem demùm fugacem patiuntur qui diù intentis & fixis oculis quid conspiciunt; qui iram acerbiorē concipiunt; qui in loco præcipiti, ac lubrico versantur; qui in aquarum vortices; vel amnem præcipiti cursu labentem, oculorum aciem defigunt, &c.

Imminentem vertiginem nonnunquam denuntiat dolor capitis gravativus; hæc concomitantur tinnitus aurium, nausæ & vomitus, virium lapsus, &c.

Insultum apoplecticum, imò & epilepticum, brevissimum sanè, haud rarò æmulatur vertigo: tanta prætereà est inter prædictos morbos affinitas, ut sæpiùs in juvenili ætate, vertigo epilepsiæ sit prodromus; atque in senio, affectum soporosum, apoplexiam vel paralysem nonnunquam prænuntiet vertigo idiopathica, vel sedem habens in ipsomet sensorio communi; præsertim si paroxysmi sint longiores & crebriùs recurrant. Addere tamen lubet, ut meticulosorum mentem componamus, inanem sæpiùs terrorem incutere vertigines chronicas & increbrescentes; cùm plures novi ætate provectos qui viginti vel triginta abhinc annis; imò & à pueritiâ, incolumi aliàs sanitate, cum vertigine luctabantur. Quoad vertiginem symptomaticam, vel sympathicam cujus causa alii parti hæret, morbi primarii habenda est ratio ut recta instituaturs *prognosis*: eam verò quæ à causâ fugaci- & facilè amovendâ ortum trahit, ne minimum quidem portendere periculum singulis patet. Aliàs minùs est pertimescenda vertigo quæ corporum circumgyratione se prodit, quàm soporosa, quæ apoplexiam minatur.

Ex *observationibus anatomicis* colligitur cerebrum in suis anfractibus & plicis serosam vel cruentam recondere colluviem: hâc præsertim repletur hic recessus, qui, sub tertii ventriculi titulo, innotescit. Comperiuntur in plerisque hydatides plexui vasculoso, sanguine ut plurimum turgido, adnatæ; quæ nonnunquam humore subnigricante madent. Carotides in quibusdam ossëam duritiem contraxerunt. Tumens & quasi carcinomatosa se præbet glandula pinealis. Passim occurrunt purulentia & putredinis notæ, non solum in ipsâ cerebri compage; sed etiam in ejus involucris. De vermibus, lapidibus, aliisque corporibus extraneis nil addimus; cùm innumeros alios morbos respiciant. Deteguntur in resecato pectore pulmones tuberculosi & putridi; cordis dilataciones, valvulæ concretionibus ossëis vel lapideis impactæ; & coagulationes, ut inquiunt, polyposæ intrâ cordis thalamos, auriculas, majoraque vasa, quasi ad proplasma fictæ; quibus addere licet hydropem pericardii. Abdomen exhibet ventriculum & intestina, quæ morbi mineram sæpiùs recondunt, flatibus turgida, maculis lividis signata, occalescentia, &c. viscera inflammata, obstructa, à nativo colore recedentia, corrupta & diversimodè labefactata; vesiculas feminales ultramodum dilatatas, putridas, aliove vitio tactas, &c.

Ob omni *curatione* abstinere præstat, si vertigo à causâ evidente & fugaci ortum ducat: aliàs tùm in symptomaticâ, tùm in idiopathicâ, ad præsidia medica devenire licet; sed morbi fomite in obscuris sæpiùs latente, ardua & intricatissima est horum administratio; adeò ut à juvenibus & lædentibus ut plurimum dirigatur hæc curatio; ni solâ & congruâ vivendi ratione penitùs absolvatur. Venæ sectio, præsertim saphenæ, juvenibus & plethoricis sæpiùs proficua censetur; ac multò magis si sufflaminentur catamenia vel hæmorrhoides; idem præstant hirudines ano admotæ: aliàs morbum exasperare solet quævis sanguinis detractio. Præsentaneam opem ferunt emetico-cathartica quæ foràs deturbando sordes in stomacho

VERTIGO.

& intestinis retentas morbi fomitem sæpiùs impugnant : haud singulis tamen congruit vomitus : cautèque moveri debet in flatulentis. Ritè depleto stomacho, hujusce organi viribus prospiciendum ; ad quod opus jure deprecantur stomachica ex aromaticorum ; amarificantium & absorbentium classibus deprompta ; quorum usitatoria audiunt acorus, enula campana, cortex peruvianus, gentiana, fumaria, & absinthium ; sal tartari, coralium, &c. Parùm à prædictis discrepant cephalica & antispasmodica, quæ etiam prodesse queunt inculpatò cerebro ; hæc sunt salvia, betonica, melissa, mentha, valeriana sylvestris ; flores tiliæ, calendulæ, lilii convallium ; cinnabaris antimonii, mithridatium, &c. quæ omnia colophonem curationi imponere solent. His obsecundant & fortè palmam præripiunt diluentia ; aqua scilicet simplicissima, vel materiebus vegetabilibus congruis non nihil imprægnata ; serum lactis, aquæ minerales frigidæ & thermæ ; Vallenfes nempè & Sedlicenfes, Bellilucanæ, Plumberianæ, &c. Porro aliquid ferre possunt auxilii millepedes, gummi ammoniacum, martialia, saponacea, aliaque aperientia ; quæ obstructa viscerum abdominalium vasa referando ; frequentiori vertiginis causæ medentur. Nec despicienda sudorifica, antiscorbutica & depurantia, quæ pro re natâ & circumstantiis proficuè adhibentur ; guaiacum præsertim multis profuisse testantur historiæ. Plures demùm vertiginem præcavent tantillum comedendo ; uti pluries in praxi observavi.

Omnia demùm *medicamina*, apoplexiæ & epilepsiæ dicata, congruere videntur vertigini ; haud inconsultò tamen in usum sunt vocanda ; cùm curatio in variis vertiginis speciebus opportuno regimine ; vel uno aut altero cathartico absolvatur. *Paroxysmum* cohibent odor aceti acerrimi, vel diversarum materierum graveolentium ; vapor salium, spirituumque volatiliū ; fumus plumarum & veterum coriorum ; vel injecta enemata stimulantia : nonnullis prodest fumus salviæ & roris marini, fistulâ, ut inquiunt, tabacariâ haustus, &c. Ex observatis constat saluberrimum quandoque fuisse spontaneum muci narium profluvium ; hinc patet cur profine sternutatoria ; egregiamque opem conferant salivantia. Nec exiguam laudem merentur frictus in dorso, vel artubus inferioribus celebrati ; pediluvia, balnea domestica, &c. Caterùm vesicatoria, setacea, & cauteria inter exquisitiora præsidia recensentur ; sed vertiginem duntaxat idiopathicam respiciunt. Symptomata verò aliis telis est impugnanda ; nec hilum proficitur, ni curandi ratio ad primarium morbum dirigatur ; quo noto (sed hoc opus, hic labor est) medicamina in hunc scopum efficaciora è jam traditis eruere licet.



A P O P L E X I A.

APOPLEXIA

UT R O R U M Q U E sensuum, motuumque voluntariorum abolitione, incolumi respiratione, & illibatâ cordis actione, *innotescere* huncce truculentum morbum à multiplici causâ oriundum, neminem fermè latet. Nonnulli hoc subitò perculsi, vel quasi fulmine tacti, sui inscii concidunt; aliàs somni profundi instar invadit, & suos habet prænuntios hic affectus; qui nunc infrequens est, nunc epidemicè grassari videtur. Licèt *apoplexia* suis signis se proferat, & hinc faciliè ab affinibus distinguatur; varii tamen affectus, præceps etiam exitium afferentes, ab incautis vel inexpertis latissimo apoplexiæ vocabulo insigniuntur: quem errorem quotidie prodit *sectio cadaverum*, quâ patent varia cordis, pulmonum, stomachi, &c. vitia, quæ inculpato cerebro promptissimam & inexpectatam necem foveant. Prætereà ad apoplexiam proximè accedunt ultimus vertiginis gradus; nonnulli insultus hypochondriaci & hysterici, affectus comatosi febrium malignarum prodromi, syncope, catarrhus suffocans, &c. porrò pro apoplexiâ sapissimè & perperam habentur effectus commotionis cerebri, insolationis, ingluviei, & ebrietatis; venenorum, fumi carbonum; vel vehementiorum animi pathematum; tum lætitiæ immoderata, tum mœstitiæ & desperationis inexpectata, &c. quæ sunt toridem *causæ mortis subitaneæ*; sed diversa est harum accessionum ratio, quarum antecessus, progressus & exitus, benè perspecti, praxi edoctos ab omni errore vindicant.

Apoplexiæ sanè cognatus videtur vertiginis soporosi paroxysmus; sed brevior, mitiorque censerì debet. Convulsiones sat perspicuæ præeunt, vel sequuntur affectus comatosos, hypochondriacos vel hystericos. Difficiliùs *distinguuntur insultus soporosi*, quibus exordium capiunt quædam febres mali moris, ni præcesserint soliti febris prænuntii; sed ægri temperies, pulsus contractus, & quædam spirandi difficultas, febris ineuntis suspicionem movent; quæ demùm brevi se sistens in propatulo, omne dubium solvit: notare tamen expedit quod invasio illa comatosa & febrilis haud rarò hemiplegiam, genuinum apoplexiæ signum, post se trahat; tam difficile est genuinum *morbi characterem* extricare. Dilucidiùs se profert syncope, pulsu scilicèt obscuro, vel planè deficiente, respiratione vix conspicuâ, fœdo vultûs pallore, &c. A notis antecedentibus, de quibus infrà, distinguì potest catarrhus suffocans ab apoplexiâ; sed sapiùs, ut verum fatear, *Œdipo* opus esset. E relatu demùm adstantium scitur nùm morbus sobolescat à capitis percussione, ab ardore solis, crapulâ, veneno, vapore carbonum, &c. Cæterùm mos invaluit ut hic convulsionum lethalium exitus, vel hæc omnium partium subsidencia quæ in obitum vergit, pro apoplexiâ haberetur: nùm rectè? solertioribus examinandum relinquimus.

APOPLEXIA

Ex infrà tradendis observationibus è *cadaverum acervo* desumptis colligitur *triplicem* esse *apoplexiam*, nempè *sanguineam*, *serosam* & *accidentalem*. *Primam* oriri ab stasi sanguinis in cerebro, tam intrà vasa, quàm extrà sua receptacula pro comperto manet. Huic speciei, cæteris frequentiori, obnoxii censentur plethorici, vel temperie sanguineâ præditi, lautè victitantes & obesi; quorum cervix brevior videtur: hanc accerfunt assuetorum profluviorum sanguineorum cessatio; non secùs ac vehemens ira, aliaque graviora animi pathemata: hanc demùm apoplexiæ speciem caveant à quadragesimo ad sexagesimum ætatis annum, qui quamdam huic proclivitatem à parentibus contraxerunt.

Apoplexia serosa à laticis aquosi, vel pituitosi, stagnatione in variis cerebri recessibus nomen mutuatur; sed hæc eluvies serosa in multis etiam morbis, nullâ accedente apoplexiâ, comperitur; hinc objicere licet merum esse productum morbosum, cujus causâ versatur in atoniâ vel concidentia cerebri. Ad hanc speciem (quam prodit faciei livor, & in quibusdam spuma circà os; ac nonnunquam concomitatur convulsio oculorum, aliarumve partium; licèt respiratio liberiùs exerceatur, quàm sub sanguinea,) proclives existimantur phlegmatico temperamento donati, senio confecti & desipientes; æquè ac in orio recumbentes, cum ingenio tardo: quibus addere licet scorbuticos & arthricos. Hanc etiam inferre queunt somnus ultrà naturæ metas protractus, usus immodicus tabaci naribus excepti; ischuria renalis chronica, veterum ulcerum exsiccatio, sputorum consuetorum suppressio, sudoris pedum retrocessus, &c.

Tertia apoplexiæ species, vel accidentalis, à quâvis alteriùs ordinis compressione cerebri sobolescit; quem effectum exerunt tumores vel abscessus, cujuscumque laticis stagnatio, ossa cranii depressa, vel è propriâ sede dimota, &c. Hanc demùm promovent casus ab alto, vehementiores capitis contusiones, vulnera, &c. Hinc perspicuum fit multùm ab invicem discrepare prædictas apoplexiæ species; quæ licèt inter *rimanda cadavera* luce clariùs pateant, ægrè sapiùs, vel ab exercitatissimis practicis, antè obitum distinguuntur. Itaque haud nisi ab apprimè notis antecedentibus, ætate, temperamento, aliisque circumstantiis, eruere licet horumce morborum, solo exitu consimilium, accurata *diagnosis*.

Inter *apoplexiæ* cujusvis tituli *prodromos* numerantur dolor capitis gravativus, temporum, alterutriusve oculi; vertigines, reminiscentia læsa; membrorum torpor, fletus involuntarii, aurium tinnitus, oris distortio, labiorum tremor, loquela impedita, dentium inter somnum stridor, extremorum frigus, arthritis anomala, &c. Omnium functionum animalium, ac motuum voluntati obsequentium cessationem, remanentibus muniis vitalibus, cujusvis *apoplexiæ characterem* exhibere jam suprà inculcavimus: sed addere juvat quòd, procedente, vel ingravescente morbo, pulsus sensim oblitteretur, & pectoris motus vix percipi valeat; aded ut nonnulli jacentes immortui pro mortuis habeantur; & sepulturæ tradendis, haud citrà piaculum, relinquantur. Hæc sunt *indicia* spectabiliora,

quæ apoplexiam in genere produnt ; sed cuique speciei congrua superest ut tradamus.

APOPLEXIA

Apoplexia sanguinea, quam vernaculo idiomate vocant *coup de sang* ; repente ut plurimum invadit : nonnulli hæc perculsi inter cadendum ejulant. Facies rubore perfunditur ; oculi semi aperti solito splendore destituuntur : respiratio paululum impedita , cum stertore & sibilo sæpius exercetur ; pulsus altus & validus observatur. Paralysis in quibusdam se prodit ineunte morbo ; vel non nisi pluribus elapsis horis , vel diebus , invadit : in variis haud integra fit sensuum abolitio ; adeò ut plures suas cogitationes nutibus exprimere queant ; atque compellati audiant , & alloquentes intueantur. Nonnulli apoplectici mente constant , & se magno morbo corripi subito exclamant ; dum artus & lingua paralyti tentantur. Nonnunquam demùm evenit ut sub apoplexiâ sanguineâ ad lethum properante , dentibus strideant , vel convellantur ægri. Sopor *apoplexiam serosam* plerumque denuntiât ; quâ vigente , facies , venis vix conspicuis , pallore afficitur ; respiratio difficilior evadit , cum roncho vehementiori. Pulsus depressus , inæqualis & intermittens deprehenditur ; nonnulli denique ad obitum vergentes spumas ore agunt. Sed prædictæ notæ in ancipiti versantur , inextricabilesque se proferunt ; si apoplexia utriusque causæ , staseos nempe sanguineæ , & serosæ colluviei , sit particeps ; quod in nonnullis *cadaveribus* compertum fuisse , nullus ambigendi locus. E prægressis erui potest apoplexiæ accidentalis diagnosi ; si à causâ evidente & notissimâ ortum trahat ; sed in obscuris latet , si à tumore , aliove cerebri vitio processerit.

Hæc omnia , intricatiora dum vita agitur , luce clariùs patent post obitum. Itaque *cadavera apoplexiâ sanguineâ raptorum* , priusquam asseri imponantur , multum cruoris ex ore & naribus effundunt : cultro anatomico subiecta exhibent vasa , cerebrum , ejusque involucra irrigantia varicosa & aneurismatica , ultrà modum repleta , & concretionibus , ut inquirunt , polyposis infarcta , plexum choroidem tumentem & varicosum , sæpius laceratum & inanem ; cujus varices magnos uvæ acinos haud rarò æquant ; carotidum & vertebraliū disruptionem ; cruorem extrà vasa emissum , stagnantem in ventriculis , sub meningibus & intrà propriam cerebri substantiam , quæ hinc solvitur , & quâquâ versum dimovetur , ab excavatis cavernis circa medullam oblongatam , cerebellum & medullam spinalem. Sed hæ sanguinis effusiones aliam sæpius , præter plethoram , proficiam ducere infra dicemus. Ingurgitantur etiam in plerisque pulmonum vasa , quæ hinc post interitum disruptionem sæpius patiuntur ; cur fit ut sanguis in multis cadaveribus per os & nares , uti notavimus , profiliat : porrò caput hoc morbo extinctorum suprâ modum sæpius tumet. Reperiuntur in *apoplexiâ serosâ extinctis* cerebrum uvidum & flaccidum , vel in sese collapsum ; ac aquâ obrutum : ventriculi capacissimi sero nunc limpido , nunc cruento turgidi : eadem se præbet colluvies inter utramque meningem : hæc præsertim uberiori proventu colligitur ad basim cranii ;

APOPLEXIA

atque in quibusdam circà medullam spinalem fluctuat. Hæc materia per prædictas partes diffusa nonnunquam visciditatem contrahit, & gelatinæ instar, quæ circà vasa præsertim colligitur & pellucida apparet, se offert. Plexus choroides ut plurimum decolor varias appensas hydatides ostendit, quarum nonnullæ ad avellanæ magnitudinem accedunt: vasa annotantur plus sero & aëre, quàm sanguine turgida; & glandula pituitaria marcida: occurrit demùm in nonnullis, vegetis dùm viverent, temperieque sanguineâ præditis, diluvies, uti jam innuimus, partim aquea, partim sanguinea. In *apoplexiâ accidentali sublati* vitia spectabiliora deprehenduntur, nempe tumores molles vel ossei; abscessus, erosiones, ulcera sinuosa; pus metastasi collectum intrà ventriculos, & putriditates; hydatides & folliculi, ovum gallinaceum nonnunquam æquantes, sero subluteo vel cruore atro & grumoso turgidi; glandula pinealis mole amplissima; varia corpora extranea; ossa depressa, falcis ossificatio; corpus striatum emarcidum; arteriæ carotides & vertebrales osseam duritiem referentes; vasa prætermodum flatulenta; materies nigricans instar fuliginis, circà ambitum cerebri, &c. quibus addere licet stagnationes serosas, sanguineas & purulentas; quæ profapiam habent, à mox adductis causis alienam.

Neminem practicum fugit apoplexiam spontaneo naturæ motu sæpiùs solvi, nunc salivæ fluxu, nunc hæmorrhagiâ; absque aliâ quâcumque notabili evacuatione. Hemiplegia quæ in plerisque apoplexiam pressò pede sequitur, sæpiùs, ingruente apoplexiâ, se prodit; imò & nonnunquam illam antecedit; sed rarò post quartum à primo insultu diem accidit. Haud *mortem minatur* hæc paralyseos species, & plerùmque spontè, vel quocumque medico auxilio evanescit. Secùs evenit de paralyfi universali; quæ omnem curam vincens ægros seriùs ocyùs in orci fauces trahit. Nullam demùm occurrere apoplexiam, quæ quamdam paralyseos speciem haud inferat, nonnulli, inter quos eminent BAGLIVIVS, asserunt; sed refragatur experientia. Pulsus plenus & æqualis, atque respiratio libera, faustum pollicentur exitum: sed quò magis ab statu naturali recedunt cordis & pulmonum munia, *periculosior* censetur apoplexia. Res est etiam periculosa alea, si impediatur deglutitio; si adsit stertor. Lotium ciuentum vel vinosum mortem imminuentem indicant. Ingruens demùm febris, procedente paroxysmo, pro salutari habetur. Omnes rei medicæ scriptores asserunt post HIPPOCRATEM apoplexiam levem curatu difficilem esse; fortem verò planè indomabilem: sed huic aphoristicæ sententiæ etiam reluctatur observatio medica. Ubi tamen in apoplexiâ forti, elapso uno vel altero die, solita præsidia vel exquisitiora nullam opem præstiterunt; ad vespillonem mittere licet. Fatis cedunt apoplectici primo, secundo vel tertio ab insultu die; sed qui septimum diem superant superstites plerùmque evadunt.

Hisce generalibus nonnulla circà *prognosim cujuscumque speciei* addere expedit. Itaque convulsiones sæviente apoplexiâ sanguineâ, mortem instantem indicant; hanc etiam adventantem portendit facies decolor,

livida vel plumbea. Apoplexia serosa, præsertim in senili ætate, nonnullas inducias, plerumque mendaces, impertitur; quæ tamen si ultra octavum diem protrahantur res est in vado: sed ubi paucis elapsis diebus recurrit morbus, cogitandum de exequiis: suffocatio in hâc specie, stertor, oris spuma, sudor frigidus, urinæ & alvi continentia, insultus convulsivi, &c. totidem audiunt symptomata ominosa: insuper hemiplegiæ, oris distortioni, loquelæ impeditæ, &c. vulgò subjiciuntur ægri, qui hanc apoplexiæ speciem evicerunt. Ubi postremò ab stagnatione tum sanguinis, tum feri fovetur alterutra species, quod tamen difficilè præscitur, brevi lustricâ opus erit.

Apoplexiæ cujusvis tituli *curatio* est festinanda; cum maximum sit periculum in morâ: nihilque non movendum ut celeriter superetur morbosus obex, qui aliàs omnem curam vincere solet. Ut ab *apoplexiâ sanguineâ* exordium capiamus; protinùs mittitur sanguis è brachio, pede vel cervice: maximum etiam juvamen præstare valet arteriotomia, quæ, nescio quo fato, jam ferè abiit in desuetudinem: venarum occipitalium sectionem commendat MORGAGNUS; quam olim faustè etiam adhibebat LUSITANUS in casibus desperatis: nùm sanguis feliciùs ex hisce venis mittatur, quàm è cæteris cervicalibus? dubitare licet. Certis tamen cancellis cohiberi debet sanguis detractio, quæ haud ultrà ter, quaterve ad summum celebrari debet, etiam in athleticis; ne calor natus, ad morbi solutionem apprimè necessarius, restinguatur: imò & in plerisque una aut altera venæ sectio præcipuam explet indicationem; quæ eò redit ut præcaveatur vasorum cerebralium disruptio: nec inutilem opem præstant vincula infrà poplites injecta, quorum beneficio sufflaminatus sanguis intrà venas inferiores minori proventu ad cerebrum appellit. Depletis vasis mos invaluit ut ad emeticum properetur; quod tamen haud omnibus congruit, quin potiùs noxam vel mortem, sub hâc apoplexiæ specie, plerumque inferat: sed præmissò cathartico, tutiùs exhibetur vomitorium, si saburra nidulans in stomacho illud suadeat. Post debitas utriusque sortis evacuationes; haud inopportunæ censentur aquæ spirituosæ cephalicæ, & cardiacæ vulgatissimæ; dummodò temperatæ, & pariori dosi, præcipiantur; aliàs cautè cum illis mercari expedit. Pro concessò enim manet, quòd in ipso curationis exordio, eò collimandum sit, ut flexilitas vasis cerebri concilietur: sed contrarium effectum exerere has substantias spirituosas, intùs vel extùs adhibitas, nemo rebus physico medicis edoctus inficias ibit.

Aliter sentiendum de *enematibus stimulantibus*, è vino scilicèt emetico, colocynthide, euphorbio, &c. paratis, quæ revulsionem saluberrimam movere queunt: nonnulli laudant infusum caffè, simili modo usurpatum; sed huicce remedio minime fidendum. Eandem opem præstant *hirudines*, temporibus, ano, &c. impositæ; *vesicatoria*, sinapismi & cucurbitulæ syncipiti, scapulis, coxis, &c. admota; vel ipsummet cauterium

APOPLEXIA

occipiti, vel plantæ pedum, inustum. Nec posthabendi sunt frictus in dorso & artubus inferioribus in eundem scopum celebrati. Jamdudum eviluit, vel ad populum ablegatur animalium viventium sectorum capiti impositorum usus: sexcentis tamen historiis constat illud topicum, dum familiarius usurparetur, plures ab orco revocasse. Fugato demum apoplexiæ insultu, nil non movendum ut declinetur recidiva; cui scopo satisfaciunt congrua victus ratio, corporis exercitationes, tempestivus venæ sectionum & cathartorum usus; aquæ Bellilucanæ, Vicienses, aliæque thermæ, setaceum, fonticulus, &c.

Alius est *apoplexiam serosam curandi ritus*; cum in refarciendas vires converti debeant clinicorum curæ. A venæ sectione nimirum abstinere præstat; quæ tantò est nociva in hæc apoplexiæ specie, quantò proficua in alterâ: quod tamen non impedit quominus à vulgo Medicorum, sub utrâque indiscriminatim adhibeatur; cur fit ut mortem, vel salutem in apoplexiâ, nullo habito discrimine, inferre rectè tradiderit CÆLUS. Nonnulli tamen inter recentiores venam, si vires ferant, semel secare haud renuunt; ut alia remedia suam actionem facilius exerant; vel potius ut vulgi præjudiciis obtemperent. Lethalem tamen esse venæ sectionem, si sensuum & motuum privatio ab ingluvie, quod sæpissimè accidit, ortum mutuetur, omnes pronuntiant. Rectius igitur à vulgiori emetico, & largâ dosi exhibito, auspicatur medela; cui remedio, si obsurdescat stomachus, ad pulverem algaroth devenire licet: hoc enim præsidio non solum foras exturbantur sordes quibus gravatur stomachus; sed tota corporis compages concutitur, & torpidi ut plurimum exsuscitantur spiritus. Emeticorum vires quandoque æmulantur purgantia drastricta: nec exiguam laudem merentur enemata acria suprâ tradita: quibus nil proficientibus injici potest decoctum nicotianæ; cujus dosi pro quocumque enemate à semiunciâ ad drachmas sex contineri debet. Jure etiam deprædicantur cephalica, cardiaca & diaphoretica; infusum nempe melissæ, & menthæ; decoctum cardui benedicti, &c. aqua Regiæ Ungariæ, melissæ composita, imperialis & theriacalis, spiritus succini & salis ammoniaci; guttæ Anglicæ, confectiones cardiacæ officinales, aliæque innumera omnibus affectibus comatosi, & paralyti dicata.

Præstantissima depromuntur præsidia, sub hæc apoplexiæ specie, ex *sternutatoriis*, quorum usitatiora censentur iris florentina, folia nerii, semina sinapi & staphisagriæ, piper, pyrethrum, helleborus albus, euphorbium, aliæque id genus; imò & cantharides, arsenicum, sublimatum corrosivum, in re urgentiori, naribus insufflari queunt. Nil fortè magis confert in hisce angustiis, quàm jacentes omni arte exagitare & vellicare: nonnulli enim, cæteris præsidii deficientibus, rhedâ per vias stratas & asperiores vecti, sanitati restituti sunt. Nonnullos vidi à majori strepitu expergefatos: sonum tympanorum bellicorum, tubarum clangorem, pulverisque pyrii fragorem etiam profuturos crediderim; sed clinicis de famâ

plus æquo sollicitis minime arrident hæc tentamina, quæ haud ritè succedentia à nasutulis lubibrio haberi queunt. Mira demùm præstant cujusvis fortis vellicantia & *stimulantia externa*; aquæ nempè cephalicæ naribus admotæ, spiritus & salia volatilia simili modo usurpata; odor sulphuris accensi; frictus cum panno asperiore, sinapismi, vesicantia, cucurbitulæ scarificatæ, cauterium actuale, &c. Hisce præsidiiis, vel naturæ viribus, sublato morbo, danda est opera ne recurrat: hoc infortunium avertere solent practici diætâ congruâ & variis corporis exercitationibus; usu opportuno cephalicorum, catharticorum, aperientium, diaphoreticorum & salivantium; inter quæ crebro usu recipiuntur salvia, elixirium proprietatis, millepedes, martialia, antihecticum Poterii, antimonium diaphoreticum, tabacum masticatorium, vel ejus fumus fistulâ congruâ haustus. Sed cæteris prophylacticis palmam præripiunt aquæ Bellilucanæ, Plumberianæ, Vicienses, Vervonenses, Borbonienses Arcimbaldicæ, &c. quibus addere licet setaceum & cauterium, quæ fortè ex omnibus antiapoplecticis paria non habent.

Hæc sunt, experientiâ duce, quæ ex *immensâ remediorum*, quibus scatent libri, *farragine* depromere è re nostrâ fore putavimus; quæ, etsi selectiora & magis comprobata, haud nisi summâ cautelâ in usum vocari debent. Millenis enim historiis satis superque constat innumeros apoplecticos solis naturæ viribus; vel tralatitiis, anilibusque præsidiiis, ab omni medico apparatu alienis, evasisse: nùm in hisce casibus salubriora naturæ conamina, à frustraneis vel inopportunitis remediis haud perturbentur? viderint qui abditos naturæ recessus lustrarunt. Sed nil magis me movet quàm apoplexia ingruens post remedia ad illam fugandam efficaciora, & in alium finem usurpata: equidem paucis abhinc annis vidisse memini virum nobilem vegetæ constitutionis, quinquaginta circiter annorum, cui ob febrem, ni fallor, catarrhalem, vena intrâ quatrimum ter secta fuerat, & propinata fuerant, interjecto die, emeticum & catharticum quæ egregiam evacuationem præstiterunt: quibus peractis apoplexiâ lethali postero die, correptus fuit. Quid hinc inferendum virorum probitate & doctrinâ conspiciuorum examini submittimus.



AFFECTUS
SOPOROSI.

AFFECTUS SOPOROSI.

EX omnibus de hoc argumento scriptis, nil fortè præter insulsam nomenclaturam, quam pro arbitrio invertunt Authores, eruere licet: juxtà quam quatuor soporis morborum constituuntur species, nempe carus, coma somnolentum, lethargus & coma vigil. Binæ priorès, pulsu apureto, ut plurimum deprehenduntur; posteriores verò febrem comitem habent, vel pro mero symptomate febrili recipiuntur. *Carus*, qui ad apoplexiam proximè accedit, versatur in somno profundiore quem clamores & strepitus, corporis commotiones, vellicationes & puncturæ vix expugnare queunt. Ubi verò diversimodè lacesciti ægri expergiscuntur, audiunt, percipiuntque quæ secum aguntur; sed brevi in pristinum statum relabuntur, stertore, non secus ac in apoplexiâ, quandoque stipatum. *Coma somnolentum* vocitatur hic sopor profundus, idiopathicus & chronicus qui facilius, si vocè compellantur ægri, discutitur: sed ubi relinquuntur propensione, ad somnum obtemperant. Scitur ad hunc pronos esse senes, qui vel inter garriendum & comedendum inexpugnabili fermè dormiendi necessitate premuntur; ad eandem proclives sunt hypochondriaci, hystericae & catalepticae: hanc accersunt arthritidis retrocessus, hæmorrhoidum, aliorumque spontaneorum profluviorum sufflaminatio, &c. *Lethargus* febre quâ stipatur, vel cujus est symptoma, à duabus prioribus speciebus differt. Hoc correpti vix spontè expergescunt, plerique vigiles desipiunt; alii ita sunt immemores ut inter oscitandum claudendi oris obliviscantur. Supini denique cubant; vel ab aliis in latus conversi, ultrò in dorsum revolvuntur. Inter symptomata febrilia etiam recensetur *coma vigil*, sub quo ægri irritò dormiendi desiderio urgentur; mente capti, & insomnes, etsi oculos claudunt, molestissimâ totius corporis inquiete torquentur. Has postremas species ad febrem pertinentes consultò prætermittimus, ne crambem repetitam apponamus.

Somnolentia idiopathica, de quâ præsertim agendum nobis incumbit, in quam coeunt carus & coma somnolentum, non secus ac apoplexia, à quâ gradu duntaxat differre videtur, triplici innititur causâ, facem præferente *autopsiâ anatomicâ*; sanguineâ nempe, ferosâ & accidentali; de quibus satis superque in præcedenti capite; hinc minime mirum si hæc somnolentia species familiarissimus sit apoplexiæ prodromus; vel etiam intrâ proprios limites subsistens, tremorem capitis, & quamdam debilitatem paralyti finitimam sæpius post se trahat. Hanc cognitionem luculenter demonstrat *sectio cadaverum*; quâ oculis subjiciuntur stases sanguineæ, fluctuationes serosæ, colluvies gelatinosa in anfractibus cerebri & ad spinæ tubum, tumores, aliæque cerebri defædationes, quas exhibent apoplexiâ extincti. Notare tamen expedit rariorem esse sanguinis congestionem;

hinc

hinc patet cur somnolentia, de quâ in præsentiarum, apoplexiam serosam, vel accidentalem crebrò denuntiet. E præhabitis obvium fit haud aliam esse curandi methodum; morbi tamen gradûs accuratâ habitâ ratione: eo pacto his diutiùs immorari superfluum fore judicamus. Iisdem etiam telis soporem febrilem aggredi licet; dummodò omnibus benè perspectis & trutinatis curandi iudicium dirigatur.


Nunc superest ut agamus de aliis *somnolentiæ speciebus accidentalibus*, quæ *ebrietatis* titulo innotescunt; & illæso cerebro foveantur à vino, cerevisiâ, aliisque id genus potulentis fermentatis; à lolio, ab opio, cæterisque narcoticis; à fumo tabaci, ab aquis mineralibus, &c. Harum diversi sunt modi; adeò ut intensiores à genuinâ apoplexiâ vix discrepent: huic errori se obijciunt etiam peritiores, si ægrum curandum suscipiant, priusquam morbi causam evidentem ex adstantibus sciscitentur: plures enim, quorum curæ demandabatur hæc somnolentiæ species, conveniunt pseudo-Medicos, qui genuinum morbi characterem ne quidem subolfaciebant. Hoc soporis genus, licet accidentale, & à nullâ cerebri labe pendeat, haud periculi est expers: maximum terrorem incutit, si apoplexiam accuratè mentiatur; præsertim si præeant paralyfes in palpebris & labiis, capite & brachiis; imaginationes omnis generis tam furibundæ quàm jocosæ; convulsiones in omnibus ferè partibus; amentix pueriles, &c. Minus sanè ominosum censetur, si somni placidi instar se proferat; etsi expergefacti somnulosi haud mente constant, vel furibundi evadunt. Aliàs, in mitiori scilicet gradu de dolore capitis gravativo conqueruntur ægri, inter ambulandum titubant, nil distinctè cernunt, aliena & incondita loquuntur; tremores patiuntur, &c.

Illius soporis speciei curatio simplicioribus peragitur; ni præstet ab illâ planè abstinere. Quoniam in casu graviore saburrâ ut plurimum gravatur stomachus; danda est opera ut cieatur vomitus largo aquæ tepidæ potu; vel pharyngis vellicatione sollicitetur. Quibus tentaminibus haud ritè succedentibus, emeticum propinare fas est: nec posthabenda sunt enemata purgantia; cum maximi tùm sit momenti, ut alvus etiam exoneretur. Expeditis primis viis, nil magis confert quàm aqua nitrosa, vel acidis vegetabilibus imprægnata. Traditur plures ebrios fortè fortunâ in aquam prolapsos, illicò persanatos fuisse; hinc patet quanta foret balneorum frigidorum efficacia. Quoad venæ sectionem, multùm controvertitur apud Medicos; sed hanc maximè reformidandam esse sub *temulentiâ* vulgatissimâ, experienciâ edocti, asserere minime dubitamus: sub aliis verò casibus venam semel secare, si vires ferant, nil fortè impedit.

Coronidis loco addere licet varias prostare historias *somni ad menses vel annos*, cum nonnullis tamen intermissionibus *protracti*, in Commentariis Academiae Regiæ Scientiarum, & Societatis Regiæ Londinensis, in Actis Lipsiensibus, aliisque id genus Collectaneis & Diariis, quorum Auctoribus rara & curiosa, vel à publico rerum ordine aliena, ad rem physicam spectantia, litteris consignare incumbit. Quibus constat hos præternaturales

AFFECTUS
SOPOROSI.

somnos præfidiis adversus apoplexiam potentioribus incassum impugnatos fuisse ; & nonnisi exhaustis medicinæ fontibus totum curationis negotium , ne quid pejus evenisset , naturæ commissum fuisse : adeò ut ejus spontaneâ vi , post absolutum illius stupendæ ægritudinis decursum , expergefacti fuerint dormientes. Haud tamen reticendum quod , inter remedia multigena , quæ ad hunc rarissimum casum adhibita sunt , subitanea in aquam frigidam immersio pluribus optimè cessit ; quod hujusce suprâ laudati auxilii præstantiam ulteriùs arguere videtur.



T R E M O R.

NEMINEM fugit *tremorem* , nunc esse generalem vel omnes partes afflantem ; nunc peculiari parti , capiti scilicet , brachio , cruri , &c. insidentem : sed haud omnibus innotescit hujusce morbi , licet vulgatissimi , genius : quandoquidem *paralyseos* in pletisque sit *particeps* ; in aliis verò merè *convulsivus* audiat ; ac sæpiùs utriusque ægritudinis , *paralyseos* neimpè , & *convulsionis* sit prodromus. *Primæ tremoris speciei* obnoxios esse senes , & à morbo gravi convalescentes , nemini haud notum. Ad eandem vergunt baccho litantes , venerique plus æquo indulgentes : nec immunes sunt qui crebriori caffè haustu , rectè notante BAGLIVIO , delectantur. Hanc demùm accersunt narcotica & venena , hydrargyri , plumbi , aliorumque mineralium perractatio , &c. Promovetur verò *tremor convulsivus* à frigore externo ; à terrore , iracundiâ , aliisque gravioribus animi pathematibus. *Horror* , & præsertim *rigor* , vel totius corporis concussio oculis conspicua ; sub quâ nonnunquam cutis solitum calorem servat ; febrim , aliorumve morborum symptomata , ad hunc pertinent. Frigus tremulum etiam animi pathemata ; purulentia interna ; vermes in intestinis nidulantes ; ischuria renalis , vel vesicalis ; mensium & lochiorum suppressio , &c. Facile *distinguitur* tremor quem fovet partium debilitas , à tremore convulsivo : primus scilicet magis perspicuus fit , vel incrementum sumit , ubi manus onus quoddam sustinet , & planè desinit si brachium suffulciatur : secundus verò à gestato pondere domatur ; sed quieti partis minime cedit. E benè perspectis antecedentibus , symptomatibusque tremorem concomitantibus ; nec non aliis circumstantiis à vivendi normâ , ætate , sexu , &c. eruendis , patet quid de *utriusque speciei eventu* statui potest. Tremorem à debilitate ortum , *paralyseos* prænuntium nonnunquam fuisse jam suprâ inculcavimus : si ad annos protrahatur præcipuè in ætate provectâ , nullam curam admittit ; aliàs in potiori parte periculi expers censetur. Tremoris verò convulsivi , ut plurimum symptomatici diversus est exitus : nec accurata instituitur prognosis ; ni primarii morbi recta habeatur ratio : sed in morbis acutis delirium excipiat , vel à sufflaminatis lochiis sobolescat , exitium portendit.

Pauca eruntur ab *introspectis cadaveribus* circa indolem primæ speciei , atque de hac re observata magis spectant ad morbos succedaneos , vel adventitios , quàm ad ipsum tremorem. Sed plura edocent sectiones eorum qui tremorem convulsivum passi fuerant. Reperitur nempe latex serosus , subviridis , fluctuans circa cerebrum & medullam spinalem : occurrit sanies in ventriculis cerebri ; visendæ se præbent purulentia & putredines , diversas hujusce visceris partes defædantes. Deteguntur etiam vermes in nonnullis ejusdem partis recessibus hospirantes. Vasa insuper sanguine fœculento turgent. Obvius fit lien immensæ molis , & haud rarò quasi cartilagineus. Conspiciuntur vasa bilifera ultrà modum turgida. Passim occurrunt suppurationes , putredines & gangrænæ , in visceribus tùm pectoris , tùm abdominis : uterus præsertim sæpissimè labefactatus deprehenditur.

Primæ tremoris speciei medela vix discrepat ab illâ quæ paralyfim & convulsiones respicit , de quâ suo loco agemus : cur superfluum foret huic diutius inhærare. Solemniora tantummodò & usitatoria , quasi per transennam indigitare haud abs re fore putavimus. Itaque ad hanc speciem , præmissis generalibus , principem locum merentur cephalica & stomachica , è roborantium classe petita ; id genus sunt melissa , stœchas , satùreia , helonium , fœniculum , cortex peruvianus , caryophylli , nux moschata , &c. Pluris etiam habentur martialia ; nec inanem operam ludunt diaphoretica. Sed diluentia , temperantia & demulcentia omnem implent paginam ; si tremor à venere , baccho , &c. ortum mutuetur. Cardiaca , diaphoretica & diuretica conducunt , sub tremore ab hydrargyro. Cæterùm præclara munia obeunt , si tremor sit paralyseos particeps , frictus vulgatissimi ; balnea & irrigationes ab alto cum aquis thermalibus ; Vervonensibus putà , Viciensibus , Dinensibus , Aquis Granensibus , Balneolensibus , & aliis cognatis ; non secùs ac linimenta roborantia , fots & suffitus aromatici , &c.

Tremor convulsivus alia expostulat *præsidia* : nimirùm conducit in nonnullis venæ sectio , si vires & ætas ferant ; præsertim ubi sufflaminatur quodvis sanguinis profluvium. Profunt etiam cathartica , aliaque remedia generalia , in limine cujusvis curationis usurpari solita , ut efficacioribus sternatur via : hæc versantur circa antispasmodica & cephalica , quæ vi quâdam specificâ pollere videntur : proficuè etiam adhibentur roborantia , alexiteria & stomachica , quæ à prioribus parùm discrepant. Ubi verò incusantur vermes , scorbutus , hypochondriasis , hysteris , &c. quid factò opus sit , nemo non videt. Plurimum insuper deprædicatur multiplex aquarum thermalium usus ; nec improbantur balnea frigida. Juvamen sæpiùs præstant frictus : nec inutilem opem conferunt setaceum & fonticulus ; licet inter obsoleta inameritò referantur. Præcavetur postremò rigor febrilis largo aquæ tepidæ haustu paucis horis ante paroxysmum exhibitæ. De tremore ab irâ , timore vel terrore ; aliisque causis fugacibus nil addimus.

PARALYSIS

P A R A L Y S I S.

IN sensûs & motûs , alterutriusve defectu versari paralysem , cui proximè accedunt debilitas & stupor partium , nemini haud obvium. *Universalis* audit , si omnes partes infrâ caput positas ingruat : ubi verò dimidiam , nunc dextram , nunc sinistram corporis partem occupat , *hemiplegia* vocitatur. Si demùm hanc vel illam partem ; brachium nempe , crus , palpebras , linguam , pharyngem , penem , vesicam , anum , &c. seorsim invadat , paralyseos *particularis* nomine venit ; de quâ passim sub aliis titulis agemus. In nonnullis impeditur lingua , vigentibus sensibus internis , adeò ut nutibus respondere cogantur. Alii mente minime constant , & motibus etiam convulsivis agitantur ; quod phænomenon morbi complicati suspensionem movet. Haud obscura sanè est huiusce morbi genesis , si ritè perspiciatur quid emergat à vi externâ nervos comprimente. A torpore etiam quem infert , vel à longinquo , tactus hic singularis piscis , quem vocant torpedinem (*la torpille*) , plura circa ejusdem indolem eruere licet.

Paralysis , rarè morbus primarius , apoplexiam plerumque *sequitur* : illam etiam post se trahunt epilepsia , aliique affectus spasmodici ; nephritis acerbior , colicus dolor acutissimus , dysenteria torminosa ; ac demùm arthritis & rheumatismus. Huic *obnoxii* sunt senes , hypochondriaci , scorbutici & syphilitici ; ac demùm scrophulosi. Hanc caveant plethorici , non secùs ac hi quorum vires ab immodicis sanguinis profluviiis , vel à periculantiore venere sunt exhaustæ. Hanc promovent diuturnior vel immodicus caffèi usus ; vinum liberaliùs sumptum vel lithargyro adulteratum , inconsultus narcoticorum usus , aër halitibus metallicis inquinatus , effluvia mercurialia , brumale frigus , &c. Natales quandoque sumere à vulneribus , luxationibus & fracturis nemo nescit. Postremò hunc morbum sæpiùs contrahunt infantes ab eruptionum cutanearum retrocessu ; à præposterâ variolarum & morbillorum medelâ , &c. Notare expedit quod paralysis ab scorbuto , hypochondriaci , affectibusque spasmodicis orta sola motuum organa illæso sensu afficere soleat.

Hemiplegia , quæ nullo prodromo sæpiùs invadit , & inter varias species frequentior audit , oculum , os & linguam in consensum trahit ; atque cum ægris utplurimùm senescit , dummodò sensorium commune ab omni læsione vindicetur. *Paralysis universalis* plerosque brevi è medio tollit ; sed si ultrâ mensem producat chronicon classem subit. Benè *ominandum* in quâvis specie , ubi membra resoluta tremore , pruritu , formicatione , vel dolore corripuntur. Felicem etiam eventum hariolari licet , si febris inter paralysem , apoplexiæ serosæ succedaneam , incandescat ; ni morbus tamen sit extrâ curationis metam. Paralysis , quæ motum

duntaxat impedit, minùs periculosa cenfetur, curatuque facilior evadit. Major falutis fpes affulget, fi paralyfis cujufcumque ordinis nullo prævio cerebri affectu invaferit. Sudor ingens morbum folvit vel infanabilem reddit. Paralyfis, quæ comitem habet atrophiam vel frigiditatem, pro immedicabili habetur. Convulfiones in paralyticis, præfertim in latere oppofito, morbo & vitæ imponunt finem. Ubi membra refoluta œdemate corripuntur; gangræna imminet: idem infortunium minatur paralyfis à frigore contracta. Si jam femel fugatus morbus denuò recurrat, res eft periculofæ aleæ; rarò enim numerantur tres accessiones. *Stupor* fub hypochondriafî & hysteri, nil mali portendit; fed lethale audit fymptoma in febribus acutis. Si poftremò anus & vefica refolutione tententur, mors præforibus imminet.

PARALYSIS

Paralyfis, non fecùs ac apoplexia, *fæpiùs fponrà definit*; & hic felix exitus ad remedia quæcumque priùs ufurpata, etfi fæpiùs futilia, tribui folet. Proftant hiftoriæ variorum paralyticorum qui, poft diuturniorem & inefficacem medicationem, ab irâ vehementiori, à terrore, aliove graviore animi pathemate, illicò fanitati præter omnium expectationem reftituti funt. Refert VALERIOLA fe vidiffe quemdam paralyticum Arelatensem multis abhinc annis lecto affixum, in tantum terrorem incidiffe ab inexpectato propriarum ædium incendio, ut fuæ debilitatis quafi oblitus, è lecto cum impetu ejulans profliegerit, & feftinanter vicinos in fubfidium vocaverit; adeò ut à flammarum periculo, & à morbo fimul evaferit. Haud minùs mirum quod narrat BARTHOLINUS, circà mutum, à quâdam mulierculâ quam antehàc odio profequebatur, ludibrio habitum, qui irâ percitus, vires colligendo, loquelam adinvenit, & invifam conviciis profcindere potuit. Nec defunt aliæ hiftoriæ paralyticorum qui pro ingenti timore, vel quodam acri defiderio, artuum ufum recuperarunt.

De variis cerebri læfionibus apoplexiam & paralyfim refpicientibus & inter *rimanda cadavera* obviis, jam fuprà actum fuit. Recenfitis addere licet vulgatiſſimas eſſe poſt paralyſim ſtagnationes ſeroſas, vel gelatinofas; tùm inter meninges, tùm in cerebri anfractibus; tùm circà medullam ſpinalem. Crebrò etiam occurrunt purulentix, eroſiones, & putredines in diverſis cerebri partibus; ſed imprimis in corporibus ſtriatis; quæ aliàs minùs firma occurrunt, inſtar amurcæ diſcolorata, ſtriis ferè oblitteratis. Serum æruginoſum & quafi vitriolicum, viciniora erodens, nonnunquam reconduunt ventriculi. Annotatur in plexu choroïde aggeries hydatidum ad phaſeoli magnitudinem accedentium. Reperiuntur in medullâ oblongatâ, haud rarò flavâ flaccidâ & ſemiputridâ, folliculi ad ovum columbinum accedentes, & aquam turbidam continentes. In quodam latebat tuberculum fabæ magnitudine circà corpora ſtriata. In plerisque glandula pinealis occurrit fabuloſa. Notandum ergà læſiones alterutrum cerebri lateris occupantes quod ſitum præfertim habeant in latere paralyſi oppoſito; ob fibrarum cerebri medullarium decuſſationem, pluriès in Actis pariſienſibus celebratam: haud tamen hanc perpetuam eſſe legem docent ſecta cadavera.

PARALYSIS

Medulla spinalis nunc marcessit ; nunc parùm abest quin in putrilaginem abeat. Theca vertebrarum sæpiùs sero plena occurrit , cerebro planè sicco. In nonnullis annotantur vertebræ à genuinâ sede remotæ ; connexiones ossium calvariæ laxiores , &c. Insuper observantur in abdomine vasa bilifera ultrà modum turgida ; viscera diversimodè labefactata , &c.

In immensum cresceret pagina , si omnia *remedia* quæ adversùs paraly-
sim proponuntur hùc attexerem ; cur ea duntaxat quæ à sanioribus prac-
ticis usurpari solent , vel à propriâ praxi confirmata , pro instituto , re-
censere animus est. Ut à venæ sectione exordium capiamus ; inutilem
vel noxiam fore , si paralyxis à colluvie ferosâ ortum ducat , è præhabitis
jure infertur ; aliter se res habet , ubi à causâ sanguineâ procedit ; dum-
modò tamen morbus haud jam annosus evaserit. Nec in usum trahi debet
illud præsidium , nisi priùs probè attendatur ad ætatem , vires & præ-
gressa. Proficuè adhibentur emetica , ubi nulla staseos sanguinis intrà vasa
cerebri est suspicio ; aliàs angue pejus fugienda. Turior est in utroque casu
catharticum usus ; sed longè salubrior , si insimulerur serosa colluvies.
Plurimùm præsertim conferunt evacuantia per alvum in paralyxi scorbu-
ticâ ; æquè ac in aliâ specie quæ à colicâ natales sumit , &c. Enemata
demùm acria , stimulantia & aromatica , perquàm utilia , generalium
agmen claudunt.

Inter opportuniora præsidia , primarium locum tenent *roborantia* & *ce-
phalica* ; salvia nimirum , stœchas , melissa , camphorata , baccæ juniperi ,
succinum , &c. Ageratum seu eupatorium Mesues , instar the , cerebro &
nervis prodesse experientiâ constat ; ut nil addam de celebratissimâ radice
ginzeng. Haud exiguam laudem merentur sudorifica ; interque usitiora
audiunt guaiacum , & antimonium diaphoreticum. Profunt etiam ape-
rientia ; martialia scilicet , aloëtica & mercurialia. Nec posthabenda sunt
antiscorbutica. Colocynthis à decimâ parte grani ad sextam , mira præstat ,
teste BOERHAAVIO , in languidis nervorum morbis. Cæteris postremò re-
mediis palmam sanè præripiunt aquæ minerales calidæ , vel ore sumptæ ;
vel sub balnei , & irrigationis ab alto spinam respicientis , formâ usurpatæ ;
in quarum censum veniunt Borbonienses Anselmenses , vel Arcimbal-
dicæ , Vicienses , Vervonenses , Montis aurei , Bellilucanæ , Plumbe-
rienses , Dinienfes , Granenses , Bagnerienses , Baregienses , &c. His adde
quòd Borbonienses Anselmenses , in paralyxi scorbuticâ , cæteris præcel-
lere vulgò feratur. Paralyxis verò , vel hemiplegia intermittens febrium
congenerum curam sibi vindicat.

Summè deprædicantur , nec immeritò , pelles animalium recèns macta-
torum parti affectæ admotæ ; vel ipsamet *animalia viventia secta* , prius-
quam calore nativo orbentur. Opportunè usurpantur linimenta è petro-
leo , oleo laurino & formicarum ; ex unguento martiato , aliisque id genus
roborantibus parata. Laudantur frictus sicci , vel cum spiritu vini cam-
phorato , alterove liquore spirituofo , celebrati : commendantur suffitus ,
fotus & balnea ex aromaticis parata , sudatoria ; urticationes , vel

Flagellationes partium paralyticarum cum urticis; sinapismi & vesicatoria; quibus subjungere juvat setaceum, & cauteria. Si deficient thermæ naturales; parari queunt artificiales, cum libris quatuor calcis vivæ & libris duabus sulphuris, coctis in sufficienti aquæ fontanæ quantitate. Plurimum demum prodest balneum arenæ solis radiis imprægnatæ, idem præstare queunt vinacea: folia demum ebulli furno excalefacta, quibus obvolvuntur ægri, sudorem saluberrimum elicere valent. Nec silentio prætermittendum, quod pars affecta, inter usum prædictorum remediorum, pellibus vulpinis, leporinis, aliisque consimilibus probè muniri debeat. Nonnullos ultimò ab admotâ machinâ electricâ curatos fuisse multiplici experientiâ constare videtur: sed pluribus minime successisse hanc periclitationem pro comperto habemus.

PARALYSIS

MENTIS ET MEMORIÆ SEGNITIES.

ARDUUM fanè quidem opus aggredimur de mentis læsionibus dicturi; cum ægrè intelligatur quomodò ab affecto corpore mens laboret. Ab alio tamen fonte nusquam pati debent mentis errores, annuentibus physico-metaphysicis, qui in eâ versantur opinione quod nihil utilius & magis proficuum censeretur debeat ad sui ipsius cognitionem, quàm accuratè perpendere quid enti immateriali sit tribuendum; quid corpori sit concedendum; ne alterutrius vires, genuinâ posthabitâ causâ, ab inani eruantur hypothesi. Undenam stupenda ingeniorum discrimina, & diversa hominum propensio, cæteris paribus, ad virtutes & vitia? illud fanè intactum prætermisit moralium scientia, nec dilucidius extricavit philosophia; quidquid adhibuerint solertiæ Authores ad enucleanda virtutum & vitiorum semina. Neminem latet tot fermè esse ingeniorum modos, quot sunt homines: viri sub hoc conspectu multum discrepant à feminis: integræ nationes, aliis ingenio præstant: de moribus idem esto judicium; si historicis & peregrinantibus sit fides. Hæc omnia, nemini haud obvia, discrimina ad diversam mentis humanæ indolem referre absurdum, imò & impium foret; cum ejus suprema genesis omnem innatæ labis amoveat suspicionem. Feliciùs illud extricatur phænomenum, si illius ratio in causâ merè physicâ, medentium indagini submissa, inquiretur. His obiter notatis, è diverticulo ad propositum redimus.

Morosis & obliviscentia à senectute, vel à quâdam cerebri constitutione hereditariâ, nullâ arte domari patiuntur; nec inter ægritudines recensentur; proindè huc minime spectant. Sed aliter se res habet, si ab aliâ causâ sobolescant *ingenii tarditas* & oblivio; ab apoplexiâ nempe; à cerebri commotione post ictum vel casum ab alto, à colluvie ferossâ, &c. Hæc etiam accersere valent infortunia, terror subitaneus, mœrorque

MENTIS
ET
MEMORIÆ
SEGNITIES.

acerbissimus ; non secus ac diuturnæ comestationes , & castra veneris. Mentem nonnunquam obtenebrat somnus ultrâ naturæ metas protractus , vel abusus narcoticorum : eundem effectum sæpius exerunt prægressi graviores morbi , è quibus nonnulli convalescentes planè obliviosi , vel sui nominis haud recordantur. Profluvia insuper immodica , cujusvis sint fortis similem sensorio communi labem inferre queunt. Porro onanismus , ad quem pueri sunt proclives , nonnunquam imaginationem & memoriam lædit. Haud absimile periculum incurrunt , qui præmaturo ingenio plus æquo obtemperantes , intempestivo labori vel studiis intensis indulgent ; atque à severioribus cogitationibus se retrahi minime patiuntur ; adeò ut haud rarò eveniat , ut qui in juvenili ætate ingenio , & mentis acie nulli secundi judicabantur , sensim exhaustis judicii & imaginationis viribus , hebetes & stolidi evadant. Nonnulli ex adverso videntur infantes ingenio tardo , vel inepti , qui processu temporis , mentis torporem discutiunt ; adeò ut nullis parcentes laboribus , non solùm ingeniosi & memores ; sed etiam ad peritissimorum & facundissimorum gradum devehantur. Hunc felicem eventum nonnunquam promovent morbi gravissimi ; lapsus ab alto , aliaque accidentia , quæ sub aliis circumstantiis contrarium effectum nonnunquam exeruerunt.

Has judicii & reminiscentiæ læsiones à parentibus contractas , vel extremam senectutem concomitantes , planè *immedicabiles* esse , jam suprà innuimus. Si memoria , nullâ præviâ causâ manifestâ , deficiat ; apoplexiam esse in procinctu ; vel paralysem imminere jure conjicitur ; sed notissima sunt præsidia prophylactica , quibus utrumque fatum avertere licet. Si hebetudo & memoriæ lapsus , à venere & baccho , vel ab usu narcoticorum , originem ducant ; contrariâ vivendi normâ , nonnullis pro re natâ in subsidium vocatis præsidiis , facile evincuntur ; secus evenit si sint apoplexiæ soboles ; vel commotionis cerebri effectus. Sed mentis obnubilatio & oblivio , post perpeßum graviolem morbum accidentes , spontè ut plurimum , vel congruo regimine desinunt. Mentis demùm imbecillitas à pravo corporis habitu ægrè impugnatur , ni primarii morbi habeatur ratio.

Sc̃ta cadavera ostendunt cerebrum nunc uvidum , flaccidum & depressum ; nunc siccum ; vel tantâ ariditate donatum , ut nonnunquam ad friabilitatem accedat : aliàs densum & contractum ob serosæ colluviei molem , quæ non modò varias intercapedines replet ; sed etiam circà visceris ambitum fluctuat , quem etiam obducit materia crassa & gelatinosa. Præterea conspiciuntur diversa tumorum genera , abscessus & hydatides ; lapides , aliave corpora extranea. Traditur glandulam pinealem in quibusdam planè defecisse ; quæ in nonnullis ingens deprehendebatur. Dura meninx , nunc ad livorem vergens , nunc tuberculis obsita , putrida , dilacerata deprehenditur. Quibus addere licet insolitam cranii crassitiem , aliamque ossium vel connexionum pravam constitutionem.

Utramque cerebri læsionem rarò *curationem* admittere è præhabitis facile colligitur ;

colligitur : hinc minime mirum si plerumque inefficacia sint, vel exquisitiora medicamina : si quid conferre nonnunquam videantur ; id minùs auxiliis medicis, quàm tempori, rectæ victûs rationi, somnoque breviori tribuendum. Quod ad infantes spectat ; profunt præcipuè parentum vel magistrorum curæ, qui opus plusquam herculeum aggredi haud gravantur ; & præceptis nitidè expositis, mentem in obscuris latentem evolvere & componere queunt. Nil tamen impedit quominùs, ubi quædam curationis spes affulget, in subsidium vocentur, præmissis generalibus, cephalica & antispasmodica ; inter quæ selectiora audiunt flores stœchados, tilia, primula veris, & lilii convallium ; pœonia, valeriana, zedoaria & calamus aromaticus ; cubebæ, macis, caryophylli, &c. De viribus cephalicis ambræ cineritiæ & moschi, dubitare licet ; cùm experienciâ constet plures ad morosum & obliviscentiam nullo modo proclives in utrumque morbum ab eorum immodico usu incidisse. Spiritus succinatus salis ammoniaci ad guttas decem, serò & manè exhibitus à practicis prioris subfelli commendatur. Quoddam insuper ferre queunt auxilium sternutatoria, masticatoria, aliaque evacuantia hydragoga. Postremò hæc decantata præsidia nullam opem præstare videntur, ni obtemperent morbi indoles & œconomia animalis vires ; quibus reluctantibus incassum adhibentur, vel vitio vertuntur,

MENTIS
SEGNITIES.

P E R V I G I L I U M.

SOMNI consueti defectus, ad quem proximè, uti suprà notavimus, accedit, coma vigil, rarò morbus per se, vel essentialis audit ; sed alios ut plurimum tùm acutos, tùm chronicos concomitatur ; hæc paucis perstringere expedit. Somnum arcent graves curæ & sollicitudines : *noctes insomnes* trahunt melancholici & imprimis maniacy : de somno interrupto conqueruntur macilenti, biliosi, fevioribus cogitationibus intenti ; vel ærumnosi, qui etiam inter dormiendum insomniis molestissimis anguntur. In otio demùm recumbentes, vel diutiùs quàm par est lecto affixi noctes inquietas sæpiùs traducunt. Insuper notissimus est *consensus inter cerebrum & stomachum* ; cur minime mirum, si quævis hujusce postremi læsio, vel molestia, quieti nocturnæ officiat. Hoc incommodum incurrunt nonnulli juvenes à fame ; cur fit ut non nisi post largam cœnam placidè dormiant : contrarium fanè evenit in plerisque adultis, & præsertim senibus, quorum stomachus ab ingestis inter dormiendum gravatur ; hinc minime mirum, si post pastum sæpiùs expergesiant, vel ob imminentem incubum, difficilemque decubitus è lecto se proripere cogantur. Cur necesse est ut sanitati consulentes à cœnâ planè abstineant. Nonnullorum somnum fugat haustus caffè ; dùm aliis, vel cubitus ituris, tutò porrigitur. Alios innu-

PERVIGI-
LIUM.

meros diversos, vel contrarios effectus ab unâ & eâdem causâ, ratione variarum circumstantiarum, oriundos consultò prætermittimus.

Quid sit *pertimescendum* à diuturniori pervigilio nemo non videt: notare tamen expedit quòd hanc molestiam cæteris faciliùs ferant melancholici & maniaci, qui plures menses vel annum integrum planè insomnes sine noxâ transigere queunt: de vigiliis innoxiiis decem, viginti & triginta annorum, mentio subjicitur apud Authores, penès quos sit fides: aliter se res habet sub vigiliis febrilibus, quæ delirium prænuntiant, & vitæ sæpiùs insidiantur. Pauca depromuntur ex observationibus anatomicis: verumtamen annotantur in potiori *cadaverum* parte stagnationes ferossæ, tum in cranii pyxide, tum in vertebrarum thecâ: mirari profectò subit simile quid observari in ægritudine planè contrariâ; post scilicèt soporosos affectus. Cæterùm deteguntur abscessus in propriâ cerebri compage; phlogoses in ejus involucris, caries in ossibus cranii, &c. Reperiuntur etiam purulentia & putredines, aliæque defædationes in hepate, pancreate, aliisque abdominis visceribus; quæ, ut verum fatear, minùs ad pervigilium, quàm ad varios affectus, quorum est symptoma, pertinere videntur.

Nonnulli de noctibus insomnibus queruli *levamen* experiuntur, si haud ultrà sex aut septem horas lecto se contineant. Pluribus prodest, horâ somni, largus haustus aquæ simplicissimæ, vel succo limonum, feminibusve frigidis imprægnatæ: proficuè etiam adhibentur statò tempore syrupus violarum, nymphaeæ, &c. De balneorum efficaciam nullum est dubium. Omnem insuper implent paginam diluentia, *refrigerantia* & *demulcentia*, quæ spirituum fervorem reprimere, sanguinisque impetum retundere valent: hunc effectum etiam præstare valet venæ sectio, suum symbolum conferentibus cæteris remediis generalibus. Haud minorem opem ferunt obambulationes, equitationes, aliæque corporis exercitationes in loco aprico, vel aëre nullis halitibus inquinato. Nec desunt qui lecti, cunarum instar, jactatu somnum alliciunt. Insuper conferunt legitimus animi & corporis deliciarum usus, concentus musici, aquarumque fluentium strepitus; nec despicienda anagnostæ vox composita; quid enim valeant ad promovendum somnum piæ conciones nemo non expertus fuit. Quibus haud ritè succedentibus ad *anodyna* confugere expedit; in quorum censum veniunt nitrum, camphora, pulvis temperans, & liquor anodynus mineralis; quæ etiam in morbis acutis præscribi solent: sed his antecellunt narcotica quæ promptiùs humorum, spirituumque ferociam coërcent, insomnesque suavissimâ animi lætitiâ perfundunt: quæ tamen cum cautelâ; nec diutiùs quàm par est, exhiberi debent; quod altâ mente teneant ægrorum querulis plus æquo auscultantes. Postremò pediluvium cum aquâ tepidâ sincerâ, vel coctione anodynorum imprægnatâ, pluribus, etiam vigente febre, optimè cessit. Addere licet priusquàm manum è tabulâ amoveamus, parùm profutura hæc præsidia, si pervigilium alterius morbi sit symptoma; aliam tum ineundam esse medendi viam obvium fit.

I N C U B U S.

INCUBUS.

INTER somnum *ingruens* hoc morbi genus, (*le Cochemar*) *affectibus convulsivis* cognatum esse credere par est. Conqueruntur ægri de quodam onere pectori incumbente, quo intercipitur respiratio, cum imminente, ut ipsis dormientibus videtur, suffocatione. Plures loquuntur de phantasmatibus horribicis quibuscum luctantur; quæ pectori incumbencia, vocis iter clamitare cupientibus præcludunt; quibus tanto terrore concitantur ægri, ut subito cum inordinato cordis motu expergiscantur; atque à molestissimo somno, & à morbi insultu liberantur; quo fugato defessi aliquandiu perstant, non secus ac post affectus convulsivos. Stomachus ingestis à vespertinâ crapulâ turgidus incubum sæpius promovet; hinc fit ut lautè victitantes & voraces huic morbo sint obnoxii: ad eundem etiam proclives censentur plethorici, hypochondriaci & hysterici: nec parcat infantibus, præsertim vermibus, vel hydrocephalo laborantibus; si pavores, uti nonnulli autumant, ab eâdem causâ processerint; quod peritioribus examinandum relinquimus. His addere licet ferociorem, ac nonnunquam lethalem, incubi insultum parum discrepare à catarrho suffocante; ni sit unus & idem morbus.

Incubus infrequens, & intrâ certos limites subsistens, *periculi exfors* censetur, sed vehemens, crebròque recurrens epilepsiam in nonnullis juvenibus *prænuntiat*; vel apoplexiam in ætate provectâ minatur: imò & fertur quandoque fuisse maniaæ prodromum, *Incubus* tamen vehemens, sub quâvis ætate, subito enecare potest; narrat CÆLIUS AURELIANUS hunc morbum fuisse olim Romæ epidemicum, & pestis instar summam stragem edidisse. Nil effatu dignum è *cadaveribus evisceratis* colligitur; si excipias colluviem ferosam, & purulentiam in cerebro nonnunquam repertas; quæ nec ad causam morbi, nec ad ipsius productum spectare videntur. De ingenti cordis mole mentio etiam subijcitur.

In congruâ victûs ratione versatur præcipuus *curationis* cardo; ac sæpius nil aliud opus est factu. Potiori ægrotantium parti prodest supinus decubitus; nonnullos tamen vidi qui paroxysmum declinabant in alterutrum latus cubando. Sed nil magis præstat, quàm vacuo ventriculo, vel post absolutam digestionem, ad quietem se componere. Quoad præsidia medica; opportunè celebratur venæ sectio, si nil obstat, & adsint nonnulla plethoræ signa: sed primis viis, ubi latet morbi fomes, præsertim prospiciendum; ideò præsentaneam opem ferunt cathartica; imò & emetica, quæ imminuentem accessionem procul dubio tollunt. Ubi inculpatur humorum crasis, suas laudes merentur diluentia, temperantia, vel blandè aperientia; inter quæ primatum ducunt aquæ minérales tùm frigidae, tùm thermales; martialia, tartarus vitriolatus, &c. Ubi pravæ digestionis occurrunt indicia,

INCUBUS.

expeditis primis viis , faustè usurpari solent stomachica ex absorbentibus , amaris & roborantibus petita ; corallum nempe & conchæ præparatæ ; fumaria , gentiana , cortex peruvianus & aloë ; salvia , melissa , &c. Agmen claudunt cephalica & antispasmodica , si de læsione cerebri quædam emergat suspicio ; id genus sunt stœchas , rosmarinus , betonica , pæonia , succinum , castoreum , &c. sed haud inconsultò exhiberi debent hæc præsidia , rarò uti jam innuimus , necessaria : ac præsertim vetatur horum incondita farrago.

MELANCHOLIA.

NOTISSIMUS est hic *affectus temperamento cognomini finitimus* , & ab illo vix discrepans , ni certum gradum assequatur. Somnum ægrè capiunt melancholici , insomniisque molestissimis conflictantur. Proclives ad vertiginem de impeditis cerebri functionibus conqueruntur. Nonnulli aurium tinnitu & dolore capitis gravativo torquentur : in quibusdam se proferunt tremores , convulsiones , vel affectus soporosi. Inter familiarissima symptomata numerantur anxietates , cordis palpitationes & pectoris constrictiones , cum sputo crassiori. Pulsus exiguus , inæqualis & intermit- tens deprehenditur : se sistunt pulsationes in abdomine ex aortâ , cœliacâ vel mesentericâ superiore , oriundæ : crebrò erumpunt ructus acidi , alteriusve naturæ ; tyrannidemque exercet flatulentia , quâ venter sæpiùs inflatur. A colluvie acidâ in stomacho nonnullorum melancholicorum nidulante ; emergit fames quædam spuria , & quasi inexplibilis. Matulam sæpiùs petunt melancholici ; urinasque profundunt limpidas & subalbicantes : sed rarò stimulantur ad secessum. Intereâ mœrore obruuntur : quidam mortis formidine premuntur , alii cum oculis cavis , tædio vel integrâ animi objectione pertæsi rebus humanis vale supremum dicere ambiunt. Plerique hominum congressus fugiunt ; ludos & spectacula averfantur , nec quod aliis volupe est sapiunt. Eorum demùm mens obnubilatur : à causâ sæpiùs levissimâ summo , ob meticulosam mentis depressionem , terrore percutiuntur , vel à dubio nuntio toti contremiscunt : falsa rerum simulacra se objiciunt ; nunc illacrymant , nunc risu ilia dissolvunt ; vel planè delirant. Notare tamen expedit quòd hæc mentis ludibria circà unum duntaxat vel alterum objectum plerumque versentur ; ægréque ab hac præconceptâ opinione , de aliis rebus rectè judicantes , dimoventur , ni astutiâ animo excurtiatur : alii enim se vasa esse figulina putant , & timent ne aliorum occurfu frangantur : alii se mortuos esse arbitrantur : & sic innumeris modis desipiunt.

De alio *delirio melancholico* mentionem subjiciunt Authores , quo tacti tenebras persequantur ; latebras quærunt ; vitamque inter feras degere cupiunt ; & idèò seriùs ocyùs è domo se proripiunt ; locaque deserta &

falebroſa, luporum inſtar, adeunt; noctuque vagantur; hinc *lycanthropia* audit hicce morbus. Alii ſollicitudinibus confecti & vitam quaſi moleſtè ferentes, licèt à fugâ planè alieni, locum tamen mutare avent; perpetuòque nituntur in vetitum. Sunt è contrà qui otio recumbentes, è domo vel conclavi egredi planè negant; atque tantâ ſegnitiè, vel animi abjectione urgentur, ut de rebus humanis parùm curantes, hebetes, vel tanquàm ſtipites jaceant. Poſtremò inter varias melancholiæ ſpecies numerari ſolet *Noſtalgia*, vulgò *la maladie du pays*, quâ affecti patriam inviſendi deſiderio flagrant; quod tamen ſæpiùs rationi conſonum exiſtimamus: patriâ enim, vel parentibus orbat, mœrore corripuntur, languent, debilitantur, lentè febricitant; anorexiâ laborant, & ſenſim abſumuntur.

Melancholiam præcipuam ſedem habere in cerebro & nervis, nulli dubitamus; nec refragatur clar. LORRY qui exquisitiſſimum de hâc re conſcripſit tractatum: ſed de aliâ ſpecie, nimirum humorali, quæ parùm, ni fallor, diſcrepat ab hypochondriaſi, mentionem ſubjecit erudiſſimus Author, per quem jamdiù obſoletæ reviviſcunt veterum opiniones. Melancholia, ut in orbitam revertamus, à parentibus in prolem tranſmitti ſolet; ſed nonnunquam adventitia à *cauſâ evidente* ortum mutuâtur; ab amoris ſcilicèt æſtu, à mœrore & triftitiâ, aliſque ingratis animi affectibus haud rarò exſurgit: ſub quo rerum ſtatu de cordis conſtrictione queri ſolent ægri, ſcrobiculum cordis oſtendentes; undè emerſit ſuſpicio hunc morbum ſedem habere in oſtio ſuperiori ventriculi, annuente clar. REGA. Hanc promovent ſuppreſſæ hæmorrhoides, aliique innumeri ſubſiſtentes vel prægreſſi morbi. Inſuper affectus hypochondriaci & hyſterici, de quibus ſuo loco, melancholiam plerumque comitem habent: ſed à verî tramite recedunt, qui arbitrantur hoſce morbos ab invicem non diſcrepare; quandoquidem occurrunt hypochondriaci, à melancholiâ planè expertes, imò ad hilaritatem compoſiti; non ſecùs ac melancholici, ab hypochondriaſi immunes: ſed ut verum fateamur, ſeriùs ocyùs in plerisque cœunt prædicti affectus. His addere licet melancholiam nonnunquam ſolvi ab erumpentibus hæmorrhoidibus, ab efflorefcente ſcabie, aliſque morbis cutaneis: nec ſuis defraudantur viribus adverſus hunc morbum pertinaciſſimum vulnera; ſi variis hitoriis ſit fides. Sed rarus eſt hic fauſtus exitus, extrâ quem vix ſubit ſanitatis ſpes; quin potiùs *diuturnus hic morbus* & ad certum gradum provectus, ſcorbutum, phthiſim, febrem hecticam, maraſmum, &c. poſt ſe trahat.

Pauca depromuntur ex *obſervationibus anatomicis*, licèt numeroſiſſimis; cùm vix pateat, nùm melancholiæ, vel hypochondriaſi, quas pro uno eodemque morbo habuerunt plerique Authores, ſint referendæ. Ut de hâc re certiora tradamus, ſcire expedit quòd, remotâ cranii abſide, obviâ ſiunt vaſa circâ cerebrum reptantia ſanguine craſſiori & ſubatro turgida; colluvies ſeroſa in omnibus prædicti viſceris reſſibus, plexus choroides quodam muco obductus; glandula pinealis in majorem molem accreta, &c.

MELAN-
CHOLIA.

MELAN-
CHOLIA.

Cor in quibusdam planè vacuum repertum fuit ; in aliis se obtulit concre-
tionibus , ut inquiunt , polyposis refertum , vel sanguine faculento &
fluido repletum. Abdominis vitia , suprâ tradita , dum de hypochondriaci ,
consultò missa facimus , ne crambem repetitam apponamus.

Immedicabilem plerumque esse hunc affectum jam notavimus : imò &
crebrò evenit ut ægri plus æquo remediis confidentes in pejus ruant ; ne-
dùm ipsis leventur : ideò cautè præscribi debent , & non nisi à juvantibus
& non lædentibus dirigi debet *curatio*. Prodest venæ sectio , si incusetur
plethora vel cujusvis fluxûs sanguinei sufflaminatio ; aliàs iners vel noxia ,
quidquid in contrarium adducant Authores , censerî debet. Saluberrima
audiunt præsidia , emetica & cathartica , ubi sordes in primis viis nidu-
lant ; aliàs futilem operam ludunt. Sed sibi paria non habent humectantia ,
diluentia & temperantia ; inter quæ miris laudibus effertur aqua simpli-
cissima , quæ largâ manu propinata cæteris præcellere videtur : in hunc cen-
sum veniunt cichorium , fumaria , lapathum , &c. lac asininum vel capri-
num , serum lactis ; aquæ minerales frigida , &c. quibus præmissis proficuè
adhiberi queunt aperientia è nitrosis & martialibus petita ; non secùs ac
antiscorbutica ; ubi de affectu cognomini nonnulla emergit suspicio. Qui-
busdam profunt aromatica , quæ in cephalicorum & stomachicorum classi
recipiuntur ; id genus sunt melissa , botrys , cerefolium , semen anisi ; cho-
colatum , extractum juniperi , electuarius de baccis lauri , mithrida-
tium , &c. Inducias impertiuntur antispasmodica : inter quæ usitatiora sunt
flores tilia , aurantium & stœchados ; crocus , camphora , castoreum , &c.
Juvamen præstare videntur narcotica ; sed haud reticendum quod ab eorum
intempestivo usu haud sopiantur melancholici ; quin potiùs magis turben-
tur , & morbus , ut plurimùm , pertinacior evadat ; ideò cum illis cautè
mercari expedit. Pluris habentur balnea & enemata refrigerantia ; sed ut
omnia in unum contraham , nil fortè efficacius reperitur quàm proba vi-
vendi ratio : omnem scilicèt mœrorem excutiant melancholici ; confabu-
lationibus , deambulatione , equitatione , itineratione , &c. animum ad
hilaritatem componant ; & post congruum pastum curis & negotiis valedi-
cant ; donec prima eduliorum elaboratio in stomacho absoluta fuerit. Quod
ad *nostalgiam* attinet ; si ægri patriam exuere planè negent , & omnibus
rationum momentis obsurdescant ; danda est opera ut ad lares nullâ morâ
properent ; nec alia est curandi methodus.



M A N I A.

MANIA.

NEMO nescit maniacos firmioribus viribus pollere, famem & vigiliis facillimè ferre; & ad venerem esse procliviores. Melancholiam ad certum gradum provectam mania esse cognatam jam suprà notavimus; adeò ut ab unâ & eâdem causâ utrumque morbum sæpiùs promoveri confectarium sit. Varios subit gradus hic affectus, à primâ scilicèt illâ desipientiâ, vel mentis imbecillitate ad furorem quem nec verbera, nec compedes, nec fames vincere valent. Nonnulli nec feroces, nec queruli, solâ ratione carent: non desunt qui lucidis gaudent intervallis. In plerisque vires corporeæ adaugentur, etiam sub pravo & tenui victu; adeò ut robori musculari addi videatur quod intellectui demitur: sed omnes insaniendi formas persequi arduum & inutile. Vehementiora animi pathemata, insolens scilicèt gaudium, amoris æstus, mœror & tristitia, adversa, studia intensa; meditationes profundiores, cum hâc perspicaciâ, vel quodam ingenii acumine, quod vocant *bel esprit*, hæreditaria demùm pronitas, *insaniam minantur*. Nec tamen immunes cenferi debent ingenio tardi & stolidi, qui ad amentiam sæpiùs vergunt. Præterea hæmorrhoidum & mensium suppressio; affectus hystericus vel hypochondriacus, phrenitis, insultus comatosi, alique graviores morbi stultitiam inferre queunt; quæ aliàs nonnunquam pendet à systemate nervoso ventriculi, quod notante BOERHAAVIO plerique agri accusant: ut sileamus de amentia senili planè immedicabili.

Hic morbus recens & remittens, à morbo acuto, aliâve causâ fugaci contractus, *secundis avibus sæpiùs judicatur*: sed ubi inveterascit & à causâ stabili fovetur, omnibus denegatis induciis, *domari recusat*. Ab erumpentibus varicibus, ab uberrimo mensium & hæmorrhoidum, post quamdam suppressionem, proventu, aliove sanguinis inassueto profluvio; à diarrhœâ naturæ limites prætergrediente, à dysenteria sævissimâ, aliâve immodicâ evacuatione, nonnulli desipientes sanitati restituti sunt. Eundem effectum præstârunt febris quartana, cæteræque intermittentes; quibus tamen sub aliis circumstantiis, nonnulli antea mentis compotes in maniam delapsi sunt. Si demùm spontaneo naturæ motu, vel cõpportunis remediis discutiat hic morbus, mortalium superbiam deprimens; hujusce turpitudinis haud immemores, ex hoc convalescentes tantâ tristitiâ obruuntur, ut in publicum prodire vereantur, & perpetuo recidivæ metu torqueantur. De delirio à venenis, de quibus suprà, nil addimus.

Cadavera stultorum *cultro anatomico* subjecta exhibent cerebrum firmius & aridum; ejus compagem elasticam; vix pyxide osseâ coërcendam; vasaque sanguifera latice nigerrimo infarcta; & cerebellum molle. In quibusdam serosa colluviës omnes recessus cerebri implet; & hydatides,

MANIA.

nunc solitaria, nunc acervatim aggestæ, plexui choroïdi varicoso, & nonnunquam skirrholoso, adnatæ, conspiciuntur. In aliis dura meninx, suis vasis vix conspicuis, crassa & callosa, vel exiguis tuberculis albicantibus obfusa, nonnunquam observatur. Osseam duritiem contrahit processus falciformis; & cerebellum consimili seimento munitum in suo antro delitescit; nec ab hacce labe immunes sunt ceteræ meningum partes. Vermes haud rarò recondunt sinus frontales; nec ipsimet cerebri substantiæ parcunt hæc fœda animalcula. Ossa demùm cranii, cujus oblitterantur connexiones, insolitam crassitiem præ se ferunt. Insuper vesicula fellea bile glutinosâ & atro viridi turget. Ceteras verò viscerum læsiones quas memorant scriptores, recensere, haud è re nostrâ fore putavimus.

Curatio, uti neminem latet, à venæ sectionibus est auspicanda; ut inanitis vasis obsequiosiora fiant sensationum organa, & hinc compescatur efferus spirituum motus: sanguis videlicet educitur è brachio, pede & cervice. Decantatissima erat apud Veteres *arteriotomia*, quæ etsi à nostris coætaneis posthabita, plures tamen maniacos fausto beavit eventu: circa quam obiter notandum, haud minorem laudem mereri adversus phrenesim, cephalalgiam atrocissimam, ophthalmiam pertinaciorē, &c. Nemo nescit arterias temporales ob subjacentia ossa huic sectioni aptiores esse. Sanguis etiam educitur è venis frontis, podicis, &c. ope hirudinum solitâ arte admovendarum. Nil postremò non movendum, ut cohibitus fluxus hæmorrhoidalis, vel menstrualis in integrum restituatur. Pluris habentur emetico-cathartica, si bilis æstuans & nidulans in propriis receptaculis, vel primis viis, uti crebrò accidit, incusetur. Suum symbolum etiam conferunt, sub eodem conspectu, enemata purgantia & stimulantia. Depletis vasis, & expeditis primis viis, præstò sunt humectantia, diluentia & temperantia; refrigerantia & nitrosa; aqua scilicet affatim hausta, vel gelidissima; aquæ minerales frigida; cichorium, borrago, & fumaria; oryza, hordeum, & semina frigida; lac, serum lactis, &c. quibus sensim reprimatur ferus spirituum impetus.

Rarò profutura sunt narcotica, opiata nempe & papaverina; quin potiùs morbum sapiùs exasperent: sed eorum vices supplere valent alterius fortis sedantia & anodyna; flores nempe nymphae, violarum, &c. Haud exiguan laudem meretur camphora, quam in re urgentiori ad semidrachmam, semel aut bis in die, exhibere licet. Sunt qui saccharum saturni à granis duobus ad octo, pro furore extremo compescendo suadent: sed à saniori clinicorum parte improbatum illud remedium: cæterum suppetias quandoque ferunt antispasmodica suprâ laudata. Quòd ad *helleborum* olim celebratissimum spectat; scire expedit hancce radicem, quæ sub hoc titulo venalis prostat, solertiorum examini subjectam, vel ad quamdam stirpem quam christophorianam vocitant pertinere; vel ex helleboro nigro, herbâ indigenâ & vulgatissimâ, depromi; non verò à genuino helleboro HIPPOCRATIS, amplissimo folio, caule præalto & flore purpurascēte; plantâ exoticâ & orientali, quæ haud multis abhinc annis in curiosorum hortis

hortis colitur : hinc è remediorum antimaniacorum censu expungendum esse hunc pseudo-helleborum officinalem facile colligitur. Haud tamen efficaciorum fore verum helleborum , licèt apud Veteres decantatissimum , variis rationum momentis adductus , facile crediderim.

Inter præstantiora auxilia , ut in orbitam revertamus , recensentur *balnea frigida* : non modò totum corpus , collo tenùs in aquam mergitur ; sed etiam caput per vices irroratur , & hoc est balneatorum munus : nec inutilem opem præstant semicupia , paratu facilia. A nonnullis etiam laudatur repentina & inexpectata immersio in aquam maris ; uti mos est in hydrophobiâ. Pluribus profuisse castrationem traditur. Quibusdam optimè cessit cranii perterebratio : nec despiciendum cauterium occipiti inustum , &c. Nonnunquam evenit , ut irritis omnibus hisce præsiidiis , à summo terrore , lapsu ab alto , aliove adverso casu , præter omnium expectationem sanitati restituti fuerint maniaci. Nec merè curiosa sunt hæc phænomena à publico rerum ordine aliena ; cùm ex illis benè perspectis & trutinatis curandi iudicium dirigere queant solertiores ; qui scilicèt praxi edocti à tritâ viâ recedere minime detrectant.

MANIA.

P H R E N E S I S.

HACTENUS de insipientiâ apurerâ actum fuit ; nunc expedit , ut ad *delirium febre stipatum* deveniamus. Hoc duplicis esse sortis docet praxis ; scilicèt morbus , ut inquiunt , per se censetur , & febrem comitem habet ; nunc cujusvis febris symptoma audit : ad neutram tamen speciem pertinere huncce morbum implicitum exsurgentem è delirio melancholico aut maniaco , & quâcumque febre adventitiâ , nemini haud obvium. His præmissis circâ hæc discrimina , ab Authoribus perfunctoriè tradita , de genuinâ phrenitide agendum nobis incumbit : quo nomine insigniri debet illud *delirium idiopathicum* vel essentialiale quod febrem acutam excitat : delirium verò febrile dicitur mentis alienatio , si febris sit primarius morbus. Sed harumce ægritudinum species diversis gradibus & implicationibus confines , ità sæpiùs invicem nectuntur , ut *diagnosis* summis difficultatibus prematur ; & vix constet de morbi indole.

Phrenitis vera & legitima , rarior ac vulgò fertur , prænuntiari solet æstu & dolore atrociori capitis quem ægri ad interiora haud perperam referunt ; faciei & oculorum rubore , pervigilio , &c. Intereà exsurgit febris , nunc levis , nunc intensa ; nec semper morbi impetui consona , adeò ut solâ diurnitate discrepare videatur hoc delirii genus à maniâ , quam contumaciorem esse nemo nescit. *Delirium* verò *febrile* , vel symptomaticum præviæ feбри appenditur , solosque febricitantes adoritur ; cur minime mirum si hoc sedato perstet febris , solitamque periodum absolvat. Aliter se res habet sub phrenitide ; si enim resipiscant ægri , illicò , uti pluries in praxi

PHRENESES.

observari, sanitati restituuntur; si excipias virium debilitatem quâ aliquandiu tenentur hoc gravissimo morbo convalescentes.

Haud silentio prætermittendum aliud esse delirium symptomaticum, *paraphrenitidem* nempe, clinicis rarissimè occurrentem; quam ad morbos capitis inconsultò referunt scriptores Medici; cum hic morbus ratione partis affectæ nullo modo discrepet à pleuritide simili delirio stipatâ, & uterque in pleuram irruat; cum hoc tamen discrimine, ut pleuritis membranam cognominem costas succingentem invadat, & paraphrenitis sedem habeat in illâ pleuræ propagine concameratum diaphragma suprà vestiente. Paraphrenitidem de quâ Authores, alii aliorum vestigiis instantes, mentionem amplam subjecerunt, haud me observasse memini; & bis tantum, ni fallor, in *extispiciis cadaverum*, inter innumera quæ secunda curavi, oculis visenda se præbuit vera pleuritis; quæ tamen apud pseudo-Medicos vel imperitos pro frequentissimâ habetur. Notandum postremò incumbit pleuræ tum pectoris latera, tum diaphragma obvestientis phlogosin haud semper delirium adjunctum habere, uti patet è traditâ cadaverum historiâ.

Delirium melancholicum à prægressis gravioribus morbis, ab affectu hypochondriaco & hysterico, à sollicitudinibus, &c. prosapiam ducere jam suprà inculcavimus. *Delirium* verò *febrile* febres continuas & intermittentes cujusvis fortis sæpiùs concomitatur: hoc prænuntiant vigilæ, cephalalgia acerbissimâ; oculi flammei & truces, fletus sine causâ manifestâ, inquietudines vel insolens animi fiducia: promovetur à sufflaminatis evacuationibus; ab erysipelatis, alteriusve cutis efflorescentiæ recessu, phlogosi internâ, &c. *Phrenitis legitima*, quæ intrâ aliquot dies continetur, & rarò ad octavum protelatur, juvenes, vegetiores vel athleticos, biliosos & iracundos, opiparè viventes & poculis indulgentes invadere solet: hanc pariunt dapes salitæ vel piperatæ, liquores ardentes bibonibus gratissimi, insolatio, capitis contusiones, &c.

Rarò in obitum vergit desipientia melancholica: agros in vitæ discrimen trahit delirium febrile, præsertim si febres biliosas & inflammatorias, variolas & morbillos, ileum, aliumve morbum fonticum, concomitetur. *Phrenitis morbus calamitosus* audit, qui scilicet tertio, quartove ab insultu die agros è medio tollit. Tremor, hæc procedente, & convulsiones; bilis æruginosæ vomitus, sitis defectus, lotium suppressum vel subalbicans, &c. funeris metum incutiunt. Faustum econtrâ exitum pollicentur dolores trunci & artuum, hæmorrhagiæ, fluxus hæmorrhoidalis, varicum eruptio, alvi profluvium, sudores, &c. Si demùm sublatâ febre persistat delirium essentialiale vel symptomaticum, in desipientiam melancholicam, vel manicam, & nonnunquam in affectum soporosum facessit.

Extrâ oleas evagaret si quidquid in *exenteratis cadaveribus* post morbos acutos vel chronicos delirio stipatos huc attexerem. Eas duntaxat læsiones in cerebro detectas, quæ magis ad phrenitidem pertinere videntur, è re nostrâ fore putavimus, quæ sic se habent. Referato capite, conspiciuntur

vasa, quæ per cerebrum, ejusque involucra, nonnunquam crassa & corrugata, disseminantur, plus æquo turgida & varicosa in plexu choroïde: sinus duræ meningis concretionibus polyposis turgentes. Deteguntur farcoses, aliique tumores: occurrunt vermes in variis ejusdem visceris partibus hospitantes. Serosa colluvies, in plerisque, omnes cerebri recessus implet, vel inter meninges effusa deprehenditur. Haud rarò occurrit humor gelatinosus circa tenuis meningis vasa. Cerebrum densum, aridum & firmitus, phlogosi, non secus ac meninges, correptum, purulentiâ vel gangrænâ defœdatum sæpius annotatur. Easdem læsiones quandoque exhibet medulla spinalis; similibusque vitiis contaminantur alterutrius partis involucra; præter quæ, dura meninx tuberculis obsita deprehenditur: ac postremò hujusce membranæ processus, sepimentorum munia gerentes, haud rarò osseam duritiem assequuntur. His addere licet quod hepar, vicinioreque partes nonnunquam phlogosi corripiantur; bilisque receptacula sæpius turgent cum flavedine ictericâ totius corporis; & sanguis omnium vasorum fluidus reperiatur; ut de aliis pectoris & abdominis vitiis, à nostro proposito alienis, fileamus.

De *medelâ* delirii febrilis, vel symptomatici, suprà actum fuit: sed præhabitis addere licet quòd haud leve emergat dubium circa venæ sectionum efficaciam, ab omnibus fermè scriptoribus celebratam; quin potiùs pluriès mihi observasse contigit quòd à misso sanguine, dùm viget delirium, fatum acceleretur; præsertim si sub primis diebus jam pluriès secta fuerit vena, & morbus etiam adoleverit: scitur prætereà, post WILLISII, FLOYERI, aliorumque haud infimi subsellii Authorum observationes, delirium à balneo frigido sæpius fugari, imò & morbum solvi: nùm illud phænomenum phlebotomiæ inertiam arguat? solertioribus examinandum relinquimus. Quod spectat *ad phrenitidem*, quantocyùs celebrari debent venæ sectiones; nec fallit sub hoc casu vulgatissima indicatio: commendatur præsertim sanguinis missio è saphenâ: aliis tamen antecellere jugularium sectionem propriâ experientiâ pluriès didici: nonnullis tandem optimè cessit ipsamet arteriotomia. Probè depletis vasis conferunt emetica & cathartica: suas laudes etiam merentur enemata purgantia prioribus succedanea: à quibus peractis, haud rarò clauditur curatio. Insuper propinanda veniunt per totum morbi curriculum, diluentia, demulcentia, & temperantia; aqua nempè oryzæ & pulli, serum lactis, emulsiones, decoctum cichorei & borraginis, aliaque consimilia, quibus occurritur fibrarum rigiditati. Inter anodyna jure decantantur nitrum, & cremor tartari; camphora & sal sedativum, quæ lascivientes spiritus egregiè compescunt: sed rarò proficiunt narcotica; quin potiùs, æquè ac in delirio febrili, morbum exasperare soleant.

Haud despicienda remedia externa, inter quæ utilia admodum censentur aqua frigida, vel gelidissima, acetum, nitrum, camphora, &c. Egregium etiam effectum præstant, præmissis præmittendis, sinapismi, vesicatoria, & cucurbitulæ, artubus inferioribus admota. Pluris habentur

PHRENESIS.

hirudines, vasis hæmorrhoidalibus impostæ, si fluxus cognominis cohibeatur: sub aliis circumstantiis fronti & temporibus admoveri solent; atque inter remedia efficaciora jure numerantur. Pediluvium postremò tepidum multis optimè cessit.



CONVULSIONES.

RITÈ *distingui debet mera convulsio, à motu convulsivo*; sub illâ scilicet partes rigidæ & immobiles perstant, in hâc membra diversimodè concutiuntur, atque jactatione, plus minùs violentâ, agitantur. Insuper mentis operationes liberè ut plurimum exercentur in convulsione; ac planè deficiunt in motibus convulsivis: respiratio in utroque affectu rarè læditur: sed pulsus sæpiùs obscurus, & quandoque febrilis, deprehenditur. Nemo nescit hosce morbos vel generales; vel hanc, illamve partem respicientes, nunc fugaces, nunc diuturnos esse; adeò ut de eorum studio rarè quid certi proferre liceat. Quibusdam periodis nonnunquam continentur; vel statis temporibus febrium intermittentium more recurrunt: huncce typum sæpiùs præ se ferre convulsiones hystericas neminem practicum latet. Varia sortitur nomina convulsio, ratione partis cui insidet: si musculi, utrimque commissuris labiorum implantati, convellantur, emergit *spasmus cynicus* vel *risus sardonius*: ubi alterutrum latus duntaxat afficitur, *tortura oris* audit, quam etiam in paralyti suboriri cuivis anatomico obvium. *Trismus* est convulsio maxillæ inferioris, feminis præsertim hystericis & infantibus recens natis familiaris. Convulsio in dorsum ingruens *tetanos* dicitur; sub quâ specie maxillæ inferioris musculi primò lædi solent; dein morbus transmittitur in musculos cervicis, dorsi & lumborum; hinc corpus rigidum in neutram partem flecti potest; pharynx convellitur; adeò ut fiat deglutiendorum reditus per nares. Nonnulli acerbissimis dorsi doloribus torquentur; vigiliis pertinacibus, imò & delirio plectuntur. Si soli musculi flectentes afficiantur, *emprosthotonos* vocitatur morbus: *opisthotonos* verò dicitur, si antagonistæ spasmò corripiantur: sed de hâc Græcâ nomenclaturâ à Veteribus, qui nescio quo pruritu fingendi nomina laborarunt, excultâ, & in Scholis celebratâ parùm curant clinici, qui rectam medendi normam apprimè callent; dummodò genuina indoles morbi, in quâcumque parte sedem habeat, ipsis innotescat.

Præter has *differentias*, alii occurrunt morbi convulsivi; epilepsia nempe, incubus, asthma & tussis ejusdem commatis; cordis palpitatio; sternutatio, strabismus, singultus, priapismus, &c. de quibus suo loco.

Ad eundem censum etiam referri queunt *oscitatio* & *pandiculatio*, quæ in symptomatum agmine locum habent. Alia est convulsione species ab Scriptoribus celebratissima, quam *catalepsiam* vocant, de quâ variæ

traduntur fabulæ; quæ nil aliud est quàm quidam convulsione gradus quo membra flexiliora impertitum situm retinent: hypochondriasis vel hysteris speciem præ se fert hic affectus; nec aliâ curandi methodo expugnari solet: è traditis enim historiis liquidò constat *catalepsiam* natales sumpsisse è profundioribus & religiosis meditationibus; ab improbo litterarum studio, aliisque gravioribus animi pathematibus. Subitò ingruere solet hæc rara convulsione species; & ægrum, uti fertur, vigilantem, loquentem, stantem, decumbentem, scribentem, &c. In eodem statu immotum servat: adde quòd nonnulli, sub hâc rerum conditione, vident & audiunt; sed nec loqui, nec palpebras movere queunt. Huc etiam spectat *chorea sancti Viti*, *la danse de St. Guy*, quâ pueros puellasque à decimo ætatis anno ad pubertatem invadere solet; quâ correpti manus in eodem situ continere nequeunt, vel horæ momento; ac stultè quasi saltant; inconditisque singulorum artuum motibus detorquentur. Nec parit hic morbus ætate majoribus; & ipsismet mulieribus quæ ad templum sancti Viti, in Circulo Sueviæ, juxta Ulman concurrunt, circà festum mense Maio celebratum; quæ scilicet saltu se exercent nocte dieque cum mentis perturbatione; donec extaticorum instar corruant. Epidemicè quasi grassabantur inter utriusque sexûs juvenes, pseudo-convulsiones epilepticæ in quodam nosocomio Harlemiano: cum post frustrâ tentata omnia, vel eximia præsidia, accersitur BOERHAAVIUS, qui à solâ læsâ imaginatione oriri hunc truculentum affectum jure suspicabatur: ideò palam & coram omnibus proponit cauterium ferro candente brachio altè inustum; quo remedio perterriti ad huncce morbum proclives, non ampliùs epilepsiâ laborarunt. Puella septennis epilepsiâ, uti omnibus videbatur, in nosocomio Monspe-liensi, laborabat: dolum subolfaciens clar. SAUVAGES usum verberum præscripsit; quo audito, sanata est. Morbus ni fallor affinis, haud multis abhinc annis quasi grassabatur, & in propatulo erat Parisiis; nec fortè desisset, ni Rex Christianissimus lymphatæ ægrotantium menti severâ lege consulisset. Haud absimili fortè morbo teneri *pseudo-damonicos*, avis nimium credulis fucum facientes, credere par est.

Convulsionibus correpti, quoad potiore partem, nec loqui, nec moveri valent: plures in coma somnolentum, quod nonnunquam ad mensem & ultrâ protelatur, incidunt; nonnulli etsi immobiles jacent, omnia cernunt, audiunt, intelligunt; quorum sublato morbo nitidè recordantur. Aliter se rem habere in *motibus convulsivis* suprâ declaravimus, quibus afflicti omni ut plurimum sensu orbantur. Utriusque fortis *insultus convulsivus*, truncum & artus plerumque obsidentes, *prænuntiant* vertigines, aurium tinnitus, oscitationes, pandiculationes, tremores, dolores in hanc vel illam partem impacti; cordis palpitationes & pulsus inordinatus; anxietates, cardialgiæ & nausæ: nonnulli imminente paroxysmo, de quâdam pedum fornicatione conqueruntur; alii auram, ut inquiunt, frigidam perferunt in coxide, vel extremis artubus, quæ per dorsum, ut ipsis videtur, serpens caput imperit. Postremò hypochondriorum inflatio,

CONVULSIONES.

ani spasmodica constrictio, cervicis vesicæ præclusio, &c. inter hujusce morbi prodromos etiam numerantur. Ægri insuper, vieto insultu, quasi ingenti labore fracti remanent: nonnulli animo loquuntur; alii torpore afficiuntur, vel somnolenti evadunt: morbus demùm inter clamores & ejulatus sæpè solvitur. His addere licet quòd quidam *vigente paroxysmo* priapismum patiuntur, qui etiam ab obitu non domatur.

Nemini parcent morbi convulsivi; sed sequiorem sexum & infantes ad hosce affectus *proniores* esse nemo nescit. Hos promovent hysteris & hypochondriasis, amoris æstus & lubricitas, terror & iracundia, cæteraque graviora animi pathemata. Erumpentibus catameniis haud rarò sæviunt, & ab harum suppressione; non secùs ac à partu difficili & abortu etiam *sobolescunt*. Convulsiones accersere valent emetica & purgantia drastica; toxica diversæ naturæ, vinum lithargyro adulteratum, &c. Natales ducunt ab ischuriâ, feminis sufflamine, sudore cohibito ab asperrimo frigore, efflorescentiarum cutanearum regressu, & arthritide repulsâ. Concitantur ab inediâ insolitâ, & ab evacuationibus immodicis. Has infligunt febres mali moris; materia æruginosa os ventriculi mordicans; vermes in primis viis nidulantes; morsus & punctura animalium venenatorum, &c. Quibus addere licet vulnera, luxationes & fracturæ; ac uno verbo quidquid nervos, membranis prospicientes, laceffit & vellicat: cur minime mirum, si crebrò ingruant à testium vulnere, à curatione scilicet chirurgicâ sarcoces, vel à castratione; quæ gangrænâ internarum partium, autopsiâ judice, accersere valet.

Convulsiones faciliùs ferre infantes, quàm adultos; & mulieres, quàm viros neminem practicum fugit. Has quandoque solvunt hæmorrhagiæ, urinæ largum profluvium, vermium dejectio, vomitus spontaneus, &c. *Luctuosa* audiunt, si ab inediâ & exhaustis viribus processerint; si nulla annotetur remissio nec intermissio. Omnes asserunt Authores, duce HIPPOCRATE, tetano correptos post superatum quartum diem incolumes evasisse: nonnullos tamen vidisse memini qui duodecimo vel quintodecimo morbi die occubuerunt. Traditur quoque post divinum, ut inquiunt, senem, febrem sub convulsionibus invadentem auspicatissimam esse, cui effato etiam refragatur experientia. Utriusque ordinis morbi convulsivi haud rarò faceffunt in epilepsiam, æquè ac in apoplexiam & paralyfim, quæ in proyeçtâ ætate *exitium portendunt*. Convulsiones erumpentibus variolis, vel ineuntibus aliis morbis acutis, minùs ominosæ à clinicis censentur. Calamitosæ audiunt, si immodicas evacuationes excipiant; cùm multiplici experienciâ constet periculosiores esse ab inanitione quàm à repletionem. Nec feliciorem eventum hariolari licet à convulsionibus nonnullarum partium: pro exitiali nimirum habetur, præsertim in infantibus, oculorum convulsio: in obitum vergit spasmus cynicus, morbus aliàs rarissimus: sed nil plerumque demit sanitati tortura oris. Quid minetur subsultus tendinum, vigente febre, suprâ declaravimus. Convulsiones in plerisque varias remissiones & intermissiones subeunt: ratione causæ, nunc fugaces, nunc

contumacissimæ observantur ; nonnunquam enim intrâ paucas horas continentur, aliàs ad menses & annos protelantur. Coronidis loco addere juvat morbos convulsivos minùs esse pertimescendos in morbis acutis, quàm sub cæteris ; & periculo planè vacare affectiones illas chronicas quibus oēs vel palpebræ sæpiùs detorquentur, & vultus indecorè componitur. Idem arbitrandum de hisce assuetis partium jectigationibus, fremitibus, &c. quæ inter morbos non transcribuntur.

E traditis convulsionum causis evidentibus colligitur numerosissimas esse *observationes anatomicas* ; adeò ut in immensum cresceret pagina, si omnia de hâc re prolata, licèt contracta, in medium adducerem ; quapropter cerebri duntaxat & medullæ spinalis læsiones recensere animus est. Capite igitur aperto, vasa cerebri infarcta, & nonnunquam disrupta, cum stagnante cruore conspiciuntur : patent meninges phlogosi vel purulentiâ tactæ, quæ aliàs osseam duritiem in quibusdam contraxerunt ; rariùs deteguntur vermes sub cranio delitescentes : occurrit materia gelatinosa circà ambitum cerebri ; non secùs ac colluvies serosa circà cerebrum & medullam spinalem fluctuans, ac varios recessus replens : deteguntur in quibusdam tumores varias cerebri partes obsidentes ; plexus choroïdeus skirrhosus vel putris : glandula pinealis ingens. In conspectum venit cerebrum purulentiâ & putredine sæpiùs defœdatum ; sed rariùs aridum & siccum deprehenditur. Iisdem vitiis submittitur medulla spinalis ; sed hîc frequentiores sunt stagnationes serosæ inter bina ejus involucria : & vertebræ nonnunquam reperiuntur carie affectæ. Notandum incumbit medullam vertebralem solum esse partem læsam, incolumi cerebro, sub convulsionibus quæ functionibus animalibus, & loquelæ organis parcunt. Inter aliarum partium læsiones familiariùs annotantur suppuratio diaphragmatis ; corruptela omenti, partiumque vicinarum ; calculi renales, cruditates acidæ in stômacho & duodeno latitantes ; lumbrici in tubo intestinali flatribus turgente hospitantes, &c. Notare expedit trisimum vel convulsionem maxillæ, sub tetano, nonnunquam post mortem permanere usque ad triiduum : priapismum etiam in cadaveribus sæpiùs observari jam suprà innuimus : sed quid magis stupendum detegitur ; ossium nempe luxationes & fracturæ, quæ ferociorum sanè succussionum effectus exhibent. Post demùm convulsiones febriles nil præter paululum feri reperitur in cerebro. Frustrà etiam quæritur causa morbi in capite post convulsiones quæ fiunt per consensum.

Quod ad *curationem* spectat ; supervacanea ut plurimùm vel noxia fore venæ sectiones & emetica, à vulgo Medicorum usurpari solita, experientiâ teste asserere minime dubitamus. Non vetatur tamen sanguinis missio, urgente plethorâ ; vel si incusetur hæmorrhagiarum consuetarum suppressio. Sed invaluit mos pessimus hæc præsidia in omnibus obviis gravioribus morbis ad vituperium deflectendum, vel insulsæ plebis præjudiciis obtemperandum. Haud desunt tamen medicamina quæ faustè in usum trahi queunt : propinantur nempe potiones oleosæ : injiciuntur

 CONVULSIONES.

enemata ejusdem naturæ, vel stimulantia : naribus admoventur acetum acerrimum ; spiritus salis ammoniaci simplex, vel succinatus ; petroleum, terebenthina, aliæve substantiæ graveolentes ; celebrantur frictus in dorso & tibiis ; injiciuntur vincula constrictione molesta ; fiunt litus emollientes & aromatici juxtà longitudinem spinæ ; affiguntur cucurbitæ siccæ vel scarificatæ ; vesicatoria, &c. Laudantur balnea, semicupia & pediluvia : vel pars affecta in aquam immergitur. Nec omnia, sæviante insultu, haud impeditâ deglutitione, vetantur remedia interna : pluribus enim profuit aqua frigida affatim hausta : nonnullam opem conferunt antispasmodica ; guttæ nempe Anglicæ, tinctura castorei, vel succini, aqua florum aurantiorum, &c. Si convulsiones ortum ducant à quovis urgentiori dolore, vel ab aliâ quâcumque irritatione, ad hypnotica confugere licet ; aliàs cane & angue pejus fugienda. Mira demùm præstare valent, propriâ experientiâ judice, tubarum, tintinnabulorum & tympani bellici strepitus, pulvis pyrii fragor, & id genus alia, quæ nequidem in curantium mentem veniunt.

Fugato paroxysmo, danda est opera ut præcaveatur reditus ; à benè perspectis jam exaratis causis curandi judicium dirigendo. Pro comperto enim manet vulgatiores convulsiones esse merè symptomaticas : hinc primarii morbi habendam esse rationem cuivis, vel rudi & inexperto, obvium fit. Ubi verò causam fugacem agnoscunt, insultus convulsivi, totum negotium naturæ committendum ; vel ad remedia melancholiæ dicata confugere expedit. Aliàs *curatio prophylactica* à venæ sectione in plerisque est auspicanda, præsertim post sufflaminata solita sanguinis profluvia. Misso sanguine, primis viis prospiciendum ; sordes scilicet inibi nidulantes, tum per vomitum, tum per secessum foràs elutriando. Intereà in usum vocantur diluentia, temperantia & demulcentia ; aqua nempe simplex vel nitro imprægnata, aquæ minerales, frigida, vel thermæ, ferum lactis, vel ipsummet lac, jusculum pulli vel vituli, emulsiones, &c.

Nec minùs conducunt antispasmodica, inter inducias, quàm sub paroxysmo ; quibus proximè accedunt cephalica & carminantia : usitatiora audiunt melissa, salvia & betonica ; folia aurantiorum, quorum vires summis laudibus extollit clar. DE HAEN ; flores tilia, primula veris & lilii convallium ; pæonia & valeriana ; succinum, castoreum, pulvis de gutteta, &c. Tanquam præstantissimum remedium à nonnullis recentioribus laudatur moschus, à granis octo ad duodecim, exhibitus. Juvamen sæpiùs præstant amara, inter quæ multùm deprædicatur, nec immeritò cortex peruvianus, quo occurritur digestionum vitiis : nec sub alio scopo laudes merentur absorbentia & vermifuga ; corallina nempe, semen fantonicum, &c. Nec inanem operam ludunt aperientia ; martialia nempe, aselli, &c. Inter sedantia pluris habentur camphora & liquor anodynus mineralis. Proficue etiam usurpari queunt narcotica antispasmodicis sociata, si liberè exerceantur functiones animales : aliàs haud citrà periculum hæc adhiberi posse facile crediderim. Multis emolumento sunt balnea aquarum thermalium vel

vel alterius fortis; non secus ac varia topica, fugando paroxysmo dicata. Interea multum interest ut locum editum adeant ægri; ut obambulatione, vel equitatione se exercent, aut rhedâ vehantur: pluribus summè profuisse hæc vivendi ratio, experiundo didici. Fertur nonnullos incassum adhibitis omnibus præfidiis, sanitati restitutos fuisse, magnetem ferro instructum gestando: quod phænomenum, etsi à publico rerum ordine alienum, rationi tamen minime absolum videtur; dummodò cerebrum nullum vitium contraxerit. Quod choream sancti Viri spectat, à mentis perturbatione, ni fallor, semper oriundam: licet monitis, increpationibus & minis fugari queat; haud tamen inutilem opem præstant suprâ tradita remedia; inter quæ præsertim laudatur cortex peruvianus; non secus ac electuarium antiepilepticum Fullerii.

CONVULSIONES.

EPILEPSIA.

HOC morbo perculsi subito, vel post varios gyros, quasi vertiginosi, corruunt. Humi prostrati, sui inscii, omnique sensu orbat, inconditis & horrendis motibus, luxationem sub infantia minantibus, torquentur; adeo ut commiseratione permoveantur adstantes, vel filicei. Jacentium oculi convelluntur; os, declinante præsertim paroxysmo, spumâ ductili, instar sebi fusi, defœdatur; facies tumida calore atro-violaceo perfunditur; lingua crassa extrâ os exeritur & dentibus nonnunquam vulneratur, vel planè refecatur: respiratio in pluribus difficilis cum stertore multifono exercetur. Pulsus, sævientè paroxysmo, durus & inæqualis; debilis verò circa finem deprehenditur; imò & in nonnullis quasi obliteratur. Nonnulli ejulant & furore quasi perciti pugnis se percutiunt: alii delira loquuntur, vel quædam inaudita profutiunt, quæ à variis nebulonibus pro rebus dæmoniacis venditantur. Nec desunt qui cœlestia sibi fingunt somnia, ab insulsâ plebe, vel à fanaticis celebranda. Penis in juvenili ætate erigitur, imò & semen erumpit: urinæ in nonnullis summo impetu profiliunt, & alvus eâdem ratione solvitur. Paroxysmus nonnunquam ingeminatus, vel circa declinationem recrudescens hebetudine vel somnolentiâ, apoplexiæ planè compare excipitur. Nonnulli superato paroxysmo membrorum torpore aliquandiù afficiuntur; omnes de lassitudine insolitâ, ceu summo labore fracti, conqueruntur; ut de capitis contusionibus quas patiuntur super pavimentum lapidibus stratum devoluti nil addam.

Insultus epileptici quibusdam periodis plerumque subjiciuntur; singulis scilicet annis, mensibus, hebdomadibus, &c. recurrere solent: nec raro lunæ phasibus submittuntur; hinc minime mirum si veteres, hoc morbo correptos lunaticos vocitaverint. In nonnullis per plures annos silet hic morbus, præter omnium expectationem dein recurrens. Paroxysmi ab horæ

EPILEPSIA.

quadrante, ad horam unam vel alteram vulgò protenduntur; haud defunt tamen qui ad plures dies protelantur. Quidam epileptici varios prodromos jam experti, lapsum præcavere queunt: multa enim *imminentem paroxysmum* indicant; dolor nempe capitis gravativus, vertigo vel scintillæ oculis obversantes, aurium tinnitus, cordis palpitatio, epigastrii inflatio, borborygmi, extremorum refrigeratio, &c. His addere licet dolorem quemdam vel titillationem alterutris artubus insidentem, qui accessionem minatur; cui monito obtemperantes ægri, lapsum & contusionem paventes, humi se prosternunt. Aura, ut inquiunt, ab hac parte ad caput movetur; quasi inibi esset fomes morbi, qui cerebrum in consensum traheret. Plerisque tamen nullus occurrit paroxysmi prænuntius, qui tùm gravior esse solet; adeò ut haud defint qui ob metum invasionis domo egredi negant. Nonnullorum tamen epilepticorum, sensibus inter paroxysmum minime orbatorum, memorant Authores: nùm affinitate decepti unum morbum pro altero habuerint? solertioribus examinandum relinquimus; cùm nemine ferè discrepante in integrâ sensuum internorum abolitione præcipuus versetur *epilepsia typus*; quo benè perspecto in apicum veniunt variorum mendicorum fraudes. Præterea in genuinâ epilepsiâ oculi convelluntur, solo albo conspicuo; & in hoc signo verè distinguitur à fictâ vel simulatâ.

Signis tamen evidentibus haud semper se profert epilepsia; nec observationes anatomicæ, etsi numerosissimæ, genuinum hujusce morbi characterem produnt; nedùm variæ epilepticorum historiæ, ab Authoribus traditæ, nos ab erroris periculo vindicent. Plerosque nubem pto Junone salutasse rectè notavit BOERHAAVIUS; qui tamen hallucinationem declinandi modum minime docuit; adeò ut haud fortè absolum sit dubitare, nùm epilepsia cum aliis convulsionum speciebus haud coincidat: imò & re seriò pensitatâ, omnes morbos spasmodicos solo gradu ab invicem discrepare arbitrari fas est. Nec refragantur, uti jam innuimus, hoc morbo denatorum *extispicia*. Scitur præterea omnes ferè convulsionum species iisdem causis evidentibus progigni; symptomatibus vix absimilibus stipari; congeneribus auxiliis impugnari; nec planè diversum habere exitum: sed illud dubium in medio relinquimus.

Infantes & juvenes, non secus ac cachecticos & melancholicos epilepsiæ *obnoxios* esse experientiâ compertum manet: sed rarò invadit senes hic morbus, ni à pueritiâ illum contraxerint. Nemo nescit mulieres, præsertim gravidas & puerperas, ad hunc pronas esse; ni hystericis ipsis familiaris epilepsiæ faciem præ se ferat. Terrores & pavores, aliaque graviora pathemata, quibus mens acerrimè commovetur, epilepsiam accersere queunt. Fertur virginem sex & viginti annorum, tenerioris & sensibilibioris naturæ, verulam horrendâ epilepsiâ correptam conspexisse; & à concepto horrore in epilepsiam incidisse, singulis diebus, pari horâ recurrentem. Traditur etiam nonnullos epilepticos ab ingenti terrore, quod sanè mirum, curatos fuisse. Hanc concitant effrenata salacitas, vel frequentior seminis emissio. Nonnunquam etiam promovetur à castimoniâ post

petulantioris veneris usum. *Causam in ipso capite* hærentem, in obscuris plerumque latentem agnoscit *idiopathica*, quæ sæpè progerminatur ab scabiei, aliorumque affectuum cutaneorum retrocessu, ab exhaustis vestustis ulceribus, à præposterâ febrium intermittentium curatione, &c. *Sympathica* verò plerumque suboritur à saburrâ in primis viis nidulante; à cohibitâ in utroque sexu ad venerem propensione; à sufflaminatis mensibus; aliove uteri vitio: hanc promovent in infantibus vermes & dentitio: natales postremò sumit à contusione, vulnere, ossium fracturâ & carie, aliisque causis in proximo capite recensitis, quibus per nervorum consensum afficitur sensorium commune. His subnectere licet epilepsiam nonnunquam incipere à latere, manu, pede, &c. sub sensu auræ, formicationis vel doloris ad caput ascendentis; cur fit ut fasciâ injectâ cohibeatur exorients paroxysmus; vel secto nervo planè curetur morbus.

Epilepsia puerorum, de quâ suo loco, pubertate ut plurimum solvitur; nec ultra septem menses, vel annos produci vulgò fertur; ni tamen sit congenita, vel à partu difficili contracta; aut summo terrore concitata. Sed in *adultâ ætate* rarò spontè desinit; quin potiùs per totum vitæ curriculum proteletur. Quò frequentiores sunt paroxysmi eò *periculosior* censetur epilepsia, hereditaria nullam fermè curationem admittit: idiopathica etiam pro immedicabili habetur; sympathica verò facilè evincitur. Epilepsia in affectum quemdam comatosum apoplexiæ æmulum faciens ægros in orci fauces præcipites trahit; ni accedente paralyti ad vivorum numerum revocentur; quod nonnunquam evenisse testantur historiae. Paroxysmum sæpiùs presso pede sequitur syncope, quâ jacentes vix à mortuis discrepant; quod altâ mente tenere debent clinici, ne cogitetur de exequiis; & infelicissimi ægri, vivi sepeliantur; quod plus quàm horrendum infortunium plures passos fuisse haud falsò conjicitur: qui demùm ferociores hosce insultus superant; his mens ægrotat. Coronidis loco addere juvat epilepsiam omnibus remediis obsurdescentem à febre quartanâ, aliove graviore morbo, radicitùs haud rarò extirpatam fuisse. Nec desunt exempla epilepsiæ sanatæ à puris effluxu per oculos, nares & aures. Nùm epilepsia sit contagiosa dubitare licet; etsi nonnulla in medium adducuntur exempla prædicti contagii.

Ex *observationibus anatomicis* colligitur epilepsiam in plerisque esse idiopathicam: præter enim ossium cranii & futurarum morbosam conformationem; occurrunt exostoses cerebrum prementes; vel fragmenta ossea, nunc mobilia, nunc pyxide adnata, & duram meningem laceffentia. Cranium circâ futuras pellucidum visum fuit, vel passim cariosum. Crassæ meningis processus in osseam substantiam, cujus nonnullæ partes angulosæ cerebrum vellicare queunt, conversi deprehenduntur. Conspiciuntur crassa meninx tuberculis obsita, vel piæ meningi accreta, cerebrumque firmum, callosum, suis involucris agglutinatum; substantiæ medullaris præcipua portio in corpus gelatinosum subfuscum & pellucidum mutata. Substantia corticalis, colliquaminis instar, levissimo tactu diffluens, vel

EPILEPSIA.

in mucosum corpus conversa quod cultri mucronem attollentem sequens in fili modum ducebatur, &c. Visenda se præbent vasa per cerebrum, & meninges disseminata, concretionibus, ut inquiunt, polyposis, vel mucos quodam tartareo infarcta; & in quibusdam materiâ quadam viscidâ & gelatinosâ obducta; plexus choroïdes dilatationibus varicosis, vel hydatidibus refertus, &c. In propatulo fiunt stagnationes cruentæ, tum in ipsâ cerebri substantiâ, tum in variis ejusdem visceris anfractibus: sed frequentior est serosa colluvies omnes recessus implens, vel circa cerebrum & medullam spinalem fluitans. Detegitur in ventriculis cerebri sanies fœtida, vel ichor quidam viscidus parum discrepans ab spumâ, quæ os defœdabat. Materia huic planè compar, sub crassâ meningè, etiam conspicitur. Alia notatu digna etiam observantur; tumores nempe diversæ sortis, purulentia, putredines, plexus choroïdes granulofus, vel hydatidibus refertus, &c. Insuper obvium quandoque fit argentum vivum circa basim cerebri; & in diploe, non solum in iis qui ante obitum hydrargyrosi syphilidæ submittebantur; sed etiam in variis artificibus qui illud minerale conductitiis & assuetis operibus pertractaverant. Postremò nil à naturâ alienum invenitur in nonnullorum capite; præsertim post epilepsiam per partium inferiorum consensum quæ rarò sui vestigium in cerebro relinquunt.

Superfluum sanè foret mentionem subjicere de variis læsionibus pectoris, abdominis, trunci & artuum, à nostro proposito planè alienis. Sed haud abs re erit nonnulla *quæ artus spectant* in medium adducere. Plures epilepticos dolore quodam in pedum, manuumve digitis, vel in quâvis aliâ crurum, vel brachiorum parte defixo imminentis paroxysmi admoneri, jam suprà innuimus: occurrit in hocce puncto, ab ægrotantibus, dum viverent, pluriès designato, ganglii quoddam genus, aliudve vitium quod genuinam morbi sedem præbet: imò & nonnullis historiis constat, plures hâc chirurgicè sublatâ causâ, vel secto nervo huic vitio prospicienti; sanitati restitutos fuisse; quod sedulò annotasse sufficiat.

Vena sectiones & emetica quæ audacter à pluribus imperitis, vigente paroxysmo, præcipiuntur, superflua & exitialia censerì debent. Consultius est totum opus naturæ committere, dummodò situ congruo, contusionibus præcaveatur; & adacto inter utramque maxillam subere, aliove corpore congruo, impediatur quominus lingua à dentibus vulneretur. Et si paroxysmus à sanguinis missione nonnunquam fugari videatur, ratum tamen manet, apud artis Magistros, hoc intempestivo præsidio, morbum contumaciorem evadere: exemplo sit hæc mulier in diariis celebrata, cui intrâ anni curriculum, nescio quo præcipiente Medico, vena quater milles secta fuerit; tantùm invalescunt præconceptæ opiniones. Nonnunquam tamen sanguinem mittere licet, ut urgentiori occurratur; ubi scilicet vasa sanguinea, ob plethoram, vel cujusvis fluxûs sanguinei suppressionem; plus æquo turgida disruptionem minantur; quod non rarò à vehementioribus convulsionibus accidisse, è relatu naturæ rimatorum sat abundè patet.

Pari ratione præscribi potest emeticum; si primæ viæ pravis digestionum reliquiis turgant: sed summâ cautelâ moveri debet vomitus, quo sanguis majori impetu irruens ad cerebrum, lethalem labem ipsi impertiri valet. Tutiùs, ad quamdam revulsionem peragendam, celebrantur frictus in dorso vel cruribus; & injiciuntur enemata stimulantia vel cathartica, quæ sub variis circumstantiis haud inutilem operam ludunt. Ab injecto vinculo paroxysmus coërceri solet in hâcce epilepsiæ sympathicæ specie, quæ à peculiari artuum vitio pendet; pluriesque benè cessisse hanc opportunam deligationem experientiâ constat. Sternutatoria in potiori epileptico- rum parte nocentissima, nonnullis profunt: sed cùm arduum sit inquirere in quo casu congruant prædicta stimulantia; ab his planè abstinere satiùs videtur. Odoramenta graviora & ingrata in aliis convulsionum speciebus proficua, planè inertia in hâcce deprehenduntur; adeò ut mos invaluerit apud omnes ferè gentes, ut paroxysmi solutio *solis naturæ viribus* committeretur.

Inter inducias, nil non movendum ut præcaveatur invisi illius morbi alter accessus; hæc *medicatio prophylactica* vix discrepat à suprâ, vel in postremo capite, exaratâ. Sanguinis missio, præsertim è pede, vel cervice, omnibus ferè epilepticis opitulatur: nec minùs proficua censentur emetica & cathartica in primo curationis limine, imò & alvum sæpiùs ducere expedit per totum medelæ curriculum; præsertim si saburræ acidæ in primis viis nidulantis, vel vermium inibi hospitantium occurrant indicia. Cathartica ante novilunium & plenilunium prodesse notat BOERHAAVIUS: minime mirum si sub hâc cœli constitutione suboriantur, juxtâ SANCTORII observationes, quædam plenitudines quæ hebetudinibus, lassitudinibus, turbato somno, aliisque signis se produnt, ac sudoris vel urinæ insolito proventu solvuntur. Supperias ferunt in quovis tempore diluentia & temperantia. Pluribus optimè cessit regimen lacteum, quo spirituum ferocia egregiè reprimitur, nec minorem laudem merentur aquæ minerales frigidæ, tùm acidulæ, ut inquiunt, tùm martiales. His præmissis in usum vocantur *specificæ*: sed multùm abest quin hâc, quæ vulgò ipsis tribuitur, efficaciam polleant, quin potius debellando morbo in plerisque sint imparia: interque selectiora audiunt præonia, valeriana sylvestris, viscum, cortex peruvianus, cinnabaris antimonii, pulvis de guttetâ, &c. quorum ope nonnunquam cohibentur insultus epileptici. Iphis cognata sunt cephalica: quæ iisdem ferè viribus instrui videntur; præsertim si kinækinæ socientur. Proficue nonnunquam adhibentur amara & absorbentia: quibusdam conferunt sudorifica; præcipuè decoctum guaiaci: nec inutilia censentur aperientia, & præsertim martialia. Præstò sunt antiscorbutica & antivenerea, si latentis virûs quædam emergat suspicio: inter hæc postrema, usitatiora audiunt æthiops mineralis & aquila alba. Ipsammet hydrargyrosim faustè fuisse adhibitam, etiam in luis veneræ planè expertibus, plures tradiderunt. Alia occurrunt medicamina quæ pro re natâ usurpari queunt; saponem scilicet, magnesia; flores salis ammoniaci, &c. Nec despicienda

sunt hypnotica, si incusetur causa quædam irritans : vel ærumnis & mœrore torqueatur æger.

EPILEPSIA.

Haud post habenda *remedia externa* : faustè enim, in quibusdam epilepticis, adhibetur capitis irrigatio ex aquis bellilucanis, aliisque thermalibus; profunt hirudines vasis hæmorrhoidalibus admotæ; conferunt cucurbitulæ scarificatæ capiti, dorso vel femoribus impositæ: horum vires æmulantur vesicatoria iisdem partibus affixa: mira præstat setaceum per occipitis cutem trajectum: nec exiguas laudes merentur vulnera à causticis inflicta; dummodò haud adoleverit morbus. Agmen claudit cauterium actuale sincipiti inustum, quod pluribus optimè cessisse, variis observationibus, constat. Ligaturam postremò nonnunquam conducere ad cohibendum morbum suprà notavimus. Nil addimus de variis amuletis ex hydrargyro, radice pæoniæ, unguilâ alcis, aliâve materiâ paratis, collo appensis, vel regioni cordis appositis, quorum vires ab impetratâ ægrotantium fide pendere videntur. Hactenùs traditis, parergi loco, subnectere expedit, hunc pertinacissimum affectum sæpiùs eximi post longam, tædiosam & futilem curationem, à quocumque novo vitæ instituto; à cœli mutatione, longinquis peregrinationibus, diutinâ navigatione, &c. Multiplici postremò experientiâ comprobatur, nullum par sibi habere præsidium probam victûs rationem; quæ insuper omnibus cujuscumque sortis auxiliis obsecundat: quâ deficiente ab omni aliâ curatione abstinere præstat. De epilepsiâ sympathicâ nil addimus; cùm ratione causæ peculiarem curam sibi vindicet, quæ versatur circà vermifuga, absorbentia, caustica, &c.



S E C T I O I I I .

RAUCEDO.

DE MORBIS INTERNIS PECTORIS.

R A U C E D O .

OMNIBUS innotescit hic affectus glottidi insidens, vocem infirmans, & exasperans, qui à nostratibus *enrouement* vocitatur. Sed alter est morbus nullo nomine gallico designatus, etsi familiarissimus, qui in laryngem, & præcipuè tracheam, incumbit; ac *branchus* apud Scriptores audit. Fluxiones catarrhales vulgarissimas alterutram raucedinem comitem habere nemo nescit; quæ etiam inter variorum morborum symptomata numeratur; phthiseos nimirum, vomicæ, atrophiciæ, vermium, mensium suppressionis, &c. Hanc promovent cohibita perspiratio, aër frigidior inspiratus, potus gelidus, cantus, clamores, &c. Contrahitur à dapibus frixis, ab oleo & butyro rancidis, &c. Utramque à mucos quodam, membranam internam laudatarum partium laceffente, progigni ultra omne dubium positum manet, cum solo exscreatu, vel roncho quodam arbitrario, mitescat. *Ad veram raucedinem proclives* sunt macilenti, scorbutici, syphilitici, &c. *Brancho obnoxii* existimantur senes & cachectici, concionatores; illi demum qui perstudiosè affantur, vel haud abjectâ verecundiâ ad populum dicunt. Raucedo à quovis accidente, vel à causâ fugaci; ortum ducens *periculo vacat*; licet ad plures menses protelari queat: sed si à causâ internâ sobolescat, aut alterius morbi symptoma sit, nil boni spondet: idem fermè cogitandum de brancho, qui insuper in provectâ ætate haud leve incommodum parit; nec periculi expers est; cum sæpius in asthma vel suffocationem facessat; nunc verò catarrhum suffocantem, uti nonnulli arbitrantur, minetur, subest dubitandum.

Cadavera cultro anatomico subiecta exhibent glottidis, laryngis & tracheæ faciem internam glutinoso mucos madentem; vel infarctam, phlogosi correptam, vel ulcusculis exesam, aridam & maculis gangrænosis signatam. Utrarumque partium cartilagine carie læsæ deprehenduntur. Inibi etiam conspiciuntur congestiones gypseæ vel lapideæ; atque in propatulo veniunt farcoses polyposæ, nunc immobiles; nunc pendulæ & fluitantes, &c. Pulmo in consensum sæpissimè trahitur; nunc enim skirrhusus vel tuberculis repletus, nunc abscessum recondens, vel ulceratione erosus occurrit: nec immunis est thymus, qui accurato examini subiectus eandem labem haud rarò ostendit: ut de oris ulceribus, aliisque læsionibus quæ ante obitum cernere licuit nil addamus.

Medendi methodus parùm discrepat ab illâ quæ tussi, catarrho, phthisi, &c.

RAUCEDO.

congruit. Quapropter rarò conducit venæ sectio, ni adsint plethoræ indicia; aliquam opem conferunt laxantia, si dejectiones haud ritè perficiantur, vel quâvis saburrâ gravetur stomachus. Sed pluris habentur diluentia, demulcentia vel pectoralia mitiora: id genus sunt lac, ejusque serum; mel, napus, jujubæ, oryza, hordeum & consimilia; gummi tragacanthum, saccharum, sperma ceti, testudines, &c. quibus medetur tumentibus, vel rigidioribus laryngis vasculis; sanguinisque æstus compescitur. Laudantur adversus raucedinem chronicam vulneraria & detergentia pectori dicata; veronica nempè, hyssopus, hederæ terrestris, gummi ammoniacum, balsama naturalia, syrupus de erysimo, balsamum Lucatelli & sulphuris, &c. Suas laudes etiam meretur, in senili imprimis ætate, spiritus salis ammoniaci; sed solerti manu pertractari debet illud remedium. In raucedine verò symptomaticâ, morbi primarii habendam esse rationem nemo non videt: hinc minime mirum, si sæpiùs ritè succedant sudorifica, antiveneræ, antiscorbutica, aliaque incidentia multigena. Præclara demùm munia obeunt fontanellæ & fetacea; ubi morbus altas radices egit; & inepta fuerunt cætera medicamina.



TUSSIS ET CATARRHUS PECTORIS.

NEMINEM, vel rudem & inexpertum latet *catarrhum*, peripneumoniam, phthisim, hydropem, aliosque morbos pectoris, tussim comitem habere: sed non omnibus innotescit hæc *suboriri* à solâ glottidis, vel laryngis vellicatione; à pleuræ, diaphragmatis, & hepatis phlogosi; nec non purulentiâ: à pravis succis in stomacho & duodeno nidulantibus, aliisque viscerum abdominalium læsionibus; ab hysteri & hypochondriaci, &c. Si à causâ laryngem laceffente, à pleuræ ejusque propaginum inflammatione, & à diversâ viscerum abdominalium labe, ortum ducat tussis; *siccâ* ut plurimum observatur: sed si à muci proventu, stagnante sanguine, purulentiâ, tuberculis, concretionibusque lapideis vel osseis pulmones vellicantibus concitetur, *humida* audit, vel sputi ejectione stipatur; quod nunc merè pituitosum, nunc striis sanguineis notatum, nunc purulentum, sordidum, &c. se præbet. *Tussis vehementior*, quam convulsivam vocant, catarrhalis vel alterius naturæ, quibusdam periodis submittitur; atque tantâ ferociâ nonnunquam urgent paroxysmi, plus minùsve frequentes, ut facies colore atro cæruleo perfundatur; & ægri suffocationis periculum incurrant. Ex hoc fonte etiam prædeunt hæmorrhagiæ, sputum sanguinis, vomitus; mictus involuntarius & intempestiva alvi dejectio; abortus; ac demùm cujusvis sortis herniæ. Tussis hujusce commatis, juxta nonnullorum mentem contagiosa, epidemicè sæpiùs grassatur, ac *coqueluche*, *grippe*, *folete*, &c. pro mero curantium nutu vocatur.

Tussim

Tussim catarrhalem, quam plerumque promovent subitæ aëris vicissitudines, prænuntiare solent coriza, gravedo, raucedo; & pharyngitis, vel hæc angina species quæ vulgò *mal de gorge* audit. Hancce morbi constitutionem etiam produnt urinæ cum subsidentia floccorum instar discriptâ. Nil ferè sub primo stadio è pectore educitur; sed nonnullis diebus elapsis, sputa sensim crassiora evadunt, & uberrimo proventu ejiciuntur. Quandoque verò haud sine magno labore; cum scilicet pituita vel materia cruenta, viscida huc collecta, ob moram glutinosior evadat; hinc bronchiis firmiter hæreat: *febris catarrhum* concomitans à refrigeratione; vel vagis, longisque horroribus, ut plurimum orditur, & vespertinis horis exacerbari solet: hæc, quam *catarrhalem* vocant, nunc mitior intra biduum vel triduum continetur; nunc mali moris doloribus erraticis, spirandi difficultate, anxietatibus, lipothymiâ, exanthematibus cutaneis, vel eruptionibus miliaribus, sudoribus uberrimis, &c. stipatur. Sub nonnullis constitutionibus epidemicis, peripneumoniæ, vel febris malignæ faciem referens, *febris catarrhalis* vitæ insidiatur: atque sub hoc genio ad septimum vel decimum quartum diem protenditur; ultra quem metus est ne in febrem hæcticam faceßat.

Aliæ sunt *tussis* species; *stomachalis* nempe, *gutturalis* & *hepatica*: prima à saburrâ viscidâ, acidâ, alteriusve indolis, in stomacho nidulante oriri & foveri videtur: ejus diagnosi quæ atrâ sæpius caligine obvolvitur, ore fordido, cibi fastidio, nausæâ & vomitu, cardialgiâ vel dolore gravativo stomachi, & epigastrii inflatione eruitur. *Tussis stomachalis*, ad quam proni sunt infantes, hypochondriaci & senes, nullum ferè movet sputum jejuno ventriculo; sed post pastum exacerbari solet cum sputo copiosiore; ac tantam quandoque sævitiam exercet, ut febrem accendat, & infantes haud rarò ducat in atrophiam. *Tussis gutturalis*, ut plurimum chronica, à molestâ quâdam sensatione in imis faucibus, vel circâ laryngem, deficientibus numeratis signis, patet: sed plerumque meris duntaxat conjecturis ejus characterem assequi licet. *Tussis hepatica*, nonnullis hypochondriacis familiaris, est intermittens, & nonnunquam ferocissima: in ejus intervallis nulla percipitur spirandi difficultas, nec febris: si lacticiiniis, bechicisque edulcorantibus, vel hypnoticis tractetur, uti tussis vulgaris, abit in tabem hepaticam, febre lentâ stipatam, quam fovet hepatis abscessus. Alia & fortè frequentior observatur *tussis symptomatica*: hæc vexantur hypochondriaci & hysterici, scorbutici & scrophulosi: hanc promovent arthritidis & rheumatismus, fudor introversus; scabiei, aliarumque eruptionum cutanearum retrocessus; ulcerum chronicorum exsiccatio, &c. Concitatur à variolis & morbillis; à dentitione & vermibus: hanc demum pariunt fumus, halitus minerales; quodvis corpus extraneum in laryngem subreptum, vulnera, &c.

Nil mali portendit tussis catarrhalis simplex, leve incommodum parit; ac spontaneis naturæ viribus solvitur. Chronica verò labem pulmonibus infert, è quâ haud rarò emergit phthisis: hæc in protractâ ætate haud citrà

T U S S I S
E T
C A T A R -
R H U S
P E C T O R I S.

**TUSSIS
ET
CATARRHUS
PECTORIS.**

periculum cohiberi potest; & plerique fenes tandiù anacatharsi egent, quândiù vitali aurâ fruuntur; eo quod coarctati cutis poruli solitis perspirationis effluviis exitum minime largiantur. Strages sapiùs edit febris catarrhalis epidemica ob phlogosim internam, quam plerumque comitem habet; vel ob graviora symptomata quibus stipatur, quorum ratione pro febre malignâ perperam ab incautis habetur: sed alterius est indolis hæc febris catarrhalis species, alioque stadio subjicitur, cùm haud ultrâ decimum quartum diem proteletur; quâ procedente, sudores fœtidi & urinæ fæculentæ *faustum spondent exitum*: si malè constitutos invadat, vel præposterâ medelâ impugnetur, exitum portendit; vel in tussim chronicam ferè indomabilem facessit. Tussis ferocior, vel convulsiva, varia post se trahit infortunia: sanguis enim validissimâ pectoris succussione, majori impetu irruens ad cerebrum, cephalalgiam, vertiginem, & apoplexiam nunc lethalem, nunc in paralytim abeuntem, inferre valet: ab eâdem causâ prodeunt hæmorrhagiæ, abortus, herniæ, aliaque infortunia, de quibus suprâ. Tussis postremò sicca, & chronica, cujusvis latentis pulmonum vitii, aliorumve viscerum infarctûs skirrhusi suspicionem movet; hinc phthisim, vel asthma, de quibus suo loco, minatur. Facile fugatur tussis stomachalis recens; sed pertinacior censerì debet chronica, præsertim sub senio. Gutturalis à labe quâdam organicâ originem, ut plurimum, ducens, omnibus remediis ferè obsurdescit: in symptomaticâ verò, morbi primarii habenda est ratio.

Sectis cadaveribus, patent pulmones haud citrà lacerationem à vicinioribus avellendi; œdemate, vel emphyzemate affecti; crustâ gelatinosâ obducti, emaciati, præduri & skirrhusi, lapillis scatentes, emphyzemate tumidi, phlogosi tacti, purulenti, putridi, exesi, &c. Comperiuntur bronchia muco glutinoso, vel pure concreto infarcta, vasa circâ hæc repantia, plus æquo turgida & varicosa. Deteguntur in eodem viscere skirrhi, tubercula, tumores cystici, abscessus, ulcera, aliæve purulentia, putredines & gangræna; nec rarò ibidem occurrunt concreciones lapideæ, osseæ, &c. Pleura, cum suis processibus, livore affecta, phlogosi tacta, maculis gangrænodeis signata ante oculos versatur. In aprium venit colluvies ferosa, faniosa vel purulenta, tùm pulmones circùm ambiens, tùm in mediastino vel pericardio recondita. Haud silentio prætermittendum, inter numeranda effatu digna, quòd cor, etiam hujusce mali consors, ulcerosum vel suo involucro accretum haud rarò deprehenditur. Nec inculcata se præbent abdominis viscera: annotantur enim inflammationes, purulentia & skirrhi in hepate, liene & pancreate, stygmata gangrænosa, vel tubercula in ventriculo & intestinis, quorum cavum multigenis fordibus repletur; vasa biliaria suprâ modum turgentia, &c.

Febris catarrhalis vulgatiore *curatio* simplicioribus peragitur; vel naturæ committitur; dummodò tamen vitetur aëris frigidioris, non secùs ac calidioris fortè magis pertimescendi, accessus; nec posthabeatur victus ratio. Radix althææ, capilli veneris; flores malvæ, tussilaginis, verbasci

& papaveris rhœados; succus liquiritiæ, aliaque pectoralia demulcentia, omnem implent paginam. Nec verantur hypnotica, si noctes sint insomnes, & tussis majorem quàm par est sævitiam exerceat. Sputa crassa, & liberè excreta, proximam solutionem indicant; ni morbus incongruâ & intempestivâ medicatione proteletur. Sed aliter se res habet in febre catarrhali mali moris, quæ varia efflagitat præsidia; inter quæ venæ sectio à pluribus haud infimi subfellii Medicis laudatur, annuente ipsomet. SYDENHAMO. Haud tamen experientiâ teste, in omnibus epidemiis conducit sanguis missio; quin potius summam noxam vel necem inferre queat: sed pro dolor! nulla patent indicia, quibus de hâc re curandi ritus dirigi valeat: adè ut sub hisce angustis, ineunte epidemicâ constitutione, ægros nonnullis periclitationibus submittere fas sit. Sed semper proficuè adhibentur diluentia, demulcentia & bechica; liquiritia nempè, herbæ capillares, hispidula, jujubæ, napus, brassica rubra, mel, oleum amygdalarum dulcium, sperma ceti, looch album, lac, ut inquiunt, gallinaceum, tabellæ de althæâ, saccharum penidiatum, lac, serum lactis; cremor hordei, oryzæ, &c. quæ non solum acredini opitulantur; sed etiam vasis plus æquo rigentibus flexilitatem conciliant.

Valent, declinante morbo, *cathartica*; aliàs summâ cum cautelâ usurpari debent; ne intempestivâ per alvum evacuatione, sputa sufflaminentur, & periculosissimæ concitentur suffocationes: quod pluriès evenisse memini; quidquid in contrarium adducant RIVERIUS, alique haud inferioris notæ scriptores, qui huicce præsidio plus æquo confidebant. *Emetica* tamen, ineunte febre catarrhali, egregiam sæpiùs opem præstant; non secus ac in aliis febrium speciebus; hæc profunt præcipuè in hâc tussis specie, *coqueluche* nomine notâ, quæ scilicet paroxysmis ferocioribus, *quintes* vocitatis, exacerbari solet. Cæteris emeticis, nemine ferè reluctante, præstat ipecacuanha: summis etiam laudibus extollitur in hoc casu kermes mineralis, licet tanquàm vomitorium præscribatur, vel pro alterante & incidente exhibeatur. Rarissimè fallunt diaphoretica blandiora; flores scilicet papaveris rubri, & verbasci; vel jam laudatus kermes refractâ dosi exhibitus: imò & tussim catarrhalem sæpiùs cōhibent theriaca, mithridatium, aliaque id genus electuaria roborantia & cardiaca, quæ etiam paregoricorum classem subeunt. Nonnullis, inter tussim catarrhalem convulsivam, profuerunt exiguæ doses cascarillæ; sed non inconsultus debet esse hujusce remedii usus, quo sanè quidem incautè exhibito irritari queunt crabrones. Salubriorem perspirationem movent, & inducias agunt sedantia; crocus nempè, laudanum, guttæ anodynæ, diacodium, syrupus de karabe, pilulæ de cynoglossò, cæteraque hypnotica; quæ tamen solerti manu tractari debent, ne intempestiva emergat sputorum suppressio.

Tussis stomachalis, sub quâ affectus ventriculus pulmones in consensum trahit; hypochondriacis, infantibus & senibus familiaris, *evacuantia* per vomitum, vel alvum, experientiâ judice, expostulat; sub quo scopo sæpiùs faustè successit kermes mineralis. Expeditis primis viis, vel saburrâ

T U S S I S
E T
C A T A R R H U S
P E C T O R I S.

**TUSSIS
ET
CATARRHUS
PECTORIS.**

inibi fluctuante foràs eliminatâ, egregiam opem conferunt stomachica; anisum nempè, coriandrum, catechu, theriaca, opiata Salomonis, &c. Nonnullis etiam opitulantur confectio de hyacintho, aliaque absorbentia, quæ saburram acidam ventriculum laceffentem infringere queunt. *Tussis hepatica* initio feliciter avertitur aloëticis, jusculis aperientibus & ptisanis nitratis; nec inutilem opem conferunt blandiora cathartica. Notandum quod demulcentia bechica, quæ largâ copiâ adhiberi solent adversùs quamvis obviam tussim, inertia vel noxia sub symptomaticâ censerì debeant: de quorum viribus, etiam ergà alias tussis species haud leve emergit dubium; cùm aqua simplicissima omnium fortè exquisitiorum bechicorum efficaciam superet; quod solertioribus pensitandum relinquimus.

Aliam curam sibi vindicat tussis chronica: præmissis nempè præmittendis, opportunè exhibentur pectoralia demulcentia; lactinia nimirum, farina-cæa, testudines, &c. Hæc excipiunt pectoralia vulneraria, inter quæ selectiora audiunt hedera terrestris, alchymilla, veronica, hypericum, balsama naturalia, aqua picea, syrupus de erysimo, balsamum Lucatelli, pluraque officinalia quæ vires à sulphure mutantur; atque sub tabellarum, balsami, magisterii, & florum formâ venditantur. Nec minùs conferunt, haud adversante morbi genio, pectoralia incidentia, abrotanum putà, camphorata, feniculum, baccæ juniperi, myrrha, styrax calamita, flores benzoïni, antimonium; varia è scillâ præparata, pilulæ balsamicæ, &c. Huc coincidunt diaphoretica; guaiacum nempè, china radix & salsaparilla; antimonium diaphoreticum, antihecticum Poterii, jam pluriès laudatus kermes mineralis, aliaque consimilia, quæ cutis spiracula referando plures fausto bearunt successu. Pro re natâ in usum etiam trahuntur diuretica, aperientia & depurantia; aselli nempè, iris florentina, oxymel scilliticum, æthiops mineralis, &c. Sed fortè cæteris adminiculis præstat aër apricus & serenus; vel materiebus balsamicis imprægnatus, fumo scilicèt succini, mastiches, olibani, styracis, &c. Hinc summè prodest tussientibus rusticari & versari inter abietes & pineta; aëremque terebinthinaceis effluviis gravidum inter ambulandum inspirare. Postremò inter exquisitiora præsidia recenserì debent aquæ Bonenses, Cranenses, Baregieneses, Montis aurei, Selteranæ, &c. quæ interiora corporis penetralia lustrando, pertinaciores obstructions solvunt, & chronicorum curam claudunt.

Præclarum effectum in nonnullis edunt *vesicatoria*, setacea & fontanellæ; præcipuè si priùs recesserint eruptiones cujusvis fortis cutaneæ, & annosi ulceris labrà ad mutuuum contactum coiverint. Idem esto judicium de variis aliis morbis diversæ indolis, qui tussim symptomaticam movere queunt; quibus benè perspectis, legitimus patet curandi modus. Mantissæ instar addere lubet historiam in Actis Academiæ Regiæ Scientiarum traditam; de quodam, tussi pertinacissimâ & chronicâ laborante, qui jamdudum in cubiculo calido, ostiorum & fenestrarum rimis religiosè clausis, Medicorum consilio, se continebat, & molestâ vel tædiosâ medelâ plectebatur; qui scilicèt ulterioris moræ impatiens omnibus remediis valedixit, & in

publicum profiliit : mirum fanè quòd ab inspirato aëre frigidissimo , non solum haud recruduerit tussis ; sed præter spem planè evicta fuerit ; adeò temeritas nonnunquam efficit , quod prudentia nequiverit.

TUSSIS
ET
CATARRHUS
PECTORIS.

CATARRHUS SUFFOCANS.

Vix quid certi è libris eruere licet ; cùm de hoc argumento tradita , lascivientis potiùs ingenii quàm sedulæ observationis opus sapiant. Plures *catarrhum suffocantem* à suffocatione vulgatissimâ & multiplici , planè diversum , pro subitaneo pulmonum infarctu , undè nomen prodiit , habuerunt ; quod à vero haud abludere , respectu senum & infantum , testatur *autopsia anatomica* : sed aliter se res habet in aliâ ætate. Cor nonnulli inculparunt ; hinc morbum , de quo in præsentiarum ; ad *syncopem cardiacam* , quâ scilicèt cor & pulmones sanguine obruuntur haud perperam retulerunt. Alii inter peritiores existimarunt catarrhum suffocantem versari in violentâ laryngis irritatione , quam excipit calamitosa vel lethalis suffocatio ; adeò ut parùm discrepet hic morbus ab hâc anginae specie , nullâ intumescentiâ phlogodeâ stipatâ ; nisi in eo quòd catarrhi suffocantis accessio sit promptior & periculosior. Nec defunt qui insultum asthmatis convulsivi , vel suffocationis hystericae , catarrhi suffocantis nomine salutent ; etsi maximum occurrit discrimen inter morbum chronicum , & acutissimum. Plures demùm prædictum catarrhum ab apoplexiâ haud differre sibi falsò persuaserunt ; cùm suffocatio in hâc catarrhi specie se prodât , priusquam aboleantur sensationes ; uti constat è relatu famulorum excubias agentium ; dùm apoplectici primò functionibus animalibus planè carent ; dein verò respiratio læditur. Proximiùs , ni fallor , accedit catarrhus suffocans ad ferociorem incubi insultum , haud minùs periculosum ; nec dubito quin unus pro alio pluriès habeatur.

E præhabitis colligere licet plures , affinitate deceptos , in genuinâ hujusce morbi diagnosi planè cæcutiisse , & alium pro altero pertractasse. Re accuratiùs pensitatâ , à *duplici causâ* ortum mutuari catarrhum suffocantem credere par est ; ab spasmodicâ scilicèt glottidis constrictione , & à bronchiorum infarctu. Prima species invadere solet illos qui ab ingenti quodam labore æstuentes , aëri frigido , nullâ interpositâ morâ , se committunt. Crebrò attingit fluxionibus catarrhalibus jam obnoxios , æquè ac obesos ; lautè victitantes , in otio recumbentes , poculis deditos , &c. Ad alteram speciem pronos esse infantes & senes suprâ innuimus. Utraque diversis gradibus submittitur , quorum leviores periculo minime vacant : è gravioribus verò emergit subitanea suffocatio , roncho & sibilo stipata ; sensationibus plerumque deficientibus. Sub ineunte primâ specie , larynx molestè vellicatur & dein coarctatur , imminente suffocatione ,

CATARRHUS
SUFFOCANS.


non secùs ac à bolo hùc elapso : postea sensorium commune in consensum trahitur. Aliter se res habet in alterâ specie ; quâ , illasâ larynge , tanto pondere obruitur pulmo , ut illicò omnibus sensibus orbiati corruant ægri.

Bina catarrhi suffocantis species haud ultrâ aliquot horas protelantur , & necem subitanèam sæpius inferunt ; quod præcipuè de postremâ intelligi debet , cujus solutio in solâ expectoratione versatur ; cui promovendæ impares sunt debiliores infantes & senes. Ratò clinicis occurrit hic alterutrius fortis morbus ; etsi multò frequentior est quàm vulgò fertur ; cùm circa mediam noctem plerumque ingruens , suum stadium percurrat priusquam cura suscipiatur ; adeò ut ab omni ope medicâ destituti miselli ægri repentinâ morte sæpius abripiantur.

Nil fermè colligitur ex *observationibus anatomicis* sub hoc titulo conscriptis ; cùm pleræque circa insultus hystericos , & varios cordis cerebrique morbos , immutato nomine , versentur. Unicus vir inter Magnates conspicuus , & sexagenarius , primâ catarrhi suffocantis specie noctu extinctus , si adstantium famulorum relatui sit fides , mihi secandum se obtulit. Ventriculos cordis , & præsertim primum , sanguine compacto ultrâ modum infarctos reperi : nil visendum se præbuit in glottide & larynge , cujusvis læsionis , uti videbatur , planè expertibus ; licèt æger aphonus , nutu indubio , morbum hisce partibus hærentem clarè indicasset. Ideò ne minimo prægressæ strangulationis subsistente vestigio , productum tantummodò morbosum ; stasis nempe sanguinis in cordis thalamis , auriculis , aliisque receptaculis , oculis subiciebatur. Notare expedit hoc morbo denatum , obesum , mœrore & sollicitudinibus confectum , vitam peregisse otiosam ; qui cæteroquin vegetâ fruebatur sanitate. Pluriès mihi observasse contigit , alteram catarrhi suffocantis speciem , infantibus & senibus familiarem ; quorum cadavera tracheam & bronchia muco viscidiori repleta , & aëri planè impervia exhibebant ; dùm cætera viscera inculcata , vel variis læsionibus à re nostrâ planè alienis affecta conspicienda se præbuerunt. Inter exenterationem cujusdam simili morbo extincti , materiam viscidam bronchiis pertinacissimè hærentem , horumque cavum replentem etiam observavit clar. MORGAGNUS.

Haud dubitare licet quin *venæ sectiones* etiam pluriès repetitæ catarrho suffocanti glottidem oblidenti congruant. Præsentaneam opem ferre valet emeticum , dummodò ritè ptius depleantur vasa sanguinea ; aliàs vitam ægris eripit. Minùs sanè essent pertimescenda cathartica ; sed angustissimum vel brevissimum morbi stadium hæc præsidia , suum effectum tardiùs exerentia , adhibere nusquam finit. Semel venam tundere licet in secundâ specie ; sed vetatur ulterior sanguinis detractio. Kermes minerale , cæteraque emetico-cathartica , licet probatissima , non nisi summâ cautelâ exhiberi debent. Conducunt in utroque morbo enemata stimulantia , quæ aliàs nullam noxiam inferre valent. Idem esto iudicium de cucurbitulis scarificatis , de vesicatoriis & sinapismo. Haud exiguam laudem merentur

pediluvium calidum, & vincula artubus injecta: nec despiciendæ sunt vellicationes, frictu, aliove modo celebratæ, quæ humores & spiritus alliciendo, partem spasmo correptam sublevare queunt. Secundis naturæ viribus vel artis præsidio, superato hocce herculeo morbo, nil non movendum ut declinetur alia invasio. Inter generalia prophylactica pro re natâ usurpanda, laudatur cautus cathartorum usus: cætera auxilia è diaphoreticorum & diureticorum classibus depromi solent; id genus sunt terra foliata tartari, succus raphani, sal succini, spiritus salis ammoniaci & cornu cervi, &c. Nec inutilem opem præstant pectoralia demulcentia & incidentia, nimirum sperma ceti, gummi tragacanthum & ammoniacum, &c. Fontanella denique hisce auxiliis obsecundat; & hæc fortè superat. Interim plurius habenda est congrua victûs ratio, demptâ pro senibus cœnâ: temperatiore aurâ in loco edito fruantur ægri; mœrores & sollicitudines fugiant; obambulationibus vel peregrinationibus indulgeant, &c. Plura addere vetat accuratarum observationum penuria; nec finit propositum.



INFLAMMATIO PECTORIS.

PRO UNO, eodemque morbo habentur apud sciolos *peripneumonia* & *pleuritis*, quæ multum tamen ab invicem discrepant, ratione partis læsæ; cum *peripneumonia* sedem habeat in ipsomet pulmone, & *pleuritis* in membranam costas succingentem ingruat. *Peripneumonia* insuper morbus est frequentissimus; *pleuritis* verò, autopsiâ judice, rarissimè invadit: inter enim innumeros inflammatione pectoris sublatos, quos secandos curavi, binos duntaxat, ni fallor, genuinâ *pleuritide* affectos reperi. Verum quidem est quod pulmones phlogosi correpti *pleuram* in consensum sæpiùs trahunt; undè emergit hic morbus implicitus quem vocant *pleuro-peripneumoniam*; sed à mērâ *pleuritide*, pulmone parcente, multum abluidentem. Turpiter de hac re allucinantur, qui dolorem acutissimum lateris pro *pleuritidis* indicio manifesto habent; cum sæpiùs nobis contigit observasse *pleuram* in hocce casu ne minimam quidem labem passam fuisse. Alius in praxi subrepsit error circa inflammationem illius *pleuræ* processûs, convexam diaphragmatis faciem obregentis; qui morbus cum *pleuritide* coincidit; ratione causarum undè gignitur, effectuum quos edit, & methodi quâ curatur: is est quem pro delirio, quo stipari solet, ad morbos capitis, sub *paraphrenitidis* titulo insulse referunt Auctores, etiam optimæ notæ: sed hisce haud diutiùs immorabimur, ne crambem repetitam apponamus.

Horror plerumque anxius, quem excipit febris; dolor alterutrius lateris, ut plurimum tamen sinistri, sterni, dorfi, &c. sputa cruenta & spirandi

INFLAMMA-
TIO
PECTORIS.

difficultas, sunt notissima *peripneumoniae signa*. Sedulò animadvertendum quòd in quibusdam, peripneumoniâ decumbentibus, nulla erumpant sputa cruenta, licèt pulmones verâ phlogosi corripiantur; cur fit ut plures clinici, duce SYDENHAMO, hunc affectum pro *peripneumoniâ nothâ* habeant; nùm rectè è mox enarrandis patebit. Illud etiam notandum incumbit quòd pulmonum phlogosis haud semper tussi, dolore, & spirandi difficultate stipetur; uti grassante constitutione epidemicâ anni 1754, haud rarò inter *rimanda cadavera* eorum quorum cura mihi demandata fuerat, observavi. Peripneumoniam nonnunquam præeunt ventris tormina, defluxio anginosa, aliufve morbus inflammatorius: nec infida in quibusdam epidemiis censentur hæc prænuntia, in aliâ tempestate planè silentia. De erysipelate pulmonum post HIPPOCRATEM & GALENUM, mentionem subjecerunt LOMMIUS & BOERHAAVIUS; sed meris conjecturis suffulta est hæc opinio; cùm erysipelas solam cutem respicere videatur; cujus retrogressu, materiâ morbosâ in quodvis viscus per metastasim ingruente, alter emergit affectus, ob partis fabricam, ab erysipelatis indole profectò dispar: quod pace tantorum virorum per transfennam annotasse sufficiat.

Nulla promoventur sputa cruenta in *pleuritide & paraphrenitide*, nì ferociori tussi disrumpantur bronchiorum vascula; sed in hoc casu sanguis rutilans sub alio conspectu se præbet. Delirio in plerisque stipatur uterque affectus; dolor acutissimus, hanc vel illam partem pectoris occupans, ab inspiratione recrudescens decumbentes, hinc ægrè spiritum ducentes, torquet. Pulsus, vigente febre, durus exploratur; os aridum deprehenditur; ac demùm rigores inordinatè recurrunt. E doloris situ internoscitur paraphrenitis, quam præterea concomitantur ructus, nausea & vomitus, cardialgia, anxietates, singultus, risus sardonicus, &c. Parùm discrepat respectu *signorum* hepatitis, à pleuritide & à paraphrenitide; præsertim si phlogosis partem hepatis gibbam, diaphragmatique hærentem invadat; cùm dolores indè exsurgentes totum pectoris ambitum pervadere, vel ad claviculas & scapulas pertingere queant. Nec dilucidius se sistit *cordis & pericardii inflammatio*, morbus aliàs rarissimus; cùm eadem fermè symptomata post se trahat; nec dissimilibus signis se prodatur. Notandum sanguinem in omnibus ferè hisce morbis inflammatoriis, phlebotomiâ eductum, parte rubrâ compactum, & crustâ, ut inquiunt, phlogisticâ rectum post unam vel alteram venæ sectionem in patellis conspici: haud tamen pro certo *phlogoseos indicio*, uti fertur, habendam esse hanc sanguinis concretionem pluriès experienciâ didici; & suprà notavi.

Quævis pectoris inflammatio sputo cruento stipata, nec ne, intrâ triduum, vel quatrimum, resolutione *judicari* potest; sed si febris, dolor, ceteraque symptomata, ultrâ illud stadium persistant; de suppuratione, aut infarctu skirrhoso nullum est dubium. Morbus ad decimum quartum, vel vigesimum diem in primo casu protrahitur: in secundo verò ulterius protelatur, donec sensim chronicorum faciem induat. Equâcumque

pectoris

pectoris inflammatione, aliarum instar, nonnunquam emergunt metastases; quæ à materiæ purulentæ in hanc vel illam partem accubitu, plùs minùsve *ominosæ* censentur. Peripneumonia, rufis infensissima, omnium frequentior eò majus portendit periculum, quò horror febrilis, ineunte morbo diutiùs protrahitur; & sputa tardiùs procedunt. Secundis verò avibus judicari solet, si subcruenta & conglobata se prodant: haud levem molestiam pariunt glutinosiora & ægrè è bronchiis avellenda: serosa, biliosa & subviridia summum terrorem incutiunt; æquè ac sanguine rutillante & spumoso scatentia: si nigra demùm conspiciantur, ad vespillonem mittere licet. Quandoquidem præcipua hujusce morbi solutio à congruâ expectoratione præsertim pendet, facilè intelligitur mortem præ foribus imminere, si planè deficiat, vel intempestivis remediis sufflaminetur. Ubi verò circà quartum morbi diem promovetur anacatharsis, & liberè in posterum exercetur, morbus circà septimum, nonum vel undecimum diem spontaneo sudore plerùmque *solvitur*. A doloris subitanæ cessatione, cæteris favientibus symptomatibus, gangranam esse in procinctu, & brevi lustricâ opus fore, nemini practico non obvium.

Omnibus pro comperto manet pulsus, sub hocce morbo, esse praxeos cynosuram; ideò haud instituenda est *prognosis*, ni priùs attendatur ad cordis rhythmum & caloris gradum: pulsus enim durus & contractus, cum æstu acriori & cute aridâ, nil boni spondet: quò minùs à nativo statu recedit, eò major affulget salutis spes. Plura etiàm eruuntur è doloris typo; obscurus enim phlogosim interiora pulmonum occupantem indicat; undè expectoratio faciliior: ab acuto verò inflammatum esse pulmonis ambitum conjicitur; nec fortè inculpatam esse pleuram; cur sit ut morbus periculosior evadat. Clinicos tamen monitos velim, *autopsiâ cadaverum* edoctus, dolorem nonnunquam fuisse sævissimum, illæsâ pleurâ; quod præsertim evenit, si pulmo huic membranæ connectatur; quam cohæsiorem, etiam in pancraticâ sanitate, sæpissimè observari, neminem anatomicum fugit. Sudor uberior sub primis morbi diebus haud vano metu clinicos terret; sed circà septimum diem, evacuationis criticæ vices explet. Salubriora munia sæpiùs obiisse tempestivum vomitum biliosum, haud latet in arte peritos.

Urinæ subalbicantes & faculentæ, circà septimum, nonum vel undecimum morbi diem, cum ægrorum solamine non rarò minguntur. Si crassæ sub principio, circà quartum diem attenuentur, pro lethalibus habentur. Porracæ cum sedimento nigro aut furfuraceo in pleuritide mortem etiam minantur, notante DURETO. Mali etiam est ominis urina cruenta. Copiosior ineunte morbo nil boni spondet; nec minorem terrorem sub eodem tempore incutit uberior sudoris proventus. Aliàs nil certi de *eventu* statui potest ab uroscopiâ. Nec certiora salutis vel mortis *auguria* desumuntur ab alvi fluxu; qui tamen, procedente morbo, ominosus in plerisque censetur. De hæmorrhagiâ res etiam in ancipiti versatur. Sed faustum pollicentur exitum abscessus ponè aures, in dorso, femoribus, &c. erumpentes.

INFLAMMA-
TIO
PECTORIS.

Respiratio econtrà singultuosa vel anxiosa, & ronchus ad ultimam rerum lineam ducunt. Delirium cum vultu tumido & flammeo, pro exitiali habetur: nec à linguâ aridâ & nigricante, vel ab aphthis lividis, passim in ore occurrentibus major spes elucescit. Lethum postremò imminet, si sexto morbi die recrudescent symptomata; vel nova gravioraque caput exerant; si post febrem vehementiorem & calidiorum usum ingruant anxietates & lipothymia; extremorum frigus & maculae lividae circa pectus, cum sputo seroso, fusco & graveolente, aliisque gangraenae signis. Peripneumonia scorbuticos & scrophulosos invadens, calamitosa audit: grave etiam facessit negotium, anginam, aliumve morbum inflammatorium excipiens. Si dolor, tussis & febris ultrà solitum morbi terminum protelentur, & accedant rigores inordinati, anxietates, sudores nocturni, &c. peripneumonia in febrem hecticam, phthisim, vomicam, empyema & hydropem pectoris facessit. Abscessus movetur suspicio circa decimum quartum morbi diem, si parciora ejiciantur sputa, vel planè deficient; si febris inter noctem recrudescat cum sudore; remanentibus dolore, tussi, & spirandi difficultate. Quid sit postremò expectandum de materiâ morbosâ è pulmonibus secedente, ad hepar, alterumve viscus irrüente, nemo non intelligit.

Pleuritis & paraphrenitis labem gangraenosam parti affectæ plerumque impertiuntur: pus tamen nonnunquam inibi conficitur & emergit abscessus in majorem, minoremve molem succrescens, qui extus in quibusdam tabo sub digitis fluctuante, protuberat: in potiori verò parte pus in cavum pectoris effunditur; undè suboritur empyema: aliàs, sed rariùs, ad abdominis interiora, trans diaphragma, viam sibi cudit; hinc emergit ascites purulentus, quo brevi labefactantur viscera. Qui demùm phlogosim internam pectoris jam passi sunt, quamdam in huncce morbum proclivitatem contrahunt; cur postliminium, simili adveniente tempestate, ipsis impendet, quod primâ accessione periculosius censetur.

A *sectionibus anatomicis* colligitur pulmones bifariam labefactari; lividi scilicet, infarcti indurati, hepatis substantiam æmulantes, & mole ampliores reperiuntur. Circà horum ambitum occurrunt ecchymoses, pustulae suppuratae, maculae gangraenodeae; quæ visum fugiunt, si pleurae vicinioribusque partibus nectantur hæc viscera. Horum superficies obducitur *crustâ* quâdam *gelatinosâ*, subalbicante vel flavescente, leviter hærente, vel radente scalpello facilè eximenda: haud absimili etiam materiâ quandoque subtegitur pleura: eodem modo defædari hepar, intestina, aliaque viscera inflammata, suprà innuimus. A quâdam suppuratione genitam esse hanc materiam, membranæ instar pulmones obvolventem, credere par est; cùm post confirmatam pulmonum phlogosim, nulla alia sæpiùs pateant purulentiae indicia: insuper me pluriès observasse contigit similem materiam cum sincero pure immixtam. Crebriùs, ut propositum persequamur, deteguntur abscessus integri intrâ pulmonum substantiam, quæ aliàs ita pure scater ut à quâvis sectione undique diffluat ille latex: putridi demùm

in nonnullis & siderati deprehenduntur pulmones: sed rarò integri enumeratis modis labefactantur; sed sæpiùs alterutra pars, læva vel dextra; hic vel alter lobus afficitur. Coronidis loco animadvertere expedit circà morbi sedem, quòd nonnunquam, iudice autopsiâ, de dolore circà partem sanam conquerantur ægri, dùm silet latus affectum.

INFLAMMA-
TIO
PECTORIS.

Diversam labem præ se fert pleura, tùm costas succingens, tùm diaphragma obtegens, tùm mediastinum efformans; livida enim, extrà solitum crassa & cartilaginea; tuberculis obseffa; phlogosi correpta, ulceratione exesa, & siderata deprehenditur. Conspicitur tam in pleurâ quàm sub mediastino abscessus, cujus moles in immensum quandoque assurgit; adeò ut totus hujusce lateris pulmo penè oblitteretur. Simili quandoque modo labefactari videntur, quædam pulmonis plaga, & huic prospiciens pleura; sed ritè distinguere licèt, tam autopsiâ, quàm historiâ morbi, quænam pars fuerit primariò affecta, è quâ morbus in aliam fuit propagatus. Sub hoc conspectu genuinam pleuritidem, uti innuimus, morbum esse rariorem, tùm è nostris observationibus, tùm è naturæ rimatorum relatu per transfennam colligere datur. Has morbosas dispositiones excipiunt stagnationes serosæ, saniosæ & sæculentæ, quæ circùm pulmones & pericardium fluctuant. Cor prætereà diversimodè læsum deprehenditur; concretionibus polyposis sæpiùs scatet; ejus superficies subalbicans, ulcusculis exesa vel quasi tomentosa conspicitur; maculisque subalbicantibus, quæ uti jam innuimus, totidem sunt pelliculæ, exfoliationis instar, avellendæ, sæpiùs defædatur; præter quæ pericardium inflammatum, humore sordido oppletum, sideratum & cordi undiquè accretum, oculis subjicitur. Nonnunquam pericardio processibus quasi ligamentosis alligatur cordis mucro: nec rarò stagnat colluvies serosa vel sordida in pectore. Hepatis nonnunquam ingentis, aliorumque viscerum phlogoses; vermes in primis viis nidulantes, aliaque innumera imi ventris vitia, quæ parùm ad nostrum argumentum pertinent, consultò prætermittimus.

Nullum est dubium quin ad quamvis pectoris phlogosim, præcipuus *curationis cardo* in sanguinis detractione versetur: nec obstant fluentia catamenia; sed tùm secanda est saphena, ne intempestivâ revulsione sufflammentur; verumtamen in quâcumque parte celebrentur *venæ sectiones*, certis cancellis contineri debent; ne vires, plus æquò depletis vasis, ad promovendam expectorationem, aliudve naturæ molimen, planè deficient. Experimentiâ edocti & celebriorum practicorum consensu suffulti, asserere minime dubitamus haud ultrà ter vel quater sub primis morbi diebus venam tundendam esse; & magis profuturas paucas venæ sectiones tempore opportuno peractas, quàm numerosissimas per reliquum morbi stadium institutas; quæ fugax solatium præstando, sæviora deinceps symptomata concitare queunt. Præclarus praxeos Medicæ arbiter SYDENHAMUS sanguinis uncias circiter quadraginta, tribus aut quatuor venæ sectionibus, mitti curabat. Famigeratissimus RIVERIUS, qui etiam ætatem inter experimenta consumpsit, haud ultrà sanguinem fundebat; quorum vestigiis

INFLAMMA-
TIO
PECTORIS.

inhæſiſſe celebriores & annioſiores præcticos, nemini haud incompertum. Ut quid de hâc re arbitrer, ne aſymbolus videar, candidè aperiàm; longiori, & fortè feliciffimâ, praxi edoctus pro certo habui, tres aut quatuor ſanguinis, ad uncias circiter duodecim, miſſiones omnibus infortuniis, à nimîâ ſanguinis copiâ, præcavendis apras natas eſſe; adeò ut haud niſi urgentiori caſu ad quintam vel ſextam me contuli. Inſuper nemo neſcit venæ ſectiões etiam pauciſſimas in nonnullis conſtitutionibus epidemicis, ubi præſertim debacchatur bilis, lethales eſſe; ſub quibus circumſtantiis, ab omni ſanguinis detractiõe planè abſtinere præſtat. His addere licet quòd venæ ſectiões, nemine diſcrepante, ſuppurationi officiant; quam natura circà tertium quartumve morbi diem auſpicari ſolet.

Haud reticendum plures, nec inferioris notæ, contrariam methodum ſectari; qui ſcilicèt in quâvis obviâ pectoris inflammatione, venam deciès, quindecîès & ultrâ ſecare jubent. Hanc *ſtupendam ſanguinis miſſionem* ferre valent juvenes & athletici; ſed multos in phthiſim vel hydropem, ſuperato morbo inflammatorio, delapſos vidi; ut ſileam de pluribus, quorum vires ab immodicâ vaſorum depletione fatiſcunt: cur fit ut promovendæ expectorationi impares evadant; & ſuffocatione, vel gangrênâ è medio tollantur. Sunt poſtremò qui velint phlebotomiam juxtà latus affectum celebratam magis proficua fore; cui opinioni adſtipulantur RIVERIUS & SYDENHAMUS: quod nec rationi nec experienciæ abſonum videtur.

Celebratâ unâ vel alterâ venæ ſectiõe, ad *emeticum* properare ſæpiùs expedit, ne primarum viarum ſaburra ad ſanguinem appellens, vel tractum inteſtinalem laceſſens, grave in poſterùm curanti faceſſat negotium: ſed rarò conducit illud remedium ſub aliis morbi temporibus. Haud tamen reticendum vomitoria, ineunte peripneumoniâ, à nonnullis prioris notæ clinicis tanquam pernicioſa, imò & lethalia planè abdicari; quod, pace illuſtrium virorum, experienciæ quotidianæ planè adverſatur. Declinante morbo opportunè exhibentur *cathartica*; aliàs cautè præcipi debent; ne ex horum intempſtivâ adminiſtratione, à nonnullis coætaneis acceptiſſimâ, plura emergant infortunia; inter quæ primatum ſanè ducit ſputorum ſuppreſſiõ quæ ægrum in vitæ diſcrimen trahit. Libera tamen ſervanda eſt alvus, vel laxantibus mitioribus, vel enematum emollientium præſidio: ſed ab hâcce normâ nonnunquàm deſſectere fas eſt; ubi ſcilicèt os ſordidum, lingua muco obducta, naufææ & vomitus, &c. pravam colluviem in primis viis nidulantem arguunt; ſub quâ conditione, nil non movendum ut foràs eliminentur ſordes, haud aliâ arte evincendæ. Expeditis primis viis, ſanguini æſtuantî proſpicere juvat; hinc apprimè congruunt per totum morbi curriculum, & fortè cæteris auxiliis præſtant, *diluentia* & *demulcentia*, quorum magis comprobata audiunt liquiritia, althæa, cichorium, hiſpidula & herbæ capillares; oleum lini & amygdalarum dulcium, ſperma ceti; ſyrupus de althæâ & de nymphæâ; mucilagines è ſemine lini, & gummi tragacantho extractæ; variî tinctus, emulſiones

simpliciores, aqua pulli, &c. Laudatur inter *temperantia*, præsertim in peripneumoniâ biliosâ, cremor tartari qui ad plures uncias intrâ nychthemeri spatium exhiberi potest, annuente clar. TISSOT. Prædictis opportunè sociantur *diaphoretica blandiora*, papaver nempè erraticum, flores sambuci, borrago, carduus benedictus, scorfonera & scabiosa. Nec id genus validiora sunt despicienda, sanguis nempè hirci præparatus, in nonnullis regionibus celebratissimus; kermes minerale, antimonium diaphoreticum, &c. *Hypnotica*, doloribus occurrendo, & spirituum ferociam coërcendo, nonnullis profunt: cautè tamen cum hisce remediis mercari expedit, præsertim in legitimâ pleuritide; licèt à pluribus prioris subsellii clinicis, familiarius usurpentur; refragantibus aliis non inferioris notæ, vel ipsomet HECQUETO opiatorum cæteroquin, uti nemo nescit, strenuo encomiastâ: cùm, falsas inducias impetrando, vel sputa sufflaminando, morbum quandoque occultent; qui hoc velamine obductus ex voto succedere videtur; dùm gangræna clancularias ægrorum vitæ struit insidias.

Inter *varia topica* quæ usurpari solent; summam fanè opem conferunt vesicatoria parti affectæ, alibive admota: equidem ex observatis constat morbos tùm acutos, tùm chronicos, sæpiùs solvi, vel ab eruptionibus cutaneis, vel ab humorum, materiæve morbosæ, in hanc vel illam partem affluxu. Hæc salubriora naturæ molimina promovent, vel æmulantur, cathæretica, quæ devios humores ad cutem, salvis visceribus, dirigere queunt. Scitur prætereà humores inquinatos per annosa ulcera sentinæ vices explentia expurgari; cur sit ut ab his exhaustis, tabum viscera impetere soleat. Neminem postremò fugit laticem purulentum in quâcumque parte collectum sæpiùs resorberi, & per varia colatoria exitum sibi parare. Hinc liquet profutura esse vesicatoria, consentientibus naturæ viribus, si materia morbosæ sanguini remixta metastasim internam minetur, vel aliò vergat. Eandem opem præstare valent cucurbitulæ scarificatæ parti dolenti, alterive impositæ; quæ etiam, sub sputorum subitaneâ suppressione, cruribus faustè affiguntur.

Proficue adhibentur, ad dolorem compescendum, cataplasinata *emollientia*, vel vesicæ lacte tepido semi turgidæ: eundem effectum edit inspiratus aquæ tepidæ vapor: in eundem scopum etiam commendantur linimenta ex axungiiis, medullis, unguento de althæâ, oleo lumbricorum vel laurino, &c. parata; quibus nonnulli addunt camphoram. Balsamum tranquillans, aliaque narcotica externa, in ferocioribus & urgentissimis doloribus, cautè usurpare fas est; aliàs exulare debent. Ad anilia medicamina perperam amandatur dimidium panis, recens è furno extracti; cùm sæpiùs hoc solo & innoxio præsidio conticeant dolores: nec minorem opem præstat felis viva exenterata dolenti parti admota. Eò magis profutura hæcce topica, quò cuti proximior est sedes morbosæ; cùm major tùm spes affulgeat ut purulentia divertatur, luce clariùs patet: sub quo scopo

INFLAMMA-
TIO
PECTORIS.

à quibusdam usurpantur emplastra maturantia, quæ cuti acutè infixa, pus hùc movere & dirigere queunt. Plures demùm, etiam conclamatos, fausto bearunt eventu cauteria & fetacea, loco congruo imposita: sed parùm arri- dent hæc stimulantia, & molestiora topica, clinicis qui ad ægrorum vel adstantium nutum se componunt: hinc minime mirum, si decumbentes, hisce salubrioribus præsidiiis plerùmque defraudentur. De pleuritidis, aliarumque suprà enumeratarum pectoris inflammationum curatione nil addimus, cùm haud absimili methodo, dummodò accurata circumstantia- rum habeatur ratio, pertractari soleant. De vomicâ verò & empyemate, quæ pectoris phlogoses excipere solent, suo loco agemus.

PERIPNEUMONIA NOTHA.

PAUCIS fanè innotescit hic affectus, licèt in ætate provectâ haud in- frequens: cùm nulla fortè prosteret apud Authores hujusce accurata descrip- tio. De hoc perfunctoriè egit RIVERIUS, sub nomine peripneumoniæ pitui- tosæ: morbos planè diversos sub uno & eodem titulo adumbrarunt SY- DENHAMUS & BOERHAAVIUS; nihilque fortè præter hypotheses tradide- runt. È recto desleclunt tramite qui post BOERHAAVIUM, hunc pulmonum infarctum, ultimi fati, in omnibus ferè morbis, prodromum, pro peripneu- moniâ nothâ habent: nec feliciùs collineant quibus arridet, hanc inter mor- borum symptomata, numerare. Constat propriis observationibus peripneu- moniam spuriam morbum esse sui generis, vel per se existentem; qui peri- pneumoniæ legitimæ typum sapiùs æmulatur; adeò ut in solo pulsûs rhythmò discrimen inter utrumque morbum versari videatur. Merum esse *vasorum pulmonarium* recentem *infarctum*, à phlogosi planè alienum; sed ab stagnante latice, ut inquiunt, pituitoso ortum credere par est. Tussì & spirandi diffi- cultate, dolore obscuro & gravativo, præcipuè stipatur. Sputa in plerisque albicantia, viscida, & spumosa, rarò cruore tinclta erumpunt: pulsus, etsi febrilis, tardus & contractus deprehenditur: inordinatè recurrunt rigores; vel frigus & calor alternatim invadunt; lingua lento humore madida con- spicitur: anxietatibus anguntur ægri, qui aliàs morbofo sopore premun- tur, &c. *Obscurum* sæpè est hujusce morbi *exordium*; unde fit ut de ejus stadio vix quid certi proferre liceat. Veruntamen, non secùs ac peripneu- monia legitima, intrâ triduum quatrduumve solvi potest: aliàs ejus cur- riculum sat accuratè æmulatur; cur minime mirum si hanc pro illâ habeant inexperti; ni paroxysmum asthmatis se curare arbitrentur. Cum legitimâ tamen nonnunquàm implicatur *peripneumonia notha*; undè emergit morbus ancipitis naturæ, qui etiam peritioribus grave facessit nego- tium.

Sopor lethargicus, fœdus faciei & unguium livor, raucedo, anxietates & artuum refrigeratio, imminentis *interitûs metum* incutiunt: sed sæpiùs silent hæc symptomata, latetque periculum; adeò ut inter spem felicioris exitûs, illuc quandoque abeant ægri, undè negant redire quemquam. In locis humidis & paludosis sæpiùs grassatur peripneumonia notha; præsertim sub tempestate humidâ & frigidâ. Senibus prætereà impendit hic morbus; ad quem etiam proni sunt cachectici & phlegmatici, nec parcit potatoribus. Crebriùs uno verbo occurrit in praxi hæc peripneumoniæ species, cujus typum nequidem in suspicionem admittunt imperiti: quid hinc emergat proclive est intelligere.

PERIPNEU-
MONIA
NOTHA.

Experiundo didici *curationem* esse festinandam, cùm sæpiùs, sub hac rerum conditione, serò medicina paretur. Rarò conducit venæ sectio, quæ tamen urgente spirandi difficultate levamen fugax impertiri solet; sed haud dubitare licet quin à detractò sanguine imminuantur vires, difficiliùsque promoveantur sputa; undè morbus gravior & periculosior evadit. Præsentaneam opem fert *emeticum*, præsertim ubi ægri nausæâ vexantur; cùm sæpiùs saburra in primis viis nidulans primariam morbi causam recondat: nec minùs conferunt evacuantia per alvum, cathartica nempè & laxantia, vel enemata his obsecundantia. Haud omittenda sunt diluentia aquea, quorum ope lenti & hærentes succi blandè solvuntur & faciliùs expelluntur. Proficuè etiam adhibentur pectoralia, demulcentia & incidentia; hederà nempè terrestris, hyssopus, aqua mulsa, sperma ceri, kermes minerale, &c. Nec suis laudibus defraudantur diuretica & aperientia prioribus immixta; nimirum enula campana, nitrùm, saponès, oxymel scilliticum, spiritus cornu cervi, & alia, quæ intimiora corporis penetralia adeundo, viscidiorum humorum stases solvere queunt. Inter paregorica decantantur camphora, anodynum minerale, &c. sed vetantur narcotica; dummodò solerti manu tractentur. Haud denique posthaberi debent vesicatoria vel cucurbitulæ scarificatæ, quæ humores noxios alliciendo, aliquam horum partem eximere valent.



ASTHMA ,
ET MORBI
COGNATI.

ASTHMA , ET MORBI COGNATI.

Hoc titulo perperam insigniuntur *varia spirandi difficultates*, à genuino asthmate summè discrepantes; & illuc res rediit ut è decem ægrotantibus qui pro asthmaticis curantur, vix unus occurrat, qui vero hoc morbo laboret: mirari profectò subit clarissimum FLOYERUM, qui asthmate ipsemet confictatus, ejusque accuratissimam descriptionem tradidit, hujusce fortè erroris haud immunem fuisse. Scitur ex autopsiâ cadaverum ab innumeris causis promoveri spirandi difficultatem, quæ vulgò dyspnœa audit; nempe ab œdemate, tuberculis, vomicâ, aliove pulmonum vitio; à cordis mole; à latice stagnante, vel tumore, tum in pectore, tum in abdomine; à pravâ pectoris conformatione, congenitâ vel adventitiâ, &c. quæ omnes *anhelationis* species pro asthmate ab imperitis habentur. E benè perspectis tamen signis facile expiscatur asthmatis indoles, quæ in perennante vel chronicâ spirandi difficultate per se existente, nunc continuâ, nunc intermittente; sed semper periodica; & cujus diversi sunt gradus, versatur. Hinc patet hanc spirandi difficultatem omnes pectoris morbos pedissequam, aliove morbo pendentem, alterius esse commatis. *Asthma* morbus sui generis, ut plurimum febris expers, duplicem habet conspectum: sub hoc nulla promoventur sputa; sub illo copiosa diversæ sortis, vel purulentia faciem referentia erumpunt: primum *siccum* audit, alterum *humidum* vocitatur. Utrumque ratione gradûs dyspnœa, asthma vel orthopnœa dicitur: sed de hâcce nomenclaturâ in scholis celebratissimâ parùm curant clinici.

Alterutrius naturæ asthma suos habet paroxysmos plus minùsve conspicuos; quorum gravioribus hiant ore aërem captant ægri; nec nisi erectâ cervice spiritum ducere queunt. Noctu vel post prandium insurgere solent *accessiones*; cur fit ut plures ægri è lecto, ad captandum aërem, sese cum impetu proripere cogantur. Tussi ut plurimum, stertore & sibilo stipantur insultus, qui à bihorio ad diem integrum & ultra protenduntur; & sæpissimè insolito urinæ profluvio solvuntur. Nec rarò convulsionis est particeps *insultus asthmaticus*; hinc fit ut tumentibus venis excandescat facies; atque ægri suffocationis periculum incurrant: brevior sanè, crebriùsque recurrens est spasticus paroxysmus, quem præeunt ructus, ventris inflatio, aliaque flatulentia indicia. Nil certi tradi potest de paroxysmorum interstitiis, nunc duodecim vel quindecim dierum, nunc unius vel alterius mensis, anni, &c. eò tamen ampliora videntur lucida intervalla, quò longiores sunt insultus. Nonnunquam insuper asthma, præsertim siccum, continuum, uti suprâ notavimus, observatur: sed quibusdam exacerbationibus semper subjicitur, quæ paroxysmorum vices explere videntur: atque in

in hisce periodis, licet haud statis temporibus recurrentibus, versari genuinum asthmatis typum, ex enarratis facile colligitur.

Ad asthma proclives censentur plethorici & obesi; cachectici, scorbutici, arthritici, hypochondriaci, hystericae, &c. Hunc affectum promovere valent eruptionum cutanearum, & chronicarum regressus, arthritidis anomala, annosorum ulcerum exsiccatio, mensium & haemorrhoidum suppressio, &c. Inter reliquias variolarum, phlogoseos pectoris, & febris intermittens etiam numeratur. Asthma continuum accersit aer quovis pulvere per eum volitante, halitibus mineralibus, fumo carbonum, &c. inquinatus; quibus addere licet pravam pectoris conformationem. Inter morbos pertinaciores jure recensetur asthma, quod ad triginta, quadraginta vel quinquaginta annos protelatur; nec longaevitati obstare videtur: si tamen cordis palpitatione, lipothymiis & artuum paralyfi stipetur, res est periculosa alea: ad certum enim gradum deVectus hicce morbus, accedente gravissimo insultu, agros nonnunquam è medio tollit; vel in cachexiam, anasarcam, pectoris hydropem, tabem, phthisim, &c. facessit.

Haud desunt sanè *observationes anatomicae*; sed aegrè distinguitur, nùm genuinum asthma, aliudve cognatum morbum respiciant. Ex his tamen benè perspectis colligitur, pulmones subtumidos & mole ampliores, oedematosos & skirrhosos; gypseos, tophaceos, vel cretaceos; maculis nigris & gangrenosis signatos; crustâ quâdam obductos, pleurae, mediastino & diaphragmati accretos reperiri. Abscessus, hydatides, aliosve tumores cysticos haud rarò recondit praedictum viscus; quod etiam tuberculis, concretionibusque lapideis scatet, vel purulentiam, putredine & gangraenâ defœdatum deprehenditur. Occurrunt bronchia à diversis inspiratis pulveribus obstrueta; exulcerata & materiâ purulentâ, quasi pultaceâ, obturata. Tracheam quandoque impediunt sarcosae, mole & numero variae; quae aliàs è pulmonum ambitu prodeunt; vel è pleurâ, ejusque processibus nascuntur. Observantur tumores aquâ, materiâ pultaceâ, sanguine, pure, vermibus, lapidibus, &c. scatentes; quibus trachea & pulmones comprimuntur. Bronchia in nonnullis osseam duritiem assequuntur; claviculis, granis frumentaceis, carnis frustulo, aliisque corporibus extraneis fortuito deglutitis obstruuntur. Thymus quandoque ingens; & glandulae bronchiales tumidae observantur. Occurrunt aneurismata in pectore latitantia; aorta ossea & tuberculosa. Planè inculcata in nonnullis reperiuntur viscera; si cor excipias, quod mole amplissimum ante oculos versatur; cujus superficies ulcusculis exesa, vel pericardio accreta annotatur. Stupendo in quibusdam adipis proventu obruitur; & quasi tumulatur praedictum viscus: nec absimili causâ totum saepius tumet mediastinum: cur minime mirari subit si ab hac adiposâ mole, emergat pulmonum angustia; eundem ferè effectum exerit hydrops pericardii. Insuper utriusque ostii valvulae osseam vel petream duritiem referunt: eandem lationem cernere licet in aortâ, ejusque propaginibus. Thalami sanguine compacto, vel, ut inquiunt, polypofo, tumidi deprehenduntur; ac auriculae supramodum dilatatae.

ASTHMA,
ET MORBI
COGNATI.

ASTHMA,
ET MORBI
COGNATI.

Repertum fuit foramen ovale patens & minimum digitum admittens. Pleuram insolitâ crassitie & stupendâ duritie labefactatam; adeò ut hinc emergeret alter pectoris ambitus, soliditate vix naturali cedens, observasse memini; aliique annotarunt. Mediastinum crassum, aquâ vel sanguine turgens conspicitur. Serosa postremò, cruenta, vel purulenta colluvies omnes, tum pericardii, tum pectoris recessus sapissimè replet.

Varia etiam observatu digna exhibet *abdomen*: diversimodè nempe defœdata visenda se præbuerunt digestionum organa: annotantur enim tumores & tubercula in ventriculo, qui æruginosâ colluvie nonnunquam turgēt, flatu distenditur, & è genuinâ sede depellitur. Hepar discolor ad insolitum molem exurgit, vel infarctu skirrroso, purulentiâ, putredine, &c. contaminatum, diaphragmati & nothis costis morbosè accretum, tuberculosum, hydatidibus fœtum, crustâ obductumprehenditur. Eadem vitia conspici licet in liene, pancreate, mesenterio, aliisque imi ventris visceribus; præter tumores diversæ fortis, variamque colluviem. Parergi loco addere expedit haud rarò occurrere asthmaticorum cadavera, quorum viscera, tum pectoris, tum abdominis, nullum vitium conspicuum contraxerunt: haud sanè mirum; si cultro anatomico subjecti asthmate convulsivo & periodico, cujus causa in nervis delitescit, dum viverent, torquerentur. Præterea evidens est hanc multiplicem viscerum, aliarumve partium labem, quam exhibet cadaverum scrutinium, alios morbos ab asthmate planè discrepantes respicere; ni tamen pro producto morbo in genuino asthmate nonnunquam haberi debeant; quod sanè rationi consentaneum videtur.

E præfatis colligitur arduam esse asthmatis *curationem*, cum multiplici causâ, in cimмериis tenebris ut plurimum demersâ, progignatur; vel potius diversi sunt morbi qui ob eundem effectum quem edunt sub eodem titulo perperam comprehenduntur, adeò ut in hisce angustiis satiùs fortè foret, instituto congruo victûs regimine, ab omni curatione planè abstinere; vel ad medelam diversis tentaminibus viam cautè sibi parare; adeò ut curatio merè empirica videatur. Inter varia præsidia adversus hunc contumacissimum morbum usurpari solita, primatum ducunt *venæ sectiones*, quarum sinistros effectus sæpiùs plangunt saniores Medici; cum, etsi temporarium solamen impertiuntur, omnia à detractò sanguine in pejus plerumque ruant. Ubi tamen vasa sanguinea ultra modum turgent; vel sufflaminantur menses & hæmorrhoides, aliudve consuetum sanguinis profluvium phlebotomiam profuturam faciliè crediderim. Haud vetatur etiam in urgentiori asthmatis convulsivi insultu, imminente scilicet suffocatione: aliàs exulare debet. Qui verò aliam methodum sectantur, undè flatu ostenditur, vela dare; & de morbi exitu, pessimo sanè consilio, parùm curare, videntur.

Conducunt *emetica* & *cathartica*, vigente asthmate humido; prima præsertim laudantur sub insultu; sed tutiora & magis proficua utraque censentur, si inter inducias exhibeantur. Congruunt in omnibus temporibus

diluentia & demulcentia ; serum nempè lactis vel ipsummet lac ; juscula è pulmone vitulino parata ; æquè ac ptisanæ , & apozemata , liquiritiâ , borragine , tussilagine & hederâ terrestri imprægnata. Parum abest quin specifici titulo gaudeant *pectoralia* , vulneraria , & incidentia ; hinc summis laudibus extolluntur camphorata , erysimum , abrotanum , hyssopus , marrubium , fatureia , arum ; baccæ juniperi ; gummi tragacanthum , vel ammoniacum ; sapo , aqua picea , terebinthina , varia officinalia è sulphure præparata , flores benzoini , balsamum Lucatelli , &c. quæ omnia haud indiscriminatum sunt usurpanda ; sed , pro re natâ , delectu opus est. Nec minorem opem præstant *aperientia* & *diuretica* , gramen nimirum , bruscus , feniculum , enula campana , bryonia , iris florentina ; aselli , nitrum , martialia , oxymel scilliticum , &c. Sed notare expedit circâ aperientia , incidentia , aliave stimulantia ; quòd haud nisi summâ cautelâ in usum trahi debeant ; cum præposterè adhibita summam noxam inferre queant : nec latet in arte medendi peritos , plures astmaticos intempestivâ horumce medicaminum administratione ad fatum propeasse ; qui aliàs vitam diuturniorem curâ palliativâ , vel solâ probâ victûs ratione , traxissent.

Inter salubriora præsidia à prioris notæ scriptoribus recensentur *perspirationem moventia* ; quæ præsertim conferunt , si asthma à retrògressis efflorescentiis cutaneis , vel à materiâ arthriticâ sanguini remixtâ originem mutuetur ; inter quæ usitatiora audiunt scabiosa , carduus benedictus , guaiacum & lignum sassafras ; china radix & farsa parilla ; antimonium diaphoreticum , antihecticum Poterii , &c. Suas laudes etiam merentur *antispasmodica* , crocus nempè , succinum , & castoreum ; ubi scilicèt præ insultuum vehementiâ de læsis nervis injicitur suspicio. Nonnullis congruunt amara ; inter quæ cæteris præstat cortex peruvianus : pluribus demùm arridet haustus caffè , qui sub quibusdam circumstantiis aliquantulum auxilii præstare potis est. Pro supervacaneis vel noxiis , sæviante paroxysmo , habentur hypnotica , quæ etiam in aliis temporibus à sanioribus clinicis planè abdicantur. Agmen claudunt aquæ minerales , Vallenfes nempè frigidæ : Plumberianæ , Borbonienses Anselmenses , Baregienses , Montis aurei , Cauterienses , Dinenses , Balneolenses , Granenses ; aliæque thermæ quæ secretiora corporis adyta permeando , vel vascula impedita referando , omnium fermè chronicorum curam absolvere solent ; hinc minime mirum , si pro extremo Medicorum , de cæterorum remediorum efficacîâ despondentium , confugio habeantur.

Mira præstant , urgente paroxysmo , enemata emollientia , cathartica & stimulantia ; vel cum colocynthide , vino emetico , &c. parata. Juvant frictus in cruribus celebrati , nec non pediluvium tepidum. Imparia sunt superando morbofo obici sinapismi & vesicatoria ; ni accessio ultrâ plures horas proteletur ; sed præclara munia obire valent , si temporibus intermediis admoveantur ; præsertim post eruptionum cutanearum regressum , circâ quem notare expedit , quòd asthma à repulsâ scabiæ ortum nullâ arte

ASTHMA,
ET MORBI
COGNATI.

tutiùs fugari quàm ab iterum traducto hoc fœdissimo morbo. Vesicantium vires superare cauteria extrà paroxysmum imposita multiplici experientiâ comprobatur manet : hæc enim humores nocivos tractu temporis alliciendo , morbum cæteris auxiliis obsurdescentem eradicare queunt , nec fugit practicos eundem effectum sæpiùs præstasse ulcera à prævio abscessu , vel quâvis aliâ causâ fortè prognata. Nonnulli insultum fugant fumo tabaci , ope fistulæ notissimæ hausto : aliis prodest acetum sub eodem scopo naribus admotum , &c. Mantissæ instar addere licet haud levem noxam asthmaticis inferre aërem frigidum & humidum ; præcipuè si pectus haud accuratè cooperiant.

SUFFOCATIO.

IN propatulo se sistit hic morbus , à catarrho suffocante , de quo suprà multum discrepans ; non secùs ac ab orthopnæâ ; quæ est anhelationis chronicæ exacerbatio ; vel alterius morbi symptoma ; sed sæpiùs delitescit ejus indoles. Scitur sanè suffocationem *promoveri* à cursu ; ab iracundiâ , aliâve vehementiore mentis perturbatione ; à leviori atmosphærâ in excelsioribus montibus ; ab aëre crassiori in profundioribus fodinis , &c. Nec latet hanc concomitari incubum , anginam ; sanguinis vel puris è bronchiis eruptionem , &c. Notissima est suffocatio à bolo , aliove corpore incantè deglutito , fistulæ œsophagi impacto ; à tumore quocumque tracheam premente , &c. nec minùs obvia glottidis obstructio , tum ab excrescentiis polyposis huic parti , vel trachæe adnatis , tum à tuberculis & concretionibus lapideis è pulmone prodeuntibus , vel à quovis corpore extraneo per os hùc fortè intromisso. Variæ enim prostant apud scriptores medicos historiæ variorum corporum in glottidem , vel tracheam , illapsum ; frustorum scilicèt panis vel carnis , castaneæ , pomi , pyri , &c. pisorum & phaseolorum ; nucleorum cerasorum & prunorum ; uvarum acinorum , &c. Facile demùm intelligitur suffocationem excitari , si trachea & bronchia , post hæmorrhagiam narium , vel oris , sanguine obruantur ; quod semel accidisse memini in viro , aliàs atletico , qui post hæmorrhagiam narium , intempestivo somno indulserat ; à majori & subitaneo puris profluvio in cavum pectoris ; à disruptione aneurismatis , &c. Sed haud singulis perspicuum fit , an suffocatio prodeat ab affectu hypochondriaco , vel hysterico ; à catarrho suffocante , ab hydrope pectoris & empyemate : nec liquet nùm à disrupto aneurismate , à peculiari cordis morbo , &c. concitetur.

E præhabitis conspicuum fit suffocationem plerumque esse symptomaticeam ; vel enumeratos morbos , de quibus alibi , respicere. Quapropter nobis in præsentiarum agendum incumbit de hâc solâ *suffocationis specie accidentali* , quæ à *submersione in aquam* , vel ab inspirato aëre *musto*

effervescentiâ, fumo carbonum, halitibus mineralibus, vel *mephiti*, inquinato; quæ scilicet gravioris syncopes faciem brevi induit; adeò ut miselli ægri vitæ planè expertes videantur. Sed è relatu pristinae sanitati restituto- rum, pro comperto manet primam invasionem meram fuisse suffocationem, quæ ad certum gradum devectorum functiones animales & vitales ita impedit, vel obscurat, ut jacentes vix à mortuis discrepent.

Ad propositum minime attinet farcoses polyposas, & corpora extranea glottidi infixa; nec variam colluviem, quâ pulmones intus vel extus obruuntur; aliasve jam enumeratas suffocationis causas recensere: cur ea duntaxat notatu digna, quæ colliguntur è *seçtione* subito extinctorum ab aquâ, vel aëre quodam inquinato, exhibebimus; quæ sic se habent. Vasa cerebri ultra modum tumentia deprehenduntur: cordis receptacula insolitam amplitudinem referentia sanguine obruuntur: patent ejusdem laticis stases intrâ tumida pulmonum vasa: in propatulo demùm fiunt ecchimoses & stigmata diversæ fortis in pulmonum, aliorumque viscerum ambitu. Sed illud notandum incumbit, quod stomachus eorum qui in aquis animam efflarunt, ne minimam aquæ copiam, uti vulgò fertur, excepisse: quod phænomenum altâ mente tenere debent clinici, qui vulgi præjudiciis obcæcati eò collimant ut stomachus hâc commentitiâ sarcinâ liberetur, quid mali ex hâcce præposterâ methodo emergere queat, faciliè intelligitur. Membra postremò hisce infortuniis sublatorum plerumque rigida, cum dentibus constrictis, occurrunt; vel insolitâ flexilitate donantur: facies nunc rubra, nunc pallida se præbet; cætera consultò prætermittimus.

Sub hoc casu urgentissimo, missâ omni cunctatione, nil non movendum ut vires refocillentur, sensus revocentur, & morans sanguis solitum circuitum absolvat. Haud despondendum de iis qui mortuorum instar jacent; ni adsint putriditatis signa: cùm minime dubitare liceat, quin plures pro defunctis, pessimo fato, relictis, opportunorum ope auxiliorum ex orci faucibus fortè fortunâ evaserint: etenim variis historiis constat haud paucos, qui post plurium horarum submersionem pro mortuis lugebantur, præter omnium expectationem, ad vivorum numerum revocatos fuisse; sub quâ tamen conditione haud citrà piaculum libitinæ tradi solent: exemplo sit quidam aquis per sex horas submersus, cujus memorat PECHLINUS; atque mulier quæ tres dies sub aquis latuit, de quâ loquitur BOERHAAVIUS; quod, ut verum fatear, omnem fidem superat. Quapropter, nullâ interpositâ morâ, ad focum devehantur, & susceptum frigus sensim arceatur; diversis motionibus agitentur, & volvantur, ut sopiti spiritus suscitarentur. Sunt qui balneum cinerum calidorum, fîmetive calentis; vel pellem ovis recens mactatæ quâ obvolvuntur naufragi, suadent: sed ut plurimum in re urgentissimâ hæc desiderantur præsidia: hinc ad alia properare expedit; inter quæ primatum sanè ducit *venæ seçtio*, præsertim jugularis, quantocyùs celebrata. Intereà promovendus est vomitus pharyngis vellicatione vel quâvis aliâ arte: naribus & temporibus admoveantur spiritus flagrantissimi; vel ori guttatim instillantur. Conducunt errhina

SUFFOCA-
TIO.

SUFFOCA-
TIO.

validiora. Haud inutilem operam ludit aër, vel fumus tabaci, per os congruâ vi & compressis naribus insufflatus. Jure laudantur suppositoria & enemata acriora, vel è nicotianâ parata. Horum vices æmulatur & fortè superat, *fumus tabaci* per podicem injectus ope cujusdam instrumenti à BARTHOLINO, MUSCHENBROEKIO, aliisque recentioribus delineati: sed parvi habendum in re urgentissimâ præsidium quod nullibi præstò occurrit. Sunt qui *laryngotomiam* summè deprædicant: hanc necessariam fore, si glottis quocumque modo obturetur; sed inutilem judicamus, ubi liber manet hicce aëris aditus, quem inculpatum observari in defunctis ab aquâ, nemo nescit. Nec sufficiunt in hoc extremo casu nonnullæ periclitaciones: quin potius ipsis diutiùs inhærendum, cum plures ex aquâ extracti, vel *laqueo suspensi* jam conclamati, haud nisi post bihorium & ultrâ, quædam vitæ superstitis indicia incolumes præbuerint; quod sanè, etsi mirum & à publico rerum ordine alienum videtur, ultrâ omne tamen dubium positum manet.

Simili ferinè modo pertractantur suffocati ab aëre venenosis vaporibus imprægnato. Primò nempè, danda est opera ut ad locum editum ferantur: facies aquâ frigidâ inspergatur: aër compressis naribus per os insuffletur, ut irruat ad pulmones. Olfacienda admoveantur, acetum nempè acerrimum, sal volatile Anglicum, spiritus salis ammoniaci, aliaque consimilia. Illicò insuper *tundenda vena*: nonnulli proponunt emeticum; nùm rectè? cæteris judicandum relinquimus. Nec fortè feliciùs collineant qui antispasmodica & sedantia adhibent; quæ tamen si variis historiis sit fides, faulstè nonnunquam successisse videntur. Conducunt ultimò *sternutationem moventia acriora*; *enemata stimulantia* suprâ laudata, frictiones cum pannis asperis celebratæ, cucurbitulæ scarificatæ, aliaque innumera adversus syncopem & affectus comatosos adhiberi solita. Mantissæ instar, addere licet circâ suffocatos à quâcumque causâ, qui sensibus, pulsu & respiratione orbatî fati cessisse videntur; quòd de exequiis cogitare nusquam liceat; nisi variis præmissis tentaminibus, quibus erui possunt nonnulla latentis vitæ indicia; cum nulla certa, præter putrefactionem, occurrant, uti suprâ innui, obitûs signa. Itaque accuratè perspicì debent oculi qui peculiari modo infuscantur in demortuis, vel suo nitore planè defraudantur: admoveri debent vesicatoria acriora, quæ si phlyctænas promoveant haud mendacem vitæ notam produnt; cum planè inertia sint in cadaveribus: præterea infigitur ferrum candens in plantam pedum, &c. quæ omnia altâ sanè quidem mente tenere debent Medici suis muniis perfunctoriè hærentes; ne priusquam moriantur, horrendum dictu! sepulturæ tradantur quâvis causâ suffocati.



HÆMOPTYSIS.

IN ancipiti nonnunquam versatur hujusce morbi *diagnosis*; cum tanto sæpius proventu erumpat sanguis, ut pro vomitu cruento ab ipsismet ægrotantibus habeatur; vel, cum sputa tantummodò cruenta excreentur præ sanguine è naribus, faucibus, ore & glottide, inculpato pulmone, haud raro profiliante: nec ab hoc errore vindicantur solertiores; si in hisce casibus tussis à quâcumque aliâ causâ excitetur. Re tamen accuratiùs pensitatâ, minime arduum est inquirere, nùm sanguis è bronchiis prodeat, tùm enim rutilans & spumofus hic latex tussis ope ejicitur; præterea conqueruntur ægri sub hâc hæmorrhagiæ specie de æstu acriori, pruritu vel dolore quodam gravativo in parte affectâ: inspirandi insuper difficultatem sibi, nonnunquam vomitum adjungit hæmoptysis, quæ hisce notis, ab affinibus vel cognatis sanguinis profluviiis facilè *distinguitur*. Sanguis verò è partibus superioribus prorumpens per nares stillat, priusquam in propatulum veniant sputa cruenta: si è gingivis, vicinioribusque partibus prodeat, ab introspecto ore morbi sedes detegitur, & sanguis simplissimâ sputatione projicitur: si è faucibus exeat, titillationem non obscuram inibi excitat & excreatu everritur: si demùm disrumpantur vasa glottidem vel laryngem irritantia; molesta circa prædictas partes emergit sensatio; & sanguis cujusdam ronchi ope foràs, parcâ copiâ amandatur; vel sputa striis sanguineis tantummodò notantur: sed notandum quòd tussì stipetur hæc postrema sanguinis excretio; cur sit ut agrè sæpius à genuinâ hæmoptysi, ad quam proximè accedit.

Ex ipsâ pulmonum substantiâ exeuns sanguis; nunc solâ transudatione exprimitur, & vix sputa inficit; nunc disruptis vasis in bronchia sese exonerantibus, tantâ copiâ ad os appellit, ut de vomitu cruento nonnullam moveat suspicionem; præsertim si sanguis blandior, ne minimam inibi vellicationem concitet; nullamque vel leviolem tussim moveat; quod nonnunquam evenire haud fugit Medicos. Nùm cruor affatim è pulmonibus erumpens à disruptis arteriis evomatur; necne? ambigendi locus: sed illud dubium in medio relinquimus. Inter hæmoptyseos signa minime recenseri debet febris, quæ tamen ab æstuante sanguine nonnunquam excandescit; quâ fit ut imperiti, vel incauti, de peripneumoniâ perperam cogitantes, genuinum morbi characterem, nequidem subolfaciant. Nec magis ad hæmoptyseos notas pertinent quædam bronchiorum ramenta, quæ unâ cum sanguine è pulmonibus profluente, nonnunquam foràs detruduntur; cum illud phænomenon solos phthísicos ad hanc hæmorrhagiam, uti nemo nescit, proclives respiciat. In nonnullis sapor quidam falsus, quem ad sanguinem referunt ægri, anteit futuram hæmoptoem; fortè referri debet prædictus

HÆMOPTY-
SIS.

sapor sanguini bronchia laceffenti : non secùs ac colluvies amara in ventriculo nidulans oris amarorem concitat per consensum partium.

Hæmoptysis *contrahitur* à cantu, clamore, ruffi vehementiori; ab immani iracundiâ; à lapfu ab alto; ab ictu pectori illato; à conatu violento inter verfandas magnas moles, &c. Hanc fovet menfium vel hæmorrhoidum, aliorumque affuetorum fanguinis profluviorum, tùm fpontaneorum, tùm arte institutorum fuppreffio. Huic obnoxii cenfentur in otio recumbentes, æquè ac improbis corporis laboribus indulgentes; helluones & admiſſarii. Hanc caveant graciles & macilenti; juvenes à decimo quinto ætatis anno, ad trigefimum, imò trigefimum quintum; ſcorbutici; hypochondriaci, litterati, &c. Pronus denique ad hæmoptysim cenfetur fequior ſexus. *Periculi* eſt expers hic affectus, ſi cauſam accidentalem, illibatâ aliàs fanitate, agnoſcat, & certis terminis coërceatur: nil mali etiam expectandum, ſi catameniorum vices expleat. Sed periculofa eſt alex, ubi inveteraſcit, vel à jam diuturno morbo pendet; nec major ſpes affulget ab hæreditariâ. Nemo nescit hæmoptysim ad pulmonum ulcerationem vergere, præfertim in ætate juvenili: ſuffocationem minatur cruor pleno gurgite erumpens, vel moleſtiſſimas poſt ſe trahit reliquias.

Sec̃ta cadavera exhibent tracheam & bronchia fanguine vel fanie repleta; membranam has fiſtulas obveſtientem eroſam; clavos, aliaque corpora extranea hùc intromiſſa. Pulmones pallidi, contracti, duri & fanioſi, fanguine infarcti, nunc ſingulis partibus ambientibus hærent; nunc maculis gangrænodeis, vel exanthematibus ſignantur; aliàs phlogofi, puris collectione, exulceratione, vel ſckirrhis deſcædantur; tubercula etiam, concretiõesque lapideas recondunt; horumque vaſa fanguine turgent. Viſenda ſe præbent aortæ aneurifmata diſrupta, & bronchiis fanguine infarctis pervia. Obvium fit cor ſuo involucro nonnunquàm accretum, mole ampliſſimum, cum ſuis auriculis præter morem dilatatis: ejusque ſuperficies ulcuſculis eroſa deprehenditur. Occurrit ſeroſa colluvies tùm in pericardio, tùm in cavo pectoris. Sanguis demùm ſtagnans in contextu mediæſtini nonnunquàm conſpicitur. Nec minùs memorabilia annotantur in abdomine; oculis enim ſubjiciuntur hepar inflammatum, tuberculoſum, vel ſckirrhofum, lien triplo major, venæ portæ propagines ultra modum tumentes, &c.

Hæmoptyſeos accidentalis & recentis *curatio* coincidit cum eâ quæ congruit hæmorrhagiis: hæmoptysis verò chronica phthiſeos inſtar, ratione affinitatis, pertractari debet. Præſentaneam fanè, ineunte morbo, opem præſtant, in primo caſu, venæ ſectiões, quæ hanc fortè tutiùs præcavent: ſed haud majori quàm par eſt copiâ mittendus eſt ſanguis, ne proclives ægri in phthiſim delabantur. Depletis vaſis conducunt refrigerantia & demulcentia; hordeata nempè, emulſiones, decoctum oryzæ, althææ & nymphææ, oleum lini, &c. quæ ſub morbo leviori curationem abſolvere queunt: ſed ſi inter horum uſum ſanguis ubertim profluat, ad efficaciora deveniendum; ad adſtringentia ſcilicèt & vulneraria; in quorum cenſum
veniunt

veniunt pimpinella, urtica, consolida major, plantago, hederæ terrestris & pervinca; rosæ rubræ & balaustia, mucilagines, catechu, sanguis draconis, succinum, corallum, lapis hæmatites & globulus martialis. Urgente demùm necessitate, vel sanguine pleno gurgite profluente, ad alumen, oleum vitrioli, & essentiam Rabel confugere expedit: sed haud nisi summâ cautelâ præscribi debent hæc postrema remedia; ne intempestivâ, vel subitaneâ sufflamine, sæviora emergant symptomata. Nec vetantur narcotica, si tussis ferocior hæmorrhagiam foveat; id genus sunt diacodium, pilulæ de cynoglossa, trochisci de karabe, &c. cum quibus tamen cautè mercandum. Postremò minime sunt posthabenda vincula artubus injecta, ut, vasis infra ligaturam tumentibus, minor sanguinis copia ad cor & pulmones redeat; linthea aquâ frigidâ vel oxycrato imbuta scroto admovenda, aliaque adversus hæmorrhagias recentes adhiberi solita.

Apud saniores Medicos in confesso manet nil felicius usurpari ad hæmoptysim chronicam quàm *lacticia*, cremores oryzæ, hordei & avenæ; juscula è testudine, pulmone vitulino, &c. parata. Parùm conferunt in utroque casu cathartica: si tamen sordes in primis viis nidulantes ea expostulent; blandiora, ut cassia, manna, tamarindi, &c. sunt præscribenda. Omnia præsidia longè antecellit congruum victûs regimen; imò & opus est diætâ tenuissimâ, & demulcente, ubi viget hæmorrhagia. Aliàs danda est opera, ut à cupediis sapidioribus, vino & consimilibus, abstineant ægri; ut aurâ temperatiore fruantur & moderatè caleant: in otio insuper recumbant; atque præsertim sileant hæmoptysici, ne inter pulmonum actionem vascula recens agglutinata iterùm dilacerentur; sub quâ conditione cave phthisim, morbi, de quo in præsentiarum pedissequam.

P H T H I S I S.

SPUTUM sanguinis, tussis sicca, febricula vix conspicua, genarum rubor, æstus totius corporis, & præsertim volæ manuum, &c. sunt totidem phthiseos *prodromi*. Hanc produunt sputa fœda, glutinosa & purulenta; febris lenta & evidentior, quæ post pastum & serotinis horis exacerbatur; vox rauca & submissa, halitus fœtidissimus, respiratio impedita, dolor circâ pectus, vel ad dorsum pertingens, marasmus, ungues incurvi, &c. Non tamen in omnibus hæc spectabilia *signa* morbum in propatulo sistunt; quin potiùs his deficientibus, vel dubiis, haud rarò res in ancipiti versatur. Notare enim expedit tussim nonnunquàm esse siccam, nullumque erumpere scretum purulentum; etsi pectus pure scatet; imò & in quibusdam planè deficit tussis: nec desunt phthisici, haud procul à tabe remoti, liberè spiritum ducentes, & doloris planè expertes. Præterea asthma humidum, cum tussi chronicâ, non secùs ac catarrhus inveteratus, phthiseos faciem non

HÆMOPTYSIS.

PHTHISIS.

rarò præ se fert, quâ decipiuntur imperiti; tussis verò sicca & habitualis infidum phthiseos tuberculosæ signum præbet. Sola igitur *sputa purulenta* morbi characterem produnt; sed nùm hanc naturam redoleant? arduum quandoque inquirere; cùm quotidie excreentur in simplicissimo catarrho sputa subalbicantia, fœdissima, fundum aquæ petentia, aliasque sinceri puris notas referentia; quæ tamen ratione indolis ab phthysicorum sputis longè discrepant. Nec certiores depromuntur notæ ex odore quem referunt, & ex horum sapore solo ægrotantium relatu dignoscendo. Pus tamen prunis injectum, quid fœtidi exhalat, ab alio odore distinguendum. Nihilominus tantâ sæpius caligine obruitur hujusce morbi *diagnos*, ut nihil præter conjecturas assequi liceat, præsertim si à concretionibus steatomatosis, tophaceis, gypseis, &c. foveatur.

Noctes ut plurimum insomnes ducunt phthysici, & in alterutrum latus ægrè decumbunt. Cietur vomitus à tussi post pastum accedente: prorumpunt, præsertim noctu, sudores copiosissimi, pustulæque pruriginosæ totum quandoque corporis ambitum infestant. Accedit alvi fluxus, ut inquiunt, colliquativus, qui scilicet contabescentiam post se trahit; emergunt aphthæ in ore jam falsedine affecto: urinæ minguntur oleosæ: corpore jam macie confecto, excavantur oculi; nasus acuminatur; protuberant scapulæ; capilli decidunt; tument tibiæ, &c. Nonnulli demùm phthysici tubercula cum sputis excreant; non secùs ac calculos præduros, aut assicula diversiformia, hordei vel pisi magnitudine; corpora polyposa, ramenta pulmonum, vel membranæ bronchia obvestientis, &c. Nec semper hisce symptomatibus stipatur phthisis; cùm haud desint ægri quorum alteruter pulmo putredine planè absumptum, pure totum spatium replente post mortem deprehenditur; qui tamen, uti suprà inculcavimus, in alterutrum, facili manente respiratione, cubare queunt, nullo dolore premuntur, nec tussi molestantur, &c. Quod stupendum phænomenum pluriès, post accuratam prægressi morbi notitiam inter *rimanda cadavera* observasse memini.

Phthisim caveant quibus inest hereditaria labes, vel mala pectoris conformatio; & graciles staturâ oblongâ donati. Hunc morbum promovent castra veneris, liberaliorque vini, liquorum ardentium & cupediarum usus; consuetorum sanguinis profluviorum sufflaminatio; retrogressa eruptiones cutaneæ; arthritidis anomala; ulcera exhausta, &c. *Suboritur* ab asthmate, variolis & morbillis, peripneumoniâ, tussi catarrhali chronicâ, vulneribus, &c. Postremò inter luis venereæ, scrophularum, scorbuti, &c. symptomata numerari prædictum morbum neminem fermè latet.

Immedicabilis censetur phthisis hereditaria, confirmata, vel ad certum gradum provecta: accidentalis verò, quæ scilicet à peripneumoniâ, variolis, suppressis evacuationibus, &c. ortum mutuatur, curatu facilior evadit. Quoad symptomaticam, haud nisi sublato primario morbo eradicari omnibus obvium. Funeris metum incurrit febris acuta, hoc præcedente morbo, insurgens; prodit enim plerumque à tuberculorum phlogosi & purulentiâ: atque haud rarò intermittentium faciem præ se fert, licet alte-

rius sanè sit indolis. Minime mirum si febris acuta sub hoc rerum statu exurgens, pro calamitosâ habeatur; cùm neminem fugiat quòd morbi chronici qui in acutos vertuntur, cæteros sævitie & perniciæ antecellant: sputa copiosiora & fœdissima, suffocatio, alvi fluxus, sudores ubertim erumpentes, vel arenosæ; vultus colorem plumbeum referens, capilli decidui, atrophia & virium defectus, pro mortis præconibus habentur. Levem molestiam creant tubercula, ni phlogosi & suppuratione corripiantur. Constat tamen nonnullos phthificos, quorum sputa ultrâ omne dubium pus redolebant, congruo composito victûs regimine, per viginti, triginta annos & ultrâ, vitam traxisse: quod evenit ubi ulcus pulmonum haud latè serpens, fontanellæ instar sentinam præbet, quâ humores è noxiis, virulentisque materiebus expurgantur; adeò ut haud citrà periculum exsiccantur prædicta pulmonum ulcera. Nemo nescit phthitim inter consanguineos propagari; sed nùm pertimescendum sit illud contagium in conjugio nondùm liquet.

Sectiones anatomicæ horrendam & stupendam stragem à purulentiâ & putredine ortam exhibent: adeò ut mirari profectò subeat ægrotantes, his sic se habentibus, haud citiùs occubuisse. Conspiciuntur pulmones omnibus partibus vicinioribus arctissimè annexi; cur fit ut sine laceratione evelli nequeant. Visenda se præbet horum tunica crassissima, callosamque duritiem nacta. Dereguntur larynx, trachea & bronchia ulceribus exesa. Repertus fuit larynx sarcomate, vel frustulo pulmonis obstructa. Abscessus integros, vel apertos; tumores anomalos, materiam melleam, steatomatosam & putridam continentes; tubercula gypsea vel tophacea, & concretiones lapideas recondunt pulmones; qui etiam sæpiùs purulentiâ per totam substantiam serpente, vel putredine conspurcati se præbent. Nonnunquàm alteruter pulmo ulcere phagedænico planè absumptus deprehenditur, vel exiguâ parte superstite; ac tanta sæpiùs annotatur hæc horrenda strages, ut omnem fidem superet. In apricum veniunt pulmones exsuccii, aridi, scirrhusi; mediastinum purulentum & putridum. Occurrunt stagnationes saniosæ, vel purulentæ, tum in cavo pectoris, tum in ipso pericardio, ob cordis exulcerationem, quod aliàs putridum, vel adipe obrutum invenitur. Nec thymo, sæpiùs mali consorti, parcit purulentia; qui scilicèt ita in nonnullis pessundatur, ut pro præcipuâ morbi sede haberi queat. In consensum etiam quandoque trahuntur viscera abdominalia, hepar nempè, epiploon, pancreas, &c. in quibus easdem fermè defædationes cernere licet.

Venæ sectio, ineunte morbo, in nonnullis proficua censetur; aliàs inutilem operam navat vel noxam infert: de sanguinis detractioe notatè juvat, quod hanc præcipere soleant imperiti, in hacce febris acutæ specie, quæ à tuberculorum inflammatione & suppuratione sobolescit: sed ab hac intempestivâ sanguinis missione pluriès iteratâ, ad æthereas sedes properasse ægros pluriès vidisse memini. Nonnulli qui praxim à limine salutarunt, vel observationum anatomicarum fortè inscii, tussim phthificorum pro

PHTHISIS.

stomachali perperam habent : cur fit ut nil præter saburram in primis viis nidulantem cogitantes, cathartorum præpostero usui, reluctante experientiâ, hæreant ; quibus stimulantibus irritari crabrones nemo non intelligit ; hinc minime mirum si plectantur ægri, quidquid delirant medentes. Haud tamen vetantur hæc remedia in pravis digestionibus ; sed blandiora sunt eligenda, & cum cautelâ præcipienda, ne vehementiori pulmonum æstu, quem accersere solent id genus medicamina, tussis recrudescat. Inter remedia phthisi dicata primatum sanè ducit lac ; nil enim efficacius reperiri, tam ad sanandum, quàm ad præcavendum huncce morbum, experientia quotidiana testatur : usitiora sunt asininum, equinum, caprinum & vaccinum ; quæ duo postrema pro omni alimoniâ usurpari solent ; adeò ut alimentum, ut inquiunt, medicamentosum præbeant : hæc est *diata lactea* circa quam, si nil obstet, totus versari debet phthiseos curationis cardo : si ab injecto lacte gravatur stomachus, hydrogala, vel lac copiosâ aquâ dilutum præscribitur. Eundem fermè effectum præstat lac ebutiratum : huic obsecundant pectoralia demulcentia, borrago nempe, pulmonaria, herbæ capillares, tussilago & hispidula. Lactis vices supplere queunt juscula è pulmone vitulino, vel testudine parata, cremores hordei, oryzae, &c. Prodest sub phthisi tuberculosâ, notante BOERHAAVIO, succus endiviæ, lactucæ, cichorii & taraxaci. Præclara etiam munia obeunt *pectoralia* vulneraria & detergentia ; veronica nimirum, hypericum & hederæ terrestris ; benzoinum & gummi ammoniacum ; balsama naturalia, balsamum Lucatelli, varia officinalia è sulphure parata ; aqua picea, pilulæ balsamicæ MORTON, &c. sed cautè usurpari debent hæc postrema ; ne ab horum præpostero usu, jam æstuans sanguis ulteriùs excandescat. Nil ad morbi curationem conferre videntur absorbantia, sed variis symptomatibus, nimirum acescentiæ primarum viarum, alvi fluxui, hæmorrhagiis, sudoribus immodicis, &c. opitulari queunt.

Inducias agunt diacodium, pilulæ de cynoglossò, aliaque hypnotica ; sed cautè & opportunè debent exhiberi, atque certis cancellis contineri, ne symptomata leniendo noxam inferant ; morbumque jam adultum exasperent. Quandam opem præstare solent, morbo nondum provecto, aquæ minerales balsamicæ, Bonenses nempe, Baregieneses, Montis Aurei, Cauterienses, Balneolenses, &c. Selteranas, non secùs ac aquam calcis, opportunè sæpiùs lacti immisceri jam suprà notavimus. De mercurialibus, sudorificis, aperientibus & incidentibus, antiscorbuticis, &c. quæ phthisi duntaxat symptomatice congruunt, nil addimus : nec de cortice peruviano quem phthisicis præscribere haud detrectant, post BAGLIVIVM & ipsūmet BOERHAAVIUM, celebriores Medici ; quod, pace secùs sentientium, incongruum judicamus. Postremò equitationi indulgeant ægri ; se ambulando exerceant in loco edito, vel juxtà flumina ; aurâ temperatâ fruantur : aëremque inquinatum fugiant : versentur inter abietes & pineta ut aërem terebinthinaceis effluviis imprægnatum inspirent. A vino, liquoribus fermentatis, aliisque luxuriosæ gulæ humidis blandimentis ; ab eduliis salis, piperatis, &c. abstineant ; &c.

victui vegetabili quantum licet hæreant. Nonnullis prodest fumus herbarum vulnerariarum, vel bechicarum cum balsamis immixtarum, fistulâ congruâ haustus. Plures demum fausto beavit eventu cauterium occipiti, scapulis, alterutrove brachio inustum, quod non nihil de materiâ morbosâ alliciendo, hanc sensim prorsus eximere valet; præcipuè ubi phthisis à catarrho chronico, vel à quâlibet metastasi ortum trahit. Ubi demum de peculiari quodam dolore in pectore conqueruntur ægri; egregiam opem fert setaceum, cuti parti affectæ prospicienti trajectum: ac fortè nihil efficacius excogitari potest.

PHTHISIS.

V O M I C A.

OCCULTATUR in plerisque hic affectus, donec à disrupto intrâ pulmones latente abscessu, pus vel parcâ copiâ, vel pleno gurgite haud citrà suffocationis periculum ad os irruat. Haud tamen suis *signis* defraudatur hæc puris collectio; tussiculâ nempè post pastum molestiori, nunc ficcâ, nunc humidâ tenentur ægri, & de dolore pectoris obscuro conqueruntur: respiratio ab angustatis loculis pulmonaribus, nonnihil impeditur cum difficili decubitu in latus sanum; halitus fœtet & os inquinatur: plures anxietatibus laborant, sudoribus nocturnis diffluunt, vel alvi fluxu corripuntur: alii fame quasi caninâ urgentur, vel cibi fastidio laborant; cum febre lentâ horis ferotinis exacerbândâ conflictantur. Abscessûs à pulmonum phlogosi sobolescentis movetur suspicio, circâ decimum quartum morbi diem; si malè se habuerit expectoratio, vel planè defecerit; si febris noctû cum sudoribus recrudescentibus subsistat; si haud desierint dolor, tussis, spirandi difficultas, aliaque purulentiae symptomata. Ubi verò ortum ducit hic morbus à fluxione catarrhali chronicâ, aliâve pectoris læsione; à suppressis evacuationibus, vel repulsis eruptionibus, exhaustivæ ulceribus externis; à contusione vel à vulnere; à metastasi febrium malignarum, putridarum, &c. clanculûm sæpè conficitur pus; nec nisi hoc erumpente se profert morbus. Post tabi à disruptâ cystide evacuationem, sputa in plerisque prodeunt purulenta, sublutea, saniosa vel fecum vini faciem referentia; livent digiti; tument crura; aliave se produnt phthiseos *symptomata*. Nec desunt qui unam integram vomicam, ovi columbini, vel gallinacei, magnitudinem adæquantem, imò & plures, haud sine suffocationis periculo, rejiciunt.

A tussi, clamore, sternutatione, aliâve pectoris commotione *dilaceratur abscessus*, sed cystidis hiatus haud semper bronchiis prospicit, quibus pus exitum per os sibi parat, quin potiùs in cavum pectoris nonnunquam diffunditur hic latex & inibi delitescit; donec partibus obviis labem inferens graviora concitet symptomata, in empyemate purulento observari

VOMICA.

solita. Addere lubet quod sæpiùs evenit ut collectum pus trans pleuram, musculos intercostales, diaphragma, ipsūque hepar viam ad exteriora sibi cudat; hinc fit ut felici sanè quidem exitu, nonnunquam in gracilibus extùs protuberet abscessus; qui tūm notissimā arte chirurgicā aperiri solet.

Vomica inter morbos *calamitosos* jure censetur: plures enim ab uberimo puris, ad libram unam vel alteram accedentis, proventu suffocati, illicò è medio tolluntur. Ulcus à disrupto abscessu in nonnullis emergens latius serpit, & phthisim indomabilem patit. Hoc impendet infortunium, si accedentibus cæteris prædicti morbi indiciis, sputa purulenta & fœda ultrà quadragesimum diem ejiciantur. Haud rarò accidit, ut ulcus apertum certis terminis coërceatur; adeò ut exhinc emergat sentina, quæ sanguis & humores, uti suprà notavimus, à noxiis materiebus per *anacatharsim* liberentur. Cystis post evacuationem plerūque agglutinatur, & pus iterū hūc colligitur, donec nova fiat dilaceratio; & sic deinceps; adeò ut plures agrotantes viciès, trigesiès, & ultrà, hunc abscessum per vitæ curriculum evomuisse testentur historiæ. Nec desunt postremò juvenes, illibatā aliàs humorum massā, qui post exhaustum folliculum, carnibus rore nutritio ferruminatis, pristinae sanitati restituti sunt: sed nonnullas reliquias plerūque trahit hic morbi exitus, præsertim si hāud liberè exerceatur respiratio; sub quā conditione sibi caveant ex hoc affectu convalescentes. Nonnunquam evenit, uti jam notavimus, ut pus in cavum pectoris diffundatur; hinc empyema, de quo infrà, vel viciniora erodendo ad ambitum corporis appellat, & producto tumore sub digitis fluctuet. Aliàs tabum sanguini remixtum solis naturæ viribus, faustissimo sanè eventu, ad renes, vel fistulam intestinalem excernendum amandatur.

Nihil non movendum ut disruptatur vomica intrà pulmones & per os promoveatur puris ejectio. Huic evacuationi facient inspiratus aquæ tepidæ vapor; diluentia & demulcentia interna, largâ manu exhibita; variæque pulmonum, totiusve corporis motiones; quibus addere licet tussim moventia, quæ tamen cautè adhiberi debent, ne à subitâ vomicæ dilaceratione, vel pure pleno gurgite erumpente suffocetur æger. Nullam opem conferunt venæ sectiones, quidquid in contrarium adducant Auctores; sed alvus servanda est libera, laxantium & enematum ope: nec perstante abscessu integro planè inutilia sunt diuretica, sub spe futuræ metastaseos. Post disruptum verò abscessum, phthiseos instar pertractari debet hic affectus. Quapropter omnem implent paginam *demulcentia*, quorum selectiora audiunt lacticia, cremores hordei & oryzæ, juscula è pulmone vitulino & testudinibus parata, &c. Pluris etiam habentur *detergentia*, veronica nempè, mel, terebinthina, balsamum sulphuris, pilulæ MORTONI; &c. in eundem scopum proficue adhiberi queunt aquæ Bonenses, Baregieneses, Montis aurei, aliæque minerales bituminosæ, quæ, cæteris consentientibus, plures quasi ex orco revocarunt. Suas laudes merentur cauteria & setacea, quibus saburra purulenta foràs sensim eliminari

potest. Multum denique profunt aër apricus nullis noxiis effluviis inquinatus, equitatio, vectio in rhedâ; aliaque præsidia phthificis dicata. Sub perenni pulmonum ulcere, à vetustiore vomicâ prognato, cavendum ne à vehementiori animi pathemate, ab inspirato aëre frigidiori, aliâve causâ sufflaminentur sputa: grave enim negotium faceßere hanc suppressionem neminem expertum latet; hinc nihil non movendum, ut ab inspirato aquæ tepidæ vapore sputa revocentur, vel quâvis aliâ arte huic infortunio occurratur, sub quo sæpius mira præstat oxymel scilliticum, ex saturatâ infusione aqueâ florum sambuci propinatum, annuente clar. TISSOT, de rebus practicis benè merito.

VOMICA.

E M P Y E M A.

SIC vocitatur hæc puris in cavo pectoris stagnatio quam sæpius post se trahunt vomica & peripneumonia; vel aliæ suppurationes, tum pulmonum, tum pleuræ, mediastini, diaphragmatis, hepatis, &c. accersunt. Idem sortitur nomen sanguinis vel chyli collectio intrâ pectus post contusiones, vulnera; aneurismatis vel ductûs thoracici dilacerationem, &c. de quibus alibi. *Ægrè dignoscitur empyema*, de quo in præsentiarum, post peripneumoniam haud infrequens: suspicio tamen nascitur pus nidulari, si inter prædicti morbi curriculum parvus fuerit sputorum proventus; vel febris post decimumquartum vel vigesimum morbi diem, cum exacerbationibus ferotinis persistat. Haud desunt tamen *notæ* quibus se prodit hic affectus: impedita scilicet respiratio & tussis sicca: quoddam pondus circa pectus quo conqueruntur ægri; difficilisque in alterutrum latus decubitus: his addere juvat os fœdum, appetitum depravatum, tumorem crurum œdematosum, sudores nocturnos, rigores inordinatè recurrentes, anxietates, febris lenta, macies, &c. Nusquam demùm in propatulum venit id morbi genus, ni tactu vel auditu innotescat puris stagnantis collectio; quod haud rarò evenire norunt Practici.

Nec ab omni empyematis metu vindicat largus, procedente peripneumoniâ, sputorum etiam optimæ notæ proventus: erenim hanc fœdissimam colluviem pluriès observasse memini in pectore eorum, quibus ob pleniorē, dùm viverent, anacatharsim, fausti exitûs spes affulserat; idemque testantur varii naturæ rimatores. Haud minùs *in ancipiti versantur* cætera tradita *signa*; præsertim ubi empyema à vomicâ, aliâve tardiori suppuratione originem ducit: plures enim ægros curandos suscepimus qui liberâ respiratione, nullâque urgente tussi, in utrumque latus pro lubitu decumbabant; in quibus post obitum alteruter pulmo putredine planè consumptus, compertus fuit, pristinum visceris locum replente hâc purulentâ

EMPYEMA.

spurcitie ; quod haud citrà admirationem annotarunt adstantes , & tradiderunt nonnulli Authores. Præfatis addendum , quandóque reperiri pus majori copiâ circà pulmones fluctuans ante decimumquartum peripneumonix diem ; quod sanè altâ mente tenere debent clinici , qui illud infortunium temporis , nequidem subolfaciunt. Alium stupendum exitum annotavi in homine qui ante peripneumoniam pancreaticâ sanitate fruebatur , & trigesimo secundo die morbi , ad patres migravit ; cujus *exenteratum cadaver* pulmonem dextrum planè absumptum exhibebat ; sincerum nempè pus & inodorum , vel lactis æmulum , integram pulmonis sedem occupabat , exiguâ hujusce visceris parte superstite. Aliàs reperiuntur pulmones inflammati , skirrhosi , abscessum recondentes , putridi & pleuræ annexi , quæ ut plurimum crassior & purulenta conspicitur. Quibus addere licet hepar purulentum , ulcerosum , &c.

Pus circà viscera fluctuans nonnunquam resorberi , & unâ cum sanguine , circulationis lege , ad renes , vel sentinam intestinalem amandari jam suprà innuimus : apud omnes in confessio manet hæc præclara munia obire solas œconomix animalis vires ; quibus tamen obsecundare cauto *laxantium* , *diureticorum* , imò & *sudorificorum* usu nil vetat. Sed futilibus hisce tentaminibus nusquam immorandum ; si morbus in propatulo se sistat ; tùm enim nil non movendum , ut stagnans pus incunctanter ope phlebotomi , vel cannulæ acuminatæ , quam vocant *troicart* ; aut topici cujusdam escharotici subtrahatur. Plures fausto beavit eventu hæc *paracentesis* , tempestivè celebrata , priusquàm scilicet stagnans pus certam stragem ediderit ; aliàs agros , fatiscentibus viribus , in orci fauces præcípites trahit hæc evacuatio. Haud citrà subitanæ necis periculum exhauritur pus majori copiâ intrà pectus aggestum , quod tutiùs per vides educitur. Si hâc arte eductum tabum , sincerum , album & optimæ notæ se præbeat , nonnulla emergit salutis spes : ubi verò fœtidum & lutulentum occurrit : ad tibicines mittere licet. Post hanc peractam evacuationem , injectionibus vulnerariis & detergentibus inhærendum ; nec post habenda cætera præsidia , de quibus satis superque dùm de phthysi.



HYDROPS PECTORIS, ET PERICARDII.

HYDROPS
PECTORIS,
ET
PERICARDII

FREQUENTIOREM esse hunc affectum obscurum & ambiguum, quàm arbitratum Medicorum vulgus, docent *cadaverum sectiones*. Non secus ac empyema, *difficile innotescit* hydrops pectoris: nec facilius ab invicem distinguuntur prædicti morbi: qui etiam pro asthmate ab incautis pertractantur, quid hinc emergat omnibus obvium fit. Serum in cavo pectoris stagnans, rarò pericardio parit; nec ab hac colluvie immunia sunt mediastinum, pleura & ipsimet pulmones qui folliculos aquâ turgidos recondere queunt. Tardè incedit hydrops pectoris & pericardii; ni à morbo inflammatorio ortum trahat. Ascitem sæpiùs post se trahit hydrops pectoris; & uterque morbus ut plurimùm ab anasarca sobolescit.

A signorum syndrome aquam in pectore stagnare conjicere licet; sed atrâ caligine sæpiùs obvolvitur hæc *diagnos*. Ritè ramen perpenis signis à solertioribus traditis expiscari potest hujusce morbi indoles. Hunc scilicet prænuntiare solent crurum vel scroti intumescencia œdematosa, dyspnœa levis cum tussiculâ siccâ vix advertenda; dein prodeunt sputa glutinosa; viresque nonnihil deficiunt cum levibus anxietatibus. Præsentem indicant respiratio frequens & difficilis, cum pinnarum nasi manifestâ expansione; quæ difficultas magis urget in situ horizontali; quâ scilicet anxie decumbunt ægrotantes; sæpiùsque ineunte somno molestè expergiscuntur. Plures cubitum ituri imminentis suffocationis metu torquentur; nec nisi inviti, haud exutis vestibus, ad lectum se conferunt; è quo sæpiùs cum impetu proliunt. Alii non nisi in sedili somnum capere queunt; nec desunt qui noctes planè insomnes ducunt, licet inexpugnabili dormiendi necessitate premantur; ni sedentes proni pulvinariis incumbant. Omnes ferè siri, tussi nunc siccâ, nunc humidâ, vel cum sputo catarrhali laborant, & de dolore quodam obscuro & gravativo circâ diaphragma, cartilaginemque xiphoidem conqueruntur, qui nonnunquam ad scapulas & brachia pertingit. Interea pulsus contractus, inæqualis & intermittens exploratur; aliàs exurgit febris lenta, exacerbationibus nocturnis & rigoribus inordinate recurrentibus stipata, tussis in dies crebrior & molestior evadit; ac erumpunt, jam provento morbo, sputa cruenta; non secus ac in peripneumoniâ: quandoque tamen evenit, ut tussis & sputa planè deficiant. Præter œdema crurum & scroti; pectus externum & brachia simili modo afficiuntur: tumet facies, & in fastigium attollitur abdomen. His accedunt cordis palpitationes, lipothymia, sudores nocturni, lumborum dolor, oris fetor, lotium paucum & crassum, demùm atro rubens, cum furfuraceo vel lateritio sedimento, &c. plures subito & sine agone extinguuntur. Sed *infida* omnia hæc signa quæ aliàs in nonnullis planè desunt, ni à quâdam corporis motione

**HYDROPS
PECTORIS,
ET
PERICARDII**

aqua fluctuans in pectore ab ægris percipiatur, vel ab adstantibus audiatur quo solo indicio, sub empyemate, rarò occurrente, morbus de quo in præsentiarum, in propatulum venit. Hydrope pectoris, vel empyemate affectos in latus sanum ægrè decumbere, jam suprà notavimus: sed sæpiùs contrarium evenire observatione clinicâ & *autopsiâ anatomicâ* suffulti asserere minime dubitamus.

Hinc colligitur intricatissimam esse hydropis pectoris *diagnosim*; nec clariùs patet colluvies serosa in solo pericardio nidulans; quin potiùs cognitu longè difficilior, deficiente fluctuatione, evadit: tantâ enim caligine obruitur *hydrops pericardii*, plerumque cachexiæ pituitosæ, vel scorbuticæ soboles, ut de hoc etiam peritiores planè cæcutiant; quem haud rarum esse, liquet è *cadaverum sectionibus*. Hoc tamen nomine non insigniri debet hæc parca aquæ copia, quæ in omnibus ferè cadaveribus intrâ prædictum cordis involucrum colligitur, cùm à partibus in sese concidentibus post mortem exprimatur, vel productum merè morbosum præbeat. Sed hæc sola pericardii, à collecto seroso latice, intumescencia, quæ inter rimanda corpora, primo conspectu, obvia fit, hoc nomen sortiri debet. Jam prolatis indiciis addere licet faciei colorem plumbeum, viriumque languorem, pulsum obscurum, cum frigore artuum marmoreo; lipothymias frequentes, cordis palpitationes, sitim, febrem lentam, difficilem decubitus in latus dextrum, &c. Præter hæc signa aliud recenseri potest, pulsus nempe tardissimus, quem se in simili casu observasse tradidit DIEMERBROECKIUS: unum enim inter plures vidi, appetitu & viribus ritè se habentibus, arteria viciè tantùm intrâ horæ minutum micabat; qui inter majorem salutis spem è vivis sublatus, & *cultro anatomico* subjectus, pericardium in immensam molem à colluvie serosâ assurgens exhibuit: sed ut verum fatear, non in omnibus, sed in nonnullis duntaxat hoc annotavi phænomenum: adde quod in pluribus hydrope pericardii laborantibus, pulsus deprehendatur intermittens; adeò ut nonnunquam deficient quatuor vel sex pulsationes: haud rarò etiam exploratur durus, inæqualis & convulsivus. De hydrope mediastini & pleuræ, prædictis cognato, nec dignotu faciliore nil addimus, ne repetitam crambem apponamus.

Asthma, phthisis, cordis palpitationes, alique viscerum thoracicorum affectus hydropem pectoris sæpiùs accersunt; quem etiam *promoveant* scrophulæ, scorbutus, lues venerea, &c. Huicque obnoxii sunt litterati vitæ sedentariæ plus æquo indulgentes, debiles, valetudinarii & cachectici. Summè *periculosum*, ac ferè indomabilem esse hydropem pectoris nemo nescit: plures tamen hoc morbo correpti, vitam ad plures annos protebant; nec desunt, si conjicere liceat, vel variis historiis sit fides, qui ab hydrope pectoris evaserunt: nil tamen certi de hâc re adduci potest; cùm solâ cadaverum sectione nitidè pateat hic affectus. Nonnulla igitur sanitatis spes affulget, ubi haud gravioribus stipatur symptomatibus prædictus affectus; accedentibus verò febre acutâ, anhelosâ, & anxiosâ respirandi difficultate, sputis cruentis, lipothymiâ crebrò recurrente, &c. mors præ foribus imminet.¹

Numerosissimæ de hâc re prostant *observationes anatomicae*; quibus infer-
 tur pulmones ob aquæ copiam plus minùsve contractos, rarò illibatos oc-
 currere: skirrholi enim, callosi, tuberculis mole variis obfiti, hydatidi-
 bus, receptaculisve merè aqueis scatentes, deprehenduntur; vel purulen-
 tiâ, putredine & gangrænâ defœdantur; præcipuè post peripneumoniam,
 phthisim, aliosque pulmonum affectus; qui uti jam innuimus, hydropem
 pectoris sæpiùs post se trahunt. Pleura insuper crassissima, & ad cartilagi-
 nis duritiem accedens, nonnunquam occurrit. Thymus skirrholus, cal-
 losus vel mole amplissimus, nunc putredine confectus conspicitur. Latex
 in uno vel altero pectoris latere, vel in utroque stagnans, limpidus, spu-
 mosus & inodorus; subcæruleus, flavus, mucosis telis conspurcatus, fa-
 niosus, purulentus, lutulentus & fœtidus oculis subjicitur. Rariùs obser-
 vatur hydrops cysticus, mediastini scilicèt, pleuræ, &c. Ad hanc speciem
 referri debet hydrops lacteus, à disrupto ductu thoracico oriundus, quem
 nonnulli annotarunt: sed haud infrequens est colluvies pericardii, nunc
 merè aquea, nunc saniosa & purulenta. Cor in aquâ, suo involucro coër-
 cita, fluitans; mole amplissimum, ulceratione erosum deprehenditur:
 ejusque valvulæ, præsertim semilunares, osseam, lapideamve, duritiem
 sæpiùs referunt. Easdem fermè læsiones cernere licet in visceribus abdomi-
 nalibus, hepate scilicèt, liene, pancreate, stomacho, &c. circa quæ fluitat
 similis diluvies: quibus addere licet concretiones lapideas in vesicâ felleâ
 sæpiùs latitantes. E quibus benè perspectis luce clariùs patet, cur pauci
 huncce morbum eluctentur.

Hydropem pectoris pro asthmate sæpiùs ab incautis haberi jam suprâ
 notavimus; hinc minime mirum, si hunc venæ sectionibus perperam ag-
 grediantur; quibus scilicèt fatum acceleratur. Hydropem pectoris *curandi*
modus haud differt à methodo, in colluviei serosæ conspectu generali jam
 traditâ, quæ versatur circa *cathartica*, roborantia & aperientia; ac præ-
 fertim diuretica. Nullus ambigendi locus quin nonnullis optimè cesserint
 purgantia per alvum; sed constat quoque plures ab inopportuno horumce
 medicaminum usu in marasimum lethalem incidisse: hinc cautè explorari
 debent horum vires, ne vitio vertantur: inter usitatiorâ recensentur
 rheum, jalapium, diacrydium, elaterium, pulvis de tribus, aquila alba,
 syrupus de rhamno cathartico, &c. Parùm profuisse gummi guttam in hâc
 hydropis specie multiplici experientiâ constat.

Superfluum serum foràs tutiùs elutriatur *aperientibus* & *diureticis*, quæ
 circulationis lege cuncta permeando, materiam morbosam unâ cum lotio,
 ad renum incernicula devehunt. Cæteris congeneribus sanè præstat scilla,
 vinum & oxymel quæ ex hâc parantur. Suas laudes merentur bryonia,
 aselli, crocus & sal martis; tartarus chalybeatus, sal tamarisci, &c. qui-
 bus addere juvat baccas juniperi, cassiam ligneam, aliaque tonica, quæ
 aperientium & diureticorum vires sæpiùs egregiè æmulantur. Sibi par
 fortè non habet kermes minerale, quod naturæ conaminibus obsecundando
 nunc catharsim, nunc diuresim vel diaphoresim movet: præclaram in

**HYDROPS
PECTORIS,
ET
PERICAR-
DII.**

hocce casu prædicti pulveris, refractâ dosi exhibiti, efficaciam pluriès expertus novi. Quod attinet ad depurantia, sudorifica, antiscorbutica, &c. quæ sæpiùs faustè usurpantur; hydropi pectoris symptomaticæ duntâxat congruere videntur; vel potiùs primario morbo è quo sobolevit. Bechica verò & expectorantia pro re natâ proficua & inter mera palliativa referenda consultò prætermittimus.

Inertia, ut verum fateamur, in plerisque sunt hæc *præsidia*, ni latex morbosus arte chirurgicâ, omnibus sub hoc casu decantatâ, sed rarò institutâ; non secùs ac in empyemate, priùs evacuetur: sublatâ enim aquâ pulmones obruente suam actionem feliciùs exerere valent prædicta medicamina: neminemque eruditum latet plures ægros ad incitas redactos, ex orci faucibus, utroque præsidio, ereptos fuisse. Experientiâ teste, decem vel duodecim aquæ libræ, citrà maximum virium dispendium, *paracentesi* educi queunt: sed tutiùs sanè est hanc evacuationem per vices moliri. Haud reticendum quòd hoc curandi ritu sæpissimè defraudentur ægri, quorum morbus in obscuris latet: minime sanè mirum, si rarò celebretur *paracentesis* adversùs morbum quem solâ, ut plurimùm, suspitione assequi licet; ita sanè intricatâ, ut quid certi concludi nequeat; donec evidentioribus signis se prodente morbo, sit cogitandum de exsequiis. Prætereà infelicissima sæpiùs fuisse id genus tentamina satis superque notum manet. Præclusis tamen omnibus aliis medendi viis, nec reluctantis ægris, aliquid fortunæ committere haud nefas. Post hanc peractam operationem ope cannulæ cuspidatæ, serum denuò colligi solet; cur fit ut pluriès haud citrà ægrotantium damnum iterari debeat: hinc satiùs est vulnus phlebotomo inflictum hians servare, ut præcaveatur stagnatio; & æger metu novæ punctiōis non torqueatur. Quibusdam demùm præfuerunt vesicantia, cauteria & feracea: aliis arrident crurum tumidorum & scroti scarificationes aut inustiones: sed haud citrà gangrænæ periculum adhiberi illud postremum auxilium suprâ monuimus; quod infortunium præcaveri posse saturato corticis peruviani fomento notasse juvat.



CORDIS PALPITATIO.

CORDIS
PALPITA-
TIO.

*A*B obscuris, ad abstrusiora pergimus, dùm cordis affectus adumbrandos suscipimus: pauca enim de hâc re eruuntur ex eruditorum adversariis; si tamen excipias clarissimi SENACI opus elaboratissimum, comptiorique calamo expolitum: nullis enim parcens laboribus peritissimus Author, inter abditos naturæ humanæ recessus lustrando, multa sanè notatu digna è sectis cadaveribus deprompta, aliaque innumera ad artem clinicam spectantia, libro nuperrimè recuso, dilucidè tradidit; quæ vel contracta recensere vetat angustior pagina, nec finit propositum. Quapropter de tribus duntaxat vulgatoribus cordis affectibus, totidem distinctis articulis, coincidentibus cum aliis fortè omnibus hujusce organi lationibus verba facere expedit, ne præfixos limites excessisse criminemur.

Palàm sanè profilit cordis palpitatione; cùm tactu; visu & auditu percipi valeat; sed ægrè distinguitur *essentialis* à *symptomaticâ*: nec dilucidius innotescit genuina palpitationis *causa*. In spasmodicâ tamen hujusce visceris contractione, quâ thalamorum latera inani nisu cruoris expulsionem moliantur, credere par est. Palpitationem dolore nonnunquam stipatam, quâ cor versùs costas diversâ vi arietat, esse convulsionis consortem, exindè patet, quòd ab ejus vehementiâ non solum vox & respiratio lædantur; sed etiam costæ à suâ sede dimoveantur, vel frangantur. Pulsus, *procedente morbo*, contractus, inæqualis, intermittens exploratur; adeò ut minime consonet cordis motioni: ingruit vertigo, cum visûs obtenebratione. Flatulentiâ torquentur ægri, & de quâdam in parte affectâ vellicatione conqueruntur, &c. Syncopem nonnunquam prænuntiat cordis palpitatione; vel asthmati convulsivo, pectoris hydropi, leucophlegmatiae, &c. sociatur. Alterius est indolis *cordis tremor*, quem pro palpitatione perperràm habent imperiti; licèt ab hâc apprimè distinguatur pulsu debili, viribus fatiscentibus, lipothymiis, sudore frigido, aliisque mortis præconibus.

Natales ducit cordis palpitatione ab aortæ angustia, vel aneurismate; ab ingenti cordis mole; à pericardii abscessu, aliove vitio organico; ut de commentitiis polypis fileamus. Promoveretur à plethorâ, vel à consuetorum sanguinis profluviorum sufflamine; ab eruptionum cutanearum repulsionem, annosorumque ulcerum coalitu. sobolescit à variis stomachi morbis, à diversâ sortis febribus, &c. Hanc postremò accersunt insolens gaudium, iracundia, timor, terror, sollicitudines, aliaque animi pathemata graviora: ut fileamus de nonnullis odoramentis, de immodicis exercitationibus, &c. quæ etiam hanc promovere queunt. Ad cordis palpitationem proclives sunt cachectici, hypochondriaci, scorbutici & arthritici;

CORDIS
PALPITA-
TIO.

huic obnoxie sunt hystericae & chloroticae : sæpiùs demùm invadit valetudinarios, helluones, in otio recumbentes, &c.

Periculi expers est cordis palpitatio à causâ accidentali & fugaci procedens, nec semper ominosa censetur symptomatice, dummodò morbo indomabili minime submittatur : sanitatis demùm spes affulget, si à nervorum læsione generali progerminetur ; vel à consensu partium qui inter frequentiores morborum causas jure numeratur. Secùs verò evenit si à vitio cordis organico prodeat ; quod suspicari licet, ubi palpitatio crebriùs recurrit, vel continuò ægrum conflictat. Quo læsionis genere inter palpitationem afficiatur præcipuum circuitûs sanguinis organum meris conjecturis assequi licet : nec hilum proficerent clinici, etiam notissimâ morbi indole, cùm nullam fermè curationem admittat hæc labes organica ; uti ex infra dicendis luce clariùs patebit.

Seçta cadavera cor multifariam labefactatum exhibent : phlogosi nempè & purulentiâ correptum, vel adipe obrutum, conspicitur : passim in ipso occurrunt tubercula ; ejusque ambitus haud rarò exulceratione defœdatur. Insuper stupendam quandòque molem assequitur prædictum viscus ; cujus thalami, auriculæ & appensa vasa ultrà modum aliàs dilatantur. Binæ majores arteriæ cum coronariis, osseam duritiem sæpiùs referunt ; nec ab hoc vitio immunes sunt valvulæ, tùm auriculares, tùm arteriosæ ; quæ aliàs tuberculis asperæ, vel lapideæ visendæ se præbent ; invicem annexæ, absumptæ, &c. detegitur sarcoma cordi adnatum. Concrescunt corpora lapidea, tùm juxtâ cordis ostia, tùm in ipsismet ventriculis & pericardio ; in quibus etiam vermes nonnunquàm latitare traditur. Conspiciuntur venæ coronariæ præter solitum ampliatae & varicosæ. Flatum, serum, colluviem saniosam vel purulentam, recondit pericardium ; quod aliàs pinguedine obrutum, carnosum, cartilagineum, osseum, tumore exasperatum, & cordi accretum conspicitur. In nonnullis planè desideratur hæc capsula. Visenda se præbent aortæ ejusque propaginum aneurismata ; nec parit arteriæ pulmonari illud vitium. In propatulo denique fiunt costæ à genuinâ sede depulsæ vel fractæ ; ingens hepatis, lienis & pancreatis moles : ut de hydrope pectoris, variisque tùm pulmonum, tùm viscerum abdominalium læsionibus, quæ parùm ad nostram rem pertinent, conticeamus : quibus addere licet nonnunquam omnia sana reperiri, tùm in thorace, tùm in abdomine ; sub quo casu causam morbi in ipsismet nervis latitare haud falsò injicitur.

Inducias agunt *venæ sectiones* in vehementioribus cordis palpitationibus, à quâvis causâ oriundis ; nec inutiles censeri debent in idiopathicis ; licèt impares sint superando morbo obici : sed haud citrà periculum adhiberi queunt, ubi vires deficiunt ; mortemque inferunt in tremore cordis. Faustè præcipiuntur cathartica ; si sordibus scateant primæ viæ ; caputque gravetur : cautè tamen sunt usurpanda ; vel mitiora seligantur, ne hoc stimulo irritentur crabrones. Mira præstant diluentia & refrigerantia ; largus scilicèt aquæ simplicissimæ potus ; aquæ minerales acidulæ & martiales,

nonnullæque thermæ ; serum lactis vel ipsummet lac , &c. His sapiùs proficuè sociantur aperientia , quorum usitatiora sunt crocus martis , tartarus martialis , & sal tartari , aselli , saponis , &c. Sed præcipuus curationis cardo versatur in congruo regimine : plus enim , sub hoc rerum statu , victûs rationi quàm pharmacis tribuendum esse nemo non intelligit.

Suas laudes merentur præcipuè *adversus cordis tremorem* stomachica & amara ; fumaria nempe , aristolochia rotunda , rheum , cortex peruvianus , caryophylli , cinnamomum , elixirium proprietatis , &c. Pluris etiam habentur absorbentia , ubi colluviei acidæ nonnulla occurrunt indicia. Nocentissima verò sunt narcotica ; sed haud verantur alterius sortis sedantia , nitrum nempe , pulvis temperans , liquor anodynus mineralis , sal sedativum , &c. Morbum compescere solent antispasmodica , camphora nimirum , castoreum , succinum , flores benzoini , aqua florum aurantiorum & tiliæ , melissophylli , &c. sed rarò hunc profligant. Pluribus demùm opitulantur enemata purgantia & carminantia ; foras emollientes , semicupia , pediluvia , hirudines vasis hæmorrhoidæ admotæ ; camphora sacculo excepta , & regioni cordis admovenda , &c. Mantissæ instar addere lubet inanem operam ludere , hæc omnia auxilia , ni morbi primarii habeatur ratio , in quâ versari præcipuum curationis momentum cuivis obvium fit.

CORDIS
PALPITA-
TIO.

OPPRESSIO CARDIACA.

ANIMI pathemata vehementiora , tum grata , tum tristia hunc morbum vulgatissimum , de quo tamen altum apud Authores silentium , post se trahunt : sub variis gradibus se profert hæc cordis læsio , quæ nunc versatur circa levem , & quasi sepultam , graviditatis sensationem in regione cordis , magis suâ pertinacitate , quàm molestiâ ingratum ; de quâ , ob apprimè notam causam , parùm curant ægri ; etsi mente & stomacho tantisper laborant ; & identidem anxietate , vel angore in præcordiis conflantur. Aliàs hîc loci graviùs molestantur ; & de quâdam sarcinâ cor premente , atque ad suspiria cogente , queruntur. Hæc ingrata ponderis quasi prementis sensatio *coudoun* audit apud Accitanos & Gallo-Propriales ; nomine ducto à malo cydonio , quod cordis molem & formam sat accurate exprimit. Aliter se res habet ; ubi hic morbus , ratione gravioris causæ , vehementior ingruit , & ad summum acuminis gradum pervenit ; sub quo , veluti à constricto pectore , ægrè exercetur respiratio ; & ominosa inter ejulatus & querulum anhelitum , concitantur symptomata : obscure audiunt & intelligunt , tanquam aphoni jacentes ; vel nonnulla verba effutiant. Nonnulli convulsiones , tremores , vel cordis & musculorum palpita-

 OPPRESSIO
CARDIACA.

tiones patiuntur; ob spirituum quasi torpescentium ataxiam; vel totius systematis nervosi spasmus. Morbo ad hunc gradum provecto, nil calamitosius excogitari potest: adeò ut plures, sub hâc rerum conditione, in syncopem spasmodicam delabantur; vel primo insultu repentinâ morte obripiantur; quo superato, haud nisi post summos & tædiosos labores, lethum effugiunt senescentes & valetudinarii; qui sæpius intempestivâ dein medicatione in vitæ periculum denuò adducuntur. Major affulget salutis spes ergâ juvenes, qui etsi primo morbi incessu velut morituri jacebant, brevi tamen incolumes evadunt.

Jure fanè quidem dicitur *oppressio cardiaca* hic affectus, quo obruuntur cordis vires, quod etsi genuina sedes morbi, haud tamen primariò afficitur; cum nullum sit dubium quin à priùs affecto sensorio communi in consensum trahatur cor; non secùs ac respirationis organa, & ipsemet ventriculus qui tùm suis obeundis muniis impar evadit. Ponderis & constrictionis spasmodicæ sensatio in regione cordis præcipuum hujusce ægrotationis symptoma audit; adeò ut manum, vel incogitantes admoveant plerique ægrotantes, etiam sensibus quasi orbat, vel tanquam apoplectici jacentes; vix tamen immutatis pulsu & colore faciei, uti nonnunquam observasse mihi contigit. Equidem facilè intelligitur cur in gravioribus animi perturbationibus cerebrum primo morbi impetu tactum, brevi cor in consensum trahat; non secùs ac pericardium, diaphragma, os superius ventriculi; vicinioresque partes, notissimâ sympathiâ ejusdem sortis participes. Hinc patet cur ab irâ & timore; æquè ac à summo gaudio afficiantur præcordia, & cor quodam torpore corripiatur, vel suffocanti palpitatione teneatur: neminem enim fugit nonnullos summo terrore, vel sinistro & inexpectato nuncio percussos, subitò corruisse, vel morte repentinâ raptos fuisse.

Ad hoc ægritudinis genus procliviores cenferi debent systematis nervosi morbosâ, congenitâve debilitate; vel nimia, ut inquiunt, sensibilitate donati; meticulosi scilicet & pusillanimes, melancholici & hypochondriaci; qui demùm suî anxii, perenni cujuscumque eventûs formidine premuntur; hinc intelligitur cur mulieres, & præsertim hystericæ, huic ægritudini sunt obnoxia. Hoc ècontrâ infortunium eluctantur apathici & impavidi, vel à vehementioribus animi pathematibus planè soluti. Certis cancellis coërcitum hoc malum periculi expers est; sed si ad supremum gradum provehatur, cum pravâ & præviâ viscerum dispositione, feralem habere potest exitum; vel subitò enecare: aliàs, superato primæ & procellosæ invasionis impetu, collectis viribus ad vivorum numerum revocantur ægri; lassitudine dein, totiusque corporis torpore & ignaviâ, vel memoriæ debilitate aliquandiù laborantes, præsertim, uti suprà innuimus, in provectiori ætate.

Curatio, naturæ viribus submissa, paucis peragitur: ideò caveant polypharmaci, ne intempestivis remediis ægrotantium res in deteriora ruant. Exulare debent venæ sectiones quæ sub hoc primo rerum statu pro exitiabilibus

libus, nemine, ni fallor, refragante, habentur. Nec minùs pertimescenda emetica & cathartica, quæ plus damni quàm emolumenti inferre solent: solâ enim cunctatione evincitur in plerisque hic affectus, qui idè progressu temporis cicuratur, & sensim evanescit; vel nonnullæ ægritudines, plus minùsve contumaces post se trahit; præsertim in senescentibus & valitudinariis. Intereâ naribus admoventur antispasmodica fortiora, acetum nempè acerrimum, aqua melissæ composita; spiritus salis ammoniaci; sal anglicanum, oleum succini, &c. Confert largus aquæ potus, quantum licet à faucibus, quæ haud rarò constrictione spasmodicâ tentantur: valent aqua florum aurantiorum, guttæ anglicæ, aqua dicta *de luce*, vel spiritus salis ammoniaci succinatus. Omni ope enitendum ut alvus enematis emollientibus, & catharticis, solvatur; quibus frustrâ adhibitis addere juvat vinum emeticum turbidum. Nec inutilem opem præstant frictiones in artubus, tum superioribus, tum inferioribus, celebratæ; ut de variis aliis adminiculis, quæ pro re natâ adhiberi queunt; sileamus.

Quod ad *morbi reliquias* attinet, capitis nempè gravitatem, memoriæ debilitatem, oculorum obnubilationem, stuporem partium, spirandi difficultatem, præcordiorum angustiam, cordis tremorem vel palpitationem; aliosve affectus spasmodicos: pluribus à primo insultu elapsis diebus, solitis & notissimis præsidiiis impugnantur: nimirum venæ sectionibus, hirudinibus, vesicatoriis & cucurbitulis; laxantibus & catharticis; diluentibus, antispasmodicis, &c. Nihil deniquè non movendum ut omnem mœrorem & tristitiam excutiant ægri; ut sedulò amoveatur quidquid mentem in violentos impetus præcipitem agere potest. Sapientibus econtrâ monitis, blandis adhortationibus, vel gratis confabulationibus, in meliorem spem erigantur: severis cogitationibus, vel intempestivis meditationibus nusquam indulgeant. Quidquid demùm morbum fovere potest, viriliter arceant; & mentem, quantum sinit rerum conditio, ad hilaritatem componant.



SYNCOPE,
VEL ANIMI
DELIQUIUM.

SYNCOPE, VEL ANIMI DELIQUIUM.

NEMO nescit cardialgiam, debilitatem, faciei pallorem, visûs obnubilationem, tinnitum aurium, sensûs & motûs primò obscurationem, deniquè omnimodam feriatiorem, frigiditatem, &c. esse vulgatissima syncopes *indicia*. Sed alia sunt quibus differt ab apoplexiâ & affinis, in quibus sensus & motus etiam abolentur; nec deficiunt alia signa quæ versantur circa observatum pulsûs & respirationis rhythmum. Etenim in syncope, cordis & thoracis motus planè deficere videntur; adeò ut ægri animam egisse videantur, & solâ membrorum flexibilitate à mortuis planè discrepent. Sed hic est ultimus syncopes gradus, quorum levior, sub quo sensationes non planè abolentur, *lipothymia* nomine insignitur; & apud nostrates audit *défaillance*, ou *évanouissement*. Signis prolatis, totidem prodromorum instar, sæpiùs prænuntiatur syncope; aliàs illicò ingruit. Brevi ut plurimum fugatur hic affectus, vel spontè desinit: nonnunquam tamen ad plures horas, imò & diem integrum protelatur: è quibus longioribus insultibus nonnisi defessi, & quasi ab immani labore fracti evadunt ægri, qui processu temporis pristinae sanitati restituantur.

Immodicum sanguinis, alteriusve laticis, profluvium; non secùs ac cujuscumque liquidi majori copiâ in cavo pectoris & abdominis aggesti evacuatio syncopem accersere solet. Hanc etiam *promoveant* virium ab alimentorum penuriâ exsolutio: idemque impendit infortunium, si vires ab ingluvie obruantur, vel ab ardentioribus amplexibus cupidinis exhauriantur: nec desunt exempla variorum utriusque sexûs inter coitum extinctorum. Contrahitur à vehementiore animi pathemate, terrore nempè, irâ, mœrore, &c. non secùs ac à cadaveris, serpentis, muris, alteriusve objecti invisî conspectu: eundem effectum exerunt nonnulli odores, musci nempè, ambræ, rosarum, jasmini, &c. Concitatur à simplici venæ sectione, aliove sanguinis profluvio; à quovis dolore acutissimo, à narcoticis, venenis, vermibus, &c. Huic morbo obnoxii sunt debiles & valetudinarii; cachectici, hypochondriaci & hysterici, arthritici, plethorici, &c. Syncope demùm febres haud rarò antecedit, atque inter variorum morborum ominosa symptomata numeratur. Qui sine causâ manifestâ animo linquntur, inquit HIPPOCRATES, hi derepentè moriuntur: verissimum esse illud effatum satis superque testatur experientia: hoc præsertim imminet infortunium, si æger sit senio confectus; si crebrò recurrat prædictus morbus; ejusque insultus diutiùs producantur: sed ubi causam fugacem agnoscit, periculo vacat.

Incisus hoc morbo *interemptis*, in apricum venit pericardium cordis ambitui agglutinatum, adipe obrutum; aquâ, sanguine vel pure, huc collectis turgens diversimodè labefactatum, vel planè absumptum. Cor mole

maximum, phlogosi & purulentiâ tactum; ulcusculis externis, ad auriculas haud rarò pertingentibus, exesum; ultrà modum, cum suis appendicibus, dilatatum conspicitur: passim in eodem viscere reperiuntur tumores, & pustulæ diversæ sortis. Valvulæ & arteriæ; tùm majores, tùm coronariæ, osseam duritiem nonnunquàm contrahunt. In plerisque, patent venæ cerebri, flatu turgidæ, præsertim post numerosiores venæ sectiones, vel immodica cruoris profluvia. Supervacaneum foret hîc mentionem subijcere de variis cerebri & meningum læsionibus, de pulmonum, pleuræ, mediastini & diaphragmatis phlogosi & purulentiâ, de hydropè pectoris, de pravarum digestionum reliquiis; variisque stomachi, hepatis, lienis, pancreatis, mesenterii, uteri, ovariorum, &c. læsionibus: sed non abs re erit nonnulla per transennam in medium adducere de *commentitiis illis polypis*, ab Authorum turbâ celebratis, qui nil aliud sunt quàm concretiones sanguineo-lymphaticæ, quæ interstitia columnarum replentes, totidem radicibus cordis substantiæ implantari videntur.

SYNCOPE,
VEL ANIMI
DELIQUIUM.

Rei specie decepti sunt qui de polypo cordis scripserunt: hæc enim concretio sanguinea trabibus & columnulis cordis alligata, primo intuitu, refert substantiam carneam variis radicibus instructam; quæ accuratiori examini subjecta concretionem merè sanguineam prodit; nil discrepantem ab illâ crustâ subalbicante, sanguini venæ sectione educto innatanti: hæc substantia cruore levior, corii instar firma & tenax, quæ *coëne* apud nostros audit, sanguine refrigerato concrevit in corde, non secùs ac in patellâ. Si *polypi* nomine intelligatur sarcosis è cordis contextu prodiens, non secùs ac narium polypi è membranâ pituitariâ exsurgunt; talem nusquam observari in corde asserere nulli dubitamus. Mirum sanè foret inter tot millia cadaverum, quæ per triginta annos in nosocomiis secunda curavi; ne unum quidem polypum se visendum præbuisse; quem tot Medici, qui, tanquàm canis è Nilo, nonnullis dissectionibus per vitæ curriculum interfuerunt, pluriès se compertos fuisse somniarunt. Sed ab hoc crassissimo errore vindicantur solertiores, quibus lubuit huncce sanguinem compactum, vel contextum fibrosum, primo intuitu, referentem, concretionis polyposæ nomine salutare. Absit tamèn ut pro causâ syncopes vel mortis subitanæ, habeantur prædictæ concretiones; quæ potiùs inter, vel post obitum, efformari videntur. Hinc intelligitur cur vulgatissimæ occurrant, tùm post morbos acutos; tùm post chronicos: non secùs ac cùm sanguis venæ sectione eductus, ratione peculiaris indolis in coagulum densum & subalbicans faceffit; sic post obitum, vel deficientibus motu & calore concrevit in suis receptaculis prædictus latex.

Nemo non novit *presidia extemporanea* adversùs syncopem adhiberi solita: ad locum scilicèt apricum feruntur ægri, & in situ horizontali collocantur; ac quocumque modo agitantur & vellicantur: facies aquâ frigidâ inspergitur: avelluntur pili: ori inditur frustum salis cibarii: liquores fragrantiores; acetum nempè, aqua Reginae Hungariæ, vel melissæ composita; spiritus salis ammoniaci sincerus vel succinatus, &c. naribus &

SYNCOPE,
VEL ANIMI
DELIQUIUM.

temporibus admoventur; summamque opem conferre queunt sternutatoria. Panis tostus, vino irroratus, & aromaticis conspersus, scrobiculo cordis, volæ manuum & plantæ pedum imponitur: refrigerata extrema linteis calidis obvolvuntur; frictiones cum pannis asperis celebrantur, &c. Intùs exhibentur liberâ deglutitione cardiaca & cephalica; vinum nempe generosum, aqua cinnamomi, imperialis & theriacalis, aliaque id genus innumera, quibus cordis vires refocillantur; & ejus motus perennatur: aliàs cum cautelâ ori instillantur, ne glottidem, haud sine ægrorum periculo, subeant. Nec omnibus tamen congruunt prædicta stimulantia interna: vetantur enim, si incusetur hæmorrhagia, quæ horum adminiculo foveri potest. Suam opem etiam conferunt enemata acriora, cucurbitulæ scarificatæ, vesicatoria, &c. sed tardiora hæc præsidia rarò usurpari posse adversùs morbum brevissimum facilè intelligitur.

Quod ad *venæ sectionem*, quæ incassum sæpiùs tentatur, spectat; non solum rarò conducit inter paroxysmum; sed sæpiùs noxam infert; præsertim ubi ingestorum copiâ gravatur stomachus. Opportunè verò extrâ paroxysmum sæpiùs celebratur, & inter *auxilia prophylactica* jure numeratur. Sed tutiùs fortè præcavetur hic morbus cauto emeticorum & cathartico- rum usu: præter quam quòd eò sit collimandum, ut alvus servetur libera; ne primæ viæ, cor in consensum sapissimè trahentes, pravis digestionum reliquiis lacestantur. Haud in alium scopum proficuè sæpiùs adhibentur absorbentia, stomachica & amara, quæ hujusce saburræ genesi adversantur; nec despicienda sunt roborantia & martialia, quæ cordis & vasorum vires adaugendo, sanguinis stasim præcavent. Sed hæc omnia fortè antecellunt congrua victûs ratio, hilaritas, grata exercitationes, &c. Nec licet suprà laudata remedia indiscriminatim adhibere; cùm delectu opus sit priùs habitâ ratione morbi causæ, uti nemo non intelligit.

Haud abs re erit nonnulla, parergi loco, addere circà *mortem repentinam*, quæ apoplexiæ, catarrho suffocanti, & syncopi vulgò referri solet; licet diversi alii sint morbi, & innumerae causæ quæ hominem præter expectationem celerrimè rapiant: quod fatum sæpiùs opportunis remediis præcaveri & averti posse, dummodò innotescant prodromi & causæ; ultrâ omne dubium manet. Variis enim historiis constat plures pro subito interemptis habitos, imò & sepultos, arte vel spontè evasisse. Adeò ut incerta sint mortis indicia, ni corpus jam putrescere & fœtere incipiat; vel infigatur ferrum candens plantæ pedum, nullâ excitatâ sensatione. E conspectu etiam oculorum, qui post obitum suo nitore planè defraudantur, erui possunt latentis vitæ signa. Aliàs admoveri potest vesicatorium cantharidibus saturatum, quod in cadaveribus ne minimum effectum edit. Inter causas mortis subitanæ frequentiores recensentur victus opimus, & lautior; temulentia, plethora, obesitas & inedia: vita deses & otiosa; arthritidis anomala; consuetorum sanguinis profluviorum suppressio; eruptionum chronicarum retrocessus; veterum emunctoriorum exliccatio; graviora animi pathemata; castra veneris; insolatio & frigus

intensissimum; fumus carbonum, mephitis, aliæque suffocationis causæ, de quibus suprà; ardui labores, conatus virium vehementiores, contusiones, casus ab alto, &c. Exhinc prodeunt innumeræ læsiones quas sistit autopsia anatomica, nunc in capite, nunc in thoracè, aliàs in abdomine. Equidem vasorum sanguineorum cerebrum irrorantium dilaceratio à quâcumque causâ internâ vel externâ, frequentiore mortis subitanæ causam præbet: hùc coincidit apoplexia fortis sanguinea; sub quâ comprimitur cerebrum ab effuso sanguine. Intrà ventriculos; aliisque hujusce visceris recessus; vel in propriam substantiam, quæ ab irruente hoc latice excavatur. Rariùs hunc effectum exerit colluvies serosa vel purulenta.

SYNCOPE;
VEL ANIMI
DELIQUIUM.

Crebriùs sanè deprehenditur *mortis subitanæ causa* in pectore, ab ingenti scilicèt mole, vel dilaceratione vasorum sanguineorum: alterutrum scilicèt pectoris cavum sanguine congruato plenum reperitur à disrupto aneurismate aortæ, alteriusve arteriæ: bronchia nonnunquam sanguine obruuntur. Vasa etiam priùs inculcata; aorta nempè, vena cava, azygos, &c. inter vehementiorem nisum, disruptionem patiuntur; similique ratione inexpectatum lethum accersunt. Similis animadvertitur cruoris stagnatio à fissis auriculis; vel à dilacerato ipsomet corde, ob quemcumque obicem qui egressui sanguinis obstabat; nec hujusce disruptionis immune est ipsummet septum cordis medium. Sæpiùs occurrit pericardium sanguine tum ex arteriis, tum è venis prorupto mirè distentum quo brevi extinguatur cordis motus. Eundem effectum, sed rariùs, exerit hydrocardia; non secùs ac ingens cordis moles à retento & concreto sanguine; vel ab adipis copiâ, quâ quasi obruitur. Annotantur abscessus & sarcomata è cordis vel auricularum ambitu erumpentia; pericardium crassissimum, tuberculosum, & pure absumptum; cordis valvulæ cartilagineæ, osseæ, vel lapideæ. Mirari profectò subit aortam laminis vel bracteis osseis munitam, disruptioni & erosioni magis obnoxiam esse, nullâ conspicuâ dilata-tione. Pluriès observata fuit cordis erosio ab ulcere; quo perforatum hoc viscus sanguinem elabi finit. Insuper statim corruunt quibus impeditur & sufflaminatur respiratio, à constrictâ vel obturatâ glottide; non secùs ac ab uberiori sanguinis vel puris proventu ad bronchia. Suffocationem etiam inexpectatam accersit subita irruptio ingestorum in cavum pectoris, ob dilacerationem stomachi, & diaphragmatis putriditate tactorum. Postremò inter causas mortis subitanæ numerari queunt sanguis stupendâ copiâ effusus in cavum ventriculi, cum liene subputri; hoc viscus fissum & disruptum; hepar ingens & abscessum recondens; aneurismatis abdominalis disruptio; majorumque vasorum dilaceratio: ventriculi, tubique intestinalis perforatio; portentosa horumce viscerum distensio, gangræna, &c. quibus proximæ mortis auguria desumuntur. His addere licet hæmorrhagiam enormem à quâvis parte externâ erumpentem; ut de variis aliis causis, omnibus notissimis, fileamus.

SINGULTUS.

S I N G U L T U S.

E MORBORUM albo expungitur singultus vulgarissimus & fugax: sed aliter se res habet de diuturno & chronico, qui nonnullos agros in vitæ discrimen trahit. *Sub variis gradibus se profert* hic affectus; qui tantâ ferociâ quandoque ingruit, ut totum corpus concutiat, & costæ diffrangi videantur; atque ægri suffocationis periculum incurrant. Haud rarò periodicè invadit; licèt nil certi statui possit de ejus reditu: nec magis constat de ejus stadio, quod nunc nonnullis diebus vel mensibus continetur; nunc ad plures annos, imò & triginta protelatur. Helluones & potatores ad huncce morbum fugacem & diuturnum *pronos* esse neminem latet; qui etiam familiaris est infantibus, hypochondriacis & hysteris. Hunc alterutrius fortis promovent solitarum evacuationum suppressio, arthritis anomala, efflorescentiarum cutanearum retrocessus: *progignitur* à primarum viarum saburrâ; à vermibus; ab emetico-cathartorum stimulo; à venenis, à cartilaginis xiphoideæ prolapsu, à luxatione costarum, à premente quocumque tumore, &c. Singultum postremò comitem habent febres acutæ, phlogoses internæ, ileus, cholera, dysenteria, hæmorrhagia, &c. sub quibus pro periculosiori symptomate haberi neminem fugit.

Ab exaratâ *cadaverum historiâ* colligitur, inter innumeras pectoris læsiones, pulmones phlogosi tactos, vel purulentiam conspurcatos sæpius reperiri. Obvius fit stomachus bile vel sordidâ colluvie scatens, maculis gangrenosis signatus, skirrhosus, inflammatus & ultra modum dilatatus; cujus nervi nonnunquam à tumore vicinioribus partibus hærente premuntur; in quibusdam denique à sede depulsus. Hepar occurrit mole amplissimum, vel inflammatione correptum; æquè ac intestina, renes, vesica, aliæque abdominis viscera. Omentum skirrhosum, crassissimum; ventriculūque versùs inferiora detrahens, peritonæo adglutinatum,prehenditur. Passim demùm annotantur putredines, gangrænæ, aliæque strages; ut de cartilagine xiphoide à genuinâ sede dimotâ, de vulneribus, &c. sileamus.

A benè perspectis antecedentibus, & ritè extricatis causis, suam quique *curandi methodum* condere debet, quæ solum singultum chronicum respicit. Nullum est dubium quin sæpissimè conducat venæ sectio: sed magis proficuè adhiberi solent *emetico-cathartica*, & enemata his cognata. Expeditis primis viis, egregiam opem præstant diluentia & demulcentia; largus scilicet aquæ simplicissimæ potus; infusum the, serum lactis, decoctum oryzae, oleum amygdalarum dulcium, emulsiones vulgarissimæ, &c. quibus præmissis ad absorbentia & stomachica deveniendum; corallum nempe & lapillos cancrorum fluviatilium; ad mentham, anisum, anethum, corticem peruvianum, catechu, diascordium, theriacam, &c. Plu-

ribus profunt aperientia; radices nempè notissimæ; rheum, aselli, martialia, acetum scilliticum, &c. Præclarum sæpiùs effectum edunt antispasmodica; crocus nempè, castoreum, fuccinum, aqua florum aurantiorum, &c. Nec posthabenda sunt hypnotica & paregorica; laudanum nempè & diacodium; liquor anodynus mineralis, &c. Curationem postremò sæpiùs absolunt lac; sudorifica; aquæ Forgienses, Passienses, Vallenses, Bellilucanæ, aliæque minerales. Suas laudes etiam merentur *remedia externa*; inter quæ auxilium præstant balnea; sed pluris habentur fots, vel epithemata è menthâ, salviâ, rutâ, absinthio, caryophyllis, camphorâ, theriacâ, aliisque consimilibus parata; panis calidus linteo obvolutus, &c. Nec despicienda sunt linimenta cum axungiâ humanâ, ursinâ, &c. Nonnullis demùm profuerunt cucurbitulæ regioni epigastricæ, vel dorso admotæ.

SINGULTUS.

Futilis est hic remediorum apparatus *ad singultum accidentalem*, qui vel spontè desinit, vel haustu aquæ simplicissimæ fugatur: cohibetur etiam ab aliquandiù retardatâ respiratione, ab attentâ cogitatione, à quocumque inopinato eventu, &c. Pertinacior esse solet *singultus symptomaticus*, cui occurrendum remediis suprà traditis; inter quæ usitatiora & efficaciora aqua pulli, serum lactis, vel emulsiones, oleum amygdalarum dulcium; corallum, cæteraque absorbentia terrea; cortex peruvianus, castoreum & diascordium; liquor anodynus mineralis, syrupus de papavere albo, aliudve hypnoticum. Proficuè etiam usurpantur epithemata emollientia, vel roborantia, cucurbitulæ, aliaque topica, de quibus suprà.



DE MORBIS INTERNIS ABDOMINIS.

P R A V A D I G E S T I O .

Hoc præcipuè ad praxim sese accingentibus incumbit munus ; ut scilicèt stomachi , qui jure pro innumerorum morborum fomite habetur , vires & functiones apprimè calleant : aliàs ejus læsionum , caput , aliasve partes impetentium , genuinam indolem nusquam assequi valent. Non secùs ac hominum vultus , etsi iisdem partibus constant , ab invicem in infinitum discrepant : sic in singulis individuis diversa occurrunt digestionis & chylicationis organa ; adeò ut quisque peculiari , ab aliis planè absimili , gaudet stomacho ; cujus temperies accurato studio esset perpendenda , ut exhinc emergeret dilucidior pathologia. Sed de hâc saluberrimâ scientiâ parùm curasse videntur Authores ; quos non puduit putidæ litterarum ostentationi inhærere , vel ætatem in condendis futilissimis hypothesibus conterere. Hinc minime mirum si inter abstrusiora naturæ humanæ phænomena adhuc numerentur *genuinæ digestionum leges* ; & in cimmeriis plerùmque lateat tenebris innumerorum morborum has respicientium typus ; infaustaque sit curandi methodus.

Experientiâ quotidianâ , vel tralatitiâ , ultrà omne dubium constat cuique stomacho congruere certam alimentorum quantitatem , ultrà quam ejus pervertuntur munia. Nonnullis enim prodest parca alimonia ; dùm alii victum liberaliùs sumptum optimè ferunt. Pluribus conducunt obambulationes , aliæve corporis exercitationes post pastum : nonnulli verò ingesta haud ritè concoquunt , nisi in quiete , vel inter dormiendum. Aqua egregium eduliorum dissolvens præbet potiori hominum parti : haud desunt tamen , quibus vinum , liquoresque ardentes emolumento sunt. Haustus caffè , chocolatæ , &c. quibusdam prodest ; cæteris nocet. Lac saluberrimum , vel lethiferum alimentum suppeditat. Idem fermè esto judicium de fructibus & leguminibus ; de oleo & butyro ; de quadrupedum , avium & aquatiliū carne , &c. quæ in diversis subjectis contrarios effectus edere solent. Ut nil addamus de stupendis *idiosyncrasæ* vel *antipathiæ* phænomenis , quâ fit ut plures à lacte , caseo , vino , &c. abhorreant ; alii anguillas , testacea , peculiare fructus , quædam legumina , &c. averferunt ; quod ab affecto systemate nervoso pendere videtur ; vel peculiari spirituum animalium , in appetitûs , famis , digestionis & chylicationis opere præcipuum symbolum conferentium vitio. Equidem famelicus etiam sanissimus à conspectu cujusdam rei sordidæ nauseat , & appetitum planè amittit ;

amittit: quidam notante BOERHAAVIO, secundâ gaudens valetudine vix poterat famem ferre: ingressus diversorium pedem offendit, talum distortet, & corrui: ipso momento deletur appetitus, à cibis abhorret & nauseat. Circâ odores etiam versari antipathiam, mulieribus familiarissimam nemo nescit. Quibusdam est insensibilissimus odor moschi, rosarum, jasmini, aliarumve materierum suave olentium. Plures etiam averfantur conspectum aranearum, muris, felis, serpentis, &c. Huc etiam coincidit virginum & mulierum appetitus depravatus: sed in immensum cresceret pagina, si omnia *digestionum phenomena* vel adumbrare susciperemus; nec è re nostrâ fore putavimus: cur solertioribus lampada tradimus.

Ubi stomachi functiones, alio modo quàm à naturâ constitutum est, exercentur, digestiones perverti evidens est: hinc emergit *saburra ventriculi laceffens*, quæ variorum morborum fomitem præbet. Pravarum digestionum reliquæ cibi fastidio, ore sordido, ructibus inquinatis, cardialgiâ, nausæâ & vomitu, vertigine tenebrosâ, dyspnœâ, &c. se produnt: sed nil aliud exhibent prædicta indicia præter productum morbi cujusdam organici ægrè dignoscendi, vel atrâ caligine immerfi. *Diversa* est *indolis* hæc *saburra stomachica*; *acida* nempe occurrit, vel *amara*; *mucosa*, vel *putrida*: hanc igitur sub totidem ægritudinis speciebus examini subicere consultius fore judicavimus. 1°. Ructus acidi, stomachus morfu affectus, ejusque ardor & inflatio, in nonnullis voracitas ad famem caninam accedens; dolor capitis gravativus, tussis, singultus, alvus sicca & tenesmus, ingestorum *acescentiæ* notas exhibent: & ex hoc putredinis genere emergunt cruditates, ut inquiunt, acidæ; è quibus, præsertim in lactentibus, graviores exsurgunt affectus. Melancholici & hypochondriaci ob copiosum in primis viis acidum plus appetunt & ingerunt quàm ipsis est utile: hinc exacerbantur morbi symptomata & morbus insanabilior evadit. 2°. *Oris amarities*, lingua arida, cardialgia, æstus interaneorum, vomitus materierum luteo-virentium, alvi fluxus, fames inextinguibilis, &c. *bilis regurgitationem*, vel materierum in ventriculo latitantium amaritiem produnt; quæ materies nonnunquam æruginosæ pelves argenteas, quibus excipiuntur, maculis vix delendis infestant: cur minime mirum, si ventriculum laceffendo cardialgias molestissimas inferant. Bilis porracea & eruginosa, notante BOERHAAVIO, producit cibi fastidium, anxietates, singultum, cardialgiam, vomitum, flatulentiam, tormina, fluxum dysentericum, acutos morbos, febres & convulsiones: magis est pertimescenda, si in atram faceffat, quæ nunc sapore acerrimi aceti, nunc putrefacti cruoris, urit & rodit; hinc dolores atrocissimos, inflammationes & gangrænas parit. 3°. Os glutinoso humore inquinatum, saliva viscida, appetitus prostratus, flatulentia, eructationes quæ post plures horas à pastu, deglutitorum odorem & saporem referunt; vomitus & dejectiones materierum mucosarum, lienteria, &c. arguunt primas vias *mucosiores* obliniri, qui horumce organorum sensationem obtundit, & alimentorum elaborationi officit. 4°. Os sordidum, quasi ab ovo incubato, ructusque ejusdem indolis;

 PRAVA
DIGESTIO.

stomachi gravitas, anxietates, flatulentia, vomitus gravè olentes, dejectionum fetor insolitus & alvus soluta, *putredinis merè alkalinae* notas præbent, & cruditates, ut inquirunt, nidorosas patefaciunt. *Inappetentia* has omnes stomachi læsiones concomitari solet; quæ etiam mœrorem, capitis torporem, lipothymias, hypochondriorum inflationem, &c. sæpiùs post se trahunt.

Ingluvies, vel insolita ingestorum copia, stomacho aliàs benè se habente, *pravam digestionem*, minùs verò pertimescendam parit: sed stomachi vires crapulâ obruuntur, si præcesserint prædicta digestionum vitia. Omnibus innotescunt nimia repletionis signa, torpor nempè, vel segnities corporis paulò post pastum, vel nonnullis elapsis horis; capitis dolor gravativus; mens solito tardior; insomnia turbulenta, vel nimia ad somnum propensio; nausæa demùm & flatulentia. Solutam vivendi normam excipiunt interaneorum dolores, ad tormina sæpiùs accedentes; appetitûs dejectio, anxietates, stomachi inflatio, ructus acidi vel nidorosi, singultus, vomitus, alvi fluxus, crepitus olidi, &c. gravioribusque nonnunquàm symptomatibus stipatur hic stomachi status à victu præter solitum pleniori; sopore nempè, affectu comatoso & delirio. Ab eâdem causâ haud rarò excandescit febris, quâ sæpiùs maximo ægrotantium damno decipiuntur incauti.

Apud omnes in confesso manet studia intensa, attentasque alterius fortis cogitationes, alimentorum primæ elaborationi officere: ab accuratâ enim stomachi *autopsiâ anatomicâ*, haud falsò colligitur materiam quamcumque à cerebro ad illud organum appellere, ut ejus functiones ritè peragantur: hinc minime mirum, si à sufflaminato, ad alios etiam usus comparato hoc spirituofo latice, suis viribus orbatus ventriculus, ritè *coquendis ingestis impar* omninò evadat. Languent ejusdem visceris functiones à debilitate generali, & à provectâ ætate; ac præsertim à majore sanguinis vel seminis profluvio; vel spirituum dispendio in his qui post pastum labori & studio indulgent; nec meliùs se habet ventriculus inter mœrorem, aliave animi pathemata. Nec ritè perficiuntur ventriculi munia, si saliva à nativâ indole defleat, & cibi haud debito tritu in ore subigantur. Pervertuntur demùm à vitio quodam organico tum ventriculi, tum aliorum viscerum digestionem alimentorum famulantium. Putredini acidæ *obnoxii* censentur hypochondriaci æquè ac hysterici: digestionem verò melancholicorum, phlegmaticorum, scorbuticorum, & pronorum ad insultus catarrhales, ad mucosas vergunt. Biliosi & iracundi à laticis fellei excandescentiâ, vel majori proventu torquentur. Valetudinariis & debilibus, non secùs ac carneis dapibus plus æquo indulgentibus, familiares sunt cruditates nidorosæ.

Nusquàm *periculo* vacant, à quâcumque causâ ortum ducant, *pravæ digestionem*: ex hoc enim fonte, tanquàm è Pandoræ pyxide, innumeri & graviores prodeunt morbi, tum acuti, tum chronici; inter quos frequentiores numerantur febris intermittens, arthritis, nephritis, obstructiones, alvi

fluxus, &c. Pro comperto manet apud peritos, quòd à primarum viarum acescentiâ emergat potior affectuum chronicorum pars. Scitur quòd à succis amaris & putridis exurgant vertigines quæ apoplexiam minantur; febres acutæ peioris notæ; haud tamen in hâcce putriditate versatur *febris*, ut inquiunt, *putridæ* typus; sed ab horum succorum depravatorum ad massam sanguineam accessu hanc febris speciem progerminari credere par est.

Prava digestio ab eduliorum copiâ, vel ingluvie, sub diversos gradus se profert; quorum nonnulli haud inanem *metum incutiunt*, cum sæpius ad ultimam rerum lineam ducant; præsertim si affectum comatosum, ab apoplexiâ vix absimilem, infligant. Majus portendit periculum, si *temulentia* societur, ni primæ viæ vomitu & alvi fluxu sese exonerent. Periculosa est alex *inappetentia*, in infantiâ & senectute, post morbos graviores, sub alvi fluxu chronico, &c. Notavit BAGLIVIVS ingentem appetitum post diuturnum cibi fastidium, in morbis chronicis, lethalem esse; sed huic opinioni nonnunquam refragatur experientia. Nemo nescit quod à coagulo lactis in stomacho horrenda suboriantur symptomata.

Scitur è *viscerum intuitu* inculpatum sæpius stomachum à viciniorum labe in consensum trahi; nec fortè ex alio fonte prodeunt variæ *fordes*, de quibus suprâ. Haud rarò tamen ultrà modum dilatatus, vel contractus reperitur; in quibusdam adipe quasi obruitur: in aliis materiâ potulentâ, vel flatibus turget. Exiliores, nullisque rugis exasperatæ nonnunquam patent ejus tunicæ; quæ aliàs succo atro obliniuntur, vel crustâ crassâ & glutinosâ succinguntur. Præter lapides diversæ sortis in ejus cavo repertas, occurrunt prominentiæ callosæ vel skirrhosæ, tubercula variæ molis, &c. Quandoque ulceribus, putredine & gangrænâ defædatur stomachus, qui iisdem causis perforatur, & multifariam hiulcus proximiora viscera coinquinat. Nonnunquam demùm à propriâ sede dimoveretur illud organum, & ab hærente in herniis omento versùs inferiora, vel infrâ umbilicum trahitur. Sed frequentiores sunt, uti suprâ innuimus, ambientum viscerum læsiones: hepar enim skirrhosum, colorem subalbicantem vel plumbeum referens, stomacho accretum, molem ineffabilem, quâ ad pelvim usque nonnunquam depellitur, exhibens; emaciatum & deforme, tuberculis oblitum, hydatidibus refertum, abscessus recondens, ulcere depastum, putridum, gangrænosum, &c. deprehenditur. Lien exiguus, corrugatus & callosus sæpius conspicitur; aliàs corruptus, pultaceus, vel planè absumptus observatur. Patent intestina flatibus ultrà modum distenta, mutuò connexa, necrosi correpta, lacera, &c. Infarctum denique skirrhosum, suppurationem, putredinem, aliamve labem cernere licet in pancreate, omento, mesenterio, renibus, utero, &c.

Hinc jure infertur stomachum, ferendis alimentis imparem, rarò idiopathicè affici; sed sæpius ab aliorum viscerum abdominalium labe, vel strage, in consensum trahi; hinc patet quàm difficile sit congruam *curendi methodum* assequi; ad quam variis tentaminibus viam sibi parare nil

PRAVA
DIGESTIO.

vetat. Omnibus sanè innotescunt modi quibus occurritur diversæ primarum viarum saburræ : sed cum atrâ sæpius caligine obruatur ejus profapia, minime mirum si tot incassum adhibeantur remedia. Haud dubitare licet quin in hisce angustiis urgentiori sit occurrendum ; sordes scilicet cujuscumque sortis in stomacho nidulantes, foràs incunctanter, congruo emetico-cathartorum usu, elutriando : nec minùs patet quantum conferat exquisitissima victûs ratio. Quoad cætera præsidia, ea sunt eligenda quæ benè perspectam primarum viarum colluviem subigere queunt ; quæ experientiâ duce, sigillatim tradere expedit. 1º. *Ad cruditatem acidam*, præmissis præmittendis, egregiè conferunt diluentia simpliciora, vel ipsamet aqua. Specificè agunt absorbentia, lapilli nempe cancrorum fluviatilium, corallum, creta, &c. Conducunt amara, inter quæ usitatiora audiunt cortex peruvianus, gentiana, aloë, elixirium STOUTON, &c. Juvant roborantia ; rheum nempe, & extractum juniperi, elixirium proprietatis & garusi, martialia, &c. Nec inutilem opem præstant plantæ antiscorbuticæ, quæ non solum peculiari vi stomachi acescentiam oppugnant ; sed etiam ad sanguinem appellentia, hujusce laticis contractam labem emendare queunt. Vetantur sub hisce circumstantiis fructus crudi, vinum, alique liquores fermentati ; farinacea & saccharata ; lac & jura carniû quæ morâ & calore brevi acescunt. Nùm experientiâ, vel hypothesi ductus celeberrimus BOERHAAVIUS vinum & aquam vitæ suis ægris concedebat, solertioribus examinandum relinquimus.

Alia expostulat auxilia colluvies amara, inter quæ primatum sanè obtinent evacuantia emetica vel cathartica, circa quæ notare juvat oris amarorem, haud semper oriri à nidulante colluvie biliosâ in stomacho ; cum sæpius à solâ salivâ inquinatâ ortum ducat, sub quo casu nihil proficiunt cathartica : sed summam opem conferunt vomitoria inter quorum actionem bilis è suis receptaculis exprimitur, & pleno gurgite irruit ad stomachum è quo foràs per os amandatur. Nec leve juvamen præstant in utroque casu diluentia ; imò & sæpius conducit vinum quod saburrâ biliosâ, aquam respuentem, feliciùs diluit & solvit. Quibus præmissis rarissimè fallunt aquæ minerales frigidæ, Vallenfes nempe, Passienses, Forgienses, Spadanae, &c. Sed hanc saburrâ amaram expeditiùs subigere queunt medicamenta acida, tum vegetabilia, tum mineralia ; in quorum censum veniunt syrupus limonum, vel granatorum ; spiritus sulphuris & vitrioli, alique consimilia.

Quod *ad materiam mucosam* attinet ; haud præcipienda sunt evacuantia, ni priùs debito diluentium potu, fluiditas ipsi concilietur : aliàs stomachus mucò obductus remediorum stimulo obsurdesceret. Quibus præmissis, ad aquas Thermâles, Plumberianas nempe, Bellilucanas, Vicienses, Verwonenses, &c. quibus proficuè sociantur cathartica, devenire juvat. Interea pro votis succedere solent diversæ sortis stomachica, tum aromatica, ceu mentha & salvia ; cortex citri & aurantium, cyperus, calamus aromaticus, zedoaria, cinnamomum, nux moschata, piper, caryophylli, &c.

tum roborantia; uti malum cydonium, myrobalani, rheum, catechu, nux condita; vinum Cypreum, Hispanicum, aliudve generosum; martialia, &c. tum amara; absinthium nempè & centaureum minus; gentiana, cortex peruvianus, aloë, &c. tum officinalia è prædictorum miscelâ conflata, opiata nimirum Salomonis, mithridatium, theriaca, &c. Monendi demum hâc colluviei specie conflictati, ut probè stomachi regionem cooperiant.

Emesi & catharsi etiam impugnantur *cruditates nidorosæ*: cæterum, ab institutâ diætâ è terræ frugibus paratâ, auspicatur *curatio*. Quibus peractis *ia* usum sunt vocanda refrigerantia acida, quibus præstat hic gratissimus potus, quem limonadam vocant: profunt quoque tamarindi, cydoniata & id genus alia. Nonnunquam etiam pro re natâ contraria juvant; cortex nempè peruvianus, gentiana, absinthium, aliaque amara; non secus ac aromatica, mentha scilicet, abrotanum, &c. Suas demum meretur laudes rheum, sub hoc casu usitatissimum: nec inerres censerì debent aquæ minerales, tum calidæ, tum frigidæ; quæ præsertim visceribus digestionì alimentorum famulantibus succurrere valent.

E prolatis intelligitur cur *cibi fastidium*, omnium ferè harumce morbosarum stomachi dispositionum familiare pedisequum, diversam pro multiplicium causarum conspectu, *curandi methodum* exoptulet. Nemo sanè quidem nescit quòd quædam alimenta vel remedia appetitum in hoc promoven, & in illo prosternunt: hinc fit ut experti clinici, suis præjudicatis opinionibus minime addicti, agrorum votis sæpiùs indulgeant; imò & ex illo fonte plura eruunt quæ morbi indolem, antea occultam, prodere queunt. Pluriès enim vidisse memini, post incassum exhausta prioris notæ remedia, appetitum restitutum à cepâ, allio & nucibus; ab acerariis, ab echinis marinis, à carnibus & piscibus muriâ conditis, aliisque id genus expetitis; sed in morborum curatione planè obsoletis.

Supereft priusquam manum è tabulâ amoveamus, ut de modo medendi *pravis crapulæ effectibus* breviter agamus; è quibus sanè, præviâ & vigente quavis morbosâ stomachi dispositione, graviora vel lethalia emergere queunt symptomata; quorum curatio plerumque absolvitur aquæ, pro omni alimoniâ, largo potu; vel alvi solutione spontaneâ, vel enematum beneficio concitatâ. Venæ sectionem in hoc casu periculosam esse nemo nescit; cur fit ut, nisi urgente necessitate, nusquam ante elapsas à pastu viginti quatuor horas adhibeatur. Ab hâce normâ nonnunquam tamen deflectere licet, ubi in statu plethorico vehementior sævit febris, cum somnolentiâ, delirio, aliove ominoso symptomate. Sed cavendum ne impeditæ cerebri functiones, quæ huic causæ submittuntur, pro genuinâ apoplexiâ habeantur; quem errorem capite luunt plerique agrotantes. Præsentaneam opem ferunt cathartica & emetica, quæ tutius morbi fomitem foras eliminant; cum cautelâ tamen sunt præscribenda, ne fatiscentibus viribus vitio verantur. Ultrâ omne dubium positum manet sordes primarum viarum nervos laceßere, & truculenta excitare symptomata, donec foras eliminantur;

PRAVA
DIGESTIO.

hinc anxietates, cephalalgiae, deliria, soporosi affectus, &c. quibus cathartorum praesidio occurritur. His peractis nonnunquam conducunt amara vel acida, imò & roborantia: absit tamen ut imperitorum, vel nebulo-
rum exemplo diutius quam par est proteletur curatio. Si demum *temu-*
lencia eduliorum ingluviei societur; opportunè exhibetur largus haustus
the, vel succus limonum aqua copiosiori & saccharo temperatus: sed in
urgentiori casu ad venae sectionem & emetica, cum supra laudatis caute-
lis, confugere licet.



V O M I T U S.

HAUD abs re erit per transennam annotasse vomitum à vi contractili & spasmodicâ ventriculi promoveri, non verò à diaphragmatis & musculorum abdominis simultaneâ actione, ubi tradidit aliàs celeberrimus CHIRAC; cui assensum inconsultò praeberunt omnes, ni fallor, Scholae Medicæ: circa quod phaenomenum vide Acta Regiæ Academiæ Scientiarum Parisiensis anni 1752. Ventriculum exquisitissimo sensu donari è benè perspectis crassioribus nervorum propaginibus quæ ejus contextum adeunt, abundè patet: hinc minime mirum si à quâvis vellicatione convellatur; vel spontaneo naturæ nisu lacerantes materias, duplici fibrarum lacertofarum serie instructus, foràs abigat. *Vomit*us, ut ad propositum revertamur, quem præit nausea, vel os anxiosum, cum copiosâ salivæ excretionem, *concitatur* à pravis eduliis, vel majori copiâ ingestis, à vino liberaliùs sumpto, à medicamentis stimulantibus, & venenis; atque à variis fordibus in stomacho nidulantibus. Suboritur à ventriculi inflammatione, exulceratione, skirrho, alteriusve fortis labe organicâ: quibus addere licet herniam epiploicam, quæ stomachum adducendo, ejus inconditum motum fovere solet. Sed familiarior est *vomit*us *sympathicus*, vel per consensum, à morbis scilicet capitis, hepatis, lienis, renum, &c. sobolescens: nullum enim est dubium quin hemicrania, capitis contusio, ebrietas à vino, tabaco, fumo carbonum, aliâve causâ; hepatitis, nephritis, &c. vomitum accersant: neminem latet vomitum moveri pharyngis vellicatione, ope digiti vel plumæ: sed occultantur innumeræ aliæ causæ; ni ab *extispiciis* cadaverum innotescant. Apprimè norunt Practici *vomitum symptomaticum*, vel *criticum*, in morbis acutis, in variis colicæ speciebus, &c. nec expertos fugit hunc sapiùs concitari à retrocessu materiæ arthriticæ, ischiadicæ, vel rheumaticæ, à sufflaminatâ perspiratione, à suppressis mensibus, urinâ, aliove fluxu. Conspectum postremò rerum averlarum, insolitam navigii jactationem, ergà inassuetos, vel maris impatientes, currûs vectio ergà retrorsum sedentes; casus ab alto, &c. eundem effectum edere nemo nescit.

Ad vomitum *proni* censentur infantes, helluones, & potatores; hypochondriaci & scorbutici, cachectici & valetudinarii: huic obnoxia sunt virgines chloroticae, mulieresque utero gerentes. Vomitus, febrium intermittentium instar, & praesertim quartanae, nonnunquam periodicè recurrit. Plures quidem, vegetâ aliàs sanitate gaudentes, quotidie matutinis horis, materiam, ut plurimum, mucosam vomituriunt. Alii hanc evacuationem patiuntur singulis hebdomadibus, mensibus, &c. nonnulli demùm post pastum stomachum exonerare solent.

Vomitu deturbari quidquid in stomacho & intestinis continetur, ingesta nempè, bilis, succus pancreaticus, mucus gastricus & intestinalis, vermes, lapides, sanguis, pus, &c. nemo nescit: ut quosdam vomitus, à publico rerum ordine alienos, quorum historiae fabulas sapiunt, silentio praetermittamus: bufones enim, lacertos, serpentes, talpas, catellos, mures, &c. in stomacho viventia latuisse, credat Judæus Apella. Proficuum est vomitus ab ingestorum copiâ concitatus: ac perutilis est bilis, vel materiae mucosae, evacuatio. Sed majorem *incutit metum* colluviei nigrae & putridae, saniosae vel purulentae ejectio. Vomitus chronica, nullâ accedente causâ manifestâ, ab stomachi, vicinarumque partium vitio organico pendere; hinc exitium portendere haud falsò conjicitur. Vomitus in principio morborum acutorum non solum *periculo* vacat; sed conducibilis censetur. Aliter se res habet sub aliis morbi temporibus, cum sit ut plurimum symptomaticus: si demùm, inter morbi gravioris periculum, singultu stipetur vomitus; praecipue exitium affert.

Scitur è *sectis cadaveribus* raro occurrere pravam stomachi conformationem; hoc verò viscus, nonnunquam mole portentosum, saepius è fede suâ depellitur, tum à propriâ herniâ diaphragmaris scilicet repagulum, vel musculorum abdominalium obicem solvens; quod tamen raro contingit: tum ab herniâ epiploicâ; vel ab aliâ causâ. Skirrhus in multis deprehenditur ventriculus: sed huic vitio magis obnoxium est ostium inferius, quod, praeter obstructionem à nummo, aliove corpore extraneo, in nonnullis cartilagineum, vel osseum reperitur; nec hujusce labis immune est appensum duodenum: quandoque etiam visendus se praebet pylorus phlogosi correptus; sed raro ad purulentiam vergens. Insuper observatur ventriculus praeter solitum contractus, occallescent, pustulis diversae fortis oblitus; tumoribus anomalis, nonnunquam cancrosis, deformatis; phlogosi, purulentia, exulceratione & gangranâ tactus; dilaceratus, vulneribus confossus, &c. Hepar, inter cetera viscera abdominalia, frequentius defœdatur; inflammatum nempè, purulentum; skirrhusum vel steatomatosum; gangranosum & putridum; diaphragmati, stomacho, aliisve partibus ambientibus accretum; aridum, durum & quasi elixum, deprehenditur. Concretiones biliosas recondit vesicula fellea, quae aliàs, non secus ac vasa choledocha, bilis copiâ turgescit: insolita nonnunquam comperitur insertio ductûs communis; qui scilicet propè pylorum, vel in ipsomet ventriculo implantatur. Intestina ultra modum di-

VOMITUS.

stenta, veluti à circumducto filo arcè constricta; extrà abdomen depulsa, unà cum epiploo; putrida & invicem accreta; vermium glomeramine, vel invaginationibus obstructa, disrupta, &c. cernuntur. Lien, pancreas, mesenterium, omentum & renes, mole portentosa, inflammata, purulenta, skirrhusa, putrida, &c. annotantur: quibus addere licet lithiasim renum, & ureterum. Deprehenduntur tumores diversæ sortis, stomachum, tubumque intestinale comprimentes, vel laceffentes. Obvius postremò fit cartilaginis xiphoidis prolapsus; ut de hydropè cystico, aliàve colluvie; variisque capitis & pectoris læsionibus quæ stomachum movere queunt si leamus.

Curatio vomitum duntaxat immanem, vel diuturnum, nullâ præexistente causâ organicâ immedicabili, respicit. Venæ sectiones, nemine sanè discrepante, exulare debent. Nonnunquam conferunt emetica, & præsertim ipecacuanha: sed cum grano salis admittendum illud effatum, quo fertur vomitum vomitu curari; cum haud omnibus congruat hic curandi ritus; quo, experientiâ teste, crabrones sæpiùs irritantur; & exasperatur morbus; præcipuè si à vitio organico foveatur. Proficiunt laxantia: sed raro obicem morbosum superare queunt: egregiam verò opem præstant enemata stimulantia. Conferunt diluentia & refrigerantia; serum nempè lactis, ipsumve lac; juscula pulli leviora, aqua simplex vel succo limonum, spiritu vitrioli & sulphuris, imprægnata, &c. Commendantur paregorica, nitrosa nempè, sal de duobus, & liquor anodynus mineralis: nec verantur narcotica, laudanum nempè, diacodium, pilulæ de cynoglossò, &c. Jure deprædicantur, præmissis præmittendis, stomachica roborantia & amara, mentha scilicet & salvia; absinthium & centaurium minus; enula campana & rhabarbarum, rosæ rubræ & balauſtia, cydonia & cortex granatorum, mastiche, balsamum peruvianum, extractum juniperi, theriaca, confectio de hyacintho, &c. Nec posthabenda sunt absorbentia; creta nempè & lapilli cancrorum fluviatiliū, cornu cervi præparatum, crocus martis, &c. Minime prætermittendum, vomitui febrium symptomatice egregiè occurrere, mixturam Riverianam, succum nempè limonum cum sale absinthii, alterove ejusdem naturæ, fermentatum, qui in plerisque, incantamenti instar, vomitum molestissimum compescit. Postremò curationem claudunt aquæ Forgienses, Vallenses, Passienses, Borbonienses Anselmenses & Arcimbaldicæ, Bellilucanæ, Cauterienses, Amandinæ, &c. quæ cuncta permeando stomachi, viscerumque ambientium morbis organicis mederi queunt.

Necessum quandoque judicatur ut ægrotantes lecto se contineant: aliàs gratis obambulationibus in aëre aprico se exerceant. Sed semper prodest, quævis causa incusetur, *viçtus tenuis* è gelatinis, cremoribus, ovis sorbilibus, &c. depromptus. Aquæ simplicis, vel variis stirpibus imprægnatæ largus potus nonnullos juvat; alios offendit. Si demum *vomitùs immanior ab emetico* largiori dosi, vel intempestivè exhibito sobolescat; largo aquæ, vel vitrioli imprægnatæ, potu sedatur: acida verò vegetabilia contrarium effectum

effectum edere vulgò fertur ; sed refragatur experientia. Eamdem opem conferre valent demulcentia vulgatiore, sedantia stomachica & absorbentia : VOMITUS.
 rarò tamen in usum trahuntur prædicta medicamina adversus morbum, qui solo odore citri vel aceti sæpiùs fugatur.

Præclara mûnia obire valent sub debilitate stomachi, *topica* diversæ fortis roborantia, & regioni epigastricæ admota ; pulpa nempè cydoniorum, mentha, melissa, absinthium, caryophylli, crocus ; aqua Reginae Hungariæ, acetum, theriaca, aliaque id genus, è quibus conficiuntur cataplasmata, vel epithemata, quæ pluribus optimè cedunt : sed cæteris fortè præstat panis tostus vino generoso irroratus, aromaticis conspersus, & scrobiculo cordis impositus. Faustè etiam naribus admoventur acetum acerrimum, aqua Reginae Hungariæ, aliava cognata ; aurantia, limones, &c. arte demùm chirurgicâ curatur cartilaginis xiphoidis prolapsus. Quod *ad vomitum symptomaticum* attinet ; morbi primarii habendam esse rationem, nemo non intelligit : cur fit ut sæpiùs conferant aperientia, sudorifica ; hirudines podici admotæ, cauteria cruribus vel brachiis inusta, &c.

VOMITUS CRUENTUS.

ÆGRORUM relatu, vel affinitate morbi deceptos, hæmoptysim pro vomitu cruento, quosdam habuisse jam suprà notavimus : accuratiori tamen examine, maximum patet inter utrumque morbum *discrimen* : sanguis enim è pulmonibus erumpens sincerus, rutilans & spumofus observatur ; qui econtra ex stomacho prodit nigricans & diversis materiebus immixtus conspicitur : præterea hæmoptysis tussi stipatur, & hæcce notâ à vomitu cruento facilè distinguitur. Alium in autopsiâ errorem caveant inexperti, qui haud ritè distinguunt sanguinem nigrum & corruptum per vomitum excretum ab illâ caligine biliosâ, atro-viridi, ad acidum vergente, quæ atra bilis veterum audit, à recentioribus, si excipias clarif. LORRY inter Medicos Parisienses celeberrimum, inconsultò posthabita ; quæ scilicèt non solum per vomitum & per sedes se prodit ; sed etiam urinas suo colore inficit ; ut sæpissimè observatur sub diathesi humorum melancholicâ. Morbum, de quo in præsentiarum, prænuntiare solent æstus, dolor gravativus stomachi, hypochondriorum inflatio, anxietates, quædam artuum inferiorum inquietudines noctu invadentes ; cibi fastidium & nausæ quibus nonnunquam sociantur motus convulsivi, vel sudores frigidi à profliente sanguine fugandi. Febrem rarò comitem habet vomitus sanguinis ; quin potiùs pulsus in plerisque exiguus est & contractus. Interea vultus colorem pallidum, vel plumbeum induit ; vires deficiunt, accedunt anxietates, lipothymia, aliaque graviora *symptomata* in cæteris hæmorrhæ-

VOMITUS
CRUENTUS.

giis observari solita. Major, minorve est sanguinis, nunc floridi, nunc nigricantis & fœtidi proventus, qui etiam atramenti instar per sedes egeritur, præsertim ubi vasa mesenterica, non secus ac gastrica, hunc profundunt. Dolor varium situm obtinet, è quo benè perspecto, quænam sit *pars affecta*; nùm scilicèt stomachus, vel tubus intestinalis, lien vel pancreas, &c. lædantur, licet conjicere.

Plethora à suppressis profluviis sanguineis, præsertim in sequiõri sexu, vomitum cruentum sæpiùs concitat: hunc *promovent* soluta vivendi norma, ciborum calidiorum, vel sale & aromatibus conditorum esus; emetica, purgantia drastica, & venena. Rarò epidemicè grassatur hic affectus; cui *obnoxii* censentur plethorici & cholerici; melancholici, hypochondriaci, & scorbutici. Dejectiones, sub hocce morbo, sanguine aterrimo plerùmque inquinari notavimus; hinc fit ut *morbi nigri titulo* insigniatur, apud Veteres: sed hanc incongruam nomenclaturam hætenùs obsoletam, quibusdam verò recentioribus plus æquò fortè arridentem, admittere gravamur; ne ex hoc fonte prodeant errores misellis ægris lugendi. *Vomit*us sanè quidem *cruentus* haud semper dejectionibus ejusdem naturæ stipatur: ac feces alvinæ nigerrimæ sæpiùs conspiciuntur, nullo prævio vomitu. Undè liquet binos hosce affectus, plerùmque reverà implicitos, seorsim nonnunquàm existere; cùm horum universa sit sedes. Quibus addere licet, quòd quandoque accadat ut sanguis è naribus prodiens, inter dormiendum in situ supino, stomachum petat; cur fit ut ventriculus partim vomitu sese exoneret, & partim sanguinem stagnantem versùs inferiora elabi sinat; undè sedes nigerrimum colorem contrahunt: turpiter sanè hallucinari qui sub hocce casu, morbum nigrum se pertractare somniant, nemini haud obvium.

Haud *ominosus* est vomitus cruentus qui à suppressis mensibus & hæmorrhoidibus fovetur; dummodò tamen sanguis haud pleniori gurgite erumpat; cùm à restitutis pristinis evacuationibus desinat. Exitium econtra portendit, si febre stipetur, vel symptomatis instar in morbo acuto se prodatur; si sanguis niger & graveolens profundatur; si demùm, post accuratum doloris sedis examen, à lienis, pancreatis, &c. vitio quodam organico pendere videatur. Vomit sanguinis à liene manifestè tumido, qui post vomitum in sese concidit, periculosa est alea. In quibusdam verò paululùm cruoris foràs per os amandatur, stomacho remanente turgido, vel ultrà modum distento; undè emergunt lipothymia, syncope, aliaque graviora symptomata; ni sanguis corruptelam morâ brevi induens, inferiora versùs exitum sibi paret. His addere licet quòd hoc morbo semel correpti, ejus reditum cavere debeant.

Ab institutis *cadaverum sectionibus* patet stomachus cruentus, tumore quasi cancroso defœdatus, exulceratus, maculis gangrenodeis infestatus, vix citrà dilacerationem pertractandus. Ostium inferius in nonnullis infarctum, & quasi obstructum oculis subjicitur. Deteguntur hujusce visceris venæ, lieni præsertim prospicientes, plus æquò turgidæ & varicosæ; ac

simili modo afficiuntur vasa intestinorum, qui etiam flatu distenduntur: emaciata deprehenduntur omentum & mesenterium: tumens conspicitur lien, skirrhusus, cartilagineus vel putridus. Pancreas infarctum, induratum vel putridum reperitur. Hepar, sed rarius simili fermè modo læditur, vesiculaque fellea bile turgida annotatur. Ut de aneurismate, aliisque vitiis taceamus, quæ passim occurrunt, tùm in pectore, tùm in abdomine, quæ à nostro proposito fermè aliena videntur.

Quiete & diatâ tenuissimâ in ipsis quasi incunabilis sæpius præfocatur hic morbus: quod tamen non impedit quominus *venæ sectio* opportunè celebretur; ubi scilicet excretus sanguis rutilans & coccineus oculis subicitur; vel post consueti sanguinis profluvii sufflaminationem: aliàs inutilem operam ludit; vel planè improbat. Inter *remedia* usitatiora & magis proficua recenseri debent refrigerantia & temperantia; aqua scilicet succo limonum vel nitro imprægnata, syrupus aceti, vel de berberide; serum lactis; aqua pulli, oryzæ & hordei; quibus addere licet infusa vel decocta è cichorio, agrimoniâ, pimpinellâ, acetosâ, portulacâ, &c. Conducunt vulneraria & adstringentia blandiora; urtica scilicet, consolida major, hederâ terrestris, plantago, millefolium & herbæ vulnerariæ; malum cydonium, rheum, cathecu, corallum, balsamum peruvianum, copahu, &c. multis etiam optimè cessit aqua gelidissima. Quoad adstringentia validiora, lapidem putà hamatitem, sanguinem draconis, alumen, essentiam Rabel, spiritum vitrioli, aliaque consimilia; haud nisi urgentiori casu in usum trahi debent; cùm noxam, imò & lethum sæpius inferant.

Cautè etiam præscribi debent *hypnotica*, diacodium nempè, trochisci de karabe, &c. ne intempestivâ vomitûs cruenti sufflaminatione, sanguis moram trahens in primis viis corruptelam induat; & hinc truciùs moveantur symptomata. Nec minùs sunt pertimescenda *cathartica*; si excipias mitiora, cassiam nimirum, tamarindos, rheum & myrobalanos; quæ nonnunquam post cohibitum sanguinem usurpare licet; sed maximi est momenti ut alvus aperta fervetur. Exulare debent emetica: radicem duntaxat Brasiliensem refractâ dosi exhibere nil vetat. Minime demùm sunt posthabenda, vigente paroxysmo, *auxilia externa*, in omnibus fermè hæmorrhagiis adhiberi solita; nempè vincula artubus injecta, frictiones in cruribus celebratæ, manuum & pedum immersio in aquam frigidam vel tepidam; lintea calida imò ventri admota; fons ex aceto vel oxycrato paratis, &c. Quod ad *remedia prophylactica* spectat, pluris habetur diætâ refrigerans, lac nimirum pro omni alimoniâ, cremores hordei & oryzæ, &c. Conducunt præsertim venæ sectiones: conferunt laxantia: proficua nonnunquam audiunt martialia; aperientia, aliaque benè multa primarium morbum respicientia; qui scilicet vomitionem cruentam fovet.

VOMITUS
CRUENTUS.

FAMES
CANINA.

FAMES CANINA.

Sic vocitatur hæc *inexplebilis ciborum voracitas*, quâ conflictati latrantem stomachum compescere nequeunt; quæ vomitum & lenteriam, aliaque graviora incommoda post se trahens, atrophiam demum excipitur. Alia est famis indomabilis species quæ nullam harum evacuationum comitem habet; atque dolore stomachi gravativo, spirandi difficultate stipata, *fames bovina* audit. Ab alterutrâ, vires sensim prosteruntur; ingruit somnolentia, &c. Rarissima est genuina famis canina, sub quâ nusquam saturantur ægri; licet quotidie hoc nomine ab inexpertis insigniatur hæc esuries, juvenibus, mulieribusque gravidis; melancholicis & valetudinariis familiaris, quæ nil ferme sanitati demit. Fami caninæ obnoxii sunt hypochondriaci & scorbutici: illi qui per nives diu gradiuntur; cur sit ut regionum septentrionalium incolæ sint edaciores. Multa prostant exempla hominum voracissimorum qui uno convivio quadraginta & ultra carnis libras vorabant, cum panis & vini stupendâ copiâ. Fidem sanè superat quod traditur de variis athletis qui integrum taurum uno die comedebant. A saburrâ acidâ nonnunquam fovetur famis canina, uti patet ex vomitu, quo rejiciuntur materies acidæ & æruginosæ, stuporem dentibus inducentes, & vasa ænea quibus recipiuntur brevi in æruginem arrodentes. Eundem effectum non raro producit bilis restagnans in ventriculo: scitur enim plures, in quibus ductus choledochus hiabat in ventriculum, voraciores fuisse. Hepatis ingens moles, solium, & lumbricorum copia, voracitatem etiam inducunt: ut fileamus de variis causis quas patefacit autopsia anatomica.

Lustrata cadavera exhibent stomachum ultra modum turgentem; vel parvum cujus latera insolitam crassitiem exhibent: deteguntur in ejus cavo cruor stagnans; colluvies atramenti instar nigra; bilis æruginosa & quasi vitriolica; ingensque pediculorum numerus. Pylorus laxior, vel plus æquo apertus se sistit; ductus biliaris in ipsummet ventriculum hians observatur, &c. Stupendus conspicitur lumbricorum proventus in tubo intestinali; qui nonnunquam etiam solium recondit. Adinventum fuit unicum intestinum recto tramite ab stomacho ad anum pergens; ut alia conformationis vitia fileamus. Hepar nonnunquam infarctu skirrroso tactum vel mole amplissimum annotatur. Lien etiam stupendam magnitudinem præ se fert; vel pultaceus & putridus deprehenditur. Easdem ferme læsiones contrahunt pancreas, mesenterium, &c. Quibus addere licet ductum pancreaticum duplicem; œsophagum alterius stomachi instar in pectore dilatatum, &c.

Proficua in utrâque fame censentur, ni nil obstat, *evacuantia* per alvum. Plurimum conferunt *refrigerantia* & demulcentia, aqua nempe pulli, vel

oryzæ; serum lactis, &c. Huc respiciunt dapes pinguiore, vel oleo conditæ, quæ sæpius exquisitorum remediorum vices supplent. Nec minùs præstant, præmissis præmittendis, *hypnotica*; diacodium scilicet, laudanum, pilulæ de cynoglossò, aliaque id genus. Simili fermè ratione adhibetur nicotianæ fumus, tanquam scilicet præfens sævientis famis levamen. Pro votis quandòque succedunt, perspectâ morbi causâ, mercurialia, aliaque vermifuga. A nonnullis decantatur ambra cineritia: alii suadent theriacam, aliave stomachica aromatica, quæ sedantium vires æmulari videntur. Nec despiciuntur absorbentia, corallum nempè, creta, lapis hæmatites, limatura ferri, &c. quæ, acida stimulantia subigendo, inducias impertiri queunt.

FAMES
CANINA.

MOLESTIA STOMACHI.

DE multiplici hujusce morbi indole, perfunctoriè à veteribus indagatâ, nil ferè præter commenta effutierunt recentiores: adeò ut, quidquid de hac re in libris prostat, animum veritatis avidum minime expleat. Ægrè sanè *innotescit*, nùm hic morbus, in quibusdam sævissimus, sit essentialis, vel symptomaticus: nec faciliùs nonnunquam distinguitur à colicâ hepaticâ, intestinali, nephriticâ, &c. *Sedem* habere videtur hic dolor in scrobiculo cordis, cui ventriculi ostium superius respondere, neminem anatomicum fugit. Sed hisce cancellis minime continetur; quin potiùs nunc per tota præcordia se diffundit; nunc in latiore regionem epigastricam propagatur; aliàs ad notissimas diaphragmatis connexiones, hypochondria nempè, dextra lævaque pertingit. Sub variis gradibus se profert hæc molestia stomachi sensatio, qui ob diversum typum quem assequi videntur ad quatuor referri queunt *species*, quas seorsim exhibere expedit. 1°. Dolor obscurus & languens, *anxietas* audit, quæ etsi mitior videtur, agros tamen modo quodam ineffabili excruciat; undè inquietudines, quarum sævitiam produnt suspiria & gemitus. 2°. Morfu quodam afficitur orificium ventriculi superius, quod *cardiam* vocitarunt Veteres; hinc *cardialgia* audit hic affectus, qui pravas digestiones concomitari solet, & suos nonnunquam habet paroxysmos. 3°. Alius occurrit dolor quasi urens, vel fervoris sensus, *sodæ* nomine notus; *le fer chaud* à nostratibus dicitur, juxtà œsophagum sæpius propagatur hæc ingrata sensatio; & fovetur à colluvie acidâ quasi vitriolicâ in stomacho nidulante, cui obnoxii sunt melancholici, & cerevisiæ potatores, de ructibus ejusdem naturæ perpetuò queruli.

4°. Denique alia est doloris species lancinans quæ suam tyrannidem exercens in eodem digestionum organo, *colica stomachi* dicitur: hæc ab spasmo & flatulentiâ natales sumit; ructibusque ac inflatione epigastrii,

 MOLESTIA
STOMACHI.

anxietatibus & lipothymiis plerumque stipatur. Notare expedit quòd, si hic postremus dolor, ad certum gradum evectus febrem comitem habeat, ventriculi minatur phlogosim; quæ truculentiora post se trahit symptomata; & crebrius sanè occurrit quàm vulgò fertur. Hisce stomachi cruciatibus, partes proximiores & dissitæ in consensum trahuntur; & omnes ferè œconomiae animalis functiones pervertuntur; prodeunt nempè vomitus enormes, spirandi difficultates, cordis palpitationes, & pulsus inordinatus; rigores, tremores, lotii suppressio, sudores frigidi, extremorum refrigeratio, convulsiones, paralyfes, &c. adeò ut nonnulli ægri, hisce ferendis impares, deficientibus mentis & corporis viribus ad incitas redigantur: minime sanè mirum, si acerbissimi stomachi dolores hanc truculentiorum symptomatum catervam post se trahant; cùm nulla occurrat pars in corpore vivente, ratione habitâ molis, quæ tantum nervorum proventum excipiat, & hinc exquisitiori sensu donetur: cur haud malè dicitur ventriculum, & cor, habenas tenere quibus totum corpus regitur.

Suboriuntur dolores stomachi à materiis stimulantibus, in ejus cavo latitantibus; pravarum nempè digestionum reliquiis, emeticis & catharticis, venenis, vermibus, &c. Sobolescunt ab iracundiâ, mœrore, aliisque gravioribus animi pathematibus; à suppressis profluviiis sanguineis, à repulsis eruptionibus cutaneis, à cohibitâ dysenteria; à colicâ intestinali, mesentericâ, duodenali, hepaticâ & nephriticâ; à febribus mali moris, &c. Hisce torminibus *obnoxii* sunt comestationibus indulgentes, melancholici, arthritici & calculosi; ad hæc pronæ censentur chloroticæ & hystricæ, &c. Stomachi dolores crebrò recurrentes haud *periculo* vacant: indomabiles sunt chronici: vehementiores, vigente febre, stomachi inflammationem minantur: malum denique impendet maximum, si, his sævientibus, exsurgant singultus, sudores frigidi, lipothymia, &c. Scire expedit hunc morbum, *cardialgia* nomine notum, sedem sæpiùs habere extrâ ventriculum; non solum in œsophago, duodeno, diaphragmate & omento; sed in hepate & liene, in pancréate & mesenterio; ac in musculis abdominalibus. Aneurismata etiam & cæteri tumores ventriculum laceffere queunt: hinc sequitur, haud jure sæpiùs incusari ventriculum; & morbum, sub hoc errore, præposterâ curatione impugnari.

Seçta cadavera patefaciunt bilem acerrimam vel æruginosam in stomacho stagnantem; vel lapilli biliares, instar granorum mali granati, in stomacho delitescentes, atque sanguinem extrâ vasa emissum. Flatulentiâ, vel copiâ alimentorum, in immensam molem assurgit prædictum viscus, nonnunquàm è sede depulsum; ejus tunice crassiores & occallescentes, phlogosi & purulentiâ tactæ, ulceribus intus & extus exesæ, putridæ, gangrænosæ & dilaceratæ deprehenduntur. Passim etiam occurrunt tumores anomali vel cystici, sarcosæ fungosæ, verrucæ, pustulæ gangrænosæ ad papulas variolosas accedentes; aliæ diversæ sortis tubercula. Detegitur quandoque ductus biliaris huicce organo implantatus, in quo etiam reperiuntur

vermes , folliculi pediculos colligentes , lapides multiformes & diversæ molis , pilulæ , nuclei , carbones , gypsum , aciculæ , innumeraque alia corpora extranea deglutita. Pylorus demùm tumidus & skirrhusus, verrucis vel sarcomatibus obsessus , ac ulcerosus ; in nonnullis ita relaxatus ut omnes digitos junctim compositos admitteret , oculis subjicitur. Nec duodeno parcit hæc morbosa dispositio ; quod etiam à flatibus ultrà modum distenditur ; non secùs ac alia intestina. Hepar skirrhusum , inflammatum , purulentum & putridum reperitur : similique labe defœdantur lien , pancreas , mesenterium , omentum , &c. Patet vesicula fellea ad crepaturam repleta ; vel stupendum concretionum biliarium numerum recondens. Ante oculos versantur herniæ epiploicæ ; aneurisma aortæ vel celiacæ , &c. ut de mediastini & pericardii phlogosi ; immensâ cordis mole , aliisque hujusce organi vitiis fileamus.

**MOLESTIA
STOMACHI.**

Ubi dolor stomachi acerbissimus febre acutiori stipatur , venam tundere juvat ; ut imminens declinetur phlogosis. Equidem sub hocce casu sanguini minime parcendum. Aliàs nihil celerius expedire valet ventriculum quàm *emetico-cathartica* ; cùm uni eliminationi sordium in primis viis nidulantium ante omnia sit studendum. Cum cautelâ tamen , vel hypnoticis immixta præscribi debent ; ne hoc stimulo exasperetur morbus. Quibus peractis proficue adhibentur demulcentia ; aqua nempe pulli , serum lactis , emulsiones , oleum amygdalarum dulcium ; aliaque consimilia , quæ præsertim emeticorum & venenorum spicula vellicantia obvolvere queunt : aqua aliàs simplicissima affatim hausta pro votis succedit : plures enim hoc chronico morbo liberantur hæc solâ ratione , quâ vino abstineant. Haud inanem operam ludunt decocta è borragine , cichorio , pimpinellâ , fumarîâ , cerefolio , cancris fluviatilibus , aliisque temperantibus vulgatoribus parata.


Prædictis medicaminibus sociari queunt *sedantia paregorica* , nitrum nempe & camphora , liquor anodynus mineralis , &c. Nonnunquam proficiunt antispasmodica ; melissa nempe & flores tilia , castoreum , aqua florum aurantiorum , pulvis de gutteta , &c. nec vetantur urgentioribus doloribus narcotica ; diacodium nempe , guttæ anodynæ SYDENHAMI , aliave affinia. Hunc morbum etiam respiciunt *stomachica & carminantia* , flores nempe chamæmeli , à pluribus jure celebrati ; mentha & salvia ; anisum & feniculum , enula campana , & rheum , cortex peruvianus & cascarilla , extractum juniperi & absinthii , theriaca , &c. In subsidium postremò vocantur , pro re natâ , absorbentia , anthelmintica , martialia & aperientia , sudorifica , antiscorbutica , &c. quibus impugnari solent variæ causæ stomachum in consensum trahentes. His insuper obsecundant enemata demulcentia , laxantia & carminantia.

Maximi fanè est momenti inter hæscæ dolorum species curandas , ut apprimè attendatur ad materiarum in stomacho nidulantium indolem , quam produnt recensita signa ; nùm scilicet ad aciditatem vel ad alkaliescentiam vergant ? ne post adhibitam inconditam remediorum farragi-

**MOLESTIA
STOMACHI.**

nem, à jivantibus & ledentibus tota dein dirigatur medela, merè empirica. *Colluvies* enim *acida*, præmissis diluentibus & evacuantibus, solis absorbentibus quandòque domatur; cretâ scilicèt, corallo, lapidibus cancrorum fluviatilium, magnesiâ, aliisque consimilibus. *Saburra* verò *alkalina* contrariis subjicitur, nitro scilicèt, limonadâ, aliisque potionibus acidulis. Sed hæc omnia remedia, inertia sæpiùs esse, haud latet sanè clinicos, qui exhaustis officinarum fontibus ad aquas minerales, tanquàm ad sacram anchoram confugere solent; inter quas usitatiores audiunt Vallesenses, Forgienfes, Plumberianæ, Bellilucanæ & Montis aurei. Pluribus demùm proficit, cæteris consentientibus, victus demulcens, è lacte scilicèt, cremoribus oryzæ, hordei, &c. paratus. Sed infausta hæc est curatio, ni priùs; uti jam innuimus, morbi primarii habeatur ratio.

Quod ad *topica* spectat; plura adhibentur quæ inducias impertiri queunt; in quorum censum veniunt emollientia, sub litûs, fotûs vel cataplasmatibus formâ, regioni epigastricæ imposita. Doloribus chronicis tutius occurrunt aromatica, spiritiosa, balsamica & camphorata, è quibus parantur sacculi, linimenta, epithemata cataplasmata. Nec despiciantur emplastra è pice, tacamahacâ, baccis lauri, conflata. Nonnullis profunt balnea, vel semicupia tepida; nec inutilem opem præstant pediluvia. Plures demùm, qui post longam tædiosamque curationem in pejus ruebant, nedùm levarentur; omnibus remediis valedixerunt, & regione epigastricâ ritè coopertâ congruoque composito regimine, sanitati sensim, præter spem, restituti sunt.



INFLAMMATIO ABDOMINIS.

DE phlogosi internâ generatim conspectâ, jam satis superque in primâ Synopses parte: nunc operæ pretium judicamus ut de *inflammatione abdominis*, morbo frequenti & ominoso, speciatim pro instituti ratione agamus. E notâ imi ventris fabricâ colligitur variam sedem habere hic acutissimus & truculentus affectus; qui tamen intestina, præsertim tenuia, invadere solet; atque ventriculum, mesenterium, aliaque viscera in sacco peritonæi recondita in consensum sæpiùs trahit: nec parcat, autopsiâ judice, ipsismet musculis abdominalibus, aliisque imi ventris involucris. Ad hunc morbum proni censerì debent juvenes, temperieque sanguineâ vel biliosâ præditi; qui aliàs inter febrium mali maris symptomata numeratur. Hunc promovent erysipelatis, aliarumque efflorescentiarum cutanearum retrocessus; devia, & sanguini remixta, materia arthritica, vel rheumatica: sobolescit à fluxûs hæmorrhoidalis, alteriusve consuetæ hæmorrhagiæ sufflamine: contrahitur ab alimentis calidioribus & pipèratis; à vino & liquoribus ardentibus; vel à copioso aquæ gelidissimæ haustu;

haustu , corpore intensius calente : quibus addere licet emetica præposterè adhibita ; cathartica vehementiora ; venena acria & corrodentia , inconsultus hydrargyri usus , &c. Præterea hoc accersunt infortunium , corporis labores ardui , compressiones violentæ , contusiones graves ; dolores colici ferociore , præsertim ab herniâ incarceratâ ; diarrhœâ intempestivè cohibitâ , &c.

INFLAMMA-
TIO
ABDOMINIS.

Abdominis prominentis , distenti & renitentis dolor æstuans , cum nonnullis horripilationibus ; febris vehemens , nonnunquam maligna , semitertiana & pestilentialis , cum siti molestissimâ ; pulsu duro , nonnihil inæquali , qui haud rarò obliteratur : anxietates & vigiliæ , sæpiùs succedente delirio ; vomitus ingestorum , vel colluviei viridis & nigricantis , singultu nonnunquam stipato : faucium siccitas & ardor , cum dieglutiendi difficultate ; cardialgia , vel ventris dolores , præsertim circà præcordia & umbilicum ; ac in quibusdam dolor gravativus circà lumbos ; alvus adstricta , cum urinâ paucâ , crassâ vel flammeâ ; fæces subnigricantes ; ac nonnunquam alvi fluxus pertinacissimus , vulgatiore audiunt *phlogoseos abdominalis signa*. Solitâ exploratione innotescit inflammatio ventriculi & intestinorum : non secus ac hepatis & lienis. Sed ægrè dignoscitur , eadem adhibitâ indagatione , inflammatio pancreatis & mesenterii , sub quâ pulsus debiliior , & symptomata mitiora observantur. Quod attinet ad muscutorum abdominalium phlogosim , aliàs rariorem ; dignosci potest à dolore acerbiori , qui vel levi tactu , vel quovis corporis motu , præsertim intertussim exasperatur. Minime recipitur in hocce articulo renum , vesicæ & uteri , viscerum extrâ peritonæum positorum , inflammatio ; quæ cæteroquin notissimis , alibique traditis signis se prodit.

Nemo nescit omnes ægros *in vitæ discrimen* trahere , imò & plures nec dare inflammationem abdominis , cum rarò resolutione intrâ paucos dies absolvendâ desinat , & sæpiùs purulentiam , vel ipsammet gangranam ; aut infarctum skirrhosum , diurnitate molestissimum , solitumque eludere Medicorum solertiam , post se trahit. Proximum exitium portendit ventriculi phlogosis , quæ gangranam accersere solet ; vel in ulcus lethale faceffere ; ni emergat infarctus skirrhosus planè immedicabilis. Nonnulla sanitatis subit spes , si solus tubus intestinalis afficiatur , cum pus à quarto ad septimum diem inibi confectum , per patentem viam exitum sibi parare queat. Hinc salutis auguria desumuntur è fœdis dejectionibus ; ni obstet summa virium prostratio. Conjicere licet partem affectam in suppuratum abire , si statò tempore de dolore pulsatorio , & de levi frigore crebrò & inordinatè recurrente , conquerantur ægri. Ubi verò dolor urens & acutus subitò , vigentibus cæteris morbi symptomatibus , evanescit ; cogitandum de gangrenâ. Dolor lancinans & contumacior ulceris suspicionem movet : obscurus demùm & gravativus , post solitum morbi stadium , nullis præviis suppurationis indiciis , infarctum skirrhosum denuntiat. Sed sæpiùs , ut verum fateamur , in ancipiti versantur prædicta signa , adeò ut nonnisi conjecturas de morbi exitu assequi licet ; vel solâ hoc

INFLAMMA-
TIO
ABDOMINIS.

morbo denatorum evisceratione pateant defœdationes, quæ à prægressâ inflammatione suboriri solent. Inter varia symptomata quæ nil boni spondent, singultus indomabilis & lipothymia crebrò recurrentes, cum sudoribus frigidis, maximum terrorem incutiunt: sub quâ rerum conditione, maculæ atro-lividæ cum phlyctænis in abdomine erumpentes, pro funesto habentur indicio.

In *sectis cadaveribus* patent ventriculus inflammatus, maculis subattris, & erosionibus deturpatus, cum liquamine subflavo & æruginoso, ac fœtido in ejus cavo fluctuante: intestina maculis sanguineis signata, inflammata, purulenta, gangrænosa & disrupa; flatu turgida, lumbricis scatentia, fœcibus infarcta, crustâ quâdam albâ & viscidâ obducta; ac invicem hærentia: cæcum cruore putrido ultrâ modum distentum: hepar phlogosifacatum, tuberculosum, subnigrum & sideratum: vesicula fellis pseudo-lapidibus biliosis scatens; inanis, &c.: pancreas inflammatum, infarctum & tuberosum: epiploon intestinis & peritonæo adglutinarum, vesicæ accretum, skirrhosum & putridum: peritonæum cum limbo diaphragmatis phlogosi & gangrænâ correptum: mesenterium infarctum, purulentum & passim putridum. Præterea occurrunt abscessus incertæ sedis; colluvies fordida & purulenta stagnans in abdomine; ut de variis herniis & pectoris læsionibus quas exhibent cadavera sileamus.

Phlebotomia incunctanter celebrata, pro ætate & viribus pluriès iteranda; præsentaneum audit remedium adversus inflammationem abdominis; quamcumque sedem habeat: sed notare expedit quod intrâ primos morbi dies contineri debeant venæ sectiones; nec ultrâ quater, vel ad summum sexies tundenda sit vena: ideò à sanguinis missione, rationibus suprâ allatis, abstinendum post primum quatrimum, ni urgeat necessitas. Insuper si imi ventris inflammatio sit symptoma febris putridæ vel malignæ, jam adolescentis; vix semel, cæteris consentientibus, venam tundere licet; cum sub hâc conditione periculosissimæ censerî debeant venæ sectiones, quidquid in contrarium adducant secus sentientes. Interea diæta tenuissima, vel merè aquea, quantocyùs est præscribenda: huic obsecundant diluentia, temperantia & demulcentia; inter quæ præstant serum lactis, aqua pulli, emulsiones simpliciores; infusum florum malvæ, vel seminum lini; decoctum hordei & avenæ; mucilagines è radicibus althææ, seminum psyllii, &c. Nonnullis prosunt blandiora diaphoretica, borrago scilicet & buglossum; scorzonera, carduus benedictus, &c.: sed cautè adhiberi debent hæc præsidia, ne sanguis plus æquo incandescat. Verantur opiata, aliave narcotica: sed exhiberi queunt paregorica, uti nitrum, camphora, liquor anodynus mineralis, sal sedativum, &c. Insuper alvus fervetur libera ope enematum emollientium & demulcentium: haud tamen reformidanda laxantia mitiora, oleum nempè amygdalarum dulcium, cassia, tamarindi; vel ipsamet manna, cautè & partitis vicibus adhibita: cætera verò cathartica, per totum morbi stadium angue pejus sunt fugienda. Hinc obvium fit quid sit cogitandum de emeticis, quæ haud sine præsentî

vitæ discrimine propinari queunt; etsi à nonnullis, penes quos sit fides, pluriès, ineunte morbo, faustè successisse traditur. Opportunè præscribuntur absorbentia, si nidulet colluvies acida in ventriculo. Postremò minime despicienda medicamina externa, fots nempè & cataplasmata emollientia, pelles animalium recèns mactatorum, &c. Nec immeritò deprædican- tur hirudines podici admovendæ; præsertim post suppressum consuetum fluxum hæmorrhoidalem. Nil addimus de prolapsu intestini, vel de herniâ incarceratâ quæ artem chirurgicam expostulat.

INFLAMMA-
TIO
ABDOMINIS.

I L E U S.

AB intestino ileo, sæpiùs tamen inculpato, nomen fortitur hic affec- tus; qui haud rarò cæcum & colon, imò & rectum obsidet. *Vol- vulus* etiam dicitur à volvendo, eò quòd tubus intestinalis ob mutuum suarum partium ingressum ita intricatur, ut circumplicari videatur. A vomitu demùm horrendo, ab anxietatibus & cruciatibus quibus torquen- tur ægri, barbaro *miserere* nomine insignitur. Lento ut plurimùm gradu *insurgit ileus*; sub quo enim primò evomuntur materies in stomacho contentæ; dein bilis projicitur, quam excipit materia chylacea: proce- dente demùm morbo, non solùm feces alvinæ, sed etiam enemata & suppositoria per os quandòque deturbantur. Intereà alvus occluditur; tumet abdomen vel in altum attollitur; sæviunt tormina umbilicum haud rarò spectantia, respiratio offenditur, exsurgit singultus; ac pressò pede sequuntur convulsiones, lipothymia, sudores frigidi, extremorum refri- geratio, &c. Venena, emetica, aliave materies aciores ileum accersere queunt: hunc *promovent* crapula, colica convulsiva, tubi intestinalis con- strictio ab herniâ, aliâve causâ; innumeraque vitia organica in imo ventre latitantia: quibus addere licet vehementiorem iracundiam, cursus effre- nos, &c.

A probo materierum vomitu rejectarum examine facilè innotescit *sedes morbi*; cùm ex tantùm, quæ suprâ obicem colliguntur, retrogradum motum patiantur. Nec inutilis est partis affectæ indagatio, cùm ab illâ benè per- spectâ, accuratior institui possit *prognosis*; faciliorque pateat ad curatio- nem aditus. Ileus inter morbos calamitosos numeratur; præsertim si occur- rant febris intensior, dolor acutus, intumescencia abdominis, aliave in- flammationis internæ indicia. Nec minorem metum incurit, si ab strangu- riâ ortum trahat. Doloris cessatio, cæteris vigentibus symptomatibus, gan- grenam portendit; quæ brevi, tertio scilicèt vel quarto morbi die ægros illuc mittit undè negant redire quemquam. Nonnunquàm tamen diutiùs protelatur hic morbus; ad septimanas nempè, imò & menses; quod sanè à diversâ morbi causâ pendere cuivis obvium.

I L E U S.

Scitur, uti suprà innuimus, ex *autopsiâ anatomicâ*, intestinum ileum haud crebriùs lædi, quàm cæcum, colon & rectum; ideò de omnibus intelligenda veniunt quæ supersunt dicenda. Itaque patent in pluribus intestina ultrà modum distenta, phlogosi correpta, vel gangranâ tacta: dilacerata nonnunquàm reperiuntur; undè à profusis materiebus quas continebant, quædam emergit ascites, quâ imus venter antea ultrà modum intumescibat. Oculis passim subjiciuntur, per totum tubi intestinalis tractum, abscessus, vel protuberantiæ skirrhosæ, quibus canalis planè obturatur. Simili modo impeditur prædictus tubus à fecibus induratis, à concretionibus quasi gypseis, à vermium glomeramine, à coalitis tubi lateribus, &c. Dereguntur intestinorum suscepciones, vel invaginationes; quibus scilicèt intestini coarctati pars in partem proximam priùs expansam ingreditur; quæ ita oppletur ut nil à superioribus intestinis ad inferiora permeare possit: circà quam obstructionem illud notatu dignum occurrit, quod nunc per partem superiorem, nunc vice versâ, hic mutuus fiat ingressus. Sed silentio minime prætermittendum has duplicationes observari in pluribus morbo iliaco nusquàm antea conflictatis. Obvia sæpissimè fiunt intestina ab herniis præclusa, vel ita coarctata, ut à circumducto filo antea constringi videantur. Nonnunquàm etiam intorti, implicati & intertexti, vel nodo quasi constricti apparent horum gyri. Quandòque demùm occluduntur à compressione tumoris extrà tubum siti; ab ingenti hepatis, alteriusve visceris mole; à massâ cujusvis liquaminis in abdomine stagnantis, &c.

Curatio hujus affectûs est properanda; cùm maximum sit periculum in morâ. Priusquàm tamen inchoetur; probè inquirendum nùm ab herniâ prodeat ileus; quæ haud semper conspicua est præsertim in mulieribus: quid factu rùm opus sit, nemo vel rudis & inexpertus non intelligit. Aliàs præsentaneam opem ferunt venæ sectiones, tam ad impugnandam quàm ad præcavendam phlogosim. Depletis vasis jure celebrantur demulcentia, aqua nempe pulli, oleum amygdalarum dulcium, juscula pinguiora, serum lactis, emulsiones, decoctum feminum lini, &c. Fauttè etiam usurpantur sedantia paregorica, nitrum scilicèt, camphora, liquor anodynus mineralis, &c. Nec vetantur, præmissis præmittendis, narcotica, diacodium nempe, laudanum liquidum, aliaque id genus; quorum præsidio opportunè propinari queunt laxantia blandiora, quæ præclara munia obire solent. Nonnullos juvat aqua gelidissima; imò & profuit, incassum tentatis cæteris præsidiis, cortex peruvianus. Ubi verò nec herniæ, nec inflammationis subest suspicio; exhibere licet globulos plumbeos, vel hydrargyri libram unam, aut alteram, in aquâ vel jusculo congruo. Notare per transfennam expedit mercurium crudum, sub hisce circumstantiis propinatum, ptyalissimum nonnunquàm promovisse.

Insuper deprædicantur enemata emollientia, purgantia vel stimulantia, per totum morbi curriculum summè proficua. Sunt qui post HIPPOCRATEM aërem vel flatum, ope follis fabrilis, in anum injicere tentant; sed haud

innoxia est hæc methodus , quæ experientiâ teste truculentiora tormina sæpiùs accersit. Nonnulli in hisce angustiiis instrumentum, quod delineandum curavit DEKKERS , excogitarunt, cujus beneficio fumus tabaci in anum inflatur ; quo stimulo excitatur quædam revulsio, quæ plures fausto beavit eventu. Inter usitatoria præsidia recensentur *topica* emollientia, fots scilicet & cataplasmata, necnon balnea vel semicupia ex aquâ tepidâ, decocto emollienti, vel oleo olivarum parata. Huc coincidunt animalia secta; horum omentum, vel pelles cum suo calore nativo. A nonnullis demùm celebratur linimentum ex axungia & camphorâ paratum : alii summis laudibus extollunt cataplasma ex oleo menthæ, theriacâ, &c. confectum : sed, ut verum fatear, sæpiùs incassum adhibentur hæc auxilia externa; quæ aliàs citrà periculum admoveri posse crediderim.

 ILEUS.

C H O L E R A.

FEROCISSIMUM, velocissimumque esse hunc affectum, qui subito invadit, & dirum in modum *ardente syrio*, sæpiùs *grassatur*, nemo nescit. Vomitu & diarrhœâ, simul sævientibus, *in propatulo se sistit* hic affectus; sed infida cenferi debent hæc indicia; cum utramque evacuationem, periculi planè expertem haud rarò promoveat prava alimentorum digestio. Cur hisce *notis* addere juvat truculentiora symptomata quæ cholerae characterem produnt; dolorem scilicet acutissimum & æstuantem interaneorum, renitentem abdominis intumescientiam, cardialgiam, singultum, anxietates, lipothymias, intensiorem sitim, pulsus inæqualem, contractum, intermittentem & febrilem; convulsiones, membrorum contractiones, crurum spasmos, sudores frigidos, extremorum refrigerationem, &c. Cholera vegetiores sæpiùs intrà nychthemeri spatium è medio tollit; vel ad biduum, triduumve protelatur. Materies per utramque viam pleno gurgite erumpentes biliosæ, porraceæ, æruginosæ, nigrae, &c. observantur. De aliâ cholerae specie, quam siccam vocant, ab illâ, de quâ in præsentiarum, toto cælo distante, suprà, dùm de flatulentiâ mentionem subjecimus; hinc crambem recoctam haud apponemus.

Cholera, cui *obnoxii* sunt computationibus indulgentes, biliosi & iracundi, *promovere* solent melones & cucumeres, fungi, aliaque alimenta pravæ notæ; purgantia drastica & venena. Hanc comitem habent nonnullæ febres, imi ventris inflammatio, aliufve gravior morbus. Sub variis gradibus se profert cholera, quorum leviores verum morbi typum haud præ se ferentes periculo vacant: sed *calamitosus* censetur hic affectus, si vigeant jam enumerata symptomata; ubi præsertim nulla prævia patet causa evidens; & utrâque viâ profilièntes materies odore & colore

CHOLERA.

à genuinâ indole deflectant. Sub quâ conditione jure incusatur bilis redundantia, vel ferocia: bilis enim pravæ indolis, porracea nempe, æruginosa & atra, præter anxietates, cardialgias, vomitum & alvi fluxum; dolores atrocissimos, inflammationes & gangranas post se trahit. Atra, tenax & quasi picea imaginationem sæpiùs lædit. Atro-flava, putrescens, & ad aciditatem vergens, veneni instar omnia turbat; hinc infania, ecstasis, convulsiones, &c. Hæc est atrabilis veterum quæ non solum per vomitum & sedes exitum sibi parat; sed etiam urinam suo colore nonnunquam inficit; quod sanè haud rarò observatur in melancholicis.

Scitur ab *scrutatione cadaverum*, bilem in propriis conceptaculis exuberare, quâ redundante conspurcantur digestionum organa. Observatur hic latex à propriâ naturâ degener; atro-flavus scilicet, viridis, & æruginosus; niger, tenax, putrescens & ad aciditatem vergens. Ductus choledochus in nonnullis propè pylorum inseritur, cujus ratione bilem eructabat in ipsum ventriculi cavum, cui etiam nonnunquam implantatur. Hepar deprehenditur infarctum & induratum, steatomatosum, phlogosi tactum, vel gangranâ defœdatum. Intestina se præbent inflammata vel sphacelata. Passim postremò observantur aliorum viscerum læsiones, quas recensere, è re nostrâ alienum fore putavimus.

Curatio simplicioribus peragitur: nec hilum proficit hæc ab Authoribus in medium adducta remediorum farrago; quâ sanè quidem saniora medicinæ præcepta convelluntur. Pessimè se gerunt qui venæ sectionem hîc confidentiùs adhibent; cùm à detracto sanguine fatum sæpiùs acceleretur: venam tamen sub diversis circumstantiis tundere licet; sed rarissimè occurrunt, atque in his dignoscendis planè cæcutiunt innumeri, qui Medici nomen sibi arrogant. Currenti calcar addunt emetica & cathartica, quæ hinc exulare debent: nonnunquam tamen opportunè exhibentur, si vires ferant, cassia, tamarindi, aliaque laxantia blandiora. Nonnullis conferunt absorbentia, testacea nempe, lapides cancrorum fluviatilium, aliaque terrea, quæ materies digestionum organa vellicantes intrâ sinum recondere solent. Sed à sanioribus Medicis abdicantur adstringentia præsertim sub primis morbi temporibus, & nonnisi ab imperitis, reluctante etiam experientiâ, adhibentur hæc remedia; quæ declinante morbo suppetias nonnunquam ferunt.

Expedit ut ad *salubriora præsidia* properemus, quæ depromuntur è diluentium & demulcentium classi; nec alia sunt propinanda sub hujusce morbi procellosis temporibus: usitatoria & efficaciora audiunt aqua simplicissima, vel succo limonum, acidove minerali imprægnata; aqua pulli, & ferum lactis; quæ singula pro omni alimoniâ, vel largâ manu exhiberi debent: nec minùs profunt enemata refrigerantia & demulcentia vulgatiore. Cæterùm egregiam opem præstant lac, juscula pinguia, oleum amygdalarum dulcium, aliaque id genus; si veneni sit suspicio. Profunt, præmissis prætermittendis, hypnotica & antispasmodica, si incusetur catharticum drasticum, aliave quæcumque materies stomachum & intestina

vellicans : in quem scopum faustè usurpantur laudanum & diacodium , tinctura anodyna & castorei , &c. sed cautè cum hisce remediis mercari expedit. Horum explere valent stomachica roborantia ; diascordium nempe , theriaca & confectio hyacinthi ; quæ tamen haud nisi elapsis octo vel decem horis à primo insultu , tutò præscribi possunt. Nil fermè expectandum de topicis stomachicis , quæ tardiùs effectum suum exerunt in morbo velocissimo : opportuniùs sanè adhiberentur emollientia ; quæ admoveere vix sinunt perpetuæ ægrorum jactationes.

CHOLERA.

D I A R R H Œ A.

SUB triplici conspectu se profert *alvi fluxus incruentus* ; nunc enim genuina diarrhœa audit ; nunc fluxus cœliacus nuncupatur : aliàs lenterix nomen sortitur. *Diarrhœam* vulgatiorem prodit frequens alvi dejectio stercorosa , biliosa , serosa , mucosa vel pituitosa , adiposa , vel colliquativa , purulenta , &c. Hanc concomitantur cibi fastidium , anxietates & lipothymix , flatulentia & borborygmi , interaneorum dolores , tenesmus , ventris intumescencia , spasmus crurum , &c. sub quibus parciores urinæ , subrubræ & turbidæ mingi solent. Innotescit *fluxus cœliacus* à dejectionibus subalbicantibus , chylaceis & mucosis : hunc affectum à denegato chyli ingressu in venas lacteas oriundum , sequuntur inappetentia & sitis , ructus acidi & dolores lumbis prospicientes , quibus nonnunquam accedit febris : urinæ etiam fœculentæ , ac minori proventu prosiliunt. *Lienteria* , quam levitatem intestinorum vocavit CELSUS dignoscitur ab egestis cibis semi-coctis , vel vix immutatis : diarrhœam & dysenteriam sæpiùs excipit hic morbus ; quem etiam post se trahunt varii affectus chronici : quo vigente appetitus nunc proritatur , nunc prosternitur ; vires deficiunt , aliæque tradita emergunt symptomata : lotium postremò crassum & lutulentum parcâ copiâ profunditur. Hæ sunt differentiæ quibus obiter distingui solent alvi fluxûs incruenti species : sed innumeræ aliæ occurrunt ab ætate & temperie depromendæ ; non secùs ac à victûs ratione , à sumptis medicaminibus , aliisque accidentibus vigentibus vel prægressis ; è quibus benè perspectis patet genuina medendi via. Ad diarrhœam *proclives* censentur pancreaticè viventes , cachectici , biliosi , arthritici , &c. hanc nonnunquam *promoveant* pedum refrigeratio , quædam alimenta , aquæ inassuetæ , &c. si ortum ducat à medicamento purgante per alvum ; *hypercatharsis* audit nostratibus *superpurgatio*. Fluxui cœliaco obnoxii sunt infantes : scorbutici verò ad lenteriam sunt proniores. Hos demùm alvi fluxus post se trahere solent incondita victûs ratio , vel soluta vivendi norma.

Diarrhœa vomitu , lotii profluvio , vel sudore sæpiùs solvitur : recens ab aëre frigido , aquis vel alimentis sobolescens , *periculi* est expers , bre-

 DIARR-
RHŒA.

vique desinit : sed ominosa censetur diuturna, vel à causâ internâ prodiens; ubi præsertim vires deficiunt. Id genus censeretur diarrhœa, quæ à mœrore fovetur; planè incurabilis, persistente causâ, atque atrophiam lethalem post se trahens. Eò periculosior existimatur diarrhœa, quò dejectiones colore, & fœteditate magis ab statu naturali recedunt: grave demùm facessit negotium, si truculentioribus symptomatibus stipetur; febre nempè, cum siti ingenti, torminibus & tenesmo, anxietatibus & singultu, sudoribus frigidis & lipothymiâ, &c. Biliosa ad choleram morbum quandoque accedit, vel in dysenteriam facessit: adiposa, quam *colliquativam* vocant, marasimum post se trahit: purulenta nonnunquam salubris audit; cùm sæpiùs abscessus intùs latèntes, ejus beneficio, exhauriantur: aliàs in obitum vergit. Diarrhœa in morbis acutis pro criticâ sæpiùs habetur; sed huncce typum minime præ se fert in primis morbi temporibus: exitialem sæpiùs esse sub morbis pectoris suprâ declaravimus. Si nullum juvamen præstet hydropicis alvi fluxus, hos in orci fauces præcipientes trahit. Sinistri est *augurii* in vulneribus, & præsertim capitis. Haud inanem metum incutit utero gerentibus: puerperasque in vitæ discrimen trahit; phthisicos postremò tabidos conficit. Quod ad lienteriam attinet; luctuosa censetur in singulis ætatibus; sed senes brevi ad libitinæ rationem ducit. Fluxus verò cœliacus faustè judicatur, si à materiæ mucosæ prædominio ortum mutuetur: ubi verò à vitio quodam organico pendet; cogitandum de exequiis.

Sectiones cadaverum patefaciunt copiosiore mucum primas vias conspurcantem; undè chylus agrè ad lacteorum oscula appellebat. In conspectum veniunt phlogoses, ulcera, maculæ gangrænosæ, & putredines, tum in stomacho, tum in tubo intestinali, cujus tunica bombycina abrafa sæpiùs deprehenditur. Venterculus nonnunquam intestini instar contractus occurrit. Post diarrhœam, à dysenteriâ prognatam, conspiciuntur cicatrices numerosissimæ, vel occallescentiæ quibus præcludebantur venarum lactearum oscula. Inveniuntur intestina mutuò connexa, vel in unam massam coeuntia; inflammata, tuberculosa, skirrhusa, gangrænosa & perforata. Hepar nunc mole amplissimum, nunc exiguum, vel plus æquo contractum, skirrhusum, induratum & quasi elixum, aridum & friabile; phlogosi correptum, abscessus, tumoresve cysticos & vermes recondens; tuberculis refertum vel putridum cernitur. Vesicula fellea bile æruginosâ & nigricante; vel concretionibus lapideis fœta annotatur. In apricum venit lien stupendæ magnitudinis, occallescens, putridus, vel pultis instar levi attactu diffluens. Obvium fit pancreas skirrhusum, ejusque ductus secretorius lapillis scatens deprehenditur. Obstructæ & ingentes reperiuntur glandulæ mesenterii, quarum plures avellanæ molem mentiuntur. Epiploon crassissimum & skirrhusum, vel putredine confectum observatur. Tumores insuper diversæ naturæ, stagnationes saniosas & purulentas, aliave tum abdominis, tum pectoris vitia, quæ parùm ad rem nostram pertinere videntur consultò missa facimus. Haud absimiles fermè læsiones conspiciuntur

conspiciuntur in lienteriâ extinctis ; annotantur præsertim intestina crassa & callosa , putrida & gangrænosa ; mesenterium infarctum , abscessum recondens , putridum , &c.

DIAR-
RHŒA.


Sævientibus doloribus , nonnullos juvat *vena sectio* ; dummodò tamen vires ferant : aliàs inanem operam ludit , vel noxam infert. Vomitu spontaneo diarrhœam sisti jam suprà notavimus ; hinc proficua fore *emetica* pronum est credere , & experientia quotidiana testatur : hùc spectat radix brasiliensis , quæ , nemine discrepante , adversùs alvi fluxum cæteris vomitoriis antecellit. Nec minorem opem præstant *cathartica* blandiora , rheum nempè , tamarindi , myrobalani , manna & cassia , quæ secessum blandè movendo , diarrhœam sæpiùs cohibent. His præmissis omnem implent paginam , in diarrhœâ biliosâ , alterive causæ calidæ submissâ ; refrigerantia ; acetosa nimirum , aqua succo limonum , vel ribesiorum , imprægnata ; serum lactis , nitrum , &c. quæ alvi fluxum à debacchante bile tutò refrænant. In eodem casu , æquè ac sub hypercatharsi , hâc diarrhœæ specie ab imperitis artificibus excitatâ , egregiè se gerunt sedantia narcotica ; laudanum nempè , diacodium , tinctura anodyna , pilulæ de cynoglossò , &c. Sed inertia ut plurimum esse hæc postrema medicamina in alvi fluxu ferroso , aliisve speciebus , experiundo didici.

Quibus peractis , *stomachica* in usum trahere licet , inter quæ pro usitatoribus habentur absinthium & centaurium minus , cortex peruvianus , cinnamomum & cassia lignea , diascordium & theriaca , vinum cypreum , hispanicum , &c. Morbo hisce omnibus remediis obsurdescente ; præscribere licet adstringentia , pervincam nempè , balauſtia & rosas rubras , tormentillam & simaroubam , sumac , cynorrhodon & corticem granatorum , catechu , sanguinem draconis & acaciam ; syrupum magistralem , de rosis siccis , cydoniorum , &c. quibus addere licet martialia , quæ præter adstringendi vim , alia munia obire valent. Nonnisi tamen summâ cautelâ in usum vocentur adstringentia , ne lusus , ut inquiunt , stabulo includatur : quæ scilicèt intempestivè , vel citiùs quàm par erat , usurpata , phlogoses , infarctus , vel obstructions , alvi fluxu domando longè periculosiores , accersere queunt : adeò ut nil feliciùs sæpè excogitari possit inter exhibenda hæc inopportuna præsidia , quam ut nullum effectum exerant. Lac postremò , omnibus incassum tentatis , pro clinicorum votis sapissimè succedit ; nec minus auxilium præstant aquæ minerales , Forgienses nempè , Plumberianæ , Borbonienses , Arcimbaldicæ , &c. ad quas quasi ad sacram anchoram confugere solent Medici. Quod ad diarrhœam febrilem attinet ; laudantur demulcentia , serum lactis scilicèt , aqua pulli & oryzæ , decoctum album , &c. Profunt quoque laxantia , cassia nimirum & manna ; nec verantur hypnotica , diacodium putà , laudanum , diascordium , &c. Sæpiùs postremò conferunt lapilli cancrorum fluviatilium , corallum , aliaque absorbentia : nec posthabentur diaphoretica , inter quæ præstat kermes minerale.

Eâdem fermè methodo *curatur lenteria* , cui magis congruere videntur

DIARR-
R H Œ A.

absorbentia & stomachica, inter quæ usitatiora audiunt testacea & corallum; absinthium, rheum, cortex peruvianus, nux moschata, mala cydonia, panis tostus vino generoso irroratus, &c. Quod ad *fluxum cæliacum* spectat, pluris habentur, præmissis præmittendis, rheum, absinthium, centaurium minus, aliaque amara: sed ubi, sub hocce morbo, de mesenterii obstructione quædam emergit suspicio; martialia, aliaque aperientia opportunè exhiberi queunt. Enemata insuper demulcentia, sedantia vel adstringentia, pro re natâ & circumstantiis haud inanem operam ludunt, in quâvis alvi fluxûs specie. Nec despicienda ropica roborantia regioni epigastricæ admota. A sudoribus arte concitatis vel spontaneis diarrhœam sæpiùs solvi, suprâ notavimus; hinc infertur proficuas esse corporis exercitationes, peregrinationes, & frictiones; quibus addere licet balnea calida, indusia à panno laneo tenui contexta, aliaque id genus perspirationem promovere solita. Connubium denique pluribus profuisse nemo nescit: sed omnibus hætenùs traditis fortè præstat exquisita victûs ratio; verantur enim animalium carnes, fructus crudi, acetaria, &c. Scitur insuper innumera remedia, etsi probatissima, adversùs diarrhœam sæpiùs incassum adhiberi; adeò ut ægri diuturniori & infaustâ curatione pertæsi, totum negotium naturæ committant; vel ad anilia medicamenta, haud rarò efficaciora confugiant; ni agyrtarum consiliis obtemperent.



ALVI FLUXUS CRUENTUS.

NON secùs ac diarrhœa, *triplicis* est *sortis*; dysentericus nempè, hepaticus, & gastro-mesentericus, quibus addere licet fluxum hæmorrhoidalem, quo diarrhœæ sociato plures decipiuntur. Ut à *dysenteria* exordium capiamus; nunc acuta, nunc chronica, epidemicè sæpiùs grassatur; extremâ præsertim æstatè, vel sub autumnali tempestate; ac adveniente hyeme mitescens. Ab horrore & febre ut plurimum *orditur*; quæ excipiunt sitis, tormina & æstus interaneorum, dejectiones mucosæ, adiposæ, saturatè luteæ, porraceæ & cruentæ; frequens desidendi cupiditas, &c. quibus *signis* facilè distinguitur à fluxu hepatico, mesenterico & hæmorrhoidali. Sed haud semper dilucidè patent hæc discrimina, ob innumeros propemodùm gradus, quibus se proferunt prædicti affectus. *Febris dysenterica*, ineunte morbo, levis, ita sensim invalescit, ut sæpiùs prædominium obtineat; vel morbus pro febre mali moris, alvi fluxu cruento stipatâ habeatur. Dejectiones primò biliosæ, dein sanguine intermixtæ annotantur, intereà de ore fordido, cibi fastidio, pervigilio & virium prostratione conqueruntur ægri. Nonnullos angunt cardialgiæ, vomitus & flatulentia: quibus procedentibus secessus fiunt mucosi; pici liquidæ similes, saniosi vel purulenti; imò & sæpiùs dejiciuntur carunculæ, intesti-

norum ramenta : nonnunquàm demùm lienteriae particeps videtur prædictus affectus. Illud notandum incumbit, quòd in nonnullis epidemiis dejectiones incruentæ se præbeant, vigentibus cæteris morbi phænomenis; adeò ut cholera, tum, parùm discrepare videatur; præsertim si accedat vomitus; hinc minime mirum, si sub utroque titulo ab Authoribus adumbretur hic affectus.

ALVI FLUXUS
CRUENTUS.

Dysenteria, alia mitis, febris scilicèt expers, nullaque post se trahens procellosa symptomata, benigna vocitatur; alia truculenta & contagiosa, ob sæviora quibus stipatur symptomata, maligna audit: quâ vigente excalescit febris; sanguis sincerus nonnunquàm dejicitur; lingua patet arida, muco obducta & multifariam hiulca; os ulcusculis vel aphthis defœdatur; erumpunt vomitus enormes; ac cutis exanthematibus purpureis nonnunquàm signatur. Quibus addere licet singultum, delirium, convulsiones, aliaque atrociora symptomata febrem malignam concomitari solita. A doloribus circà umbilicum sævientibus; non secus ac à dejectionibus liquefactis, vel dilutioribus, intestina tenuia affici haud falsò conjicitur: sed morbus sensim ad crassiora pertingit; acerbioresque tenesmus infligit, quo nonnunquàm emergit ani prolapsus: imò & in quibusdam macie confectis paralyti tactus podex, hians vel parulus, fœdissimo sanè aspectu, remanet. *Dysenteriae obnoxii* sunt arthritici & scorbutici: præsertim si legum diæticarum obliviscantur. Hanc *promovent* febris biliosa; aqua nivea, fructus horarii, aliaque alimenta pravæ notæ; cathartica drastica; aër castrorum, nosocomiorum & carcerum, vel hominum frequentiam inquinatus. Notare expedit haud jure incusari fructus inter epidemicam constitutionem; cum potiùs sint saluberrimi; dummodò tamen sint maturi & optimæ notæ, annuente clar. Tissot, cujus opinioni multiplici experientiâ edocti inhæremus.

Inter rariores morbos recenseri debet *fluxus hepaticus*: ni, uti mos est, hoc titulo insigniantur affinia profluvia. Genuinus se prodit dejectionibus subcruentis, vel loturæ carniū similibus: ac febre lentâ stipatur, non secus ac cibi fastidio, & oris amaritie: præterea erumpunt flatus; minguntur urinæ biliosæ; tumet cum dolore & renitentiâ hypochondrium dextrum; facies colorem subluteum induit; ingruunt rursus & spirandi difficultas; sanguis demùm è naribus, vel ore profilit. Nonnulli, inter recentiores, hunc affectum pro quodam fluxu hæmorrhoidali interno perperam habuerunt; sed observationes è *cadaveribus* depromptæ arguere videntur, hepar haud immeritò à veteribus incusari. Sanguis insuper è vasis hæmorrhoidalibus, vel internis prodiens sincerus, & nusquàm fecibus alvinis intimè permixtus dejicitur: Adde quòd icterus, hepatitis, aliique jecoris morbi fluxum hepaticum sæpiùs post se trahunt; cui præterea hypochondriaci de hepate perpetuo queruli *obnoxii* censentur.

Alius occurrit *alvi fluxus cruentus*, sub quo sanguis majori sæpiùs proventu egeritur, à dysenterico, hepatico, & hæmorrhoidali summe discrepans; quem ob suam duplicem prosapiam *gastro-mesentericum* vocitare

AEVI FLU-
XUS
CRUENTUS.

lubet. A disruptis vasis gastricis, vel mesentericis oriri hancce hæmorrhagiæ speciem docet autopsia cadaverum: hinc intelligitur cur vomitum cruentum plerumque excipiat. Sanguis per podicem excretus à diversâ in primis viis morâ, & à variâ morbi sede, nunc scilicet in stomacho, nunc in gracilioribus intestinis, vel in crassioribus, sub multiplici conspectu se profert. Ideò vel sincerus & floridus deprehenditur, vel fæcibus alvinis probè mixtus & fæculentus observatur: aliàs inodorus & graveolens occurrit; ob minorem scilicet vel longiorem quem percurrit tractum; priusquam per podicem foràs amandetur. Etenim ratione moræ in tubo intestinali diversum colorem induit; variumque fœteditatis gradum contrahit; atque ex hocce putrido latice infensissimum quoddam haud rarò emergit deleterium, quod non solum lipothymias accersit; sed etiam necem infert. E dejectionum atro colore *morbum nigrum* ab HIPPOCRATE dictum fuisse fluxum gastro-mesentericum, jam suprà notavimus; ad quem *proclives* esse melancholicos & scorbuticos norunt practici. Traditis addere licet sanguinem nonnunquam, trans vasorum intestinalium latera, per diapedesum, vel transfudationem excerni; undè prodit fluxus quidam mesentericus dilutè rubens; non secus ac fluxus hepaticus: sed utriusque signa omne dubium solvunt: notare juvat bilem atro-viridem nonnunquam per podicem excerni, ritè distinguendam à mero sanguine; cum haud rarus, de hac re, sit error in autopsiâ.

Nil fermè *metuendum de dysenteriâ* miri: sub gravi verò, erumpentibus sudoribus, sanitatis spes affulget. Periculosa est res alex; si exacerbetur febris, tyrannidem exerçant tormina, vires obruantur, erumpat vomitus, exsurgat singultus, se prodant aphthæ & venter subsideat: si dejectiones suprà modum fœteant, vel pure scateant, cum tunicæ villosæ ramentis: si demùm procedentibus cæteris symptomatibus dolores planè desinant, artus frigeant, &c. Ubi sævientibus circà umbilicum doloribus sanguis majori proventu excernitur; imminet intestinorum gracilium inflammatio quæ ad ultimam rerum lineam ducere solet. Dysenterici quorum dejectiones atrâ bile inquinantur, intrâ quatuor dies plerumque moriuntur; vel superato quatridduo incolumes evadunt. Gravem etiam metum incutit dysenteria infantum & senum; cachecticorum, scorbuticorum & puerperarum. Scire juvat hunc affectum sublatum sæpiùs recurrere, in congruâ victûs ratione præcaveatur reditus: aliàs in diarrhœam contumacissimam facessit. Porro ab intempestivè cohibitâ dysentetiâ materiam morbosam irruere ad hepar, quod purulentiam afficitur; vel ad artus qui arthritide impediuntur, post HIPPOCRATEM observarunt clinici: quibus addere licet asthma & hydropem similem haud rarò profapiam ducere. De *dysenteriâ incruentâ*, (*dysenterie blanche*,) haud minùs ominosa, quæ à cholera vix discrepat, suprà actum fuit. Minorem sanè sævitiem exercet *fluxus hepaticus*; sed longè pertinacior evadit, cachexiamque, hydropem & marasimum sæpiùs post se trahit. In ancipiti versatur fluxus *gastro-mesentericus* ob magis sanguinis dispendium, vel contractam à diuturniore hujusce laticis

morâ putriditatem; è quâ duplici causâ graviora emergere symptomata suprâ notavimus. Calamitosa censeretur, si febris putridâ, aliove morbo anticipis eventûs societur. Ejus demùm reditum cavere debent qui unam vel alteram accessionem passi sunt.

Sectis dysenterîâ extinctis, patet bilis pœrracea, fusca vel atra, nidulans in propriis receptaculis, & in intestinorum cavo. Hæc viscera chartæ pergamenæ instar arida, flatibus ultrâ modum turgida, phlogosi correpta; vermibus scatentia, pure deturpata, ulceribus exesa, sphacelata & dilacerata deprehenduntur. In ipsis etiam percipiuntur tubercula, skirrhi, occallescentiæ, pustulæ variolosæ, &c.: mutuò demùm accreta, vel invicem agglutinata cernuntur. Multifariâ læditur ventriculus, qui scilicet ulcusculis confossus, infarctus, skirrhosus, &c. conspicitur. Hepar livore affectum, à naturali magnitudine recedens, densum & firmitus, necrosi correptum vel putridum, oculis subjicitur. Mesenterium infarctum, purulentiâ tactum, & gangrænâ detentum occurrit. Omentum subviride, skirrhosum & putredine absumptum se offert. Porro lien tumidus, pultis instar diffuens, annotatur. Ut de aliis læsionibus, & de variâ colluvie circâ viscera fluctuante fileamus.

Fluxu hepatico denati exhibent hepar partim putridum, vel hâc labe planè confectum; ejusque proprium involucrum sacci instar materiem fœniosam, vel loturæ carniûm similem, sapius continens. In nonnullis inflammatum & infarctum absque putredine deprehenditur prædictum viscus: nùm postremi genuino fluxu hepatico laboraverint, dubitare licet. A perspectâ hepatis defœdatione, nonne colligere datur fluxum hepaticum à putridâ hepatis solutione præcipuè pendere? Sed per quam viam hæc materia ad tubum intestinalem appellat? haud obvium fit. Si tamen conjecturæ locus sit; hanc colluviem, ductûs biliaris notissimi ope, in intestinorum cavum eructari existimamus; licet haud dilucidè pateât quomodò, post tantam visceris stragem, integra servantur prædicti vasis propagines. Illud postremò minime reticendum; quòd hepar simili corruptelâ tactum nonnunquam deprehendatur; nullo tamen prævio fluxu hepatico: quod fortè à dirutis vel oblitteratis prædictis ductibus secretoriis, vel à denegato hujusce materiei aditu ad intestina, referri debet.

In *fluxu gastro-mesenterico peremptis* observantur jejunum & ileum phlogosi correpta, flatibus turgida, ac maculis gangrænodeis signata: sed suprâ omnia annotatur colon flatulentiâ ultrâ modum expansum. Colluvies nigra, sanguinea & graveolens totum tubi intestinalis tractum conspurcat, quæ in pluribus majori copiâ intrâ ejus cavum colligitur. Annotantur omentum absumptum; hepar parvum, cum vesiculâ felleâ flatu turgidâ. De sede morbi nil certi statui potest; cum nunc in ventriculo, nunc in intestinis gracilibus observetur; aliàs in crassioribus reperitur; sed crebrius in cæco, suprâ quod ne minimum sanguinis vestigium tum apparet. Insuper epiploon & mesenterium emaciata & contracta deprehenduntur: hepar in nonnullis infarctum, skirrhosum vel aridum conspicitur: lien marcidus & putridus

ALVI FLUXUS
CRUENTUS.

ALVI FLU-
XUS
CRUENTUS.

occurrit : vasa splenica & mesenterica , nunc ultrà modum turgida ; nunc exinanita oculis subjiciuntur : sed notare expedit quòd hæc omnia viria in multis etiam detegantur , qui fluxum mesentericum nunquàm passi fuere.

A venæ sectionibus primò auspicanda *dysenteriae curatio* ; dummodò pulsus & vires sinant , nec vetet constitutio epidemica. Depletis vasis , præsentaneam opem fert emeticum : ipecacuanha quæ in hocce casu specifi-
fici titulo gaudet , vix cæteris præstat : nec fortè conducibilius vitrum anti-
monii ceratum ; etsi nostrâ ætate summis præconiis celebratur ; quod
tamen , ni fallor , jam exolescere videtur. Tutò præcipiuntur laxantia ,
manna scilicèt & tamarindi , rheum & catholicum. In latissimum usum
trahuntur demulcentia , aqua nempe pulli & vituli , oryzæ & hordei ; se-
rum lactis ; decoctum album , oleum amygdalarum dulcium , sperma
ceri , &c. nonnullis arridet , ni obstet febris , lac coctum cum triplici aquæ
quantitate & largâ manu exhibitum. Suas laudes etiam merentur refrige-
rantia ; aqua nimirum succo limonum vel nitro imprægnata ; decoctum
pimpinellæ & consolidæ majoris , &c. Plures demùm curatos vidi solâ
adhibitâ aquâ simplicissimâ per nonnullos dies : nonnunquàm tamen ex-
pedit ut præmittantur generalia : aliàs omnium vices explet illud reme-
dium , quod in majori morborum ineuntium parte par fanè non habet.

His præmissis , præclara munia obeunt *sedantia* ; tum paregorica , ut cam-
phora & liquor anodynus mineralis ; tum narcotica , ceu laudanum , syr-
pus de papavere albo , guttæ anodynæ SYDENHAMI , aliaque id genus ; quæ
etiam catharticis opportunè sociantur ; dummodò tamen nulla moveatur
gangrænæ suspicio. Conducunt vulneraria & balsamica ; hypericum nempe
& pervinca , balsamum copahu & Lucatelli , aliaque consimilia. Nonnullis
profunt diaphoretica , uti scorzonera , china radix , guaiacum , &c. Profi-
cuè etiam adhiberi queunt absorbentia vulgatiora : sed solerti manu tractari
debent stomachica & adstringentia , quibus opportunè adhibitis curatio
plerùmque absolvitur : in hunc censum numerantur rosæ rubræ & balauſtia ,
tormentilla , & simarouba haud immeritò à neotericis celebrata , acacia ,
mastiche , alumen & martialia , diascordium , theriaca , &c. Nemo demùm
non novit singularem diætæ lacteæ efficaciam ; egregiasque aquarum For-
giensium , aliarumve mineralium frigidarum vires , quæ post varia reme-
dia , vel exquisitiora , incassum usurpata , ægrotantium vota explere valent :
nec latet quantum conferat cœli mutatio , quæ sola plures conclamatos ab
orco revocavit.

Minime prætermittenda sunt *enemata* demulcentia & detergentia , quæ
ineunte morbo & per totum curationis curriculum opportunè injiciuntur :
demulcentia primis morbi temporibus magis congrua parari solent è lacte ,
jusculo omasorum , vel capitis vervecini ; è decocto althææ , verbasci ,
femini lini , &c. Hæc excipiunt detergentia , quæ ingrediuntur hyperi-
cum & pervinca ; rosæ rubræ , saccharumque cognomine ; ovi vitella , mel ,
terebinthina , &c. quibus haud infauſtè sæpiùs sociatur camphora. Sed de-
bilem opem præstant *topica* , tum emollientia tum roborantia ; ni quasdam

impetrent inducias. Hæc sunt præsidia adversus quamvis dysenteriae speciem usurpari solita ; sed ratione circumstantiarum , selectu opus esse nemo non intelligit : ideò si ad malignitatem , ut inquiunt , vergat hic affectus ; ad compositam methodum se conferre expedit. His addere lubet quod eadem curandi ratio haud singulis *constitutionibus epidemicis* congruat ; cum rarò sibi similes observentur : venæ sectio , verbi gratiâ , pro quâdam cœli intemperie , vel diversâ morbi naturâ , nunc salubris , nunc exitialis deprehenditur : idem dicendum de ipecacuanhâ , simaroubâ , lacte , &c. Ideò nil non movendum ut priùs innotescat morbi , vel miasmarum in aëre latitantium , indoles : aliàs cautè explorari debent remedia ; cum sæpè sæpiùs haud nisi post varia tentamina , ad curationem pateat aditus. Postremò caveant hoc morbo convalescentes æstuosas mentis & corporis exercitationes , aërem frigidiorē , cupedias , inconditamque victûs rationem ; quæ sunt totidem causæ morbi reditum promovere solitæ.

Quæ dicenda supersunt de *fluxûs hepatici & mesenterici medelâ* , paucis complecti cogit observationum penuria. Ut igitur à fluxu hepatico exordium capiamus ; ex omnibus de hâc re traditis , & nostris animadversionibus , colligere datur varias plantas temperantes , aperientes & amaras , haud immeritò hepaticas à veteribus vocitari , cum nil fortè efficacius , præmissis præmittendis , reperiatur adversus prædictum morbum ; dummodò tamen haud altas egerit radices : selectiora & usitatiora audiunt hepatica , agri-
monia , cichorium , dens leonis , & lingua cervina ; centaurium minus , rheum , &c. Nonnulla etiam pro re natâ in subsidium vocantur præsidia , nempè absorbentia & stomachica , aperientia validiora & sudorifica ; quæ pluribus benè cessisse videntur. Sed lac tempestivè adhibitum , consentiente stomacho , exquisitorum remediorum vires æmulari , experiundo didici. Quoad *fluxûs gastro-mesenterici curationem* , primò danda est opera ut foràs elutriatur sanguis in tubo intestinali nidulans ; ne diuturniori morâ putredinem contrahat : sola tamen enemata in hunc scopum adhibere licet ; nec sine cautelâ sunt præscribenda ; ne foveatur hæmorrhagia. Quibus peractis egregiam opem conferunt antiputrida acida , quæ non solum hæmorrhagiam sistere ; sed etiam sanguinis stagnantis corruptelam inhibere queunt : aqua pulli vel oryzæ succo limonum vel essentiâ *Rabel* imprægnata , cæteris sanè antecellit. Nonnullis profuerunt balsama naturalia , peruvianum nempè , toltanum , &c. Decoctum chamæmeli intùs adhibitum , vel per podicem injectum egregiam etiam opem præstitisse traditur. Hanc curationem claudit medicamen catharticum ; quod tamen eâ lege præscribitur , ut recidivæ periculum minime incurrant ægri. Plura circa hujusce postremi morbi indolem & medelam accuratè exarata prostant in diario medico mensis Martis anni 1758 & Decembris 1760 , quæ consulere expedit.

ALVI FLU-
XUS
CRUENTUS.

TENESMUS.

T E N E S M U S.

SIC vocitari frequentiore desiderii cupiditatem nemo nescit : nunc solummodò irritus est egerendi conatus ; nunc excernuntur unà cum fecibus materies mucidæ , cruentæ vel purulentæ. Tenesmus (*épreintes*) dysenteriam , uti suprâ innuimus , & diarrhœam concomitari solet. Hunc etiam *promovent* calculus vesicæ , vel stranguria à quâcumque aliâ causâ orta. Progignitur & fovetur ab hæmorrhoidibus , & ascaridibus ; an exulceratione , fistulâ , &c. Tenesmus gravidarum haud *periculo* vacat , ob imminensem scilicet abortum. Cæterùm ratione morbi primarii cujus est symptoma , varia institui debet *prognosis* ; in cujus accurato conspectu præcipuum versatur curationis momentum.

Haud defunt tamen congrua quædam *medicamina* , quæ sub quâvis causâ vellicationem compescere valent : id genus sunt emulsiones , aqua pulli vel oryzæ , serum lactis vel ipsummet lac , &c. nec inopportuna sunt laxantia blandiora ; manna nimirum , cassia , tamarindi , rheum , &c. Faustè etiam in usum vocari queunt absorbentia , non secùs ac varia præsidia dysentericæ dicata , quæ tenesmum , cæteris consentientibus , sedare queunt. Sed præcipuam opem conferunt remedia externa , inter quæ primatum sanè ducunt enemata vulgatiore , demulcentia & detergentia , in quibus coquere licet , si nil impediat , capita papaveris albi. Felici etiam successu usurpantur semicupia , foci emollientes & resolventes , quibus sanè palmam præripit decoctum florum sambuci ex lacte. Haud minus auxilium præstat vapor aquæ calidæ , vel decocti althææ , verbasci , aliarumque stirpium affinium. Pluris postremò habentur unguentum populeum , lini-menti instar admotum , sebum cervinum , oleum ovorum , aliaque consimilia.



ALVUS ADSTRICTA.

ALVUS
ADSTRICTA

MULTI occurrunt utriusque sexûs qui haud nisi post triduum, quatri-duumve, alvum exonerant: nec desunt quorum venter per decem aut duodecim dies occluditur; etsi pluriès stimulantur ad secessum: nonnulli ob victûs parcitatem, semel tantum, sine sanitatis dispendio in hebdomadâ alvi purgamenta emittunt. Quidam sani & liberaliter comedentes, haud crebriùs dejectiunt. Mentio subjicitur de quâdam feminâ quæ intrâ duas tresve septimanas semel tantum alvum deponebat: item de quodam sacerdote, aliàs sanissimo, qui nusquam, ab infantiâ, nisi post viginti quatuor dies alvum exonerabat; cujus fæces caprarum stercori erant similes. Sed rarissima est diuturnior alvi adstrictio, ni alimenta planè deficient. Haud *periculo* vacat alvus plus æquò compressa; quin potius varia incommoda post se trahit; imò & graviores morbos accersit: conqueruntur enim difficillimè excernentes de flatulentiâ, hæmorrhoidibus, torminibus & anxietatibus; de oris amaritie & cibi fastidio. Tumet nonnunquam abdomen cum calore molestissimo, nonnunquam accedente tympanitide; caput vertigine, doloreque gravativo afficitur; respiratio nonnihil impeditur; viresque obruuntur. Sunt qui tanto nisu alvum exonerant, ut sanguis è naribus profiliat. In nonnullis excandescit febris, cum siti, anorexiâ, &c. Præterea ani prolapsum, vel sanguinis profusionem, animique deliquium post se trahit pertinacior alvi tarditas. Ex eodem fonte quandòque prodeunt imi ventris inflammatio, ileus, epilepsia, apoplexia, &c.: potiori tamen parti nil sanitati demit alvus ignava; quæ familiaris est melancholicis & hystericis, scorbuticis & arthriticis; hæc litteratis impendet morbosa dispositio; quam demùm promoverè solent sudores copiosissimi, diætâ lactea, &c.

Ab *exenteratione cadaverum* patent intestina ingestorum copiâ, fæcibus induratis, materiâque quâdam mucidâ, exsiccâtâ, ultrâ modum infarcta & distenta; flatuumve uberrimum proventum recondentia, vel diversimodè internexa; tuberculis confertim aggestis obstructa; ac lapides foventia. Duodenum præcipuè digestionum reliquiis obrutum deprehenditur. Colon, cæteraque crassiora intestina fæcibus compactis & quasi lapidescentibus obstructa comperiuntur. Repertum fuit colon nucleis cerasorum & persicorum, ad trium plus minusve librarum pondus infarctum; vel ventriculi instar dilatatum, & in fine ampliacionis coarctatum; ac anulo carnosio sphincteris instar constrictum. Occurrunt in intestino ileo sarcofes ingentis mólis; occalescentiæ, vel tumores quidam cartilaginis naturam quasi referentes, quibus tubus coarctatur, vel planè occluditur. Annotatur tubi coalitus à mutuo utriusque lateris exulcerati contactu. Visenda se præbent prædicta organa putrida & gangrænosa; nec raro

ALVUS
ADSTRICTA

dilacerata, cum materierum hùc antea collectarum stagnatione in abdominis cavo. Passim inibi observantur rugarum coalescentia, vel cicatrices quibus angustatur canalis. Colon in immensam molem assurgens à situ dimovetur. Similem ferme amplitudinem etiam assequitur rectum; quod sæpiùs materiâ quâdam subalbicante, & quasi gypseâ repletur; vel tumore skirrhuso obturatur; ac demùm vesicæ implantatur. Insuper ventriculus, haud rarò è fede depulsus cernitur. Annotatur hepar skirrhusum, cum vesiculâ felleâ nunc exinanitâ, nunc bile turgidâ, vel lapideis concretionibus fœtâ. Detegitur pancreas ingens & induratum: occurrit lien mole portentosus, laxatis ligamentis pendulus. Obvium fit omentum crassissimum, putridum, & intestinis accretum. Passim animadvertuntur tumores è ventriculo, mesenterio, utero, vaginâ, aliisque partibus exsurgentes, quibus sæpiùs comprimitur tubus intestinalis. In apricum denique venit vesica lorio ad crepaturam turgida, vel ingentes calculos recondens. Quibus addere licet varias cerebri vel medullæ spinalis læsiones, quæ intestinorum paralysem post se trahunt.

Alvi adstrictio, quâ functiones minime pervertuntur, *periculi* est expers, nullamque curationem expostulat: plura enim prostant longæavorum exempla, vel secundâ valetudine gaudentium, qui haud nisi post triduum, quadriduum & ultrâ, alvum deponebant. Sed aliter se res habet, si ab alvi pigritie, varia emergant incommoda, quæ phlogosim, ileum, colicam acerbissimam, hæmorrhoides furentes, ani prolapsum accersere queunt. Hinc nil non movendum ut opportunis præsidiiis hæc præcaveantur infortunia: neminem ferme latet, quid tùm factu opus sit; quod patris perstringere expedit.

Nonnunquam conducit venæ sectio, præsertim in plethoricis, vel ad inflammationem proclivibus. Sed inter usitatiora *præsidia* recensentur diluentia & laxantia, veluti serum lactis; decoctum betæ albæ, mercurialis, lapathi, brassicæ rubræ, passularum, prunorumque damascenorum; infusum frigidum florum malvæ & althææ, oleum amygdalarum dulcium, cassia, manna, tamarindi, &c.: nonnullis prodest cortex peruvianus, refractâ dosi singulis diebus exhibitus: alios juvat syrupus de gentianâ, &c. Quibusdam optimè cessit tartarus crudus ad ʒ vi. in juscule exhibitus. Quod ad cathartica attinet, rheum nempè, sal polychrestum, rupellanum vel obsoniense, folia orientalia, &c. rarò præscribi debent; eò quòd post absolutam, quam promovent evacuationem, alvus remaneat ficcior.

Pluribus conferunt *panis secalinus*, carnes animalium frigida, lac ab omni calore orbatum, olera, fructus horæi, fraga, uvæ, caricæ, poma cocta, &c. A nonnullis deprædicatur haustus secalinus, instar caffè paratus; vel panis tostus oleo eximio irroratus. Plures juvat aer matutinus in aprico inspiratus. Nec desunt qui cubitum ituri largum aquæ cyathum felici successu hauriunt, ut innumera anilia medicamina, haud semper despicienda, silentio prætermittam. Cæterùm haud exiguam laudem

merentur *enemata* emollientia & purgantia, quorum compositionem ingrediuntur oleum & butyrum; sal gemmeum vel culinare, diaphœnicum, catholicum, aliaque id genus electuaria. Sollicitatur alvus ope glandium, vel suppositoriorum è cereolis, lardo, sapone, melle cocto, butyro de cacao, &c. confectorum; quorum efficaciam augment sal gemmeum, jalapium, agaricus, aloë, colocynthis, euphorbium & id genus alia ipsis immixta, quæ alvum ad secessum stimulant. Unguentum de arthanitâ linimenti formâ abdomini admotum, & infantibus dicatum, parvi habent clinici: pluris verò habentur balnea & semicupia simplicia vel emollientia: sed imparia sunt hæc omnia præsidia superando morboſo obici, si post inconsultum absorbentium usum, vel quâcumque aliâ causâ fæces siccissimæ & induratae ac quasi lapidescentes, intestino recto plus æquo dilatato hæreant; quo in casu spatulâ ligneâ vel argenteâ, in anum immisâ incidi debent; ut dein enematum præsidio everrantur. Novi nobilissimam mulierem quæ huicce auxilio sensim assuefacta, hæud aliâ arte alvum pro lubitu bis, terve per hebdomadam alvum exonerabat. Hæud desunt postremò qui missis omnibus præsidiis Medicis alvum ex voto referant, pedibus nudis aliquantisper obambulando; etsi colici doloris periculum sæpiùs incurrunt.

ALVUS
ADSTRICTA

COLICUS DOLOR.

AB intestino cognomine nomen fortiri hunc affectum evidens est: sed posthabitâ etymologiâ sic vocitari solent quicumque ferè dolores acuti abdomen obsidentes; quorum sedes & indoles in cimmeriis plerumque latent tenebris: cur sit ut, quidquid de hâc re ab Authoribus traditur, obscurum & intricatum, vel scholasticis quisquiliis refertum videatur. Hinc patet quàm difficile sit *genuinam colicam* ab spuria extricare; minime mirum si incauti, & iudicio præcipientes in errorem delabantur, quem prodit *autopsia anatomica*, luuntque ægrotantes. Inter tor ambages, Œdipo opus esset: ideò accuratiorem de hâc re tractatum conscribendum relinquimus iis, quibus volupe est hypotheses fingere: quapropter ea duntaxat, licèt nequaquàm absoluta, quæ è propriis adversariis eruimus, rationi & experientiæ, uti nobis visum fuit, magis consentanea, laconico, pro instituto, sermone tradenda suscipimus. Itaque colici doloris nomine, hanc molestam vel acerbam sensationem intelligi volumus quæ in hanc vel illam seriei intestinorum partem incumbit, quæ sub quadruplici commate se sistens, totidem *colicæ species* exhibet; *bilioſam* nempe, *flatulentam*, *spasmodicam* & *saturninam*; de quibus sigillatim agere expedit.

Colicam bilioſam produnt fitis & oris amarities; interaneorum æstus &

**CÔLICUS
DOLOR.**

materierum, vomitu, vel secessu ejectarum, notissima indoles. Dolor plerumque acerbus, nunc cuidam parti hæret; nunc ex unâ in aliam serpit: aliàs totum intestinorum tractum pervadere videtur. Circà umbilicum versatur, ubi jejunum & ileum afficiuntur: ad dorsum refertur, si duodenum vel jejuni principium invadat: sævit in epigastricâ & hypochondriacâ regione, vel ad inguina propagatur, quotiès in colon irruit. Plures demùm ægri de quâdam constrictione abdominis, non secùs ac fune arctè cingeretur, conqueruntur; & se præ torminibus morituros vociferantur. Vomitus & alvi fluxum sæpiùs promovet colica biliosa; quæ nonnunquàm in ileum & choleram facessit; vel paralyfim & convulsiones post se trahit. Quidam denique, inter hæcce tormina, intestinorum ramenta egerunt; nec desunt, uti observasse memini, qui integras tubi portiones foràs elutriant. Breve est colicæ biliosæ stadium; sed sæpiùs tanto cum impetu recurrit, ut inflammationem minetur, quâ nil truculentius & periculosius excogitari potest. Nonnunquàm ob doloris situm pro colicâ nephriticâ habetur; sed testium retractio dolorem renalem ab intestinali ritè distinguit. Colica insuper biliosa vomitu & alvi fluxu compescitur; quæ evacuationes nullum sub nephriticâ levamen præstant. Urinæ postremò turbidæ minguntur in colicâ biliosâ; limpidæ verò observantur vel planè sufflaminantur vigente nephresi.

Duodenum sæpiùs adoritur colica biliosa; cur minime mirum, si dolor in hocce intestino defixus pro cardialgiâ, colicâ hepaticâ vel nephriticâ ab imperitis sæpiùs habeatur. Illud per transfennam notare expedit, prædictum intestinum variarum febrium fomitem recondere; cujus dolores, mesenterii ope, ad dorsum transmitti solent. Ex eodem fonte etiam prodire videntur anxietates & dolores quæ vomitum biliosum, choleramve prænuntiant. Non solùm ab excandescente, vel exuperante bile infestatur duodenum; sed sæpiùs à vermibus inibi hospitantibus confoditur; bilis enim amarities quæ in cavum hujusce organi sincera profunditur, non impedit quominùs hic commoretur verminosa progenies. Remittente morbo egeruntur fæces biliosæ; ac sæpiùs coagula ejusdem naturæ quæ è longinquo adspicienti sanguinea videntur.

Colica flatulenta à dispositione quâdam spasmodicâ scaturiginem habere conjicere nil verat; cùm dubitare liceat nùm à flatuum præsentia, vel à constrictione quâdam spasmodicâ, flatuum genesi favente, ortum ducat. Hinc parùm, præ indole, discrepare videtur ab infra recensendis speciebus: sed ratione peculiarium symptomatum quibus stipatur; & pro diversâ curandi methodo, hanc seorsim exhibere necessarium duximus. Hanc patrefaciunt intestinorum rugitus & borborygmi, erumpentes ructus & crepitus, abdominis inflatio vel renitens intumescencia, quæ nonnunquàm ità increfcit, ut umbilicus coërcendis intestinis impar ipsis egressum largiatur: hinc minime mirum, si ex hoc meteorismo emergat spirandi difficultas. Dolor plerùmque vehemens rarò peculiari parti infigitur: sed sæpiùs singulas abdominis partes pervadere videtur. Majorem tyrannidem

exercet, si duodenum, cæteraque gracilia intestina obsideat: sed in plerisque, coli supremam partem, vel ventriculo incumbentem, impedit; undè ab stomachi, & hepatis doloribus ægrè distinguuntur hæc tormina, præsertim si cum cardialgiâ implicentur. Oscitatio denique & alvi segnities; ac nonnunquàm ileus, colicam flatulentam concomitari solent: nec rarè cordis palpitationem, lipothymias, extremorum frigus, &c. post se trahit hic dirus affectus.

COLICUS
DOLOR.

Colica spasmodica morbus haud infrequens causæ in ipsis nervis latitanti, quâ ab affinibus discrepat, innititur. Cognitu sanè difficilis est, ob variam sedem quam occupat; etiam in eodem insultu; adeò ut nunc colicam stomachi, nunc intestinalem; aliàs hepaticam vel nephriticam æmuletur: ac tanta est ad errorem proclivitas, ut iisdem fermè symptomatibus stipentur hæ singulæ dolorum species, vomitu nempè, alvo pigrâ, lotii suppressione, tremoribus, virium prostratione, anxietatibus, lipothymiis, sudoribus frigidis, singultu, convulsionibus, delirio, &c. Intereà pulsus sub hocce morbo, parvus & durus, ac nonnunquàm febrilis deprehenditur; respiratio fit anxiosa; dolores qui, uti jam innuimus, per totum abdomen divagantur, sæpiùs pacantur, ut recrudescant: citiùs tamen solvuntur, quàm si à causâ huic vel illi visceri hærente sobolescerent. Sed minime reticendum sæpiùs implicari prædictos dolores; adeò ut hisce enucleandis impares planè sint vel solertiores; ni ægri constitutionis, vivendi generis, omniumque antecedentium sint ritè conscii. Sæpiùs periodicè invadit colica spasmodica, quàm aliarum specierum instar, promovere solet soluta vivendi norma, præsertim in melancholicis & litteratis qui huic obnoxii censentur. Ut de pedum refrigeratione, aliisque causis fugacibus fileamus.

Colica saturnina, vulgò *colique des Peintres*, quæ pace BOERHAAVII, aliorumque celebriorum Authorum, multum discrepat à colicâ Pictorum, in spasmodicorum classi locum sibi vindicaret, ni peculiarem, notissimamque causam agnosceret. Dolores, ut plurimum remittentes sub hâc specie, quandòque epidemicè grassante, non solùm stomachum, tubum intestinalem & mesenterium peragrant; vel peculiari horumce organorum parti, præsertim circà umbilicum, instar terebræ, obnixè hærent; sed etiam ad inguina, dorsum, pectus, &c. haud rarè propagantur. Cæteris speciebus ferocior & contumacior observatur colica pictorum; cum ad duodecimum vel decimum quartum diem nonnunquàm proteletur; & tantâ sævitie missellos ægros discruciet, ut animum planè despondeant. Pulsus, hâc vigente, contractus & apuretos exploratur: nausæâ vexantur ægri; vel ingentem saburræ biliosæ & subviridis copiam evomunt. In potiori parte, erumpunt ructus & crepitus: urinæ parcè fluunt, vel sufflaminantur. Alvus sæpiùs ità occluditur, ut ægrè injiciantur enemata. Venter subsidet & umbilicus versùs dorsum quasi retrahitur; adeò ut muscoli abdominales tetano laborare videantur; quod postremum signum pro pathognomonico nonnulli habent; cui addere licet ipsiusmet podicis introtractionem clysterum

COLICUS
DOLOR.

administratoribus summè conspicuam. Anxietatibus torquentur decumbentes, quæ non solum, somnum arcent; sed etiam delirium cum furore, vel somnolentiam comatosam prænuntiant. Nonnulli horrore corripuntur; alii dolores, contractionem vel stuporem in artubus patiuntur, quæ paralyfim minantur: nonnullis à paroxysmi primordio contingit paralyfis; quæ in aliis, declinante, vel prorsus cessante colicâ, subnascitur. Caput insuper exerit singultus: exsurgunt convulsiones: erumpunt sudores frigidi & glutinosi: accedunt lipothymia, aliaque atrociora symptomata, in gravioribus morbis solemnia. In quibusdam erumpunt tubercula in dorso manuum, quæ si post fugatam colicam non evanescunt, recidivam minantur; ac periculi nusquam expers est subitus horum recessus: nec omnes sublato morbo pristinae sanitati restituuntur; quin potius incidunt in asthma convulsivum pertinacissimum, icterum, alvi fluxum, emaciationem, paralyfim, &c. *Hiscæ signis* addere licet causam hujusce morbi notissimam; nempe virulentam plumbi materiem, quæ subjecta organa diversimodè laceffit. Hoc virus hauriunt pictores qui varias plumbi præparationes in suis pigmentis adhibent: hoc caveant chymici & pharmacopola qui varia saturnina parant. Huic submittuntur operarii, diversis hujusce metalli operationibus indulgentes; necnon figulini qui illud pertractant. Hoc vitium demùm contrahitur vino lithargyro adulterato, ut scilicet acidum, vel immaturum, plumbi ope graciosus evadat; aquâ in vasis plumbeis recepta & collecta; butyro demùm cui immixta fuit cerusa, ut sub penuriâ ponderosius evadat.

Præter has *colicæ species* essentielles, innumerae occurrunt *symptomata*, quæ cum prædictis coincidunt: hypochondriacæ nimirum, hystericae & scorbuticae; non secus ac quæ ab alvi fluxu & dysenteria, ab herniâ, imi ventris inflammatione, febribus malignis, &c. pendet. Colicam præterea accersunt præpedita perspiratio, mensium & hæmorrhoidum sufflaminatio, eruptionum retrocessus, materia arthritica & rheumatica sanguini remixta, calculus renum, dentitio, partus, &c. Hanc *promoveant* emetica, purgantia drastica & venena; vinum acescens vel immaturum; vermes in tubo intestinali nidulantes; ingestorum copia, fæces coercitæ, & pedum refrigeratio. Hæc tormina nonnunquam præeunt febrium intermittentium insultum, mensium profluvium, &c. Sed in hunc censum minime veniunt dolores hepatis, lienis, pancreatis, stomachi, renum, uteri, &c. qui pro colicâ sæpius perperam habentur. Addere lubet quod omnes ferè colicarum, aliorumve dolorum abdominalium & fugacium species à solutâ vivendi normâ, quæ delitescentem causam evolvit, ut plurimum promoveantur.

Tantâ vehementiâ & ferociâ misellos ægros discruciat *colica saturnina*, ut vix effari possint: atrocissima etiâ censei debet *spasmodica*: alterutrâ enim correpti ejulatu totas ædes explent; cur minime mirum, si in vitæ discrimen nonnunquam trahantur. Haud tantam sævitiam exercere solet *colica biliosa*, minoremve *metum* incutit *flatulenta*, quæ brevi ut plurimum

fugatur. Pro periculofiori & *pertinaciori* fanè habetur colicus dolor, cuiusvis fit fortis, partem quamdam dilanians, huicque obnixè hærens, quàm is qui ex uno loco ferpit in alterum. Singultus, horror & febris, anxietates, lipothymia, &c. inter colicæ cruciatus emergentes pro calamitosi symptomatibus habentur. Nemo nescit colicam nonnunquàm facessere in icterum, dysenteriam, choleram, phlogosim abdominis, ileum, &c. Vehementior insuper epilepsiam aliunde morbum convulsivum, stuporem & paralytim, cæcitatem, &c. post se trahit. Sudores postremò; sanguis erumpens è naribus, ano & utero; efflorescentiæ scorbuticæ, insultus arthritici, &c. colicam solvere queunt.

COLICUS
DOLOR.

Fecundissima fanè prostat *cadaverum historia* ad nostram rem exarata; quâ patent non solum variæ strages huc pertinentes; sed etiàm diversæ viscerum læsiones, quæ perperam ad colicum dolorem antea referebantur. Itaque visenda se præbent intestina skirrhusa, pituitâ infarctâ vel obducta; vicinioribus partibus, vel invicem accreta; phlogosi correpta, abscessum recondentia, ulcusculis exesa, vel stigmatibus gangrænosus defœdata; eorum vasa plus æquo infarctâ, & juxta horum viscerum ambitum summe conspicua. Intestina & præsertim duodenum, colonque, pellucida videntur; flatibus supra modum turgida, & nonnunquàm dilacerata. Obiter de hac re notare juvat tubum intestinalem, non secus ac alia viscera cava, nusquam ferè, post enormem dilationem, pristinum tonum recuperare: quod nuperrimè observavi in viro quinquaginta annorum qui acerbissimam colicam quatuordecim abhinc mensibus passus fuerat: à quo tempore interaneorum dolore, obscuro fanè, conquerebatur; cujus cadaver cultro anatomico subjectum exhibuit præcipuam jejuni partem ob stupendam dilationem è genuinâ fede depulsam, in decliviori parte sideratam & dilaceratam; uti evenire solet in tympanitide. Gracilium intestinorum cavum, ut incæpta prosequamur, bile porraceâ, æruginosâ & nigricante; vel materiâ glutinosâ & purulentâ scatet. Crassiora scybalis compactis & exsiccatis impediuntur: ac colon in nonnullis senibus à costis spuris plus æquo incurvatis suggillatum deprehenditur. Passim occurrunt per totum tubi tractum vermes; concretiones tum biliosæ, tum lapideæ; diversa corpora extranea deglutita; varii nuclei, nunc nudi, nunc crustâ quâdam obducti, &c. tenuia intestina mutuâ adhæsione glomeramen quoddam sæpiùs mentiuntur. Obviæ fiunt in utrorumque contextu occallescentiæ quibus tubus angustatur. In conspectum denique veniunt coarctationes absque causâ manifestâ, quasi à circumducto filo constringeretur canalis; ejus laterum coalitus. Crebrius hæc annotatur constrictio in fine duodeni; & familiaris est iis qui, dum viverent, intestinorum fragmenta egresserunt.

Præter hanc multiplicem *intestinorum labem*, patet stomachus phlogosi tactus, flatulentiâ turgens, maculis gangrænosus signatus. Reperitur mesenterium skirrhusum & sideratum; abscessus, tumores anomalous & hydatides recondens. Ante oculos versatur peritonæum inflammatione, purulentiâ vel gangrænâ defœdatum; cruoremve in contextu cellulari

COLICUS
DOLOR.

colligens. In apricum venit epiploon crassissimum, sideratum vel putredine absumptum; in glomeramen quasi convolutum, colluviem cruentam vel saniosam continens: ejusque vasa infarcta & varicosa occurrunt. Se offert hepar decolor, infarctu vel phlogosi detentum, putridum stupendæ molis, tuberculis vel hydatidibus refertum; è quo nonnunquam prodeunt tumores cystici, alteriusve naturæ: repertum fuit hoc viscus in thorace situm. Vesicula fellea nunc bile tumet, nunc recondit concreciones lapideas; quibus ductus communis haud rarò obturatur: aliàs exinanita, & corrugata, vel disrupta, cum stagnante bile in abdominis cavo, conspicitur. Cernitur lien pallidus, tumens, è loco depulsus, & ad pelvim quasi delapsus. Pancreas skirrhosum, inflammatum, pus colligens, ulcerosum, sphacelatum vel putredine confectum annotatur. Nonnunquam demùm invenitur aorta, è quâ originem ducunt cœliaca & mesenterica superior, ultrà modum dilatata. Ut de variâ renum, vesicæ, capsularum atrabilarium, &c. labe, de variis tumoribus & abscessibus incertæ sedis, & diversis stagnationibus familiaribus, tum in abdomine, tum in pectore, vel in thecâ spinali; de visceribus transpositis, sileamus. Sed minime reticendum quod post colicam spasmodicam recentem, nil vitii, præter flatulentiam conspiciatur. Equidem haud procul abhinc annis grassabantur Versaliis insultus colici, qui plures rapiebant, sub quorum exenteratione nil notatu dignum occurrebat. Ad summam luce clariùs patet à traditâ cadaverum è colicâ denatorum historiâ, licet contractâ, plura organorum vitia, de quibus post scriptores mentionem subjecimus, ad nullam colicæ speciem pertinere.

Nemo nescit omnes ferè colicæ species iisdem telis impugnari, nempe venæ sectionibus, emeticis & catharticiis; diluentibus, lubricantibus, demulcentibus & anodynis; balneis, topicis emollientibus, linteis calidis, &c. Nec adversùs sola tubi intestinalis tormina usurpantur hæc *præsidia*, sed etiam adhiberi solent sub renum, hepatis, aliorumque viscerum abdominalium doloribus. Nec futilia, sub hisce omnibus morbis, censerì debent; cùm horum ope compescantur cruciatus abdominales, cujusvis sint sortis & cuicumque parti hæreant: atque eo pacto minùs sint pertimescendi imperitorum, à veri tramite circà morbi naturam & sedem deflectentium, allucinationes. *Diversa* tamen debet esse *curandi methodus*, non modò pro parte affectâ & morbi indole; sed etiam ratione innumerarum circumstantiarum, quæ citrà piaculum à clinicis posthaberi nequeunt. Hinc medendi rationem singulis colicæ speciebus congruam tradere consultius nobis visum fuit.

Experientiâ constat magis profuturas esse *venæ sectiones in colicâ biliosâ*, quæ sæpiùs inflammationem minatur, quàm sub cæteris; licet tempeste biliosâ præditi sanguinis missionem agrè ferant; sed urgentiori succurrendum. Conferunt diluentia & demulcentia, aqua nempe pulli & vituli, serum lactis, oleum amygdalarum dulcium, sperma ceri, &c. quorum vices supplere valet aqua simplicissima largâ manu exhibita. Nonnullis profunt

profunt aqua succo limonum vel aceto cum tantillo mellis imprægnata ; decoctum tamarindorum ; acetosa , nitrum , cremor tartari , &c. Danda præsertim est opera , ut foràs elutrietur saburra biliosa , si nil obstat , emeticorum & catharticoꝝ ope. Haud exigua sanè laudem merentur hypnotica ; quæ præmissis congruis evacuationibus , dolorum ferociam reprimunt : sed cautè sunt exhibenda ; quidquid in contrarium adducant varii prioris notæ Authores , vel ipsemet SYDENHAMUS. Efficaciora & usitatissima sunt enemata emollientia , anodyna & laxantia ; non secùs ac fœtus ; vesicæ lacte semiturgidæ , lintea calida , balnea , &c. Multùm postremò celebratur chamæmeli usus internus vel externus ; nec fortè immeritò. Hæc sunt *præsidia* adhiberi solita , vigente paroxysmo : sed alia , *prophylactica* nempe , in usum vocantur contra colicam biliosam chronicam ; lac nimirùm , & aquæ minerales ; aperientia , sudorifica , antiscorbutica , aliaque benè multa ; ratione morbi primarii vel implicati , aliarumve circumstantiarum , quæ peculiarem curationem sibi vindicant.

Ad colicam flatulentam nonnunquàm confert venæ sectio : sed semper proficuè adhibentur diluentia , demulcentia & sedantia ; de quibus suprà : nec inutilem opem præstant laxantia. Quibus præmissis , conducunt *carminantia* , quæ perperam à nostris coætaneis despiciuntur ; id genus sunt folia melissæ , salviæ , botryos & abrotani ; flores chamæmeli ; semina anisi , coriandri , & feniculi ; balsamum commendatoris & Fioraventi ; extractum juniperi , opiata Salomonis , theriaca , orvietanum , &c. quibus addere licet enemata emollientia , lubricantia , anodyna & carminantia ; nec non varia topica suprà tradita , quæ partibus rigidioribus & dilaniatis flexilitatem & mollitiem conciliare valent.

Venæ sectione plerùmque exasperatur *colica spasmodica* ; ne dùm compescatur ; idèò sanguini parcendum : sed largâ manu sunt propinanda diluentia & demulcentia ; serum nempe lactis , & aqua pulli ; oleum amygdalarum dulcium & sperma ceti , aliaque silentio premenda , ne priùs dicta recoquamus. Cateris præstant *sedantia* , tùm hypnotica , tùm antispasmodica ; mixtura nempe è guttis anodynis & tincturâ castorei parata ; laudanum , diacodium , &c. quorum ope ut plurimùm domatur hæc doloris species , cujus causâ extrâ primas vias sævitiam suam exercet , dùm solatium duntaxat impetrant in cæteris colicæ speciebus à materiâ quâdam stimulante prognatis : tanta est horumce postremorum efficacia , ut plures viderim ad incitas quasi redactos , lecto affixos , veluti morituros jacentes , qui haud citrà adstantium admirationem , post haustam prædictam mixturam , surgebant & obambulabant. Præsentaneam opem conferunt laxantia tempestivè propinata ; præsertim si flatus & fæces intrâ colon , à tubi intestinalis constrictione spasmodicâ sufflaminentur ; quod sæpiùs in hâcce specie accidere expertos clinicos nequaquàm fugit. Hisce peragendis præstò sunt emollientia , anodyna & carminantia ; quibus addere licet sal gemmeum , si fæces retentæ incusentur. Nec inertia censerì debent fœtus &

COLICUS
DOLOR.

cataplasmata emollientia, balnea & femicupia, lintei calidi, vesicæ lacte tepido semirepletæ, &c.

Peculiarem medelam sibi vindicat colica saturnina, etsi spasmi est particeps: sub quâ, haud nociva censetur venæ sectio, quæ tamen sæpius incassum adhibetur. Profunt sicuti in præcedentibus speciebus diluentia, demulcentia, oleosa, & antispasmodica: sed narcotica haud nisi summâ cautelâ, vel cardiacis immixta, præscribi debent; ne paralysem, ad quam proclives sunt ægri, accelerent. Cæteris palmam præripere videtur emeticum, vel repetitum; quod, præmissis diluentibus, conducit ad eradicandam causam in primis viis latitantem; & hinc ad compescendos stomachi dolores. Quibus peractis, identidem, vel singulis trihoriis, propinatur olei amygdalarum dulcium uncia una aut altera, cum æquali quantitate aquæ vulnerariæ; quod euporistum, etsi empiricum, acceptum habuit clariss. SENAC, Archiattrorum Comes: dein ad laxantia, cæteris consentientibus, devenire expedit. Nec defunt alia remedia ab Authoribus decantata, nimirum emulsiones camphorata, succus mitiorum antiscorbuticorum, balsamum copahu, sapo veneris, aliaque benè multa, quæ pro re natâ adhiberi queunt. Quod ad enemata attinet, laudantur emollientia & demulcentia, quibus immiscentur oleum nucum, terebinthina, balsamum copahu, oleum anisi, &c. Sed pro efficacioribus habentur stimulantia, quæ scilicet ingrediuntur vinum emeticum, colocynthis, &c. ut de topicis emollientibus suprâ laudatis nihil addam. Qui ex hocce morbo pluriès evaserunt, experientiâ edocti, à viâo temperant: vinum enim, licet non adulteratum, particulas metallicas antea inertes dissolvit & in motum agit. Insuper oleum tartari per deliquium, antiacidum, uti nemo nescit, præstantissimum, inter efficaciora *prophylactica* numeratur. *Paralysis*, uti suprâ innuimus, saturninæ præsertim colicæ speciem excipit: hanc nervorum resolutionem plerumque fugant aquæ minerales; quibus deficientibus ad solita præsidia, de quibus suo loco, confugere licet. Dolores verò artuum, qui etiam inter hujusce morbi reliquias numerantur, aperientibus & saponaceis impugnari solent: summis laudibus sub hoc casu deprædicatur tartarus martialis cum juscule aperiente sumptus. Frigus postremò omni studio arceant, tùm hunc morbum perpessi, tùm ex hoc decumbentes; ac præsertim à congruâ victûs ratione minime deflectant; cui plus sanè quàm pharmacie tribuendum.

Aliâ methodo colicam saturninam aggrediebatur Parisiis expertissimus DUBOIS in Nosocomio dicto de la Charité. A venæ sectione scilicet, oleosis, cæterisque lubricantibus & demulcentibus, alibi largâ manu usurpari solitis, planè abstinebat: sed ptisanam diaphoreticam pro potu præcipiebat. Et primo morbi die enemata emollientia, anodyna & laxantia injici curabat. Postero die vitrum antimonii, alterumve emeticum præscribebat; & theriacam cum grano opii ferotinis horis exhibebat; quod narcoticum tertio die repetebatur; ut catharticum stimulans quarto die adhiberetur;

quo omnem curationem absolvi autumabat laudatus Author. Sed nùm hæc methodus semper pro votis succedat, singulisque congruat? expertis examinandum relinquimus.

COLICUS
DOLOR.

Ut nil intactum prætereamus, nonnulla, mantissæ instar, adjicere lubet de morbo quodam, ni fallor, commentitio, quem endemium esse apud Pictones, quasi solos conterraneos invaderet, falsò traditur; undè *colica Pictonum* à recentioribus multùm celebrata vocitatur. CITESIUS primus mentionem subjecit de hâc colicæ specie, clinicis duntaxat fortè occurrente qui nubem pro Junone amplecti solent. Hanc ad biliosas pertinere existimat prædictus Author: quæ, inquit, virium prostratione subitò ingruere solet: frigent extrema, & accedunt lipothymia. Intereà cardialgiâ anguntur ægri; bilem porraceam evomunt & exsurgit singultus. Apurexia non impedit quominus sitis urgeat: alvus intereà obturatur, & parcè fluit lortium. Conqueruntur decumbentes de acriori æstu in regione epigastricâ, & in hypochondriis; ac de doloribus acerbissimis qui per totum abdomen divagantur; sæpiusque ad pectus, dorsum & scapulas pertingunt. Coarctatur abdomen quasi, ut ipsis videtur, à fune constringeretur. In propatulo fiunt arteriæ cœliacæ, vel ejus propaginum, pulsationes. Dolores demùm excipit artuum *paralysis*, incolumi sensu, quæ ad plures menses protelatur; aliàs ingruit epilepsia ad obitum vergens, vel cæcitatem plurium dierum, libero perstante judicio, post se trahens. Hæc colicæ species, paralyti, plerumque judicanda, majorem tyrannidem exercere solet in sequiori sexu; ac demùm ætate provectos in vitæ discrimen trahit.

Addit laudatus Author *colicam pictaviensem progigni* à vinis austeris & immaturis; ab exercitationibus immodicis, vigiliis & animi pathematibus; familiaremque esse iis qui rarò stimulantur ad secessum. Ejus curationem venæ sectione inchoandam esse opinatur; eo quòd proficuum pluribus fuisse mensium & hæmorrhoidum profluvium experiëntiâ didicerit: sed publico coætaneorum clamore nonnihil perterritum fuisse candidè fatetur. Depletis vasis laxantia proponit: validiora verò cathartica, etsi à veteribus decantata, haud citrà periculum adhiberi posse perperam credidit. Incassum tamen pluriès adhibitis purgantibus blandioribus, efficaciorum fortè fore crocum metallorum, alterumve emeticum haud falsò conjicit: narcotica denique in usum adhibebat. Præcipiebat insuper enemata demulcentia, è lacte scilicet, juscule omasorum, vino & oleo, &c. parata; non secus ac fœtus emollientes, fœmicupia, &c. Curationem absolvebat temperantibus, aperientibus, aquis mineralibus martialibus, acidulis, &c. E quibus, ni fallor, inferre licet huncce morbum, in istâ regione tunc temporis epidemicum, haud peculiari commate à suprâ recensitis colicæ speciebus distinguì posse; quas ad ultimum gradum devectas eandem faciem præ se ferre, ex jam habitis satis superque constat. De simili affectu per totum Imperium Romanum grassante, quem sequebantur paralysis, morbus comitialis, &c. mentionem subjecit PAULUS ÆGINETA. Variæ paralyseos à colicâ historiæ prostant apud SCHENCKIUM, aliosque scriptores Medicos: undè patet haud

COLICUS
DOLOR.

crebriùs observari apud Pictones hanc ægritudinis speciem, quàm in cæteris orbis regionibus; vel colicam cujuscumque indolis acerbiorē, colicæ Pictonum nomine, pro curantium mente salutari.

Nec adversatur clariss. TRONCHIN, qui de hâc re nuperrimè scripsit: cùm in eâ sit opinione hanc colicæ speciem in paralyfim vel epilepsiam faceffuram, sub diversis sanè titulis Veteribus innotuisse: atque signis à CITESIO allatis addit ægros de quodam graviditatis sensu per triduum ante morbi accessionem conqueri: quo scæviente umbilicus versùs spinam deprimatur; exsurgit tenesmus, ingruit rauco, ac visus obnubilatur: paralyfim demùm, ex laudato Authore, prænantiant artuum dolores, vel epilepsia insultus solito longior. Exhinc colligitur *colicam pictaviensem* haud morbum esse, uti vulgò fertur, *sui generis*; & huic sententiæ adstipulari videtur egregius Author; juxtà quem variæ occurrunt torminum species quæ ad colicam Pictonum referri queunt; licèt à diversis causis oriantur, & peculiarem medendi methodum sibi vindicent; quorum seriem transcribere, & paucis perstringere, haud abs re nostrâ fore putavimus.

Prima *species* excipit *febres præposterè curatas*; atque paralyfim, lethargum & convulsiones post se trahit: adversùs quam futilia sunt, asserente nostro Authore, emetica & purgantia drastica; necnon narcotica; sed antispasmodica, semicupia, fofus, cataplasmata & enemata emollientia laudat: quamdam opiatam etiam præscribit è mannâ, cassiâ & oleo amygdalarum dulcium simul subactis paratam; cujus alternis horis drachma una in fero lactis diluta propinatur. Succum postremò beccabungæ, vel taraxaci suadet, aquisque mineralibus acidulis curationem claudit.

Secunda *species* originem ducit à *plumbo*, cupro, cinnabari, cerusâ, viride æris & antimonio; ac crebriùs à vino, saccharo saturni, vel lithargyro adulterato: ad quam venæ sectio, sub ætate juvenili & vegetâ congruit. Huic ineunti confert vomitorium; dein usurpari debent hypnotica, haud posthabitis fotubus, cataplasmatibus & enematibus emollientibus, balneis, &c. Laxantia demùm, quorum basim præbet serum lactis, commendantur; quibus addit vesicatoria cruribus imposita.

Tertia *species* respicit, pergente Authore, *vina austera & immatura*; necnon liquores acidos: adversùs quam venæ sectionem, emetica & purgantia drastica respuit: unum aut alterum duntaxat tartari stibiati granum in majori aquæ copiâ solutum haud improbat; dummodò vesperè exhibeatur narcoticum. Enemata & topica emollientia minime despicit; sed dubia ipsi videntur balnea. Oleum amygdalarum dulcium, cæteraque laxantia proponit; non secùs ac demulcentia, aquam nempè pulli, vel lac aquâ Selteranâ dilutum. Aquis postremò martialibus per mensem & ultrâ propinatis, simul accedente equitatione, medelam absolvit.

Quarta *species*, *arthritica & rheumatica* audit, quæ paralyfim & convulsiones sæpiùs post se trahit: sub quâ specie conducit juxtà laudatum Authorem, venæ sectio, si vires finant. Supervacanea sunt emetica & purgantia validiora: summam opem præstant vesicatoria illicò cruribus admota; quorum

suppuratio diù protelari debet. Suppetias ferunt cucurbitulæ siccæ plantæ pedum manè & serò admotæ : opportunè etiam foveantur crura decocto emolliente , vel vapore aquæ calidæ. Huc quoque pertinent laxantia & enemata lubricantia. Pluris habet denique lacticia , equitationem , aliasque corporis exercitationes : nec vinum prohibet debilibus.

COLICUS
DOLOR.

Quinta *species sufflaminata perspirationi* natales debet ; sub quâ venæ sectionem plerumque utilem autumat præciturus Author. Egregiè se gerunt laxantia & oleosa ; cucurbitulæ siccæ abdomini impositæ , vel ipsamet vesicatoria , enemata , demulcentia , &c. Felici successu usurpatur infusum assafras ; alterve haustus diaphoreticus. Inducias agit laudanum refractâ dosi ; sed pluriès exhibitum ; cui camphora ad duplum immiscetur : quæ omnia excipiunt aquæ minerales sulphuræ.

Sextam *scorbuticam* vocitat ; sub quâ à venæ sectione abstinendum : huic congruunt laxantia , serum nempè lactis , cassia , manna , & oleum amygdalarum dulcium ; quibus addere licet enemata vel topica emollientia. Suam opem præstant vesicatoria cruribus admota ; ac demùm aquæ minerales ; ut de specificis & antiscorbuticis nil addam.

Septimam *melancholicis familiariorem* ad colicam *biliosam* proximè accedere existimat ; sub cujus medelâ inertia sunt venæ sectiones , emetica & cathartica stimulantia : sed omnem implent paginam demulcentia & laxantia ; aqua nempè pulli , serum lactis , cassia , &c. Nec reformidandum ipsi videtur unguentum de arthanitâ abdomini admovendum : atque postremò ad aquas minerales acidulas , equitationem , &c. deveniendum esse censet.

Octava denique *ab animi pathematibus* prognata familiaris est hystericis & hypochondriacis : inter quam curandam exulare debent venæ sectiones , vomitoria & cathartica. Omni ope antea enitendum , ut mentis & corporis quieti indulgeant agri ; nec vetantur in huncce scopum narcotica. Pro votis interea succedere solent enemata laxantia & lubricantia ; fofus & cataplasinata emollientia , pediluvia , cucurbitulæ femoribus impositæ ; sinapismi cruribus admoti. Haud prohibentur laxantia ; nec despicienda sunt lacticia. Postremam insuper manum huic curationi imponit cortice peruviano , cæterisque roborantibus. Haud reticendum aëris mutationem plurimum conferre non solum in hac specie , sed etiam sub cæteris chronicis.

Quod ad *paralysim* spectat , omnium fermè harumce specierum haud rarò pedissequam ; balnea , frictus , & corporis exercitationes commendat. Membra paralytica pelle animalium recens mactatorum calidè involvuntur ; quod pluriès iterare expedit : in usum internum & externum trahuntur aquæ thermales : sunt linimenta cum unguento martiato , &c. Haud inutilem opem conferunt balsamum peruvianum , gummi ammoniacum , vinum generosum , &c. Hi sunt morbi quos sub generali colicæ *Piçtonum* titulo comprehendit clariss. TRONCHIN ; quibus subjunximus ejus medendi methodum ; quam etsi rationi & experientiæ minime absonam , cum grano tamen salis accipiendam esse censemus.

FLATULEN-
TIA ET
TYMPANI-
TES.

FLATULENTIA ET TYMPANITES.

CURVIS, etiamsi physicem à limine salutaverit, obvium fit quomodo emergat in primis viis *meteorismus*: incalescentia enim ingesta ob diuturniorem moram, aliamve causam, quamdam patiuntur solutionem; undè aëris moleculæ subactis materiebus immixtæ & quasi incarceratæ extricantur & evolvuntur: sui juris factæ prædictæ particulæ, ratione affinitatis brevi adunantur vel in bullas coeunt, quibus ingressum denegant vasa lactea; cur sit ut ad certam molem assurgentes per superiora vel inferiora egressum sibi parent: plura de hâc re non addimus, ne noctuas Athenas adspertasse insimulemur. Haud dubitare licet, ut ad propositum veniamus, quin flatus in stomacho & intestinis collecti, & calore loci ad rarefactionem proni, molestissimam horumce organorum dilatationem moliantur; unde exsurgit *colica flatulenta*; non solum intestina respiciens; sed etiam ipsummet ventriculum, qui quandoque mirè ab hâcce causâ dilatatur; etsi alimenta liberè permeant: sed sæpiùs immeritò incusantur flatus; ubi scilicet dolores à causâ spasmodicâ sobolescent; quâ retardatus egerendorum gressus flatulentia innocuæ ansam præbet. Nonne quotidie occurrunt homines ad flatus procliviores; borborygmis, ructibus, & crepitibus majorem strepitum concitantes; qui, vel inflato abdomine, doloris sunt planè expertes; dùm cæteri de flatibus vix queruli tormina atrociora pariuntur.

Ructus & crepitus crebrò & confertim erumpentes; *borborygmi*, vel intestinorum rugitus; stomachi, hypochondriorum, totiusque abdominis inflatio *flatulentiam* sanè *produunt*; quæ, dummodò à febre non promoveatur, leviora parit incommoda; si utrumque guttur ipsi exitum largiatur. Sed aliter se res habet, ubi constrictione quâdam spasmodicâ cohibetur, & ad ulteriorem expansionem cogitur; undè abdomen in altum attollitur, alvus occluditur & acerbiores exsurgunt dolores. Ex eodem fonte etiam prodeunt nausæ, anxietates, lipothymia, cephalalgia, vertigines, spirandi difficultas, &c. A ructibus insipidis, acidis & putridis innotescunt digestionum vitia; quæ etiam prodit diversa crepituum foetiditas. Cholera siccam in flatuum per utramque viam creberrimâ eruptione versari jam suprà notavimus: tantâ enim copiâ sæpiùs expelluntur, ut meram xolipilam mentiantur ægri; qui si illos inconsultò coercere velint, colicæ atrocissimæ, vel tympanitidis periculum incurrunt; nec desunt varia horumce infortuniorum exempla.

E præhabitis colligitur *tympanitidem* ultimum flatulentia, vel colicæ cognominis gradum præbere; quem prodit stupenda abdominis inflatio, vel intumescencia, quâ muscoli abdominales & cutis ità distrahuntur & disten-

duntur, ut nonnunquàm percussus imus venter sonum instar tympani edat : sed multùm abest quin in omnibus illud annotetur phanomenum ; licèt ab Authoribus , quorum plerique cæco brutorum more , aliorum vestigiis instare solent, pro *signo pathognomonico* habeatur : quod falsissimum deprehendimus , & pluriès nonnullis clinicis , hisce præjudiciis antea obcæcatis examinandum præbuimus , qui se aliorum fide delusos fuisse fateri haud erubuerunt. Ventris intumescencia sub tympanitide minor ac in ascite : eandem in quocumque corporis situ formam & molem servat ; nullaque deprehenditur fluctuatio : nec sensim & uno tenore incrementum capessit hic tumor, uti observatur in ascite : sed sapiùs in maximam molem brevi exsurgit, nec in eodem statu remanet, ut in hydrope ; sed alternos subit gradus. Prætereà renitet hic utricularis tumor, ad sensum & ad stateram hydrope levior : fursùm, versùsque umbilicum magis prominet : in quibusdam percussione factâ obscurè tinnit ; pressus mox se attollit, & contumaci ventris adstrictione stipatur ; pulsu plenior & durior quàm in ascite.

Inter morbos chronicos numeratur *tympanites* ; etsi ægros nonnunquàm brevi è medio tollit. Hysterim & hypochondriasm, asthma, convulsiones, infarctus mesenterii, ventris pigritiem, icterum, febres diuturnas, partum difficilem, lochia suppressa, abortum, &c. nonnunquàm excipit hic ingens abdominis tumor flatulentus, qui doloribus circa umbilicum in variis abdominis partibus, & in dorso, sævientibus stipatur : *quo procedente* accedunt cibi fastidium, nausæ & vomitus, æstus interaneorum, & sitis ingens ; anxietates & vigiliæ : insurgit tussis ; respiratio læditur ; pulsus fit frequens & inæqualis, cutis arefcit & alvus occluditur. Insuper irritâ flatus eructandi cupidine premuntur ægri, qui tamen senescente morbo omnia ingesta evomunt, & in merum ileum delabuntur, quem excipit integra virium prostratio & atrophia. Notandum incumbit flatus sub tympanitide haud semper in stomacho & intestinis coërceri ; sed haud rarò extrà hæc viscera & in ipso abdominis cavo contineri, vel, quod familiarius est, utrumque locum occupare. Si præcipuam in stomacho *sedem* habeat hic morbus ; rubore perfunditur facies ; ructus magis conducibiles faciliùs erumpunt, & epigastrica regio suprâ alias tumet ; adeò ut disrptionem minetur. Ab eâdem causâ oriuntur deglutiendi difficultas, suffocatio, palpitationes, anxietates & vertigines, &c.

Nemo nescit *flatulentiam* familiarissimam esse hypochondriacis & hystericis, litteratis & senibus, infantibus & mulieribus. Huic *obnoxii* censentur nephritici & arthritici ; cachectici & ærumnosi : hanc sovent cruditates acidæ & nidorosæ, alvus durior, profluviorum sanguineorum sufflamina-tio, &c. Promovetur à prægressis gravioribus morbis, ab hæmorrhagiis immodicis, à febribus intermittentibus præposterè curatis, &c. *Hanc pariunt* legumina, fructus cucurbitacei, pisces, pluraque alia notissima edulia. Cæterùm vigente febre extricantur moleculæ acræ non solùm è materièbus putridis in stomacho & tubo intestinali nidulantibus ; sed etiam ex

FLATULEN-
TIA ET
TYMPANI-
TES.

FLATULEN-
TIA ET
TYMPANI-
TES.

ipsomet sanguine, cujus receptacula sæpiùs, uti suprà notavimus, flatibus turgida reperiuntur.

Cohibita flatulentia graviores morbos inferre potest, colicam nempe, suffocationem, tympanitidem, ileum, apoplexiam, &c. *Meteorismus* hypochondriorum vel totius abdominis, intumescentiâ conspicuus, *februm pertinaciam* arguit, quæ nusquam fermè solvuntur, ni priùs ab hâcce materiâ expediantur primæ viæ: quod luce clariùs patet ab ingenti hisce febribus sublatorum abdominis inflatione. *Inter morbos ominosos* jure recensetur *tympanites*, quæ sæpiùs ascitis instar, ad menses protrahitur; nullamque curationem admittit, si ab intestinorum enormi & diuturniori dilatatione, horum tonus frangatur. Sitis, hâc procedente, suffocatio, corporis ambitûs & interaneorum æstus, tumor crurum œdematosus, urinæ lixiviosæ, vires prostratæ, animi abjectio, anxietates, lipothymix, extremorum refrigeratio, &c. pro gravioribus symptomatibus haberi; vel rudibus & inexpertis, obvium fit. E benè enim perspectis hujusce morbi prodromis, & symptomatibus, necnon auspicatori medendi methodo; tympanitidem merum esse affectum spasmodicum, in atoniam facessurum, facilè intelligitur. Ubi diutiùs protelatur tympanites, cum ascite implicari solet; & hinc *solutu difficilior* evadit.

Cadaverum sectiones exhibent stomachum flatibus ultrà modum turgidum, inflammatione vel sideratione tactum, & in quibusdam disruptum. Eamdem labem ostendunt intestina nonnunquam callo coarctata, vermibus infarcta, innumerisque tumoribus sæpiùs obducta; quæ aliàs parcissimam facum copiam recondunt. Sed ad hanc stupendam dilatationem proniora sunt cæcum & colon, quæ in nonnullis, femoris crassitiem æmulantur. Minor, majorve vermium copia reperitur in hisce canalibus, quorum gyri diversimodè etiam internecti deprehenduntur. Flatulentia, uti jam innuimus, in abdominis cavo, & extrà viscera nonnunquam colligitur; adeò ut in immensum tumens abdomen, primâ sectione subsideat & complanetur; ni intestina quamdam aëris copiam contineant. Semel duntaxat vidisse memini in tympanitide totam aëris massam à peritonæo cohiberi, planè inculpatis intestinis. Insuper in apicum venit hepar skirrhosum & putridum, contractum & induratum, cum cystide felleâ atrâ bilis ad crepaturam turgente: simili quoque modo quandòque afficitur lien, qui nunc mole amplissimus, nunc ità exiguus ut renem succenturiatum vix superet, observatur. Epiploon in quibusdam inflammatum; vel putredine planè absumptum, quasi desideratur. Pancreas skirrhosum, tabidum vel putridum detegitur; mesenteriumque infarctum deprehenditur. Quibus addere licet colluviem serosam in abdomine, parco tamen proventu stagnantem. Varias pulmonum, renum, aliorumque viscerum defædationes, parùm ad nostrum propositum pertinentes, consultò prætermittimus.

Ut recta ineatur *curatio*, ad compescendum interaneorum æstum, primasque vias lubricandas & laxandas, ut facilior fiat flatuum explosio, converteri debent clinicorum curæ. Hinc pluris habentur serum lactis, aqua pulli,

pulli, aliaque diluentia & vulgatiore; in quorum censum veniunt aquæ Vallenses, Reginenses, Meynenses, Monferinenses, cæteræque cognatæ, quæ proficue adhiberi solent. Suas laudes merentur temperantia; inter quæ, selectiora audiunt fumaria & cichorium; nitrum, tartarus vitriolatus, &c. A sanioribus Medicis abdicantur emetica; ni urgeant nausæ; sed faustè usurpari queunt laxantia, oleum nempè amygdalarum dulcium, manna, sal epsomense, rupellatum, &c. Opportunè dein exhibentur stomachica amara, inter quæ haud infimum locum obtinent cortex peruvianus; tinctura amara *Stoughton*; syrupus de absinthio, de gentianâ, &c. Suas laudes etiam merentur martialia, cautè, vel servatis servandis, exhibenda. Quod ad *carminantia* olim decantatissima, à nostris coætaneis posthabita, attinet; semina anisi & feniculi; flores chamæmeli, zedoaria, &c. haud inutilem, præmissis diluentibus, opem præstant. Hæc medicamina planè inepta ad demandatos effectus peragendos, nonnullis rationum momentis adducti, declararunt varii recentiores: sed horum opinionem firmioribus experimentis impugnavit clarissim. Hales, in rebus naturalibus perscrutandis nulli secundus. Ideò nùm flatus discutiant, vel pariant carminantia cæteris examinandum relinquimus; sed praxi edocti asserere minime dubitamus hæc medicamina ex aromaticorum classe petita, vi quâdam sedante pollere: haud latuit sanè Veteres hæc carminantium vis anodyna; cujus ratione, hæcce materias fragrantès purgantibus drasticis opportunè immiscebant: nec inconsultus erat hic usus, qui nescio quo fato apud recentiores jamdudum eviluit: ad summam, hypnoticorum & antispasmodicorum, quæ haud rarò sub hâc rerum conditione vetantur, vices supplere valent carminantia. Postremò incassum adhibitis remediis suprâ traditis, ad venæ sectionem confugere licet; dummodò vires & ætas ferant: proficue verò adhibentur per totum morbi stadium enemata emollientia, purgantia & carminantia; balnea, foci emollientes, anodynî & aromatici, cucurbitulæ siccæ abdomini impositæ, &c.

Cùm tympanites ultimus flatulentiae gradus audiat, eâdem ferè mendendi ratione impugnatur; ni præ gravioribus symptomatibus exquisitiore remedia expostulet. Quamobrem crebro usu recepta sunt diluentia, lubricantia & temperantia, de quibus suprâ. Nonnulli penès quos sit fides aquam gelidissimam summis laudibus extollunt. Pro votis succedere solent laxantia; inter quæ præstare videtur oleum amygdalarum dulcium, bis per diem exhibitum: sed imparia plerumque sunt emetica superando morbofo obici; hinc satius est ab illis abstinere, ne irritentur crabrones. Expeditis, ope diluentium & laxantium, primis viis, opportunè exhiberi queunt stomachica, roborantia & carminantia: salvia nempè, chamædrys & enula campana; vinum Hispanicum, extractum juniperi; elixirum proprietatis, &c. hunc morbum etiam respiciunt antispasmodica, melissa nimirum, castoreum, assa fœtida, aqua florum aurantiorum, &c. sed hæcce remedia nil sapius præter quoddam juvamen præstant; cur sit ut ad efficaciora, quæ scilicet intimiora corporis penetralia adire valeant, sit

FLATULEN-
TIA ET
TYMPANI-
TES.

confugiendum : quam opem præstant aperientia & diuretica ; ceu sal tartari & genistæ , tartarus martialis & arcanum duplicatum , saponacea & martialia , quibus fortè præcellunt aquæ Vallenfes , Forgienses , Passienses , &c. Nonnullis profuit sanguinis detractio ope phlebotomi , vel hirudinum : sed notare juvat quòd sæpiùs ab intempestivis venæ sectionibus fatum acceleretur. De antiscorbuticis , antivenericis , aliisque præsiidiis , quæ pro re natâ in subsidium vocari queunt , nil addimus.

Quoad *remedia externa* , quæ internis obsecundare solent , parantur foris emollientes , cataplasmata , &c. Nonnulli nivem vel glaciem contusam imò ventri imponunt : sed cum hocce topico cautè mercari expedit ; quod tamen haud infelici successu , me detrectante , suasit circumforaneus quidam. Tutiùs sanè celebrantur frictus cum pannis calidis , cum oleo amygdalarum dulcium camphorato , &c. quibus omnibus irritis , & imminente interitu , ad opem chirurgicam devenire nil vetat. Nullum quidem est dubium quin *paracentesis* apprinè congruat : ubi flatus extrâ viscera colliguntur ; & plures fortè supremum diem obierunt , qui hocce auxilio sani evasissent. Equidem nullâ hactenùs notâ arte dignoscitur hic casus : sed in re ancipiti & urgentissimâ , nonne satiùs est experiri remedium quàm nullum : nec constat prætereà lethalem fore hanc operationem , etiam vulneratis intestinis ; quin potiùs innumeræ prostant observationes chirurgicæ , quæ contrarium arguere videntur : adde quod temeritas nonnunquàm præstat , quod prudentia nequit.

V E R M E S.

NEMINEM latet *lumbricos* , *ascarides* , *cucurbitinos* & *teniam* esse hostiles primarum viarum incolas : ut sileamus de variis infectis à naturali rerum ordine alienis , quorum accuratam historiam tradiderunt VANISLIERI , ANDRY , LECLERC & BIANCHI , qui hanc materiam penitùs exhaustisse videntur ; quæ ut verum fatear rem potiùs physicam , vel naturalem , quàm medicam respicit. *Lumbricos* à sexto ætatis anno ad pubertatem familiares , sed nulli ætati parcentes , *produnt* halitus acidus , cibi fastidium , vel fames inexplibilis ; ptyalismus noctu erumpens , ore interdium remanente sicco ; oculi flammei , genarum livor ; dentium strepitus inter somnum ; vel peculiaris labiorum & faucium motus deglutitionem æmulans ; sudores nocturni graveolentes ; terrorque inter dormiendum quo subito expergiscuntur ægri. Intereà insurgunt vomitus , cardialgia , borborygmi ; molestissima punctiõis vel erosioni sensatio , pastu compescenda , tenesmus , fluidæ & albicantes dejectiones ; tussis , singultus , &c. abdomen tensum , nunc in altum elevatur , nunc deprimitur , & ultrâ modum complanatur. Excandescit in quibusdam febris , cum horroribus

inordinatè recurrentibus ; pulsus in aliis æqualis & obscurus deprehenditur ; imò & nonnunquàm planè obliteratur. Hiscè notis adjicere licet , varia symptomata à verminosâ progenie oriunda ; ileum nempè , suffocationem , vertigines , insultus convulsivos , affectus comatosos , stupiditatem , delirium , aphoniam , cæcitatem , paralyfim , syncopem , &c.

Cæteris signis vel evidentioribus palmam præripiunt ipsimet vermes per os , narefve ejecti , vel per podicem foràs deturbati , è quo nonnunquàm agminatim prodeunt. Sed sæpiùs desideratur hoc indicium , eò quòd vermes in primis viis enecati brevi putredine solvuntur ; undè nil præter materiam viscidam & glutinosam fæcibus immixtam , egeritur. Tanto sæpiùs impetu ingruunt *insultus verminosi* , sensationes impedièntes , ut pro genuinâ apoplexiâ habeantur ; ni attendatur ad pulsum contractum & extremorum refrigerationem , quæ genuinæ causæ suspicionem movent : sed difficiliùs distinguuntur vermium accessiones convulsivæ , infantibus familiares , ab epilepsiâ , adeò ut *Œdipo* sæpiùs opus sit ; ni à benè perspectâ morbi historiâ , ejus expiscetur indoles. Vermes prætereà inter graviorum morborum symptomata numerantur : horum enim genesim fovènt variolæ & morbilli ; non secùs ac febres putridæ , malignæ , petechiales , epidemicæ , &c. quæ hinc à medicâ plebe verminosæ dicuntur. Lumbrici nonnunquàm perterebrant stomachum & intestina , è quibus exitum sibi parant , & in abdominis cavum devolvuntur ; vel ulteriùs pergendo , peritonæum , musculosque abdominales perforant : in corpore adiposo nidulantes phlogosim accersunt , in abscessum facessuram ; è cujus sectione prodeunt vermes , quod pluriès accidisse circà umbilicum & inguina , testantur scripta medica.

Ascarides , caseosorum vermiculorum instar , teretes & exigui , unà cum fæcibus alvinis excreti , oculis visendi , se præbent. Intestinum rectum obsident ; hinc tenesnum vel pruritum molestissimum in podice concitant. Tanto sæpiùs agmine hanc speluncam infestant , ut alvo non referatâ , exitum sibi parent , & vicinas partes defœdent. *Cucurbitini* sic nuncupantur , ob cucurbitæ feminis formam , quam sat accuratè referunt : magis sunt conspicui quàm ascarides ; tæniæque signum haud infidum præbent. Distinctâ serie invicem quandòque hærent , & concatenantur ; qui simul juncti ægrè dissociari patiuntur. Pruritum quandòque molestissimum hæc pariunt insecta in ano , qui ipsis viventibus , æquè ac ascaridibus , etiam retentis fæcibus egressum largitur.

Tania , vel folium , *le Solitaire* , est vermis latus & depressus , innumeris nodis distinctus , stupendæ longitudinis , & in primis viis hospitans ; hujusce insecti accuratæ descriptiones , iconesque nitidissimæ prostant in variis libris. Vix tamen constat de ejus longitudine ; cùm nusquàm integer excernatur hic portentosus vermis , quem ad viginti quinque ulnas Gallicas accedere , conjicere licet : imò & hanc mensuram quandòque superare testantur *PLINIUS* , *TULPIUS* , *RUISCHIVS* , *BOERHAAVIUS* , &c. Solitarium esse hoc insectum vulgò fertur : nullum tamen est dubium quin plura hujusce

VERMES.

fortis occurrant in canibus, nonnullisque aliis quadrupedibus: multiplicem etiam fuisse in homine, variis rationum momentis adducti, nonnulli conjiciunt. Capite quodam donari prædictum vermem ex iconibus & descriptionibus colligitur; quod tamen nusquam inter innumeros nostro examini subiectos, vidisse contigit: quin potius illum in sectione cadaverum, utrimque acuminatum reperimus: sed illud dubium in medio relinquimus, ut ad certiora properemus.

Obscura sanè est solii & cucurbitinorum affinitas: liquet tamen, uti jam innuimus, horum excretionem, illius præsentiam arguere. Sed haud defunt alia *signa* quibus se prodit hic molestissimus incola: id genus sunt nausæ, cibi fastidium vel voracitas, os fœdum, ructus acido-nidrosi, sputatio frequens, & nausæ; faciei livor, visus debilitas, quadam gravitatis sensatio in abdomine; dolores qui nunc stomacho, nunc hepati vel dorso infigi videntur; dejectiones mucidæ & torminosæ, &c. imus venter in nonnullis mulieribus, in altum attollitur; depravatur appetitus, & sufflaminantur menses; adeò ut pro utero gerentibus nonnunquam habeantur. Graviores demùm promovet symptomata hic insensibilis vermis, lipothymias nempe, cephalalgiam contumacissimam, vertigines, convulsiones, affectus comatosos, &c. Per totum intestinorum tractum porrigitur tænia, quæ haud rarò ab stomacho ad fauces ascendit, haud sine ægrotantium anxietate & terrore: nec defunt qui ejus frustra amplissima foràs per vomitum deturbant. E gravioribus postremò morbis convalescentes pristinae sanitati ægrè restituuntur, si tæniam gestent.

Quoad *prognosim*; è jam traditis obvium fit grave quandòque periculum portendere *lumbricos*, ob paralysem scilicet, maniam, convulsiones, epilepsiam, ileum, aliaque atrociora symptomata, quæ accersere queunt: emunctoria nutricum organa nonnunquam exhaustiunt; tantamque sævitiam, præsertim rubri, cæteris longè ferociore, quandòque exercent, ut *febres* periculosissimas, *verminosas* jure nuncupatas concitent; sed in hunc censum minime venire febres putridas & malignas, quæ vermium progerminationi favent; jam suprà notavimus; sub quibus benè ominandum, si per podicem expellantur: sed aliter se res habet, ubi per os foràs elutiantur; præsertim si secum devehant laticem subatrum & fœtidum. Periculo vacant *ascarides*, qui molestam duntaxat sensationem in podice concitant. *Cucurbitini* haud ominosi per se censentur; sed tanquam tæniæ prodromi haud levem terrorem incutiunt. *Lumbricus* verò *latus*, quem congenitum plures arbitrantur, atrociora movet symptomata, quæ pro totidem morbis periculosissimis haberi debent: præter enim jam recensita; febrem lentam, marasimum, hydropem, ascitem, tympanitidem, &c. post se trahit. Ex eodem fonte nonnunquam prodire pleuritidem nonnulli existimarunt: an rectè? solertioribus pensandum relinquimus.

Autopsia anatomica exhibet *lumbricos* in faucibus & œsophago, in stomacho, & passim per totum tubi intestinalis tractum. Nonnunquam inclu-

duntur prædicti vermes intrâ folliculos diversæ molis, vel in glomeramen denso agmine convolvuntur, quo haud rarò obturatur tubus intestinalis. Subeunt in nonnullis ductum biliarem vel pancreaticum; inibique impediti deprehenduntur. Occurrunt in cavo abdominis, in abscessibus, &c. Pluriès tamen evenit ut post integram dissolutionem, ne minimum quidem horum vestigium percipiatur, præter mucum quemdam, in quem facessunt. Reperiuntur postremò phlogoses, pustulæ à tunicâ villosâ prognatæ; purulentia & putredines in stomacho, & in intestinis; horumce invaginationes, &c. Quod ad *ascarides* & *cucurbitinos* spectat, nusquam post obitum conspiciuntur; nullæ horum annotantur reliquiæ. *Tania* verò, haud immutatâ formâ, in stomacho & intestinis reperitur; & non secus ac lumbrici, apicem superiorem in ductum choledocum quandòque immittit: ut fileamus de variis viscerum læsionibus, quæ à jam exaratis minime discrepant, & mera audiunt producta morbosa.

In immensum cresceret pagina, si omnia hùc attexeremus *anthelmintica* ab Authoribus tradita; inter quæ nonnulla, etsi celebriora, occurrunt de quorum viribus, multis experimentis suffulti, planè dubitarunt primi subsellii scriptores; quibus verò alii haud inferioris notæ, praxi edocti, refragantur; adeò ut adhuc sub iudice lis sit. Sed missis hisce controversiis, selectiora duntaxat vel usitatiora ex immensâ vermifugorum farragine, pro instituto depromemus. Primatum sanè ducunt *purgantia per alvum*, rheum nempè, folia alexandrina, jalapium, aloë, diacrydium, pulvis Cornachini, sirupus florum persicorum, trochisci alhandal, confectio Hamec, &c. quæ non modò vermes enecare queunt; sed etiam, vel vivos, foràs eliminant. Catharticis minime cedunt *mercurialia*, vermium hostes infensissimi: aquila nempè alba, panacea, æthiops mineralis, &c. Sed parùm fidendum decocto hydrargyri ex aquâ, vel quâvis ptisanâ, quod infantibus ad vermes enecandos pro potu ordinario præscribi solet. Haud infimum locum in anthelminticorum ordine tenent *amara*; ut semen fantonicum, abrotanum, absinthium, tanacetum, gentiana, nuclei persicorum, &c. Pluris etiam habentur *absorbentia*; corallum scilicet, cornu cervi præparatum, &c. Viribus specificis pollere videntur *olea* ex olivis, nucibus & amygdalis expressa; petroleum, assa fœtida, &c. quæ respirationis, uti fertur, spiracula obstruendo, vermes interimunt. His addere licet saponem album qui, cæteris consentientibus, dosi congruâ, ad plures scilicet drachmas singulis diebus, pluribus optimè cessit. Suum gradum etiam obtinent, in vermifugorum censu, acida; omphacium nempè, succus limonum, spiritus sulphuris, &c. Nonnulli demùm aquam gelidissimam, quæ vermibus adversari dicitur, summis laudibus extollunt; nec fortè immeritò: ut de vino, cepâ, allio, theriacâ, aliisque innumeris à plebe & mulierculis celebraris conticeamus.

Nec inutilem opem præstant *remedia externa*: proficue enim injiciuntur enemata è lacte & saccharo, quibus alliciuntur vermes, & versùs inferiora ducuntur; vel è decocto filicis, gratiolæ, absinthii, tanaceti, &c.

VERMES.

parata; quibus adduntur oleum nucum vel olivarum, theriaca, &c. Admoventur epithemata, quorum compositionem ingrediuntur aloë, myrrha, fel bovinum, succus absinthii vel centaurei minoris, petroleum, unguentum de arthanitâ, fuligo, &c. Hisce materiebus etiam confici solent suppositoria longè sanè efficaciora. Hæc sunt vermifuga interna & externa à sanioribus Medicis adhiberi solita: nusquàm tamen, uti evidens est, indiscriminatim sunt usurpanda; quin potiùs ob diversum effectum quem exerunt, selectu pro circumstantiis opus est: viterur imprimis horum ineptum connubium; cùm pleraque mutuò colluctentur, vel invicem contranitantur. Sed ad demandata munia peragenda inepta censerì debent hæc utriusque fortis medicamina, si vermes cuicumque febris mali moris natales debeant: quo in casu urgentiori sanè succurrendum; haud posthabitis, dein vermifugis, quæ opportunè in subsidium vocari queunt.

E notâ *ascaridum* sede facilè intelligitur parùm conferre remedia interna; si tamen excipias cathartica aloëtica, hisce enecandis & foràs abigendis apta. Sed præsentaneam opem ferunt *enemata* ex oleo, colocynthide, mercurialibus, &c. parata: quorum vires æmulantur, & fortè superant suppositoria è lardo, vel gossypio confecta, unguento neapolitano illita; vel in fel bovinum, aloës solutionem, &c. priusquàm indentur, immersa. Nec hisce remediis supersedendum, etiam fugatis ascaridibus; cùm innumera relinquant ovula, quæ ferius ocyùs stupendum horumcè insectorum proventum edere solent; ideò aliquandiù protelari debet curatio, ut *nova præcaveatur genesis*.

Inutilem opem præstat potior prædictorum vermifugorum pars, adversùs *tæniam* & *cucurbitinos*: sed proficuè adhiberi queunt *emetica* & *cathartica*; tartarum nempè stibiatum, vel vinum emeticum, aloë, diacrydium, mercurius dulcis, &c. Pro specificâ venditur *radix filicis*, cujus pulvis ad drachmam unam vel alteram, ex melle vel vino in adultâ ætate, præscribitur; postridiè exhibito cathartico. Cum filice viribus convenire radices mori plures arbitrantur, quas à drachmis duabus ad duplum, in decocto aqueo præcipiunt pro duobus dosibus, manè & serò hauriendis: quo medicamine alvum nonnihil solvi fertur. Silentio minime premere debemus anthelminticum adversùs *tæniam* in diario Medico anni 1757, pag. 305; & 1761, pag. 214, laudatum; quod nil aliud est quàm oleum nucum cum vino Hispanico, vulgò *d' Alicante*, mixtum. Alia ad lumbricum latum proponuntur remedia quæ multis optimè cessisse videntur; semen scilicèt rutæ, corallina, æthiops mineralis, martialia & aquæ minerales ferri participes, &c. quæ, etsi diversæ naturæ, proficuè adhiberi queunt; dummodò horum usus à juvantibus & lædentibus dirigatur: plura addere vetat angustior pagina.



COLICA HEPATICA.

COLICA
HEPATICA.

SCITUR vesiculam felleam, aliaque bilis receptacula esse hujusce morbi acerbissimi *sedem*: inibi enim concresecunt pseudo-lapides, qui vel mole & figurâ hæc laceffunt organa; vel hosce tubos obturando, impediunt quominus bilis solitum alveum petat: eundem effectum præstat lenta & glutinosa bilis, quâ infarciuntur prædicta emissaria. Hinc fit ut vesicula & canales biliares suprâ obicem, ad crepaturam, ob bilis regressum, dilatentur; undè dolor emergit acutissimus. Nec semper ab obstructo vase secretorio, laticis amari fluxus intercipitur; sed sæpius comprimitur prædictus canalus à mole infarcti pancreatis, vel à quovis alio tumore vicinarum partium: nonnunquàm etiam constrictione spasmodicâ ità coarctatur, ut bili ad duodenum appellenti ingressum planè deneget: nec ab hac affectione spasmodicâ immunis est tubus intestinalis, quâ ità constringitur canalus biliaris ostium, ut ne guttam quidem bilis eructet. Cognitu difficilem sæpius esse *colicam hepaticam* jam suprâ notavimus: varia tamen se produnt *signa* quæ hunc morbum proferre queunt; nempe æstus plus minúsve molestus circâ partem affectam; dolor & renitentia hypochondrii dextri & proximioris epigastricæ regionis; flatulentia, nausea & vomitus, anxietates, præcordiorum & pectoris angustia, &c. Intereà tormina, quæ nunc stomachum, nunc renes, aliàs dorsum obsidere videntur, atrociores exacerbationes patiuntur. Quibus sævientibus *febris* excandescit, & nonnunquàm ad duodecimum vel decimum quartum diem protrahitur: in quibusdam tamen pulsus apuretus observatur, & febris nonnisi fugatis doloribus exsurgit, haud ultrâ biduum persistens. Facies in plerisque colore flavo vel subviridi perfunditur; vel in genuinum icterum incidunt ægri. Alvus utplurimum obturatur; vel clysmatum ope egeruntur excrementa caprinis simillima: urinæ sufflaminantur, vel parcè fluunt, & non nisi post insultum, turbidæ & lutulentæ minguntur. Plerique demùm ægri *pseudo-lapides*, vel concretiones biliosas, diversi coloris, leves, inflammabiles, & in aquâ calidâ solubiles, tum per vomitum, tum per alvum excernunt. Calculum biliarem ad ovi gallinacei magnitudinem accedentem per sedes expulsum se vidisse testatur clar. IMBERTUS.

Notare expedit vesiculam felleam à retentâ bile in tantam molem quandoque assurgere, ut *tumor extûs promineat*, quem pro abscessu nonnunquàm habent imperiti; licet tumor à bile magis sit circumscriptus, & ejus fluctuatio, ineunte morbo, sit magis evidens. Prætereà sedes tumoris, color albicans dejectionum, lotium saturatè flavum, oris amarities cum siti intensâ, & nonnunquàm color icteritius, hujusce tumoris indolem produnt. Cujus erroris immeritas pœnas luunt miselli ægrotantes, qui post præposteram sectionem fistulâ, nullâ arte exhauriendâ, conficiantur;

COLICA
HEPATICA.

vel bilis profusione in cavum abdominis ad libitinæ rationem ducuntur. Nec semper facile est verum à falso extricare, cum uterque tumor iisdem fermè phænomenis stipetur; imò & quandòque implicentur prædicti morbi; nam præviâ abdominis inflammationem nonnunquàm sequitur hic vesiculæ infarctus: hinc minime mirum si ab incautis pro abscessu habeatur: de quibus plura notatu digna legere est, in primâ & tertiâ collectaneorum Chirurgicorum parte. Alii insuper passim exsurgunt tumores ex eodem fermè fonte oriundi; ubi scilicèt inflammata & exulcerata cystis fellea dilaceratur, & latici bilioso egressum largitur, qui contextum cellulosum subiens latè spargitur, ac sæpiùs phlogosum & abscessum extùs prominentem in hâc vel illâ abdominis parte concitat; è quo aperto pus unâ cum bile educitur; nonnunquàm etiam prodeuntibus concretionibus biliosis; undè emergit ulcus fistulosum ab indefinente bilis fluxu nullis repagulis coercendum.

Colica hepatica haud rarò periodicè recurrit singulis scilicèt septimanis, mensibus, annis, &c. paroxysmi stadium intrâ aliquot horas continetur; aliàs ad unum vel alterum diem & ultrâ cum nonnullis tamen induciis prote-latur. In ancipiti versatur hujusce morbi *eventus*, qui graviores morbos quandòque infert; phlogosum nempè hepatis, ictèrum, febrem lentam, hydropem, phthisim, tabem, &c. Sæpiùs tamen brevi vel spontè evanescere è clinicorum relatu colligitur, sed nùm semper genuinam colicam hepaticam pertractaverint, dubitare licet; quandoquidem hepar, non secùs ac alia abdominis viscera, affectu merè spasmodico sæpiùs laboret, qui colicam hepaticam accuratè mentitur; imò & sæpiùs ictèrum fugacem post se trahit. Nonnunquàm evenit ut colica hepatica, sub primo conspectu, vix discrepet à nephritidè, ad quam converti solent clinicorum curæ; qui solis cadaverum extispiciis à veri tramite se recessisse tacitâ mente revolvunt.

Sectiones anatomicæ minorem vel majorem calculorum biliarium proventum patefaciunt: de trecentis repertis in vesiculâ felleâ, quorum nonnulli avellanæ magnitudinem æquabant, mentio subjicitur. Non rarò observantur prædicti *pseudo-lapides*, qui molem castaneæ superant, vel ad uncias duas, & ultrâ, accedunt; ac ideò totum cystidis cavum replent. Prætereâ illud receptaculum bile glutinosâ, vel tenacissimâ, sæpiùs scatet; aut vermes, hydatides, &c. recondit: in quibusdam crustâ quasi lapideâ obducitur; vel variis sepimentis in cellulas dividitur. Aliàs in immensam molem exsurgit prædictus folliculus, ob uberrimum scilicèt bilis proventum ad quatuor, sex vel octo libras accedentem. Eamdem dilatationem patiuntur ductus biliares; qui aliàs à lapidibus, vel vermibus, sæpiùs, obstructi reperiuntur. In propatulum venit hepar skirrhosum, inflammatum, purulentum, putridum, &c. in nonnullis protuberat infarctum pancreas, cujus mole comprimitur ductûs communis osculum: similem effectum exerunt alii tumores à mesenterio, tubo intestinali, &c. prognati. Haud dubitare licet quin jure incusetur colica hepatica sub conspectu prædictarum lésionum: minime tamen conticendum eamdem stragem conspici in cadaveribus variorum, qui

qui dùm viverent , prædictæ colicæ planè fuerunt nescii , quid hinc sit inferendum solertiorum examini submittimus.

COLICA
HEPATICA.

Eâdem fermè methodo *curari* solet colica hepatica , ac cætera imi ventris tormina. Haud profutura ; vigente paroxysmo , remedia bilem moventia , è præhabitis confectarium manet ; quæ tamen præsidia , superato paroxysmo , proficuè adhibentur ; cùm horum scilicèt præsidio reditus præcaveatur. Ineunte morbo quantocyùs *tundenda est vena* ; sibi enim par non habet illud auxilium ad declinandam imminentem phlogosim. Incunctanter etiam sunt propinanda diluentia & demulcentia , aqua nempe pulli , serum lactis , emulsiones , oleum amygdalarum dulcium , & sperma ceti ; infusum florum althææ , seminum lini , &c. Nec minùs profunt , remittentibus doloribus , laxantia ; cassia nimirùm , manna , tamarindi , &c. quibus incassùm adhibitis , ad narcotica confugere expedit ; inter quæ usitatiora audiunt syrupus de papavere albo , utrumque laudanum , aliaque consimilia , quibus dolores conquiescunt. Præsentaneam etiam opem ferunt in singulis morbi temporibus enemata emollientia & anodyna , cum oleo , butyro , althæâ , malvâ , feminibus lini , &c. nec posthabenda fots & cataplasmata , balnea , semicupia , aliaque topica , de quibus suprâ ad nauseam. In re demùm urgentissimâ , vel ægro in extremum vitæ periculum adducto , vesiculam felleam extùs protuberantem , CELSI effati haud immemores , pertundendam esse censemus ; licèt exigua circâ hanc operationem versetur curationis spes.

Sublato morbo , aliud curanti impendit munus , ut scilicèt ejus reditum præcaveat. Sub hoc conspectu in usum vocantur laxantia , quibus præstare videtur rheum. Insuper gramen , aselli , nitrum , martialia , saponacea , aliaque diversæ fortis aperientia & diuretica , vel bilem moventia ; omnem , uti suprâ innuimus , implent paginam. Suas laudes etiam merentur absinthium , chamædrys , gentiana , cæteraque amara , quæ peculiarem affinitatem cum hepate habere dicuntur. Sed omnibus hisce remediis palmam sanè præripiunt aquæ minerales frigidæ & thermæ ; Vallenfes putà , & Passienses , Vicienses , Plumberianæ , Bellilucanæ , &c. Nonnullis postremò profunt lacticia , quæ , cæteris consentientibus , aliorum *prophylacticorum* , vel exquisitiorum , vices explere valent.



HEPATITIS.

H E P A T I T I S.

Sic vocitari *hepatitis inflammationem* nemo nescit ; quæ vel totum viscus impetit , vel cuidam ejus parti insidet. Nunc solum hepar læditur ; nunc vicinæ partes in consensum trahuntur ; cur fit ut sub diverso intuitu se præbeat hic affectus , ægrè sæpiùs à cognatis distinguendus. Ab horrore & rigore exordium capit hepatitis , quos excipit febris acuta ; quâ procedente conqueruntur ægri de æstu & dolore gravativo hypochondrii dextri , quod renitet & nonnunquàm prominet. Alvus sub hoc morbo , nunc obturatur , nunc solvitur ; cum torminibus & dejectionibus biliosis. Parcâ copiâ minguntur urinæ croceæ & turbidæ. Facies pallore subviridi , ab expertis notissimo , perfunditur. Lingua primò arida , sensim amurcâ quâdam subflavâ , vel nigricante obducitur ; sitis urget , tussis insurgit , respiratio fit difficilior ; ingruit singultus , ac mens obnubilatur : nonnulli demùm in icterum delabuntur.

Notandum incumbit quod nausæa & vomitu plerùmque vexentur ægri ; præsertim si lobus hepatis ventriculo incumbens afficiatur : sub quo casu de *morbi sede* sæpiùs dubitant clinici , vel oculatiores. Ubi verò phlogosis convexam hepatis superficiem occupat , dolor ferocior ad scrobiculum cordis porrigitur , aut versùs pectus se diffundit ; imò & ad claviculas , scapulasque pertingit ; cur fit ut ægri in latus affectum decumbere nequeant ; undè pleuritidem mentitur hic affectus. In musculos abdominis sæpissimè etiam disseminatur dolor ; hinc de horumce organorum phlogosi , haud levis emergit suspicio. E benè perspectis tamen singulorum horum morborum signis facile est expiscari , affectûs de quo in præsentiarum , naturam & sedem ; dummodò hepatitis viciniorum viscerum phlogosim haud sibi comitem adjungat : aliàs in ancipiti versari , vel arduæ esse indaginis morbum implicitum candidè fatemur.

Ubi *hepatitis ad suppurationem* vergit ; dolor cum pulsatione recrudescit , æstus fit intensior , parsque affecta magis renitens protuberat. Tùm horrores exsurgunt inordinati ; ac *febris* exacerbatur ; donec à confecto pure , vel disrupto abscessu , in lentam , frequentiori lipothymiâ stipari solitam , faceßat. In propatulo fit puris fluctuatio , si *abscessus* in parte anticâ hepatis situm habeat : sed cavendum , uti jam inculcavimus , ne intumescens vesicula fellea pro puris collectione habeatur. Aliàs abscessus altè immersus tactum planè fugit. Silentio prætermittere minime debemus , pus clanculariè sæpiùs in hepate confici , absque præviâ , uti videtur , inflammatione ; post variolas scilicèt , febres mali moris , &c. Purulentiam etiam notu difficillimam pariunt icterus & chronica hepatis obstructio , quam produnt tussis nonnunquàm ferocior , sed intermittens ; & tabes : non secùs ac vetus hujusce partis contusio. Hoc infortunium deni-

quæ accerfunt ulcerum capitis, cæterarumque partium, exsiccatio; eruptionum retrocessus, &c. Notare juvat quod ab obscurâ hâc puris genefi sæpè emergat abscessus immensæ molis; quantum vidisse memini in viro quinquaginta annorum, & habitûs athletici, qui abhinc biennio, post repulsum herpetem, tumorem in hypochondrio dextro gestabat, qui sensim tantum incrementum sumpsit, ut dimidium abdominis occuparet, haud sine molestâ spirandi difficultate; donec pus viciniora sensim confodens, trans diaphragma, viam ad pectus sibi cuderit; undè emerfit stupenda, vomicæ instar, puris evacuatio, quâ viribus exhaustis post quatrîdium occubuit misellus æger. Hæc materia ad sex vel octo libras adstantium judicio accedens, sæcum vini colorem & crassitiem referebat, ac tantum fœtorem spargebat, ut totas ædes tetro odore infecerit.

*Inter calamitosos morbos jure recensetur hepatitis: quædam tamen subest curationis spes, si phlogosis externam hepatis partem, certis terminis coercita, invadat: sed ubi aliùs defigitur & latè se spargit; agrum in orci fauces præcipitem trahit. Nonnunquàm aliarum inflammationum instar resolutione judicatur: sed sæpiùs in abscessum facessit, vel skirrhum post se trahit, quibus imminet interitus. Delirium, materierum nigricantium vomitus, lipothymia, singultus, sudores frigidi, &c. exitium portendunt. Si demùm dolores, cæteris persistentibus symptomatibus, subitò evanescant, ad libitinarium mittere licet. Hæc inflammatio, resolutione solvenda, haud ultrà trîdium quatrîdiumve protelatur: si verò ad septimum diem protendatur, de purulentiâ & infarctu skirrholoso nullus est ambigendi locus. Maximum fanè impendet periculum à confecto abscessu: haud tamen animo planè despondendum; cùm nonnunquàm accidat ut spontaneis naturæ viribus fiat puris evacuatio per vomitum, vel per sedes. Haud rarò etiam tabum resorptum mingitur; vel sputa purulenta promoventur: sed tùm imminet pulmonum exulceratio vel phthisis; præsertim si à partium intermediarum erosione, latex purulentus in hepar collectus, recto tramite pulmones adeat. In potiori agrorum parte, pus disrupto abscessu intrà cavum abdominis profunditur; undè emergit *ascites purulenta*, quâ brevi contaminantur abdominis viscera; undè febris lenta, marasmus, &c. Abscessu in quibusdam extùs prominente, tabum, felicissimo fanè eventu, exitum per cutem sibi parat; undè emergit ulcus post nonnullos menses tralatiis Artis Chirurgicæ præsidiiis agglutinandum. Coronidis loco addere licet abscessum, ab hepatis phlogosi ortum, proximum minari exitium; diuturniorem verò evadere, si morbo chronico natales debeat.*

E sectione cadaverum in apricum venit hepatis inflammatio; nunc angustis cancellis coercita; nunc latè diffusa: portentosum sæpiùs deprehenditur hoc viscus, vicinioribusque partibus accretum, abscessum vel plures diversæ molis recondens. Ab erosione partibus intermediis patet puris commercium cum pulmonibus, stomacho & intestinis: tabum nonnunquàm in intestina eructat ductus biliaris; nec desunt hujusce phænomeni exempla: sed sæpiùs reperitur abscessus integer variæ magnitudinis; vel præviâ dilacera-

HEPATITIS.

~~HEPATITIS.~~ tione in abdominis cavum hians. Hepar prætereà exulceratum, fideratum; vel putredine confectum deprehenditur; vel sacci instar vacuum & collapsum reperitur. Obvium in quibusdam fit tabum in suo receptaculo concretum vel exsiccatum: in aliis pure scatet cystis fellea; costæ carie laeduntur, &c. Diaphragma demùm, pleura & pulmones, phlogosi, purulentiam aut gangrænam sapius defœdantur. Eamdem labem præ se ferunt stomachus, intestina, pancreas, epiploon, renes, &c. Ut de variis stagnationibus saniosis, purulentis & fœdissimis, in pectoris & abdominis cavo, crebrò occurrentibus fileamus.

Sub hâc inflammatione, non secus ac in aliis internis, à venæ sectione auspicanda est *curatio*; quæ pro ætate & viribus pluriès iterari debet; dummodò haud ultrà quatridduum, ni urgeat necessitas, proteletur. Nec minùs conferunt diluentia, demulcentia & temperantia; serum nempè lactis, aqua pulli vel vituli, emulsiones, decoctum ex agrimoniâ & herbis cichoraceis paratum, sperma ceti, &c. Pluris habentur sedantia è nitro & camphorâ deprompta: sed cautè præscribi debent hypnotica, quæ torporem inducendo infringunt vires vasorum hepaticorum, quorum infarctus diutiùs protelatus skirrhosam indolem contrahere solet. Ubi dolores mitescunt & remittunt symptomata, circa scilicèt sextum vel septimum morbi diem, proficuè adhibentur laxantia; cassia nimirum, manna, &c. A nonnullis laudantur sudorifica, & præsertim antihecticum Poterii: sed cautè cum hisce remediis mercari expedit; ne ab horum præpostero usu sanguis plus æquo excandescat: levem opem etiam conferunt vulneraria & balsamica; ni de hepatis exulceratione constet.

Quoad *remedia externa*; crebrò injici debent enemata emollientia & laxantia: suppetias ferunt fots, cataplasmata, aliaque topica emollientia resolventia & maturantia, pro re natâ & vario morbi statu usurpanda. Ubi verò abscessus ante oculos versatur, vel digitis contrectatur, nullum est dubium quin ferro vel caustico maturè sit aperiendus: hæc operatio quam pluriès celebrandam curavi, periculo vacat, dummodò abscessus partibus secandis connectatur: aliàs metus est ne quædam puris portio intrà abdominis cavum, pessimo ægrotantium damno, profundatur. De ictero, skirrho, ulcere, aliisque hepatitidis reliquiis nihil addimus; cùm de singulis hisce affectibus, à quâvis causâ oriundis, alibi actum fuit.



I C T E R U S.

ICTERUS.

PRÆTER cutis & conjunctivæ colorem flavum, quo singulis obvi-
 patet hic morbus, qui aliàs *aurigo*, *morbus regius*; & nostratibus *la jaunisse*
 audit, aliis signis se prodit; totius nempe corporis pruritu, ore amaro,
 inappetentiâ, urinâ croceâ vel fuscâ quæ è longinquo adspicienti subnigra
 videtur; subalbican- tibus alvi dejectionibus, &c. Objecta nonnunquam
 lutea ab agris percipiuntur; saliva & sudor similem quandoque referunt
 colorem, quo etiam infici omnia viscera docet sectio cadaverum. Vomi-
 tus, cardialgia, anxietates, dolor & renitentia hypochondrii dextri; spi-
 randi difficultas, lassitudo spontanea, lipothymia, &c. vulgati- ora audiunt
 symptomata quibus stipatur *icterus*, qui febrem haud rarò comitem habet:
 aliàs pulsus tardus & debilis exploratur. Cutis hoc senescente morbo,
 colore plumbeo, vel cæruleo-viridi, livido aut fusco defœdata, oculis
 nunc intensè flavis, nunc quasi coloris fuliginosi; urinisque colorem castet-
 i referentibus, *icterum nigrum* exhibet, in quem flavus face-ssere solet: cujus
 causa erui debet à bilis porraceæ corruptione; quæ hinc ad acidum vergit.
 Sed pro ictero nigro minime haberi debent maculæ nigræ scorbuticæ, fa-
 ciem aliamve partem deturpantes, cum aurigine legitimâ; nec color ille
 fuscus nonnullis melancholicis familiaris, qui splenis vitio laborare dicun-
 tur; qui affectus icteri nigri splenetici nomine salutatur; sub quo vultus,
 quasi ferrugine tinctus nigricat. Icterus *promovent* colica hepatica, hyste-
 rica, hypochondriaca, alteriusve naturæ; hepatis inflammatio, abscessus
 & obstructio, ileus, retardatus vel impeditus bilis ad duodenum appulsus.
 Suboritur à purgantibus mochlicis vel emeticis, à venenis, à morfu anima-
 lium, à retrocessis morbis cutaneis; à mensium hæmorrhoidumve suffla-
 minatione, à quartanâ aliisque intermittentibus præposterè curatis; ab in-
 tempestivâ venæ sectione, à cachexiâ atque vehementioribus animi pa-
 thematibus. Hunc etiam accersunt helluationes, immodicus chocolatae
 usus, cibi crassiores, vel pejoris notæ, &c. His addere licet mœrorem &
 tristitiam, vehementioraque animi pathemata; haud enim fugit praxi
 edoctos affectum sensorium commune hepar in consensum plerumque
 trahere.

Haud *periculi* expers est icterus flavus; sed multò secùs se res habet
 sub nigro, præsertim in provectiore ætate. Si icterus, sub febribus acutis,
 ante septimum diem se proferat; tristis est augurii: ubi tardiùs se prodit;
 crisæos instar, faustum exitum pollicetur. Icterus à colicâ, emetico-cathar-
 ticis & iracundiâ, brevi desinit; in gravidis verò partu solvitur. Pertina-
 cissimus censetur, si cachexiæ vel scorbuti natales debeat, vel nullam
 causam evidentem agnoscat: haud aliter ominandum, ubi hepatis puru-
 lentiae vel infarctui submittitur. Procedente morbo, exitium portendunt

ICTERUS.

ventris intumescencia, tympanites, vomitus purulentus, & sedes ejusdem naturæ; suffocatio, lipothymia, marasmus, hydrops, &c. Ab urinis turbidis, atro-virescentibus, vel bile saturatis, salutis spes affulget; haud inanem verò metum incutiunt limpidæ. Icterus postremò solvunt sudores, fluxus hæmorrhoidalis & dysenteria, &c. Sed hoc semel affecti ejus reditum caveant.

Constat ex *observationibus anatomicis* non solum contextum cellularem, omniaque viscera; sed etiam cartilagineæ & ossa colore flavo tingi; non secus ac cutis. Sed innumeras ferè læsiones & defædationes cernere licet in hepate, præcipuâ morbi sede: etenim livore affectum, subviride vel plumbeum, phlogosi correptum, infarctum & skirrhosum, firmiter & exsiccatum, exiguum & contractum; vel immensæ molis deprehenditur: nunc exulceratione confossum, gangrænâ defædatum, aut putredine confectum annotatur. Aliàs abscessus numero & magnitudine diversos recondit; tuberculisque quasi lapidescentibus, imò & vermibus scatet. Obvia fit vesicula fellea, nunc subsidens & exinanita; nunc bilem atro-virescentem, crassam & glutinosam, serosam & insipidam continens: in ipsâ etiam latitant *pseudo-lapides* biliosi, nunc ferè innumeri, nunc mole amplissimi, vel ad ovum gallinaceum accedentes; ac cystidem accuratè replentes. Sic reperiuntur vasa biliaria ultra modum dilatata, lapidibus infarcta; vel sarcosi ex eorum lateribus prodeunte impedita: nonnunquam etiam à **prominentibus** pancreate & mesenterio, ab enormi coli magnitudine, aliove tumore compressa deteguntur. Ità demùm in quibusdam exsiccantur hæc bilis receptacula, ut cartilagineum ossiumve duritiem æmulentur. Inter varias pectoris læsiones, quas recensere supervacaneum foret, notatu dignus occurrit tumor ingens pleuræ adnatus, quo pulmones & hepar obruebantur. Annotatur insuper ventriculus flatulentia in immensam molem assurgens; & suâ sede distractus; vel pediculorum acervum colligans. Portentosam etiam assequitur amplitudinem colon: haud tantam dilatationem patiuntur cætera intestina; quæ verminosam etiam progeniem recondunt: flatu aliàs turgida, crassa & callosa apparent. Lien nunc mole amplissimus & skirrhosus; nunc exiguus & ad nihilum ferè redactus se præbet: aliàs tuberculis & lapillis refertus; putredine confectus, vel disruptus occurrit. Pancreas deforme, infarctum & putridum observatur. Omentum crassissimum, sphacelatum & planè corruptum se offert: præter varios tumores circa hepatis vicinia sitos, prædictum viscus comprimentes; diversas stagnationes, & innumera alia vitia parùm ad nostrum argumentum pertinentia, & in omnibus morbo chronico extinctis observari solita.

E præfatis intelligitur icterus innumeris propemodum causis submitti; quibus posthabitis, incongrua tenetur *curandi methodus*. Ex his verò benè perspectis & trutinatis patet quid selectu opus sit, inter varia præsidia quæ clinicorum judicio submittimus. Itaque recentis icteri curatio simplicioribus peragitur; sed haud plus æquo est properanda. Diutiùs etiam sub chronico

est protelandâ ne intempestivâ festinatione ægrotantium res, sub utroque casu, in pejus ruant: quod pluriès accidisse norunt experti. Inertem vel noxiam esse venæ sectionem experientia docet; ni tamen certiora adsint plethoræ vel phlogoseos indicia; aut sufflaminentur solita sanguinis profluvia. Inter salubriora adversus icterum medicamina jure recensetur emeticum, dummodò stomachi vires ferant: confert enim in omnibus morbi temporibus; sed pluriès habetur in principio; nec rarò evenit ut hoc solo præsidio exulet prædictus morbus. Haud minorem opem præstant cathartica pluriès per totum morbi curriculum repetita: sed blandiora sunt eligenda, rheum nempè, cassia, manna, tamarindi; sal epsomense, sedlicense, Glauberi, &c. quæ per se, vel remediis infrâ recensendis sociata, proficuè exhiberi solent.

Summè, nec immeritò deprædicantur *diluentia*, *temperantia* & refrigerantia: id genus sunt serum lactis, aqua pulli, emulsiones & aqua succo limonum imprægnata; decocta graminis, borraginis, cichorii, agrimonix, fumariæ, capillorum Veneris, linguæ cervinæ, lapathi, acetosæ, fragariæ, aliorumque consimilium: quibus addere licet caneros fluviales, pulverem temperantem, &c. Haud inanem operam ludunt sedantia antispasmodica, ceu crocus, pulvis de guttetâ, &c. sed annuentibus celebrioribus practicis cautè præscribi debent hypnotica, quorum intempestivus usus infarctum hepatis producere solet. Nonnunquàm etiam conferunt amara & stomachica, veluti absinthium, centaurium minus, gentiana, enula campana, cortex peruvianus & cinnamomum: extractum juniperi, confectio de hyacintho, theriacâ, &c. Sed haud plus æquo, vulgatorum Medicorum exemplo, hisce remediis confidendum. Præclara deniquè obeunt munia aperientia & diuretica; parietaria nempè, chelidonium, apium, asparagus, rubia tinctorum & iris florentina; nitrum, sal genistæ & tamarisci, crocus martis, globulus martialis, gummi ammoniacum, borax, sapo, terra foliata tartari, arcanum duplicatum, tartarus martialis solubilis, aselli, &c. quæ omnia haud fortè inconsultò *hepaticorum* titulo insignierunt Veteres. Non secùs enim, facem præferente praxi, distinguuntur pectoralia & uterina, à demulcentibus, vulnerariis incidentibus & diureticis, è quorum classi depromi solent; sic è temperantium, aperientium & stomachicorum tam amarorum quàm acidorum agmine nonnulla colliguntur remedia magis hepati dicata. Nùm quamdam affinitatem habeant hæc medicamina cum hocce viscere, vel latice inibi secernendo? cæteris pensitandum relinquimus.

Nec hisce cancellis continentur *remedia antiicterica*, etsi jam numerosissima, quin potiùs plura alia in usum trahuntur succedanea; absorbentia nempè, diaphoretica, depurantia, & antiscorbutica, quæ pro re natâ, variisque circumstantiis & implicationibus nonnihil ferre valent auxilii in diuturniori curatione, ad quam sæpiùs haud nisi post varia tentamina, paratur via. Hanc demùm claudunt aquæ minerales, tùm frigidæ acidulæ & martiales, tùm thermæ; Passienses nimirum, Forgienses & Vallenses,

ICTERUS.

Vicienses, Plumberianæ & Bellilucanæ; quæ postremæ maximi æstiman-
tur, nec immeritò. Intereà alvus per totum hujusce morbi curriculum fer-
vetur libera, ope præsidiorum congruorum. Nonnullis suppetiantur fots
emollientes: quosdam juvant ipsamet balnea, præsertim si urgeat pruri-
tus; quæ etiam sublato morbo opportunè adhibentur; ut scilicèt pristinus
nitor cuti, fædo colore imbutæ, restituatur. Caterùm nemo nescit oculos
post absolutam medelam, has morbi reliquias ægrè sæpiùs deponere; qui-
bus delendis fumum aceti prodesse fertur.

NEPHRITIS.

DIVERSA fanè est hujusce morbi indoles, cùm nunc pendeat à renum
phlogosi, vel ab horumce organorum constrictione spasmodicâ, nunc
à calculis & arenulis in pelvi hospitantibus, vel in ureteres adactis; à mu-
coso lotio prædicta receptacula obturante, &c. sed à quâcumque causâ
ordiat hic affectus; longas inducias concedit & præposterâ victûs ratione
recurrere solet. Hinc intelligitur cur sint varii dolorum gradus; qui tantam
ut plurimum tyrannidem exercent, ut totas ædes suis clamoribus expleant
miselli ægrotantes; donec remittant, vel absolutâ intermissione planè quies-
cant cruciatus nephritici. Lumbis infigi, vel stomachum obsidere videntur
dolores, qui in plerisque ad radicem penis, vel ad alterutrum inguen pro-
pagantur, imò & ad ipsum testem, qui retractionem quamdam patitur,
pertingunt. Nec rarò evenit ut crus ejusdem lateris torpore afficiatur. Inter-
eà urinæ sufflaminantur; vel parcè, & cum stranguriâ fluunt: *vigente pa-
roxysmo* limpida minguntur; sub finem verò turbida, mucosa, sabulo
referta se præbent. Alvus sævientibus doloribus obturatur; atque moventur
nauseæ & vomituritiones. Febre plerùmque stipatur nephritis, cujus sta-
dium, ab aliquot horis, ad plures dies protelatur: ejus solutionem præ-
nuntiant largus lotii proventus, vel cujuscumque calculi exitus.

Quibuscumque *indiciis* se prodat nephritis; nonnunquàm tamen ægrè in-
notescit; eò quod ejus schema sæpiùs mentiantur variæ colicæ, hepatica
nempè, & duodenalis, eâdem furentes sævitie: haud absimilem etiam fa-
ciem præ se ferre valent dolores colon obsidentes; cùm hoc intestinum,
uti neminem anatomicum latet, ad inguina utrinque protendatur. Varii
prætereà occurrunt abdominis dolores qui nephritidem æmulantur; id genus
sunt nonnulli cruciatus rheumatici, arthritici, scorbutici & hysterici; non
secùs ac tormina quæ ineuntibus febribus intermittentibus; vel erumpen-
tibus catameniis, renibus desigi videntur. Pro nephritide sæpiùs habetur
lumbago, licèt sola motuum organa afficiat; quæ ideò pertractatione,
vel quovis spinæ motu exacerbatur; quod nusquàm evenit sub verâ
nephritide, ni cùm doloribus ischiadicis implicetur, uti haud rarò accidit:
cur

cur fit ut varii nephritici à corporis inflexione quoddam solatium experiantur.

NEPHRITIS.

Nephritide ab affectibus cognatis accuratè distinctâ; aliud clinicis impendet munus, ut scilicet *genuinam morbi indolem* expiscantur: nùm à phlogosi, calculo, spasmo, vel muco profapiam ducat. Itaque renum inflammatio dignoscitur à dolorum vix remittentium pertinaciâ; à febre acutâ; ab urinâ primò flammeâ, dein limpidissimâ, &c. sub renum calculo, (circâ quem per transfennam notare expedit quòd renem ut plurimùm sinistrum obsideat). Nulla vel mitior adest febris: quasdam intermissiones fubeunt dolores, qui aliàs à variâ calculi dimotione, ità sæpiùs recrudescent, ut phlogosim accersere queant. Tormina ab spasmo orta acerbiora evadunt; sed ad varias abdominis partes propagantur, & brevi desinunt: insuper urinæ à plus æquo constrictis suis organis secretoriis subalbicant, guttatim stillant, vel planè sufflaminantur. Tantas neutiquàm concitat procellas nephritis, à mucoso lotio oriunda: dolores nimirum placidiores vel obscuræ ingruunt; omniaque remissiora observantur symptomata. Nusquàm *periculo* vacat hic morbus, cujuscumque sit naturæ, cum ægros haud rarò in vitæ discrimen trahat. Si dolor ultrà septimum diem proteletur, ac invalescente febre, horroribusque inordinatè recurrentibus, pulsativus evadat; de puris confectione cogitandum. Subitanea cruciatuum cessatio; pulsus depressus & intermittens; sudores frigidi, atque urina nigricans & fœrens, certissimas gangrænæ notas præbent. Ad nephritidem *proni* existimantur litterati, & otio recumbentes; baccho & veneri litantes; melancholici & arthritici, &c. huic demùm obnoxii censerì debent qui unum aut alterum insultum jam passi sunt; si sit præsertim labes hæreditaria.

Institutæ *cadaverum sectiones* exhibent renes mole amplissimos, vel marcidos & corrugatos; compactiores & firmiores; vel ad cartilagineam duriem accedentes; inflammatos vel abscessum recondentes; ulcere confossos; putriditate & gangrænâ conspurcatos; skirrhosos & tuberculis refertos, horumque ambitum granulis vel pustulis obductum; varicibusque exasperatum, &c. In quibusdam cadaveribus, nil præter saccum materiam subviridem, saniosam & purulentam, & nonnunquàm hydatides, imò & vermes, continentem conspicitur. Nonnunquàm unicus prostat ren, multiformis; dextrâ lævâque, vel in medio situs. Prætereà familiarissimè occurrunt in pelvi arenulæ, calculi & lapides, diversæ molis & figuræ, quibus sæpiùs infarciuntur ureteres, vel planè obturantur: cur fit ut à sufflaminato lotio in immensam quandòque molem assurgant prædicti canales: nec desunt lapides tunicati diversæ molis. De rene portentoso, triginta quinque libras pendente, mentio subjicitur: alter annotatus fuit merâ flatulentiâ supramodùm dilatatus: nec desunt historiæ renum petrefactorum, & albastrì instar albicantium. Sed mirari profectò subit lapides diversæ molis, vel ingentes in renum pelvi nidulantes, vel maximam in alterutro rene stragem, nonnunquàm reperiri inter rimanda cadavera quorundam, qui dum viverent, arenularum, muci & puris excretionis planè nescii, nullum

NEPHRITIS.

nephritidis insultum passi fuerant : quod stupendum phænomenum pluriès me vidisse memini. Ægrè etiam intelligitur cur læso alterutro rene, dolor sæviat in alio latere ; quod non rarò mihi vidisse contigit. Nec inculpata occurrunt alia viscera in nephritide extinctis ; pancreas enim skirrhosum, purulentum, vel lapides recondens nonnunquàm detegitur : mesenterium infarctum vel tabo conspurcatum se offert. Lien firmior & compactus, è situ depulsus, renique sinistro incumbens, vel pultis instar contrectatus diffluens deprehenditur. Ut de tumore ilei skirrroso ; aortæ, ejusque propaginum aneurismate ; vertebrarum carie ; abscessibus passim occurrentibus ; ferosâ circâ medullam spinalem colluvie, aliisque vitiis à nephritide planè alienis ; nil addam.

Èd collimandum, vigente insultu nephritico, ut dolores compescantur ; flexilitas scilicèt & mollities laceffit organis concilientur. Utrumque præstant *venæ sectiones* quantocyùs celebrandæ ; ac pro ætate, temperie & viribus ; vel febris vehementiâ & dolorum acutie, plus minùsve iterandæ. In hunc etiam scopum largâ manu propinantur *diluentia* & *demulcentia* ; serum nempè lactis, aqua pulli & oryzæ, infusum è floribus malvæ & feminibus lini ; oleum amygdalarum dulcium & sperma ceti : emulsiones vulgatiores, vel è feminibus papaveris albi paratæ ; syrupus violaceus, de nymphæâ, &c. nec minùs profunt *hypnotica*, uti diacodium, laudanum liquidum, pilulæ de cynoglossò, syrupus de karabe, &c. Sed certis cancellis contineri debet narcoticorum usus ; cum sæpiùs horum præposterâ administratione frangantur organorum vires, ad calculorum excretionem apprimè necessariæ : ac exulare planè debent, ubi vel minima gangrænæ emergit suspicio. Dilutum cassiæ, aliaque laxantia blandiora, haud nisi remittentibus torminibus usurpari queunt. Si diutiùs proteletur urinæ suppressio, cum imminente vitæ discrimine, ad emeticum, tanquàm ad sacram anchoram, confugere expedit : plures enim ad incitas redactos ab orco quasi revocasse illud remedium multiplici constat experienciâ, & ipsemet pluriès vidi ; periculo tamen minime vacat sub hâc rerum conditione emeticum ; cum nonnunquàm obici morbo superando impar, præceps exitium afferat : sed in hisce angustiis ; vel in casu desperato, haud vetantur tentamina, quibus nonnulla elucescit curationis spes. Quidam postremò summis præconiis celebrant semen fructûs exotici, nomine *sapotille*, quem fert arbor Americana, achras apud PLUMERIUM dicta : sed nùm cæteris jam traditis præsidiis antecellat dubitare licet.

Fugato paroxysmo ad *prophylactica* devenire expedit ; in quorum sanè rectâ administratione præcipuum versatur curationis momentum. Diuretica sævientibus doloribus summè reformidanda, egregiè conferunt, ad præcavendum horum reditum ; selectiora audiunt & usitatiora pareira brava, lignum nephriticum, parietaria, herniaria, radices helenii & calcitrapæ ; semina dauci sylvestris ; nitrum, balsamum peruvianum, terebinthina, &c. Celeberrimum fuit, præsertim in Occitaniâ remedium anti-nephriticum bavillianum ; quod sanè minime despiciendum, præcipuas vires mutuatur à radice calcitrapæ, foliis parietariæ & ligno sassafras ; de

cujus processu in materiâ medicâ. Sed experientiâ judice, omnibus hisce remediis præstant pilulæ lithontripticæ STEPHENS; quæ etiam tutò usurpantur vigente insultu; dummodò tamen morbus ab arenulis, vel calculo concitetur; aliàs inutilem operam ludunt. Insuper exquisitiorum prophylacticorum vires æmulatur, & fortè superat diætâ lactea, quæ haud reluctante stomacho, rarissimè fallit. Felici etiam successu in usum trahi solent aquæ Vallenses, Forgienfes, Amandinæ, Balneolenses, Motenses, Bellilucanæ, Vicienses, Baregienfes, Vervonenses, Granenses, aliæque minerales fortè innumerae, tum frigidae, tum thermales; quæ majori impetu ad renes appellendo, arenulas secum rapiunt. Nec despicienda aqua communis tepida, singulis matutinis ad libras duas circiter epota: plures enim hoc solo domestico præsidio imminentes accessiones inhibuisse multiplici constat experientiâ. In subsidium etiam vocari debent, sub omnibus curationis temporibus, enemata emollientia & demulcentia, ex althæâ scilicet, feminibus lini, oleo, butyro, aliisque affinis, parata. Haud minorem opem conferunt fots, balnea, semicupia, &c. nonnunquam postremò podici admoventur hirudines, quæ sub quibusdam circumstantiis mira præstare queunt; ubi scilicet sanguis præfervidus circa urinæ incernicula stagnare cogitur. Silentio minime premere debemus à nonnullis celebrari quemdam *lapidem nephriticum* dictum, quem regioni renum alligare solent; qui ad jaspidem accedens coloris obscuri, viridis & variegati, ac superficiei quasi subpinguis affertur ex Hispaniâ & Bohemiâ: sed jam exolevit hoc remedium, de cujus viribus dubitare licet.

L I T H I A S I S.

ARENULÆ quæ in renum pelvi efformantur, præterfluente lotio rapi, & foràs placidè abigi queunt: sed si inibi morentur & certam molem adipiscantur; vellicationes sapiùs molestissimas tam in pelvi, quàm in ureteribus quibus adiguntur, pariunt; undè nephritis de quâ suprâ. Ab arenularum coalitu, vel ulteriori incremento emergunt calculi, qui etiam ab urinæ profluvio in vesicam blandè detrudi; vel dolorem tantummodò obscurum concitare valent. Sæpiùs tamen acerbiores cruciatus promovent, qui dorso, stomacho, inguinibus, &c. infigi videntur: sed calculi grandiores renibus impacti qui à sede minime dimoveri patiuntur nullam vel levem molestiam inferunt, ni è suis typis divellantur. *Renum lithiasis innotescere* valet à præviâ nephritide, à lotio mucoso, furfuraceo, arenulisve referto, & ab excretis lapidibus; à prægressis insultibus arthriticis, ischiadicis, &c. quibus adde stranguriam cum mictu cruento post equitationem, vectionem in rhedâ, aliamve insolitam exercitationem; sed *calculus* potiùs *vesicæ* prodere videtur hoc postremum signum; præsertim accedente dysuriâ, cum

LITHIASIS.

dolore ad extremum penem, post mictum pertingente. Nec defunt alia lapidis in vesicâ latitantis indicia; tenesmus nempe qui singulos mingendi conatus concomitatur; quidam gravitatis sensus in perinaeo; crebra genitalium titillatio, vel pruritus, ad quem compescendum, manum, gestu sanè indecoro, sæpius admovere cogitur uterque sexus: quod præsertim annotatur in infantibus qui penem sæpissimè contrectant, & distrahunt, ut urinæ exitui faveant, vel dolores leniant. Interea profiliens urina sæpius sistitur; vel per vices, alternatimque inter tormina mingitur; ni ægrotantes experientiâ edocti, in unum vel alterum latus decumbentes vesicam exonerent; ut scilicet lapis vesicæ cervicem obturans, proprio pondere, ad hujusce organi fundum vel latera devolvatur.

Haud conticendum vesicæ phlogosim, abscessum, exulcerationem, skirrhum, &c. etiam respicere tradita *signa*, quotquot se proferant; adeò ut in ancipiti versetur hujusce morbi diagnosi; ni vesicæ calculus digito in anum immisso exploretur, vel cathetere in vesicam adacto attingatur. Rarò tamen digitus podici inditus ad vesicam adultorum pertingere valet; licet de infantibus nullum sit dubium. *Catheterismus* verò nonnunquam fallit, ubi scilicet lapis circa vesicæ latera delitescit, inibique sibi foveam cudit; quo recessu, fistulæ argenteæ apicem fugit. Dolores quidem, cujuscumque fortis sint, continui vel intermittentes inter *indicia fallacia* numerari debent, cum, uti jam inculcavimus, ab aliâ causâ suboriri queant, & nonnulli occurrant ægri, qui longissimis induciis gaudeant. Nec defunt doloris expertes; qui scilicet inscii ingentes lapides tam in renibus quàm in vesicâ gestant; & nil patiuntur quod calculi suspicionem movet. In quodam viro, notante REGA, de dolore genuum, dum viveret, perpetuò querulo, reperiebatur ingens calculus in rene, antea doloris planè experte. Minime sanè mirum si lapis superficie lævi intrâ foveam sensim & processu temporis insculptam, in renum & vesicæ molli & flexili contextu defigatur, ità ut nequaquàm obstet urinæ profluvio; vel peculiari capsulâ ità includatur & alligetur, ut immotus & iners inibi jaceat. Caveant sub hocce casu cystotomi, ne inter trahendum lapidem, nonnullam vesicæ portionem divellant, quam pro farcosi fungosâ fatuis adstantibus ostentare solent; quod pluriès, haud citrà cordolium vidisse memini; ac nullus, ni fallor, eorum qui hoc infortunium passi fuerunt, sanitati restitutus fuit. Hinc intelligitur cur plures calculosi ætatem citrà incommodum trahant; quod etiam quandòque accidit, si lapis, etsi grandior, ambitu glabro & lævi, nullam in vesicâ molestiam creet, præter quandam ponderis sensationem, de quâ parùm curant ægrotantes. Sed si ejus superficies sit inæqualis, scabra, vel aculeis horrida; summos cruciatus singulis vesicæ contractionibus infert; è quorum diuturnitate emergit phlogosis, quam excipit ulcus; quo sensim non solum vesica; sed etiam confines partes depascuntur: hinc fit ut lapis in scrotum haud rarò devolvatur; vel intestinum rectum subeat, & per podicem foràs amandetur.

Nemini parcit diathesis calculosa, quæ sæpissimè à parentibus in prolem

propagatur: infantes tamen & ætate provectos huic morbo magis esse obnoxios nemo nescit. Ad hunc proclives sunt admissarii, vel qui, immaturâ ætate, veneri petulantiùs se addixerunt. Impendet lautè victitantibus, qui cupediis delectantur; sæpissimèquè attingit poculis deditos. Rarò lithiasi immunes sunt arthritici, quorum urinæ sedimentum gypseum deponere, vel arenulis scatere solent; hinc cum genuinâ nephritide sæpiùs colluctantur; præter quosdam insultus, qui hunc affectum, æquè ac dolores è calculo vesicæ oriundos, accuratè mentiuntur. Sed nothas, tum colicæ nephriticæ, tum calculi vesicæ, accessiones, etiam comite stranguriâ, crebrò patiuntur hystericæ, hypochondriaci, scorbutici, profluvioque hæmorrhoidali obnoxii; aliàs genuini calculi minime expertes.

Secta cadavera lapides multiformes & grandiores, sæpiùs inexpectatos in renibus patefaciunt: imò & mole portentosi haud rarò occurrunt in quibusdam qui, uti jam inculcavimus, nullam dum viverent de hocce morbo suspicionem habuerant. Purulentiam, putredinem, aliasque læsiones de quibus suprà, etiam exhibent urinæ incernicula; quorum dextrum hepatis, vel colo, agglutinatum nonnunquam annotatur. Ureteres deteguntur lapillis infarcti, planè obturati, ultrà modum dilatati, tortuosi, callosi, &c. patet vesica densa & compacta, calculum ità obvolvens, ut vix supersit cavum ad urinæ effluxum; lapidibus foeta, phlogosi correpta, ulcere exesa; subnigra & siderata; duplicemque saccum, cucurbitæ lagenariæ instar, effingens. Observatur quandoque illud organum vaginæ prolapsu à sede dimotum; aliàs ulcere confossum, & in intestinum rectum hians detegitur; vel ab inductâ cicatrice intestino firmiter hæret. Lapidès in quibusdam occurrunt stupendæ magnitudinis, ad malum scilicèt aurantium; ad ovum struthio camelinum; vel ad pueri caput accedentes; aut ponderis quatuor circiter librarum. Nonnulli lapides medio foramine excavantur; vel strix, canaliculusve ipsis insculpitur, ut appellenti lotio aditum largiantur: nunc perpoliti & quasi lævigati observantur; aliàs asperi, scabri, tuberculis obstiti, spiculis quasi horridi, &c. in apricum veniunt. Ratione firmitatis; plures adinveniuntur molles & friabiles, vel quasi gypsei; alii verò densiores ad silicis duritiem accedunt, è quibus chalybe percussis scintillæ prodeunt igneæ. Diversum etiam colorem referunt; alii enim sunt subalbidi, sublutei vel virescentes; alii fusci, nigri, &c.prehenduntur; nec defunt qui quâdam pelluciditate donantur. Calculi urinarii, ut plurimum liberi in vesicâ fluctuantes reperiuntur: nonnulli tamen, uti jam innuimus, deteguntur ità lateribus vesicæ defixi ut capsulâ includi videantur; cur fit ut explorantem catheterem fugiant. Præsertim ubi sub parte posticâ trigoni, ut pluriès observavi, latent; cuius exemplum præbent Acta Chirurgicorum Parisiensium, pag. 399 tomi primi. Nemo non novit nucleum prædictorum lapidum; cuius vices nonnunquam explent aciculæ, acus, funiculi, cereoli, specilla plumbea, aliaque corpora extranea circa quæ sensim efformantur & concresecunt lapides. Reperiuntur postremò calculi

LITHIASIS.

in urethrâ , vel extrâ repagula ; in corpore scilicet celluloso perinæi ; scroti , &c.

Haud difficili Marte fugantur , uti suprâ innuimus , *renum arenulæ* ; sed aliter se res habet de calculo certæ molis , & formæ inconditæ hisce visceribus impacto , qui nullâ hætenus notâ arte se expugnari patitur ; ac ideo *curam* merè *palliativam* duntaxat admittit ; si excipias *nephrotomiam* , de quâ multum controvertitur : vix sanè concipere licet quomodo , absque præsentis vitæ periculo , vulnus infligi possit in partem reconditissimam : nec facilius intelligitur modus urinam deflectendi à fauciato rene proflientem , & hinc cicatrici obstantem : de hac controversiâ consulere licet tertium Academiæ Chirurgicæ volumen , in quo varia prostant curiosa , & scitu digna. Ubi verò calculus in pelvi renum latitans ad orbicularem formam accedit ; ac certam molem nondum assecutus est ; facile à præterfluente lotio rapitur , & per ureteres ad vesicam devolvitur. Quibus sic se habentibus , nil efficacius reperitur , quàm *largus aquæ potus* , quo urina pleno gurgite è vesicâ exiens corpus illud extraneum secum rapiat : scitur enim quod nonnulli lapides ad olivæ vel avellanæ magnitudinem accedentes sæpius per hancce viam foras amandatur : ad quod opus etiam conferunt enemata emollientia , balnea , &c. Quandoque evenit ut calculus grandior , superandæ vi contractili urethræ impar , inibi moretur & mictum planè præpediat ; donec ab aquâ affatim haustâ major lotii proventus , & impetus , hunc obicem tollat : quo tamen irritò præsidio ad *urethræ sectionem* incunctanter devenire licet ; quæ operatio simplicissima periculi est planè expers. Faciliorem esse calculi ejectionem in sequiori sexu neminem fermè latet : etenim traditur quamdam mulierem quinquagenariam , lapidem uncias duas pendentem per urethram expulisse. Ubi *calculus in vesicâ* latitans insignem assequitur magnitudinem , & nulla spontanei exitus spes superest ; ad *curam palliativam* ; nimirum ad enemata , injectiones in urethram , & topica cujuscumque sortis emollientia ; accedentibus paregoricis internis , congruoque vitæ regimine , converti solent clinicorum curæ ; ni cruciatus , quibus torquentur ægri , ad *cystotomiam* devenire cogant ; cujus periclitationem , jubente Ludovico XI primus , prospero successu , subiit Parisiis anno 1474 , quidam pro suis flagitiis capite damnatus : quo inaudito tentamine è truculento morbo evasit , & probrosam mortem effugit. Hæc tamen operatio cujus varias methodos nemo non novit , licet nostrâ ætate , curâ & studio cujusdam Monachi Parisiis celebratissimi , aliorumque de re Chirurgicâ benè meritorum , omnibus fermè numeris absoluta , periculo minime vacat ; quin potius plures illuc mittit undè negant redire quemquam ; præterquàm quòd lapis , præ mole , extractioni ineptus sæpius evadat ; sed hoc periculum adire quasi coguntur doloris impatientes.

Haud defunt tamen *lithonriptica* ab Authoribus , penès quos sit fides , plurimum decantata ; virga nempe aurea , alkekengi , cepa , raphanus rusti-

canus ; succus limonum , pareira brava & lignum nephriticum. In hunc usum etiam veniunt aquæ Baregieneses , Borbonieneses , Passienses , aliæque minerales haud immeritò celebratæ ; magis tamen exturbandis arenulis , quàm lapidis solutioni promovendæ , aptæ. Uvam ursi summis laudibus extollit clariss. DE HAEN , qui inter artis procures haud infimum locum sibi vindicat ; sed nùm induciæ , quibus inter hujusce remedii usum fruuntur ægri , haud potius paregoricis & injecto in vesicam oleo lini , referri queant ? solertioribus examinandum relinquimus. Prætereà post diuturniorem hujusce remedii usum , calculus , annuente ipsomet Authore , intactus remanet ; & post varias inducias recurrunt symptomata , vel truculentiora. Multùm etiam à recentioribus deprædicatur aqua calcis è conchis ostreorum parata , tam pro usu interno , quàm ad injectiones in vesicam : de egregiis hujusce aquæ viribus innumera jam prostant historiæ ; quibus saltem constat haud noxiam fore ; quod tamen ulterioris experientix incudi submittendum esse censemus. Cæterùm inter varia lithontriptica paucis abhinc annis publici juris facta , sibi par fortè non habet *remedium stephensianum* è sapone & calce præcipuè confectum ; cujus præstantia validis argumentis impugnata , accuratioribus experimentis clinicis comprobatur : quibus benè perspectis & trutinatis , lapides molles vel gypseos , hocce præsidio solvi ; neutiquàm verò saxeos luce clariùs patet. Minime mirum si , posthabito hoc discrimine , multùm & perperam de hâc re dissentiant ; vel hoc remedium planè abdicent etiam primi subfelli Authores , inter quos gravamur numerare clarissimum MEAD. Sed missis hisce disputationibus ad rem , vel minimam , elucidandam nil conferentibus ; quid è nostris observationibus tam publicis , quàm privatis sit colligendum candidè aperiemus ; priùs traditâ historiâ cujusdam ægrotantis jam præ morbi diuturnitate & sævitie ad incitas redacti ; hocce lithontriptico ultrà omne dubium ab orco revocati.

Vir quinquagenarius , haud infimæ conditionis , febre lentâ , & doloribus à calculo vesicæ oriundis attritus cystotomiam obnixè efflagitabat. Jam diù indefinente stillicidio fluebant urinæ ; appetitus planè prosternebatur ; somnum arcebant dolores identidem ferociores , atque viribus fatiscentibus ad ineluctabile fatum properabat. Quibus sic se habentibus , & lapide catheteris ope pluriès explorato , remedium Anglicum , jam crebrò usu receptum , ipsi reluctanti proposui , & quantocyùs exhibendum curavi. Sub secundo mense quoddam levamen expertus fuit : tertio melius se habuit ; quarto majores erant induciæ ; atque urinam ad horam integram & ultrà cohibebat ; quod pluribus abhinc mensibus nusquàm ipsi contigerat. Quid opus est verbis ; omnibus ritè succedentibus circa octavum mensem voti planè compos fuit , nullo remanente morbi vestigio. Notare expedit quod per totum curationis stadium innumera lapidis ramenta , materiamque lutulentam & gypseam , unà cum lotio , minxerit ; quod dein limpidum evasit ; & non secùs ac in vegetiori sanitate , vesicâ obsequentiori , coërcebatur ; ac pro nutu absque minimo dolore profiliebat. Id temporis , appe-

LITHIASIS.

titum, somnum & vires recuperavit: faginatius demum, cum facie floridâ; tam vegetus fuit, ac si nusquam mali passus fuisset. Licet de integrâ, omnibusque numeris absolutâ hâc curatione nullus fuisset ambigendi locus; haud tamen incongruum fore putavi, ut publica fieret exploratio ope catheteris; quâ, post omnium adstantium tum Chirurgorum, tum Medicorum, præsertim Chirurghi cui sectio ante septem menses commissâ fuerat, tentamina; calculum vesicæ planè fugatum fuisse, vel in frustra, quæ secum devehebat lotium, facessisse nemine discrepante, constitit.

Cæteras de hâc re observationes, tum vesicæ calculum, tum renum lithiasim respicientes quæ in nostris prostant adversariis: recensere longum & fastidiosum esset opus: ideò quid ex illis collatis sit inferendum paucis, parergi loco, perstringere haud inconsultum nobis visum fuit. Primò itaque è pluribus qui calculo vesicæ laborabant, & nostræ curæ se commiserunt, quatuor duntaxat pristinae sanitati, intra octo vel decem mensium spatium restituti fuerunt: alii diuturniori curatione pertasi, medicamen quotidie tergeminum, palato ingratum & nauseosum agrè ferentes, præceptis Medicis, etsi melius se habebant, obtemperare planè recusarunt: inter quos unus modò senex, qui octogesimum ætatis annum agebat; & cujus calculus cautis instar fortè induruerat, tantum levamen ab hocce remedio accipiebat, ut per plures annos ab hujus usu minime recesserit, donec senio confectus & nescio quo morbo, ad superos migraverit: alter fuit qui præter calculum vesicæ, ulcere renum & febre lentâ, unâ cum marasmo laborabat, quibus ad incitas redactus occubuit; cui hoc remedium haud ultra mensem ipsi subministratum fuit; stupendum tamen effectum in lapidem, cujus icon prostat in actis Academiæ Regiæ Scientiarum, jam exuerat; quem scilicet per totam superficiem erosum omnes in publicâ cadaveris sectione mirati sunt; haud discrepantibus ipsismet cystotomis. 2°. Haud minorem præstarunt opem pilulæ ejusdem Authoris, nephritidi dicatæ, quæ scilicet hunc morbum in potiori agrorum parte planè fugarunt; & in cæteris summè leniebant. 3°. Secus se res habuit ergà renum lithiasim: bini duntaxat hoc morbo, uti videbatur, afflicti meæ curæ se tradiderunt; quibus aliquid tulit auxilii prædictum remedium: sed nil aliud præter remissionem, quâ tamen summè oblectabantur, experti fuere. E quibus colligere datur hocce remedium, præter vim sabulum expellendi quâ egregiè pollet, merum esse *lithontripticum* ergà calculos in vesicâ delitescentes; dummodò haud saxeam duritiem assequantur; & ideò in præstantiorum medicaminum censu haud infimum gradum mereri, quidquid obganniant qui turpi lucro inhiantes, alias methodos vituperare solent. Nec me movet assertum clariss. HUXHAM, qui arbitratur prædictum medicamen labem scorburicam inferre; & hinc hoc morbo affectis nusquam congruere, quod haud observasse memini: sed tanti viri auctoritate ductus, ulterius inquirendum esse censeo.

MICTUS CRUENTUS.

MICTUS
CRUENTUS.

HAUD dilucidè quandòque patet, nùm *sanguis* sua repagula transiliens, lotiumque inficiens, è *renibus vel vesicâ* prodeat; etsi haud defunt *utriusque statûs indicia*. Etenim nullo plerùmque dolore stipatur hic affectus, si cruor è renibus stillat, ni implicetur cum lapide, aliove vitio organico; vel intercipiatur urinæ fluxus à sanguine grumoso, alterutrum ureterem impediēte; undè moventur dolores à superato obice compescendi: sed acerbiores concitantur, ubi cruor è vesicâ lateribus erumpit; quotiès scilicèt lotium ex hisce latebris expellitur. Periodicè nonnunquàm, vel statis temporibus, singulis nempè mensibus, recurrit mictus cruentus ab utroque organo prodiens; sed à consuetâ normâ recedunt insultus, si ægri helluationibus & comotationibus indulgeant: varia prostant exempla apud Scriptores Medicos fluxûs cujusdam menstrualis per veretrum. Alterius est indolis hæmorrhagia urethræ, doloris expers, & gæneonibus familiaris, quâ cruor sincerus è pene guttatim stillat; lotio remanente limpido. Calculo renum & vesicæ plerùmque submittitur mictio cruenta, quæ etiam sobolescit à varicibus quibus exasperantur vesicæ vascula. Præterea à cantharidibus intus sumptis, vel extus admotis, ab aloëticis, à balsamo sulphuris terebinthinato, aliisque stimulantibus, ortum quandòque ducit hic affectus: quem etiam *promovere* queunt ictus, casus ab alto, inconsulta corporis molimina, exercitationes immodicæ, castra veneris, vinum liberalius sumptum, iracundia ferox, &c. Hunc morbum accersere solet mensium sufflaminatio à casu, vel atate, orta: idem evenit à suppressio hæmorrhoidum profluvio. Insuper melancholici & scorbutici urinas atro rubentes, vegetâ sanitate, sæpiùs mingunt, parùm à cruentis discrepantes. Quid simile accidit ab hepatis infarctu, è quo aliàs profapiam nonnunquàm ducit morbus de quo in præsentiarum. Scitur præterea quò sanguinem esse fervidiorem, eò urinam excerni rubicundiorem; lateritiam mingi sub febribus intermittentibus, &c. Pro varietate demùm assumptorum urinas multifariam tingi neminem latet.

Nusquàm sanè *periculo* vacat mictus cruentus; præsertim si febre & dolore stipetur; sed maxima plerùmque est curationis spes: urinas saturatè rubras, vel subatras, diù & absque nullâ molestiâ plures mingere nemo nescit: imò & pro salubri nonnunquàm habetur mictus cruentus sub febre ardente erumpens. Secùs se res habet in aliis febrium speciebus; quin potiùs inter procellosa symptomata numeratur sub variolis & morbillis, ac febribus malignis. Haud ominosus censetur mictus cruentus periodicus, dùm mensium & hæmorrhoidum vices supplet: nec majorem metum incutit, si ab exercitatione immodicâ, aliâve causâ fugaci suboriatur; ni tamen diutiùs protractus exulcerationem in læsis organis minetur. Ubi à calculo, aliâve

**MICTUS
CRUENTUS.**

horumce viscerum labe sobolescit; clinicorum artes eludere, ægrorumque æumnas protelare solet.

Numerosissimæ prostant *historiæ anatomica* hunc morbum respicientes; è quibus colligitur mictum cruentum sæpissimè progigni à calculo renum & vesicæ; inter quæ rimanda, ad vulnerata vasa facillimè ducunt sanguinis reliquiæ, suprà quas incruentæ reperiuntur partes. In apricum venit sanguis concretus in vesicâ fluitans, vel ureteribus impactus: haud absimilis etiam detegitur obex in urethrâ. Renes insuper inveniuntur exulceratione defœdati, vel putredine planè confecti. Se præbent vesicæ vasa, ejus imprimis cervicem irrigantia, sanguine turgida & varicosa. Præter calculos multiformes; vermes inibi nidulantes nonnunquam recondit hoc viscus; quod crebrò maculis gangrænodeis signatum observatur, intùs exfoliatum, &c. Cæterùm alia occurrunt labefactata viscera: oculis nempè subjicitur hepar inflammatum, skirrhosum, purulentiâ tactum, & sideratum. Lien mole portentosus, vel infarctus sese offert. Cor tabo conspurcatum, vel concretiones lapideas recondens, in conspectum venit; ut de aliis innumeris viriis taceamus quæ à nostro argumento planè aliena videntur.

Nullum est dubium quin sanguinis missio; cæteraque *præsidia* hæmorrhagiis dicata plurimùm conferant sub mictu cruento: neminem fugit sapientiam secandam esse, si menses vel hæmorrhoides cohibeantur. Sed præclara munia obeunt *diluentia*, *refrigerantia* & temperantia; serum nempè lactis, & decocta è borragine, cichorio, agrimoniâ, pimpinellâ, linguâ cervinâ, herbis capillaribus, urticâ & symphyto parata. Haud minorem opem præstant *demulcentia*; flores nempè & radices althææ, semina lini; lac, emulsiones, sperma ceti, &c. Opportunè exhibentur *sedantia* è nitro & camphorâ deprompta; præsertim, ubi mictus cruentus febris symptoma audit: non verantur, cæteris consentientibus, laudanum, diacodium, cæteraque narcotica; si ægri insomnes noctes ducant. Cum adstringentibus cautè mercari expedit; etsi plures audacter proponunt mala cydonia; cathecu, bolum armenam, &c. experientiâ enim edoctus, hæc haud citrà periculum adhiberi posse crediderim.

Opportunè exhiberi queunt *vulneraria*; hypericum scilicèt, veronica, hederâ terrestris, trochisci Gordoni, &c. sed balsama & terebinthinæ, licèt inter traumatica celebriora numerentur, rarò sub hâc rerum condicione, ex voto succedunt. Proficuè, pro re natâ, in usum trahuntur rheum, manna, cassia, aliaque laxantia; nec exulare debent cathartica validiora, jalapium scilicèt & diacrydium, dummodò refractâ dosi, mitioribus fociuntur. Faustè etiam sub nonnullis casibus, usurpari queunt *aperientia*, ceu crocus martis, tartarus chalybeatus, aselli; & id genus alia innumera: nec minùs profunt, si nil obstat, aromatica & roborantia; videlicèt cassia lignea, & cinnamomum; salvia, mentha, calamintha, &c. licèt merè empirica videantur: pluriès enim observarunt clinici prædicta remedia, in alium scopum præcepta, quasi fortè fortunâ mictum cruentum planè cohi-

buisse : hunc stupendum effectum notare mihi contigit in nobili muliere, quæ duobus abhinc annis, ni fallor, mictu cruento laborabat; cujus curatio, post varia incassum adhibita præsidia, naturæ tradita fuit; quem tamen mictum evicit salviæ usus, cui ad refocillandum stomachum, tunc temporis inhærebat. Ut in orbitam revertamus, si inania sint memorata medicamina, ad aquas minerales, ut inquirunt, acidulas; quibus lac opportunè immiscetur confugere juvat; in hoc enim auxilio versatur novissima spes. Postremò in subsidium etiam vocari solent remedia externa; injectiones nempe ex aquâ frigidâ, aquis bellilucanis, aliisque thermalibus; enemata demulcentia & laxantia; æquè ac balnea; hirudines vasis hæmorrhoidalibus admotæ; aliaque innumera quæ tempestivè adhibita, pro votis succedere queunt.

MICTUS
CRUENTUS.

MICTUS PURULENTUS.

ALAPIDIBUS angulosis aut aculeatis sæpiùs vulnerari renes & vesicam, cuius obivium fit; nec minùs intelligitur cur hæc vulnuscula, quæ ab eadem causâ inibi hærente fovetur, brevi in ulcus faceßant: sed arduum fit inquirere, cur cantharides intùs sumptæ, aliaque medicamina diuretica stimulantia, similem effectum exerere valeant. Hanc labem etiam contrahunt hæc organa, non secùs ac alia viscera; à pravâ sanguinis humorumque diathesi. Nullum est dubium quin sub hoc morbo urinæ sæculentæ, purulentæ & graveolentes se præbeant: mendax tamen illud est *signum*; cum sæpiùs nil præter metastasim, vel tabi intrâ viscera delitescens ad renes translationem, indicet: quod phænomenum hæud rarò accidere jam suprà inculcavimus. Prætereà urinæ sæpiùs minguntur turbidæ, albicantes, imò & fœrentes, vel puris faciem referentes; quæ tamen alterius sunt naturæ; circà quas quotidie deluditur plebs medica. Itaque hæud nisi benè perspectis antecedentibus innotescit *renum exulceratio*; hæc versantur circà nephritidem, vel phlogoseos, lithiasisque renum *indicia*; quibus addere licet persistentes æstus, & dolores obscuros ad lumbos referri solitos, febrem lentam, aliaque exulcerationum internarum signa, è quorum syndrome renes labefactari hæud falsò conjicitur. Quod ad vesicam spectat; hypogastricæ regionis renitentia & dolor qui atrectatu, vel micturitione, recrudescit, stranguria, urina cruenta, pure conspurcata & fœtida, tenesmus, molesta genitalium titillatio, quam excipit pruriginosa libido, hæud fallacia *erosionis vesicæ* præbent *indicia*. Hinc intelligitur agrè innotescere urinam purulentam; quæ tamen nonnullis signis se prodit, præter fœtorem in plerisque teterrimum. Ubi igitur movetur puris suspicio sinenda est primum quiescere, donec totum crassamentum subsederit: post decantationem, sedimentum tenax & viscidum, pituitosum audit: si verò

MICTUS
PURULEN-
TUS.

facile dissolvatur pro pure habetur. Pus scilicet commotum minutim funditur per totam urinam; minime verò pituita. Semen insuper in urinâ circa summa natat; pus verò & pituita fundum petunt; sed ad minimum motum pus omninò dissilit & urinam galactoidem exhibet; pituita verò gyratur: sed lotio quiescente utraque materia subsidet. De latice purulento ab ulcere urethræ è pene, non secus ac in gonorrhœâ seorsim stillante, alibi.

Ulcus, dummodò haud altas egerit radices, faciliùs curatur in renibus quàm in vesicâ: indefinens enim hujusce postremi organi motio impedit quominus carnes glutine nutritio ferruminentur; et si injecta vulneraria & detergentia exquisitiora ad partem affectam appellant. Uno verbo *ulcus renum agrè sanatur*: nullâ verò arte evinci potest eadem *vesicæ labes*; præsertim in provectâ ætate. Quò magis fœtent urinæ, uberiorque fit puris proventus, & crebrior caruncularum vel membranæ interioris ramentorum exitus; eò *majorem metum* incutit morbus: cum sub hoc rerum statu, de ulcere latè fuso, vel mali moris, cogitare proclive sit. Notare tamen expedit renum ulcerationem, non secus ac stragem pulmonum, sapiùs in obscuris latere, & vitæ placidè insidiari. Exemplo sit quidam juvenis, qui binis abhinc mensibus à nephritidis insultu liberatus, vegetâ sanitate frui videbatur; imò & uxorem duxerat; dùm secundâ nephritidis accessione intrâ quatrimum rebus humanis vale supremum dixit. Hâc repentinâ morte commotus, cadaver secandum curavi; in quo detectus fuit ren sinister luto purulento & gypseo, atque lapidibus numerosissimis fœtus; cujus substantia ulcere depasta, vel putredine planè confecta erat: undè sanè sequitur hunc morbum jamdiù *immedicabilem* & exitialem fuisse; qui tamen nullis signis innotuit, propter obturatum scilicet ureterem sinistrum, qui materiæ purulentæ exitum denegabat; organo dextro, morbofi vices gerente.

Ut incœpta prosequamur; constat è multiplici *cadaverum historiâ*, ulcus renum frequentissimè profapiam ducere à calculo. Sacci instar nonnunquàm deprehenditur alterutrum urinæ incerniculum; nunc collapsum & depressum, nunc ultrâ modum expansum; urinâ scilicet purulentâ & faniôsâ, fluitantibus calculis, turgidum: ac tantâ copiâ quandòque hùc colligitur lotium fæculentum, ut ad libras duodecim accedat; quod quandòque in alterutro uretere etiam ad libras duas coercetur. Præterea conspiciuntur renes aridi & corrugati, partibus conterminis agglutinati; vermes recondentes, putridi & absumpti, &c. Annotatur in vesicâ ulcus plus minùsve prorepens; non secus ac lapides multiformes & diversæ molis. Reperitur lotium lutulentum, cui innatant carunculae, vel membranæ alterutrius visceris ramenta. Conspiciuntur recessus vel capsulæ pure, lapidibus & arenulis scatentes. Deteguntur ulcera sinuosa in intestinum rectum hiantia, &c. nonnunquàm demùm reperiuntur renes inculpati, aliis visceribus, tum pectoris, tum abdominis, sed plerumque pulmone & hepate, purulentâ defœdatis.

Parùm discrepat horumce affectuum *curatio*, ab illâ quæ cæteris exulcerationibus internis, de quibus suprâ, congruit. Ne tamen aliquid prætermisisse videamur, usitatoria ad hoc opus medicamina tradere haud inconsultum nobis visum fuit. Itaque temperantia & demulcentia, præmissis, si res expostulet, generalibus, omnem implent paginam: in hunc censum veniunt cichorium, agrimonia, borrago, lapathum & symphytum, flores & radices althææ, semina lini, serum lactis, vel ipsummet lac, quod fortè sub hoc casu sibi par non habet. Haud inutilem opem præstant aquæ minerales Valleses, Spadanæ, & aliæ consimiles, vel cognatæ. Pluris etiam habentur detergentia, *vulneraria* & balsamica; hypericum nempè, veronica & herbæ vulnerariæ helveticæ; terebinthina, balsamum de Copahu & peruvianum; trochisci Gordoni, hydromel, aqua calcis, &c. Conducibilia sanè sunt hypnotica; quæ tamen cautè sunt adhibenda; nec diutius quàm par est horum protelari debet usus. Laxantia, quibus præstat in hoc casu rheum, pro re natâ usurpare licet. Sed haud citrà periculum adhiberi queunt pareira brava, bruscus & petroselinum, æthiops mineralis, aliaque plura id genus, à nonnullis inconsultò laudata. Postremò nusquàm omittendæ ad ulcus vesicæ, injectiones, tùm demulcentes, vel ex ipso lacte; tùm detergentes, è decoctis scilicèt traumaticis, aquâ calcis, trochiscis Gordoni, &c. paratæ. Nec posthabenda enemata demulcentia & terebinthinacea, quæ cruciatus tùm renum, tùm vesicæ compescere solent.

MICTUS
PURULEN-
TUS.

DYSURIA ET STRANGURIA.

QUONIAM hice morbi, simul sæpissimè juncti, ab unâ eâdemque causâ procedere queunt; haud ritè à vulgo Medicorum distinguuntur; vel pro *mingendi difficultate*, plus minúsve molestâ haberi solent. Sua tamen quisque sibi vindicat *signa*, quibus ab affine discrepat. In *dysuriâ* enim urina ægrè fluit; sed exoneratâ vesicâ, planè desinit mingendi cupiditas: aliter se res habet in *stranguriâ*, sub quâ guttatim, & cum dolore stillat lotium; atque indefinente fermè stimulo, vel vacuæ vesicæ laceffitur cervix. Utrumque affectum comitem habent vesicæ phlogosis & ulceratio; æquè ac calculus & mictus cruentus. *Promoveantur* etiam prædicti affectus ab urethræ inflammatione vel ulcere; quibus addere licet commentitias carunculas, de quibus alibi. Stranguriâ infert cantharidum usus, tam internus, quàm externus. Nonnunquàm progignitur à cerevisiâ recenti, quæ etiam gonorrhœam spuriam curatu facillimam accersit. Natales etiam ducit prædictus morbus à sufflaminatis hæmorrhoidibus, mensibus & lochiis. Affectus postremò venereos dysuriâ & stranguriâ sæpissimè stipari, nemo vel rudis & inexpertus nescit. Insuper arthritici, silentibus paroxysmis, dysuriâ nonnunquàm, à tumente prostatâ, torquentur: stranguriæ

DYSURIA

ET

STRANGU-
RIA.

pertinacissimæ *obnoxii* censentur senes; hâcque fugaci sæpiùs conflictantur hypochondriaci & scorbutici.

E relatu *naturæ rimatorum* colligitur, à vesicæ lapidibus, vel exulceratione, dysuriam & stranguriam sæpissimè progigni. In apicum veniunt calculi grandiores & multiformes, superficie nempe inæquali, angulosâ, rubrosâ vel aculeis horridâ, nunc in vesicâ fluitantes, nunc in peculiari capsulâ, de quâ suprà, reconditi. Patent ulcera fundum & latera vesicæ occupantia; sed sæpiùs ejus cervicem obsidentia. Conspicitur præterea hoc urinæ receptaculum phlogosi correptum, skirrhosum, occallescent, nigrum & sideratum. Occurrunt in ejus cavo abscessus, farcoses fungosæ vel cancrasæ, pustulæ diversæ sortis, nunc integræ, nunc ulcusculis depastæ: vasa totius organi, sed præsertim cervicis, turgida & varicosa deprehenduntur: prostata tumida sæpiùs conspicitur. Vesica in nonnullis ultrâ modum dilatata, & quandôque dilacerata, vel herniâ à sede dimota; nonnunquam skirrhusa & callosa se præbet; in aliis contracta tam à prægresso morbo, quàm à propriâ conformatione conspicitur: nonnunquam demùm planè desideratur hoc organum, cujus munia tùm explent ureteres: ut de nonnullis aliis vitiis congenitis, sed rarissimis, sileamus. Cæterùm premitur quandôque vesicæ cervix à tumoribus partium vicinarum; ab aneurismate, aliove tumore; ab stupendâ vaginæ, uteri lapides vel molam continentis, vel ovariorum mole; à tumido intestino recto; à quâvis stagnatione, &c. Coronidis loco notare expedit, quòd nil quandôque occurrit, nisi renum læsio, à lithiasi, à phlogosi, purulentiâ, exulceratione, &c. planè inculpatâ vesicâ: imò & in quibusdam nullæ deteguntur, nec in renibus, nec in vesicâ morbi reliquiæ; causâ scilicet in nervis, vel vasis sanguineis latitante.

E prolatis luce clariùs patet hunc morbum nonnunquam esse indomabilem, curamque merè palliativam efflagitare, præsertim sub ætate proVectiori. Proficiuæ tamen censentur in potiori agrorum parte *venæsectiones*; quæ summam imprimis opem conferunt post sufflaminata solita sanguinis profluvia: sed pluris habentur diluentia & *demulcentia*; aqua nempe pulli vel vituli, serum lactis; infusa, seminibus lini & papaveris, radicibus napi, althææ, nymphææ & fragariæ, parata; mucagines, oleum amygdalarum dulcium, emulsiones, vel ipsummet lac: quibus addere licet aquas minerales frigidas, tùm acidulas, tùm martiales, quas multis optimè cessisse experienciâ constat. Haud exiguam laudem merentur *sedantia*; nitrum nempe, camphora & liquor anodynus mineralis; imò & narcotica cautè explorare licet. Interea alvus servetur libera ope laxantium blandiorum, cassiæ nempe, roris calabrini, tamarindorum, &c. E traditâ cadaverum historiâ fat intelligitur quanti sit momenti vulnerariorum & balsamicorum usus: proficiuè præsertim adhibentur, annuentibus primi subfellii Authoribus, balsamum copahu & peruvianum, terebinthina, & id genus alia. Insuper minime prætermittendæ sunt *injectiones*, vel demulcentes, è lacte scilicet, ejusque sero, oleo amygdalarum dulcium, &c. vel vulne-

rariâ, è decocto nempè agrimonîæ, alchymillæ, hyperici, aristolochiæ, &c. paratâ. Ultimò maximi æstimantur in foro medico enemata laxantia, demulcentia & oleosa; fots & cataplasmata emollientia, balnea, femicupia, &c. Ut de cereolis & specillis plumbeis in ischuriâ adhiberi solitis conticeamus.

DYSURIA
ET
STRANGU-
RIA.

ISCHURIA RENALIS ET VESICARIS.

FACILÈ dignoscitur, nùm lotium à renum vitio sufflaminetur, vel vesicâ retineatur. Nemo non novit *ischuriam renalem* à nephritide, calculo, phlogosi, alterâve renum labe ortam: sed haud dilucidè patet hæc prædictorum organorum constrictio spasmodica, quæ cæteris abdominis visceribus minime parcit; qualis quotidie observatur in morbis acutis, in affectibus hypochondriacis & hystericiis, &c. Nec minùs latet organi flacciditas & subsidencia, vel prava humorum diathesis, quæ etiam hunc affectum accersunt. Ischuria renalis, præter jam tradita signa nephritidis, dolore obscuro & gravativo circâ renes stipatur: accedunt cardialgiæ, nausea & vomitus: os urinæ sapore afficitur; emergunt spirandi difficultates, somnolentia, &c. Sunt qui ægrè spinam flectunt; sed nùm sub hoc casu ischuria cum lumbagine, vel ischiade implicetur, uti crebrò evenit? solertioribus examinandum relinquimus.

Aliis notis se prodit *ischuria vesicaris*; nempè à tumente vel renitente regione hypogastricâ, à quâdam ponderis sensatione in perinæo; atque ab irritâ meiendi cupiditate, quâ rarissimè premuntur genuinâ ischuriâ renali laborantes. Sed nil hunc morbum clariùs patefacit quàm catheter in vesicam adactus; qui aliàs urinæ exitum promovendo præsentaneum remedium præbet. Ischuria vesicaris ab organi atoniâ, vel torpore, à lapide ejus cervicem obturante, à prostatâ tumente in arthritide anomalâ, alioque obice chronico prodiens, febris ut plurimum est expers; sed si à phlogosi & purulentiâ tum vesicæ, tum prostatæ, uti sapiùs evenit in gonorrhœâ sufflaminatâ, sobolescat; febris incandescit, dolores exasperantur, vires prosteruntur, exsurgit delirium, &c.

Maximum impendere *periculum* à diuturniori *ischuriâ renali*, nemo non intelligit: uberrimus sanè sudorū proventus mortem procrastinat ad duodecimum vel decimum quartum morbi diem: aliàs circâ septimum ad superos migrant ægri qui citiùs etiam conficiuntur, si ischuria renalis à vulnere vel casu ab alto profapiam ducat. Sopor, singultus & suffocatio, sub urinæ suppressione, *ominosa* audiunt *symptomata*. *Ischuria vesicaris*, quam ad paralyfim refert vulgus Medicorum, & cui obnoxii sunt senes, ab stupore vesicæ, vel à prostatâ tumidâ, pendere videtur: spontè enim desinit in pluribus post quindecim, viginti vel triginta dies; dummodò

ISCHURIA
RENALIS ET
VESICARIS.

pluriès per diem *urina catheteris* ope subtrahatur. Mulieres circa ultimos gestationis menses *proclives* sunt ad hanc ischuriæ speciem ; quâ partu illicò liberantur. Hoc incurrunt infortunium qui diutiùs quàm par est *urinam* cohibent ; quod etiam *promovere* valet *salacitas*. Prostata tumida , vel spasmo correpta , hunc morbum infligere solet ; qui aliàs vulgò fove-
tur à gonorrhœæ reliquiis. Ischuriam comitem habet vesicæ inflammatio , quæ intrâ quatuor vel quinque dies ægros è medio tollit ; ni tamen pus conficiatur ; undè emergit *ulcus* nullâ arte domandum , quod sensim misel-
los ægros ad ultimam rerum lineam ducit. Haud silentio præmittendum , aliam nuperrimè inventam fuisse ischuriæ causam haud infrequentem , nempe protuberantem carunculam in cervice vesicæ sitam ; quæ ultrâ mo-
dum sapiùs tumens non solum *urinæ fluxum* sistit ; sed etiam præpedit quo-
minùs fistula argentea in vesicam adigatur ; qui obex ubi innotuit , facile
solerti manu superatur ; circa quæ vide Acta Academiæ Regiæ Scientiarum
anni 1753.

Aperta cadavera exhibent substantiam viscidam & mucosam , lutum gyp-
seum , arenulas & calculos in vesicâ & ureteribus ; non secùs ac in renum
pelvi , quæ etiam crustâ lapideâ obducitur : *ureteres* haud rarò à lapidibus ,
vel grumis sanguinis planè obturantur , & suprâ obicem ad crepaturam
distenduntur ; vel callosi & exsiccati se præbent. Conspiciuntur *renes*
phlogosi correpti , purulentiâ defœdati , putridi , dilacerati & penè con-
fecti ; corrugati , depressi & aridi ; tuberculosi , vel mole ampliores : nil
in quibusdam remanet præter saccum urinâ , hydatidibus , vel colluvie
fœtidâ , turgidum ; qui aliàs tantam molem assequitur , ut vesicæ pellu-
cidæ faciem præ se ferat. Unicus quandòque ren , suo uretere instructus ;
nunc in propriâ sede , dextrâ , lævâque ; nunc in medio situs , deprehen-
ditur. Calculos in venis emulgentibus repertos fuisse à quibusdam , penes
quos sit fides , traditur. De variis stagnationibus & tumoribus vicinarum
partium prædicta organa prementibus , mentio etiam subjicitur. Per tran-
sennam notare expedit quòd à labefactato uno rene , alter , etsi planè
illæsus , in consensum trahatur ; solitisque obeundis muniis impar sapiùs
evadat. Haud defunt postremò cadavera in quibus *renes* & *ureteres* planè
inculpati videntur ; licèt ne parcissimam *urinæ copiam* collapsæ vesicæ
præbuisent.

Haud minora , ut propositum prosequamur , nec infrequentiora obser-
vantur *vesicæ vitia* : præter enim arenulas & calculos , in maximâ extincto-
rum parte reperta ; inflammatione , abscessu , ulcere , gangrænâ , &c.
afficitur illud organum , nonnunquàm dilaceratum. In conspectum quan-
dòque veniunt *sarcosæ polyposæ* , quæ totum vesicæ cavum replent ; vel
tumores skirrhusi & cancrofi , qui pugni magnitudinem nonnunquàm asse-
quuntur. Contractum præterea , tuberculosum , callosum & penè cartila-
gineum , etiam deprehenditur hoc viscus. Reperitur hic *vesicæ processus* ,
qui , *uvula instar* , osculo vesicæ prospicit , tumidus , inflammatus , skir-
rhosus vel occallescent : nonnunquàm aliàs annotatur inversa hujusce
visceris

visceris membrana interna. Suas etiam patitur læsiones prostatica, quæ fæpissimè phlogosi tacta; vel mole amplior, skirrhusa & callosa cernitur: nec immunis est urethra, quæ calculo, aut sarcosi impedita & planè ob-
turatora detegitur. Postremò ante oculos versantur herniæ ingentis molis; abscessus, aneurismata, aliique tumores diversæ fortis, circa vesicæ cer-
vicem siti; vaginæ & uteri, necnon intestini recti, stupenda moles; uteri prolapsus, intestina flatu distenta, &c. Vesicam postremò ultrà modum dilatatam, nullâ manente labe conspicuâ, reperiri suprà inculcavimus: talem enim vidi suprà umbilicum ascendentem, & dimidiam imi ventris partem replentem; qui non secùs ac in graviditate, tumebat; in viro quadraginta annorum, qui nescio quo fato, Chirurgo sciolo, sed inexercitato, se curandum tradiderat.

Medelam, quam sibi vindicat *ischuria renalis* à febre, phlogosi vel nephritide orta, silentio prætermittimus, ne crambem repetitam apponamus. Opportunè in aliis casibus celebratur sanguinis missio, præsertim è saphenâ, si ætas & vires ferant: quod præsidium nonnunquam etiam congruit ischuriæ vesicari, præcipuè si à cohibitâ gonorrhœâ concitetur. Interea cautè sunt usurpanda diluentia & demulcentia; quæ ubi obicem superare minime valent, morbum, uti nemo non intelligit, exasperant. Sed summam opem præstare queunt diuretica; dummodò tamen renes nullum vitium organicum contraxerint; inter quæ usitatiora audiunt nitrum, succus limonum, parietaria, calcitrapa, raphanus, alkekengi asparagus & bruscus. Nec inutilem opem ferunt cataplasmata è cepis coctis & parietariâ confecta, & lumbis in eundem scopum imposita. Sed nullum fortè diureticum sibi par habet pareira brava: plurimùm quandòque conferunt aselli, balsamum copahu, sal succini, spiritus nitri & vitrioli, &c. A nonnullis celebratur pulvis apum; nec vetantur ipsæmet cantharides, si immineat interitus. Irritis postremò omnibus hisce præsidiis ad emeticum tanquàm ad sacram anchoram confugere fas est; nonnullos enim decumbentes, & cum morte colluctantes, hocce præsidio tempestivè adhibito ex orci faucibus ereptos vidi.

Omnia diuretica insensissima fore in *ischuriâ vesicari* nemo non videt: sed proficua sunt *enemata* emollientia & oleosa: senibus verò congruunt terebinthinacea. In usum quoque trahuntur fots, *cataplasmata* & lini-
menta emollientia, balnea & semicupia: nec futilia censentur pediluvia, tum calida, tum frigida. Sed plurimùm deprædicatur, in hâc ischuriæ specie, non secùs ac in renali, cataplasma è parietariâ, vel cepis coctis paratum & regioni hypogastricæ admovendum. Nec despicienda sunt lini-
menta cum oleo formicarum vel scorpionum; quorum usus tamen perpe-
ràm eviluit. Quibus incassum tentatis, opportunè immittitur *catheter*, qui unicum in ætate provectâ præsidium audit. Haud minorem fortè opem con-
ferunt *specilli plumbei*; *cereoli* simplices vel compositi, & diversæ crassitie; ubi obex morbosus in urethrâ latitat. Si verò ad vesicam attingere minime liceat, & urinâ obruatur illud organum, ad *paracentesim* per-

ISCHURIA
RENALIS ET
VESICARIS.

perinaeum vel hypogastrium, nullâ morâ devenire expedit. Hæc est vulgatissima methodus, quæ, ut verum fatear, haud semper ritè succedit; cur ad aliam simpliciorē, secundis avibus, me contuli; quæ versatur in solâ immessione *specilli argentei recti*; quod solerti manu ductum quemvis obicem, si excipias lapidem urethræ impactum, superare valet. Sed minime arrident simpliciora, uti pluriès expertus fui, sciolis & nasutulis, qui ad altiora, ut fucum faciant, sese accingunt. Plura de hâc re addere vetat instituti ratio; nec finit angustior pagina.

D I A B E T E S.

Sic vocitatur uberius, vel *insolitum urinæ profluvium*; morbus senibus & cachecticis familiaris; ac frequentior quàm vulgò fertur. Sed ægros & Medicos, de urinis parùm sollicitos plerùmque fugit, ni ad acmen pervenerit. Urinæ sub hoc statu non solùm solito majori copiâ minguntur; sed etiam à nativâ indole deflectunt; materiâ scilicet chylaceâ vel oleosâ scatentes conspiciuntur. Primis ab *invasione* temporibus nullam vel levem patiuntur molestiam ægrotantes, imminentis periculi planè nescii; sed *procedente morbo* secùs evenit: tùm enim emergit *febris lenta* siti stipata; saliva spumosa excernitur; alvus pigrior evadit. Interea de æstu interaneorum, qui præcipuam sævitiam exercet in lumbis, conqueruntur ægri, vires prosteruntur; totum corpus macie conficitur, aliaque exsurgunt symptomata quæ febrem hecticam, vel, ut inquiunt, colliquativam, concomitari solent. Hinc patet diabetem ad certum gradum provectum morbum esse *luctuosum* vel immedicabilem; præsertim si à renum, hepatisve vitio organico pendeat, quod haud rarò evenire, docet autopsia anatomica.

Diabetem accersere queunt labores ardui, aliaque exercitationes immodicæ; castra veneris, vel amoris æstus qui in furorem vertitur; vinum liberaliùs sumptum, vel aquæ ardentes diversis titulis insignitæ. Hunc affectum nonnunquàm etiam infligit inconsultus stimulantium diureticorum usus; nec absimilem effectum exerunt ipsæmet aquæ minerales frigida vel thermæ, si intempestivè & diutiùs quàm par est adhibeantur. Cholera demùm haud rarò post se trahit diabetem; qui aliàs inter graviorum morborum reliquias haud immeritò recensetur.

Señtis hoc morbo sublati, in apricum veniunt renes flaccidi & collapsi, lapidibus referti, purulentiam tacti, vel putredine defædati. Portentosam quandòque molem præ se ferunt prædicta viscera, vel involucris crassioribus & penè cartilagineis obducta se præbent, &c. Reperiuntur ureteres à recto vel solito itinere deflectentes; ultrà modum dilatati, vel calculis fœti. Nec inculcata occurrit vesica; quin potiùs summam crassitiem sæpiùs contraxit; tumore gangrenoso compressa; perforata & in intestinum

rectum hians; vel maculis gangrænodeis signata conspicitur; ut de ejus defectu nativo taceamus. Hepar in pluribus labefactatum deprehenditur; etenim deforme vel stupendæ magnitudinis annotatur; aliàs obvium fit infarctum & skirrhosum; livore affectum, putredine tactum, &c. ut de liene calloso, putrido, aliorumve viscerum læsionibus post omnes morbos chronicos observari solitis, fileamus.

DIABETES.

E præfatis patet quid factu opus sit: eò scilicèt collimandum ut restinguatur sanguinis æstus; ejus impetus frangatur, & in integrum restituantur particulæ balsamicæ quibus orbatur. Hinc opportunè præcipiuntur temperantia; serum nempè lactis, infusa & decocta cichorii, borraginis, agrimonix, pimpinellæ & symphyti: sed omne ferunt punctum *demulcentia*; lac scilicèt, cremores hordei & oryzae, emulsiones, juscula è testudinibus parata; quibus addere lubet gummi tragacanthum, arabicum, &c. His præmissis ad absorbentia devenire expedit; uti corallum, lapides cancrorum fluviatilium, cornu cervi præparatum, &c. Proficue etiam adhibentur *adstringentia*, ceu rosæ rubrae, plantago, equisetum, sumac, bistorta, mala cydonia, catechu, acacia, alumen, lapis hæmatites, & martialia vel aquæ minerales hujusce indolis, &c. Quod ad venæ sectionem attinet; planè exulare debet, licèt proponatur tanquàm polychrestum præsidium à nonnullis, qui genuinum hujusce morbi characterem nequidem subolfaciunt. Sed haud inanem operam ludunt *cathartica* blandiora, quæ serum è tubi intestinalis parietibus eliciendo, tantùm renibus subtrahunt: similemque effectum præstant enemata purgantia, quæ aliàs alvo adstrictæ, quâ conflictari solent ægri, medentur. Nec in alium scopum laudantur sudorifica, guaiacum nempè, sassafras, antihecticum Poterii, &c. Sed cavendum inter horumce postremorum usum, ne sanguis jam effectus & æstuans ulteriùs excandescat. Proficua nonnunquàm censentur hypnotica; laudanum nempè, tinctura anodyna, diacodium, &c. sed cautè præscribi debent hæc remedia, ne morbosæ renum flacciditati torporem addant. Haud defunt ultimò alia medicamina; aperientia nimirum, roborantia, vulneraria, detergentia, quæ pro re natâ, opportunè sæpiùs in usum trahi queunt. Ægrè sanè intelligitur quomodò tot diversæ fortis remedia uni affectui congruant: minime sanè mirum, si diabetes cum variis morbis sæpiùs implicetur, vel ab alio pendeat.



MICTIO
INVOLUN-
TARIA.

MICTIO INVOLUNTARIA.

INFANTIBUS & senibus familiarem esse hunc affectum nemo nescit; cum illo tamen discrimine ut infantes inter dormiendum lectum permingant; & urinæ in senibus vel vigilantibus, furtim transfluant, etsi sæpius matulam petunt. Cæteris tamen ætatibus minimè parcat *urinæ incontinentia*; quam *promoveant* intempestivus diureticorum usus; calculus vesicæ, lapsus ab alto, & immersio in aquam frigidam. Hanc sæpius post se trahunt partus difficilis & cystotomia. Suboritur ab apoplexiâ aliisque affectibus soporosis; ac demùm inter graviorum morborum symptomata numeratur; quibus sævientibus inscii se permingunt ægri. Infantes, procedente ætate, parentumque monitis, vel increpationibus, hoc morbo liberantur; qui ægrè curatur in proVectâ ætate; ac planè *immedicabilis* censetur, si à vitio quodam vesicæ organico foveatur.

Quoniàm mictio involuntaria ab atoniâ plerùmque, vel torpore vesicæ prodit; obvium fit, cur hujusce morbi reliquæ *in cadaveribus*, quærentium oculis se subducant. Nonnulla tamen annotantur vitia, tam in urinæ organis, quàm in partibus vicinioribus: reperta fuit scilicèt colluvies ferrosa circa medullam spinalem. Renes quandòque mole ampliores, ulcere exesi vel lapidibus fœti deprehenduntur. Cernitur vesica contracta, crassior & callosa, dilatationisque experta, livida & gangrænosa, ulcere tacta, abscessum recondens, lapidibusque scatens. Tumores occurrunt partibus conterminis accreti, qui suam in hocce viscus pressionem exercent. In aprium veniunt ureteres ultrà modum dilatati; atque vesicæ plus æquo compactæ & expansionis nesciæ, vicem gerentes, &c. De variis ulceribus fistulosis quibus urinæ per scrotum, perinæum & podicem, indefinenti stillicidio fluunt; nec de hoc vitio congenito, quo lotium per umbilicum exitum sibi parat, mentionem subicere haud è re nostrâ fore putavimus.

Quod ad *curationem* spectat, hanc naturæ committendam esse in infantibus nemo nescit. Ab omni etiam medelâ sæpius abstinere præstat ergà senio confectos, quorum vires fatiscentes nullâ arte restitui possunt. Aliàs eò collimandum ut inertis vesicæ tonus in integrum restituatur: hanc opem conferre queunt adstringentia, aqua nempe in quâ extinguitur later vel ferrum candens; vinum rubrum generosum, rosæ rubræ, symphytum, equisetum, nuces cupressi, catechu, mastiche & martialia. Eundem etiam effectum exerere valent aromatica; mentha scilicèt, salvia & calamintha, piper, caryophylli, nux moschata, &c. Simili ratione, si purgantibus per alvum opus sit, selignantur rheum & myrobalani. Præterea minime despiciendæ sunt injectiones aromaticæ & roborantes; non secus ac enemata, cataplasmata, fots, semicupia & linimenta quæ

iisdem viribus pollent : balnea demùm frigida hunc morbum sæpiùs fugasse traditur. Inter anilia medicamina referri debet pulvis muris , aliaque consimilia ab infulsâ plebe decantata ; quæ tamen nihil vetat experiri , si ab ægris obnixè efflagitentur : nemo quidem nescit quid valeat ergà omnia remedia *agrotantium fides*. Nonnullis demùm excogitarunt machinulas , quibus comprimuntur penis & urethra , ut appellenti lotio exitum præcludant : in eundem finem constantur pessaria sequiori sexui congrua : sed hæc citrà incommodum minime ferre queunt ægrotantes , qui ideò talia gestare planè recusant. Cæterùm nemo non novit vasa vitrea , argentea , vel è corio confecta , quæ congruè adaptata stillantem urinam excipiunt ; nec aliâ arte fœtori occurrere valent munditie studentes.

MICTIO
INVOLUN-
TARIA.

C A T A R R H U S V E S I C Æ.

Hoc titulo insignire lubet *morbum vesicæ inauditum* , vel quëm paucis vidisse contigit. Hoc ægritudinis genus fors mihi obtulit in nobilissimo juvene , vix ex ephebis excedente ; qui septem abhinc diebus à febre rheumatico-arthriticâ quatuordecim dierum evaserat ; dùm incidit in morbum , de quo in præsentiarum. Orsus est hic occultæ indolis affectus horrore , quem excipit febris : hâc vigente de dolore in epigastrio conquerebatur æger ; quem pressio pede sequebatur stranguria. Turbidæ intereâ mingeantur urinæ ; quæ dein , *procédente morbo* , sedimentum uberrimum subalbicans & mucidum deponebant ; cujus tamen copia singulis diebus increverat ; adeò ut quartam lotii partem demùm superasse , nemine reluctante , constiterit. *Febris* ferotinis horis recrudescebat , & catarrhalium faciem præ se ferens , circâ decimum quartum diem evicta fuit ; lotio tamen persistente crassissimo usque ad duos ferè menses , à fugatâ febre. Quo stupendo materiæ morbosæ dispendio vires atterebantur , nedùm restituerentur ; totiusque corporis marcor maximum *marasmi metum* injiciebat. Venæ sectionibus summâ cum cautelâ celebratis , diluentibus , temperantibus , sedantibus & laxantibus impugnata fuit hæc secunda febris. Quoad remanentem vesicæ morbum ; omnibus ritè perpensis , ejus *curationem* , congruo accedente regimine , naturæ committendum esse consultum visum fuit ; nec fefellit eventus.

Minime reticendum plures accitos fuisse *primi subsellii Medicos* ad invisendum , nostris curis commissum , agrum inter magnates conspicuum , qui post accuratissimum lotii examen in contrarias , uti mos est , abierunt partes. Hanc enim materiam merè purulentam plures declararunt ; inter quos nonnulli ejus fontem ad renes referebant ; alii negabant , & commentitii illius puris prosapiam vesicæ tribuebant. In neutram sententiam

CATARRHUS
VESICÆ.

flexebatur nostra opinio; cum nobis videretur hanc *materiam inodoram* genuinum esse mucum à vesicæ lateribus transfudantem, vix ab similem ab illo quem sub fluxionibus catarrhalibus præbet membrana pituitaria narium, faucium & bronchiorum. Hanc opinionem, cui annuebat peritissimus ARCHIATER, haud à vero alienam fuisse luce clariùs patuit à morbi exitu. Ægrè enim concipitur quomodò & quâ arte, ulcus vesicæ vel renum, quod tantum puris proventum suppeditasset, intrâ breve tempus, solo fermè naturæ beneficio curatum fuisset. Nec superest dubium circâ *partem affectam*; nùm scilicèt renes, an vesica hanc materiam mucosam præbuerint? cum è traditis signis satis superque nota fuit hujusce postremi organi læsio. Caterùm de hocce affectu altum apud Authores silentium; si tamen excipias clarissimum HOFFMANNUM, qui cujusdam affectûs, à nostro parùm abnuentis, historiam in suis conciliis tradidit, sub titulo rari vesicæ morbi; quâ sanè liquet haud minorem inter coætaneos fuisse controversiam circâ hujusce inauditi morbi indolem, quem ad vesicam referre minime dubitavit laudatus Author.



HYDROPS ABDOMINALIS.

AB abdominis intumescentiâ, & laticis stagnantis fluctuatione, cujus sonus nonnunquàm auditur, *in propatulum* venit *ascites*; quem, ceu aliam hydropis speciem, præire solet tumor pedum œdematosus. Hunc concomitantur pallor faciei, inappetentia & sitis, cardialgia & flatulentia, tussis sicca & spirandi difficultas, febris lenta, marcor artuum superiorum; & œdema non solum crurum; sed etiam scroti & ipsius penis. *His procedentibus* alvus ægrè exoneratur; urinæ parcè fluunt, atque nunc limpida, nunc turbida, lateritiæ vel crocæe profunduntur. Intereâ venter ulteriùs prominet, & in tantum fastigium attollitur ut proprio pondere ad genua usque quandòque prolabatur: cur sit ut tegumenta ultrâ modum distenta variis rimis findantur. Cum tympanitide & leucophlegmariâ nonnunquàm implicatur ascites, qui etiam genuinæ vel spuria graviditati sociatur. Sed passim occurrunt meretriculæ, vel virgines vetitis amplexibus inquinatæ, quarum tumens uterus ascitem mentitur: quem errorem fovet commentitii morbi historia, astutè excogitata: cur minimè mirum, si decipiantur vel solertiores. Suis tamen *signis* distinguitur uterque status: præter enim liquidi fluctuationem quæ planè deest in graviditate, sub quâ etiam hypogastrium magis protuberat, quàm in ascite, suum nitorem servat utero gerentium facies, quæ pallore defœdatur in ascite. Fallacia verò sunt *indicia* à mensibus desumpta, cum in utroque statu fluere, vel sufflaminari queant. Sed pathognomonicum graviditatis signum præbet fœtûs motio, quæ circâ quartum quintumve mensem perspicua fit; ut de cæteris conceptûs signis infra tradendis fileamus.

Ægrè etiam *innotescit*, nùm *colluvies serosa* in abdominis cavum colligatur, adeò ut hâc stagnatione madeant viscera, an peculiari cystide è peritonæo & omento; vel uteri, ovariorum, renum, &c. involucris prognatâ recondatur. Deprehenditur enim fluctuatio in utroque morbo ad certum gradum evecto; quidquid in contrarium adducant nonnulli Scriptores, qui pecorum ritu aliorum vestigia premunt. *Hydropem* tamen *cysticum* dignoscere licet circâ prima morbi tempora, priusquàm majus incrementum sumat, à tumoris ambitu, qui haud totum abdomen ut in ascite occupat: tùm etiam nulla persentitur fluctuatio. Sed si, adolescente morbo, in altum attollatur imus venter; unum superest *signum* à latice paracentesi educto depromendum; colluviem enim lutulentam, fœtidam, cruentam vel purulentam præbere solet hydrops cysticus; quod rariùs evenit in ascite. *Hydatides* etiâ sæpiùs recondit hydrops cysticus abdominalis; quæ bullarum aquearum instar continent materiem limpidam & fluidissimam; aliàs glutinosam, ductilem, ichorosam, saniosam, &c. albam aut flavam, fuscâ, viridem vel nigram. Sæpiùs occurrunt hydatides racematim dispositæ, & invicem hærentes; vel liberæ, & fluido innatantes: quandòque mutuis, favorum instar, concrescunt lateribus: ad orbicularem, vel ovatam formam accedunt, aut pyriformes observantur. Ab obstructione vasorum lymphaticorum oriri hydatides conijcere licet; quæ hinc majori copiâ reperiri solent in hepate, in ovaris & tubis, in peritonæo & omento, in mammis, genu, glandulâ thyroideâ, aliisque partibus quæ tumoribus cysticis sedem præbent, qui mole duntaxat discrepant ab hydropis cognomini, de quo in præsentiarum: nec fortè differunt hydatides, ratione ortûs, ab atheromate, steatomate, aliove id genus tumore. Nonnulli, ut in orbitam revertamus, quamdam umbilici depressionem inter hydropis peritonæi signa numerant ob scilicet illius membranæ adhæSIONem, quæ tamen sæpiùs solvitur; adeò ut *mendax* quoque sit illud *indiciu*m. Sunt qui velint tumorem scroti *hydropem peritonæi* in propatulo sistere; sed haud minùs infidum censerì debet illud indicium, cùm hæc intumescencia, uti neminem anatomicum fugit, à duplici causâ prodeat; ab affecto scilicet corpore celluloso, peritonæo adnato, & vasa spermatica obvolvente; ac ab infarctis generalibus tegumentis; ut evenit in omnibus ferè hydropis speciebus, & præsertim in anasarca.

Si tamen hæc accuratiori examini subjiciantur, apertiùs elucescet hydropis cystici *diagnos*is: præter enim tumorem in hâc vel illâ abdominis parte magis prominentem, haud obscuratur nitor faciei, viget appetitus, respiratio liberiùs exercetur, uterus sua obit munia, & partes rarò, vel rariùs marcescunt: secùs verò evenire in ascite jam suprà notavimus. Prætereà tardior sit ejus progressus, seriùsque tument crura. Postremò nullum ferè incommodum parit hic affectus præter quamdam ponderis sensationem, ratione molis plus minùsve molestam, de quâ conquæ-

HYDROPS
ABDOMINALIS.

HYDROPS
ABDOMINALIS.

runtur ægri. Sed in cimmeriis latet tenebris prima hujusce morbi invasio, cum planè desiderentur prodromi, qui ascitem prænuntiare solent.

A viscerum abdominalium infarctu skirrhuso plerumque *promovetur* utraque hydropis species: sed explorantes digitos planè fugit hæc læsio organica, dum tumet abdomen; quæ facilè detegitur post laticis evacuationem, notissimâ arte chirurgicâ celebratam. Eductæ aquæ, nunc limpida vel lotii æmula; nunc subvirides, oleosæ, cruentæ, faniosæ, purulentæ; aliàs gelatinosæ, lutulentæ & fœtidæ se præbent. Nonnunquam fæces vini æmulantur; vel lactis, chyli redolent. Stupenda est aquæ copia, quæ sub utrâque hydropis specie in abdomine coacervari potest, cum haud ad centum libras, & ultrâ, nonnunquam accedere variæ testentur historiæ.

Ad hydropem abdominalem proni sunt potiores; huic obnoxii censentur cachectici, scorbutici & arthritici. Hanc colluviam post se trahunt prægressæ hæmorrhagiæ immodicæ; vomitus præsertim sanguinis, & sputum cruentum; maximumque à venæ sectionibus hujusce laticis dispendium. Ascites præterea *promovetur* ab ictero & leucophlegmatia; sobolescit à febre quartanâ alterâve intermittente contumaciore. Hunc inferunt morbi acuti graviore; solitorum profluviorum suppressio, morborum cutaneorum retrocessus; ulcerum & fistularum exsiccatio. Sed crebrius, uti jam annuimus, hanc stagnationem comitem habent skirrhi, tumores, aliæque viscerum abdominalium labe. Hanc demùm caveant puerperæ, quæ à rectâ vivendi normâ deflectunt; opiparè viventes; qui cupidius, potuque frigidissimo delectantur, &c.

Ascitem facilius curari in sequiori sexu, quàm in altero, docet praxis; sed in utroque *pertinacior* est *hydrops cysticus*. Si, uti haud rarò accidit, à sufflaminato lotio, nullâ præexistente viscerum labe, ortum ducat *ascites*, inanem metum incutit & *curatu facilis est*. Exemplo sit mulier triginta quinque annorum, poculis plus æquò indulgens, licet haud infimæ plebis; quæ paucis abhinc hebdomadibus ascite, abdominis intumescentiâ, & aquarum fluctuatione, summè conspicuâ, laborabat. Pramisso levi cathartico, nihil ipsi meæ curæ commissæ præcepi præter ptisanam nitrosam, & tralatitia juscula diuretica, quibus lotio uberiùs erumpente intrâ duodecim dies venter detumuit; atque nullis relictis morbi reliquiis, pristinae sanitati restituta fuit. Minime sanè mirum; si plures ascitici, experienciâ teste, spontaneo urinæ profluvio, vel diarrhœâ, nullâ arte concitatâ, curentur. Nec defunt quorum aquæ stagnantes exitum per umbilicum sibi parant; donec complanetur abdomen; nec aliâ egent medelâ. Sed rara sunt hæc *fausta natura molimina*, in quorum expectatione, ab omni curatione abstinere absonum foret.

Ascites, curatu difficilior, quàm leucophlegmatia è quâ sæpius sobolescit, inter morbos *contumaciores* jure recensetur. Imò & pro immedicabili habetur annosus vel inveteratus; eò quòd foveri solet à maximâ viscerum

cerum abdominalium strage. Nonnunquàm tamen exhauriuntur aquæ, tum paracenteseos ope, tum medicaminum evacuantium præsidio: sed melius minimè se habent ægri; quin potiùs marasma conficiuntur; vel in luctuosum hydropem iterum incidunt, quibus ruunt ad interitum. *Ominosa* audiunt sub hocce morbo *symptomata*, icterus, atrophia, febris erysipelacea, urinæ saturatè rubræ, sputa cruenta, immodicus hæmorrhoidum fluxus, &c. Læsionis in hepate, vel hydropis pectoris suspicionem movet tussis crebra & sicca. Horror demùm & rigor inordinatè recurrentes haud infida purulentia internæ præbent indicia. Conducunt in primis morbi temporibus vomitus & alvi fluxus; sed secùs se res habet in aliis. Expectatissimum in quovis morbi stadio est urinæ profluvium, sed rarò profunt sudores. Incausum tamen erumpunt prædictæ evacuationes, uti jam inculcavimus, si vitæ insidientur pessumdata viscera.

Eò major *curationis spes* elucescit, quò latex punctione eductus ad lotii indolem proximius accedit; sed limpidæ & albicantes, graveolentes, cruentæ, purulentæ & fæculentæ aquæ exitium portendunt. Si, depleto & complanato abdomine, persistat spirandi difficultas, pulmones etiam à ferosâ colluvie obrui primum est credere. Ascites graviditati junctus, ab effluxu aquarum antè partum erumpere solitarum, nonnunquàm solvitur: sed si remaneat hydrops, & imus venter ab egresso fœtu vix detumeat; res periculosa est aleæ. Ascitem ad plures annos; decem scilicèt, duodecim & ultrà, protrahi neminem practicum sanè fugit. De quâdam mulierculâ, quæ hydropem peritonæi per quadraginta annos gestavit, mentio subjicitur. Vidi mulierem nobilissimam quæ hydrope ovarii per triginta annos laboravit; quâ scilicèt ità in immensum creverat abdomen, ut decumbente ægrotante, aliàs macilentâ & staturæ humilis, nil ferè præter orbem conspiciebatur. Traditur demùm historia similis morbi ad quinquaginta annos protelati in virgine quâdam, quæ circà octogesimum octavum ætatis annum fati cessit.

Numerosissimæ prostant *cadaverum observationes*, utrumque hydropem respicientes; sed fusiori stylo ab Authoribus exarata, laconico & consueto sermone contrahere; atque memoratu digniora è proprio penu decerpta colligere, è re nostrâ fore putavimus. Itaque præter varios latices, nunc inodoros, nunc ultrà modum fœtentes, de quibus suprà; reperiuntur hydatides, de quibus suprà, diversæ molis, tum in genuino ascite, tum in hydrope cystico. *Hepar* in potiori extinctorum parte labefactatum deprehenditur; nunc in portentosam molem exsurgit, nunc ità marcescit, ut vix pugni magnitudinem superet: prætereà decolor, lividum, croceum, subviride, plumbeum, vel nigrum se offert. Ejus ambitus granulis, tuberculis vel vesiculis obductus conspicitur; inibique annotantur prorepentia vasa lymphatica & summè conspicua. Ejusdem visceris substantia skirrhosa vel callosa tantam quandòque duritiem contrahit, ut lignea & lapidea videatur; quæ aliàs tuberculis purulentis vel gypseis scatet; aut abscessus, hydatides, steatomata, &c. recondit. Tumorem ad duritiem lapidis

HYDROPS
ABDOMINALIS.

ferè accedentem, & ligamento hepatis suspensorio adnatum, annotatum fuisse traditur. Invenitur vesicula fellea ultra modum dilatata, & septem vel octo bilis libras continens; aquamve merè limpidam, albicantem & insulsam, nonnunquam colligens. Abscessus præterea, tumores anomalos, hydatides, pseudo-calculos, &c. haud rarò recondit prædictus folliculus; qui etiam depressus, corrugatus, & omnimodè vacuus in nonnullis detegitur. Patet lien stupendæ magnitudinis skirrhusus, occallescent, vel à lapidum duritie haud multum recedens; aut cujus superficies tuberculis purulentis vel gypseis exasperatur. Visendum se præbet epiploon, aquæ vel hydatidum copiâ turgens; quod etiam crassissimum & immensæ molis, ponderis scilicet octo vel decem librarum; steatomatosum, purulentum; corrugatum, contractum; vel putredine absumptum deprehenditur. Similes ferè defædationes exhibet peritonæum, quod nonnunquam à nimia elongatione disrumpitur.

Insuper oculis subjicitur *stomachus* flatulentiâ præter modum turgidus, aquâ in nonnullis copiosissimâ, vel colluvie sordidâ, repletus, gangrænâ & putredine tactus, dilaceratus; lateribus skirrhusis ad pollicis crassitiem accedentibus, &c. Occurrunt *intestina* flatibus ad crepaturam turgida; & præsertim colon, quod femoris crassitiem nonnunquam assequitur; aliàs inflammata, ulcerosa, putrida & lacera conspiciuntur: tenuia in nonnullis mutuo accreta, glomeramen quoddam referunt. Obvium fit *pancreas* ingens infarctum, ulcere exesum, vel putredine diffuens. Cernitur mesenterium infarctu skirrhuso crassissimum, induratum & penè cartilagineum; inflammatum, tuberculis oblitum & sideratum. In conspectum venit peritonæum quasi cartilagineum, & stupendæ crassitiei; tuberculis refertum, phlogosi & gangrænâ tactum: visus etiam fuit hic processus membranaceus, septi instar; abdominis cavum in binas partes dividens, quarum una duntaxat colluviem coërcebat. In propatulum venit umbilicus hians, è quo stillabat stagnans colluvies, vel ipsummet lotium trans perviam venam umbilicalem huc appellens. Aspiciuntur renes aridi, nudi, vel involucri adiposo orbat, hydatidibus conspersi, skirrhusi, ulcere confossi, lapidibus fœti, à coërcitâ urinâ fœculentâ ultra modum expansi; & nonnunquam dilacerati; non secus ac ureteres & vesica, è quibus rimis lorium in abdomen profunditur. Observatur *uterus*, nunc mole amplissimus; nunc contractus, calculos & hydatides continens, ulcere defædatus, &c. in immensam etiam molem crescunt ovaria, aquâ, succo glutinoso, materiâ adiposâ, &c. turgentia; ac nonnunquam centum circiter libras pendentia; quæ aliàs skirrhusa, purulenta & putrida apparent: eademque contrahunt vitia tubæ fallopianæ. Omnia quandoque coalescunt viscera abdominalia ad putredinem vergentia, & crustâ gelatinosâ, quæ nihil aliud est quàm pus concretum, obvestiuntur. Interea reperiuntur tumores fungosi & cancrofi ex hepate, stomacho & intestinis, utero & ovariis, &c. exsurgentes; atque hydatides fluitantes, vel prædictis organis hærentes. Postremò nonnunquam patet genuinus liquidi stagnantis fons

in fisso vase lymphatico, dilaceratis venis lacteis, & receptaculo pequetiano; vel apertis renibus, ureteribus & vesicâ, cæteris inculpatis visceribus.

HYDROPS
ABDOMINALIS.

Superest ut breviter referamus quæ ad aliam hydropis abdominalis speciem spectant. Itaque diversam præbet molem *cystis* quæ morbosum laticem colligit: in tantam enim sæpius assurgit, ut in angustissimum spatium coërceantur circum ambientia viscera. Hinc fit ut inexperti cadaverum scrutatores, de *hydrope tunicato* ne minimam quidem suspicionem habentes, & nil præter aquam in ingenti cavitate cernentes, mirentur in primâ abdominis sectione, omnia viscera desiderari; quæ tamen ulteriori indagatione, facillimâ arte deteguntur. Variam sedem habet hæc hydropis species, quæ crebrius peritonæum obsidet; adeò ut liquidum concludatur inter prædictam membranam & musculos abdominales, qui capsulæ complementum efformant; & hinc emergit illud latissimum spatium quod pro genuino abdominis cavo ab incautis haberi solet. Aqua insuper colligitur in omentum, renes, tubas fallopianas, ovaria, &c. quorum propria involucria in ipsummet folliculum faceffunt, & diversam assequuntur molem. Ovaria, imprimis tantam amplitudinem adipiscuntur, ut nonnunquam, teste autopsiâ, pondus centum librarum superent: circa quæ notare expedit quod eorum latera à tantâ expansione minime extenuentur; quin potius stupendam crassitiem hâc dilatatione adipiscantur; adeò ut ovarium apertum & exinanitum viginti quinque libras & ultra etiamnum ponderabat: nonnunquam etiam recondunt prædicta organa materiam gelatinosam, butyrosam, sebaceam, &c. Cæterum reperiuntur cystides visceribus non deformibus adnatæ; hepatis nempe, omento, utero, &c. quæ sanè haud tantam assequuntur amplitudinem. Utræque laticem diversæ indolis, materiam gelatinosam & hydatides variæ molis, nunc solitarias, nunc racematim congestas continent. Nonnunquam peculiaribus sepimentis intersecantur prædictæ capsulæ, adeò ut hinc emergant cellulæ inter quas nullum quandoque occurrit commercium; cur fit ut haud rarò fluida diversæ naturæ recondant. Reperitur postremò omentum stupendæ crassitiei, tuberculis steatomatosis scatens, vel passim putridum. Coronidis loco addere lubet quòd nonnunquam reperiatur colluvies serosa in capsulâ aponeuroticâ rectorum abdominis musculorum, vel inter laminas conterminorum; undè emergit quædam imi ventris protuberantia, quæ ascitem sæpius mentitur.

Præter hanc viscerum abdominalium stragem, alias in pectore lesiones cernere licet. Inibi nimirum reperiuntur stagnationes à memoratis vix absimiles: in apicem veniunt pulmones pleuræ, mediastino & diaphragmati accreti, tuberculis scatentes, purulentia & exulceratione defædati, putredine confecti, &c. Visendum se præbet cor mole portentosum, vel marcidum & contractum; cujus valvulæ, cartilagineæ, ossæ, vel lapidescentes occurrunt: patet ejus ambitus ulcusculis exesus; suo involucro firmiter hærens; crustâ gelatinosâ, de quâ suprâ, obvelatus; maculis subal-

HYDROPS
ABDOMINALIS.

bicantibus, pellicularum malè cohærentium instar, de quibus alibi, signatus: præterea diluviem serosam, saniosam, purulentam, fœtidam, &c. sæpissimè recondit pericardium; quod aliàs in nonnullis planè deficit; undè cor nudum conspicitur. Varia demùm reperiuntur vitia in lustrato capite, quæ parùm ad nostram rem pertinentia, consultò prætermittimus.


Parùm discrepat ascitem *curandi methodus*, ab illâ quæ leucophlegmatiz congruit; quæ præsertim versatur circà diversæ fortis evacuantia & obstructions referantia; in quorum subsidium veniunt roborantia, nonnullaque alia suprà tradita medicamina. Selectiora duntaxat & diuturniori usu comprobata paucis complectemur; ne crambem recoctam apponere videamur. Itaque in primis morbi temporibus, profunt emetica; quæ aliàs futilia & noxia censeri debent. *Purgantia per alvum*, rheum nempè, jalapium, iris nostras, folia orientalia & salia hydragoga per totum morbi curriculum usurpare licet; quibus tamen præsidiiis haud plus æquo fidendum. Gummi-gutta à WILLISIO celebrata, elaterium, trochisci alhandal, aliaque drastica, in anasarca curatione proficua, minùs asciti conveniunt; cur haud nisi summâ cautelâ præscribi debent. Sed omnem implent paginam aperientia, præcipuè *diuretica*; id genus sunt cichorium, cerefolium, lingua cervina, radices fragariæ, apii sylvestris, brusci, &c. Pluris habentur aselli, nitrum, tartarus vitriolatus, sal Glauberi, salia genistæ & tamarisci; vel lixivium ex harumce plantarum cineribus, ope aquæ vel vini albi parata; quibus addere licet aquas Plumberianas, Borbonienses Anselmieneses, &c. sed nil fortè efficacius reperitur quàm *scilla* notissimis elaborationibus subjecta: cæteris enim incassum adhibitis præsidiiis, plures ex orco revocasse hoc solum remedium, multiplici experientiâ constat. Praxi edoctos minime latet *roborantia* tum aromatica, tum amara; baccas nempè juniperi, rheum & helenium, cinnamomum & cassiam ligneam, absinthium & centaurium minus, &c. in aperientium & diureticorum agmine insignem locum sibi vindicare: hanc classem etiam subeunt crocus martis, tartarus chalybeatus, aliaque ejusdem indolis præparata officinalia. Nonnullis demùm pro re natâ profunt depurantia & antiscorbutica; fumaria nempè, lapathum, nasturtium, berula, &c. nec sunt despicienda *topica*, de quibus, dùm de anasarca, egimus; quibus addere licet sal marinum abdomini calidè admotum, quod, teste BOERHAAVIO, nonnullis optimè cessit. Parergi loco adjicere lubet plures à denegato omni potu persanatos fuisse; qui scilicet sitim quâ torquebantur cum frustulo panis tosto, & aquâ vitæ irrorato, compescebant: nec desunt qui hoc regimen à LISTERO celebratum ad tres menses & ultra faustè protelarunt.

Si irritis omnibus hisce præsidiiis ventris moles incrementum in dies summat & molestè ab ægris feratur; ad Artem Chirurgicam, *paracentesim* nempè, confugere nil vetat; quæ ritè succedit, si morbus non altas jam egerit radices, & inculcata fuerint viscera: aliàs ægros qui fortè longiorem vitam traxissent, in orci fauces præcipientes mittit. Nemo non novit instrumentum huic operationi dicatum, acum nempè tricuspideum, cannulâ ar-

genteâ contentum, ità ut cuspis emineat; eâ lege formatum ut perforato abdomine acus commodè retrahi possit; cannulâ in ventris cavo manente. Ubi peractâ hâc evacuatione venter per quindecim circiter dies iterùm intumescit, nulla fermè curationis spes elucescit: sæpiùs tùm iterari debet hâc operatio ad ægrorum vitam protelandam: hanc enim quinquagesiès in quâdam muliere; in aliâ verò ultrà centies, per triennium, celebratam fuisse fertur. Illud notare expedit quòd maximi sit momenti, post eductam aquam, ut venter fasciis ritè appositis deligetur & comprimatur, aliàs posthabitâ fasciatione aqua majori proventu irruit in abdomen post paracentesim quàm antè; vel abdominis vasa solito pondere orbata suis obeundis muniis imparia evadunt: equidem sæpiùs iners est illud præsidium à defectâ hâcce cautelâ: imò & necesse est ut respiratio priùs impedita haud plus æquo ab institutâ hâc operatione levetur. Cingulum ad hoc opus eximium excogitavit clar. MONRO quod circumducitur abdomini tumido, ante paracentesim, & per fibulas adducitur, dùm aqua effluit; in hunc finem ut semper maneat æquabilis pressio, etiam exhaustis aquis; & sic præcaveatur syncopes, vel subitanæ mortis discrimen post eductas aquas. Hinc solertiores & experti integram aquarum evacuationem minime suadent, ubi in immensum tumet abdomen, ne fatiscat vasorum vis elastica: quod altâ mente tenere debent inexperti. Nec sufficit vulgatissima punctio ad hydropem cysticum; cùm fistula ad hoc opus conflata laticem fœculentum, vel hydatides excipere minime valeat: hinc jure præfertur sectio, quam apertam servant; non solùm ut novissimæ materies per hunc hiatus faciliùs exitum sibi parent; sed etiam ut possint pro lubitu injici decocta detergentia, summè in hoc casu conducibilia. Ægrè verò exhauritur hoc ulcus fistulosum; sed parvi haberi debet incommodum, quo imminens lethum deflectitur. Setaceum postremò vel cauterium inter has angustias nonnullis profuisse fertur.

HYDROPS
ABDOMINALIS.





PRAXEOS MEDICÆ

PARS PRIMA.



LIBER SECUNDUS.

MORBOS EXTERNOS SPECTANS.



SECTIO PRIMÆ.

DE GENERALIBUS, VEL INCERTÆ SEDIS.



O B E S I T A S.

IN ÆGRITUDINUM censu vix locum consequitur hæc corporis dispositio; quam tamen periculi minime expertem esse nemo ambigit: *nimiâ* enim *saginâ* impediuntur motuum organa, cur fit ut levi labore, minimâque corporis exercitatione ingruant lassitudines; imò & emergant spirandi difficultates. Nec visceribus parcit adeps; ab uberrimâ enim ejus congerie itâ sæpiùs obruuntur organa interna, ut demandatas functiones, pro naturæ instituto, minime exerceri queant: cur minime mirum si graviores morbos minetur hæc constitutio; asthma nimirum, hydropem, apoplexiam, vel mortem subitanæam. Intereâ corpus sub *corpulentia* *nimiâ* stupendam sæpiùs molem assequitur; adeò ut ejus pondus ad octingentas libras nonnunquam accedat; ambitus abdominis octo pedes gallicos superet;

OBESITAS.

atque tanto oneri ferendo impares, fatiscant ægri. Illud per transfennam notare expedit, quòd hæc stupenda corporis crassities non impedit, quominus agiliores inter natandum, minus submersionis periculum incurrant corpulentiores; nec latet Physicos hujusce phænomeni ratio.

Autopsia anatómica exhibet corpus cellulosum cuti subiectum tantâ in quibusdam adipis copiâ refertum, ut ad altitudinem duodecim vel quatuordecim pollicum accedat; dùm nil notatu dignum quandòque conspicitur in abdomine & pectore, quorum viscera ab insolitâ pinguedine libera, illæsa deprehenduntur. In aliis verò tantâ quantitate colligitur corpus adiposum circà cor & pulmones, atque viscera abdominalia, ut horum munia, vitalia nempè & naturalia, ægrè, uti jam innuimus, vel ignaviùs absolvantur. Cor præsertim & renes stupendâ quandòque pinguedinis mole sepulta jacent: epiploon & mesenterium ob maximum hujusce materiæ proventum, solitam crassitiem longè superant: eâdem scatet corpus cellulosum peritonæo, pleuræ & mediastino adnatum, &c. Hinc intelligitur, cur plus æquo gravata viscera collabantur, & sanguis perenni motu hæc perluens impeditâ vasorum oscillatione, tardiori impetu suos volvat vortices; & statim sæpiùs patiatur.

Huic morbosæ corporis dispositioni occurritur congruo regimine; in quo sanè præcipuum versatur *curationis momentum*: parcè scilicèt cibentur ægri; ipsis præbeantur edulia aceto, aniso & feniculo, cinnamomo, aliisque aromatis condita. Ab euchymis alimentis abstineant: fruges terræ carneis dapibus anteponant: caveant ne longiori somno indulgeant; & otio plus æquo recumbant. Arduis econtrà laboribus se exerçant; donec fessi sudore diffluant. Quod ad *præsidia Medica* spectat; veratur venæ sectio, ni præceps urgeat occasio. Conducunt *cathartica*, quæ identidem exhiberi debent. Profunt medicamina diuresim, diaphoresimque moventia: suas laudes merentur saponacea, sed instar omnium sit acetum scilliticum, quod haud immeritò in hoc casu à solertioribus clinicis celebratur. Sunt qui aquam marinam summis laudibus extollant; sed præter saporem palato ingratum, & potiori ægrorum parti invisum, hanc citrà periculum minime adhiberi posse crediderim. Idem dicendum de diuturniori & immodico aceti usu, alteriusve acidi: quidam, narrante clar. HALLERO, obesus cujusdam scioli consilio ductus, per annum & ultrà immodico acidorum usui indulgebat: contabuit miser ad extremam maciem, & accedente vomitu obiit; cujus exenteratione reperiëbatur ventriculus skirrhosus.

Suis etiam pollent viribus *remèdia extùs admota*. Opportunè nimirum celebrantur frictus cum pannis asperis, quibus referantur cutis spiracula. Hunc effectum citiùs præstant caldaria, vel hypocaustra, quæ uberrimos sudoris rivulos eliciunt; ut sileamus de aliis modis, quibus promoveri solet perspiratio. Proficue adhibetur fumus tabaci, fistulâ congruâ haustus; nec exiguam laudem merentur alia *sialagoga* stimulantia; Nicotiana nempè, pyrethrum, angelica & imperatoria; semen sinapi, staphis-

agriæ,

agriæ, erucæ, &c. quibus debite masticatis, pleno gurgite erumpit latex salivaris. Cæteróquin ptyalismus ab hydrargirosi concitatus nonnullis profuisse fertur: sed paucos esse reor qui illud remedium audeant experiri; ni ad alterius morbi medelam sese accingant.

OBSITAS.

A T R O P H I A.

NEMINEM latet hoc titulo designari extremum macilentia gradum; qui etiam *tabes* & *marasmus* vocitatur: sed haud omnibus patet discrimen quod occurrit inter *atrophiam* primariam, vel *essentialem*; & *symptomaticam*; quam scilicet comitem habent varii morbi chronici. Nec rectius fortè distinguitur *tabes juvenum*, à *marasmo senum*; licet ratione causæ plurimum distent prædicti affectus: atrophia enim juvenilis ætatis, Anglis & Batavis familiaris, ab æstu ingenii, vel studiis intensioribus; ac nonnunquam ab intempestivâ venere, vel ab immodico seminis dispendio, ortum ducit; dum aliæ causæ submittitur marasmus senilis; ariduræ nempè vasorum, quæ sæpius in propectâ ætate osseam duritiem contrahunt: ni, uti sæpissimè evenit, à viscerum labe foveatur. Haud infrequens occurrit *atrophia primaria*, quam inferunt castra veneris, amaræ sollicitudines, vel graviores curæ, aliaque vehementiora animi pathemata. Contrahitur à labore improbo, ab inedia diuturniore, ab inconsulto liquorum ardentium usu; à calidiorum ciborum, vel cupediarum delectatione, &c.

Atrophiam symptomaticam vulgatissimam post se trahunt graviores morbi tum acuti, tum chronici; sed hanc præcipuè accersunt purulentia vel exulcerationes internæ; infarctus skirrhusi, aliæve viscerum defædationes. Suboritur ab immodicis profluvii sanguineis, dysenteria contumacissimâ, & annoso alvi fluxu; ab ptyalismo diutius protracto, diabete verustiori, sudoribus chronicis, aliisque fluxibus qui à naturali normâ recedunt. Hanc pariunt nonnulla venena, quæ clancularias vitæ struunt insidias. Atrophia insuper *obnoxii* censentur hypochondriaci, scorbutici, scrophulosi, &c. ut silentio prætermittamus varios affectus, alibi recensendos, quæ teterrimam maciem impertiri valent. De atrophia infantum nil addimus, cum de eâ suo loco seorsim agere consultius visum fuit.

Utrumque marasmm jam adolescentem concomitari solet *febris hæctica* vel lenta, quæ sæpissimè pro morbo essentiali habetur ab imperitis & incautis, qui sanè in morbis intricatioribus præcipuo; vel magis perspicuo hærent symptômati; & nil plus vident: væ sanequidem miseris agris. Aliis subrepat error circa febrem lentam, quam huncce typum, ante quadragesimum vel sexagesimum diem, à primo cujuscumque febris exordio, nusquam contrahere falsò sibi persuaserunt. Haud fugit sanè in arte peritos febrem hujusce commatis sæpius occurrere, præsertim in melan-

ATROPHIA.

cholicis ; quæ non solum citius accedit , sed etiam ante prædictum terminum desinit ; adeò ut febris lenta à chronicorum ordine sæpius sit expungenda. Cæterum pro inani circa nomenclaturam controversiâ , nequaquam dicta habeantur ; cum majoris sit momenti in arte medicâ , ut singulis affectibus proprium indatur nomen ; ne ab accepto falso , vel fortuito , commentitium morbum incauti prosequantur ; vel incongruæ curandi methodo hæreant.

Ægrè sæpius distinguitur atrophia essentialis , à symptomaticâ , cum simili fermè modo procedant , eandemque faciem præ se ferant. Nec errorem desectunt solertiores , ni in subsidium veniat accurata morbi prægressi historia ; atque omnia , tum præsentia , tum præterita signa accuratiori examini subjiciantur. Nihilominus nonnullas intermissiones plerumque subit primaria , quæ sanè desiderantur in symptomaticâ. Sub atrophîâ essentiali , de quâ in præsentiarum , tardiores fiunt progressus ; nec nisi morbo jam adulto caput exerit febris , quæ ferotinis horis paululum exacerbatur. Diutius etiam in hac specie viget appetitus , & respiratio liberius exercetur , quæ tamen in dies difficilior evadit , præsertim in quâvis corporis exercitatione. Nonnulli contabescunt , de doloribus vel quâdam fornicatione juxta dorsum conqueruntur : alii dolorem capitis gravativum , cum aurium tinnitu patiuntur. In pluribus involuntaria fit seminis emissio , tum per somnum , tum inter vigilandum ; quâ scilicet sensim collabuntur vires. Interea appetitus prosternitur , & alvus antea pigrior ultra modum solvitur. Hancque diarrhœam , quam vocant colliquativam , plerumque concomitantur sudores ejusdem indolis ; quibus vires ulterius exhauriuntur. Facies demum arida , foedo vel subviridi pallore inficitur ; acuminantur nares , excavantur tempora , retroaguntur oculi , & obscuratur visus ; è quibus collectis emergit facies , ut inquit , hippocratica.

Rarò prodeunt enumerata symptomata è *senum marasmo* , cujus invadendi modus vix fit conspicuus ; qui etiam essentialis audit : sed licet lentius & tardius progrediatur , omnem Medicorum industriam superat ; & ægros placidè ad ineluctabile fatum ducit. Nonnulli tamen inter senes tabidos in hydropem exitialem incidunt ; alii immani per totum corporis ambitum pruritu nullâ arte compescendo torquentur. Præterea insipidi fiunt vel exquisitiores cibi , aliæque sensationes ægrè exercentur , vel planè deficient : quorum infortuniorum agmen sæpius claudit gangræna , quæ non solum in viscera irruit , sed etiam ad partes externas transmittitur ; & hinc in propatulo se sistit ; donec senio & macie confecti , tantisque ferendis impares miselli ægri rebus humanis vale supremum dicant.

Haud immedicabilis censetur sub aliâ ætate *atrophia primaria* , vel essentialis , quæ scilicet à nullâ viscerum labe organicâ contrahitur ; dummodò tamen non altas à diuturnitate egerit radices. Nusquam ultra septem annos protelari *tabem juvenum* , traditur ; quod à vero minime alienum erga portiore partem deprehendimus : si tamen pectus inter hocce morbi stadium non afficiatur. Aliud etiam periculum incurrunt juvenes tabidi : nonnun-

quàm scilicèt evenit, priusquàm morbus peroptatam attigerit metam, ut serosa colluvies, tùm in capite, tùm in pectore vel abdomine colligatur: quid ex hocce consortio emérat; nemo non intelligit. *Ominosa* audiunt, procedente atrophîâ, *febris lenta exacerbationes*; nec minùs luctuosa censeatur febris acuta; quam frequentiore esse in marasmo symptomatico, quàm in essentiali, per transfennam notare juvat. Haud falsum terrorem incuriunt alvi fluxus & sudores colliquativi: infaustum etiam exitum portendunt urinae oleosæ: vires demùm exhaustæ, cum facie hippocraticâ, præceps minantur exitium.

Numerosissimæ sanè prostant *historiæ anatomicae*, quæ omnes ferè atrophiam symptomaticam respiciunt; adeò ut ex hâcce rerum luxurie paucaduntaxat eruere liceat; quibus in subsidium veniunt observationes è proprio penu depromptæ. Præter infarctus, purulentias, & siderationes; tumores, hærentias morbosas & stagnationes, quæ passim occurrunt; deprehenduntur pulmones indurati, exsuccii, tuberculis vel lapillis fœti, exesi & pleuræ adnati. Cor occurrit aridum & contractum; ac nonnunquam ulcusculis in ambitu exesum; vel protuberantiis exasperatum. Deteguntur in ejus thalamis, vasisque ipsis adnatis, concretiones, ut inquiunt, polyposæ, & quasi coriaceæ; quibus obstrui videntur præcipua hæc cruoris receptacula. Deprehenduntur præterea infarctus skirrholi in thymo, pulmonibus, hepate, aliisque visceribus; quæ etiam livore affecta, emaciata & corrugata reperiuntur. In conspectum venit ventriculus skirrholus, vel erosus: detegitur pylorus contractus, occallescent vel cartilagineus. Occurrunt lien exiguus, durus & quasi osseus; omentum intestinis agglutinatum; mesenterium materiâ quâdam caseosâ vel lapidescente infarctum, purulentum, putridum, & absumptum. Similem labem ostendunt intestina sæpiùs invicem accreta. Annotantur venæ flatu turgidæ; passim occurrit serosa colluvies, quæ medullæ etiam spinali minime parcit: primæ denique viæ haud rarò vermibus scatent. Mirari profectò subit; in quibusdam marasmo denatis, uberiores adipis proventus in mesenterio, in omento; vel circa alia viscera abdominalia. Nec desunt notatu digna in senio confectis; cartilaginee nempe, tendines, ligamenta, arteriæ, valvulæ cordis & duræ matris propagines, ossium instar indurata; ut fileamus de variis aliis læsionibus, quæ ad nostrum argumentum minime pertinent; vel pro atrophie producto morbo haberi debent. Coronidis loco addere liceat me vidisse cadaver cujusvis tabidi, qui skirrholo in stomacho & pancreate laboraverat, cujus artus, licèt frigidissimi, solitam & integram flexibilitatem servabant.

Rarò conducit, ut ad *medelam* deveniamus, venæ sectio: summâ cum cautelâ exhibenda sunt cathartica, si pravæ fordes in primis viis nidulantes hæc expostulent. Quibus præmissis ad resarciendas stomachi vires converti debent clinicorum curæ; aliàs incassum ad curationem sese accingunt; si hoc viscus, uti sæpiùs evenit, morbi fomitem recondat. Hanc opem præstant stomachica amara & roborantia, in quorum agmine principem

ATROPHIA.

locum sibi vindicant malum citreum, cortex peruvianus, absinthium, gentiana, martialia, & aquæ minerales, horum naturæ participes. His peractis proficue adhibentur humectantia, demulcentia & temperantia è fonte diætetico depromenda; id genus sunt cremor hordei & oryzæ, faguisum, gelatinæ, juscula è pullo, cancris fluviatilibus, limacibus & testudine parata; lac, ejusque serum, emulsiones, &c. quæ omnia, si stomachus ferat, præclara obeunt munia. Proindè sedantia, è camphorâ, liquore anodyno minerali, pulvere temperante, &c. petita, omnibus fermè profunt; sed cautè mercandum cum narcoticis. Ritè sæpiùs succedunt balnea: nonnullis utiles sunt frictus: suum symbolum etiam conferunt epithemata stomachica, si digestiones agrè perficiantur. Plurimùm postremò conferunt animus ad hilaritatem compositus, aëris mutatio, gratæ exercitationes, equitatio, &c. Nec inutilia censerì debent hæc præsidia ad atrophiam senum, cum horum beneficio leniatur, vel tardiùs progrediatur: sed ipsis præsertim congruunt analeptica, inter quæ primatum quasi ducit vinum generosum, quo sæpiùs nil præstantius excogitari potest.

HÆMORRHAGIA.

LICET de peculiaribus hæmorrhagiis, quæ crebriùs in praxi occurrunt, totidem distinctis capitulis passim actum sit; nonnulla tamen generalia, quæ omnia *sanguinis morbosa profluvia* respicere queunt, huc colligere haud inconsultum fore cogitavimus; tum ad vitandam recoctam crambem, tum ad varia animadvertenda, quæ prædictis capitulis attexere prolixius foret. Sanguinem crebrò erumpere è naribus, bronchiis, stomacho & intestinis; è genitalibus utriusque sexûs, è vasis hæmorrhoidalibus & cæteris venis varicosis, è dentium alveolis, è vulneribus recentibus, & ulceribus; ac per hæc vias ingens sæpiùs fieri sanguinis dispendium neminem fermè fugit. Huic etiam latè exitum, sed rariùs & parciùs, largiuntur vasa oculos, nares, labia, aliasque oris partes irrigantia. Nonnunquàm demùm profilit cruor è mammis, umbilico, inguinibus; axillis & artubus; ut de sudoribus sanguineis sileamus. His addere lubet haud rarò reperiri viros qui statis temporibus fluxum menstruum, planè innocuum, per hæmorrhoides vel urethram patiuntur.

Juvenes, temperieque sanguineâ vel biliosâ præditi, vegetiores, iracundi & scorbutici, ad largas sanguinis profusiones *proni* censentur: hæmorrhagiæ etiam obnoxii sunt poculis dediti & lautè victitantes. Profluvia demùm sanguinea accersunt aër æstuans & humidus, intensiora studia, labores improbi, &c. *Periculosa* censentur hæmorrhagiæ pulmonum, stomachi, renum, vesicæ & uteri: minorem metum incutiunt sanguinis profluvia è naribus & vasis hæmorrhoidalibus, ac nonnunquàm è mulierum

genitalibus; quin potius proficua non rarò existimantur; præsertim si periodicè recurrant: haud latet enim practicos, varios morbos acutos hæmorrhagiâ narium judicari; adeò ut sanguis sua repagula transiliens pro genuinâ crisi, tunc temporis, haberi debeat; quam prænuntiant pulsus plenus & durus, quædam ponderis sensatio circà orbitas, lacrymatio, sternutatio, narium pruritus, faciei color flammeus, &c. Hæmorrhagia ab ictu, lapsu ab alto, aliâve causâ manifestâ, rarò ominosa judicatur: quæ verò catameniorum vices explet, licèt è pulmonibus vel stomacho prodeat, periculo plerùmque vacat. Quoad cæteras; si diuturniores fiant, crebriusque recurrant, cruore confertim erumpente, habitum œdematosum, hydropem, phthisim, marasimum, &c. post se trahunt. Notare juvat plerosque juvenes hæmorrhagiæ obnoxios ad plethoram esse procliviores; cum eò plus sanguinis conficiatur, quò plus demitur; quod etiam de plus æquo repetitis venæ sectionibus intelligi debet.

Nemo nescit quantum periculum incurrant qui citiùs quàm par est hæmorrhagiam cohibent; sed haud omnibus innotescit hujusce cautelæ meta; circà quam cognitu difficillimam asserere minime dubitamus graviora immine infortunia, tam ab *intempestivâ sufflamine*, quàm à *majori sanguinis dispendio*. Nil sub hisce angustiis certi statui potest à pulsûs vibratione, & ab statu virium; cum plures etiam vegetiores à parcissimâ sanguinis missione animo linquantur; & nonnulli, si Scriptoribus Medicis sit fides, viginti vel quadragintâ libras sanguinis intrâ breve tempus, incolumes profundant: sed si hoc stupendo sanguinis fluxu haud è medio tolerantur ægri, varii ipsis impendent affectus; quos etiam post se trahunt hæmorrhagiæ ad huncce gradum minime accedentes. Docet quotidiana praxis sanguinis profluvium, accidentale, vel periodicum, spontè in plerisque desinere, & ideò nullam medelam exoptulare: sed ubi ultrâ modum protelatur, vel crebriùs & inordinatè recurrit, curationi submittitur. *Infantes*, quibus hæmorrhagia familiaris fuit, pectoris morbis sub adolescentiâ esse *obnoxios*; in ætate verò provectâ, ad fluxum hæmorrhoidalem, affectus spasmodicos, morbos arthriticos, lithiasim, &c. pronos esse, ratum manet apud clinicos.

Señtis cadaveribus hæmorrhagiâ denatorum, vel huic obnoxiorum, occurrunt in capite abscessus alterutrius meningis; sanguis effusus intrâ & extrâ cerebrum; non secùs ac juxtâ medullam spinalem. Referatur pectus exhibet bronchia sanguine obruta; pulmones contractos, exsuccos, pleuræ annexos, sanguine infarctos, inflammatos, tabo conspurcatos & putridos. Deprehenditur cor mole maximum vel exangue; pericardio nonnunquam destitutum. In apricum venit hydrops, tum pectoris, tum pericardii. Annotantur in abdomine ventriculus effuso sanguine turgens, intestina eodem latice scatentia, contracta & putrida: hepar subalbicans & exangue; maximum, induratum, infarctum & tuberosum, inflammatum, purulentum vel abscessum fovens: lien ingens, purulentus, saniosus, durus & lapidescens: pancreas infarctum & skirrhusum; mesenterium & omentum

HÆMOR-
RHAGIA.

HÆMOR-
RHAGIA.

simili labe tacta; sanguis concretus in venâ cavâ; renes ingentes; hydrops abdominalis, &c. Varias genitalium læsiones quæ fovere solent hæmorrhagiam uteri, de quâ suo loco; aliasque defædationes ad hæmoptysim, sanguinis vomitum; mictum & alvi fluxum cruentos, de quibus sub propriis titulis, referendos consultò prætermittimus.

Præcavetur hæmorrhagia sæpiùs ingruens, à venæ sectione, vel admotis hirudinibus. Egregiam etiam in hunc scopum opem conferunt refrigerantia & temperantia; nitrosa scilicèt, acida vel farinacea, serum lactis vel ipsummet lac: sæpiùs etiam haud infauitè exhibentur absorbentia. Sed inertia sunt omnia *prophylactica medicamina*; ni in subsidium veniat recta vivendi norma: exulent scilicèt cibi sale & pipere conditi, vinum & liquores spirituosi, haustus caffè, aliaque id genus calidiora, quæ morbosas vasorum oscillationes, sanguinisque æstum fovere queunt. Nec omittenda sunt balnea, quæ cæteris consentientibus proficuè etiam adhiberi solent. Sed aliâ methodo *impugnari* solet ingens & præsens hæmorrhagia: tùm scilicèt conferunt *venæ sectiones*, quæ tamen certis cancellis contineri debent; cùm sæpiùs nil proficiant; quin potiùs, vasis plus æquo exinanitis, morbum exasperent; imminentes scilicèt convulsiones promovendo; vel œdema & hydropem ocyùs accerfendo. Incausum etiam plerùmque adhibentur anodyna, hypnotica & antispasmodica, quorum effectus alioquin incerti, in re sæpiùs urgentissimâ, tardiores censerì debent.

Sed *præsentaneam opem* ferunt cucurbitulæ siccæ, vincula carpis & maleolis, vel suprâ genua & cubitos, injecta, frictus in remotioribus partibus; extremorum immersio in aquam tepidam, &c. Hùc præsertim spectant topica *adstringentia* & *styptica*, si sinat sedes morbi; lintea scilicèt aceto, oxycrato, vel aquâ frigidâ imbuta, cervici, scroto, &c. admoventur: nec verantur ultimo imminente fato, styptica interna; pulvis scilicèt HELVETII, ex alumine & sanguine draconis conflatus; essentia Rabel, & alia id genus: sed cautè cum hisce adstringentibus internis, vel externis, mercari expedit; nec intùs sunt exhibenda, ni in vitæ discrimen trahantur ægri. Coronidis loco addere lubet quòd inter adstringentia externa exquisitiora, locum obtinet pulvis sympatheticus, omnibus sanè notissimus; cujus efficacia innumeris experimentis constat; dummodò tamen parti affectæ imponatur; ut sileamus de ejus commentitiis viribus, quas procul præstare fertur: ad populum phaleras Postremò minime prætermittendus est *agaricus*, nostrâ ætate celebratissimus, cui vis adstringens falsò adscribitur: qui tamen egregiè se gerit ad sistendam hæmorrhagiam arteriarum; dùm corpus illud lanuginosum, vel tomentosum & obsequiosum fauciato vasi debitè admoveretur; & congruâ compressione coërcetur: sed inefficax est illud præsidium, adversùs hæmorrhagiam narium, de quâ infrà.



PHLEGMONE ET ABSCESSUS.

PHLEGMO-
NE ET
ABSCESSUS.

AD tumores externos devenimus, qui licet in propatulum veniant, haud rarò intricatissimæ sunt indolis; inter quos primum locum obtinet *phlegmone*; quo nomine venit hæc prominens inflammatio cuti, corpori celluloso vel subjectis musculis insidens, & certis cancellis coercita; cujus indolem produnt calor, rubor, dolor, renitentia, vel durities splendori fociata, tensio & pulsatio. Ad phlegmonem proximè accedit erysipelas, cutem duntaxat obsidens; hinc minùs protuberans, & latius serpens. Quoad cæteros *tumores inflammatorios*; bubo, sedem habens in glandulis, magis fastigiatus occurrit: notissimis signis instruuntur furunculus & anthrax: perniones extremis duntaxat partibus incumbunt: paronychia solos digitos afficit: cæteræ inflammationes ab ambustione, morfu, & puncturâ animalium; à contusione, aliâve causâ manifestâ, facilè à genuino phlegmone distinguuntur. Mos, penès quem jus & norma loquendi, invaluit, ut inflammatio minùs protuberans, vel depressior, latissimo *phlogoseos* nomine veniat; quæ, ut verum fatear, parùm aut nil discrepat à phlegmone. A causâ in sanguine vel humoribus delitescente *natales* plerumque sumit *phlegmone*; rariùsque à causâ externâ sobolescit. Febre ut plurimum stipatur, à cujus vehementiâ graviora exsurgunt symptomata, delirium nempe, suffocatio, anxietates, &c. Rudiori modo spectata sub vario schemate se profert phlegmone; genuina enim vel sincera à mero sanguine concitatur; notha verò erysipelatis, œdematis, vel skirrhi particeps se præbet. Legitima, resolutione, vel purulentia ut plurimum judicatur; aliàs in infarctum skirrhosum faceffit; vel gangrænâ corripitur.

Aliarum inflammationum instar, *abscessum* vulgò post se trahit phlegmone. Hæc imminet puris confectio, si ad quartum diem increcant calor & pulsatio; si albescat & mollior evadat tumoris, ut plurimum fastigiati, apex: hunc demùm ultrà omne dubium prodiit fluctuatio; ni tumens vesicula fellea, de quâ dum de colicâ hepaticâ, abscessûs faciem præ se ferat. Sed pus eò tardiùs elaboratur, quò altiùs immergitur phlogosis; quo in casu nativum colorem servat cutis, & obscurior sanè fit fluctuatio. Innotescere tamen potest abscessus; etiamsi intrâ textum partium profundius sepeliatur, & digitis minime contrectetur, à doloris cessatione, phlogoseos remissione, aliorumque symptomatum fugâ. Inordinatos rigores & horrores sapissimè post se trahere abscessus internos, jam suprà notavimus; sed rarò externos concomitantur prædicta symptomata. *Febris*, quæ ab utrisque excandescit, haud ominosa censeretur debet; quin potiùs requiritur *ad puris confectionem*, ut sanguis certo impetu feratur; quâ deficiente agrè perficitur suppuratio; vel tumor skirrhi naturam induit. Sed suis cancellis contineri debet sanguinis velocitas, cujus vehementia non

**PHLEGMO-
NE ET
ABSCESSUS.**

solum suppurationi officit; sed etiam gangrænam haud rarò accersit.

Periculi expers est phlegmone à sanguinis labe, vel humorum dyscrasiâ minime sobolescent: sed aliter se res habet ubi à cachexiâ, vel viru scorbutico, scrophuloso, aut venereo foveatur. Nemo nescit doloris & caloris subitanæ cessationem, & intempestivam tumoris subsidentiam partibus internis minari. Si tumor sensim indurescat, ægrè in suppuratum abit, vel, uti jam annuimus, ad skirrhum vergit. Gangræna verò imminet, si phlegmone livorem contrahat, & erumpant phlyctænæ ex ejus ambitu. Abscessus prominentes & fastigiati spontè aperiri solent: internos nonnunquam exhausti alibi notavimus; quo phænomeno pus sanguini remixtum ad quamvis partem externam irruit, ubi colligitur. Idem ferme evenit ergà abscessus externos, quorum tabum resorptum hepar, pulmones, aliave viscera sæpius impetit. Felicior nonnunquam in utrisque abscessibus habet exitum hæc puris translatio; quod intrà sinum massæ sanguineæ oberrans ad renes, intestina, aliave incernicula appellit; quibus egregio naturæ molimine egressum sibi parat. Alius fit puris transitus ab exterioribus ad interiora, vel vice versâ; dum pus scilicet extus collectum, ratione moræ, subjectas partes erodit & altius immergitur: simili ferme modò materia purulenta intrà pulmones, aliudve viscus latitans, sibi viam cudit ad cutem, ubi fit altera puris collectio; quæ cum priori commercium servat, quod haud citrà costarum cariem in pectore accidit. Prolatis addere juvat, quod præter materiam purulentam, nunc sinceram, nunc sordidam; varia corpora extranea recondunt abscessus; lapides nempe, aciculas, acus, ossa, spicas, globos plumbeos, vermes, &c. de quibus innumera prostant exempla apud Authores.

A venæ sectione prima est auspicanda *phlegmones curatio*; quam pro inflammationis gradu & febris vehementiâ iterare licet. Alvus per totum morbi curriculum, notissimis præsidiiis servetur libera; imò & exhibenda sunt cathartica, si primæ viæ sordibus scateant, aut ægrotantes cachexiâ laborent; quæ aliàs conducunt ad præcavendam metastasim, quâ morbus ad partes internas, maximo ægrotantium damno, transmitti potest. Interea faustè adhibentur humectantia, refrigerantia & temperantia; serum nempe lactis, aqua hordei vel oryzæ, limonatum, emulsiones nitrosæ, &c. Sed cautè præscribi debent hypnotica, etiam urgentibus doloribus; cum suppurationi afficere, & gangrænam accersere valeant. Insuper pro re natâ in usum quandòque trahuntur à nonnullis vulneraria, imò & diaphoretica: sed si quid contulisse visa sunt hæc remedia; id fortè minùs auxilio, quàm tempori, vel morbi genio tribuendum esse censemus.

Cæterum in *topicorum* congruâ administratione versari præcipuum curationis momentum, neminem fugit; quæ ex emollientium & anodynorum, resolventium & maturantium classibus depromi solent. Hæc vel illa seliguntur post benè perspectum tumoris genium, ad resolutionem, vel suppurationem vergens; imò & nonnunquam utraque immiscere licet, si haud

si haud dilucidè pateat morbi indoles. Cataplasmata è lacte & micâ panis, è radicibus lapathi & althææ, è foliis acetosæ, fenecionis, malvæ & verbasci; è caricis pinguibus, mucaginibus, axungiis, oleis, &c. emolliendi causâ conficiuntur. Alia ad resolvendum parantur è floribus chamæmeli, meliloti & sambuci; è farinâ fecalinâ, cumino, fenugræco, &c. Cepæ vulgarissimæ & radices liliorum; fermentum vetus, unguentum basilicum, fuscum, aliaque id genus, maturantium compositionem ingrediuntur. Utrisque quandoque immiscentur narcotica, vel opii grana quindecim aut viginti, ubi scilicèt dolores saviunt: sed cautè admoveri debent hæc postrema, quæ gangrænâ accersere queunt. Nec minùs pertimescenda sunt reperiçientia, quæ succis inibi impactis lentorem, experientiâ teste, impertiri valent; è quorum inertia emergere solet skirrhus.

Ubi à benè perspectis traditis signis scitur *abscessum*, solitum maturitatis gradum assecutum fuisse, incunctanter *ferro* vel *caustico* aperiri debet. Haud pro lubitû seligendus alteruter modus, sed à morbi sede, aliisque circumstantiis, hæc vel illa institui debet operatio, de quâ nil addimus, ne falcem in alienam messem immisisse videamur. Si præmatura fiat abscessûs sectio, reliquum curationis tempus diutiùs protelatur, tardiùsque ferruminatur ulcus; si econtrâ plus æquò procrastinetur, pus acredinem contrahens foveas nonnunquàm sibi cudit, viciniorefque partes lædit. Quod sæpiùs evenire in faucium & ani purulentiâ, nemo nescit. Sed majorem metum incutit diuturnior puris stagnatio; si haud procul à ligamentis, tendinibus, periosteo & futuris colligatur. Alterius sortis minatur infortunium longior puris mora circâ pectus; ejus scilicèt accessus ad organa vitalia; quod pluriès, uti suprà notavimus, evenisse testatur experientia. Curatur ulcus ab evacuato pure emergens maturantibus & detergentibus; unguento scilicèt basilico, mundificativo de apio, fusco, diachylo, aliisque innumeris affinis. In usum etiam trahuntur emplastrum diapalma, Noribergense, aliaque exsiccantia, si ulcus, luxuriantibus succis, plus æquò madeat. Sed, ut verum fatear, plus ad hoc opus conferunt naturæ vires, quàm artis solertia. De variis morbis primariis è quibus sobolescit phlegmone, qui idèò peculiarem, & sibi propriam medelam efflagitant, nec de skirrho & gangrænâ, quæ post se etiam trahit, & de quibus infra, nil addimus.

PHLEGMO-
NE ET
ABSCESSUS.



ULCUS
ET FISTULA.

U L C U S E T F I S T U L A .

RITÈ distinguenda veniunt *ulcera* à phlegmone, erysipelate, bubone & skirrho ortum trahentia; ab iis quæ prodeunt à vulnere, contusione, ambustione; ab admotis causticis, à gangrænâ, &c. Sed alia est, vel majoris momenti indagatio: probè scilicèt inquirendum, nùm quædam delirescat labes in sanguine & humoribus, qui sæpissimè, uti neminem expertum fugit, viru scorbutico, scrophuloso, venereo & cancroso contaminantur. Scitur *fistulam* nil aliud esse quàm ulcus sinuosum & profundius, cujus aditus fundo plerumque angustior occurrit, ob foveas scilicèt quas sibi cudit pus, suâ morâ acerrimum. Familiares & notissimæ sunt ani fistulæ, & lacrymales, de quibus seorsim suo loco agere consultius visum fuit; quod tamen non impedit quominus quædam de hâc re generalia & contracta in hocce capitulo, vel obiter, tradamus.

Facillimè ad mutuum contactum ducuntur ulcerum recentiorum à phlegmone ortorum labra, præsertim sub juvenili ætate, & in iis qui viribus valent; vel florido corporis habitu gaudent: sed secus se res habet inter provectam ætatem, vel in constitutione cachecticâ. *Pertinaciora* sunt *ulcera* ab erysipelate, œdemate, vel skirrho prognata. Quantum curantibus facessant negotium *ulcera* scorbutica, venerèa, scrophulosa, aut cancrosa, nemo sanè nescit. Prætereà ægrè curantur *ulcera* narium, oris, mammarum, & genitalium: vix domari patiuntur *ulcera* putrida, sordida & verminosa, quæ pus fœtidum, glutinosum, cruentum, ichorosum & subviride; vel merum sanguinem, nonnunquàm uberrimum eructant; quorum labia sunt inversa, & hyperfarcosæ, vel carnes luxuriantes, fungosæ, lividæ, subvirides vel nigricantes occurrunt. Omnem fermè curam respuunt *ulcera* phagedænica & fistulosa, quæ ossium vel ligamentorum carie foveantur, ac sanie oleosâ & subatrâ madent. Haud levem terrorem incutit pus sanguini remixtum, ni per pulmones, renes vel sentinam intestinalem, felicissimo sanè eventu, egressum sibi paret; quibus tamen incerniculis lethalem labem nonnunquàm impertitur. Marasimum & febrem lentam sæpiùs post se trahunt *ulcera* antiqua; quæ tamen salutaria evadunt in senili ætate, sub quâ, væ illis qui illa exhaustire & ad cicatricem perducere moliantur; cum ex hâc intempestivâ medelâ pus per hancce viam excerni solitum, viscera impetat, & deleteriam labem ipsis impertiatur; quam exhibent cadaverum extispicia.

Haftenus prolata de ulceribus, *fistulas* etiam respicere nemini haud obvium: cum, uti suprâ notavimus, nihil aliud sint fistulæ quàm *ulcera* sinuosa & cavernosa, quorum curatio majoribus semper premitur difficultatibus; nec plerumque nisi accedente Arte Chirurgicâ perficitur; cum medicamina ipsis admovenda, si demas injectiones, ad ultimos horum

recessus pertingere ægrè vel minime, valeant. Contumaciores & *curatu difficiliores*, vel planè immedicabiles censentur fistulæ, quæ pertingunt ad tendines, ligamenta, cartilagines, & ossa denudata; quæ hinc semper carie læduntur: haud rarò enim occurrunt inter praxim ulcera fistulosa in inguine, quæ soventur à carie costæ; & circà poplitem à carie capitis femoris; in podice à carie vertebrarum lumbarium; imò & dorsalium, teste TULPIO. Plerumque vitæ metam ducunt fistulæ in pectoris vel abdominis cavum hiantes; quarum margines, si inconsultâ medicatione occaluerint, incunctanter recruentari debent; ne inopportunâ ferruminatione, lupus, ut inquiunt, in ovili coërceatur.

Eò collimandum in *ulcerum medelâ* ut congruo & sincero pure madeant; quod brevi absolvitur, si optimæ notæ excernatur hicce latex. A sordibus enim quibus conspurcantur, procrastinatur vel omninò impeditur curatio: ideò hisce everrendis danda est opera, ut dein naturæ beneficio, vel debitâ sarcoticorum administratione horum labra ad mutuum contactum ducantur, & coëant. De remediorum ad huncce usum comparatorum efficaciam, multum controvertitur apud Medicos: sed hanc litem dirimendam quibus plus otii superest, committimus; cum illud duntaxat nobis incumbat munus, ut selectiora, longo & feliciori usu comprobata exhibeamus. In horum censu, primum locum sibi vindicant *maturantia* vel *digestiva*, olea nempe hyperici, liliorum & ovorum; styrax, terebinthina, balsama naturalia, balsamum Lucatelli, vel commendatoris; unguentum basilicum & fuscum; emplastrum diachylon, &c. quæ omnia tempestivè adhibita suppurationem fovere videntur. Doloribus, pruritu, & nimie ariditati occurrunt emollientia & anodyna; decoctum nempe verbasci & nymphæ, solani & capitum papaveris albi, mucilagines, butyrum & cremor lactis; oleum lini & chamæmeli; cataplasma è micâ panis, aliudve affine; unguentum de althæâ, album Rasis, pompholyx & populeum; ceratum Galeni & emplastrum de spermate ceti; quæ præter assignatas vires, puris etiam confectioni egregiè favent. Inter *detergentia* numerantur decoctum hordei, herbarum vulnerariarum, radicum aristolochiæ, foliorum nucis juglandis, &c. unguentum Apostolorum, & de apio; balsamum viride, & Arcæi, aliaque consimilia; quibus addere licet aquas Bellilucanas, Plumberianas, Baregienses, Montis aurei, Mottenses, aliasque thermales congeneres, quæ cæteris detergentibus palmam fortè præripiunt. Nec despiciebant Veteres aquam calidam simplicissimam, vel è succo radicum althææ imprægnatam, quam etiam ad maligna, ut inquiunt, crurum ulcera faustè adhibebant.

Hæc excipiunt medicamina diversæ sortis, quæ uberiori humorum proventui medentur; & hinc *exsiccantia* audiunt; uti cerusa, creta, lithargyrium, tuthia, alumen calcinatum; aristolochia, gentiana, iris florentina; tinctura myrrhæ & aloës, unguentum diapompholygos, emplastrum Noribergense, &c.: nec despicienda aqua golardiana, ceratum vel pomatum saturni, multiplici experientiâ comprobata. Luxuriantibus & fungosis car-

ULCUS
ET FISTULA.

nibus occurrunt cathartica; sabina nempè, aqua calcis, præcipitata mercurialia, unguentum ægyptiacum, balsamum viride, aqua phagedænica, collyrium Lanfranci, oleum camphoræ, butyrum antimonii, lapis causticus vel infernalis, sigillum escharoticum, &c. Superfunt *adstringentia*, quæ tubulorum oscula pus eructantia, vel sanguinem fundentia coarctare valent; quibus viribus pollent rosæ rubræ, balauſtia, equisetum, cortex granatorum, sanguinis draconis, bolus, alumen, vitriolum; aqua styptica & *Rabel*; ceratum de lapide calaminari, &c. Proponuntur demùm, tanquàm tutiora adversùs hæmorrhagiam præsidia, ligatura & compressio. Suam opem etiam confert AGARICUS nostrâ ætate celebratissimus, qui suo molli & flexili contextu hiantibus vasorum osculis faciliùs admovetur; & in hoc solo, uti jam innuimus, versantur decantatissimæ ejus vires.

Hæc sunt *topica* quæ à sanioribus Chirurgis in usum trahuntur, inter curanda ulcera; sed haud crebriùs quàm par est sunt admovenda, vel renovanda. Raram enim medicationem vulnerum, post MAGATUM, qui de hâc re integrum librum conscripsit, commendant solertiores; non solùm ut inhibeatur, quantum fieri potest, aëris accessus; sed etiam ut incœpta suppuratio minime turbetur, & saluberrimum naturæ opus, arti longè præcellens, à genuinâ normâ minime deflectat. Omnibus exhaustis præsidiiis pharmaceuticis, nonnunquàm profuit, inter tractanda pertinaciora ulcera, cauterium parti oppositæ inustum: hoc enim diverticulo puris imminuitur proventus ad antiquum ulcus; cujus labra ad mutuuum contactum sensim accedentia, demùm coalescunt; dummodò tamen inculpata sint subjecta ossa, tendines & ligamenta, quorum caries cicatrici obstat: sed plures ambigunt, nùm satiùs sit novum ulcus confodere, quàm vetus fervare; quod dubium solvit ulceris arte parati fedes, quæ pro habitu collocatur: postremum insuper certis cancellis coercetur; dùm aliud longè latèque prorepere valet.

Alia suppeditat adminicula *Ars Chirurgica* ad curationem ulcerum calloforum & fistulorum, carie implicatorum, vel gangranâ tactorum. Non secùs ac carnes luxuriantes; escharoticis absumuntur occalescentiæ, donec subjacentes carnes melioris notæ detegantur. Ulcera sinuosa injectionibus detergentibus pertractari solent: sed rarò conducit hæc methodus; cur ad sectionem devenire expedit, cujus ope fundum ulceris è quo procedere deber curatio, in aprium venit, & congrua remedia à dilatato & patente aditu excipere valet: aliàs nilum proficiunt, vel exquisitiora præsidia: sed de hâc re fusiùs, dùm de fistulâ ani, vel lacrymali, erit sermo. *Caries* verò impugnari solet euphorbio; ossis, ope instrumenti congrui, abrasione; cauterio actuali, aliisque auxiliis, de quibus suo loco. Domatur gangrana profundioribus scarificationibus; spiritu vini camphorato, aliisque topicis infrâ recensendis. Ultimum, ceteris inanibus, superest præsidium ad ulcera cancroſa, cum carie & gangranâ; partis nempè affectæ extirpatio, vel membri integri amputatio: hæc est sacra anchora; ad quam tamen, nisi omni prorsùs curationis spe ablatâ, confugere nefas.

Sed supervacanea sunt hæc cujusvis fortis auxilia, si quâdam *labe congenitâ* vel *adventitiâ* inquinentur sanguis & humores; sub cujus suspicione, nil non movendum, ut extricetur cujusvis deleterii, atrâ sæpiùs caligine immerfi, indoles; quâ probè notâ, alia incunctanter *ineatur medendi via*. Sed præter virus scrophulosum, venereum & scorbuticum; alia sunt innumera inquinamenta, tum in humorum massâ, tum in primis viis; vel occurrunt variorum morborum implicationes, ægrè sæpiùs evolvendæ, quæ ulcerum curationi officiunt; quibus posthabitis inanem operam ludunt clinici. In immensum cresceret pagina, si recensendis innumeris remediis internis quæ hùc coincidunt, immoraremur: usitiora duntaxat exhibere expedit; quæ primò circâ venæ sectiones, emetica, purgantia per alvum, aliaque *generalia* versantur. Congruit sanè sanguinis missio plethoricis, vel quibus deficiunt consueta sanguinis profluvia; quæ aliàs phlogosi, ulcerum labra, vel ambitum sæpiùs invadenti medetur. Quid conferant emetico-cathartica, si primæ viæ sordibus, seriùs ocyùs ad sanguinem appellendis, scateant; nemini sanè haud obvium.

His præmissis opportunè sæpiùs exhibentur diluentia & *temperantia*; serum nempè lactis, cichorium & borrago, cancri fluviales, aquæ minerales acidulæ, &c. Pluribus etiam prosunt demulcentia, cremores nimirum hordei & oryzae, vel lacticia. Haud rarò conducunt *depurantia*, lapathum scilicet, fumaria, nasturtium, &c. Nec posthabenda *vulneraria* & detergentia interna, quæ congeneribus extùs admodum obsecundant; id genus sunt hypericum, agrimonia, bugula, pervinca, verbena, alchymilla, mel, aqua calcis, balsama naturalia & officinalia, terebinthinæ, &c. quibus adnectere juvat aquas thermales & balsamicas; Bonenses nempè, Baregienses, Aquægranenses, Montis aurei, &c. Egregiè quandòque se gerunt medicamina quæ insensibilem perspirationem & sudores movent, uti china radix, salsaparilla, viperæ, antimonium diaphoreticum, anti-hecticum Poterii, &c. In quibusdam valent absorbentia: nonnullis opitulantur roborantia. Pluribus prosunt aperientia; imò & nonnunquam proficuè adhibentur incidentia: hisce viribus pollere videtur cicuta à clariss. STORK celebrata; quæ sanè, multiplici jam experienciâ teste, summam opem præstare valet; si ulcus cancri naturam redoleat. Norunt sanè in arte periti casus qui singula hæc remedia expostulant; cur huic expositioni inhærere haud è re nostrâ fore putavimus. Postremò vetustiora crurum, aliarumve partium ulcera in senili ætate, curam merè palliativam efflagitare, nemo nescit: adeò ut, ubi ad cicatricem vergere videntur, ope gentianæ, ireos Florentinæ, cantharidum, &c. omni studio foveri debent. Hoc opus etiam præstat sponsia preparata, priùs scilicet ceræ flavæ immersa & prælo fortiter expressa, inibique frigefacta, cujus frustum humiditate loci turgescens, ulcerum labra dimovet, vel fistularum oscula dilatat.

ULCUS
ET FISTULA.

BUBO.

B U B O.

Hoc nomine insignitur tumor phlegmonodes, fastigiatus, pugni magnitudinem sæpiùs æquans vel superans; dolore, calore & pulsatione stipatus; ac glandulis inguinum, axillarum, cervicis, &c. insidens. Sub diversis speciebus se præbet *bubo*, qui scilicèt nunc *simplex*, nunc *venereus*, vel *pestilentialis*, audit; quibus addere licet scorbuticum & scrophulosum, qui rariùs inguina obsident. Ad ovi gallinacei molem accedit *simplex*, in glandulis inguinalibus vulgatissimam sedem habens, & rarò axillas obsidens. Febrem ut plurimùm comitem habet hæc bubonis species, quæ brevi & spontaneâ resolutione sæpiùs judicatur: nonnunquàm tamen pertinacior evadit, & tardiùs ad resolutionem, vel suppuratum vergit: imò & abscessus, qui hinc emergit, difficillimè ad cicatricem perducitur; nec rarò in fistulam vix domabilem facessit. Infantes & juvenes, ac præsertim puberes; cùm plus solito crescant in altum, cum quâdam corporis macie, crebriùs invadit bubo simplex; qui aliàs nulli ætati parcit.

Bubo venereus ab impuro congressu profapiam ducens, ratione molis & diuturnitatis sub vario conspectu se profert: solis glandulis inguinalibus insidet, quarum unam vel plures afficit: ex alterutro, vel utroque latere, ad pugni circiter magnitudinem accedit. Eò faciliùs curatur, quò ad phlegmonem proximiùs accedit: sed secùs se res habet si œdematis vel skirrhi particeps sit; sub quâ implicatione in fistulam sæpiùs facessit; imò & præposterâ medelâ, canceri characterem induit. Pro signo pathognomonico luis venereæ à Chirurgis vulgò habetur hæc tumoris species; quam opinionem cum grano salis accipiendam esse censemus. Minime sanè fallit illud luis indicium, si haud nisi post plures menses & annos, à coitu impuro se prodât; sed ubi amplexus cupidineos pressò pede sequitur; nil certi, quidquid in contrarium adducant Authores, arguit; præsertim si opportunâ curatione evincatur. Notare haud incongruum erit, quod sæpiùs eveniat ut *abstranguriâ*; vel à quocumque urethræ dolore *intumescant glandule inguinales*; quas sedatâ vellicatione, vel fugato dolore, brevi subside, experientia quotidiana docet: simili ratione glandulæ cervicales vel axillares protuberare solent, à dolore scilicèt oris, vel brachiorum; sed fugaces hinc tumores semper à doloris cessatione evanescunt: hinc colligitur hunc glandularum inguinalium infarctum pro bubone venereo perperàm haberi ab imperitis; qui ejus facillimam curationem suis admotis topicis insulsè referunt. Præterea *bubonis faciem* quandoque præ se fert *hernia cruralis*, quâ incauti etiam decipiuntur; nec desunt qui maximo ægrotantium damno, hunc tumorem intempestivâ sectione aggrediuntur. Maximum tamen discrimen occurrit inter utrumque tumorem; hernia enim cujus basis est angustior sphæram accuratiùs mentitur: insuper tactui

cedit, vel notissimâ arte, ad pristinum situm, repulso intestino, planè obliteratur tumor; quæ sanè nota omne dubium solvit.

Bubo pestilentialis, præter inguina & axillas quibus sæpissimè insidet, è cervice, pectore, aurium viciniis, &c. erumpit. Haud nisi grassante peste se profert; indè patet ejus character. Peculiaribus tamen signis à cæteris distinguitur; phlogosi scilicèt corripitur cutis, cui parcent simplex & venerèus: intensior est æstus; æqualis observatur tumoris ambitus, vel pustulis atris & gangrænosus exasperatus; ejusque basim cingit circulus versicolor. Ubi citissimum incrementum sumit, & brevi in suppuratum abit; pro critico habetur; cum ex hâc eruptione graviora leniantur symptomata: aliàs nullum levamen præstat: mortem verò minatur, si retrogradum motum patiat. A benè perspectis hisce indiciis luce clariùs patet harum singularum specierum indoles: sed difficiliùs innotescit typus bubonum scorbuticorum & scrophulorum, qui alterutrum conspectum mentiuntur, ni in subsidium veniat accurata tùm scorbuti, tùm scrophularum diagnosi.

Parùm discrepat bubonum *curatio* ab illâ quæ phlegmonem respicit. *Simplex* spontè judicatur, vel tralatitiis remediis ut plurimùm cedit. Nonnulli tamen occurrunt pertinaciores qui ægrè ab exquisitoribus maturantibus, vel ab ipsismet admotis cucurbitulis domari patiuntur. Bubonis *venerei medela* venæ sectione est auspicanda; accedentibus cæteris generalibus phlegmoni dicatis, ut à depletis vasis partes infarctæ flexiliores & obsequiosiores evadant. Intereà pro vario tumoris statu adhiberi solent emollientia, resolventia & maturantia. Instar omnium habetur cataplasma lacte & micâ panis paratum, quod quævis naturæ molimina egregiè juvare valet: ejus vices interdium supplet emplastrum diachylum cum gummis, si domo egredi cogantur ægri; cujus usus protelari solet etiam aperto abscessu. Similibus imò & præstantioribus viribus gaudet unguentum fuscum. Sed inutilem operam ludunt hæc topica, si tumor sit indolens, & hinc ad suppuratum minime vergat: tùm ad aliam methodum se conferre expedit; admoventur scilicèt cucurbitulæ ficcæ, vesicatoria vel ipsummet causticum; quorum præsidio, in motum acti inibi impacti succi, & concitatæ vasorum oscillationes, puris confectioni favent. Ubi verò prædictis auxiliis morem gerens tumor in suppuratum abit, danda est opera ut ad triginta vel quadraginta dies proteletur hæc purulentia. Hâcce cautelâ declinari potest imminens lues venerea; ad quem scopum etiam venit hydrargyri usus tam externus, quàm internus; celebrantur enim per totum curationis stadium frictus circà tumoris ambitum, cum unguenti neapolitani refractâ dosi; vel admoventur emplastrum de Vigo: intus exhibentur panacea, mercurius dulcis, aliaque mercuralia officinalia, ad huncce usum parata. Confert, sub hâcce curandi methodo, cautus blandiorum catharticorum usus; præsertim si immineat pyralismus. Sed incassum hæc omnia adhibentur remedia, si ulcus in fistulam faceffat, vel skirrhi naturam contrahat; quod infortunium pro signo luis venereæ haud

BUBO.

BUBO.

infido haberi debet; adeò ut ad solitam hydrargyrosim confugere necessum sit; cui etiam nonnunquam obsurdescit bubo skirrhusus, canceri naturam redolens: tùm sanè in solâ extirpatione versatur salutis spes; dummodò tamen sinat sedes morbi: aliàs soli curæ palliativæ inharendum.

Haud minùs conducit suppuratio inter tractandum *bubonem pestilentialem*; imò & expedit ut integra absumatur glandula. Bubonum merè phlogodeorum suppurationem promovent cataplasmata emollientia, & maturantia vulgatiore: cæteris magis congruit emplastrum diachylum: illi phlebotomo aperiuntur; his admoventur lapis causticus; ubi debitam maturitatem adipiscuntur. Non secùs ac in bubone venereo, diù etiam protelari debet purulentia, ad quam juvandam opportunè admoventur unguentum basilicum, & de althæâ, balsamum Arcaï, &c. Nil de cæteris præsidii, suprà traditis, addimus; ne crambem repetitam apponere videamur. Quod ad bubones *scorbuticos* & *scrophulosos* spectat; nullum est dubium quin horum cura externa, methodo generali & vulgatori submittatur; sed præcipuam opem conferunt remedia interna, de quibus satis superque dùm de scorbutico & scrophulis: incassum enim ad horum curationem se accingunt Chirurghi, ni virus morbosum in massâ sanguineâ latitans, opportunis vel specificis auxiliis priùs subigatur.

CARBUNCULUS VEL ANTHRAX.

ALTERUTRO nomine, à carbone desumpto, pro lubitu insignitur *tumor inflammatorius & gangrenodeus*, saturatè rubens & splendens, astu intensiori & dolore molestus, plus minùsve protuberans; sed ut plurimum depressus. Hunc sæpiùs præeunt vel concomitantur pustulæ igneæ ardentissimæ, sæpiùs numerosæ, quæ angusto temporis spatio nigricant, vel sphaceli notam præ se ferunt. Tumoris basim cingit areola, nunc flammea & splendens, nunc livida & subatra; è quâ nonnullæ erumpunt phlyctænæ. *Sphacelus*, qui hujusce tumoris characterem præbet, brevi stupendum incrementum sumit, ni notissimâ arte coërceatur. Nil quandoque in conspectum venit præter pustulas phlogodeas, ardentes & vesiculares, basi vix prominente hærentes, quæ brevi ad siderationem vergunt. Notare, per transfennam, expedit quòd ejusdem fortè naturæ sint hæc exanthemata gangrenosa, quæ variolas & febres malignas sæpiùs comitantur.

E præfatis patet carbunculum, suppurationis nescium, in sphacelum abire, in quo, uti jam innuimus, versatur hujusce tumoris schema. Ab *eschare* vel crustæ illius sideratæ prolapsu emergit ulcus, veluti ab admoto caustico inustum, & agrè ad suppuracionem vergens. Nemo nescit *carbunculum* inter *pestis* & *febris malignæ* signa numerari; febrem intensiorem plerùmque promovet hæc eruptio; gravioraque symptomata post se trahit;

hit; sub quibus circumstantiis ominosa censerī debet hæc eruptio; præsertim si faciei, cervici aut pectori incumbat: nec minorem incutit terrorem, si partibus glandulosis, aponeuroticis vel membranaceis infideat: lethalis demum audit, ubi in ore, vel pharynge sedem habet. Insuper viscera hæc labe haud immunia esse docet autopsia anatomica; etenim reperiuntur carbunculi in stomacho, tubo intestinali, renibus, vesicâ, &c.

Pro carbunculo habetur quædam *furunculi species*, vernaculè dicta *Charbon Provençal*, citissimè increscens; cujus apex brevi nigricans, in escharam facessit. In Galliâ Narbonensi quasi endemius, nullâ plerumque febre stipatur hic carbunculus, qui nonnunquam depressus occurrit; vel nil aliud præbet præter phlyctænam è centro areolæ inflammatæ & splendentis erumpentem. Levem incutit metum hic tumor prædictæ regionis incolis; etsi tamen periculo minime vacat; cum haud desint exempla nonnullorum solâ prædictæ eruptionis sævitie interemptorum. Ominosus præsertim censerī debet carbunculus provincialis, si retrogrediatur; quod infortunium sub cæteris anthracis speciebus, præsertim sæviente peste, pro lethali planè habetur.

Eò redit præcipua indicatio, ut *incunctanter coërceatur gangræna*, & è carnibus sanis excutiantur adusti escharæ lobi. Celebrantur in hunc finem sectiones per phlebotomum, vel *scarificationes* ad vivum; quibus imponitur cataplasma è micâ panis, aliudve emolliens: nonnunquam renovari debent prædicta vulnuscule, inter quæ opportunè admoveretur causticum; ut hoc naturæ opus escharæ decessum moliens celerius absolvatur. Huc coincidunt cataplasmata maturantia & antiputrida, quorum compositionem ingredi solent theriaca, unguentum basilicum vel Ægyptiacum, piper, &c. Nonnulli ipsis immiscent pulverem lapidis caustici, vel vitrioli cærulei; nec incongrua est hæc methodus; egregiam etiam opem præstat butyrum antimonii ad promovendum escharæ delapsum; ni satius sit illam scalpelli beneficio auferre. Pertractatur ulcus à casu crustæ sideratæ relictum, unguento Ægyptiaco, vel mundificativo de apio, balsamo viridi Metensium, aliisque id genus digestivis & detergentibus; quibus immisceri solent antiseptica, si imminèat gangræna: hanc opem etiam conferunt aqua vitæ camphorata, tinctura myrrhæ & aloës, aqua phagedænica, balsamum Arcæi, unguentum de styrace, aliaque affinia solertiorum praxi comprobata. Ab usu fermè recessit *cauterium actuale*, quondam familiarissimum, quod, nescio quo fato, eviluit; licèt à celebrioribus practicis inter præstantiora adversus gangrænam auxilia numeretur. Remedia verò interna, de quibus satis superque, dum de peste & febre malignâ, consultò prætermittimus.

Carbunculi Gallo-Provincialis curatio simplicioribus peragitur. Nonnunquam confert venæ sectio; nec inanem opem præstant cætera præsidia generalia. Haud despicienda cardiaca quæ pluribus prodesse experientia quotidiana testatur: suas laudes etiam merentur topica suprâ tradita. Sed in potiori ægrorum parte, omne fert punctum cataplasma è lacte, micâ

CARBUN-
CULUS VEL
ANTHRAX.

panis & ovi vitello paratum; aliudve emolliens & maturans; si tumor ad suppurationem vergat. Ubi verò topicis emollientibus & digestivis haud morem gerit tuber, ad efficaciora devenire licet: tùm scilicet celebrantur scarificationes; in usum vocatur butyrum antimonii; vel cætera adhibentur cathæretica, suprà laudata; quibus opportunè admotis, vel reluctante naturâ, promoveri solet suppuratio.

FURUNCULUS ET AFFINES.

VARIOS tumores parùm ab invicem discrepantes, furunculum nempè, epinyctidem & terminthum, complectimur, ut unâ eâdemque fideiâ plures dealbemus parietes. Nemo non novit *furunculum*, (*le Clou*) cujus diversa est moles. Calore & dolore ut plurimum stipatur hic tumor, corpori adiposo insidens; nunc solitarius & ovi columbini molem sæpiùs superans, nunc stipato quasi agmine prodiens; aliàs uno curato, alter erumpit. Horum sævitie nonnunquam torquentur ægri, noctesque ducunt insomnes. Furunculus tardè quandòque in suppuratum abit, & ægrè rumpitur abscessus; cùm concreseat in plerisque pus, & in spissam, tenacemque materiam, nostratibus *bourbillon*, facessat; quâ sub filamentorum, vel ellychniorum alborum facie, expressâ, relictum ulcus brevi impletur, dummodò furunculus ad benignos, ut inquiunt, referatur. Sed alius haud infrequens occurrit *prava indolis*, qui febre stipatur, gravioraque quandòque accersit symptomata: huncce typum adsciscunt *furunculi scorbutici* & *venerei*, longè contumaciores, qui tantam in nonnullis sævitiam exercent, ut convulsiones promoveant.

Epinyctis tuberculum audit rubrum vel lividum, dolore molestissimum; basi inflammata succrescens, fabæque magnitudinem haud rarò superans. Tardior sit epinyctidis spuria maturatio, quæ rarò sincerum pus, sed sæpiùs laticem ichorosum, vel meram saniem præbet. Sæpiùs confestim erumpunt hæ pustulæ, tùm mole minores, quas papularum variolosarum instar, circà claviculas observasse memini. In hoc versatur hujusce tumoris schema, ut decumbentes invadat, & noctu præsertim sæviat & invalescat; qui aliàs spuriam suppurationem molitur; etsi, non secùs ac furunculus, *periculo* plerùmque vacat. Aliud occurrit, inter praxim, tuberculum ad epinyctidem accedens, quod *terminthus* audit apud Scriptores, nomine ducto à terebinthi fructu, cujus formam & colorem atro-virescentem æmulari videtur. Tibias subtumidas obsidere solet terminthus, qui epinyctidis instar, phlegmonodeam indolem præ se fert; & nil in spontaneâ maturitate, post delapsam crustam squamosam, præter pus ichorosum præbet. Hæc tubercula haud sanè infrequentia, latissimo furunculi nomine ab imperitis salutantur. Nil mali portendunt,

si sua percurrant tempora ; sed haud levem metum incutere debet horum retrocessus.

Pauca remedia efflagitat furunculus : omnem ferè implent paginam emollientia & digestiva è præparatis officinalibus deprompta ; unguentum nempè fuscum , emplastrum diachylum cum gummis , de spermate ceti , Abbatis de Grace , aliaque id genus innumera , quorum usus ad absolutam curationem protelatur. Si à doloribus acerbissimis incandescat febris , mittendus est sanguis , & præcienda veniunt diluentia & temperantiâ ; quibus præsidiiis subungere juvat cataplasmata emollientia vulgatiore , suprâ laudata ; inter quæ minime despicienda acetosa semicocta , & cataplasmatibus instar confusa & subacta. Licet furunculi purulentia tardiùs , uti jam inculcavimus , promoveatur , spontè plerùmque aperitur abscessus ; cur fit ut rarò phlebotomo , vel caustico opus sit. Sed aliud medentibus incumbit munus ; ut scilicèt recidivæ familiarissimæ occurratur ; in hunc scopum præscribuntur refrigerantia & depurantia : nonnunquàm etiam conducunt diaphoretica , vel cathartorum blandiorum usus. Conferunt insuper lacticia , aquæ minerales , &c. Nec omittenda balnea , ut de remediis antiscorbuticis & antivenereis , quæ omnium vota explere valent , fileamus.

Similibus topicis curari queunt *epinyctis* & *terminthus* : rarò tamen adhibentur adversùs epinyctidem , eò quòd pustulæ in plerisque numerosæ , latius se spargunt ; cujus ratione , aliâ methodo pertractari solent : pomata scilicèt , vel unguenta demulcentia , linimenti instar , duntaxat admoventur ; vel merus cremor lactis usurpatur ; quorum præsidio compescuntur dolores ; donec spontaneo naturæ motu suum curriculum compleverit prædictus morbus. Sed aliud curantibus impendet munus ; ut scilicèt ad causæ internæ medelam sese accingant ; cùm à sanguinis vel humorum labe profapiam plerùmque ducere has tuberculorum species , apud omnes in confesso maneat. Idèò probè inquirendum , nùm delitescat in mafsâ sanguineâ , virus scorbuticum , venereum , aliudve diversæ naturæ ; ut debitæ & congruis præsidiiis impugnetur.

FURUNCULUS ET AFFINES.



ŒDEMA ET
EMPHYZEMA.

ŒDEMA ET EMPHYZEMA.

NEMO nescit *œdema* (nostratibus *infiltration*, *enflure*, ou *bouffissure*,) tumorem esse plerumque latissimum, mollem & digitis prementibus cedentem, horumque vestigia aliquandiù retinentem, ac doloris expertem: sed alia occurrit rarior *œdematis* species, vulgatiore instar cuti concolor, renitens & doloris particeps, cui prementes digiti, nullam foveam relinquunt: nec alterius esse indolis hanc intumescentiam *œdematosam*, hysterici familiarem, quæ potius furas quàm pedes afficit, conjicere licet. *Œdema* nunc circumscribitur; hanc scilicet vel illam partem invadit; faciem putà, palpebras, manus, brachia, pedes, crura, &c. nunc totum corporis habitum sub *leucophlegmatia* nomine occupat. Affectum qualemcumque *œdematosum* post se trahunt morbosa & immodica sanguinis profluvia, febres intermittentes pertinaciores; variique alii morbi, tum acuti, tum chronici. *Promovetur* intumescentia *œdematosa* à ligamine & compressione: tumet enim sæpiùs facies à parotidum infarctu; ingurgitantur prægnantium crura ab uteri incremento: eundem effectum edunt viscera obstructa, vel mole majora; quæ impediunt quominus sanguis ex inferioribus redux liberè suum circulum absolvat.

Nullius *periculi* est particeps, & sponte desinit *œdema* à causâ fugaci prognatum; sed secùs se res habet, si cuius morbo chronico natales debeat, vel à viscerum labe foveatur; sub quibus circumstantiis imminet anasarca, vel hydrops pectoris & abdominis. Diù sanè & citrà molestiam in eodem fermè statu perstare valet *tumor crurum œdematosus*; præsertim si à decubitu horizontali, vel calore lecti evanescat: aliàs à majori infarctu tantum incrementum assequuntur crura, ut phlogosi erysipelaceâ nonnunquàm corripiantur; quæ, accedentibus *phlyctanis*, gangrænam minatur. Phlegmones, erysipelatis & skirrh nonnunquàm particeps observatur *œdema*: quid sit metuendum ex hisce implicationibus, nemo non intelligit.

Emphyzema (gallis *boursoufflure*) audit tumor cuti concolor, flatulentus, qui peculiari elatere resiliens prementibus digitis minime cedit; vel compressus illicò se restituit. In quibusdam partibus, exilioribus membranis instructis, nonnihil diaphanum videtur *emphyzema*; quale deprehenditur in palpebris, & crebriùs in præputio & labiis pudendorum muliebrium, undè *crystalline* à nostratibus audit hic genitalium tumor, aqueum laticem præsertim recondens; qui aliàs nonnunquàm rubet, inflammationisque notas præbet. Per totum corporis habitum nonnunquàm diffunditur *emphyzema*; ab altè scilicet inflicto pectoris vulnere; vel post febrem malignam, aliumve graviorem morbum: nec sub hisce circumstantiis periculo vacat hæc intumescentia, quæ aliàs levem metum incutit. Sed alii occurrunt tumores flatulenti & aquosi, ab *emphyzematè* plurimùm discrepantes,

hydatides nempè & *phlyctenæ* quæ observantur in erysipelate; ab imminente gangrænâ; post ambustionem vel admotas cantharides; ab iteratâ compressione, &c. Verum quidem est quod ex emphyzemate palpebrarum & utriusque sexûs genitalium sæpius erumpant prædictæ vesicæ; in quibus aër sincerus reconditur. Quæ ideo ritè distinguuntur ab emphyzemate, quod nil aliud est, quàm infarctus flatulentus.

Œdema à causâ fugaci, vel accidentali ortum, nullam *medelam* expostulat: sed aliter se res habet, si à pravâ sanguinis & humorum diathesi, vel à quâlibet viscerum labe profapiam ducat; cui tùm nullâ morâ, prospiciendum. Conducunt sub hisce casibus stomachica & roborantia; juvant purgantia hydragoga; conferunt diuretica, sudorifica, aliaque medicamina, suprà tradita, interna, in colluviè ferosâ adhiberi solita. Suam opem etiam præstant topica resolventia & tonica; decoctum nempè vinosum absinthii, salviæ, rorismarini, florum sambuci & baccarum juniperi, aqua vitæ, lixivium cinerum sarmentorum; spiritus falis ammoniaci, aqua calcis, aliive fots, quos ingrediuntur rosæ rubræ, balauſtia, alumen, globulus martialis, &c. Summas laudes merentur folia ebuli & sambuci cum spiritu vini contusa & cataplasmatibus instar admota. Ad crura œdematosa, nonnullis profunt tibialia è pelle caninâ parata; vel deligatio solerti manu ducta, quâ pedes & ribiæ æquali pressioni submittuntur. Si demùm sit ingens crurum intumescencia, adeò ut gangrænæ periculum immineat; celebrantur scarificationes, quæ stagnanti latenci exitum largiuntur: hæc foveri solent vulnuscula aquâ vulnerariâ & aquâ vitæ camphoratâ; si quædam appareant gangrænæ indicia; cui sanè proclives censentur siphylitici, scorbutici & scrophulosi. Ubi verò phlogoseos, erysipelatis, vel skirrhi particeps annotatur œdema; hujusce implicationis habendam esse rationem, nemo vel rudis & inexpertus, non intelligit.

Parùm discrepat ab hæctenùs traditâ, *emphyzema curandi* methodus: proficue scilicet extrùs adhibentur aromatica resolventia & discutientia; inter quæ efficaciora censentur salvia, rosmarinus & lavendula; feniculum, anisum & anethum; flores chamæmeli & sambuci; aqua calcis simplex, vel sale ammoniaco imprægnata; spiritus vini camphoratus; emplastrum de baccis lauri, &c. Huc etiam pertinent adstringentia; rosæ nempè rubræ & balauſtia, sumac, alumen, &c. Ubi vulnere implicatur emphyzema, debitâ pressione, vel opportuno frictu, aër inibi stagnans abigi valet: in hunc finem etiam celebrari queunt scarificationes; sed haud omnibus succedunt hæc tentamina. Remedia verò interna, quæ minime posthaberi debent, circà cathartica, diuretica, diaphoretica, tonica, aliaque suprà allata, versantur.

ŒDEMA ET
EMPHYZEMA.

SKIRRHUS

ET

CANCER.

SKIRRHUS ET CANCER.

NEMINEM fermè latet *skirrh* nomine designari hunc tumorem tardè procedentem, durum, renitentem & indolentem; qui cartilagineam, vel lapideam, duritiem nonnunquàm assequitur. Glandulis sæpissimè insidet; aliàs incerta est ejus sedes. Præter enim mammas ad hunc affectum propiores; palpebras, os, cervicem, axillas, inguina & testes sæpissimè *invadit* hic tumor; qui etiam dorsum, abdomen, coxas, &c. occupat: ut fileamus de skirrhis internis vulgatissimis, quæ hùc minime spectant. Phlegmonem, bubonem, œdema, aliosque varios tumores haud rarò skirrh naturam induere, suprà notavimus. Inter morbos *pertinaciores* recensetur skirrh; annosus præsertim, ac in ætate provectâ omnem curationem respuit: sed major subit sanitatis spes in juvenibus & pueris. A viru venereo, scorbutico & scrophuloso profapiam sæpiùs mutuatur hic infarctus; qui melancholicos cachexiâ atrabiliariâ laborantes, vel mœrore & tristitiâ affectos invadere solet; qui etiam à contusione quandòque progerminatur. Leve incommodum parit; ubi nullius est doloris particeps, cutisque nativum servat colorem; ni tamen mole ingenti, vel situ, molestus evadat. Sed si accedant phlogosis, pruritus & dolor, in cancrum facessere solet; quam infausam mutationem sæpissimè promovet intempestivus maturantium & topicorum stimulantium usus.

Tumoris cancrofi, quem *occultum* vocant, characterem produnt color cæruleo vel atro-livido; insolitum & citissimum protuberantiæ incrementum, cum inæquali superficie; venæ circà latera repentes magis conspicuæ, varicosæ, sanguineque atro turgidæ, quæ nonnunquàm peculiari situ chelas cancrorum æmulari videntur. Horumce indiciorum agmen claudit pruritus & dolor plerumque pulsativus. Alia est cancri species, cujus scilicet exordium sub tuberculi, pisi vel fabæ magnitudinem vix superantis, formâ resistit; qui tumor exiguus & indolens diù in eodem statu perstat; vel lentissimum incrementum sumit; adèò ut de eventu parum sint solliciti ægrotantes; nec de illo magis curant inèxperti clinici; donec inter has fallaces inducias pristinam faciem exuat hic tumor; ab accedentibus scilicet subitaneo incremento, dolore, aliisque traditis signis; quibus in propatulum venit *genuinus cancer*.

Interea tumor colore livido perfusus variis rimis dehiscit; & humorem ichorosum acerrimum eructat, qui vicinas partes exedit & depascitur. Hinc emergit ulcus, quod *cancer manifestus* audit; antehàc occultus vocitatus. Longè latèque prorepat prædictum *ulcus*; cujus labia sensim occallescentia fœdum in modum invertuntur, ac dolores in dies exsurgunt atrociores. Fœtorem postremò cadaverosum spargit hoc *sordidum ulcus*, è quo manans *ichor* tantâ virulentiâ donatur, ut etiam admota lintea exurat,

Nunc tardè, nunc ocyùs propagatur ulcus cancrosum, cujus fundus carnes luxuriantes & fungosas præbet; & margines versicolores, horrendo fanè conspectu, tument & invertuntur. Insuper viciniore partes confo-
dendo; vasa occurrentia erodit; hinc emergunt hæmorrhagiæ nullâ sæpiùs arte sistendæ, idè lethales. Quantum defœdetur facies ab ulcere cancroso, quod *noli me tangere* vocitant, nemo nescit. Omnibus etiam innotescit *ulcus tiliarum* phagedænicum, quod *lupi* nomine insignitur, ob voracitatem quâ vicinas carnes depascitur. Intereà *febris lenta*, quam comitem habet ulcus cancrosum ad certum gradum provectum, molestissimas exacerbationes subit: hanc excipiunt marasmus, vel hydrops; quæ infortunia misellos ægotantes ad ultimam rerum lineam ducunt. Præter infarctus phlegmonodeos, skirrhosos & scrophulosos; aliæ annotantur læsiones primo conspectu leviores, quæ canceri naturam induere queunt; tubercula nempè simplicissima, de quibus suprâ; verrucæ, tumores anomali, ulcera vulgatiore, &c. Ad plures annos, citrà ingens incommodum, protelari potest ulcus cancrosum; sed ubi altas egit radices, tantam sævitiem exercet, ut doloribus atrocioribus confecti ægotantes, vel hisce diutiùs ferendis impares; mortem expectatissimam efflagitent.

E præhabitis colligere licet satiùs quandòque fore ab omni curatione abstinere; præsertim si annosus *skirrhus* altas egerit radices; vel cùm cachexiâ senilive ætate implicetur: aliàs haud incongruum videtur *nonnulla experiri remedia*; etsi exquisitiora nil plerùmque proficiunt. Idè præmissis generalibus, temperantia & depurantia in usum trahi solent; serum nempè lactis, cichorium, lactuca, borrago, agrimonia, fumaria, nasturtium & lapathum. Suas laudes etiam merentur aperientia, nimirum aselli, bruscus, asparagus, eryngium, & rubia tinctorum; nitrum, sal Glauberi, arcanum duplicatum, tartarus martialis: hæc excipiunt diaphoretica & incidentia; uti saponacea, antimonium diaphoreticum, cinnabaris antimonii, æthiops mineralis, aquila alba, remedium *Rotrou*; & id genus alia, quæ tamen eâ lege præscribi debent, ut sanguis & humores longo diluentium usu priùs imprægnentur, vel restinguatur horum æstus; atque solidorum contextui debita concilietur flexilitas; aliàs ab hisce stimulantibus irritari possunt crabrones. Suprà traditis incidentibus addere licèt remedium à clariss. VAN-SWIEIEN promulgatum & celebratum adversus tumores skirrhosos & cancosos, mercurium nempè sublimatum, quî ad granum dimidium in unciâ unâ spiritûs frumenti; cujus solutionis cochlear manè & serò exhibetur. Nonnullis insuper profunt absorbentia: cautus laudatur catharticum usus; foliorum nempè orientalium, mannæ, rhei, salis epsomensis & rupellani, magnesiæ, pulveris cornachini, &c.

Omnibus hisce remediis palmam fortè præripiunt *lacticia*; si excipias aquas minerales, tùm frigidas, tùm thermæ, Vallenfes nempè & Forgiensfes, Vervonensfes & Borboniensfes, Plumberianas, Viciensfes, Montis aurei, Aquægranensfes, Bellilucanas, Baregiensfes, &c. quæ egregia munia obire valent. Licèt intùs exhibeantur, vel sub formâ balnei, fotûs &

SKIRRHUS
ET
CANCER.

irrigationis admoveantur. Nec despici debet horum lutum, cataplasmatibus instar admovendum; illud præcipuè aquarum Amandinarum, tanquam efficacius à nonnullis celebratur: suum symbolum denique conferunt balnea domestica. De medicaminibus internis lui venereæ, scrophulis, aliisque morbis primariis, è quibus skirrhosus prolapsum sæpiùs ducit, nil addimus; cum de illis satis superque alibi.

In subsidium vocari debent *medicamina externa*, internis obsecundantia. Primatum sanè ducunt resolventia, quibus opportunè sociantur emollientia, ut horum beneficio, illa altius penetrare valeant. In hunc scopum adhiberi solent cataplasmata è micâ panis; ex herbis emollientibus, & farinaceis parata; emplastrum de mucaginibus, saponaceum, diachylum cum gummis, diabolitanum, de cicuta, & de Vigo; unguentum mercuriale, &c. Si accedant dolor & pruritus; opportunè adhibentur unguentum nutritum, & pompholyx; quibus nonnulli addunt opium; quocum tamen cautè mercandum, ne infringantur vasorum vires ad resolutionem apprimè necessariæ; & impacti succi tenaciores evadant. Aliquam opem præstare valent frictus leviores, vapor aquæ tepidæ, vel aceti conflagrati; suffitus sulphuris, cinnabaris, &c. datâ operâ, ne horum postremorum fumus pulmones læcessat. Sed angue pejus fugienda maturantia, quorum actione tumores skirrhosum sæpiùs in cancrum facessere, experientiâ constat. Si demùm inertia deprehendantur hætenus prolata remedia, ad *extirpationem*, si sinat sedes morbi, nec obstant vires, confugere nil vetat.

Parùm differunt *remedia interna cancro* tum occulto, tum manifesto *congrua*, à jam traditis in skirrhii curatione adhibendis; quæ scilicet versantur circa diluentia & temperantia, diaphoretica & aperientia, incidentia, cathartica & absorbentia; quibus addere licet demulcentia, lac nempè & ejus serum; ptisana è radicibus althææ, fragariæ & nymphææ; juscula pulli & carnis vitulinæ; cremores hordæi, oryza & avenæ; sperma ceti, &c. Nec improbantur sævientibus doloribus narcotica; laudanum nempè, diacodium, guttæ anodynæ SYDENHAMI, &c. Sed futilia hæc omnia sunt remedia, ni cancrum extus impugnetur; hoc opus, hic labor est: omnes enim Auctores, ab HIPOCRATE numero ducto, quamvis *curationem* externam, *palliativam* excipias, reformidant; non sanè inconsultò, cum infelicem exitum sæpissimè habuisse hæc tentamina experientiâ quotidianâ constet. Etenim nemo nescit quòd ab admotis emollientibus, resolventibus & maturantibus in aliis tumorum speciebus summè conducibilibus, sæpiùs exacerbetur tumor cancrusus. Num tamen in rerum naturâ nullum occurrat præsidium, quod solerti manu tractatum, hunc horrendum morbum domare queat? minimè constat: hinc nusquam vituperanda est hæc indagatio, nec vetari debent causæ periclitationes, præsertim si nulla pateat alia medendi via. Idèò ubi quædam superest sanitatis spes, nil omitendum eorum quæ profutura videntur, adversus morbum qui seriùs ocyùs ad libitinæ rationem ducit; cum satiùs videatur sub hisce angustiis anceps experiri remedium, quàm nullum; dummodò tamen, uti jam innuimus, quædam

quædam elucescat curationis spes. Hoc docent nonnunquam prospera agyrtarum & circumforaneorum arcana: temeritatem enim sæpius efficere, quod prudentia nequiverit, nemo nescit.

Hæc præsertim intelligi debent de *cancro exulcerato*: quod verò occultum spectat; nùm ab omni curatione abstinere præstet? jure dubitandum; cum diutissimè sæpius gestetur prædictus tumor citrà ferè molestiam; qui aliàs ab appositis remediis ut plurimum efferatur, & brevi in ulcus fœdissimum abit; sub quo statu varia experiri remedia haud incongruum sanè videtur; cum plura prostent curationis exempla: ulcus enim cancrosum nasi planè curatum vidisse memini à quodam empirico, cujus arcanum nil aliud erat quàm pulvis sabinae, quo inspergebatur ulcus. Equidem varia sunt medicamina, quæ, si Scriptoribus sit fides, felicissimo successu usurpari queunt; sabina nempè, alliaria, illecebra, absinthium, geranium robertianum, &c. quibus addere licet erysimum extrùs admodum, & intrùs exhibitum, quod à pluribus, penès quos sit fides, summè deprædicatur. Nonnulli summis etiam laudibus extollunt infusum dentellariæ, vel plumbaginis, parti affectæ imponendum. Fertur postremò arsenicum, cæteraque escharotica, nonnunquam faustè adhibita fuisse. Sed omnibus fortè palmam præripit *cauterium actuale*, cujus usus sub hocce morbo familiarissimus erat apud Veteres; at nescio quo fato exolevit præstantissimum illud auxilium; nùm à meticuloforum ægrotantium terrore, vel à carantium intempestivâ commiseratione?

Superest demùm *curatio* merè *Chirurgica*, & tutior; *extirpatio* nempè tumoris, si sinat ejus sedes; quâ sit sæpius ut à vicinorum nexu haud citrà periculum liberetur; vel membri amputatio, brachii nempè, cruris, maminae, labiorum, penis, &c. ni obstant ætas senilis, virium exolutio; vel cachexia, aliave prava sanguinis & humorum diathesis: futilis enim vel noxia censeretur debet quælibet cura externa, si humorum massa quâvis labe inquinetur; quâ posthabita, minime mirari subit, si nilum proficiatur; sublato enim tumore cancroso, alius brevi subnascitur: quod infortunium fonticuli beneficio nonnunquam præcavetur: pluribus verò optimè cessisse hoc *prophylacticum* experienciâ compertum habui.

Hæc sunt *auxilia* solertiorum praxi comprobata, & usitiora, quibus nonnunquam evincitur hic terribissimus morbus: sed rationibus jam allatis, ipsis inhærere haud semper licet: ideò alia est ineunda medendi via, *palliativa* scilicet, quæ versatur circà demulcentia & anodyna. Itaque conducunt fœtus à lacte, vel aquâ sperniolæ; opportunè admoventur pulpa malorum putridorum, solanum, saccharum saturni, plumbum ustum in oleo ovorum, lamina plumbi; columba, catulus, aliaque animalia viventia secta; frustum carnis bubulæ, vitulinæ, vervecinæ, &c. quibus addere juvat ipsummet opium, si acerbioribus doloribus excrucientur ægri. Nec vetatur, uti suprà innuimus, narcoticorum usus internus: ubi dolores tantam tyrannidem exercent, ut hisce ferendis impares planè sint miselli ægri, quos manet expectatissimum & ineluctabile fatum.

SKIRRHUS
ET
CANCER.

Mantissæ instar, silentio premere minime debemus præclarum clariss. STORCK inventum, circa remedium quoddam specificum, quod nuperrimè publici juris fecit. *Cicuta* scilicèt, pro veneno jure habita, solerti Authoris manu tractata in medicamen internum auspiciatissimum abiit; adeò ut nullum hæctenùs innotuerit resolvens vel incidens internum, adversùs truculentum huncce morbum, efficacius. Summâ sane quidem cautelâ præscribitur *cicuta*: primò scilicèt parcissimâ dosi exhibetur, quæ sensim augeatur. Tumores skirrhosos mammis, parotidibus, cervici, axillis, inguinibus & testibus huicce præsidio cessisse, experienciâ laudati Authoris constat. Ulcera cacoëthea, fistulasque nullâ aliâ arte medicabiles, vicit *cicuta*; quæ etiam canculos manifestos, tum faciei, tum mammarum averruncavit: quas stupendas curationes testatur laudatus Author, annuente celeberrimo, nobilissimoque VAN-SWIETEN. Succus prædictæ plantæ evaporatione inspissatus haud ultrâ grana quatuor pro duplici dosi per diem, ineunte curatione præcipitur: hæc in dies & gradatim augeatur dosi, donec ad semi-drachmam, vel drachmam integram & ultrâ, pro re natâ, accedat. Hæc omnia dilucidè exposuit eruditissimus Diarii Medici Author, mense Junio anni 1760. Num tamen decantatum remedium eosdem effectus exerat in nostris regionibus, nondum fortè ratum manet.

A NEURISMA ET VARICES.

ANEURISMATIS nomine venit hic tumor cuti concolor, pulsans & digitis plerumque cedens, à dilatatâ arteriâ, vel ab ejus vulnere, è quo sanguis intrâ contextum cellulosum effunditur, exsurgens: undè duplex emergit *aneurisma*, *genuinum* scilicèt vel cysticum; & *spurium*, vel extrâ vas situm. Angustioribus, sub morbi principio, cancellis continentur *aneurisma* verum, quod molle occurrit, & prementibus digitis obsequitur: sed adultus hic tumor magis renitens evadit, ac sensim in imminensam molem vix pulsantem assurgit. Ad annos vulgò protelatur hujusce tumoris progressus; qui nonnunquam tamen celerius incrementum sumit. Nullam læsionem subit cutis sub primis morbi temporibus; sed procedente morbo, rubet, phlogosique corripitur; imò & nonnunquam disrumpitur illud repagulum, quo victo, arteria ultrâ modum expansa dilaceratur; hinc emergit hæmorrhagia, quæ præceps exitium affert. A pulsatione manifestâ distingui solet utrumque *aneurisma* à cæteris tumoribus; dummodò tamen hi postremi arteriis minime incumbant; undè nascitur error quo sæpiùs incauti decipiuntur. Hanc stupendam arteriæ dilatationem, sub *aneurismate* vero, ab erosionem vel dilacerationem membranæ interioris oriri, inter lustrandam in *cadaveribus* partem affectam, conjicitur. Cystidem ab aliarum tunicarum expansione ortam, replent varia sanguinis concreti strata, lamellatim inter se disposita; è quorum numero crescit

tumoris moles; quâ ad certum gradum evectâ obscurior fit pulsatio. Equidem haud rarò occurrunt aneurismata cervicem, vel pectoris supernam partem occupantia, quæ cruoris tum concreti, tum liquidi libras quatuor recondunt. Aorta, subclaviæ, carotides, axillares, brachiales & crurales huic dilatationi sunt obnoxia; quæ idè frequentiore in cervice, circâ sternum & claviculas situm obtinet. *Aneurisma spurium*, plus minusve protuberans à cruore effuso intrâ tunicas arteriæ, vel intrâ ambiens corpus cellulare, ortum ducit. Pulsatio nunc manifesta, nunc obscura humoris indolem prodit.

Alterutrum emergit aneurisma à vulneratâ per phlebotomum arteriâ brachiali; ni illicò ab inflicto vulnere congruâ compressione præcaveatur. A sauciatis scilicet externis arteriæ involucris subnascitur *aneurisma verum*: ab apertâ verò arteriâ, adeò ut cruor extrâ vas emittatur, & subsultim erumpat, prodit *aneurisma spurium*; cujus intumescencia latior, extrâ arteriam sita, submissiùs pulsat; quod demùm peculiari quâdam fluctuatione ad fremitum accedente, & digitorum exploratione conspicuâ, à genuino distinguitur. Cutis præterea, sub nothâ aneurismatis specie, ab effuso intrâ contextum partium sanguine livorem quemdam contrahit; cur fit ut sæpiùs phlogosi corripatur, imò & gangrænæ notas præbeat prædictus tumor. Hinc patet ratio cur in immensum brevi crescat aneurisma spurium, dum veri tardior sit progressus. Nunc in conspectum venit; nunc in pectore delitescit *aneurisma, aortæ*, ejusve propaginibus insidens; quod sensim viciniora ossa carie lædit; ac dolores atrociores, palpirationes, suffocationes, anxietates & lipothymias accersit; mortemque subitanèam ab spontaneâ dilaceratione inferre solet. Quovis virium molimine, saltando, luctando, onera graviora gestando, &c. *aneurisma progignitur*: hoc etiam promovent vociferatio, tussis, sternutatio, vomitus, partus, difficilis alvi dejectio, &c. Nonnunquàm demùm progerminatur à lapsu ab alto, contusione, vulnere, &c. Aneurismata majores arteriarum truncos imperentia, conspicua vel inconspicua, planè *indomabilia* censerì debent: cætera verò, ni obstat sedes, evinci possunt.

Varices, ratione partis affectæ, quamdam cum aneurismate affinitatem habentes, tubercula audiunt mollia, & atro-livida, ut plurimùm indolentia, quæ, comprimente digito, evanescunt, & remoto brevi recurrunt. A venarum subcutanearum dilatatione suborti prædicti tumores crura sæpissimè obsident; qui aliàs observantur in abdomine, scroto, podice, &c. Varices circâ anum familiares sub hæmorrhoidum titulo innotescunt: quæ verò sedem habent in tractu vasorum spermaticorum, *varicocèles* nomine salutantur. Teste autopsiâ, partibus internis minime parciunt varices; occurrunt enim in vesicâ, pulmonibus, cerebro, &c. Ab stasi sanguinis oriunda prædicta tubercula, venas nodosas & valvulosas sæpiùs infestant: hinc numerosissimæ nonnunquàm observantur in tibiis, quarum venæ præter hæc dilatationes nodosas, ultrâ modum tument: adeò ut hinc emergant plexus latissimi & summè conspicui, qui totas tibiae amplectun-

ANEURIS-
MA ET
VARICES.

tur. Varicibus crurum *obnoxia* sunt pręgnantes, & pręsertim agrę parturientes; sed sublata causā brevi evanescunt hi tumores. Ab inconsulto corporis molimine, casu ab alto, vinctis injectis, vel quavis aliā compressione suboriuntur varices, ad quas etiam proni censentur viscerum abdominalium obstructione laborantes; vel hypochondriaci qui haud rarō ab harum eruptione levantur. Doloris expertes, nullumque ferē incommodum pariunt varices exiguę: sed ubi certam molem assequuntur, molestissimę evadunt: tantum enim incrementum capeßere queunt, ut pugni magnitudinem superare, vel sanguinis libras circiter duas recondere valeant. Minime sanē mirum si ab hac stupendā venarum dilatatione dilacerentur vasa; ē quā disruptione emergunt hęmorrhagię periculosissimę, quas excipiunt ulcera mali moris; quę aliās a fero acri, quod exudant integrę varices, nonnunquā progignuntur.

Quod ad *curationem* spectat, ubi verum aneurisma recens occurrit, omni arte eō annitendum, ut vi mechanicā coërceatur. Forti enim pressione superinjectis spleniis & fasciis, incipiens aneurisma evanescit & curatur; dummodō opportunam sedem obtineat, in brachiis scilicet, cruribus, capite, externo pectore, aliisque partibus, in quibus subiectum os pressioni favet. Sed hanc methodum respuit aneurisma situm in cervice, quod citrā suffocationis periculum constringi minime valet; nec magis congruere hanc pressionem aneurismati pectoris interno, etsi sapissimē extus prominet, omnibus qui anatomen, vel a limine salutarunt, obvium. Pressionem, si nil obstat, juvant topica adstringentia, albumen nempē ovi, alumen, sanguis draconis, acacia, emplastrum stypticum, &c. Sunt qui laminam plumbeam arctā ligaturā submissam superimponunt; aliamve premendi arteriam artem excogitant; cū in hac solā congruā coarctatione versetur pręcipuus curationis cardo.

Ubi verō ab incautā vel infelici *puncturā arterię* in phlebotomię administratione imminet *aneurisma*, nullā interjectā morā imperterritus Chirurgus pollicem arterię vulneratę admoveere solet, & itā comprimere ut inhibeat sanguinis exitum: quem effectum tutiūs pręstat suprà injectum vinculum, bacillo intortum, quod vocant *tourniquet*; donec nummus aureus vel argenteus, dimidium fabę, globus lini carpti, chartęve papyraceę masticata; vel lobus agarici, nostrā ætate celebratissimi, aliudve quid simile vulneris hiatui sedulō imponatur. Postea varia admovent splenia, Gallis *compresses* dicta, quę ligaturis, vel vinctis varię fortis & arctissimē constrictis, firmant & continent. Quo apparatu sanguinis fluxus cohibetur & pręcavetur aneurisma: haud tamen plus æquo constringi debet hac deligatio, ne brachii pars interior œdemate, ecchymosi, vel phlogosi corripiatur; ē quibus quandōque imminet gangręna; quam avertere tentant embrocationibus spirituosis & camphoratis; inter quarum usum pars a frigore probē muniri debet. Ubi verō aneurisma in quavis parte situm certum incrementum sumpsit, ad *extirpationem*, si sinant viciniora, devenire expedit: sola ferē artuum aneurismata respicit hac operatio,

quâ , injecto priùs vinculo bacilli ope constricto suprà tumorem , ut sanguis omninò sufflaminetur ; arctéque prætereà ligatâ arteriâ affectâ , ferro abscinditur , priùs à vicinarum partium adhæsione solutus , tumor : quo tamen sublato , res minime est in vado ; cùm sæpiùs eveniat ut brachius sanguine orbatus gangrænâ conflictetur ; cui infortunio solâ membri amputatione incunctanter celebratâ occurritur. Ubi verò morbi sedes , aliave quælibet circumstantia , impedit quominùs adhibeantur hæc præsidia , ad curam merè palliativam converti debent clinicorum curæ , quæ circà congruam victûs rationem , & venæ sectiones identidem celebratas versatur.

Quod ad *varices* attinet , depletis vasis , tùm venæ sectione , tùm hirudinum suctu , proficuè adhibentur diluentia , temperantia , obstructionesque referantia ; nec incongrua sunt blandiora laxantia. Levem tamen opem conferunt hæc *præsidia* ; ni accedat cura externa , quæ versatur in debitâ & continuâ herumce tuberculorum compressione , quam juvant emplastra adstringentia , vel splenia aquâ aluminosâ , albumine ovi , aceto , aliove liquore roborante imbuta. Sed inania imò & noxia sunt hæc topica , si sanguis inibi stagnans suum alveum petere minime valeat , & quâvis adhibitâ pressione haud evanescat & oblitteretur tumor. Sub quibus circumstantiis contraria imponi debent medicamina , emollientia nempè & oleosa , quæ flexilitatem prædictis partibus conciliando liberum in subjectum vas & cystidem commercium restituunt. *Varices* insuper mole majores , vel *annosa* , pressioni minime cedunt ; hinc *aliâ methodo* impugnari debent ; præsertim si urgeant dolores , vel ab ingenti intumescentiâ immineat sacci dilaceratio : hæc duplex excogitata , Artem Chirurgicam respicit : prima scilicèt instituitur simplici tumoris sectione , coarctatâ priùs venâ , huic prospicienti ; evacuato cruore vulgatoribus præsidiis curatur vulnus : altera audit tumoris extirpatio , quæ faciliùs & minori periculo quàm in aneurismate absolvitur. Nec desunt ultimò qui huncce tumorem aggredi solent , nec infelici successu , butyro antimonii , aliove caustico ; imò & cauterio actuali , quod etiam suas laudes meretur , si solerti manu pertractetur.

ANEURIS-
MA ET
VARICES.



TUMORES
CYSTICI.

TUMORES CYSTICI.

Sic nuncupantur quidam *tumores tunicati*, vel peculiari folliculo instructi; qui *anomali* audiebant Veteres ob decantatam humorum quadrigam, quâ confici putabant. In hunc censum veniunt lupiæ, tumores adiposi & lymphatici, ganglion, &c. de quibus singulis cognatis in præsentiarum: eandem classẽ etiam subeunt ranula, bronchocele, strumæ; hydrocele, nonnullæque aliæ id genus protuberantiæ, quæ peculiaribus partibus insidentes ad alia capita pro instituti ratione pertinent. Lupia (*la Loupe*) passim occurrens, diversas materias colligit, quæ mellis; pultis & sebi faciem, quodammodò referunt; undè prodit barbara nomenclatura à practicis posthabita, sed in scholis acceptissima: à materiâ scilicet melligini simili, *meliceris* nuncupatur tumor anomalus: à pultaceâ substantiâ in cystide contentâ, *atheroma* vocitatur: à succo quodam sebaceo inibi concluso, *steatoma* audit. Meram axungiam, ægro nonnunquàm tabe confecto, recondit *lipoma*, vel tumor adiposus, de quo dum de lumborum morbis, familiarem situm habens in dorso & scapulis, à genuinis lupiis parùm aut nihil discrepans. Præter hæc materias in tumoribus cysticis observari solitas, aliæ diversæ sortis occurrunt; olei scilicet amurcæ, vini faculis, cæno, &c. persimiles: quibus addenda concreta carnosæ vel spongiosæ, cartilagineæ, corneæ, osseæ, lapideæ vel cretaceæ, &c. Fidem planè superant quæ referunt Authores de inibi inventis unguibus, pilis, ligni ramentis, cochleis, &c. Capiti, fronti, cervici, dorso & genubus familiarissimè incumbunt tumores cystici; sed nulla est corporis habitûs pars, quam impetere non queant; nec partibus internis parcunt; cùm, uti pluriès notavimus, sæpissimè reperiuntur, tum in pectore, tum in abdomine. A contusione, aliâve partis læsione *originem* plerùmque mutantur prædicti tumores; qui aliàs à causâ internâ, viru scilicet venereo, scrophuloso, aliâve sanguinis & humorum labe profapiam haud rarò ducunt.

Tardum incrementum sumunt *tumores cystici*, nullamque molestiam creant, ni trachæ incumbentes respirationi officiant; cutemque quâ obvolvuntur, nativum colorem servantem, citrà læsionem plerùmque extendunt: ni tamen in immensum affurgat horum moles, quæ nonnunquàm ad quinquaginta libras accedit. Equidem phlogosi sæpiùs corripuntur hi portentosi tumores; imò & in suppuratum abeunt; quam infaustam mutationem haud rarò subeunt lupiæ capiti hærentes, sub *talpæ*, *nattæ*, vel *testudinis* insulso nomine, pro Authorum lubitu designatæ. Nonnunquàm etiam evenit ut, ob nimiam elongationem, disrptionem patiantur harumce protuberantiarum involucria; quâ aliàs canceri naturam induere, vel in ulcus

fistulosum faceffere valent, quod nusquam domari patitur, ni purulentia integer absumatur folliculus. His addere licet quodd omnes tumores cystici ossa & cartilagine, quibus incumbunt, carie in dies semper ludent. Hæc sunt infortunia quæ sæpius post se trahunt vetustiores lupiæ; atque funestum haud rarò præfagiunt eventum, variis cladibus confirmatum.

Alia est tumoris anomali *species*, infrequens verò, quæ *lymphaticæ* nomen fortitur. Succo limpido turgēt, vel hydatides recondit prædictus tumor; cujus sectio anatomica vasa etiā lymphatica summè conspicua exhibet. Non secus ac cæteri folliculi, cuius corporis habitus parti insidere valent *tumores lymphatici*, vel à meræ lymphæ stagnatione prognati; qui tamen in brachiis & manibus vulgatiorem sedem habent; qui demum suprà recensitis tumoribus tunicatis *contumaciores* & molestiores, nec periculi expertes censerī debent. Quod ad *ganglion* spectat, hoc nomine venit tuberculum molle & indolens, vaginam tendinum ligamentosam obsidens; cujus moles, plerūque exigua, pisum, vel minorem avellanam vix æmulatur; qui aliās ad ovum columbinum nonnunquam accedit. Hic tumor cuti concolor, manibus pedibusque familiaris, materiam quamdam continet gelatinosam, & à notissimā artuum synoviā minime discrepantem. Compressioni, puncturæ, & contusioni, à casu vel ictu, *natales* debet hoc tuberculum, nullius periculi particeps; cui obnoxios esse arthriticos, scorbuticos & scrophulosos, vulgò traditur; nūm rectè? solertioribus examinandum relinquimus.

Lupia recentes *topicis res solventibus* sæpius evincuntur; cataplasmate nempe ex acetosâ, & radice bryoniæ parato; emplastro diaborano, de cicutâ, de Vigo, &c. Sed inertia sunt hæc topica adversus lupias mole majores vel annosas; non secus ac tumores adiposos, qui pro *indomabilibus* habentur; cur sit ut ægri consultius ab omni medicatione abstineant; ni tumoris ingentem molem ægrè ferant, vel ejus peculiari situ deturpentur: sub quibus circumstantiis ad *extirpationem*, vel *cathartica* folliculo absumendo apta, confugere coguntur. Sed sua habet pericula uterque medendi modus; quoties scilicet tumor futuris, tendinibus & ligamentis annectitur. Turior & expeditior videtur extirpatio; præsertim erga tumores adiposos, si integer folliculus à viciniorum harentiâ, solerti dissectione solutus, auferatur; sed pauci occurrunt Chirurgi qui hæc demandata munia peritè obire valeant. Huc etiā pertinet ligatura, si sinat angusta tumoris basis; qui processus multò securior & minùs molestus ægris summè arridet. Suis difficultatibus etiā premittitur caustici administratio, longior sanè & molestior; ac nunquam adhibenda, ni prius emolliatur tumor, ope topicorum quæ hisce viribus pollent: nec ritè succedit hæc cura, ni integer folliculus suppuratione planè exhaustiatur; aliàs remanet ulcus fistulosum, quod curantibus plurimū faceffit negotii. Insuper minime posthaberi debet *curatio interna*; ubi numerosi tumores cystici de quādam sanguinis & humorum labe suspicionem injiciunt; quod vitium accurato examini submissum, præmissis præmittendis, nunc diluentium & temperan-

TUMORES
CYSTICI.

tium ope , nunc depurantium præsidio , vel obstructiones referantium & incidentium beneficio , impugnari solet : aliàs inanem operam ludunt , qui ad horumce tumorum medelam sese accingunt.

Haud absimili *curationi* , nempe *Chirurgicæ* , subjiciuntur *tumores lymphatici* ; extirpatione enim , & catharteticis , eximi possunt ; sed longè difficilior & periculosior , haud perperam , censetur utraque medendi via. Imparia etiàm existimantur ad horum resolutionem peragendam topica suprâ laudata : aquarum tamen thermalium irrigationes ab alto , dummodò haud altas egerint radices tumores lymphatici , nonnunquam profuisse fertur. *Ganglii* verò recentis *medela* simplicioribus vulgò peragitur ; frictu nempe , & pressione , cum pollice factis , quibus plerumque fugantur. Sunt qui haud inconsultò , illos aggredi solent ictibus repetitis ferulæ , vel forti & continuâ pressione per impositam laminam plumbi , congruâ deligatione munitam. Quibus nil juvantibus admoventur gummi ammoniacum in aceto maceratum ; emplastrum saponaceum , de Vigo , de cicutâ , diabotanum , &c. Sed parùm conducunt hæc topica resolventia , ni fasciis superimpositis arctè constringatur ganglion. Alii laminam plumbeam mercurio imprægnatam , & firmiori vinculo arctatam imponunt : nec desunt qui suffitum mercurialem adhibent. Si irrita fuerint hæc præsidia , caustica , vel ferrum adhiberi queunt , quorum ope promovetur purulentia , quâ ganglii folliculus conficitur : sed rarissimè arti Chirurgicæ submittitur illud tuberculum ; quod aliàs nullum vel leve incommodum parit.



SARCOMA, VERRUCÆ ET CORNUA.

HAUD dilucidè sanè patet genuina *sarcomatis indoles* : licèt neminem fugiat quod hoc nomine intelligi debeat tumor carnosus , indolens & immobilis , tactui minime obsecundans , tardè procedens , ac nullâ peculiari cystide instructus. Hujusce protuberantiæ incerta est sedes , cùm è quovis corporis ambitûs parte erumpere valeat ; quæ etiam uti pluriès notavimus , partibus internis minime parcat. Oculos tamen , nares , gingivas , aliasque oris partes ; utriusque sexûs genitalia , anum , dorsum , brachia & crura plerumque *invadit* sarcoma ; quod diversam formam obtinet , nullisque terminis coërceri videtur ; cùm de massâ carneâ hujusce indolis è dorso ad poplites usque propendente mentio subjiciatur. Nemo non novit has sarcomatis species congenitas , ad *navos maternos* referendas ; quæ , ut perhibent , fructum fragariæ vel mori , acinum racemi , fructum carnis suillæ , botuli , placentæ , aliaque innumera mulierculis notissima mentiuntur. In sarcomatum classe locum habet *polypus narium* , de quo pro instituti ratione alibi agemus. *Sarcocèle* audit prædictus tumor testibus , vel horum involucris , adnatus. *Mariscæ* , *condylomata* , &c. vocitantur

vocitantur qui anum obsident. Prodeunt sarcofes sub nomine carnum fungosarum ex ulceribus mali moris, ac præsertim duræ matris, partium aponeuroticarum, &c. Nil in plerisque sanitati demit *sarcoma* ex habitu corporis exsurgens: nonnunquam tamen phlogosi corripitur, & in ulcus facessit; nec gangrænæ expers est. Carnes compactas nonnunquam recondere tumores cysticos, jam supra notavimus; quos tamen inter sarcomata numerare absolum foret.

SARCOMA,
VERRUCÆ
ET CORNUA

Verrucæ, nostratibus *verruës* ou *poireaux*, faciem, manusque vulgarissimè infestantes, consultius ad gradum sarcomatum promoverentur, ni peculiari typo omnibus notissimo, ab ipsis discreparent. Sessiles vocantur quæ latiori basi cuti hærent; pensiles verò audiunt, quæ quodam pediculo instruuntur. Levissimum vel nullum incommodum pariunt verrucæ, quæ aliàs sæpius spontè evanescent; nullumque portendunt periculum, ni quid cancrofi redoleant; quod nonnunquam accidere verrucis nasi, palpebrarum, & labiorum, expertos minime fugit. Ad verrucarum indolem nonnihil accedere *cornua* pronum est cogitare; etsi parùm discrepare videntur, tùm conspectu formæ, tùm ratione contextûs & firmitatis à vulgarissimis animalium cornubus. Nunc soli cuti adnascuntur, nunc ipsismet ossibus implantantur prædictæ protuberantiæ; quibus facies & cranium nonnunquam deturpantur, quæ etiam dorsum, artus & coxas, &c. invadunt. Leve periculum portendunt, ni ex horum spontaneo delapsu ulcus emergat cancrosum, omnem ferè curam respuens. Non secus ac verrucæ, à causâ internâ quandòque sobolescent cornua; quæ aliàs ab ulceribus haud rarò progerminantur.

Nulli *curationi* submitti debet *sarcoma*, ni peculiari situ, vel ingenti mole, molestum evadat; quod tùm ligaturâ aggredi solent curantes, si sinat basis: vel tumorum cysticorum instar, ferro, præmissis præmittendis, extirpatur. Haud pro votis successisse cathartica traditur; nùm opportunè adhibita fuerint? dubitare licet; cùm ratum maneat apud expertos hæc nusquam congruere præsidia, ubi sarcosis renitens, livida, superficie inæquali donatur, & dolore stipatur: haud citrà periculum etiam admoventi queunt prædicta adminicula, si hæc massa carnea artubus, vel partibus ligamentosis hæreat; aliàs proficua fore facillè crediderim.

Verrucæ pensiles forcipe amputari, vel ligaturâ, cum filo cerato, aut setâ equinâ, ita constringi queunt, ut brevi quasi moriantur & decidant. *Sessiles* verò expugnari solent admotis succis sabinae, cepæ, chelidonii majoris, tithymali, ficûs, verrucariæ, campanulæ foliis cymbalaræ, &c. quibus sæpius imbutæ verrucæ evanescere solent. Nonnulli sanguinem talpæ ad eundem usum deprædicant. Alii adhibent oleum tartari per deliquium cum sale ammoniaco ex aquâ soluto mixtum, acêtum sale marino saturatum, oleum vitrioli vel camphoræ, spiritum nitri vel salis, lapidem infernalem, &c. Has etiam averruncare potest flamma sulphutis cautè admota: nec inutilem opem præstant emplastrum de Vigo, aliaque id genus res solventia, &c. Sed parùm proficua forent hæc præsidia, ni prius

SARCOMA,
VERRUCÆ
ET CORNUA

novaculâ, aliove instrumento congruo, radatur verruca, ut altius ejus contextum penetrare valeant prædicta topica. Nec defunt qui *cauterium actuale* pro efficaciori auxilio habent; sed cavendum, ne lædantur partes membranaceæ, tendinosæ & ligamentosæ; undè graviora suborirentur symptomata: hoc periculum deflectere queunt, qui acum candentem ad hoc opus duntaxat adhibent. Fuitiles tamen, imò & noxiæ sunt hæc curandi methodi, si verrucæ atro-cæruleæ & dolore stipatæ quidpiam cancrofi referant; quem characterem sæpius induunt verrucæ nasi, labiorum & palpebrarum. Ubi postremò stipato agmine erumpunt prædicta tubercula, de labe humorum cogitandum; cui benè perspectæ, nunc depurantibus, nunc diaphoreticis, alias aperientibus, incidentibus, &c. præmissis generalibus, occurritur.

Quod *ad cornua* attinet, haud absimili fermè methodo impugnari solent. Cæteris præsidiiis palmam sanè præripit *ligatura*; dummodò tumoris basis vinculo constringi patiatur. Ubi verò denegatur hæc medendi via, in usum trahi potest causticum, quo circumdatur tumoris basis. Sed infelix hæc est methodus, si prædicti tumores altas egerint radices, quas haud citrà periculum prosequi licet, propter obvias partes exquisitiori sensu donatas; è quibus laceffit graviora concitari queunt symptomata. Pari ratione periculosa censi debet extirpatio; eò quòd ossibus, uti jam innuimus; vel ligamenti sæpius adnascantur cornua; quæ hinc nusquam tutò averruncari patiuntur.

ANIMALIUM MORSUS ET PUNCTURA.

MISSIS omnibus hypothesibus, quæ de naturâ veneni, à morfu variorum animalium iratorum, vel rabidorum propagati, altioraque corporis penetralia citissimè adeuntis; atque spirituum systasim vel humorum massam illicò ferè inquinantis, effutiuntur; ad modum avertendi illius calamitosos effectus properamus. Ubi igitur constat de morbi genere, nil non movendum, ut *imminens periculum* incunctanter *præcaveatur*. *Triples* sub hoc conspectu adimplenda venit *indicatio*: 1^o. scilicet ut venenum à vulnere abigatur, vel cujusvis materiæ pinguis compedibus obvolvatur & impediatur; aut quâvis aliâ arte absumatur & exhauriatur: primam opem præstant *scarificationes*, quibus sanguis contaminatus foras profilit; cujus promptiori expulsionem plurimùm favent cucurbitulæ, vel suctus, si nil obstet; quorum beneficio prædictus hauritur latex. Opportunè etiam admoventur materies adiposæ vel oleosæ, quibus intricari queunt miasmata venenosa; quæ aliàs à cauterio actuali, ope ferri candentis, vel inibi accensi pulveris pyrii, planè domatur; dummodò tamen haud altius penetraverit. 2^o. Quantocyùs impediendum quominus illud deleterium ad interiora

appellat; quod opus tutò peragitur *partis vulneratæ* extemporaneâ *amputatione*, si per metuculosos liceat, vel *vinculo* arctè constrictò suprà vulnus injecto, quo sanguis ad cor rediens omnino sufflaminatur. 3°. Ubi ab intempestivâ morâ quandam veneni portionem ad massam sanguineam jam appulisse conjicitur, impugnandum venit decantatissimis *alexiteriis*, theriacâ nimirum, orvietano, mithridatio, salibus, spiritibusque animalium volatilibus, viperæ nempe, cornu cervi, urinæ, salis ammoniaci simplicis vel succinati, aliisque id fortis; quæ omnium vota explere queunt. Suum symbolum etiam conferre solent diaphoretica, diuretica, aliaque evacuantia. Hæc est generalis curandi methòdus, & acceptissima adversus animalium, tum venenatorum, tum rabidorum virus; quæ etiam congruit puncturæ nonnullorum insectorum; habitâ tamen ratione imminentis periculi gradûs, variarumque circumstantiarum: quæ omnia paulò fusiori sermone exponere, haud abs re fore putavimus.

Nemo nescit hominem, canem, lupum, felem, equum & mulum *rabiei* esse magis *obnoxios*. Hic sævissimus morbus, qui morfu in obvia animalia traducitur, *hydrophobia* audit, de quâ infra: in præsentiarum verò, de solâ *methodo pertractandi vulnus* agemus. Itaque præstantissimum suppeditat auxilium *cauterium actuale*, ad extinguendum virus hydrophobicum, in vulnere à morfu relictum; dummodo quantocyus, & altius infigatur. Si igne perterreantur ab animali rabido demorfi, haud immediate admoventur ferrum candens; sed relictò quodam intervallo propius, quantum licet, adducitur, & aliquandiu inibi detinetur, ut remissius & diutius actionem suam exerant particulæ igneæ. Sunt qui hanc opem conferre tentant pulvere pyrio in ipsomet vulnere conflagrato; nùm ramen hæc flamma fugax ad virus altius nonnunquam immersum pertingere valeat, jure sanè dubitandum. Haud minùs fortè efficax censei debet alia methòdus, quæ *scarificationibus* profundioribus peragitur; quibus imponere solent, si sinat pars affecta, cucurbitulam, cujus ope sanguis infectus planè exhauritur: alias iteratâ & congruâ pressione cruoris inquinati fluxus promoveretur; adeò ut viciniora vasa planè exinaniantur; suctum enim ore actum adhibere inconsultum foret. Quibus peractis, aliud curantibus incumbit munus; ut vulnus scilicet ad menses proteletur; & in hoc versatur præcipuus curationis cardo; adeò ut si citius quàm par est coeant vulneris labra, nullâ morâ recruentari debent. De hujusce curationis termino controvertitur apud Authores, quorum plures haud absolutam esse post quadraginta dies pronuntiant; alii verò ad quatuor vel sex menses producendam esse autumant; quod sanè securius fore, nemo sanè ibit inficias. De frictu circà partem vulneratam cum unguento mercuriali nil addimus, cum vulnus minùs respiciat, quàm imminentem hydrophobiam, de quâ alibi.

Maximum terrorem incutit *viperæ morsus*, qui ratione regionis & tempestatis, necnon reptilis iracundiæ gradûs, plus minùsve est pertimescendus: quibus adjicere lubet demorfi pavorem, qui veneni sævitiam adau-

ANIMALIUM
MORSUS ET
PUNCTURA.

ANIMA-
LIUM
MORSUS ET
PUNCTURA.

gere potest, ut infelicem ægrum intrà paucas horas è medio tollat: aliàs post unum alterumve diem, imò & tardiùs enecat viperæ venenum. Hunc morsum pressò pede sequuntur atrociora symptomata: præter enim phlogosim, quâ corripuntur partes vulnus ambientes, & acerbissimum dolorem latè se spargentem; totus corporis ambitus intumescit, os arefcit, erumpunt vomitus biliosi; respiratio læditur; urgent anxietates, exsurgit singultus, ingruunt palpitationes, cum pulsu intermittente; caput impetunt vertigines, vires deficiunt, partes demùm stuporè corripuntur, vel tremore tentantur; donec agmen claudant convulsiones, sudores frigidi & lipothymia, quibus fatum acceleratur. Hinc patet, viperæ venenum, ubi obrepfit in sanguinem, longè calamitosius esse rabiei deleterio, quod nusquam præceps exitium affert.

Haud absimili methodo pertractari debet *vulnus à viperâ inflitum*, suprâ quod scilicèt, *vinculum* arctè constrictum, si nil obstat, injicitur, ut sufflaminatus sanguis solitum alveum minime petat. Intereà admovetur *cauterium* actuale, vel celebrantur *scarificationes*, superimpositâ cucurbitulâ, ut citiùs depleantur vasa. Suctus etiam tutò hic adhibetur, propter peculiarem indolem veneni quod ad stomachum appellens, iners & effœtum planè evadit; cùm econtrâ venenum rabidorum haud minùs esse reformidandum in primis viis, quàm in vasis sanguiferis, experienciâ constat. Plurimùm insuper decantatur axungia viperina vulneri admota: easdem fortè vires obtinet oleum olivarum, quod etiam pluribus ritè successisse fertur. Nonnulli contusum viperæ caput vulneri imponunt: alii cataplasma ex allio, theriacâ & sale ammoniaco confectum adhibent: ut sileamus de variis aliis præsidiis quæ suas merentur laudes, dummodò incunctanter usurpentur: sed haud semper in promptu habentur hæc topica, vel euporista; cur sit ut nonnulli agricolæ, imminente morte perterriti, ad partis fauciata, nullâ morâ factâ, cum primo obvio qualicumque ferro, amputationi sese accingunt: quod remedium meticulosi sanè invisum, solum fortè tutissimum occurrit. Cæterùm intùs adhibentur *alexiteria* officinalia & tralatitia; theriaca nempè & orvietanum, pulvis viperinus, salia volatilia animalia, vel spiritus ejusdem sortis; nempè viperæ, salis ammoniaci succinati, vulgò *Eau de Luce*, aliaque ejusdem naturæ alkalina, quæ etiam parti vulneratâ opportunè admoventur. Simili insuper medelæ submittitur aspidis, cæterorumque anguium venenatorum morsus: sed obiter notandum, quòd hæc reptilia venenata, si viperam excipias, rarissimè in nostris regionibus occurrant.

*Bufo*nis morsus, etsi dentibus planè caret, haud periculo vacat; cùm ejus salivaris latex penetrantissimus hinc per cutis spiracula ad sanguinem appellens, summam perniciem inferre valeat. Nec minùs pertimescendum ejusdem animalculi lotium, quo nonnunquam conspurcantur olera. Experienciâ enim teste, minime dubitare licet, quin uterque humor cum alimentis deglutitus, vel per patentes cutis porulos vasa subiens, noxiis viribus polleat; è quibus prodeunt totius corporis intumescencia, vel fœdus

pallor ad icterum accedens ; vertigines , lipothymia , convulsiones , &c. Ab eduliis hocce viru infectis lingua & labia nigricant , erumpit vomitus , sævit cardialgia , &c. Qui pravi morsûs effectus tutò præcaventur , humorem inquinatum cuti hærentem congruâ & extemporaneâ lotione cum aquâ , lotio , vino , &c. factâ , everrendo : si verò deglutiti veneni emergat suspicio , præsentaneam opem ferunt emetica & cathartica : ubi postremò per quamcumque viam sanguini immiscetur deleterium , diaphoreticis , diureticis , cardiacis & alexiteriis impugnari solet : sed rarò , ut verum fatear , innotescit hæc labes , quæ hinc clancularias vitæ struit insidias.

Periculi expers censetur *punctura scorpionis* , sub temperatâ cœli constitutione ; sed aliter se res habet in regionibus calidioribus , & præsertim ardente syrio. Hoc enim venenum æstu aëris acutatum graviora concitare potest symptomata ; quæ rarò tamen funeris metum incutiunt. Pars læsa phlogosi corripitur ; doloribus universalibus vexantur ægri ; stomachus subvertitur ; hinc vomitus & singultus. Interea accedunt membrorum torpor , tremores , &c. Inter topica efficaciora celebratur oleum scorpionis ; sed cùm plerique hoc careant , adhibetur oleum olivarum , ubique prostant : nec fortè minùs efficax. Ubi verò res videtur periculosa alexæ , quod tamen rarò evenit ; præstò sunt scarificationes , cauterium actuale , aliaque præsidia , de quibus suprâ. Sunt qui scorpionem contusum vulneri admovent ; quod pluribus pro votis successisse fertur : idèò nil impedit quominùs hoc pro more subministretur topicum ; præsertim cæteris deficientibus : nec , ubi res expostulat , despici debent cardiaca & alexiteria diuturniori praxi comprobata.


Nonnullæ occurrunt *aranea venenosa* , præter tarantulam , de quâ infrâ , quarum punctura nonnullum portendit periculum ; præsertim si pars læsa inflammatione tentetur , coloremque plumbeum , erumpentibus phlyctænis , induat : quos prodromos sequi solent nausæ & vomitus , membrorum torpor , somnolentia vel delirium ; tremores , convulsiones , &c. ad quæ præcavenda converti debent clinicorum curæ : hanc opem præstat cataplasma , ex allio & theriacâ confectum , inter efficaciora prophylactica celebratissimum : nonnulli succum lacteum ficulneum , quo fovetur pars affecta , deprædicant : quibus addere licet topica suprâ tradita ; quæ etiam conferunt in hæce puncturæ specie. Idem esto iudicium de antidotis , salibus volatilibus , aliisque jam recensitis medicaminibus internis. Nùm aranea deglutita quidpiam mali portendat , dubitare licet ; sed sub hocce discrimine ad emeticum confugere satius videtur. Cætera etiam prophylactica , etsi ut plurimum superflua , haud inconsultò in usum vocari queunt.

Nullius est particeps periculi *apum & vesparum punctura* ; quæ tamen ingentem tumorem phlegmonodeum , pustulâ albicante in centro notatum , accersit ; qui verò post biduum , triduumve evanescit. Sed ubi numero plures occurrunt ictus , gravia promoveri queunt symptomata , quæ vulgò

ANIMA-
LIUM
MORSUS ET
PUNCTURA.

ANIMA-
LIUM
MORSUS ET
PUNCTURA.

victus ratione, & unâ vel alterâ venæ sectione impugnantur. Quoad curam externam, danda est opera, ut primùm è vulnuscule detrahatur aculeus, quem inibi relinquere solent prædicta animalcula: foveatur postea tumor urinâ calidâ, vel oleo inungitur: nonnulli plantaginem contusam summè deprædicant. Aliàs admoventur theriaca cum aquâ vitæ vel infuso sambuci, subacta; aut quodvis cataplasma emolliens: quibus præsidii sedatur dolor, fugatur phlogosis, vel ulterior impeditur. Quoad *puncturam culicum tinnulorum*, vulgò *Cousins*, ob dolorem pruriginosum, sæpius molestissimum, ipsi admoventur saliva, oleum, acetum, succus limonium, &c. sed hæc omnia vulgò posthabentur, ni stipato agmine corpus laceggerint prædicta infecta.



TARANTISMUS.

Sic vocitatur stupendus hic morbus quem promovet *ictus* (uti fertur) *cujusdam phalangii* vel araneæ, quæ non solum circa Tarentum in Apuliâ reperitur, sed etiam in aliis Regni Neapolitani tractibus, non secus ac in Italiâ, Corsicâ, & apud Persas, occurrit. Per arva inter segetes, sub tempestate fervidâ, prorepens hoc insectum, periculosissimo sanè ictu, narrante BAGLIVIO, messorum & viatorum impetit. Levem phlogosim accersit hæc punctura; sed livorem ad nigredinem accedentem nonnunquam contrahit pars læsa, quæ dolore vel quodam stupore afficitur. Nùm hic stupendus affectus ab ictu tarantulæ, vel ab aliâ quâcumque causâ, uti nonnulli conjiciunt, promoveatur? viderint solertiores. Quidquid sit de ejus profapiâ; incipit paroxysmus à mœrore, insolitoque solitudinis amore: dein *anxietatibus premuntur ægri*; tremunt artus, vires prosternuntur; accedunt cardialgiæ; urget pectoris angustia, quæ spirandi difficultatem post se trahit; visus obnubilatur, atque mœrore & tristitiâ corripuntur ægri: hæc excipiunt *mentis ludibria*, quibus incondita & delira loquuntur, incongruæque agunt. In potiori ægrorum parte ad plures dies protrahitur hic morbus, letho ut plurimum finitimus. Nonnulli tamen quasi fulmine tacti concidunt, & apoplecticorum more extinguuntur. Qui verò è tarantismo evadunt, recidivam anno sequenti, & ardente syrio, caveant: nec desunt qui per totum vitæ curriculum hujusce morbi reliquias trahunt.

Cura externa ictûs tarantulæ minime differt à jam traditâ, vel cæterarum animalium puncturas respiciente. Iisdem etiam *prophylacticis* internis, cardiacis nimirum & alexiteriis impugnari solet prædictum virus sanguini immixtum: sed rarò proficiuâ erant hæc remedia, donec fortè fortunâ genuinum repertum fuit specificum, quod nil aliud audit quàm *salvatio* ad ladium vel tiliarum numerum. Multiplici experienciâ jam comprobata, si

Scriptoribus sit fides, hæc *modulata exercitatio* ad quatuor vel octo horas, & ultrà, singulis diebus producit, & quater vel sexies iteratur. Haud ab omnibus instrumentis musicis, nec à singulis modulaminibus, ad saltandum stimulantur ægri; sed post varia tentamina genuinus, & efficax innotescit modus: quo reperto decumbentium vultus ad hilaritatem componitur: intereà è lecto profiliunt, pedes & manus in numerum motitant, donec sudore perfundantur; vel tandiù saltant, quandiù sinunt vires; quibus exhaustis quieti indulgent; ac postriduò alacriores & robustiores facti, eâdem arte moventur. Mirari profectò subit desipientes à dissonis tonis ità affectos, ut choreis supersedeant; ni Musicus conductitius ad hanc rem faustè peragendam animum advertat. Hæc est stupenda curandi methodus, quâ nulla hæctenùs tutior innotuit. Illud addere licet, quòd non solum instrumenta musica, sed etiam colorum vividiorum conspectus, hanc luctuosam scenam lenire videantur. Illud tamen silentio minime prætermittendum censemus quod nonnulli inter recentiores primi subsellii in dubium revocent hæc stupenda naturæ morbosæ phænomena.

TARANTIS-
MUS.

HYDROPHOBIA.

IN propatulum fanè venit hic morbus post primam invasionem: sed dubii & fallaces sunt ejus *prodromi*; quos tamen nosse plurimùm interest. Nec semper constat de infortunio quod hydrophobiam minatur; quod etiam cognitu assequi maximi est momenti, ne intempestivâ securitate posthabeanur remedia prophylactica, quæ opportunè exhibita rarissimè fallunt, vel faustè occurrunt huicce truculento morbo; qui aliàs, ubi caput exerit, nusquam ferè domari patitur. Maximum sane quidem terrorem incutere debet canis, alteriusque animalis morsus, si quædam de *rabie* emergat suspicio: idèò sub hocce casu nil non movendum, ut diluatur ærumnosum illud dubium, nonnunquam intricatissimum. Quandoquidem circà canem nobis familiarissimum, & huic morbo, uti nemo nescit, obnoxium, sapissimè versatur; nonnulla de ejus rabiei diagnosi prælibare, haud inconsultum fore judicavimus.

Hoc ferino morbo correpti canes minime latrant; sed vocem edunt raucam, quâ cætera ejusdem sortis animalia perterrentur. Demissis caudâ & auribus, tristes incedunt, vel latebras, quibus recipiantur, quærunt. Intereà potum averfantur, solita alimenta respuunt, ægréque spiritum ducunt. Ore hiant, vel spumâ conspurcato, linguam exerunt, canes obvios laceßunt, hominesque invadunt; solis familiaribus in hoc primo rabiei gradu parcentes; quos brevi, omnium rerum obliti, & furore rapti nesciunt; donec tertio, quartove morbi die, deficientibus viribus

HYDRO-
PHOBIA.

humis prosternantur, & convulsionibus rapiantur; ni citius enecentur. *Morsum* longè periculosiorem esse sub hoc postremo morbi stadio, nemo nescit: sed rarò quisquam inter hunc statum manifestum offenditur, cum omnes fugâ sibi consulant.

Tantâ tenuitate pollet *venenum rabiosum*, ut simplici laticis salivaris contactu, nullo existente vulnere, traduci queat: imò & exsiccatus vel annosus hic humor, linteis vel pannis hærens eandem labem, si variis observationibus sit fides, inferre potest. Addere licet causam diù latere in parte demorsâ, licet ad cicatricem perductâ; cum dolor hujusce partis inter morbi prodromos primum locum obtineat: nec desunt exempla hujusce infortunii post viginti, imò & triginta annos à morsu. Intrâ vasa admissum illud virus aliquandiù occultatur; sed ante quadragesimum diem plerumque extricatur: rariùs sanè ad menses vel annos fovetur illud nefandi morbi seminium. *Hanc ferinam luem prænuntiare* solent crebriores oscitationes, spontanei corporis fremitus, cum pulsu debili & inæquali, somnus pavoribus & ejulatibus turbatus: dolores nonnunquàm sævissimi, qui non solum partem prius vulneratam obsident, sed etiam per totum corpus divagantur. Hæc excipiunt mœror & tristitia, à metu scilicet imminentis invasionis, vel quædam animi abjectio, quâ in publicum prodire verentur ægri; imò & cognatos & familiares fugiunt.

Hæc sunt vulgatiora *hydrophobiæ prologia*, quæ presso pede sequuntur aquæ, alteriùsve liquidi metus & horror; licet siti & interaneorum æstu torqueantur ægri; vomitus & singultus; pectoris angustia, vel suffocatio à quâdam laryngis constrictione, æquè ac in anginâ, cum pulsu debili & inæquali. Interea os spumâ defœdatur, & recruentatur in nonnullis vulnus: oculi torvi mentis perturbationem minantur; sub quâ clamitant & ululant cum vultu horrido. Mordendi desiderio premuntur, & furibundi evadunt; donec convulsionibus generalibus, quibus haud immunia sunt genitalia, è medio tollantur, vel in syncopem lethalem incidant; quâ scilicet circa quartum morbi diem ad plures migrant. Hydrophobia in potiori parte suos habet paroxysmos, qui nulli ordini submittuntur; sub dilucidis intervallis mentis compotes ægrotantes monent adstantes ut sibi caveant; vel vinculis constringi vulgò patiuntur.

Sunt qui velint se observasse rabidos aquæ metûs planè expertes: nùm *genuinâ hydrophobiâ* laboraverint? dubitare licet. Alii mentionem subjiciunt de *rabie spontaneâ*, nullo scilicet prævio morsu; nec contactu rabidorum: nùm morborum affinitate decepti hujusce observationis Authores à veri tramite recesserint? solertioribus examinandum relinquimus, quos non fugit potius horrorem inter febris malignæ, vel mali moris, hysteris, aliorumque nonnullorum morborum symptomata numerari: præter quàm quod contingere potest, ut ægri veterem canis rabidi morsum planè obliviscantur; vel linteamina aut vestes, hæc labe contaminata nescii pertractaverint, vel ore admoverint: hinc minime mirum si nonnulli, imminentis periculi ne minimam quidem suspicionem habentes in hydrophobiam, quæ

quæ pro spontaneâ inconsultò habetur, incidant : sed hæc dubia ulterioribus, accuratioribusque observationibus lubenter submittimus.

Ab institutis *cadaverum* hoc morbo sublatorum *sektionibus*, in apricum veniunt viscera nonnunquàm phlogosi tacta, macilenta, exsiccata, & quasi adusta; venæ iliacæ suprâ modum turgidæ, & cætera vasa nunc sanguine coagulato, nunc fluidissimo repleta. Oris & deglutitionis organa rarò illæsa; sed phlogosi correpta sæpiùs deprehenduntur; atque fœdissimâ spumâ mucosâ conspurcantur. Similem labem sæpiùs exhibet tracheæ facies interior; & pulmones nigri fœtent; ac demùm gangrænæ notas præ se ferunt prædictæ partes. Cor paucum sanguinem, picis instar nigerrimum continet: nonnunquàm flaccidum & marcidum; pericardio accretum deprehenditur. Lingua patet crassissima spumâ flavo-virente obducta. Passim observantur in interaneis, infarctus phlogodei, qui sæpiùs sphaceli notas præ se ferunt. Bilis viscida & virens; ac exuberans non solum in tubo intestinali; sed etiam in ventriculo: atque hocce latice atro-viridi scatent vesicula fellea, cæteraque bilis receptacula. E quibus benè perspectis, credere par est bilem in abdomine debacchari, dùm truculentus hic fœvit morbus; atque ab ejus incandescentiâ, præcipua oriri symptomata. Diaphragma in quibusdam inflammatum animadvertitur; & detectus fuit nodus in ejus nervo præcipuo. Vasa cerebri sanguine atro turgent, cum colluvie ferosâ, subflavâ in ventriculis stagnante. Annotantur thalami nervorum opticomum maridi; flatulentia sub dura meninge, &c. in quibusdam denique cerebrum inculpatum se præbet.

Ubi constat de imminentis periculi genere; *curationi prophylactica* nullâ morâ inhærendum. Præcipuum primò curantibus impendet munus, ut inflicto vulnere methodo suprâ traditâ prospiciant. Danda scilicet est opera ut virus rabiosum è vulnere excutiat; & ejus ingressus ad massam sanguineam omni arte, & incunctanter præpediatur. Monendi prætereà demorssi, ut lintea & vestes, mucosaliari fortè infecta, illicò exuant. Quibus præmissis invaluit usus, ut vulnerati in *aquam maris* vel fluminis, pluriès singulis diebus, & intrâ semi-minutam circiter; per novennium *immergantur*. Pluribus optimè celsisse illud auxilium experienciâ novi; quod tamen nonnulli scioli floccifaciunt. Circà quod notare juvat quòd ejus efficacia haud tam à balneo, quàm ab arte quâ inopinantes in æquor præcipites dantur, pendeat: atque in hoc terrore, quem experti Nautæ incurre solent, versari præcipuum hujusce curæ prophylacticae momentum, pronum est credere. Hinc patet ratio cur iners sit illud præsidium ergà canes, hujusce formidinis planè expertes.

Nec desunt *alia prophylactica*; pulvis nempè *Palmarii*, ostreum calcinatum, & lichen cinereus terrestris *Raii*; quibus addere licet cardiaca, alexiteria & diaphoretica vulgatiore, quæ, uti suprâ innuimus, suas laudes etiam merentur. Sed nullum hætenùs ipsomet hydrargyro tutius & efficacius innotuit præsidium; de quo mentionem olim subjecit laudatus PALMARIUS, quod scilicet è tenebris, quibus diù immersum fuerat, erue-

HYDRO-
PHOBIA.

runt nostri coætanei; quorum numerosissimæ & accuratissimæ observationes ultrà omnem dubii controversiam arguunt mercurium verum esse hydrophobiæ, non secùs ac luis venereæ, specificum, quovis modo usurpetur: intùs enim, & consuetis dosibus exhibentur turpethum minerale, aquila alba, panacea & cinnabaris, quæ nonnullis interjectis diebus, quinquies vel sexies iterantur; quibus mercurialibus nonnulli, haud sanè inconsultò, camphoram sociant. Aliàs, æquè ac ad curationem luis venereæ, celebrantur frictus cum unguento Neapolitano, ad drachmas duas vel tres, pro singulis vicibus; octies vel duodecies repetendi; interjectis solitis intervallis. Faustè etiam usurpatur mercurius in *canibus demorsis* ad præcavendam luem: quotidie scilicet, & per sex circiter dies, deglutienda præbentur turpethi mineralis grana octo vel decem cum medullæ panis quantitate sufficienti ad bolum: postea protelatur illud remedium, primò alternis diebus, dein quarto quoque die; eâ nimirum ratione, ut integra curatio ad viginti vel triginta dies accedat. Sic tutò deflectitur rabies, quæ, si jam canem invaserit, eodem medicamine impugnari debet; dummodò ingeminetur dosis, quater vel sexies exhibenda; undè plerumque prodit ptyalisimus innoxius. Haud minùs congruit hominibus jam rabie tactis hydroargyrosis; cujus dosis etiam duplex tum adhibetur: sed, ut verum fatear, in ancipiti versatur eventus.

Alia postremò recensentur *præsidia* contra hujusce morbi ferocissimi insultum; sanguinis nempè missio ad animi deliquium, balneum quantum licet productum, sub quo caput & facies identidem irrigantur: atque hoc solo præsidio quosdam evasisse nullus est dubitandi locus. Interea largâ manu reluctantibus exhibetur potus acidulus & refrigerans: ejusdem naturæ injiciuntur enemata; nec posthaberi debent anodyna interna è nitro & camphorâ petita. Proficue quandoque usurpantur emetica, inter quæ nullum sanè turpetho minerali præstantius occurrit. Quamdã opem conferre queunt antispasmodica: opportunè etiam in usum vocantur spiritus salis ammoniaci succinatus, vulgò *Eau de Luce*, aliaque alkalia volatilia; quæ fortè haud minori vi pollent ergà virus rabidorum, quàm adversùs viperæ venenum; cum nonnullam esse inter utraque miasmata affinitatem conjicere liceat. Moschum etiam faustè exhibitum fuisse fertur; circa quem vide lexicon JAMES, & Diarium Medicum anni 1761, pag. 199. Hæc sunt remedia magis decantata & experienciâ comprobatoria, quæ apprimè nosse interest; cum sub hoc morbo, veluti in aliis, pro variis circumstantiis, diversa experiri juvet.



CONTUSIO ET VULNUS.

CONTUSIO
ET VULNUS.

ECCHYMOSIM, vel phlogosim inferre *contusiones* nemini haud notum: nec latet eò periculosiores esse, cæteris paribus, quò pars exquisitiori sensu donatur: hinc patet quàm sit pertimescenda oculorum, mammarum, testium, extremorum digitorum, &c. collisio: scitur etiam *ominosos* esse capiti, pectoris & abdominis ictus, si actionem suam exerant in subjacentia viscera. Resolutione plerùmque judicantur contusiones; aliàs promovetur purulentia; nec rarò imminet gangræna, ut de luxationibus & fracturis ab eâdem causâ oriundis, de quibus alibi, sileamus. A graviore capitis contusione movetur suspicio de cranii depressione & fracturâ, vel cerebri commotione; quorum infortuniorum indicia censentur hæmorrhagia narium, auriumve; nausæ, febris, sopor & delirium, &c. Pulmones offenduntur, costæ franguntur, & à sede dimoventur à gravi pectoris contusione; hinc tussis, sputum cruentum, spirandi difficultas, &c. Nec minùs calamitosæ censentur abdominis contusiones, ad viscera pertinentes; quod sæpiùs accidit, etsi cutis nullo rubore vel livore afficitur: hinc læduntur organorum vitalium functiones: emergit interaneorum phlogosis, quæ febre, abdominis dolore & renitentiâ innotescit; quam haud rarò excipit purulentia: vel disruptis vasis, insidiatur sanguinis stasis quæ putritudinem & gangrænam post se trahit. Viscera nonnunquam skirrhusa evadunt; hærentiaque morbosas contrahunt. Suboriuntur aneurismata, acerbissimis dorsi doloribus, aliisque gravioribus symptomatibus stipata; tumores cystici, alteriùsve naturæ; hydrops lacteus, &c. hæc docent extispicia.

E *vulneribus* à corpore contundente, vel secante, inflictis minus vel majus concitatur sanguinis profluvium, quod arte vel naturâ coërcitum excipit crusta quædam repaguli vices gerens, è cujus delapsu feri cruenti vel saniei emergit stillicidium. Intumescunt graviorum vulnerum labra, phlogosique corripuntur, ac tertio, quartove die in suppuratum abeunt. Parcum sanguinis proventum præbent vulnera, è glandibus plumbeis sclopeto vibratis inflictâ; ob scilicèt quamdam escharam quâ sauciata vasa occluduntur: sed nonnullis elapsis diebus hæmorrhagiam minatur ejus delapsus: pus agrè conficitur in partibus sclopeto transfixis, quæ hinc ulcere pertinacissimo confodiuntur. Ampliora vulnera, æquè ac graviores contusiones, concomitari solent dolor, inflammatio & febris: quid sit metuentum ex horum accidentium complicatione, nemo non videt: nec fugit quantum terrorem incutiat gangræna ab hâc duplici causâ prognata, quæ pro mortis præcone haberi solet: ut de vulneribus venenatis, plerùmque lethiferis, apud nostrates rarissimis, sileamus.

Sed de *eventu* nil certi statui potest, ni priùs attendatur ad usum & fa-

 CONTUSIO
ET VULNUS.

bricam partis læsæ; non secus ac ad corporis secantis, pungentis & contudentis formam. *Arteria transversim cæsa* hæmorrhagiam vix coërcendam præbet: si leviter incidatur, impendet aneurisma. E *sectis nervis* emergunt stupor, paralyfis & atrophia partis cui prospiciebant: ubi verò leviter fauciantur & punguntur, graviora exsurgunt symptomata; dolor nempe acutissimus latè sese spargens, infarctus inflammatorius, æstuosissimus & suppurationis nescius; febris vividior, delirium, convulsiones, &c. *Artuum vulnera* luxuriante synoviâ madent, quæ marginum coalitui obstat, ac in ulcera sordida & putrida facessunt. De puncturâ tendinis è phlebotomo, suprâ actum fuit. Quid sit pertimescendum de vulneribus interiora capitis, pectoris vel abdominis attingentibus, nemo nescit: haud tamen sub hoc casu *vaticinandum*, ni priùs stylo congruo ritè explorata fuerint, accuratè insuper perspecto pristino vulnerati situ; dùm scilicèt hoc subiit infortunium: quibus indiciis constat de parte læsâ, è cujus functionibus eruenda est prognosis.

Vulnera capitis, non secus ac contusiones ab ictu, vel casu ab alto, ossa cranii deprimere vel frangere queunt; undè cerebri commotiones periculosissimæ, de quibus infrâ. Funestum præfagiunt *eventum* narium, auriumque hæmorrhagiæ, somnolentia, aliaque jam tradita symptomata. Quibus addere licet ophthalmiam ingruentem septimo vel undecimo post capitis contusionem die; quæ funeris metum incutit. Quod *ad pectus* attinet, si vulneretur cor, ad tibicines mittere licet. Minus impendet periculum è confossis pulmonibus; undè tussis, sputum cruentum & spirandi difficultas; quæ tamen symptomata haud levem terrorem incutiunt: emphyzemate corripuntur partes aditum vulneris ambientes, è quo aër unâ cum cruore spumoso erumpit; undè dilucidè patet morbi genus. Gravissima concitant symptomata *diaphragmatis vulnera*; dolores nempe vehementiores & suffocationes, febrem acutam & delirium, singultum, lipothymias, convulsiones, risum sardonium, &c. Periculosæ alex etiam censerī debent stomachi & intestinorum gracilium vulnera, & contusiones: narrat HELMONTIUS se vidisse juvenem studiosum pugno percussum, circâ orificium ventriculi; qui statim corruens, brevi oblitterato pulsu ad plures migravit. Cæterum *viscera abdominis* fauciata, ratione horum muniorum minus vel majus portendunt *periculum*. Cogitandum de exequiis, si sanguis pleno gurgite erumpat è vulnere altè inflicto; cùm de majoris canalīs immedicabili sectione nullum fermè sit dubium.

Facilè delentur leviores contusiones, de quibus, dum de ecchymosi, agemus: graviores verò, de quibus in præsentiarum, repetitas *sanguinis missiones*, non secus ac ampla vulnera expostulant; nec efficacius occurrit præsidium. Depletis vasis, digestionum organis prospiciendum, ne pravi succi inibi hospitantes morbum in posterum exasperent. Egregiam ad contusiones opem præstant repercutientia; albumen nempe ovi, acetum, rosæ rubræ, sanguis draconis, aliaque id fortis, quæ, si tempestivè & illicò imponantur, imminentem humorum defluxum, vel phlogosim avertere

solent : sed inertia vel noxia cenferi debent , si pars læsa jam intumuerit ; tùm ad resolventia & roborantia confugiendum : id genus sunt vinum saturatè rubrum & generosum , aqua vitæ simplex & camphorata , Reginæ Hungariæ & vulneraria ; aqua globulo martiali imprægnata ; terebinthina ; balsamum peruvianum , Fioraventi & Commendatoris : sal marinum sacculo receptum , urinæ vel aquæ tepidæ priùs immerfum , vel ipsamet aqua prædicto sale saturata ; petroselinum cum aquâ vulnerariâ contusum , theriaca ; cataplasinata è radicibus bryoniæ , consolidæ majoris , &c. confecta. Sed nil præstantius novi adversus contusiones generales , tam ab ictibus , quàm à casu ab alto , quàm pellis vervecina suo calore vitali prædita , quâ involvuntur ægri ; quod pluriès pro re natâ iterari potest. Cataplasma demùm è micâ panis & lacte paratum , quod etiam conducit , ubi tumor ad suppuratum vergit , egregiam opem præstat. Aliàs imponuntur vulgatiõra maturantia , donec confectum pus spontaneum exitum sibi paret , vel phlebotomi ope educatur. Sanguinis stasim etiam respicit sectio quâ prædictus latex , extrà vasa emissus , evacuat , ne labem partibus ambientibus & vicinioribus inferat : hæmorrhagia verò ex hoc inflicto vulnere sæpiùs prorumpens solitis adminiculis coërceri solet. Vesicæ sanguine turgidæ à deglutinatâ epidermide , sæpiùs solâ compressione , ope laminæ plumbeæ , vel sacculi gypso semipleni , &c. evanescunt. De ossium luxationibus & fracturis , à contusionibus oriundis , seorsim suo loco.

Suum symbolum conferunt in graviorum contusionum curatione *medicamenta interna* ; vulneraria scilicet & resolventia ; quæ tamen pro inertibus & ficulneis præsidiiis à quibusdam recentioribus perperam habentur : mirari profectò subit remedia peritiorum encomio celebrata , diuturniori praxi comprobata , nullis , ut ipsis visum fuit , viribus pollere : sed hanc litem componendam quibus plus superest otii committimus : cùm illud duntaxat nobis impendeat munus , ut usitatiora in hunc scopum , & à solertioribus acceptissima exhibeamus : qualia sunt infusum herbarum vulnerariarum , hyssopi , hæderæ terrestris , &c. succus cardui benedicti , cerefolii , petroselini , &c. terebinthinæ , & balsama naturalia , sperma ceti , sanguis hirci præparatus , succinum in officinis elaboratum , sal volatile , cornu cervi , aliudve ejusdem indolis ; antimonium diaphoreticum , balsamum LUCATELLI , theriaca , &c. quæ pleraque diaphoresim , in hoc casu saluberrimam , promovere solent. A quibusdam etiam deprædicantur absorbentia ; cornu nempè cervi præparatum , corallum , lapilli cancrosum fluviatilium , &c. quæ etiam quasdam suppetias ferre queunt.

Vulnerum ferruminatio solis œconomix animalis viribus absolvitur ; quas tamen nonnunquam juvare expedit , remotiora vulneris labra adducendo , vel quidquid horum coalitui obstat auferendo. Itaque ut vulneris simplicis , nullâ deperditâ substantiâ , curatio opportunè inchoetur , & faciliùs perficiatur , necesse est ut secta vascula debito sanguinis profluxu ritè depleantur , & accuratè sublatis quibuslibet corporibus extraneis , vulneris labra propiùs admoveantur , ac congruâ deligatione coërceantur :

CONTUSIO
ET VULNUS.

nec aliud Chirurgus incumbit munus per aliquot dies ; nisi ut identidem aquâ vitæ vel vulnerariâ irroretur hæc *fasciatio* : rarè enim medicari debent vulnera recentia ; nec ipsis immittenda sunt linamenta , penicilli , turundæ & pulvilli , quibus pessimo more nonnulli etiamnum utuntur imperiti Chirurghi , qui nil aliud patrant quàm vulnus producere. Insuper haud vetantur plantæ *vulnerariæ* , liquores spirituosi & balsamici , balsamum samaritanum , aqua globulo martiali imprægnata , pulvis sympatheticus , aliaque innumera , quæ suam opem conferre queunt in amplioribus vulneribus. Ubi è sectis majoribus vas sanguis confertim , vel ultrà modum erumpit , vinculo constringi debet ductus sanguiferus , si sinat pars læsa : aliàs admoventur styptica ; dissolutio nempe globuli martialis , alumen ustum , pulvis sympatheticus , &c. Egregiè etiam opitulatur agarius , suprâ laudatus , qui suo contextu tomentoso hiantia vasa ritè obturare potest ; dummodò congruâ deligatione coërceatur.

In quibusdam vulneribus , præsertim contusis & dilaniatis , movetur circâ quartum diem *purulentia* , quæ congruis topicis foveri debet : in hunc scopum deprædicantur *digestiva* è terebinthinâ , ovi vitello , oleo hyperici , unguento fusco , &c. parata ; quibus sociantur pro re natâ *detergentia* & *antiputrida* ; mel nempe , gummi elemi , balsamum peruvianum , myrrha & aloë , elixir proprietatis , aliaque id fortis ulcerum pertractationi dicata. Artuum vulneribus congruunt adstringentia & exsiccantia. Nervis , tendinibus & ligamentis fauciatis medentur oleum terebinthinæ & hyperici , balsamum peruvianum , elixirum proprietatis , &c. Ubi tendines certæ crassitie penitus secantur , horum extrema propius adnota futurâ jungi debent , ut ossium instar coeant ; quod absolvitur circâ decimum vel undecimum à consutione diem : nemo nescit hanc operationem , quàm despicunt nonnulli recentiores , pluriès felici successu institutam fuisse in difficilso tendine Achillis. Quod vulnera , globulis plumbeis sclopeto vibratis inflicta spectat , danda est opera ut extrahantur corpora extranea , & sistatur hæmorrhagia : quibus peractis admoventur simplicissimum linum carptum , ut postridiè adhibeantur digestiva , emollientia , &c. Etsi prima indicatio inter pertractandum vulnus adimplenda , in promovendâ cicatrice versatur , hanc tamen nonnunquam procrastinare expedit ; ubi scilicet carnes praviæ notæ luxuriant , & occultantur ultimi vulneris recessus. Ampliorum vulnerum oras haud rarè consuere juvat , ut ad mutuum contactum ducantur ; præsertim si extùs erumpant intestina , epiploon , aliaque viscera. Ubi demùm tubus intestinalis transversim secatur ; *sutura* etiam subjici potest , si accitus Chirurgus suam artem apprimè calleat ; aliàs superioris intestini labra vulneris marginibus admoventur , ut inibi ferruminentur , & hoc ano artificiali exoneretur alvus.

Vulnerum graviorum cura interna , parùm discrepat ab illâ quæ contusiones respicit. Largâ nimirum manu mittendus est sanguis ; victuique tenuissimo inhærendum. Primis viis etiam congruâ evacuatione prospiciendum , ne febris excandescat , aliaque concitentur graviora symptomata.

Interea plurimum conferunt diluentia; nec posthaberi debent vulneraria & diaphoretica, aliaque diversæ sortis remedia, quæ pristinae & pravae humorum diathesi occurrere valent. Huc etiam pertinent lacticia, ubi prædictis auxiliis haud morem gerunt contumaciora vulnera; vel ad aquas minerales tanquam ad sacram anchoram confugere expedit.

Supereft ut de levissimo hoc vulnere & familiarissimo, quod nunc *intertrigo*; nunc *excoriatio* audit, breviter agamus; quod à collisione, frictu, vel compressione; ab equitatione, &c. sæpissimè sobolescit: hoc etiam *promovent* squalor & immundities. Grave quandoque facessunt negotium excoriationes in morbis, tum acutis, tum chronicis, à diuturniori in eadem partem decubitu prognatæ. Ubi igitur exanthemata & ecchymoses à sanguinis stasi oriundæ, has minantur; lotionibus cum vino tepido, identidem iteratis, imminens continui solutio præcaveretur: ubi verò hæc stigmata livorem quemdam contrahunt; opportunè fovetur cum aquâ vitæ camphoratâ. Excoriationi verò medentur exsiccantia; pulvis ligni cariosi, cerussæ, lapidis calaminaris, &c. In usum etiam familiarissimum vocantur unguentum diapompholygos; emplastrum Norimbergense, de cerussâ, &c. Excoriationi à diuturniori equitatione prodest sebum ex ipsâmet candelâ, adeps, oleum rosaceum, &c. Sed munditiei præsertim studendum, & nil non movendum, ut pars læsa ab omni compressione solvatur.

CONTUSIO
ET VULNUS.

A M B U S T I O.

NEMO nescit varios esse ambustionis gradus, non solum ratione ignis vehementiæ & modi, sed etiam respectu fabricæ partis læsæ. Adustionem esse magis pertimescendam in facie, oculis, & cervice experientiâ compertum manet. Quod enim latior est pars ambusta & altius penetraverit ignis; eò periculosioris res est aleæ. Prunæ, metalla candentia vel fusa, flamma pulveris pyrii, aqua fervens, oleum bulliens, &c. summam sanè perniciem inferunt: sed longè vehementior cenferi debet fulguris impetus. Præter dolorem acerbissimum quem infert *vulgatior ambustio*, pars phlogosi corripitur, erumpunt phlyctænæ, variaque emergunt symptomata; ratione diversarum, uti jam annuimus, circumstantiarum à contextu vel usu partis, & naturâ corporis urentis, brevi vel longiori tempore admoti, eruendarum. Scitur ulcus hinc prognatum pertinacissimum fore; præsertim si foveatur à pravâ humorum diathesi; cachecticâ nempe, scorbuticâ, syphilideâ, &c. Extrâ oleas evagarer, si omnium ambustionum discrimina, earumque modos innumeros huc attexerem; cur omnes sub triplici classe colligere consultius & dilucidius fore cogitavi.

Itaque ratione læsionis gradûs, *ambustio* est *levis*, *media* vel *gravis*. *Prima* quæ haud ultra cutem actionem suam exerit, vel ejus superficiem

AMBUSTIO.

duntaxat afficit; dolore nunc levi, nunc acerbo stipatur; nonnullæ erumpunt pustulæ vesiculares è parte rubente & quasi urticatâ; ac plerumque secedit epidermis. Contextum cellulosum, & ultrâ, attingit *media*, quæ atrociorē dolorem excitat, & graviorem phlogosim accersit: sub hâc specie adusta cutis exarescit & rigescit, ac pus dein conficitur. Ad altiora penetrat *tertia* ambustionis *species*; imò & ad ipsa ossa pertingit; sub quâ cutis livida vel nigricans sensu planè orbatur, vel in escharam facessit; à cujus delapsu emergit ulcus profundum & putridum. Intereâ incandescit febris, atque ferociora ordiuntur symptomata; præsertim si lædantur nervi, tendines & ligamenta. Majorem, uti suprâ inculcavimus, sævitiam exercet *fulminis ictus*, qui gangrænosam labem obviis partibus infert; quo percussi syncope corripiuntur, vel planè suffocati, repentinâ morte abripiuntur.

Quamvis ambustionis speciem respicere videntur repercutientia, demulcentia, resolventia & digestiva: sed delectu opus est habitâ ratione gradûs & temporis; si tamen excipias vinum tepidum & aquam vitæ, tùm simplicissimam, tùm camphoratam; quæ indiscriminatim, nec infautè usurpari solent: sed hæc omnia sigillatim pro instituto exhibere expedit. Itaque primæ vel *leviori* ambustionis *speciei occurritur*, partis læsæ, si liceat, immersione extemporaneâ in aquam frigidam, vel admoventur lintea hâc imbuta, singulis horæ quadrantibus renovanda; quâ scilicet humorum præpeditur defluxus: eandem fermè opem præstant lutum, albumen ovi, acetum, atramentum, &c. Nullum sanè est dubium quin ritè succedant hæc *repercutientia frigida*; sed mirari profectò subit quòd haud minori efficacità polleant remedia quæ contrarias sanè vires obtinent: pars enim læsa *igni vehementi*, quantum ægri ferre queunt, exponitur; vel in aquam calidissimam felici successu immergitur. Opportunè etiam admoventur aqua vitæ camphorata, vel Regina Hungariæ, cataplasma è cepis contusis, cui nonnulli addunt sal & saponem, &c. ac multiplici experienciâ comprobantur hæc remedia; etsi invicem pugnare videntur. Utraque tamen à nonnullis posthabentur; quibus magis arriident *demulcentia*; unguentum nempe diapompholygos, nutritum & populeum, ceratum Galeni, aliaque id sortis innumera, quæ etiam particulis igneis domandis apta sunt.

Quod ad *ambustiones medias* vel *secundi ordinis* attinet, parùm aut nil proficiunt repercutientia & resolventia, quæ hinc à solertioribus & expertis abdicantur: sed pluris habentur *emollientia*, demulcentia & *digestiva*; in quorum censum veniunt emulsio vulgatissima, cataplasma de micâ panis, aliudve emolliens; oleum rosatum, liliorum vel ovorum, unguentum nutritum vel basilicum, ceratum Galeni, &c. quibus, si urgeant dolores, opium addere licet. Nec omittendæ sunt adversùs hanc ambustionis speciem, non secùs ac sub postremâ, venæ sectiones, ratione febris vel phlogoseos gradûs, plus minùsve repetendæ. Suam etiam opem conferunt diluentia & demulcentia interna, aliaque vulgatiore præsidia, quæ

quæ compescendæ sanguinis & spirituum excandescentiæ apta nata censeantur.

In usum vocantur ad *postremam ambustionum classem* topica suprâ tradita, emollientia scilicet, digestiva & anodyna; quibus opportunè nonnunquam sociantur styrax, spiritus vini camphoratus, cæteraque id genus *antiputrida*. Pars insuper siderata scarificationibus impugnari solet: ulcus verò ab escharæ delapsu emergens, solitâ & vulgatori methodo pertractatur. Sed ubi ambustio ossa attingit & sphacelus latius propagatur, nulla fermè sanationis affulget spes; ni incunctanter ad partis amputationem sese accingat Chirurgus: aliàs latè serpens gangræna, brevi viscera impetit, & hinc ægros in orci fauces præcípites trahit.

Peculiarem curam sibi vindicat *oculorum adustio*: præter enim iteratas venæ sectiones, plurimùm conferunt topica demulcentia; lac nempè muliebre, sanguis tepidus columbæ, aqua sperniolæ, rosarum & plantaginis, mucilagines seminum lini & psyllii, pulpa pomorum coctorum, &c. quæ omnia cæteris faciei ambustionibus etiam profunt. Sed si à conflagrato pulvere pyrio oriatur hæc *faciei defædatio*; danda est opera ut singula grana nigricantia acûs beneficio extrahantur: aliàs posthabitâ hâc cautelâ stigmata manent indelebilia; ni admoto vesicatorio recruentetur vulnus, & absolvatur hæc extractio. Postremò exquisitioribus topicis antiputridis coërcetur *fulminis labe*; cardiacis validioribus fugatur lipothymia & vires prostratæ refocillantur: quibus restitutis de æstu interaneorum sæpiùs conqueruntur ægrotantes; quem restinguere queunt aqua succo limonum imprægnata, cæteraque refrigerantia & demulcentia, suprâ tradita.

AMBUSTIO.



GANGRÆ-
NA
EXTERNA.

GANGRÆNA EXTERNA.

OMNIBUS innotescit hæc solidorum *adnecrosim dispositio*, quâ calor natus ferè extinguitur; cujus indicia à partis colore fusco, atro-livido vel nigro depromi solent. Sphacelus vel sideratio audit hic partis tactæ status, è quo ad pristinum nullus datur reditus; adeò ut calore & sensu planè orbetur & plerùmque gravè oleat: quod infortunium imminet, si gangræna certo doloris & ardoris gradu stipetur. *Gangræna*, alia est, ut inquiunt, *sicca*, alia *humida*: sub primâ, magis sanè ominosâ, pars inodora rigescit, corneamque duritiem quasi contrahit: humida minùs periculosa distinguitur ab humorum decubitu; *phlyctænis* sero flavo turgescitibus & fœtore. Nonnunquàm tamen occurrit gangræna utriusque characteris particeps; vel alterutrum vicissim induens: nec rarò observatur gangræna unius cruris *sicca*, dùm *humida* se sistit in alio. Hinc parùm ratione indolis ab invicem discrepare prædictas species haud falsò inferre licet. *Gangræna* nunc à *causâ internâ*, vel quâdam sanguinis & humorum labe, progerminat; nunc externæ submittitur: primam pariunt deficiens calor vitalis in ætate provectâ, atrophîa, paralyti, &c. Hanc etiam promovent nonnulla venena; inter quæ numerandum granum illud insensissimum, quod fecale luxurians vocitant; quod scilicèt degener & nigrum, insolitam crassitiem assequitur. Gangrænam deniquè post se trahunt scorbutus, lues venerea, febres pestilenciales & malignæ, variolæ, inflammatio, erysipelas, œdema, &c. Multiplex etiam est *causa externa* quæ gangrænam accersit; morsus scilicèt & punctura animalium venenatorum, vulnera, contusiones, ambustio, frigus brumale, vincula arctè constricta, compressio diuturna, luxationes, fracturæ, &c.

Pars gangrænâ correpta livorem vel nigredinem contrahit: nunc rigida, uti jam innuimus, nullis prominentiis exasperata animadvertitur; nunc mollis, è quâ erumpunt *phlyctænæ*, se sistit. Interea dolorem & æstum in parte læsâ, quibus conqueruntur ægrotantes, excipiunt sensûs abolitio, vel integra *sideratio*, quâ cutis calore & vitâ orbatâ spontè à subjacentibus carnibus separatur & decidit; undè prodit ulcus saniosum, sordidum & fœtens. Sub morbo à *pane fecalino* pravæ notæ producto, in torporem quemdam incidunt ægri, cum ventre tumido: macies & debilitas pari passu incedunt: sæviunt dolores in artubus frigidis; pulsusque debilis exploratur. Manuum denique & pedum digitos invadit gangræna, quæ brevi altas radices agit, necrosimque accersit. *Gangræna à frigore* ortum habens, ad quam prona sunt extrema, manus nempè, pedes, nasus, lobi aurium, &c. brevi stupendum incrementum sumit: pars tacta vicissim pallet & rubet cum immensi pruritu, vel dolore acutissimo; dein colorem

violaceum vel nigrum induit, sub quo gradu imminet partis fideratæ prolapsus. Artuum ligamenta nonnunquam attingit & solvit hæc gangrænæ species; undè haud rarò evenit, ut pes & ipsamet tibia, horrendo sanè spectaculo, proprio pondere, non secus ac à vulnere cæsim factò, delabantur. Nec cæteris partibus parcit *frigus extremum*; quin potius totum corpus subitò invadere potest, quod hinc rigiditatem contrahit; adeò ut nonnulli reperti fuerint, si historiis sit fides, hoc fato extincti pristinum situm servantes; milites scilicèt armis instructi & quasi præliantes, equites haud dimissis habenis, &c.

Maximum portendit *periculum gangrænæ à pravâ humorum diathesi*, vel à fecali virulento, sobolescent; quæ hinc rarò partibus internis parcit, sub quâ nil proficit membri amputatio, cùm hoc sublato in aliud ingruere soleat gangræna. Hanc ut plurimum præeunt febris vehemens, & dolores acutissimi. Primam perniciem infert in pedum digitos; altiùs dein serpens in alias partes propagatur: pulsus, rùm temporis, obscurus & intermittens exploratur: caput exerunt anxietates, cardialgiæ, lipothymia, &c. Gangræna os & genitalia invadens summum terrorem incutit: *calamitosa* censeatur in cruribus hydropicorum: pro lethiferâ demùm habetur quæ ad musculos, ligamenta, periosteum, & ipsamet ossa pertingit. Minime reticendum quòd primam in ossa sævitiam nonnunquam exerceat; intactis partibus externis, cujus phænomeni exemplum haud rarò præbent lues venerea, spina ventosa, &c.

Quantocyùs allaborandum ut gangrænæ rudimenta suis terminis coërceatur, ad quod opus varia præcipi solent *topica*; alliaria nempè & scordium, decoctum abrotani in aquâ falsâ, spiritus vini camphoratus sincerus, vel cum aquâ calcis mixtus; tinctura myrrhæ & aloës, cui addere licet spiritum salis ammoniaci, styrax, unguentum Ægyptiacum, theriaca, &c. quæ omnia tanquàm exquisitiora antiputrida, nemine reluctantè, habentur. Insuper danda est opera ut eximatur pars fiderata, cujus delapsus egregiè promovent *scarificationes*, quæ etiam expectatissimæ puris confectioni favent. Sed aliam curandi methodum sibi vindicat *gangræna à frigore* horrido contracta: pars scilicèt nive obducitur, vel linteis aquâ frigidissimâ imbutis obvolvitur, aut in hanc immergitur: aliàs leves exercentur frictus cum prædictis materiebus: dein cum linteis calidis confricatur pars affecta, ut sensim incalescat; quæ postea aquâ tepidâ fovetur, vel in hanc immergitur. Conferunt postremò fofus è vino quolibet aromatico parati; cui adjungere juvat spiritum vini camphoratum.

Nec posthabenda in quâvis gangrænæ specie medicamina interna, quæ diversa & contraria, pro re natâ præscribi solent. Opportunè enim in pluribus exhibentur cardiaca & sudorifica; radix nempè chinæ & sarsaparillæ, salia volatilia, lilium Paracelsi, elixirum proprietatis, theriaca, aliave consimilia; quæ tamen exulare debent, si excandescat febris & sæviant interaneorum æstus: sub quibus circumstantiis conducunt aqua succo

GANGRÆ-
NA
EXTERNA.

limonum imprægnata , aliaque refrigerantia acida. Sed omnibus antiputridis internis palmam sanè præripit *cortex peruvianus* , præsertim si gangræna à causâ internâ ortum mutuetur : ad drachmam semis , quartâ quâque horâ exhiberi solet illud remedium ; quod etiam enematis formâ & congruâ dosi injicitur ; non secùs ac in febrium intermittentium curatione. Nec vetatur illud *antiputridum* in ipsismet variolis , ubi in conspectum veniunt exanthemata gangrænosa ; ni tamen obstant febris intensior , & quædam pectoris labes. Plura non addimus , cùm de hoc argumento accuratissimum omnibusque notissimum conscripsit tractatum clariss. QUESNAI , de re Medico-Chirurgicâ optimè meritis.



S E C T I O I I .

DE MORBIS CAPITIS EXTERNIS.

C E P H A L A L G I A .

TOT causis autopsiâ anatomicâ investigandis submittuntur *dolores capitis*, ut minime mirari subeat, si multiplex sit horum modus: etenim præter varios gradus, & diversam sedem; nunc pungentes, nunc lancinantes, vel dilaniantes, pulsantes, contundentes, pressorii, gravativi, perterebrantes, ardentes, frigidi, &c. juxtà agrorum querelas existimantur. Quandoquidem agrè sapiùs dignoscatur in praxi, nùm *dolor* sit *internus*, cerebro-nempè, ejusque involucris insidens; aut *externus*, pericranio scilicèt & tegumentis, sinibus frontalibus & sphenoidalibus incumbens; de utroque hîc agere haud incongruum fore cogitavimus. Inter hæc discrimina distinguendus venit *dolor capitis idiopathicus*, cujus nempè causa inibi hæret, à *sympathico*, stomachi scilicèt, alteriusve visceris, labe ortum ducente; vel *symptomatico*, febris nimirùm, affectionis hypochondriacæ aut hystericæ, luis venereæ, scorbuti, arthritidis, &c. sobole. Quanti enim sit momenti hæc omnia, atrâ sapiùs caligine immersa extricare nemo non videt. Insuper *cephalalgia* audit hic dolor totum caput laceffens: *hemicrania* nuncupatur, si dimidiam tantummodò partem capitis impetat: ubi verò intrâ angustissimum spatium continetur dolor, *clavi hysterici* nomine insignitur; etiamsi pluriès accidat ut intrâ prædictos terminos coërceatur absque nullâ hysteris suspicione, quod apprimè norunt practici. De *gravedine*, præcipuo coryzæ, & nonnullorum aliorum affectuum symptomate suprâ actum fuit. Huicce conspectui generali addere juvat multifarios dolores capitis nunc esse *continuos*, sed cum quibusdam remissionibus; nunc *intermittentes*, qui scilicèt satis temporibus, vel inordinatè recurrunt.

Evacuationes suppressæ, cutisque efflorescentiæ repulsæ, improbæ mentis & corporis exercitationes, animi pathemata vehementiora, capitis contusiones ab ictu vel lapsu ab alto, insolatio, temulentia, venus immodica, vapor carbonum, cuparum, &c. sunt totidem *causæ* quæ dolorem capitis promovere solent. Cephalalgiam nonnunquàm concomitantur atrociora symptomata, febris nempè vehementior, insultus comatosi, apoplexia, lipothymia, delirium, fatuitas, convulsiones, &c. Hemicrania stomachum subvertere solet; sed rariùs pejora post se trahit symptomata. Eruptionem catameniorum, aliamve hæmorrhagiam nonnunquàm

CEPHALAL-
GIA.

prænuntiat dolor capitis; qui aliàs inter febrium intermittentium & malignarum, apoplexiæ, epilepsiæ, mania & delirii, surditatis & cæcitatibus, &c. prodromos, jure numeratur. *Pertinaciores* cephalalgias nonnunquam solvunt sanguinis vel puris è naribus, auribus & ore profluvium. Plures etiam hoc fausto bearunt eventu vermes multifarii è naribus erumpentes. De verme ad sex pollices accedente, è genere centipedum, per nares inter sternutationem ejecto, post diuturnum & acerbissimum capitis dolorem, mentionem subjicit LITTRE. Nullam ferè curam, si palliativam excipias, admittit cephalalgia à vitio quodam organico orta: symptomatica verò, sublato primario morbo, spontè ut plurimum evanescit. Periodica, etsi sæpius pertinacissima, nil plerumque mali portendit. Dolorem postremò capitis difficilius domari in senectute, & sequiori sexu, experientia docet.

Secta cadavera exhibent arctiorem ossium cranii nexum, vel futurarum obliterationem, totius pyxidis stupendam crassitiem, depressionem, vel fracturam, exostoses & cariem; ossa, vel horum fragmenta, è sede dimota; pericranium circà sinciput crassius; pediculos sub hocce involucro; ossa orbitæ mollia; exostoses cerebrum comprimentes, &c. Vasa meninges & cerebrum perreptantia, nunc sanguine turgent, nunc flatu distenduntur; vel osseam duritiem contraxerunt. Plexus choroïdeus pallescens & inanitus, vel distentus & varicosus conspicitur. Dura meninx crassissima & corrugata, necnon cartilaginea annotatur; vel cranio arctissimè hærens. Invicem accreta, vel pure defœdata, gangranosa & putrida, observantur cerebri involucra: ac pia meninx crassior, & nonnunquam statibus quasi tumida, vel humore quodam gelatinoso obducta apparet. Cerebellum sepimento osseo munitum haud rarò in suo antro delitescit: eandem etiam duritiem exhibent majores arteriarum trunci, falx, cæteræque duræ matris propagines; vel deprehenduntur ossicula passim hisce processibus membranaceis adnata. Obvium fit cerebrum depressum, vel in sese collapsum, ferosâ colluvie imprægnatum; vel densum, aridum & friabile. Occurrunt phlogoses & purulentia fœtidissima, imò & putredines, tam in cerebri compage, quàm in ejus involucris: pus etiam in sinus frontales & sphenoidales colligitur. Passim reperiuntur hydatides; tumores fungosi, cystici & steatomatosi, phlegmonodei & purulenti; tubercula, vel concretiones lapideæ; non secus ac stupenda glandulæ pinealis moles; quæ nonnunquam etiam lapidea deprehenditur. Visendæ se præbent stases feri nunc limpidi, nunc gelatinosi; colluviei nigræ & putris, sanguineæ & purulentæ, tum in ventriculis, anfractibus & recessibus cerebri; tum circà meninges; vel in sinibus frontalibus & maxillaribus. Varia subjiciuntur exempla vermium multiformium, nidulantium, non solum in cavernulis osseis, variisque narium recessibus; sed etiam in omnibus cerebri partibus. Oculis subjiciuntur gangrana & putredo, in singulis cerebri, cerebelli, horumque capsularum locis. Notare expedit sæpius observari læsionem in parte oppositâ; post dolorem scilicet dextri lateris, labem reperiri in sinistra parte: nec rara sunt *consensus partium*,

vel remotissimarum, exempla. Prolatis addere juvat cerebrum nonnunquam planè inculpatum haud rarò deprehendi. De hydrargyro demùm stagnante ad plures uncias in ventriculis, aliisque inferioribus cerebri recessibus, commemorant anatomici; non solum in his qui prius hydrargyrosi submittebantur; sed etiam in variis operariis qui hoc minerale pertractare solent: ut nil addam de skirrho & tuberculis pulmonum; de humore æruginoso in ventriculo; de hepate duro, liene obstructo, &c.


E suprà habitis colligere datur arduam sæpius esse doloris capitis *curationem*, ob innumeras scilicet causas, plerumque immedicabiles, quibus subjicitur; quæ atrâ caligine nonnunquam immerse clinicorum, vel solertiorum, indagini subtrahuntur: ni meris conjecturis illas assequi liceat; quod haud nisi post obitum, vel sectionem cadaverum, dilucidè patet. Sub hisce angustiiis soli generali methodo, pro opportunitate & circumstantiis, ad varium scopum dirigendæ, inhærebimus. Itaque inter præsidia præstantiora primatum sanè ducunt sanguinis missiones è brachio, pede vel cervice: nullâ morâ celebrari debent, si dolor capitis ab insolatione, à lapsu ab alto, aut quâvis contusione, aliove infortunio ortum ducat. Huc coincidit *arteriotomia*, quæ ad cephalalgiam pertinacissimam haud immeritò deprædicatur. Nec minorem laudem merentur hirudines, tum podici, tum fronti, vel ponè aures admotæ. Efficacissimam postremò esse jugularium sectionem in dolore capitis febrili & acerbiorè, multiplici experientiâ compertum habui. Depletis vasis sanguineis, digestionum organis prospiciendum, non solum usitatoribus evacuantibus, sed etiam aliis præsidiiis ad hoc opus usurpari solitis.

Posteà allaborandum ut restinguatur sanguinis incandescencia, ejusque moleculæ aciores obtundantur. Utramque opem præstant *diluentia*, *demulcentia* & temperantia; potus nempe aqueus, juscula pulli, vel carnis vitulinæ, serum lactis & emulsiones, &c. Aqua sincera affatim vel pro omni alimoniâ hausta hemicraniam, aliosque capitis dolores periodicos brevi fugare solet. Proficue nonnunquam adhibentur adversus dolores capitis contumaciores *aperientia*, martialia nimirum, aselli, aliaque id genus, ad obstructions quascumque referandas usurpari solita. Quibusdam etiam conferunt diaphoretica, quæ præcipue conducunt in hemicraniam periodicâ; ut de antivenereis, antiscorbuticis, aliisque specificis primario morbo dicatis, sileamus. Haud improbantur anodyna, imò & hypnotica; nitrum scilicet, camphora, diascordium, syrûpus de karabe, &c. etsi opem plerumque fugacem præstant: haud tamen citrà periculum adhiberi queunt narcotica sub cephalalgia idiopathicâ. Plures juvant cephalica & antispasmodica, inter quæ usitatiora audiunt flores tilia & melissa, betonica, valeriana & prœnia, succinum, castoreum, pulvis de gutteta, falia volatilia, cinnabaris, &c. Nonnullis etiam prodest haustus the, vel caffè: pluris demùm habetur cortex peruvianus, adversus dolores capitis periodicos. Sed hisce omnibus incassum exploratis, ad lacticia, vel aquas minerales, tam acidulas, quam mariales confugere solent clinici.

CEPHALAL-
GIA.

CEPHALAL-
GIA.

In subsidium vocari debent *remedia externa*, quæ haud rarò præsentaneam opem ferunt. Inter præstantiora recensentur vesicatoria, capiti, dorso vel cruribus imposita; nec suis viribus defraudantur sinapismi, iisdem partibus admovendi: his sanè antecellunt setaceum per occipitis cutem trajectum, & cauterium cervici, dorso vel cruribus inustum; quibus non modò conticent capitis dolores pertinaciores, sed sæpiùs etiam planè fugantur. Hunc nonnunquàm habuisse exitum cephalalgiam, à fortuità adustione, nemo nescit: hînc patent vires moxæ Sinensium, quæ conflagrata cauterii actualis vices gerit. Insuper suppetias ferunt balnea & pediluvia, frictus in cruribus celebrati, capitis irrigationes ab alto, & ipsimet foci frigidi, huic parti admoti, si culpetur insolatio. Prætereà quibusdam conferunt sternutatoria, vapor camphoræ in spiritu cephalico solutæ, & suffusus è karabe. Nonnullis prodest admotio verbenæ, sedi majoris, sacculi sale & micâ panis repleti, gossipii æthere vitriolico imbuti, &c. De cranii perterebratione, nonnullis sanè profuturâ, nil addimus; cùm atrâ plerumque caligine involvantur suprâ tradita capitis vitia, quibus mederi potis esset.



I N S O L A T I O.

Hoc nomine insignitur hic gravissimus capitis affectus, qui ab intensiori radiorum solarium æstu (*Coup de Soleil*) contrahitur: quæ causa, licet evidentissima, haud rarò tamen fugit Medicos, qui ægrotantes, præsertim nosocomiorum, percontari gravantur. *Insolatione tacti* de atrocissimo capitis dolore, pulsativo vel gravativo, febre sæpiùs vehementiori & siti inexplibili stipato, conqueruntur; qui etiam cerebrum intus concuti & convelli sentire arbitrantur. Coruscantes oculi flammei & sicci dolent, lumenque refugiunt, atque tumentibus, vel phlogosi tactis palpebris nonnunquàm planè obturantur. In quibusdam involuntariè subsilit caput. Plures in affectum comatosum incidunt, & nonnisi summè perterriti expergiscuntur: alii insomnes ducunt noctes, & vigiliis perpetuis torquentur; his impendit delirium cum febre, furore & terrore: aliàs febris expertes, omniumque immemores, garruli desipiunt. Nonnullos demùm corripit insultus convulsivi, vel artuum tremores. Intereà cutis cranii & faciei sole flagrantissimo quasi adusta, aridaque deprehenditur: nec rarò suboriuntur tumores circà aures & in cervice. Insuper vires prosteruntur, præsertim ab erumpentibus sudoribus; urinæ minguntur flammeæ, vel saturatè rubræ: ingruunt anxietates: emergit cibi fastidium vel promovetur vomitus: quidam demùm, non secùs ac hydrophobi, potum averfantur.

Hæc omnia tamen *extremum insolationis gradum* respicere nemo non intelligit

intelligit : à mitiori enim sobolescent coryza , capitis gravedo , vel dolor , periculi expers , anginae , aliave fluxiones catarrhales , de quibus alibi. Truculentior verò & calamitosus est morbus , de quo in praesentiarum : hoc enim ingruente plures sub dio statim enecantur ; praesertim temulenti , qui inter dormiendum soli ardenti , denudato capite , exponuntur : & hicce insultus parùm aut nihil discrepat ab apoplexiâ fortissimâ : in aliis ad plures dies , decem scilicet , & ultra , protelatur morbus. Ex insolatione ad extremum gradum dejectâ recreatos manent dolores capitis diuturniores & vix medicabiles : visus in quibusdam perturbatur , vel planè aboletur : nonnulli demùm superstites , ad ultimam vitæ metam desipiunt. Insolationis periculum incurrunt viatores , rustici , regularii , alique operarii qui in aprico , dum ardet syrius , sibi demandata obeunt munia ; adeò ut radiorum solarium verberatione diù submittantur. Idem impendit infortunium iis qui propè focum ardentissimum somno corripuntur ; cujus phaenomeni exemplum in medium adduxit clariss. TISSOT , de re medicâ benè meritus.

Lustrato capite insolatione denatorum , patent phlogoses , tum in cerebri involucris , tum in hujusce visceris substantiâ. Vasa alteram meningem irrigantia nigro , torridoque sanguine turgent , ac nonnunquam dilacerantur ; adeò ut profundatur latex coccineus , qui tum , cranio ferrâ orbiculatim secto , majori copiâ effluit. Dirutis cerebri involucris , in conspectum veniunt hydatides in plexu choroideo , tumores phlegmonodei , exulcerationes & purulentiae , diversam sedem habentes : pus nonnunquam proprio folliculo concluditur ; alias extrâ suum receptaculum profusum , viciniore partes inquinat ; ipsisque summam labem infert. Reperiuntur foedissimae putredines & fiderationes , circa cerebri ambitum frequentiores. Ventriculi sero cruento , vel ipsomet sanguine , ut plurimum congrumato , scatent ; qui alias materiam faeculentam recondunt. Annotantur postremò in basi cranii ossa carie laesa à corrodeute tabo ; quod hinc exitum per os , nares & aures sibi parabat , uti pluriès observatur in praxi.

Eò collimandum , ut restinguatur sanguinis aestus , & in hoc versatur curationis momentum , quae alias simplicioribus peragitur. Equidem venae sectiones , & refrigerantia intus sumpta , vel extus admota omnem implent paginam. Illicò igitur tundatur vena , & pro symptomatum vehementia pluriès iteretur hæc evacuatio ; cujus praesidio , sensorio communi prospicitur , & urgentiori obtemperatur. Ritè depletis vasis ad pediluvia , semicupia vel balnea vix tepida incunctanter devenire expedit. Suam etiam opem conferunt enemata emollientia & refrigerantia. Interea ingurgitantur ægri aquâ aceto vel succo limonum imprægnatâ ; sero lactis , emulsionibus , &c. Nonnullis prodest decoctum tamarindorum , ubi praesertim de pravis digestionum reliquiis est suspicio. Faustè insuper admoventur capiti , fronti & temporibus foci ex aquâ frigidâ , cui tantillum aceti immiscetur , parati. In similem etiam usum veniunt succi portulacæ , lactucæ & verbenæ , qui sanè suas laudes merentur. Profuerunt postremò balnea

INSOLATIO.

frigida pluribus qui pro deploratis habebantur : ac fortè in re urgentissimâ, sibi par non habet hoc remedium ; quod tamen nusquam usurpare licet , ni priùs vasa probè depleantur.

Ubique occurrunt mulierculæ quæ solem intrâ cerebrum sævientem foràs expellere sibi persuaserunt ; poculum scilicèt aquâ repletum , quocumque panno coopertum & inversum vertici admovendo ; adeò ut aqua pannum trajiciens sensim effluat , ac caput madefaciat ; cur sit ut aëris moleculæ , quæ propriâ & notissimâ vi ad locum vacuum nituntur , sub bullarum formâ superiora petant , & liquorem , quasi ebullientem , subagitare videantur ; quam motionem pro sole sursùm ablato habet insulsa plebecula. Hanc operationem ludibrio pluriès vertere hæud gravatus sum ; illum scilicèt commentitium solem extrahendo , simili arte , haud citrà adstantium admirationem , è capite ligneo , aliove quolibet corpore obvio. Haud tamen planè inutilis hæc est inepta operatio quæ fortùs aquei vires obtinet.



CAPITIS CONTUSIO.

ACASU ab alto , aliisque gravioribus capitis ictibus , concutitur , & intrâ pyxidem osseam *repercutitur cerebri massa* ; hinc labes quæ *commotio* audit , ob procellosa quæ post se trahit symptomata , summè reformidanda. Sæpiissimè confringuntur cranii ossa , nunc sub ipsâmet parte contusâ , nunc in parte oppositâ , alibive : aut tantummodò deprimuntur , si quamdam flexilitatem servant , ut in juvenili ætate & peculiari corporis dispositione. Aliàs nulla detegitur fractura , nec depressio ; quod sanè , cæteris paribus , magis ominosum jure censetur.

Variis signis se profert cerebri commotio ; vomitu nempè , hæmorrhagia narium , oris & aurium , ophthalmiâ vel visûs obtenebratione , tinnitu aurium , aphoniâ , syncope , sopore lethargico , vel apoplexiâ , paralyfi vel partium torpore , urinæ incontinentiâ , vel alvi involuntariâ solutione , febre & delirio , convulsionibus , &c. Sed haud semper illicò se produnt prædicta signa , vel symptomata ; quæ sæpiùs haud nisi quarto , septimove morbi die , vel tardiùs in propatulum veniunt : è quorum conspectu jure conjicitur sanguinem à disruptis vasis , in quâcumque cerebri parte stagnare ; hoc viscus inflammatione corripì , vel purulentiâ & putredine labefactari , ac postremò ejus involucria fragmentis osseis lacerari. Fertur dolorem à forti maxillæ inferioris adductione emergentem , *fracturam cranii* arguere : sed hoc infortunium , uti pluriès observavi , minime patefacit hæc periclitatio , si à muscutorum temporalium ortu distet fractura , quæ tùm solâ ossis denudatione , solitisque styli explorantibus innotescere valet. Notare expedit circà hanc indaginem , futuras Wormianaspasim

occurrentes pro facturâ nonnunquàm ab incautis haberi , nec ab hoc errore se immunem fuisse fatetur HIPPOCRATES. Quod ad cranii depressionem attinet , tactu & visu facilè dignoscitur. Ecchymosis , phlogosis , vel ipsummet vulnus , nil certi arguunt de commotione & facturâ ; cum sæpè sæpiùs accidat ut factum tectum sit cranium , cum maximâ tegumentorum dilaniatione ; vel ossa confringantur , illibatâ cute. Purulentiam feriùs ocyùs post se trahere solent fractura cranii & cerebri commotio ; circa quam notare expedit , pus tertio à casu ab alto die nonnunquàm confici , quod fortè inauditum , inter lustranda cadavera haud rarò observasse memini.

Variam stragem , quæ sæpiùs latuerat , exhibet *autopsia anatomica* ; multiformes nempè ossium fracturas & depressiones , perturbatas horum connexiones , ac demùm stasim materiæ cujusdam gelatinosæ , sub cute contusâ latitantis. Fractura , uti jam innuimus , haud semper occurrit in parte collisâ , sed sæpiùs in oppositâ , alterâve : nec immunia sunt ossa in pyxidis basi sita , sphenoïdeum nempè , petrosum , &c. interna ossium tabula nonnunquàm confracta observatur ; inculpatâ externâ , vel vice versâ. Obvia fiunt vasa sanguinea ultrâ modum repleta , plexusque choiroides corpusculis rubellis refertissimus. Dura meninx atro-rubens & lacera deprehenditur , cum scrobe cerebro impressâ. Patet cerebrum lymphâ gelatinosâ oblitum , nunc mollius & pultaceum , nunc firmitus , quasi elixum fuisset. Crebrò occurrunt sanguinis stases , non solùm inter cranium & meninges , sed etiam in cerebri ventriculis , aliisve recessibus , qui etiam ferofam colluviem , plerùmque subcruentam , vel loturæ carniū similem recondunt. Passim insuper annotantur phlogoses , gangrænæ & putredines , tam in ipso cerebro , quàm in ejus involucris : ossa demùm carie sæpiùs læduntur. Mirum sanè has defædationes haud rarò observari , etiamsi integra cutis nihil vitii præ se ferat. Coronidis loco addere licet nonnunquàm reperiri abscessus in hepate ; quos à metastasi oriri pronum est credere.

E præfatis colligitur *grave periculum* portendere *capitis contusiones*. Intrâ quadraginta dierum spatium se prodere solent enumerata signa , vel ingruunt procellosa symptomata quæ morbi sævitiem denuntiant : rarissimè tardiùs se proferunt. Neminem physicum latet ratio , quâ fit ut capitis contusiones cum ossium depressione & facturâ minùs sint ominosæ , quàm si ossa , cæteris paribus , illæsa deprehendantur. Silentio minime prætermittendum , quòd commotionem etiam sæpiùs patiatur cerebrum ab ictu corporis mollis , culcitæ nempè laneæ , stramentorum fascis , aliorumque id genus ex alto decidentium : imò & mentio subicitur de cerebri commotione ab inflicto colapho , à solâ corporis concussione , &c.

Largâ manu statim *mittendus est sanguis* è brachio , pede & cervice : postea primarum viarum evacuationi , cæteris consentientibus , prospiciendum , & libera fervetur alvus. Interea præscribi solent diaphoretica

CAPITIS
CONTUSIO.

& vulneraria, inter quæ plurimum deprædicatur succus cerefolii & pimpinellæ in vino albo. Nec posthabenda remedia externa, inter quæ commendatur petroselinum in aquâ vulnerariâ contusum, & parti læsæ admotum. Foveretur caput cum decocto salviæ, stœchados, lavandulæ, & rosarum rubrarum ex vino albo: è quibus herbis, non secus ac aliis aromaticis & cephalicis etiam parantur sacculi, vel cataplasinata capiti imponenda. Cæterum faustè admoveri queunt vesicatoria, ubi urget affectus comatosus: suam quoque opem conferunt setaceum, cauterium, aliaque adminicula adversus apoplexiam & paralysem usurpari solita.

Ubi denudatum & integrum cranium conspicitur; ejus exfoliatio promoveri debet; os scilicet terebellâ ad hoc opus congruâ, pluribus in locis leviter forando. Si verò occurrat fractura; necessum est ut detegatur dura meninx, quamdam pyxidis portionem auferendo cum terebellâ, ferrâ circulari instructâ, ut sanguini inibi stagnanti exitus concedatur; ac eximantur fragmenta vel spicula ossea, quæ duram matrem laceffendo, phlogosim & purulentiam accersere, vel atrociora symptomata concitare queunt. Osse naturæ viribus redintegrato, danda est opera ut periotleo cooperiatur, cujus novæ progerminationi favere dicitur solutio mastiches in spiritu vini. Postremò capitis vulnera, nemine practico refragante, rarè sunt detegenda. ni cogat plus æquo luxurians materia purulenta vel saniosa. Non solum enim pertimescendus est aëris contactus, sed etiam humectantia & oleosa pro nocivis habentur. Plura de re merè Chirurgicâ nil addimus, ne falcem in alienam messem immisisse videamur.



P A R O T I S.

Hoc nomine insignitur glandulæ cognominis infarctus, vel tumor qui diversam obtinet indolem; undè *duplex* emergit *parotidum genus*. *Primæ* scilicet inter symptomata febrium acutarum, ac præsertim pestilentia-
lium & malignarum numerantur. *Secundæ* morbos chronicos, scrophulas nempè, luem veneream, &c. respiciunt. Quibus addere licet *tertiam* parotidis *speciem*, quæ neutri causæ submittitur; sed levio-
rem & fugacem admittit: qualis est quædam *parotis spuria*, vernaculè *les oreillons*; quæ juvenes invadere solet, ac non solum glandulis parotidibus, sed etiam maxillaribus insidet.

Parotides primæ classis, vel sub morbis acutis erumpentes; plerumque phlegmonodeæ occurrunt, & ad suppurationem vergunt: has prænuntiant vultus flammeus, dolor capitis gravativus & surditas. Pro molimine critico haberi solent, si accedat symptomatum remissio: sed sæpius dolore

æstuoso stipatæ, lividæ & suppurationis nesciæ grave curantibus faceſſunt negotium; vel morbi ſuperſtites ægrorum arumnas protrahunt: ſed majorem terrorem incutit harum ſubitaneus retroceſſus. *Parotides ſecundi ordinis*, vel affectuum chronicorum progenies; œdematis vel ſkirrhi ut plurimum participes, pertinaciſſimæ audiunt, & maturantibus vel exquisiti-
oribus rarò morem gerunt. *Parotides tertie claſſis*, fugaces & periculi planè expertes à ſimplici humorum deſluxu ortæ, brevi reſolutione evaneſcunt; rariùſque in ſuppuratum abeunt; ni tamen cuicumque metaſtaſi, vel capitis contuſioni ſubmittantur. Nullo ſymptomate graviore ſtipantur, quæ juvenes invadere ſolent; ſed degluti-
tionem nonnunquàm leviter impediunt, & hinc à pluribus pro *anginâ nothâ* habentur. Rarò obſervatur hæc parotidis ſpecies in Galliæ tractibus Septentrionalibus; ſed familiariffimè occurrit apud Narbonenſes & Gallo-Provinciales; quibus levior ſub nomine *galès* innotefcit; ac gravior *cournudos* audit.

PAROTIS.

Parùm diſcrepat *curatio parotidum* ab eâ quæ ad bubones reſpicit: ſed neminem latet primarum purulentiam difficiliùs promoveri. Itaque ubi erumpunt *parotides ſub febris* mali moris, nuſquàm tentanda eſt reſolutio; quin potiùs nil non movendum ut ſolitus incrementum capeſſant & in ſuppuratum abeant: quibus haud ritè ſuccedentibus, ad ſectionem vel cauſticum devenire licet, quorum beneficio ſenſim concitatur ſuppuration; quæ tandiù protelari debet, quandiù inſarcti & præduri ſe præbent acini glanduloſi. *Topica* econtrà *reſolventia* congruunt *parotidibus chronicis*; quibus incaſſum adhibitis, ad emollientia & maturantia; imò & ad cauſtica confugere expedit. Sed ſub hæc ſpecie præcipuus curationis cardo verſatur circà remedia interna, luitvenereæ, ſcrophulis, alterive ſanguinis labi, dicata: ubi verò cancri naturam redolent, peculiarem curam jam traditam ſibi vindicant. Quod ad *tertiam parotidum ſpeciem*, vel mitiorem attinet; rectâ ſervatâ vivendi ratione, ſpontè ut plurimum curantur: nonnunquàm tamen conducit venæ ſectio: ſed nulla alia expoſtulat remedia, ni ad purulentiam vergat; quam notiſſimis auxiliis tum juvare expedit: ac demùm pus conſeſtum maturè evacuari debet; ne fo-
veas ſibi cudat & ad pectus irruat; quod nonnunquàm accidiſſe teſtantur primi ſubſellii Authores.



BRONCHO-
CELE.

BRONCHOCELE.

Sic vocitatur *tumor* cuti concolor, & peculiari *folliculo instructus*, mobilis & indolens; qui in parte anticâ cervicis situs, herniæ instar gutturis, tracheæ adjacet. *Gouëtre* vernaculè audit hæc intumescencia, quæ non secûs ac congeneres, nunc carnes fungosas & hebetes; nunc materiam melli, sebo vel pulti similem; rariùs verò aqueam recondit; ut de corporibus cartilagineis, osseis, lapideis, vel cretaceis; &c. quæ etiam inibi includuntur, sileamus. Ad melonis molem accedens dextrâ lævâque, formâ ut plurimum regulari, extenditur: sed sæpiùs in immensum crescit, imò & quandòque ad umbilicum usque protendens, stupendam & portentosam magnitudinem assequitur. Alpium, aliarumque montosarum regionum incolis familiarissima est bronchocele, de quâ parùm curant, imò & nonnullis tractibus, si peregrinatoribus sit fides, pro corporis venustate habetur.

Periculi expers censetur bronchocele mole & pondere tantummodò molesta, ni phlogosi corripitur & ad suppurationem vergat, vel præposterâ medicatione cancri naturam induat. A majori tamen ejus mole nonnunquàm comprimuntur trachea & œsophagus; hinc quædam emergit respirationis & deglutitionis difficultas, quâ nonnulli conqueruntur ægri. Insuper ritè distinguendi veniunt tumores scrophulosi, renitentiores & ambitu inæquali donati, cervicis glandulis vel ipsimet thyroïdi insidentes, & subjacentes cartilaginee erodentes, à bronchocele molli & formæ regularis, ac nullum incommodum post se trahente. Nec ad prædictum tumorem referri debent protuberantiæ cysticæ diversæ magnitudinis ex occipitio, vel posticâ cervicis parte propendentes; quæ parùm aut nil discrepant ab hisce tumoribus tunicatis cranio hærentibus, cariem ossium plerùmque accersentibus, quas *talpas*, *topinarias* vocarunt latino-barbari: circa quas notare expedit nonnunquàm occurrere capitis prominentias quæ primo intuitu tumorum cysticorum faciem præ se ferunt: nec innotescit horum indoles, ni sectione in apricum veniat ipsamet cerebri substantia, quâ replentur: scitur *hanc herniæ speciem* haud rarò observari in infantibus; sed rariùs in adultis.

Quod ad *medelam* bronchoceles spectat; haud alia est ineunda, quàm sub genuinis lupiis: diaphoretica scilicet, diuretica, aperientia & incidentia, præmissis generalibus, præscribi queunt. Sed inanem operam ludere solent prædicta remedia. A nonnullis decantantur spongia marina, & spongiola rosæ sylvestris, calcinata; alumen, sal prunellæ, saponēs, acetum scilliticum, aliaque remedia interna, de quibus ad nauseam apud Authores; sed refragatur experientia. Cæteris præstare videtur aqua marina, quæ præmissis præmittendis ad cyathum unum manè singulis diebus propinatur, per unum aut alterum mensem; tumorem interea eandem

aquâ crebrò fovendo. Cæterùm nonnullas vires obtinent, ineunte morbo, topica resolventia suprà tradita; quæ jam adulto incassum admoventur. Nonnulli hunc tumorem causticis aggrediuntur, nec infelici successu, dummodò certis cancellis contineatur: sed exulare debet illud præsidium, si in ingentem molem accreverit tumor, ut fileamus de ulcere fistuloso, quod sæpiùs post se trahit hic curandi modus. Nec minùs periculosa cense-
 ferì debet extirpatio, ob viciniora vasa, proximioresque nervos; è quo-
 rum vulneratione lethalia insurgere queunt symptomata. Ex hinc colligitur
 fatiùs fore, inter has ambages, ab omni curatione abstinere; & huic con-
 silio omnes ferè adstipulantur ægri.

BRONCHO-
 CELE.

GUTTA ROSACEA.

Hoc absconum fortitur nomen hæc *cutis faciei efflorescentia* chronica, variis tuberculis, papulis, vel pustulis phlogodeis, squamosis, vel ulcerosis, exasperata. Æstu & doloribus lancinantibus molesta sæpiùs evadit hæc curis defœdatio, quæ vernaculè audit *visage couperosé*: aliàs *boutons*, *bourgeons*, &c. Stipato sæpiùs agmine rubentem faciem obsident & deturpant prædictæ papulæ; & ita prominent ut vultus horrendus videatur: adde quòd sanguis nonnunquam exudat è venis suprà modum tumen-
 tibus & varicosis: ac nasus variis tuberculis horridus portentosam magni-
 tudinem sæpiùs assequitur.

Abstemios rarissimè adoritur gutta rosacea; sed crebrò *invadit* poculis indulgentes. A pravâ tamen sanguinis diathesi, scorbuticâ nempe, vene-
 reâ, herpeticâ, &c. ortum quandòque mutuatur. Ægrè evincitur hic mor-
 bus, ni in ipsis quasi incunabilis præfocetur: ubi verò jam altas egit ra-
 dices, præsertim in ætate provectâ omnibus remediis obsurdescit. Incas-
 sum etiam expugnatur, si cujuscumque sanguinis labis sit particeps, ni
 priùs eradiceatur primaria causa. Hinc patet cur inveterascens hic morbus
 nullis telis domari pariat, & curam palliativam, à quâcumque causâ
 sobolescat, duntaxat admittat. Prætereà haud citrà maximum periculum
 hunc radicitùs evellere licet; cùm hanc intempestivam & spuriam curatio-
 nem brevi excipiant febris, & cujuscumque visceris infarctus; quod restan-
 tur oculatiores practici, & observasse memini.

Ubi igitur sub hocce morbo incipiente, vel nondum adulto quædam
curationis spes affulget; præmissis venæ sectionibus & blandioribus ca-
 tharticis; diluentia & temperantia primo sunt præscribenda; cichorium
 nempe, borrago, pimpinella, acetosa, herbæ capillares & lingua cervina;
 emulsiones, serum lactis & ipsummet lac, &c. Post debitum horumce
 remediorum usum ad depurantia & aperientia devenire licet; id genus
 sunt fumaria, lapathum, asparagus, & rubia tinctorum; nitrum, mar-

GUTTA
ROSACEA.

tialia, cremor tartari, aselli & cancri fluviatiles; quibus addere licet remedia è viperâ deprompta & antimonialia; cinnabarin nempè antimonii, anti-hecticum Poterii, &c. Sub quorum administratione cavendum, protracto temperantium usu, ne sanguis plus æquo excandescat. Eâdem adhibitâ cautelâ, opportunè nonnunquàm exhiberi queunt ipsamet mercuralia; aquila alba nimirum, æthiops mineralis, &c. Nonnullis pro re natâ opitulantur absorbentia. Nec posthabendæ aquæ minerales, frigidæ & thermæ pro opportunitate seligendæ, quæ curationem sub hocce affectu, non secus ac in aliis morbis chronicis sæpissimè claudunt.

Quamdam opem præstant *topica* demulcentia & refrigerantia, aqua nempè sperniolæ & nymphææ, mucagines, cremor lactis, olea amygdalarum dulcium, seminum frigidorum & papaveris albi; succus limonum, ceratum cum spermate ceti, &c. Suis viribus etiam pollent resolventia & exsiccantia; aqua scilicèt florum sambuci, sal & oleum tartari, saccharum saturni, lac, ut inquiunt, virginale, camphora, lithargyrus, cerussa, alumen, sulphur & hydrargyrus; è quibus parantur lotiones, linimenta, pomata, &c. quæ tamen nusquàm adiberi debent; ni prius sanguis suprâ traditis remediis attemperetur, ejusque crasis emendetur, & obstructions referentur. Insuper inter efficaciora præsidia jure recensentur balnea, quæ sanguinis fervorem egregiè reprimunt. Quoddam ferre queunt auxilium hirudines vasis vicinioribus admotæ: nonnunquàm etiam conducunt vesicatoria, setacea, & cauteria tum occipiti, tum cruribus inusta; dummodò causa fovens morbum prius extirpetur. Si demùm recensitis cujusvis fortis remediis morem gerat, præter spem, hic affectus; danda est opera ut præcaveatur reditus, non solum accuratâ victûs ratione; sed etiam medicamenta suprâ tradita identidem repetendo.

Notare juvat, priusquàm manum è tabulâ amoveamus, quòd ad guttam rosaceam minime referri debeant hæ *faciei pustulæ* quæ à *pravis digestionibus* sobolescere solent; quarum indolem produnt flatulentia, ructus acidi, cardialgia vel dolores stomachi gravativi, colici dolores, &c. Ideò huic eruptioni medentur, qui primis viis per notissima auxilia prospiciunt; inter quæ, præmissis præmittendis, plurimùm decantatur corticis peruvian infusum vinosum. A guttâ rosaceâ etiam discrepant hæ *faciei tubercula*, pus circà apicem conspicuum conficientia, quæ *vari*, & apud Nostrates *Saphirs* audiunt; quibus obnoxii sunt utriusque sexûs juvenes, temperamento sanguineo præditi & florido corporis habitu gaudentes. Sed à quodam sanguinis viru, plerumque venereo, sobolescunt; quo posthabito exacerbantur & latius disperguntur prædicta tubercula: adeò ut quamdam lepræ speciem sæpius referant. Ubi à sanguinis æstu profapiam ducunt; demulcentibus, temperantibus & refrigerantibus, restinguendus venit: si verò pravæ sanguinis diathesi submittantur, remediis specificis expugnari debent.

MORBI OCULORUM.

MORBI
OCULORUM.

LATIORI & *insulsa nomenclatura* indulserunt varii Authores, qui Græcis plus æquo addicti sua scripta, ad meram fortè ostentationem, obscurarunt. Sed de hâcce discendi methodo, quæ superfluum & inanem potius, quàm genuinam doctrinam sapit, parùm curant saniores practici; qui partis fabricam, ejusque variarum læsionum indolem apprimè calentes juxtà sancitas naturæ leges, quemvis obvium oculorum affectum pertractare solent; nec infelici successu. Ideò ex hâcce numerosâ morborum cohorte, quâ turgent libri, missis variis illius organi affectibus cum reliquis partibus communibus, frequentiores duntaxat & curam medicam expostulantes tradere consultiùs nobis visum fuit; quibus apprimè notis, dilucidè patebit aliorum indoles. Quapropter de hâc re dicenda paucis pro instituti ratione complectemur; à palpebrarum vitiis initium faciendo; ne, tot futilibus & ineptis differentiis inhærendo, in immensum crescat pagina.

(1) *Palpebrarum coalitus* multiplex censerì debet: is familiarissimè occurrit qui à diversis ophthalmiis pendet, vel à materiâ lemarum mucosâ, purulentâ, saniosâ & ichorosâ è limbo palpebrarum exudante; quæ inter somnum, vel quiescentibus hisce partibus exsiccatur: hinc palpebrarum agglutinatio, vel coalitio nocturna gramiosis familiaris; quæ facili marte solvitur & medentis opem rarò efflagitat. Sed grave sæpiùs facessit negotium palpebrarum adhæsiò inter se, vel cum corneâ & adnatâ, ob mutuam exulcerationem post variolas, ophthalmias graviores, ambustionem, ulcus tunicæ adnatæ, &c. è quòd palpebræ ipsi oculorum bulbo ita connectuntur, ut ægrè dimoveri patiantur; etsi præmissis remediis generalibus, præstantiora admoventur emollientia: adeò ut citrà dissectionem separari nequeant connexæ, & accretæ partes; quæ operatio ingentem chirurgi solertiam & dexteritatem expetit.

(2) *Lapsus palpebræ superioris*, quo fit ut oculi vix aperiri valeant, vel perpetuò claudantur; à fibrarum scilicèt nimîâ laxitate, vel à denegato motu musculi attollentis, causam ut plurimùm internam & contumacissimam agnoscit. Topicis stimulantibus & roborantibus impugnari solet hic affectus; oleo scilicèt cinnamomi & caryophyllorum, spiritu vini camphorato, aquâ Reginæ Hungariæ, aquâ calcis, &c. Nonnunquàm conferunt vapor vini aromatici, irrigationes & embrocationes cum aquis thermalibus, &c. Nonnulli cutem palpebræ, arte rugatam & plicatam fauciant; & dein vulneris labra consuunt, ut peractâ cicatrice abbrevietur hic processus; nec despicienda est hâc methodus, cæteris incassum tentatis. Sed præcipuam opem præstant medicamina interna, quæ versantur circà cathartica, identidem repetita, diuretica & sudo-

MORBI
OCULORUM.

rifica ; inter quæ primatum ducunt decocta è lignis & radicibus exoticis parata ; non secus ac juscula viperina , quæ fortè omnibus palmam præripiunt.

(3) *Palpebrarum inversio* , nostratibus *œil éraillé* , quâ interna harum facies extrâ limbum protenditur , atque agrè connivere queunt prædicti processus , à duplici causâ pendere videtur ; nimirum à cutis palpebrarum decurtatione ; ob cicatricem post vulnus , ambustionem , anthracem , &c. Vel à peculiari infarctu tunicæ adnatæ palpebras investientis ; quæ hinc aspera & intumescens , carnis rubentis instar extus prominet. Palpebrarum inversio à primâ causâ planè immedicabilis censetur , quæ verò alteri submittitur , opportunis remediis evinci potest. Explorantur primò topica exsiccantia , tuthia nempè , lapis hæmatites , alumen ustum , vitriolum album , &c. Quibus nil proficientibus ad cathartica devenire licet ; ad lapidem scilicet causticum , vel ipsummet infernalem ; quo succrescentes carnes , pro more , attinguntur : sed haud nisi summâ cautelâ admoveri debet hoc præsidium , ne accersatur phlogosis. Nonnulli carnes luxuriantes forficularum ope eximunt ; nec infaustè ; dummodò solerti manu hæc peragatur operatio.

Contrariam inflexionem , versùs nempè interiora , nonnunquam subit limbus palpebrarum , quâ fit ut pili ciliares , suis extremis apicibus subjectas partes pungendo & vellicando , summam molestiam creent. An à nimio humorum decubitu , vel peculiari vitio organico sobolescat hic affectus , brevitati studentes , non inquiremus. Nec dilucidius patet hunc curandi methodus : parùm proficiunt decocta adstringentia quibus foveri solet palpebra : efficacius videtur emplastrum tenacissimum fronti & palpebræ admotum , ut ejus postremæ prolapsus inhibeatur : sed rarò succedunt hæc præidia : nec feliciorum habet exitum ciliorum evulsio ; ni bulbus cum pilo simul eradicetur ; aliàs brevi erumpens rigidior pilus , savius pungit. Sunt qui retinaculo ferreo palpebræ elevationem tentant ; quod citrà dolorem , cui ferendo impares sunt agri , nusquam peragi potest. Alii cutem plicatam palpebræ scindendam esse volunt , vulnere à cantho majori ad minorem protracto ; ut scilicet propius adductis vulneris labris , cicatrice contrahatur palpebra , non secus ac in ejus prolapsu , uti suprâ exposuimus : quæ operatio solerti manu peracta plures fausto beavit eventum.

(4) *Tuberculis indolentibus* & tunicatis sæpius infestantur palpebræ. A receptaculis sebaceis fortè orta hæc tubercula , & propè limbum palpebrarum erumpentia , diversam faciem præ se ferunt , quâ sua sortiuntur nomina. *Morum* nempè vocitatur illud tuberculum lividum , vel colore atro-cæruleo præditum. *Hordeolum* , nostratibus *Orgeolet* audit , quod grani hordei formam & molem assequitur. *Grando* , *GRELE* , dicitur ubi albicans , & sub formâ obiculari se profert. *Lithiasis* , *GRAVELLE* nuncupatur ob duritiem quam contrahit. *Hydatidis* demùm nomen sortitur ob conspicuam pelluciditatem , ab inibi stagnante lymphâ ortam : ritè

tamen distinguendæ hydatides à phlyctænis etiam diaphanis, sed fugacibus, palpebras sæpiùs obsidentibus; & vesicarum ab aquæ ferventis ambustione emergentium faciem referentibus; quæ toto cælo à prioribus discrepant. Parùm aut nil proficitur per discutientia & resolventia vulgatiore, quæ primâ fronte hisce domandis tuberculis magis apta nata videntur: sed nonnunquàm prodest saliva, jejuno ventriculo, cum frictu admotâ, præcipuè si recens sit tuberculum. Quamdam opem conferre queunt aqua vitæ, vel vulneraria, balsamum Fioraventi, vel Commendatoris, aliaque consimilia. Nonnullis arrident granum passulæ exacinatum, pulpa mali cocti, aliaque emollientia; quibus ad suppurationem quandoque coguntur hæc tubercula. Ab aliis decantantur gummi ammoniacum in aceto solutum, emplastrum diabotanium, de meliloto, Abbatis DE GRACE; aliaque innumera ab inficiâ plebe comprobata, quæ parvi habent solertiores practici; præsertim si jam vetustate occalluerint horum tumorum tunica.

Sunt qui hanc *curationem* aggrediuntur causticis vulgatoribus, vel ipso met lapide infernali: sed haud tutò hæc adhibentur auxilia, quæ viciniore partes exquisitissimo sensu donatas, lædere queunt. Nil verò, aut parùm metuendum à simplici sectione, quâ fiat humoris congesti effusio; vel corporis concreti extractio: sed tamen imminet reditus. Tutiùs sanè quidem per instrumentum congruum extirpantur, aut enucleantur, ut integra fiat *folliculi avulsio*: feliciùs postremò adhibetur ligatura, si sinat basis. Aliàs consultiùs videtur ab omni curatione abstinere, cum plerùmque citrà incommodum gestentur prædicta tubercula, quæ insuper spontaneo naturæ motu haud rarò phlogosi corripuntur, & in purulentiam abeunt; quâ si absumatur folliculus; integra fit curatio; sed ubi superstes evadit, iterùm progerminatur tuberculum. De *verrucis* palpebris familiarissimis nil addimus, cum à cæteris minime discrepent, nec dissimilem curam efflagitent.

(5) *Sarcoma* vel *pterygium*, oculos obsidens, è tunicâ adnatâ, bulbi partem conspicuam obvestiente, & interiores palpebras obducente, producitur. Hæc protuberantia sessilis & depressa in majori oculi cantho situm habens, è quo usque ad corneam protendi solet, ob peculiarem quam obtinet formam *unguis* audit, & nostratibus *onglet*. Vasis varicosis nonnunquàm exasperatur hæc sarcoseos species, cancrique naturam redolet: hinc minime mirum, si omnibus remediis plerùmque obsurdescat. Nihilominùs à generalibus, nimirum venæ sectione, catharticis, temperantibus & refrigerantibus, auspicanda est curatio. Dein explorari debent resolventia topica, urina nempe tepida, aqua florum sambuci, fel laurinum, &c. quæ præclara nonnunquàm obeunt munia, si recens sit sarcosis: sed futilia censeferi debent, ubi morbus certum incrementum sumpsit. Opportunè tunc temporis adhiberi queunt exsiccantia & cathæretica; qualia sunt saccharum candidum, pulvis ireos, alumen ustum, vitriolum album, & viride æris, quæ in pulverem tenuissimum redacta & cum saccharo mixta, singulis, vel alternis diebus insperguntur: in hunc usum etiam venit lapis divinus Crollii, imò & infernalis. Sed cæteris adminiculis palmam sanè præripit

MORBI
OCULORUM.

extirpatio ; haud tamen cuivis obvio chirurgo committenda ; quam etiam ritè succedere in canibus huic morbo obnoxiiis nemo fermè nescit.

(6) *Lippitudo*, Gallis *la chassie*, est quædam ophthalmia spuria palpebras offendens ; è quorum marginibus exudat humor viscidus & glutinosus, quo invicem coalescunt. Hanc materiam puris participem suppeditant ulcuscula confossa in hâc tunicæ adnatæ propagine quæ interiores palpebras investit. Varios oculorum morbos concomitatur lippitudo, quæ tamen ophthalmiæ ad quam proximè accedit, cujus instar *sicca* vel *humida* se prodit, præsertim sociatur. Morbus de quo in præsentiarum, pruritu & dolore stipatus, scabiei vel herpetis quasi particeps, pulverem squamosum globum oculi perpetuò laceffentem præbet, & marginum palpebrarum occallescentiam sensim parit ; & hæc est *lippitudo sicca*. Sub *humidâ* verò palpebrarum oræ latice quodam purulento madent ; ni inter harum partium quietem glutinis instar concreascit. Ab utrâque lippitudine bulbi superficies sæpiùs læditur, imò & nonnunquàm intrâ faccum lacrymalem colligitur humor purulentus ; hinc fistula lacrymalis : aliàs ab infarctu & intumescentiâ tunicæ adnatæ invertuntur palpebræ. Quod ad eventum attinet, successu temporis evanescit lippitudo infantum ; sed pertinacissima est in ætate adultâ, & planè immedicabilis sub senectute : omnem etiam curam respuit scrophulosa, ni congruis præsidiiis primario morbo occurratur.

Utraque lippitudo eandem fermè sibi vindicat *curationem*, quæ aliàs vix discrepat ab eâ quæ ophthalmiæ competit. Plerisque scilicèt confert venæ sectio ; opportunè exhibentur demulcentia & temperantia ; juvant blandiora cathartica, & præsertim aquæ minerales quæ hâcce vi pollent : suam etiam, pro opportunitate, opem præstare queunt diaphoretica & diuretica ; ut sileamus de variis specificis, quæ sæpiùs omnem curam absolvunt. Quoad topica, primò adhiberi solent emollientia, vapor nempè aquæ tepidæ & decoctum althææ ; butyrum & cremor lactis, pomata & cerata simpliciora : dein in usum trahuntur resolventia ; aqua nempè feniculi & euphrasiæ, vinum caryophylli, camphora & sulphur. Profunt in lippitudine purulentâ, exsiccantia & detergentia, inter quæ usitiora audiunt rosæ rubræ, saccharum candidum, tuthia & vittiolum album. Carnibus succrescentibus & palpebras invertentibus faustè etiam admovetur lapis infernalis : demùm non secùs ac in variis oculorum morbis deprædicantur vesicatoria, fetaceum & cauterium.

(7) *Epiphora*, vel chronica *illacrymatio* ab infarcto sacco nasali ; vel obstructis punctis lacrymalibus profapiam ducit. Hanc etiam promovet uberior lacrymarum proventus ; quæ tantâ acrimoniâ sæpiùs pollent, ut genas, in quas labuntur, lædant. Varia sunt hujusce morbi discrimina quæ assequi nusquàm licet, ni priùs ritè innotescat horumce organorum fabrica. Si obex sit in parte inferiori sacci nasalis, colligitur lacrymalis humor intrâ prædictum receptaculum, inibique stasim patitur ; donec nimîâ sacci turgescentiâ, vel quâvis institutâ pressione, à punctis lacrymalibus eructetur. Sed ubi deest protuberantia, nullusque ab admotis digitis

exprimitur humor; haud dubitare licet, quin afficiantur puncta lacrymalia, quæ luxuriantibus lacrymis ingressum denegant: perviis verò prædictis ductibus, de affecto organo secretorio cogitandum. Ophthalmia, lippitudo, omnesque causæ vellicantes externæ epiphoram accersere queunt. Ægrè curatur annosa, quin potius in genuinam fistulam lacrymalem sapè faceffat; ad quam pronos esse lacrymabundos nemo nescit.

MORBI
OCULORUM.

Ubi obstruuntur & impediuntur viæ per quas lacrymæ ad nares pergunt; præmissis generalibus, si opus sit, nil non movendum ut *arte Chirurgicâ* referentur. Ab indefinente sacci nasalis pressione præcaveri potest fistula lacrymalis; sed subsistit epiphora, quæ soli *methodo Aneliana* cedit: haud tamen ubique occurrunt Chirurgi, qui hanc encheiresim apprimè calleant. Ubi verò incusatur uberior lacrymarum proventus, remediis evacuantibus, catharticis nempe, diureticis, sudorificis, sialagogis, & errhinis inharendum. Nec inutilem opem præstant aquæ minerales, quæ cuncta permeando, prædictorum vires æmulantur, imò & superant. Varia proponuntur topica, lapis nempe calaminaris, vitriolum, aliaque adstringentia & exsiccantia; quæ tamen ab expertis, quibus magis arridet aqua simplicissima, parvi habentur: præterquàm quòd haud citrà periculum oculis plorantibus admoveri queunt: sed plures fausto bearunt eventu setaceum, cauterium & vesicatoria. De lacrymis sanguineis, quæ inter rarissima phænomena numerari debent; nec de commentitiis lacrymis lapidescentibus nil addimus.

(8) *Fistula lacrymalis*, inter oculorum morbos externos etiam recensenda, tumore phlegmonodeo pus conficiente, & infrà majorem oculi canthum sito, innotescit. Sub duplici conspectu se prodir: in primâ specie pus per puncta lacrymalia, integrâ cutè, exitum sibi parat, & nostratibus dicitur *Fistule borgne*, ut distinguatur ab aliâ; sub quâ pus ad exteriora, trans cutem, aliorum abscessuum more, viam sibi cudit. Sed alterius est indolis tumor aqueus in eâdem parte sedem habens; licèt hunc alter quândoque excipiat; cùm inibi stagnans materia lacrymarum, acrior evadens, phlogosim & purulentiam sæpiùs accersat. Pro fistulâ lacrymali perperam etiam habetur pustula inflammatoria eundem palpebrarum angulum occupans, quæ illibato sacco lacrymali sola regumenta afficit: quod tamen non impedit quominùs in fistulam lacrymalem faceffere valeat; ubi scilicèt pus inibi confectum, subjacentem canalem offendit, & in consortium trahit. Sed solâ pressione patet uterque casus, cùm puncta lacrymalia pus eructantia haud infidam genuinæ fistulæ lacrymalis notam præbeant. Si pus è prædictis ostiolis erumpens, saniosum, atro-viride vel fœtetur: deprehendatur, haud dubitare licet quin ossa proximiora carie læsetur. Fiquod etiam dilucidius patet à puris ejusdem naturæ effluxu pñis, venefistulam lacrymalem nonnunquàm fovet sanguinis quoddam ophthalmia, reum nempe, scrophulosum, &c. Hanc etiam promœmum causâ soalterve oculorum infarctus, variolæ, &c. A quâcumbolescat, canceri naturam induere valet.

MORBI
OCULORUM.

Quod ad *curationem* spectat, eò collimandum ut referentur pristinae lacrymarum viæ, evacuetur pus & detergatur ulcus. Ubi se prodit pustula inflammatoria, congruis auxiliis tentanda est resolutio; quâ haud ritè succedente admoveri debent emollientia & maturantia. Confecto pure, exploranda venit compressio; cujus ope materia purulenta per puncta lacrymalia foràs abigatur. In subsidium etiam veniunt injectiones, quarum beneficio abstergitur fistula, & nonnunquàm referantur obstructæ viæ. Sed si irrita fuerint hæc præsidia; incunctanter incidi debet abscessus, ope phlebotomi vel caustici, ut puri sternatur via: postea vulnus solitâ methodo, haud prætermisissis injectionibus detergentibus, pertractari debet. Sed ubi stagnans tabum sinus & cuniculos sibi excavavit, & ossa, uti crebrò evenit, carie lædantur; ad operationem Chirurgicam devenire expedit, de cujus encheiresi nil addam, cum neminem lateat Chirurgum: ad quam nusquam, nisi præmissis prætermittendis, venæ sectionibus nempè, catharticis, temperantibus, demulcentibus, &c. sese accingere debet. Nec omit-tenda sunt specifica, si sanguis viru quodam, venereo nempè, scrophuloso, &c. contaminetur.

(9) *Ophthalmia*, morbus notissimus & familiarissimus, præcipuam sedem habet in tunicâ adnatâ, non solum partem globi anticam obducente, sed etiam palpebras investiente; quæ scilicet, rubore vel phlogosi corripitur, cum diverso doloris & ardoris gradu; cujus vasa quæ antea visum effugiebant, tùm fiunt conspicua. Sed hoc nomine minime insigniri debet hic rubor vel ardor fugax oculi à fumo, pulvere, aliâve quâlibet causâ externâ sobolescens. Glandulam lacrymalem, vel interiora globi, sæpiùs occupat phlogosis in genuinâ ophthalmiâ; hinc dolores profundiores, acerbiores & pulsatorii, ægrique lumen refugiunt, & vix temperant à lacrymis, ipsis obversantur muscæ vel nebulæ, noctes insomnes ducunt, &c. *Ophthalmia* insuper, alia est *sicca*, alia *humida*: prima respectu doloris & inflammationis, levior, palpebris plerùmque parcit: sub alterâ oculus perpetuò mader: luxurians humor acris & purulentus in genas quas lædit, delabitur; & inflammatio, quasi ex traduce, propagatur ad palpebras: sub hâc rerum condicione, tunica adnata phlyctænis, pustulis purulentis, & ulcusculis defœdatur; dolores demùm, cum nonnullâ pulsatione, altius insident. Epidemicè quandóque grassatur hic affectus, sed perperam à quibusdam contagiosus existimatur: familiarem esse infantibus & senibus nemo nescit; nec latet luis venereæ, scrophularum, arthritidis, &c. nonnunquàm esse participem. Aliàs à fluxione catarrhali, erysipelate, contusione, ambustione, &c. sobolescit. Inter reliquias demùm morbillorum, variolarum, febris malignæ, &c. numeratur.

A benè perspectâ organi læsione, & habitâ ratione curæ, eruenda est *ophthalmiæ prognosis*. Ægrè curatur, nec periculo vacat hic affectus, si crassior tunica adnata promineat circâ corneam, quæ tùm depressior apparet: si glandula lacrymalis phlogosi corripitur, quæ ab acerbissimo dolore circâ partem affectam, & ab ultrâ modum tumente palpebrâ supe-

riori dignoscitur: si dolores atrociores ad orbitæ fundum porrigantur, & per totum caput sese spargant: si incandescat febris, urgeant vigiliæ, aliaque emergant graviora symptomata, sub quibus cæcitatis periculum incurrunt ægrotantes. Ubi ophthalmia scrophularum, luis venereæ, arthritidis, &c. symptoma audit, curam duntaxat specificam admittit: pertinacissima est erysipelacea: in ancipiti versatur quæ à contusione vel ambustione ortum ducit: indomabilis judicatur, si inter variolarum reliquias numeratur: pro demùm symptomate lethali habetur post casum ab alto, vel graviolem capitis contusionem. E quâvis ophthalmiâ mali moris progignuntur abscessus, & ulcera tunicam adnatam, & ipsammet corneam defœdantia: pus nonnunquàm profunditur intrâ iridem & corneam, undè emergit, ut inquiunt, *hypopyon*, quo, pupillâ obturatâ, lumine planè orbantur ægri, ni collectum tabum, fausto sanè, sed rarissimo eventu, reforbeatur; vel partem bulbi decliviolem petat. E cicatricibus ulcerum corneæ prodeunt maculæ, vel, ut inquiunt, *albugines* nullâ arte delebiles. Insuper à puris erosione ita quandoque extenuatur cornea ut coërcendis subjacentibus partibus planè impar, extûs herniæ instar propellatur; & hæc prominentia, quæ medelam merè chirurgicam expostulat, *staphylo-ma* apud Veteres audit. Ophthalmiâ correptis nonnunquàm prodest uberior lacrymarum proventus: ipsis etiam haud rarò opitulatur alvi fluxus; ut de aliis salubrioribus naturæ conaminibus sileamus; quæ tamen simplicem ophthalmiam, illibato scilicet organo, respiciunt.

Aliarum inflammationum instar, *curari* debet ophthalmia: itaque ineunte morbo, auspiciatissimæ sunt venæ sectiones, plus minúsve repetendæ, pro phlogoseos gradu, & dolorum vehementiâ: ac jure suprâ cæteras laudatur saphenæ, jugularium, vel ipsiusmet arteriæ temporis, sectio. In graviore quidem ophthalmiâ sanguis è tumentibus vasculis tunice adnatæ educitur; ac admotâ aquâ tepidâ ejus fovetur fluxus. Celebrantur in eundem scopum scarificationes, non solum in oculi bulbo, sed etiam in palpebris: hanc verò acerbam medelam averfantur delicatuli. Suas laudes etiam merentur hirudines vicinioribus partibus admotæ; nec aliis cedit hæc sanguinis detractio; quippè quod ejus ope vasa ipsius partis affectæ etiam deplentur. Intereâ haud parvi interest, sub hocce morbo, ut alvus fervetur libera, solitis nempè præsidiis, ac præsertim aquis mineralibus quæ hâcce vi pollent: experienciâ compertum manet ophthalmiam epidemicè grassantem diarrhœæ criticæ sæpius cessisse. Proficiuè insuper adhibentur temperantia & demulcentia; cichorium nempè, borrago & lappathum; juscula pulli, cancrorum fluviatilium & testudinis; lac ejusdem ferum, emulsiones, cremores hordei & oryzæ, aquæ minerales, uticis læ &c. Pro opportunitate etiam conferunt depurantia ex antisadice & sudorificis deprompta; nasturtio nempè & cochleariâ, & jusculis viligno guaiaco, diaphoretico minerali, aliisque antimonialia & incipientiæ & anguis, &c. Fauste nonnunquàm usurpantur ad despicienda sunt sedantia vel narcotica; cum quibus tamen cautè

MORBI
OCULORUM.

Nemo non novit, ut ad *externa* deveniamus, balneorum efficaciam, sed de topicorum specificorum genuinis viribus multum controversatur: nec fugit solertiores quam de hac re difficile sit verum à falso extricare; quidquid præjudiciis obcæcati, vel lucro inhiantes, in contrarium adducant. Cum verò haud nostrum sit has lites componere; experientiâ edocti selectiora tantum, & à peritioribus comprobata pro instituto exhibebimus. Itaque egregiam opem præstant, ineunte morbo, albumen ovi cum frusto aluminis subagitarum, aliaque repercutientia, præsertim si incusetur contusio; sub alterâ rerum conditione, noxia evadunt, & hinc exulare debent, si à causâ internâ sobolescat morbus. Sed opportunè semper admoventur emollientia & demulcentia; ubi dolore & æstu partis affectæ premuntur ægri, & agglutinantur palpebræ; id genus sunt aqua tepida, cum tantillâ aquæ vitæ dosi, aqua rosarum rubrarum & plantaginis, decoctum althææ, sanguis columbæ vel pulli, lac muliebre, aliudve; emulsio simplex, mucilagines è granis psyllii, lini & cydoniorum, pulpa pomorum coctorum, cataplasma micæ panis, frustum carnis bubulæ vel vitulinæ, &c. Opium, etsi à quibusdam laudatur, haud citrà periculum oculis admoveri posse crediderim. Tutiùs adhibetur sal saturni, si nuperrimis observationibus sit fides; vel aqua golardiana temperata, quæ scilicet paratur cum decem vel duodecim guttis aceti saturni extemporanei & duplo aquæ vitæ in aquæ unciis octo. Silentibus doloribus & sedato æstu, juvant resolventia; aqua vitæ nimirum temperata, aqua feniculi, euphrasie & florum sambuci; vinum tepidum cui immiscentur nonnullæ guttæ balsami Commendatoris. Parantur insuper innumera collyria è croco orientali, rutâ, salviâ, hyssopo & rore marino; quæ suas laudes merentur. His fortè præcellunt aquæ Bellilucanæ, Baregieneses & affines.

Ubi ulcusculis defædantur oculi, in usum trahi debent *detergentia* & *exsiccantia*; hisce viribus pollent saccharum candidum, iris florentina, os sepie, tuthia, vitriolum album, lapis divinus, trochisci albi Rhasis; vinum emeticum, &c. Ulceribus verò palpebrarum admovere licet lapidem infernalem, cujus morsus, oculi balneo, vel fotu aqueo, leniri solet. Peculiariorum cæterum commendantur resolventia è floribus sambuci & chamæmeli, seminibus fenugræci, &c. parata ad corneæ vel adnatæ phlyctænas, aut pustulas vesiculares; quibus verò apertis congruunt detergentia. Ubi pus sub corneâ, vel in quovis folliculo, bulbo oculi accretum nidulat; nil non movendum ut evacuetur, ne diuturniori morâ partes visus organicas lædat, cum nulla ferè resolutionis spes affulgeat. Similiter modo pertractari debet sanguinis stasis, si certo proventu coercetur; aliàs congruis solventibus fugari potest. Neminem postremò fugit quid valeant in ophthalmiis contumacioribus vesicatoria scapulis admodum; setaceam per occipitis cutem trajectum; non secus ac fontanellæ quæ multifariam confodi queunt. *Ruborem & inflammationem* ad ophthalmiam proximè accedentem, doloribusque acutissimis stipatam, etiam promo-

vent

vent *festuca*, *sordēs*, quisquiliæ, aliaque corpuscula extranea oculi bulbo implantata, ni uberiori lacrymarum proventu & assiduâ palpebrarum niçtitatione everrantur, & abstergantur bulbi superficies; vel oculo in aquam immerso eorundem processuum motitatione abigantur. Hæc nonnunquàm aufert succinum, vel cera signatoria vulgatissima, frictu prius excalesacta. Easdem erga ramenta ferrea vires exercet magnes: quibus incassum adhibitis, ad volsellam chirurgicam confugiendum.

(10.) Quamdã ecchymosim patiuntur oculi, quæ *suggillatio* audit; sub quâ intensè rubet, absque dolore, tunica adnata; oculusque lumen vel vividissimum minime refugit. A causâ externâ, vel insciis ægrotantibus, nonnunquàm profapiam ducit suggillatio, quæ aliàs à causâ internâ promovetur: hanc immanem quandoque vomitum excepiisse observatione constat. Periculo vacat hæc familiarissima sanguinis stasis, quæ intrâ paucos dies spontè plerùmque evanescit. Haud rarò tamen conducit venæ sectio: nec inutilem opem præstant topica resolventia, vel roborantia; inter quæ usitatiora audiunt, sanguis columbæ, aqua rosarum, feniculi & florum sambuci; aqua vitæ & vulneraria; spiritus vini camphoratus; decoctum è radicibus symphyti, sigilli Salomonis, &c. Ad suggillationem perperam refertur *sanguinis collectio inter corneam & uveam*, quâ non secus ac ab hypopyo, pupilla obturatur; post graviore contusiones haud rarò observatur hic affectus, cui occurritur corneæ incisione, ut latici stagnanti sternatur via; ni fausto admodum exitu resorbeat.

(11.) *Maculas*, *nubeculas*, *leucomata*, & *albugines*, quæ corneam obscurant, vel ejus diaphaneitatem conspurcant, post se trahunt ophthalmiæ, alique humorum decubitus, & corneæ ulcuscula. Sub primo casu, materia quædam albicans intrâ contextum corneæ colligitur, adeò ut inibi suâ pelluciditate planè orbetur. In altero occurrunt cicatriculæ ulcera excipientes, vel quædam occallescentiæ luminis radiis ingressum denegantes. Maculæ primæ sortis superficiem corneæ occupant, & hinc curatu faciliores censerì debent: major etiam sanationis affulget spes in juvenili ætate; sed secus evenit in senectute. Genuinæ verò cicatrices in quâvis ætate planè immedicabiles existimantur. Defluxionibus verò, quæ sæpius maculas concomitantur, occurritur venæ sectionibus, catharticis, temperantibus & balneis: sed remanent nubeculæ, quibus nonnunquàm opportunè admoventur resolventia, detergentia & exsiccantia; vapor nempe ferventis haustûs caffè; vel halitus feniculo, & rutâ prius, jejuno ventriculo, masticatis, imprægnatus; aquæ feniculi & euphrasiæ; succus calcitrapæ & chelidonii majoris; fel anguillæ, cyprini, lucii & perdicis; saccharum candidum & os sepîæ; tuthia, pulvis antimonii, &c. quibus incassum tentatis, ad vesicatoria, setaceum & fontanellam confugere fas est; quæ tamen respiciunt potiùs defluxiones, albuginum haud rarò pedissequas, quàm hæc maculas nullâ plerùmque arte debiles.

(12.) *Cataracta*, aliàs *suffusio*, nil aliud est quàm lentis crystallinæ opacitas. In propatulo se sistit hic morbus, vel proventus; sed ægrè inno-

MORBI
OCULORUM.

tescit ejus exordium. Produci solet cataracta à defluxionibus chronicis, gravioribus ophthalmiis, epiphorâ contumaciori, cephalalgîâ perenni, contusionibus, &c. Hanc minantur quædam simulacra, vel umbræ volitantes, quæ pro floccis, muscis, &c. habent ægrotantes: sed plerumque fallax est illud indicium, quod sub innumeris etiam aliis circumstantiis se prodit. Hanc verò imminentem certius indicat hæc visus obscuratio, quâ quævis objecta telâ araneâ obvolvi videntur; vel quasi per nebulam, linteumve rarum, percipiuntur: dein procedente morbo, visus hebescit & obtenebratur; pupilla ampliatur, & albicat lens crystallina; quæ notæ morbum in propatulo sistunt.

Ut ad *curationem* deveniamus; sub primis hujusce affectûs, tardè progredientis, temporibus, varia remedia proficuè adhiberi queunt: diluentia nempe & temperantia, inter usum balneorum, præmissis generalibus, faustè nonnunquam usurpantur: suam opem etiam conferunt martialia, aliaque aperientia: nec despicienda sudorifica è lignis & radicibus exoticis petita. Nonnullis profunt fumus tabaci, fistulâ notissimâ haustus; nec non alia sialagoga. Plurimum deprædicatur usus tum internus, tum externus euphrasie: nùm tamen hæc decantatâ polleat efficacîâ hæc plantula dubitare licet: alii, penès quos sit fides, asellos plurimum conducere ad cataractam præcavendam autumant. Huc etiam coincidunt vesicatoria, vel potiùs setaceum & cauterium; quæ cætera præsidia cujusvis sortis longè antecellunt. Varia demùm topica ex emollientibus & solventibus deprompta imponi solent; inter quæ usitatiora audiunt, decoctum althææ, sanguis columbæ, vapor caffè, decocta vel infusa aromatica, &c. Quibus incassum tentatis, ad operationem chirurgicam, vel *cataractæ depositionem*, quasi ad sacram anchoram, confugere expedit. Sed infastus est hic curandus ritus, si cataracta haud debitam, ut inquiunt, maturitatem attigerit; quæ dignoscitur, si inter oculi frictum, à palpebrâ digitis commotâ, nullum motum edat dilatata pupilla. Itaque dubius eventus censerî debet, si iridis motus haud planè aboleatur, & lens crystallina quid cærulei vel viridis præ se ferat; quod sanè arguere videtur haud integram esse opacitatem: quo fit ut lentis involucra, vel ligamenta difficiliùs solvantur, & cataracta in tenues lacinias discerpatur: ritè verò succedit hæc operatio, ubi cataracta summè conspicua, colorem album, cinereumve, margaritarum instar, adepta est.

Hæc *cataractæ depositio*, non in integrum restituitur visus; sed discutitur cæcitas; adeò ut qui in tenebris priùs versabantur ægri, quævis objecta tum percipiunt; obvios scilicet distinguunt; vident inter ambulandum quò via ferat: imò & typis impressa, vel scripta, legere queunt. Hæc (per transfennam dicere liceat) duplici modo absolvitur; 1°. Lentem crystallinam pelluciditate orbatam acûs beneficio versùs inferiora à sede deturbando, hancque infra pupillam submergendo, & retrò iridem aliquandiu coercendo, ne in pristinum situm recurrat. 2°. Prædictam lentem foras extrahendo ope sectionis in parte corneæ decliviori celebratæ: de

hâcce postremâ methodo mentio subjicitur in Actis Academiae Regiae Scientiarum anni 1707 & 1708, quam ab oblivione vindicavit, & instauravit oculatissimus DAVIEL; adeo ut, nemine femine reluctante, pro faciliori & tutiori habeatur: quod solertioribus judicandum relinquimus. Silentio premere minime debemus, quod de alterâ cataractæ specie, membranaceâ nempe, commemorant Authores; quam tamen vidisse haud mihi contigit, licet stupendum oculorum affectorum numerum sectioni anatomicæ subjecerim: præterea de hâc re scripta animum veri avidum minime explent; quorum insuper Authores parùm autopsiæ anatomicæ, quæ sola huic dirimendæ controversiæ apta censi debet, indulgisse videntur. De aliâ suffusionis specie, vulgò *la berlue*, sub quâ videre putant muscas, scintillas, colores, &c. nil addimus; cum ejus causam meris duntaxat conjecturis assequi liceat, & nihil ab Authoribus ophthalmiâtris tradatur præter commentitiâ etiologiam.

MORBI
OCULORUM.

(13.) *Amaurosis*, quam *guttam ferenam* vocarunt Latino-Barbari; hæc audit cæcitas, sub quâ nullum in organo, præter pupillæ quiescentis dilatationem, patet virium. Utrumque oculum plerumque invadit hic affectus, tardè progredi solens; qui tamen nonnullos intra brevissimum tempus, vel subito corripit. E paralyâ nervi optici profapiam ducere hunc affectum, hinc variis gradibus submissum, haud falsò conjicitur. Cadavera enim secta exhibent vasa cerebri sanguinea ultra modum repleta, stases sero-fas, vel sanguineas; exsiccationem vel putredinem nervorum opticorum; abscessus, tumores lymphatico-cysticos, alteriusve naturæ; sarcofes, exostoses, lapides, &c. prædictos processus medullares prementes. Per transfennam addere juvat nervum opticum dextrum graciliorem repertum fuisse, usque ad suum principium, post cæcitatem oculi dextri: hinc, notante SANTORINO, nec decussantur, nec implicantur prædicti nervi; sed alter alteri duntaxat accedit ut deinceps disjungantur. Visûs debilitas, nullâ perspicuâ causâ manifestâ, umbræ vel imagines diversæ formæ, quasi volitantes; vel oculorum caligo; dolores profundiores, &c. sunt totidem hujusce morbi prodromi. Hunc promovent sufflaminata sanguinis profluvia, eruptiones cutaneæ retropulsæ, febris maligna, apoplexia; lapsus ab alto; aliæve capitis contusiones; incautus solis conspectus, quo oculorum acies præstringitur; aëris inclementia, &c. Prægnantes cæteròquin nonnunquam invadit; sed sæpissimè natales debet improbo oculorum labori, inter minuta, vel tenuiora consequenda; non secus ac diuturno microscopiorum, conspiciellorum tubulatorum, aliorumque vitrorum opticorum usui. Fugari potest amaurosis incipiens; majorque curationis spes affulget, si subito ingruat; vel à causâ fugaci ortum trahat: sed nil boni expectandum, si lentè processerit; præsertim in senili ætate.

Vena sectiones & emetico-cathartica, ineunte morbo, proficue usurpari queunt: sed huc præsertim coincidit *euphrasia* usus internus, haud fortè immeritò decantatus; cum, si aliquid ferat auxilii hoc remedium, specifici titulo gaudens, potius sub amaurosi, quàm adversus cæteros oculorum

MORBI
OCULORUM.

morbos, id sanè præstare videatur. Insuper opportunè exhibentur aperientia & incidentia; aselli nempè, martialia & mercurialia; quibus tamen antecellunt aquæ minerales, tùm frigidaë, tùm thermæ. Huc etiam pertinent diaphoretica, viperæ nempè, lignum guaiacum, china radix, &c. Nec suis viribus defraudantur antiscorbutica; sed cæteris palmam præripiunt cephalica & antispasmodica; melissa nimirum, betonica, valeriana & pæonia; cascarilla, moschus; aqua florum aurantiorum, spiritus volatiles huic usui dicati, pulvis de gutteta, &c. Nonnunquam profunt sialagogæ; non secus ac vesicatoria, fetaceum & cauterium. Nec despiciendæ irrigationes ab alto cum aquis bellilucanis, aliisve thermalibus, quæ tempestivè adhibitæ, ni fallat experientia, fausto bearunt eventu. Inanem verò operam ludere videntur topica ophthalmica celebratissima & pro specificis venditata; cùm imparia planè sint superando morbofo obici. Nonnullas tamen suppetias ferre videntur spiritus vini & balsami Fioraventi vapor; fumus haustus caffè, aliaque id genus notissima, quorum vires explorare nil sanè impedit.

MORBI NARIUM.

(I.) **H**ORUM agmen ducit *Coryza*, nostratibus *enchisfrenement*; morbus sanè levissimus, qui rarò curam medicam expostulat. Ubi tamen, hoc vigente, haud ritè procedit narium stillicidium; promovetur dolor capitis, nunc gravativus, hinc *gravedo*, de quâ suprâ, vocitatus; nunc acutissimus, quo stomachus plerumque subvertitur. Intereâ frequens concitatur sternutatio, & emergit aurium tinnitus; læditur olfactus, prosternitur appetitus; accedunt inordinati horrores vel fremitus; febris excandescit; vires deficient; exsurgunt vertigines; urget sopor, &c. Hæc omnia symptomata delet uberior muci proventus, qui spontaneâ naturæ vi moveri solet; qui tamen si diutiùs quàm par est proteletur, ozanam infligere potest. Etsi levem metum incutit coryza, haud tamen periculo semper vacat; quippè quòd nonnunquam sit prodromus graviorum affectuum, qui fauces, glottidem & pulmones minantur: imò & ominosus per se censerì debet hicce morbus in provectâ ætate, cùm haud rarò affectum comatosum, vel ipsammet apoplexiam post se trahat.

Coryzam leviozem & vulgatiorem spontè evanescere nemo nescit, dummodò tamen probæ *victûs rationi* indulgeant; & domi sub hyeme asperâ se contineant ægri. Nec aliâ methodo divertitur imminens humorum defluxus in fauces, laryngem & pectus. Intereâ nonnihil *opitulatur* suffitus è succino, olibano, saccharo, salviâ, &c. paratus; mira præstat vapor inspiratus aquæ tepidæ, vel infusi florum sambuci; quibus scilicet non solum comescitur morbus, sed solito citiùs solvitur. Quamdã opem etiam

conferunt errhina blandiora, salvia nempe, betonica, lavandula, nicotiana, &c. quæ tamen, reluctante naturâ, cum cautelâ præscribi debent, ne intempestivâ sternutatione, capitis dolor nimîâ concussione exacerbetur. Ubi verò coryza & gravedo diutiùs protelantur; præmissis præmittendis in usum trahi queunt temperantia, diuretica, sudorifica, sialagoga, aliaque præsidia cuiusvis fluxioni dicata; inter quæ vesicatoria & fontanellæ, si res expostulet, haud omitti debent.

(2.) *Sternutatio* ad coryzam minime pertinens, cæteris aliàs benè se habentibus, inter morbos minime recenseri debet. Imò & vigente febre erumpens, nil mali per se arguit; licèt narium hæmorrhagiam, quasi fortuitò, movere queat; atque pulmones phlogosi correptos laceßat, eorumque dolorem exasperet. Parturientes prætereà juvat; soporosos expurgat, &c. Sternutatio tamen vehementior, vel ultrà naturæ limites producta, affectuum spasmodicorum censum subit: nec periculi exfors censeatur, cum à violentâ capitis concussione graviores emergere queant cerebri morbi, qui cæcitatem nonnunquam post se trahunt. Sub hoc rerum statu nil non movendum ut compescatur sternutatio; quam opem præstant demulcentia & mucilaginosæ naribus attracta, aqua nempe tepida, decoctum althææ, lac; oleum amygdalarum dulcium, aliaque consimilia, quæ rarò incassum adhibentur. Aliàs ad odorem opii devenire licet; vel ipsius tinctura naribus inspiratur; sed cautè cum hocce remedio mercari expedit.

(3.) *Hæmorrhagia narium* à plethorâ, vel temperie sanguineâ; ab exercitatione immodicâ; vel arduo labore; à vino liberaliùs sumpto, vel ingluvie; à remediis acrioribus, &c. oriunda; nil ut plurimum mali portendit. Sed in ancipiti versatur *hoc sanguinis profluvium*, vigente febre: videlicèt pro critico habetur quarto, septimo, nono & decimo quarto morbi die; dummodò tamen certis terminis coërceatur, nec ultrà debitam copiam, sanguis erumpat: sub hâc enim rerum conditione æqualem metum incutiunt majus sanguinis dispendium, & parvus ejus proventus: cautè tamen tum vaticinandum. Periculosioris res est alexæ, hæmorrhagia narium, sub statu febrili, si hanc excipiant pulsus debilis, & intermittens, lipothymia & sudores frigidi; non secùs ac convulsiones; omniaque in deteriora ruant. Nil mali econtrâ expectandum, ubi à profiliante cruore mitescit febris, sedatur dolor capitis, discutitur delirium, &c. Febrilem narium hæmorrhagiam prænuntiant faciei rubor, oculi ignei, pulsus vehementior, vigiliae vel quædam somnolentia phantasmatibus rubris interturbata; capitis & cervicis dolor, aurium strepitus, lacrymæ spontaneæ, narium pruritus, &c. Nil imminet ominosi ab hæmorrhagiâ narium *in juvenili ætate*; quæ tamen si crebriùs quàm par est recurat, vel ad plures annos proteletur, etiam si tum nil sanitati demat, in posterum tamen minatur debilem corporis constitutionem, hypochondriasmum, aliumve affectum spasmodicum; atque accedente senio arthritidem & lithiasim. Majus impendit malum ab hoc sanguinis profluvio *in provectâ ætate*; quod magis calamitosum censeatur, si

MORBI
NARIUM.

senem jam cachecticum invadat ; ob imminentem scilicet serosam colluviem. Luctuosa etiam existimatur inter prædictam ætatem hæmorrhagiæ chronicæ cessatio , quæ necem plerumque infert ; ni tempestivè ipsi occurratur. Neminem postremò prædictum fugit enormem quandoque fieri hæmorrhagiam narium , solis naturæ viribus obtemperantem : mirari profectò subit quod à tanto sanguinis dispendio haud graviora emergunt incommoda : pleno enim gurgite erumpentem cruorem , intrà quinque dies , ad quadraginta libras , nullo superveniente infausto exitu , accessisse fertur. De quâdam etiam parturiente mentio subjicitur , cujus hæmorrhagia narium viginti libras superavit , succedente felici partu.

Aliarum instar pertractari debet hæmorrhagia narium : totum scilicet negotium naturæ committendum , si desit febris ; & recens profluvium certis terminis coercetur : sed ubi majori , quàm par est , copiâ prorumpit sanguis , nil non movendum ut *opportunis præfidiis* cohibeatur. Peculiarem etiam curationem sibi vindicat hæmorrhagia narium chronica ; quam tamen sistere sæpiùs vetatur. Nil vigente febre moliendum adversus hæmorrhagiam narium criticam ; sed opem medicam efflagitat symptomatice , præsertim si diutiùs protrahatur , vel sanguis confertim erumpat. Præsentaneam opem fert sanguinis missio ; præsertim è saphenâ : depletis vasis , omnem absolvunt paginam temperantia & refrigerantia , aqua nempe largâ manu propinata ; ptisanæ acidulæ vel nitrosæ ; decoctum hordei vel oryzae , emulsionem simplicissimam , serum lactis , &c. Opportunè adhibetur liquor anodynus mineralis ; sed cautè cum laudano , diacodio , syrupo de karabe , aliove narcotico mercari expedit. Nec minùs fortè pertimescenda sunt absorbentia & adstringentia , quæ indiscriminatim usurpare solet plebs medica ; corallum nempe , plantago & equisetum , sanguis draconis , martialia , hæmatites , &c. quæ tamen tempestivè adhibita , haud inutilem operam ludunt : sed exulare debent alumen , spiritus vitrioli , essentia *Rabel* , aliaque consimilia styptica ; ni tamen fatum immineat. Immanem hæmorrhagiam nonnunquam excipit æstus febrilis , quem plures restinguere tentant ope corticis peruviani ; nùm tutò ? solertioribus examinandum relinquimus.

Nec minori egent cautelâ *medicamenta externa* , crebriori quàm par est usu ad imperitos recepta ; cum sæpiùs haud citrà periculum illa experiri liceat ; quæ tamen haud inconsultò adhibentur adversus symptomatice & immodicum sanguinis profluvium ; vel quoties pulsus debilis & obscurus , fædus faciei pallor , & lipothymia rem patefaciunt periculosa alea. Tum splenia aquâ frigidâ simplici , vel nitrosâ , acetove imbuta , fronti , temporibus , cervici , occipiti , scroto , &c. admoveri solent : cataplasma è bolo , ovi albumine & aceto conflatum , fronti imponitur. Hæmorrhagia sæpiùs coercetur ab odore aceti , vel fumo ejusdem conflagrati : sed efficaciores sunt turundæ , aceto , aquâ aluminosâ , vel stypticâ , &c. imprægnatæ , & naribus inditæ. Easdem fermè vires obtinet atramentum vulgatissimum gossypio exceptum , & simili modo immixtum. Opportunè etiam insufflari

queunt pulveres boli, gypsi, mastiches, sanguinis draconis, &c. Suppetias insuper ferunt enemata refrigerantia & balnea, frictus artuum inferiorum, vincula in brachia & coxas injecta; cucurbitulae siccae, vel scarificatae, diversis partibus affixae, &c. Obiter notare expedit nusquam esse cohibendam hæmorrhagiam narium, quæ hæmorrhoidum, vel catemeniorum vices gerit; ni prius in integrum restituantur hæc spontanea & periodica sanguinis profluvia. Postremò mantissæ instar addere juvat, cruorem turundarum ope sufflaminatum, nonnunquàm versùs fauces cursum dirigere, è quibus ad stomachum pergere, vel ipsammet glottidem subire valet: quod postremum infortunium semel accidisse memini in viro quodam ætatis floridæ, qui paulò post cohibitam, uti videbatur, hæmorrhagiam, somno sepultus; fato, insciis astantibus, cessit, cujus sectione reperta fuere bronchia sanguine obruta.

(4.) *Ulcus narium* recens & indolens, ac defluxionum vulgationum comes, nullius periculi est particeps, sponteque desinit, vel cerussâ, aliove pulvere exsiccante facilè sanatur. Sed grave facessit negotium ulcus illud contumacissimum, sordidum & dolore stipatum, quod *ozæna* nomine innotescit. Cancri naturam quandòque redolet, & tantum fœtorem spargit, ut hunc molestè ferant ipsimet ægri. Latè serpit hoc ulcus mali moris, ad pervias scilicèt narium cavernulas, vicinioraque ossa carie lædit, & palatum nonnunquàm depascitur. Polypum sæpiùs concomitatur, vel excipit ozæna: inter variolarum reliquias haud rarò numeratur; sed symptoma venereum, scorbuticum vel scrophulosum plerumque audit. Hinc patet cur sit pertinacissima, vel planè immedicabilis; ni causa fovens eradiceatur; quod haud nisi arduâ & diuturnâ curatione assequi licet.

Premiſſis generalibus, opportunè præcipiuntur temperantia; lac nempè, ejusve serum, juscula pulli, aquæ minerales frigidae, &c. Quibus auxiliares manus præbent balnea. His peractis summam opem conferunt depurantia & diaphoretica, inter quæ primatum ducunt juscula cancrorum fluviatilium, viperarum, &c. Sed nil aut parùm proficitur cum vulnerariis, quæ parvi habent solertiores practici. Quid valeant specifica primario morbo occurrentia, nemini haud obvium. Quod ad curam externam spectat, crustarum siccitati & hærentiæ occurritur aquâ tepidâ, lacte, butyro, decocto althææ, oleo ovorum, amygdalarum dulcium, &c. Nec impediunt hæc præsidia quominùs ab harum delapsu sæpiùs erumpant hæmorrhagiæ, auxiliis jam traditis coercendæ. Dein injiciuntur vulneraria & detergentia, aquæ nempè Bellilucanæ, hydromel extemporaneum; decoctum hordei, agrimoniae, absinthii, rosarum rubrarum, hyperici, scordii & fabinae; quibus nonnulli immiscent aquam calcis, aquilam albam, &c. Insuper deprædicantur succus geranii robertiani, elixirium proprietatis, tinctura myrrhæ & aloës, unguentum ægyptiacum, &c. Nonnullis prodest suffitus è labdano, myrrhâ, mastiche, styrace, &c. paratus; sed haud citrà periculum in usum trahitur cinnabaris, quæ pulmones lacerare potest. Agmen claudunt vesicatoria, setaceum & fontanellæ, quæ

MORBI
NARIUM.

pluribus optimè cessisse experienciâ constat ; dummodò tamen illæsa sint ossa , quorum caries solitis remediis impugnari nescia , curationi planè adversatur.

(5.) *Polypus narium* , à pisce cognomine sic nuncupatus ; hæc est farcosus diversicolor & plerùmque multifida , cum vario soliditatis gradu , quæ è tunicâ pituitariâ pullulans , nares sæpiùs replet , è quibus haud rarò extùs propendet ; vel ad fauces , ponè uvulam , protenditur : hinc patet cur , ore clauso , haud libera fiat respiratio ; imò & sæpiùs nonnihil impediatur deglutitio. Nunc albicat , nunc rubet polypus , aliàs lividum , plumbeum vel nigrum colorem præ se fert. Alius prætereà mollis ; alius densus , vel cartilagineus observatur. Ozænæ incumbens , pro sarcomate vulgatori à nonnullis habetur ; nùm verò inter se discrepent prædicti tumores ? dubitare licet. Quod ad eventum attrinet , polypus mollis , albicans & indolens , curatu faciliior censetur : secùs se res habet , si reniteat , rubescat , & dolore stipetur. Cæterùm pro indomabili habetur lividus & nigrescens ; præsertim si labem veneream vel scorbuticam agnoscat , vel canceri naturam redoleat.

Merè *Chirurgica* est polypi *medela* ; ad quam tamen nusquàm se conferre licet , ni priùs sanguini prospiciatur , ope remediorum generalium , temperantium & aperientium ; imò , & quorundam specificorum , si expostulet prava sanguinis & humorum diathesis. Ubi minori mole donatur , & locum aptum vel opportunum occupat ; topicis exsiccantibus , & cathæreticis impugnari solet ; pulvere nempe gallæ , corticis granatorum , aristolochiæ & sabinae , alumine usto , vitriolo calcinato , viride æris & præcipitato rubro , unguento ægyptiaco , aquâ divinâ FERNELI , butyro antimonii & lapide infernali : sed cautè admoveri debent escharotica , ne horum acredine exasperetur polypus , vel lædantur viciniore partes , quæ priùs illiniri debent unguento nutrito , vel quovis cerato , ut harum tutelæ prospiciatur : nonnullis demùm profuit sebum ovillum vulgatissimum. Egregia munia sæpiùs præstasse prædicta remedia ratum apud clinicos manet : sed tarda & molesta hæc est curatio ; cur fit ut extirpationem , tùm per nares , tùm per fauces , si sinant sedes & moles , pluris habeant solertiores ; præsertim ergà polypum mollem & indolentem ; etsi hanc operationem sæpiùs excipit hæmorrhagia , solitis auxiliis coërcenda. Sed repullulat polypus , ni radicitùs extirpetur ; quod tamen ob reconditum situm ægrè sæpiùs absolvitur. Idem impendit infortunium , si ossa carie lædantur : quod haud rarò evenire supra innuimus : nonnullis demùm prosunt emunctoria toties decantata , quæ cæteris præsidiis palmam præripiunt.



MORBI AURIUM.

MORBI
AURIUM.

(I.) **P** RIMUM in hoc ordine locum tenet *Otalgia*, vel dolor aurium, qui tantam quandóque savitiem exercet, ut parùm absit quin ægros, ejulatu totas ædes explentes, in furorem rapiat; imò nonnullos præ doloris immanitate vefanos factos, præcipientes se dedisse, constat. Si à *phlogosi* membranæ ossis petrosi cavernulas investientis, ut plerùmque accidit, pendeat, febris excandescit, truculentioraque emergunt symptomata, delirium scilicèt, convulsiones, lipothymia, &c. In suppuratum abit hæc inflammationis species, & à disrupto abscessu remittuntur dolores; sed suboritur ulcus pertinacissimum. Præter hanc causam sanguineam & familiarem, progerminantur *vermes*, harumce speluncarum incolæ, qui etiam atrocissimos dolores pariunt; sed haud continuos ob quietem, cui identidem se tradunt prædicta animalcula, quæ sæpiùs detexit autopsia anatomica. Nec minorem tyrannidem exercent alia *insecta externa* diversæ sortis, quæ per meatum auditorium ad cavum tympani proserpentina, in prædictas speluncas se recipiunt, ni obstat membrana harumce cavitatum contermina. Diversam labem inferunt quævis *corpuscula extranea*, quæ vel in aures incautè adiguntur, vel fortè in has subrepunt.

Ab insolatione, aërisque inclementiâ nonnunquàm suboritur otalgia: hanc *promovent* consuetorum profluviorum sufflaminatio, eruptionum cutanearum retrocessus, &c. quæ aliàs defluxionibus capitis magis obnoxios præsertim invadit. Quò dolores altiùs sunt infixi, eò magis portendit *periculum*: ægrorum enim vita in ancipiti sæpiùs versatur, donec superato septimo morbi die res sit in vado. Inflammatio rarò intrà triduum vel quadriduum resolutione evanescit: sed haud dubitare licet quin pus conficiatur; si circà tertium, quartumve diem exacerbentur dolores, & de quâdam pulsatione in parte affectâ conquerantur ægri. Puris evacuatione sedantur dolores, & omnia sensim ad alcyonium statum rediguntur; sed remanet, uti suprà notavimus, *ulcus contumacissimum*, tædio potiùs quàm dolore molestum; è quo emergit profluvium saniosum, quod inveteratum nusquàm citrà ingens periculum sistitur; cùm ab hâc intempestivâ sufflaminatio graviores immineant cerebri morbi; apoplexia nimirum, affectus comatosi, epilepsia, &c. præsertim si ab ipso cerebro prodeat illud tabi stillicidium, quod à carie ossis petrosi, quâ viciniora in consensum trahuntur, nonnunquàm accidisse norunt practici; de quâ strage cogitandum, si atrociore præcesserint cephalalgia.

Otalgia ab inflammatione sobolescens crebriores *sanguinis missiones* expostulat; imò urgentibus doloribus opportunè tunditur *arteria temporalis*. Conferunt etiam sub eodem scopo hirudines vicinioribus partibus admotæ, & cucurbitulæ scarificatæ ponè aures aptatæ. Præterea proficius est

MORBI
AURIUM.

diluentium & demulcentium usus ; inter quem haud prohibentur hypnotica interna , quæ cautè adhibita expectatissimas impertiuntur inducias. Nec minorem opem præstant anodyna , emollientia & maturantia externa , meatui auditorio indita ; inter quæ usitatiora audiunt lac muliebre , oleum amygdalarum dulcium , semen lini , hyoscyami , cataplasma è micâ panis , aliudve emolliens & digestivum. Nonnullis opitulatur granum camphoræ in auris meatum ineunte morbo immissum : simili quoque modo usurpatur opium , tinctura anodyna , aliaque narcotica , si fummos cruciatus patiantur agri ; sed cautus etiam debet esse horum usus externus ; cùm , notantibus summis in arte viris , haud levem noxam sæpiùs intulerint. Sunt demùm qui nonnullum levamen à pediluvio , vel frictu crurum experiuntur. Post verò disruptum abscessum , in usum vocandæ sunt injectiones vulnerariæ & detergentes ; urina , aqua Bellilucanæ , Bagnerienses & Baregienses , decoctum agrimonie & aristolochiæ , infusum rosarum rubrarum & florum hyperici , aqua hordei mulsa , & fraxini , quibus immiscetur tinctura myrrhæ & aloës , ad hoc opus usurpari solent. Postremò guttatim auribus instillantur balsamum Fioraventi , Commendatoris , aliaque innumera ulcerum curationi dicata. Quoad verò infecta in auribus genita , vel foris hùc admissa , lactis injectione sedantur , vel oleo amygdalarum amararum , petroleo , decocto colocynthidis , hydrargyri , &c. impugnari & enecari queunt ; ni quovis obice ad sedem morbi minime appellant prædicti liquores. De corporum , insectorumque extraneorum educatione , cæteris auxiliis longè præstante , nil addimus.

(2.) In obscuris plerùmque latet *surditatis* causa : præter enim organi spurcitiem à purulentiâ & ossium carie ortam ; alia patent vitia in auditûs organis diligenter perlustratis : nimirum desiderantur in pluribus ossicula : membrana tympani , nunc primâ conformatione crassior , vel crustâ quâdam impedita deprehenditur ; nunc dilacerata observatur , vel planè deest. Auris cavernulæ aquâ , mucosâ , sanguine vel tabo obrutæ sæpiùs reperiuntur : tubæ eustachianæ obstructæ vel infarctæ deteguntur. In conspectum veniunt tumores cerebro , ejusque involucris adnati , nervos acousticos comprimentes : vel se offert colluvies serosa eundem effectum exerens. Alia occurrunt vitia in meatu auditorio ; nempe sarcosæ canalem osseum replentes ; cerumen hùc collectum & inspissatum , quo planè obturatur prædictus ductus ; pisa , nuclei , glandes plumbeæ , aliaque innumera intimiùs ad membranam tympani adacta , vel in meatum casu illapsa. Hæc sunt auditûs impedimenta , quæ in viventibus cerni & explorari queunt : alia verò meris duntaxat conjecturis assequi licet : utrorumque sunt varii gradus ; undè surditatis & gravis auditûs discrimina. Per transennam notandum haud semper aboleri hanc sensationem à membranæ tympani defectu ; plures enim novi sat liquidè audientes , qui hâc planè carebant : si quidem hæc vitiosa dispositio , uti suprà innui , oculis sæpenumerò visendam se præbet ; quam etiam prodit prægressus puris fluxus , cujus fomes ultrâ meatum auditorium latitat. Scitur prætereâ quòd inter fumantium

ludibria, fumus tabaci ore receptus, quâdam haurientium industriâ auribus redditur, intacto auditûs organo.

Surditas congenita, vel à pravâ organi conformatione parva, planè *immedicabilis* censetur. Nec curatu facilior judicatur in ætate provectâ; cum foveatur ut plurimum à paralyfi vel occallescentiâ nervi acoustici. Levis curationis spes elucescit post variolas, cephalalgias diuturniores, & annosam luem veneream; post certum puris vel sanguinis ex auribus profluvium, post lapsum ab alto, &c. Ægrè etiam impugnatur surditas à tormentorum bellicorum, campanarum, &c. strepitu sensum accedens. Facillimè verò curatur gravis auditus, si à congesto cerumine ortum mutuetur, vel ab insecto, quolibetve corpore extraneo obturetur meatus auditorius. Difficilior est cura sarcoseos, hunc canalem replentis: haud desperandum de nervorum stupore, de ferosâ, sanguineâ vel purulentâ colluvie organum obruente, &c. Surditas à febribus mali moris contracta, spontè ut plurimum evanescit: haud solutu difficilis censetur hic gravis auditus hystericiis & hypochondriacis familiaris, ac causæ spasmodicæ particeps; qui scilicèt ab aurium strepitu vel bombo foveatur; cujus tamen exitus in ancipiti nonnunquàm versatur, cum epilepsiam, aliosque affectus convulsivos in quibusdam prænuntiet, auditumve planè extinguat.

Secundis etiam avibus judicari potest *surditas* vel gravis auditus, si nullo præexistente vitio organico, à *membranarum* & nervorum insolitâ *rigiditate*, vel nimia *flaciditate*, suboriatur. Nec utraque causa difficilè innotescit, si attendatur ad varios quos edit effectus aëris constitutio: ubi scilicèt flantibus aquilone & boreâ melius se habet auditus; & surditas ingravescat sub austri vel africani imperio; haud falsò conjicitur laxiores esse villos nerveos, membranaceos & musculares organi: ubi verò contrarium observatur, nimiam prædictarum fibrarum tensionem incurfare licet. Præterea ingens soni strepitus nocet his qui auris siccitate laborant; dum ceteros juvat, quod sanè utriusque surditatis discrimen dilucidè prodit, & notatu dignum occurrit.

E suprà habitis patet *diversam* esse *curandi methodum*; habitâ scilicèt ratione causæ. Ubi igitur cerumen inspissatum majori quàm par est copiâ colligitur, quod crebrius quàm vulgò cogitatur, evenit, auriscalpio everrendum, vel aquæ tepidæ vapore emolliendum, ut spontè decidat: plures, causæ surditatis nescios, & de recuperando auditu planè desperantes, hâc simplicissimâ methodo, præter expectationem, curatos vidi. Si sarcomate obturetur meatus auditorius, totum opus arti Chirurgicæ committendum. Quoad corpora extranea, præmissis injectionibus lubricantibus, congruis instrumentis extrahi debent. Vapor aquæ tepidæ, & injectiones ex emollientibus paratæ, nimiae organi siccitati medentur. Aliam curam expostulat morbosâ flacciditas & vulgatior; sub quâ conducunt sialagoga & errhina, quorum ope derivatur luxurians serum: alios salubriores effectus præstare valet sternutatio, quam promovent hæc postrema: hâc scilicèt, nonnunquàm blandiente fortunâ, foràs eliminatur col-

MORBI
AURIUM.

MORBI
AURIUM.

lulvies serosa , sanguinea & purulenta , quâ obruitur organum , vel abiguntur animalcula , aliaque corpora extranea hûc intromissa. Præterea nervorum , membranarum & muscutorum tonum restituere valet vapor sulphuris inflammari , decocti salviæ , absinthii , rutæ , rorismarini , seminum anisi , baccarum juniperi , &c. ope scilicet infundibuli aure exceptus. Nec , sub eodem conspectu , immerito laudatur granum moschi , vel ambra cineritiæ , gossypii beneficio , auri inditum ; quod remedium nonnullis etiam senibus optimè successisse fertur. Alii summè deprædicant formicas in succo ceparum contusas , vel hunc succum simplicem aquâ vitæ dilutum , nec adversatur experientia. In similem usum etiam trahuntur spiritus vini , tinctura castorei , oleum laurinum , vel amygdalarum amararum , oleum caryophyllorum & cinnamomi , &c. Apud vulgus celebratur aqua è fraxini virgulis igne calentibus stillans ; sed de hujusce remedii efficaciam dubitare fas est. Quamdam insuper opem conferre queunt irrigationes ab alto , ex aquis thermalibus sulphureis , vel quovis congruo decocto paratæ. Nonnullos demum surdos suctione aëris per meatum auditorium curatos fuisse traditur.

Quod ad *auditûs lesionem* ab aurium *sibilo* , bombo , tinnitu & strepitu , nostratibus *sifflement* , *tintement* , ou *brouissement d'oreille* , attinet ; cum merè spasmodica , uti jam innuimus , videatur ; alium curandi ritum sibi vindicat. Itaque medicaminibus antispasmodicis impugnari solet , non secus ac cephalicis quæ priorum vires æmulantur. Haud inanem operam ludunt , inter prædictorum usum , cathartica identidem exhibita. Huc quoque pertinent obstructions referantia , aliave remedia ad nauseam usque decantata. Suum insuper symbolum conferre queunt topica emollientia ; vapor nempe aquæ tepidæ , vel decocti althææ , & injectiones è lacte , oleo amygdalarum dulcium , aliisve demulcentibus paratæ. Fauste etiam usurpari queunt roborantia , vapor scilicet decocti seminum anisi , alteriusve plantæ aromaticæ , oleum è nucleis persicorum , aqua vitæ temperata , fumus succini , fœtor spiritûs salis ammoniaci , &c. Quibus addere licet rectam vivendi rationem , citrà quam nil plerumque proficitur. Susurrus à plethorâ venæ sectione fugatur. Cuivis patet remedium , si ab inanitione ortum ducat. Lipothymia verò prodromus nullam peculiarem curam sibi vindicat.



MORBI ORIS.

MORBI
ORIS.

(1) **L**ABIA, æquè ac cæteræ partes musculosæ, *convulsione* & *paralyfi* tentantur; qui affectus, etsi toto cælo distant, eundem tamen effectum erga os edere videntur; cuius scilicet *torturam* promovent, nunc à resolutione musculorum unius lateris, nunc à convulsione alterius. Si utraque labiorum commissura convellatur, emergit *spasmus cynicus*, vel, ut inquiunt, *risus sardonius*. Paralysis alterutrius lateris apoplexiam prænuntiat, concomitatur & excipit: convulsio verò, epilepsiæ, alteriusve congeneris affectus est prodromus. Suis *signis* instruitur uterque morbus: in paralyfi scilicet oris commissura ab aure recedens voluntati minime obsequitur; in convulsione verò pro ægrotantium nutu movetur prædictum latus. Quanti sit momenti, ut recta ineatur curatio, hosce morbos primâ fronte consimiles ritè distinguere, nemini haud obvium: sternutatoria enim vulgò usurpata, & paralyfi congrua, noxia sub convulsione evadunt; de cæteris remediis alterutri affectui dicatis, nil addimus, ne recoctam crambem apponamus. Illud duntaxat quasi per transfennam adjicere lubet, nonnulla prostare topica ab Authoribus celebrata in utroque morbo, uti videtur adhiberi solita, camphoram nempè, oleum macis & juniperi, spiritum salis ammoniaci & aquam Reginae Hungariæ, nec dilucidè patet ex eorum observationibus quid sit expectandum è prædictorum medicaminum administratione: quapropter de hac re ulterius inquirendum esse censemus.

(2.) In propatulum venit *labiorum fissura*, (*gerçure des lèvres*); cuius curatio simplicioribus peragitur; variis nempè axungiiis ad hoc opus paratis, oleo olivarum & amygdalarum dulcium, unguento rosaceo, ceratis vel pomatis demulcentibus & vulgatissimis. Nec despicienda hæc medela; cum hicce morbus, etsi levissimus, nonnunquam in ulcus contumacissimum facessat. Quasdam prætereà patiuntur *pustulas* labia, brevi in ulcera crustis defædata facessurâs, quæ inter febres intermittentes & nonnullas continuas futuram valetudinem prænuntiant; & hinc nullam expostulant curationem. Sed alia occurrunt labiorum *ulcera*, à cachexiâ vel lue venereâ prognata; quæ præter curam specificam; topicis exsiccantibus, unguento nempè nutrito, de cerufsâ, &c. leniri vel impugnari solent. De ulcere labiorum cancroso, à cæteris cognatis minime discrepante, nil addimus. Quoad *labium leporinum*, (*bec de lievre*), Chirurgiæ planè submittitur; cuius ope faciei indecoræ prospicitur; sed sapiùs remanet vox absona, ob fissum scilicet velum palati; quod vitium congenitum labio leporino sæpius sociatur, ac planè immedicabile censetur.

(3) Ad *tumores* diversæ fortis pronas esse cæteras oris partes nemo nescit. Erumpunt è *gingivis sarcomata*, nunc indolentia, nunc molestis

MORBI
ORIS.

lima; quæ pravae sanguinis diathesi, scrophulosa nempè, vel scorbuticae adscribi solent. Hæ protuberantiae molles, dolorisque expertes nullum, ni insolitam crassitiem assequantur, portendunt periculum; sed majorem terrorem incutiunt renitentes & dolore stipatae, ob imminentem cancrum, cujus naturam sæpius induunt. Irrita hactenus, imò & noxia fuerunt quavis topica resolventia & maturantia adversus utramque sarcosim adhiberi solita, nec feliciori eventu admota fuere cathartica. Hinc omnia abdicantur ab expertis, qui soli extirpationi confidendum esse existimant: quæ operatio secundis avibus quotidie celebratur, tum ope phlebotomi, alteriusve instrumenti congrui; tum ligaturæ auxilio; si sinat tumoris forma.

Vulgatissima est *gingivarum intumescencia phlegmonodea*, quæ à dentium labe plerumque genita, labia & genas in consensum sæpius trahit: hic gingivarum infarctus in abscessum sæpius facessit, quo disrupto vel secto, sedantur dolores & brevi evanescit tumor. Sunt qui velint vulnuscula tumetibus gingivis infligere, ut sanguini inibi hærenti sternatur via; sed nil hac methodo proficitur, si tumor ad suppuratum vergat; sub quâ conditione, magis proficua sunt emollientia; carica nempè pinguis parti tumidae admoventur; vel ore excipitur lac tepidum, vel decoctum emolliens; quorum præsidio non solum leniuntur dolores; sed etiam promovetur purulentia. *Abscessus* fastigiati spontè vel levi pressione disrumpuntur; sed ubi intra textum partium profundiores sepeliuntur, phlebotomo incunctanter aperiri debent; ne stagnans pus foveas sibi cudat, periosteumque lædat; vel fistulae contumacissimæ ansam præbeat. Evacuato pure colluitur os cum vino tepido, aquâ mulsâ, decocto agrimoniae, alterove detergente. Summis laudibus extollitur gummi lacca ad gingivarum putredinem. Ubi demùm simplici infarctu, nullâ verâ accedente phlogosi, intumescunt; identidem cruentari debent; nec alia excogitanda curandi ratio.

Ranula, gallis *grenouillette*, est tumor cysticus & subalbicans, linguae fræno adnatus, materiamque salivarem viscidam, albuminis instar, plerumque recondens. Ad ovi gallinacei molem nonnunquam accedit hic tumor; hinc minimè mirum, si lingua solitis edendis motibus, tum impar evadat; & idèd lædantur loquela & deglutitio; imò & in nonnullis respiratio impediatur. Non solum laticem salivarem, morâ inspissatum; sed haud rarò tabum, concretiones gypseas, &c. colligit prædictus folliculus. Nemo nescit infantes ranulae magis obnoxios esse; quæ sæpius virûs scrophulosi est particeps; atque præposterâ curatione cancri naturam induere valet. Futilia & nociva fore topica adstringentia, styptica, alteriusve fortis, admoventi solita, experienciâ constat. Consultius phlebotomo abscinditur tumor, vel ferro candente solvitur: probè evacuatâ cystide, inflictæ vulneri prospiciendum, ope collutionum detergentium, è decocto hordei & agrimoniae, melle rosato, tincturâ myrrhæ, &c. paratarum. Nil intereâ non movendum, ut absumatur tumoris folliculus ope succi chelidonii majoris, alteriusve cathartici; alias recurrit tumor, vel suboritur fistula

omnem Chirurgorum artem eludere solita. Aliam fortè tutiorem medendi viam præbet extirpatio, ope instrumenti congrui, vel ligaturæ, si sinat basis tumoris: sed ad alterutram operationem nusquàm se componere licet, ni præmissis generalibus, & præsertim specificis; si sanguis & lymphæ quâdam tabe inquinentur: in hunc censum veniunt, depletis vasis, & primis viis, diluentia, diaphoretica, aperientia & incidentia; ac præsertim cathartorum hydragogorum usus; circa quæ, vide diarium Medicum mensis Martii anni 1759.

Tonsillæ, præter phlogosim quæ anginam respicit, *infarctum chronicum* patiuntur, qui sensim skirrhî naturam induit; hinc angina skirrhusa audit: nec exulceratione immunis est hic tumor, si à viru quodam venereo vel scrophuloso foveatur. Leve incommodum pariunt tonsillæ tumidæ, integræ & indolentes, ni harum moles in immensum crescat; sed has ulcere confossas molestè ferunt ægri præsertim inter deglutendum. Quod ad curationem spectat; huc etiam coincidunt generalia medicamina; ac præsertim primario morbo dicata. Nonnullam opem præstant vesicatoria scapulis admota; sed his præcellunt fetaceum & fontanella. Haud desunt qui has impugnare velint cathæreticis; vel ipsomet cauterio actuali, sed eviliuit hæc methodus, haud tamen semper despicienda. Præter tonsillarum intumescuntiam; alii è labiis, linguâ, cæterisque *oris* partibus suboriuntur *tumores skirrhosi*, ad cancrum vergentes; qui ineuntes sub formâ pustulæ indolentis se produnt; quæ tardè progreditur; donec tandem dolore sti-pata ulcere defœdetur. Nonnunquam tamen diuturna sunt hæc *tubercula indolentia*; dummodò haud intempestivis topicis efferantur. Solâ extirpatione, præmissis remediis internis suprâ traditis, quæ sanguinis & humorum dyscrasiæ medentur, domari queunt prædicta tubercula *cancrofa*: sed plerumque obstat horum situs; adeò ut sola ferè labiis insidentia huic operationi submitti queant.

(4.) Haud minorem molestiam creant *oris ulcera* mali moris; in quorum censum minime veniunt hæc linguæ, labiorum & gingivarum ulcuscula fugacia *aphthæ* vocitata; quæ tamen latius quandoque proserpendo, per œsophagum, ventriculum & intestina disseminantur; ac febrem, diarrhœam vel dysenteriam concitant. Aphthæ prætereà os infestantes inter symptomata febrium inflammatoriarum, intermittentium, & remittentium autumnalium, &c. numerantur. Ad hæc ulcuscula pronos esse infantes, præsertim verminosos, neminem practicum latet: his etiam obnoxii sunt senes; quæ aliàs utero gerentes sapiùs invadunt: sed plerumque à pravis digestionibus sobolescunt. Levem metum incutiunt aphthæ pallidæ & albicantes; sed ominosæ audiunt atro-lividæ: utræque demum, in phthisi confirmatâ, funestum præsagiunt eventum.

Cætera verò *oris ulcera profundiora* & sordida, quæ primo intuitu ab aphthis distinguuntur, uvulam, tonsillas, linguam, gingivas & palatum obsident; ac luis venereæ, scorbuti, vel scrophularum, symptoma audiunt. Tuberculum, aliumve tumorem excipere solent hæc ulcera,

MORBI
ORIS.

plerumque phagedænica, quæ idèò summam in ore stragem edunt. Veneræ & palato insidentia brevi ossa carie lædunt; hancque fornicem perforant: eadem impendit labes cæteris ossibus vicinioribus; nec immunis est maxilla inferior. A quâcunque causâ prodeant prædicta ulcera, sæpius cancrofa evadunt; & hinc planè immedicabilia censerî debent. Hunc etiam infaustum exitum habere queunt ulcera à mucronatis dentium fragmentis confossa; si humorum massa quodam viru inficiatur.

Nullam curam efflagitant *aphthæ febriles*, cum pro eruptione quâdam criticâ, haud citrà periculum sistendâ, haberi soleant apud praxi edoctos. *Aphthis* verò *simplicibus* admoventur frustum vitrioli; spiritus ejusdem, vel sulphuris; essentia *Rabel*, &c. quibus si semel, bisve attingantur brevi evincuntur & evanescent; nec aliâ egent curatione. Quoad *alia oris ulcera*; nil non movendum, ut causa fovens sæpius intricatissima evolvarur: inquirendum scilicèt, nùm sit veneræ, scorbutica vel scrophulosa; ut congruis remediis impugnetur: inter quæ proficuè sæpius adhibentur decoctum sudorificum è lignis & radicibus exoticis paratum, juscula viperarum, testudinum, &c. sed præmittendus est usus diluentium & demulcentium; lactis nempè, ejusve feri, jusculorum pulli; nec omitti debent laxantia. Suam pro re natâ conferunt opem gargarismata emollientia, detergentia, exsiccantia & antiscorbutica; quibus immisceri solent mel, tinctura laccæ, balsamum Commendatoris, &c. Pluris etiam habentur oris collutiones cum aquis Bellilucanis, Baregiensibus, &c. quibus addere licet oleum tartari per deliquium, elixirium proprietatis, aliaque consimilia, quæ stylo gossypio munito identidem ulceri imponi solent.

Alterius sanè quidem sortis censerî debent *ulcera gangrenosa*, quæ peculiari cuidam anginx sociantur, aliamque curam efflagitant. Præmissis scilicèt præmittendis, colluitur os cum aquâ, nitro vel sale ammoniaco ad saturationem fermè imprægnatâ, cui addere licet tantillum aceti, vel succi mali citrei. A pluribus decantatur mel rosaceum cum spiritu salis, eâ proportionem ut sint prædicti spiritûs guttæ circiter quadraginta pro quâque mellis unciâ. *Palato perforato*, notissimis præsidiiis coerceri debent ulcus & ossium caries, quibus absolutis paratur lamina aurea vel argentea, cui alligatur spongiola ad foraminis formam comparata; ejus ope obturari potest prædictum ostium; & sic inconditæ voci prospicitur, & deglutitio liberior evadit. Extirpationi submittuntur ulcera cancrofa labiis & gingivis insidentia; sed quæ cæteris oris partibus incumbunt curâ duntaxat palliativâ leniri queunt.

(5) *Ptyalismus*, (*la salivation*), non solum sub infantium dentitione vulgò se sistit; sed etiam familiaris est hypochondriacis, scorbuticis & cachecticis, qui tantam quandòque salivæ copiam profundunt ut intrâ nychthemeri spatium ad libras duas accedat hic excretus latex. Cur minime mirum si hinc sensim emergat marasmus. Aliàs profapiam vulgò ducit ptyalismus ab humorum in hanc vel illam capitis partem decubitu: hunc etiam fovēt aphthæ, aliaque oris ulcera, non secus ac vulnera du-

ctibus

atibus salivaribus inflicta; promovetur demùm à masticatione, à quâvis materiâ vellicante, ab hydrargyrosi, &c. Pessimè se gerunt qui nimium salivæ profluvium adstringentibus cohibere moliuntur; cùm vitatâ Charibdi, in Scyllam delabantur: ab intempestivâ enim sufflamine plures subnasci queunt morbi, ptyalismo longè periculosiores. Tutiori incidunt viâ qui revulsioni promovendæ debito cathartorum, diureticorum, sudorificorum, &c. usu operam impendunt; quorum ope serum superfluum ad cætera incernicula adactum parciori ad glandulas salivares irruit proventu; donec horumce organorum munia ad constitutam naturæ normam accedant.

(6) *Inter varios dentium morbos principem sanè locum obtinet odontalgia, (douleur de dents, morbus familiarissimus, & nulli fermè ætati parcens; ac nonnunquàm sævissimus, vigilias scilicèt, febrem, delirium, convulsiones & animi deliquia accersens; qui à quâdam humorum defluxione exordium plerùmque capit; sed à dentium carie imprimis fovetur. Nunc à frigido, nunc à calido potu, nunc ab aëre frigidiori, à saccharo, &c. exacerbatur hic dolor; qui partium viciniorum intumescentiâ compescitur, & sæpiùs planè fugatur. Certa corporis constitutio congenita; materia rheumatica, vel arthritica, devia; virus venereum vel scorbuticum; graviditas, insolatio, vel intensissimum frigus caput feriens; aër paludosus vel pravis halitibus inquinatus, &c. sunt totidem causæ quibus odontalgie insultus adscribi solent; quarum inter curationem habenda est ratio.*

Ubi non ultrà modum sævit hic affectus, totum *curationis* opus naturæ committitur; sed urgentibus doloribus omni arte prospiciendum. Nonnullis solatium imperitur venæ sectio: plures gingivarum cruentatione dolores compescere solent; nec despiciendus est hic modus: evulsio demùm dentis cariosi princeps audit remedium, quod tamen adhibere vetat dolorum ferocia: quibus incassum tentatis, si agri hisce torminibus diutiùs ferendis impares evadant, ad hypnotica interna, præmissis præmittendis, confugere licet. Sed priùs experiri debent præsidia vulgatissima; aquam nempe vitæ, vel Reginæ Hungariæ; acetum pipere, caryophyllis, vel cinnamomo imprægnatum, vel cum salviâ, aut pyrethro coctum, quæ singula aliquandiù in ore retineri debent. Præterea denti carioso, priùs ritè deterso, admoventur olea thymi, caryophyllorum, buxi, aliaque consimilia; opium vel tinctura anodyna, spiritus vitrioli vel sulphuris, &c. nonnulli cauterium actuale, vel ferrum candens filiforme, dolenti nervo admoventum perperam deprædicant; summam enim noxam quibusdam intulisse illud remedium experiëntiâ novi. Suas laudes merentur sialagoga, nicotiana nempe, pyrethrum, semen staphisagriæ; aliaque id sortis stimulantia, quæ masticata copiosum salivæ fluxum promonent. Ad gingivarum deniquè intumescentiâ adhibentur lac tepidum, decoctum caricarum pinguium, aliave emollientia & demulcentia, quæ

MORBI
ORIS

diù in ore contineri debent; non solùm ad compescendos dolores, sed ut puris confectioni faveatur. Nonnullis demùm, post varia incassum tentata, profuit arteriotomia.

Pacatis doloribus, dentis cariosi fovea, ritè à fordibus purgata, gossypio vel tenuissimis plumbi lamellis repleti solet, ut præcaveatur aëris accessus: si huic operi obstet forma carièi, dens extrà dolorum ferociam eximi debet: sed ab hâc evulsione nonnunquàm emergit *hæmorrhagia*, notissimâ arte sistenda; adigitur nempè in alveolum linum carptum spiritu vitrioli, vel aquâ stypticâ imbutum; quam opem etiam præstare potest agaricus, cera mollis, &c. Nec desunt alia adversus dentium dolores præsidia, pro curantium nutu & arbitrio usurpanda; frustulum nempè nucis incensum, & in dentis foveam adactum; emplastra vesicatoria ponè aures imposita; alter viburni cortex meatui auditorio inditus; emplastrum de taca-mahacâ, cui immisceri solet opium, vel oleum hyoscyami temporibus affixum, mastiche simili modo adhibita, limaces contusi iisdem partibus cataplasmatibus instar admoti, &c. Sunt qui, post *Spigelium*, cauterium actuale, quo inuritur antitragus, summè deprædicant, nec fortè immeritò. Mantissæ demùm instar addere lubet pertinacissima haud rarò erumpere tubercula in variis faciei partibus, dentibus labefactatis adscribenda, quæ idèd brevi à dentis evulsione fugantur.

Alia, sed minoris momenti occurrunt *dentium læsiones*, *spurcities* nempè, *laxitas* & *stupor*. Quoad primam, deterguntur dentes ope panis adusti, & collutione è vino paratâ; ut taceam varias artes mundicie studiosis notissimas: crusta verò tartarea dentibus hærens instrumento congruo auferri debet: vermiculis sub prædictâ crustâ latitantibus, cariem dentium & oris fætorem inducentibus, medetur decoctum fabinæ, collutionis instar adhibitum. Usurpantur ad firmitatem dentibus laxioribus conciliandam dentiscalpia è lentisco efformata, vel crebræ collutiones è decocto ejusdem ligni paratæ: in eundem usum trahitur vinum gummi laccâ, catechu, &c. imprægnatum. Fugatur postremò *stupor dentium*, nostratibus *agacement*, fructibus acerbis, stridulo sono, affrictu dentium, &c. concitatus, collutione cum aquâ vitæ, vel Reginæ Hungariæ; hunc etiam brevi compesci à masticatis portulacâ, nasturtio & erucâ, amygdalis, avellanis, caseo, &c. neminem vel rudem & inexpertum fugit.

(7.) *Oris fætor* à dentibus cariosis nonnunquàm fovetur; sed sæpiùs lui venereæ, vel scorbuticæ, quæ utraque summam stragem in ore edere solet, natales debet. Hunc etiam promovent narium sordidæ exulcerationes, saburra nidulans in primis viis, vermes in iisdem latebris latitantes, pulmonum putridæ defædationes, insolita pylori laxitas, &c. Nec semper causæ morbosæ innititur oris fætor; cùm sæpiùs suboriatur à quâdam sanguinis diathesi, nil sanitati demente; quâ fit ut aër è pulmonibus, aliàs illibatis, exiens effluviis graveolentibus inquinetur. Ut fileamus de fætoe ab esu allii, & ceparum crudarum, à fumo tabaci, &c. Oris fætor fugax,

nullo præexistente vitio organico, pravarum digestionum suspicionem movet: ubi verò in infantibus ad aciditatem vergit, de vermibus cogitandum: quod ad graveolentiam symptomaticam attinet, nullis remediis, subsistente primario morbo, obtemperat. E *cadaverum sectionibus* in aprium veniunt thymus, pulmones, visceraque abdominalia putredine defœdata, stomachus ulcusculis exesus, &c. hinc minime mirari subit si oris fœtor sub hâc rerum conditione nullam fermè curam admittat. Nil, ut omnia in unum contraham, proficitur; ni priùs ritè prospiciatur causæ fœventi, congruâ medendi ratione impugnandæ: sed ut verum fatear, in cimmeriis plerùmque latet tenebris: cur fit, ut sæpiùs inanem operam ludant curantes. Planè demùm immedicabilis censerì debet, qui illibatâ aliàs sanitate, pendet à peculiari sanguinis crassi, cujus ratione è bronchiis erumpunt effluvia inquinata, quæ per aëra disperguntur: hæc dilucidè patet causa; si similia miasmata exitum per cutis spiracula sibi parent. Hic fœtor diluitur studiosâ munditie; accedentibus materiebus aromaticis, quæ in ore contentæ vel vestibus affixæ hoc incommodum, singulis obviis invisum, paululùm reprimere queunt. Acetosam demùm scorbuticis opitulari experientia docet.

(8.) *Sitis intensa* ab alimentis calidioribus, ab æstu aëris, vel corporis inassuetâ exercitatione orta è morborum albo expungi debet. Sed pro morbosâ habetur sitis vehemens, quam febris inflammatoria, alteriusve ordinis comitem habet. Nec minorem metum incutit sitis, quam tabes, cachexia, scorbutus, hydrops, &c. post se trahunt. A quâvis causâ procedat sitis intensa, molestam oris ariditatem, imò & raucedinem sæpiùs infert: aqua sincera, cui præsertim tantillum vini immiscetur, sitim à causâ externâ ortam sedare solet: hæc siti febrili magis fit congrua, si nitro, succo limonum, spiritu vitrioli, alterove acido, tum vegetabili, tum minerali imprægnetur. Plurimùm confert decoctum cichorii ad compescendam scorbuticorum & hydropicorum sitim. Potus demùm demulcens ex oryzâ, hordeo, pullo, &c. paratus medetur huic salivæ fædini, quæ oris ariditatem, molestissimamque sitim tabidis & nonnullis cachecticis imperiri solet. Haud exiguam demùm meretur laudem, inter cætera demulcentia, mucilago seminum cydoniorum sub linguæ & faucium ardore vel excoriatione. Coronidis loco addere licet, nil mali timendum à sitis defectu; cum plures occurrant, qui ab omni ferè potu abstinentes, vegetâ fruuntur sanitate. Sed calamitosus est materiæ cujuscumque potulentæ horror, qui hydrophobiæ characterem prodit: minorem verò incutit metum hæc averfatio, si inter symptomata febrium malignarum numeretur; quo symptomate nonnullos clinicos, aliàs de re medicâ benè meritos, deceptos vidi.

(9.) *Uvula prolapsus*, vel laxatio, nostratibus *chûte de la lnette*, morbus familiarissimus in regionibus, quæ subitaneas aëris mutationes patiuntur; ut plurimùm levissimus, nonnunquàm tamen molestus evadit; eò

MORBI
ORIS.

quoddam boli deglutiendi fallacem speciem præbet, & nonnullis ægris suffocationis metum incutit. Remediis externis tota peragitur curatio: nonnullam tamen opem ferre queunt cathartica & diuretica; aliaque præsidia defluxionibus & catarrhis dicata: sed his longè antecellunt topica adstringentia & repercutientia; gargarismata nempe è decocto lentis, plantaginis, pervinæ, &c. parata. Attingitur uvula aquâ Reginae Hungariæ, spiritu vini camphorato, spiritu salis ammoniaci, &c. vel quod magis usui comprobatur, parti affectæ admoveatur pulvis aluminis, piperis, pyrethri, gingiberis, bistortæ, &c. vel in hunc immergitur uvula ope instrumenti, ad minimi cochlearis figuram efformati. His incassum adhibitis adversus morbum jam inveteratum, explorari debent vires cauterii occipiti inusti: nec felicius cedente hoc præsidio, ad uvulæ amputationem devenire nil vetat: ne minimum quidem imminere periculum, ab ademptâ columellâ, quidquid in contrarium adduxerit HIPPOCRATES, varique Authores, qui cæco brutorum more ejus vestigiis institerunt, multiplici experientiâ edocti asserere minime dubitamus. De phlogosi uvulæ, anginam respiciente, nil addimus.

DEGLUTITIO LÆSA.

INNUMERIS propemodum causis, nunc levioribus, nunc gravissimis submittitur hic affectus. Hæ sunt externæ vel internæ: ad primas referri debet vulgatissima, & multigena *œsophagi obstructio*, quæ scilicet contrahitur ab eduliorum bolo, haud probè masticato; quo nonnulli suffocati interierunt; à voratis ossibus, spinis piscium, aliisque corporibus extraneis quæ fortuito in œsophagum irreperunt; vel stultâ morositate deglutita fuerunt. Ubi sufflaminatum carnis frustum canalem impedit, diversimodè succuri debent ægrotantes; vel exercendi sunt pugni in horum dorsum; ut impactus bolus ulterius, vel ad stomachum pergat; quod plerumque ritè succedit. Sub aliis conducunt emetica, quibus accedente vomitu everritur obex: sed prius adhibenda veniunt lubricantia, butyrum nempe, olea & juscula pingua quæ expeditiores vias parant: quibus frustrâ tentatis ad extractionem, si finat morbi sedes, devenire expedit: aliàs corpus inibi hærens ope cereoli, vel bacilli cetacei ritè lavigati, ad ventriculum adigi debet: quemdam hæc postremâ methodo, cæteris nil proficientibus, nummo argenteo, ponderis unius uncia, liberandum curavi. Ubi verò corpora acuta, vel adunca, carnibus infixæ haud dimoveri patiuntur, superest purulencia & putredinis spes: enim verò deglutationis difficultatem, ab spinâ piscis œsophagi contextui implantatâ, & à semine caucalis, variis spiculis uti neminem fugit, horrido, cum offâ vorato, hunc felicem exitum habuisse memini: nec in

atque casu prætermitti sunt cereoli & bacilli cetacei, haud sine maximis ægrorum cruciatibus; quibus ferendis nonnulli impares sunt; præsertim si hæc operatio imperito committatur.

Ut ad causas internas deveniamus: circa phlogosim, contractionem spasmodicam, paralysem & tumores pharyngi, œsophagoque adnatos, vel vicinioribus partibus incumbentes, vel ulcera mali moris circa fauces, versantur. Phlogosis anginam, de quâ seorsim agere consultius visum fuit, respicit. *Constrictio* horumce organorum *convulsiva*, potu frigido ingravescens, hypochondriacos, scorbuticos & hystericas crebrò invadit: nec hisce cancellis continetur spasmus; quin potius ad viciniora propagatur; in propatulum nempè veniunt rigentes cervicis muscoli: in consensum trahuntur ventriculus & tubus intestinalis; hinc nausea, flatulentia & borborygmi: à mesenterii distractione emergunt dolores in dorso; nec parcat renibus hic affectus; undè prodeunt urinæ limpida & subalbida: ut de tremore, horrore, aliisque symptomatibus morbi characterem exhibentibus, & àlibi traditis fileamus. Hæc verò omnia planè desunt in pharyngis & œsophagi *resolutione*; sub quâ in eodem statu perstat deglutiendi difficultas, quæ in altero casu varias intermissiones, remissiones vel exacerbationes patitur. Præterea alimenta solida, quæ œsophagum convulsum ægrè subeunt, faciliùs obicem superant in paralyti: secùs verò evenit à liquidis: undè patet utriusque morbi discrimen. *Phlogosis* demùm faucium, ut infra dicemus, oculis subjicitur, febre & siti stipatur, &c. ac toto cœlo à prioribus discrepat: sed aliter se res habet in inflammatione diaphragmatis, quæ ægrè sapius dignoscitur; & deglutationem planè præpedit. Similem quandòque effectum edit portentosa hepatis moles: hæc docet autopsia anatomica.

Immanis iracundia, inter & post cibum; cuiusdam alimenti vel medicaminis averfatio; invisum insectum, aliudve corpus fœdum fortè deglutitum; venena, &c. pharyngis & œsophagi *constrictionem spasmodicam accersere* queunt; quæ aliàs febrem malignam nonnunquam concomitatur; vel à vermibus, aliove primarum viarum vitio sobolescit: neminem sanè fugit stomachum nauseantium in consensum trahere oris partes vel ipsasinet glandulas salivares; quæ tunc temporis majorem salivæ proventum eructant: à benè perspectâ illius affectionis spasmodicæ causâ institui potest *prognosis*, ac dirigi potest *curatio*, quæ in medicaminibus antispasmodicis præcipuè versatur; suum symbolum conferentibus nonnullis aliis pro re natâ præsidiiis. Rarò prodest venæ sectio, sed conducunt emetica & cathartica; nec post habenda demulcentia, oleum nempè amygdalarum dulcium, sperma ceti, &c. noxia jure censentur hypnorica; sed tutò usurpari queunt sedantia è nitro, camphorâ, & anodyno minerali deprompta. Quid valeant in nonnullis antihysterica; vermifuga, antidota, &c. è præhabitis dilucidè patet. Suam opem etiam conferunt enemata stimulantia & carminantia, pediluvia calida, vesicæ lacte tepido turgida, necnon fofus & cataplasmata emollientia cervici admotâ. Quoad *resolutionem pharyngis & œso-*

DEGLUTI-
TIO LÆSA.

phagi; quæ apoplexiam, aliamve cerebri morbum comatosum plerumque excipit, remediis cæteris paralyseos speciebus dicatis impugnari solet: sed hisce auxiliis etiam exquisitioribus rarò cedit hic affectus, ni in subsidium veniant spontaneæ œconomiae animalis vires. Addere juvat esurientes, tùm ab impeditâ deglutitione, tùm ab alimoniae penuriâ, tandem febre corripi, cessante fame.

Ut ad *organicam œsophagi obstructionem* deveniamus; hanc pariunt *tumores* ex ipsomet canali erumpentes, vel vicinioribus partibus insidentes: exhibent enim *secta cadavera* præter polypum narium & faucium, deglutitionem impredientem; & corpora extranea ductum cibarium obstruentia; tubercula & sarcosæ in œsophagi cavo protuberantia; hunc ductum callo induratum vel cartilagineum; annulos skirrhosos crassitie conspicuos, circâ pharyngem vel ventriculum sitos, nil discrepantes ab iis qui pylorum sæpiùs invadunt; ulcera phlegmonodea passim in prædicto canali occurrentia; stupendum adipis proventum, quo obruuntur trachea & œsophagus; tumores ex asperâ arteriâ prodientes; thymum infarctum; intumescen-
tiam tyroïdis, & aliarum cervicis glandularum; aortæ aneurismata; variamque pulmonum labem; quibus addere licet ingentem hepatis molem, quâ premitur superius ventriculi ostium; & versùs umbilicum non rarò detru-
ditur hoc viscus, quod aliàs ità contractum apparet, ut vix ad renis magnitudinem accedat, & ejus cavum ferè oblitteretur. Inanissima etiam intestina occurrunt absque ullo stercoreis vestigio; bile nidulante in horumce organorum cavo. Ut fileamus de innumeris aliis vitiis post insolitas inediae observari solitis.

Hæ sunt totidem *causæ internæ*, atrâ ut plurimum *caligine immersæ*, quæ œsophagi obstructionem promovere & deglutitionem impedire solent; quibus debellandis imparia plerumque sunt præsidia medica; cur sit ut *cura palliativa* inhæreant solertiores, quæ scilicet versatur circâ demulcentia; decoctum nempe seminum lini, vel florum malvæ; oleum amygdalarum dulcium, serum lactis, &c. quorum ope lubricatæ viæ nonnullum alimoniae aditum præbent. Quibus incassum tentatis, & abiectâ omni curationis spe; unum superest misellis ægris solatium; ut tædiosam vitam aliquandiù protrahant ope enematum è lacte vel jusculis paratorum; quorum exigua pars per vasa lactea in crassiora intestina hiantia ad sanguinem appellit; quamdam mulierem, meæ curæ commissam, hâc arte per octo vel decem menses integros, fatis eripuisse memini. Haud me latet varias proflare historias *inediarum* plurium annorum absque magno virium dispendio; de quarum fide multum, nec immeritò, apud Authores controversatur: equidem quamdam solâ æris inspiratione quadraginta annos vixisse refert *Hermolaus Barbarus*: credat Judæus Apella. Pro comperto habeo repertas fuisse, haud sine adstantium admiratione, digestionum reliquias in cadavere cujusdam mulierculæ ob annosam inediam, dum viveret, famigeratissimæ; de cujus ingenuitate ne quidem dubitare fas erat, tantam facile est lucro

inhiantibus præbere mendacio fidem. Numerosissimæ circa inedias prodigiosas recensentur ab Authoribus observationes, quas summâ curâ congeffit SCHURIGIUS in suâ chylologiâ; quæ omnes, ni fallor, haud levem fraudis suspensionem movent. Præter jejunia commentitia, vel mendacia detecta & deprehensa variorum nebulonum, qui sub divini cultûs specie, multum lucri, vel æstimationis sibi concitare studebant; haud defunt tamen exempla nonnullarum ineditarum, haud infucatarum, à quibusdam fatuis & stultis peractarum; quæ sanequidem arguunt vitam sine cibo & potu, ad unum alterumve mensem protrahi posse.

DEGLUTI-
TIO LÆSA.

A N G I N A.

IN eadem pergimus de anginâ dicturi; cùm haud aliam, ac jam traditi morbi, sedem sibi vindicet. Barbaram posteriorum Græcorum nomenclaturam, in scholis acceptissimam, quæ potius orio luxuriantis ingenii opus, quàm genuinam doctrinam sapit, missam facimus: nec curant clinici, quos non fugit anginam esse *phlegmonodeam*, *catarrhalem*, *gangrenosam* vel *spasmodicam*; atque pharyngi, laryngi, proximioribusque oris partibus insidere; variis gradibus submitti, diversisque symptomatibus stipari. Ut ab *anginâ inflammatoriâ*, vel exquisitâ, Gallis *esquinancie*, & Gallo-Provincialibus juxtâ vocabulum græcum, *ankoues*, exordium capiamus; inter morbos graviores & acutissimos jure numeratur hæc phlogoseos species. Horror & rigor, febris vehemens, dolor capitis, vultus flammeus, conspicuus faucium, partiumque ambientium infarctus phlogodeus; deglutitionis & respirationis læsio, cum lotio rubro, hunc morbum patefaciunt. Pharyngi, tonsillis, uvulæ, linguæ, laryngi, partibusque conterminis insidet hæc anginæ species; quâ vigente impeditur deglutitio, & fit assumptorum per nares reversio; æstuans facies in nonnullis intumescit; protuberatque cervicis pars anterior; ac lingua tantam quandóque crassitiem assequitur ut illam extrâ os exerere, haud citrà summum incommodum, cogantur ægri.

Ab accessu aëris frigidi, corpore æstuante, sæpius *contrahitur angina inflammatoria*, præsertim in juvenili ætate. Prætereà nonnunquam promovetur ab erysipelatis retrocessu, arthritide anomalâ, mensium vel hæmorrhoidum sufflamine, &c. Hanc postremò infligunt venena, morsus animalium venenatorum, &c. fovetur ab inflammatione, purulentiâ & putriditate pulmonum; viscerumque abdominalium, ac præsertim hepatis; imò & colluviem ferosam in cranio, thorace & pericardio post se trahit: hæc docent extispicia cadaverum. Inter *morbos periculosos* recenseri hunc affectum, ni uvulam duntaxat alterutramve tonsillam invadat,

ANGINA.

neminem fermè later: nonnulli enim decumbentes intrà primum morbi diem rapiuntur; alii circà quintum, ad libitinæ rationem ducuntur; nī opportunā medelâ vel spontaneis naturæ viribus mortem effugiant. Proecedente morbo, lingua inflammata, oris spuma, vox acuta & clangosa, pulsus depressus & intermittens; convulsionēs, præsertim maxillæ inferioris, anxietates; &c. funeris metum incutiunt. Nonnunquàm observatur translatio materiæ, ut inquiunt, morbosæ; quæ scilicèt à larynge & pharynge secedens cervicis partes externas invadit; vel ad pulmones irruit, cerebrumque impetit: quid sit expectandum ab alterutrâ metastasi, nemini haud obvium. Scitur quoque laryngis inflammationem longè periculosiorem esse; etsi nonnunquàm accidit ut, ab ingenti tonsillarum abscessu, de vitâ periclitentur ægri. Cæterùm angina inflammatoria, æquè ac cæteræ phlogoseos species, resolutione, suppuratione, skirrho & gangrænâ judicatur: quæ aliàs à mensibus vel hæmorrhoidibus erumpentibus nonnunquàm evanescit. Mantissæ instar addere juvat quòd semel hoc morbo correptis imminèat reditus, nī exquisitâ victûs ratione, fontanellâ, aliisve remediis prophylacticis præcaveatur. De anginâ skirrhosâ suprà actum fuit.

Anginæ inflammatoriæ curatio venæ sectionibus incunctanter celebratis est auspicanda. Mittitur nempè sanguis è brachiis, pedibus, cervice & linguâ. Admoventur hirudines partibus vicinioribus: affiguntur cucurbitulæ scarificatæ cervici, occipiti, scapulis, &c. Intereâ largâ manu propinantur serum lactis, aqua nitrosa, aliaque diluentia & demulcentia. Alvus insuper servanda est libera ope blandiorum purgantium, vel enematum stimulantium ad hoc opus comparatorum. Emeticum, sub urgentissimo casu, in pretio jam dudum est: plures quidem vidi hocce remedio ex orci faucibus ereptos: hinc in hisce angustiis ad hoc, tanquàm ad sacram anchoram, servatis servandis, confugere nil vetat. Haud citrà periculum exhiberi queunt narcotica. Nonnullis demùm prosunt diaphoretica, vasis priùs depletis; ac post debitum diluentium usum, ne plus æquo incandescat sanguis.

Repercutientia, ut ad *externa* deveniamus; bistorta nempè, plantago, pervinca & urtica; oxycratum, syrupus de moris, catechu, alumen, &c. è quibus parantur gargarismata, egregiam opem, ineunte morbo, præstare queunt; sed hoc primo elapso tempore, emollientia & demulcentia præscribi solent, è lacte nimirum, radicibus althææ, floribus malvæ, feminibus lini, caricis pinguibus, gummi arabico, &c. deprompta. Nonnullis opitulantur sialagoga, aliàs potiori parti noxia. Intereâ imponuntur cataplasmata anodyna, & emollientia è radicibus althææ & liliorum, foliis hyoscyami & geranii robertiani, floribus chamæmeli & croco, feminibus lini, oleo olivarum, & chamæmeli parata; quæ scilicèt non solum deprædicantur ad dolores compescendos, sed etiam ad fovendum humorum decubitum externum. Vulgò celebratur *nidus hirundinis*; qui quâdam vi resolvente, pro specifico habetur; nec adversatur experientia.

Vesicatoria

Vesicatoria occipiti imposita faustam revulsionem peragere queunt ; idem præstant, uti suprà innui, cucurbitulæ scarificatæ circâ cervicem ; nec inutilia censerî debent crurum balnea. Nonnunquàm etiam, annuentibus primi subsellii Medicis, conducunt scarificationes partibus oris tumen-
tibus inflictæ. Si demùm planè obturato larynge mors præ foribus imminet, ad bronchotomiam confugere nil vetat. Præterea in quâcumque oris parte se prodât *abscessus*, nullâ morâ incidendus : evacuato pure præcipienda sunt gargarismata detergentia ex aristolochiâ, agrimoniâ, pervincâ & rubo ; floribus hyperici, & rosis rubris ; catechu, vino, melle, spiritu vitrioli, aliisque id genus materiebus parata. Infarctum skirrhosum tonsillarum nonnunquàm post se trahere anginam phlogodeam jam suprà notavimus : idèò nil addimus, ne recoctam crambem apponamus.

Angina catharrhalis, vel *spuria*, quibusdam *pharyngitis*, vernaculè *mal de gorge*, quæ à frigore diversimodè suscepto, ab intensiori clamore, à constitutione aëris pluviosâ, &c. contrahitur, nullam vel levem febrem movet. Fauces, ac præsertim tonsillæ, levi phlogosi corripuntur, è quâ prodeunt pustulæ purulentiâ albicantes, quæ brevi spontè evanescent : sub hâc dispositione emergit deglutiendi difficultas, quæ leve plerùmque incommodum parit. Coryzam plerùmque comitem habet, cui dein succedit ruffis catarrhalis, de quâ suprà. Notare juvat nonnullos pro anginâ nothâ etiam habere hunc parotidum, maxillarum, aliarumque glandularum salivarium infarctum phlogodeum, infantibus familiarem sub nomine *oreillons* ; de quo, dùm de parotidibus actum fuit. Insuper ad quamdam anginx spurix speciem proni sunt scrophulosi, & syphilidei ; quæ, etsi eandem fermè faciem præ se fert, multùm tamen à catarrhali discrepat. Alterius etiam est naturæ hæc anginx species quæ variolas, morbillos, & quasdam febres malignas solet concomitari ; non secùs ac illæ quæ ab hydrargyrosi promovetur : quæ sanè differentiæ à benè perspectis antecedentibus erui solent.

Periculo fermè vacat angina catarrhalis ; ejusque *curatio* simplicioribus peragitur ; ni solis naturæ viribus, accedente congruâ victûs ratione, committatur. Nonnullis temperie sanguineâ præditis, & ætatis floridæ opem fert venæ sectio : nec rarò conducunt, procedente, vel decrescente morbo, cathartica blandiora, dummodò tamen haud prætermittatur largus diluentium potus. Opportunè obducitur cervix lanâ succidâ : nil aliud adhibet vulgus quàm tibialia è laneo stramite contexta, quibus collum obvolvere solet. Alii cineres calidos, fimum columbinum, hyoscyami folia sub cineribus cocta, innumeraque alia diversæ sortis resolventia, vel anodyna, in consimilem usum adhibent. Hæc dùm peraguntur, haud posthaberi debent gargarismata è lacte, decocto caricarum pinguium, pervincæ, hyperici, consolidæ majoris, &c. quæ tametsi à pluribus parvi habentur ; haud tamen, me iudice, inutilem operam ludunt.

Angina gangranosa, ab *Aretæo* primùm, ni fallor, delineata, *epide-
Tom. I.*

ANGINA.

mica & contagiosa nulli ætati parcit; sed pueros & infantes plerumque *invadit*: obscurus sanè & dubius est hujusce morbi incessus; cur fit ut incauti sub hoc primo exordio decipiantur. Tonsillarum glandularumque salivarium dolore, & intumescentiâ ordiri solet hic truculentus affectus, quem rarò præeunt horror & rigor. Febris, sub primis diebus, mitis; circà tertium plus minúsve intenditur: sed pulsus depressus & inordinatus in **plerisque** observatur. Tunc temporis, vel citiùs, oculis subjiciuntur, præter uvulæ & tonsillarum protuberantiam, maculæ lividæ vel fuscæ, phlyctenæ, & ramenta membranacea siderata, non solùm in faucibus, sed in aliis circumambientibus oris partibus. Hisce stigmatibus brevi succedunt aphthæ, vel ulcuscula latè serpentina, quorum oræ inflammatae & dolentes quid virulenti redolent. In quibusdam altè insidet hæc labe, quæ oculis minimè subjicitur; sed deglutiendi difficultas, raucedo, respiratio difficilis, & ronchus; ac imprimis ramentorum membranaceorum excretio, hunc morbum dilucidè produnt. Hæc enim ulcera gangrænodea non solum os, fauces & narium cavernulas infestare; sed etiam in œsophagum, ventriculum & intestina, æquè ac in laryngem, tracheam, bronchia & pulmones ingruere *autopsiâ anatomicâ* constat. E partibus affectis & conspicuis spontè decidunt escharæ, vel eximuntur ramenta membranacea, nonnunquàm latissima, non secùs ac in genuinâ exfoliatione. Interea summum fœtorem spirat os; insolitam crassitiem assequitur lingua, & saburrâ crassâ defœdatur: intumescunt, uti jam annuimus, parotides; saliva graveolens, & mucosa, majori copiâ stillat, &c. His non rarò accedunt vomitus & alvi fluxus: ut sileamus de efflorescentiis cutaneis, aliisve variis symptomatibus, quæ rariùs observantur. Hæc porrò deterrimâ labe correptis fatum à quinto ad nonum diem; quibus superatis ad vigesimum, trigesimum, vel quadragesimum protenditur morbus.

E præhabitis intelligitur cur angina gangrænosa, etsi sub exordio mitissima videtur, *maximum terrorem* incutiat; eò quòd scilicèt ejus deleterium primis digestionum viis & pulmonibus minetur; quâ labe nil calamitosius potest excogitari. Hic infestus imminet exitus, si sordida & conspicua oris ulcera latè, & citiùs quàm par est, diffundantur; si escharæ atro-lividæ pertinaciores hæreant, & deglutitio molestissima evadat. Quo accedente infortunio brevi cum morte colluctantur ægri; qui scilicèt circà quintum morbi diem, rarò tardiùs, rebus humanis vale supremum dicunt. Pro comperto manet, apud omnes clinicos praxi edoctos, hunc ferocissimum morbum periculosiorem esse in juvenili & adultâ ætate, quàm sub senectute: scitur postremò juvenes qui ex hâcce anginae specie evadunt, morbosâ corporis constitutione; vel lubricâ, ut inquiunt, valetudine diutissimè conflictari.

Vena sectionem quandòque efflagitat angina gangrænosa; sed, ineunte morbo, celebrari & rarò iterari debet. Idem fermè esto judicium de emeticis: opportuniore videntur blandiora cathartica; alvus enim, proce-

dente morbo, servanda est libera; sed omni studio vitanda est hypercatharsis. De alexiteriis & sudorificis controversitur, quæ tamen haud plus æquo æstuante sanguine citrà periculum adhiberi posse crediderim. Omnibus palmam præripiunt antiseptica; aqua nempe succo limonum vel ribesiorum imprægnata, aliave acida, nitrum, cortex peruvianus, & alia quæ simili efficacîâ pollere videntur; inter quæ usus camphoræ haud immeritò de prædicatur. Nonnullis profunt cucurbitulæ scarificatæ occipiti affixæ: plures etiam fausto bearunt eventu vesicatoria cervicis lateribus admota; præsertim si inflicti à cathæretico vulneris purulentia foveatur. Pessimum habuerunt exitum scarificationes ad promovendum carniū gangranosarum delapsū celebratæ, hinc à sanioribus practicis abdicantur, qui scilicet hunc effectum exerere tentant gargarismatibus demulcentibus & refrigerantibus; inter quæ laudibus extollitur saccharum saturni in aquâ ribesiorum, vel rosarum rubrarum, solutum. Multis demum arridet linimentum spiritu salis & melle paratum; quo pluriès per diem inunguntur partes affectæ: congruit præsertim infantibus hoc topicum, quibus denegatur cujusvis gargarismatis usus.

Angina convulsiva, œsophagi constrictioni spasmodicæ, de quâ suprâ, cognata, & ut plurimum adjuncta, à cæteris anginæ speciebus multum abludit, tum majori spirandi difficultate, tum magis impeditâ deglutatione; adeò ut etiam erecti ægri spiritum ducere nequeant; dum nulla ab accuratiori intuitu patet nota ruboris, infarctûs & intumescentiæ circâ partes affectas. Tantus est hujusce morbi impetus ut nonnullos ægros intrâ paucas horas è medio tollat. Hæc velocissima anginæ species, de quâ quasi oscitanter egerunt Authores, rarò essentialis occurrit; sed ut plurimum symptomatrica audit prioris affectûs spasmodici; teranos nempe, hysteris, hyponchondriasis, &c. Hanc prætereà nonnunquam promovent pulmonum, thymi, hepatis, &c. labes putrida; uti ex historiâ cadaverum anatomicâ colligitur. Angina convulsiva à causâ fugaci orta, nullo præexistente vitio organico, vano plerumque metu adstantes terret. Sed ubi graviores morbum, vel quamvis immodicam evacuationem excipit; luctuosa censeretur debet: si verò hepatis vel pulmonum putridam defœdationem concomitetur, cogitandum de exequiis. Sæpius postremò pro catarrho suffocante ab incautis haberi anginam convulsivam, jam suprâ notavimus.

Quod ad ejus *curationem* attinet; nil non movendum ut compescatur efferus spirituum motus, vel revulsionis ope aliò dirigatur. Primum effectum præstant antispasmodica, tum extus admota, tum intus, si sinat obex, exhibita: naribus scilicet insufflatur fumus plumarum, veteris corii, aliufve foetidissimus à diversarum materierum ustione excitatus. Inspirandus præbetur odor aceti acerrimi, spiritus salis ammoniaci, salis volatilis anglicani, &c. Propinantur, quantum licet, aqua florum aurantiorum, tinctura castorei, aliaqua id genus. Intereà injiciuntur enemata cathartica & stimulantia, ut scilicet solvatur alvus, & hoc est præcipuum curationis

ANGINA.

momentum. Celebrantur frictus in dorso & artubus inferioribus. Affiguntur cucurbitulæ siccæ cervici, occipiti & scapulis. Quibusdam opitulatur sanguinis missio è saphenâ; præsertim si consueta sanguinis profluvia sufflaminentur: aliàs haud citrà periculum celebratur. Pluribus postremò profunt emetica, si turgeant primæ viæ: nec minùs opportunè præscribuntur cathartica, dummodò sinat obex, & per temporis angustiam liceat. De anginâ variolosâ & morbillosâ, hystericâ, venereâ, hydrophobicâ, aliâve symptomaticâ, suo loco.



S E C T I O I I I .

DE MORBIS TRUNCI ET ARTUUM.

PLEURITIS NOTHA.

A DOLORE acuto circa ambitum pectoris, tùm in sternò & costis, tùm in claviculis & dorso, qui ab explorantibus digitis, vel singulis inspirationibus exacerbari solet, *dignoscitur* pleuritis notha, tussim siccam cum febre haud rarò comitem habens. Multiplex hic morbus à communi defluxionum causâ, à flatibus, vermibus, à diathesi scorbuticâ, rheumaticâ, &c. oriri videtur. Frequens observatur pleuritis spuria, quæ vulgò *flatulenta* audit, & diro dolore excruciat, ac respirationem intercipit, cum pulsu lento & contracto. Hæc plerùmque brevi recedit, & ab spasmo originem mutuari videtur, cùm studiosos, hypochondriacos, & hystericas præsertim invadat, & spontè, vel linteis calidis fugetur. Pleuritis spuria *verminosa*, infantes potissimùm respiciens, oris fœtore, ac febre vagâ, non inflammatoriâ, ut de cæteris vermium signis sileamus, stipatur. *Scorbutica* varias pectoris partes, eodem insultu, peragrarè solet: comitem habet tussim, cum anacatharsi viscosâ: respirationem quandoque præpedit, non sine mortis formidine. *Rheumatica* contumacior haud tamen metum incutit; graveque curantibus faceffit negotium: nec minùs pertimescenda quæ à deviâ materiâ arthriticâ, vel à retrocessu eruptionum cutanearum profapiam ducit. Intercostalibus, aliisque musculis thoraci incumbentibus, insidere videtur hic fugax affectus, (*point de côté*) & ad inflammationem, præposterâ curatione, nonnunquàm vergit, quam conjicere licet, si eductus sanguis notissima phlogoseos indicia præbeat, quæ tùm familiarissimâ translatione, membranam costas succingentem, pulmones vel ipsummet hepar, teste autopsiâ anatomicâ, minatur. Brevi solvitur hic morbus, qui scilicèt rarò ultrà septimum diem protelatur; sed sæpiùs recurrit, ni sibi caveant semel correpti. Periculi exfors censetur, dummodò partibus internis parcat: nec metuenda hæc pernicies, si dolor ex unâ parte serpat in alteram. E. præhabitis colligitur pleuritidem notham longè discrepare à dolore pectoris chronico, qui à partium internarum labe fovetur.

Pleuritis spuria in plerisque, vel spontè, vel admotis linteis calidis fugatur: sed nonnunquàm pertinacior opem medicam expostulat; quæ perspectâ quantum licet morbi causâ, circa *sanguinis missionem* versatur, si acriter sæviat dolor, vel adsint plethoræ signa; aliàs futilis censerì debet.

PLEURITIS
NOTHA.

nec minus auxilium præstant emetico-cathartica, quotiès primæ viæ pravis digestionum reliquiis scatent; sed semper opportunè exhibentur diluentia, demulcentia & bechica; summè deprædicatur infusum herbarum vulnerariarum; rarissimè fallunt diaphoretica blandiora; inducias agunt hypnotica, quæ tamen nusquàm, nisi præmissis præmittendis, sunt præscribenda. Præsentaneam opem ferunt, ut ad externa deveniamus, topica emollientia & anodyna, axungia nempe humana, aliave, oleum lumbricorum, unguentum de althæâ, vel populeum, balsamum tranquillans, &c. horum vires superant vel æmulantur foris emollientes vulgatissimi; nec non cataplasmata ejusdem ordinis, quibus nonnulli saponem commiscent: camphora demùm inter hæc externa haud infimum locum obtinet. Faustram postremò revulsionem peragere queunt vesicatoria parti dolenti imposita, vel scapulis admota: summis præconiis apud plebem celebratur pulvis pipæris & gingiberis, qui simili modo adhibitus eadem munia obire potest.

LUMBORUM MORBI.

PRIMUM sanè locum obtinet *lumbago*, quæ suum nomen mutuatur à parte affectâ: sedem scilicèt habet in illâ vaginâ aponeuroticâ & crassissimâ quæ musculos extensores obvestit, & quasi colligit Rheumatismi & arthritidis sæpiùs particeps hic *dolor lumbis impactus*, à quovis trunci motu vel attactu exacerbatur, & hâcce notâ apprimè distinguitur à genuinâ nephritide, renibus scilicèt vel ureteribus insidente, quæ aliàs suis propriis signis facillè innotescit. Periculi expers censetur lumbago, aliàs contumacissima; præsertim in senili ætate, sub quâ à materiâ arthriticâ foveri jure existimatur. Haud tamen juvenibus parçit nephritis spuria; quin potius ab immodicâ corporis exercitatione, quam hæc fert ætas, sæpissimè sobolescat. Hanc etiam nonnunquàm promover mentum vel hamorrhoidum suppressio; non secùs ac diathesis scorbutica & syphilitica. Illud per transennam notare expedit simillimum affectum nonnunquàm pati musculos abdominales, qui nunc pro colico dolore, nunc pro horumce organorum phlogosi ab imperitis habetur, atque felici sanè eventu, remediis adversus commentitium morbum usurpatis nonnunquàm evincitur.

Proficuum fore *venæ sectionem*, si incusetur profluviorum sanguineorum sufflaminatio, nemo non intelligit: sed præsertim danda est opera sub hâc conditione, ut congruâ præsidiorum suprâ laudatorum administratione, in integrum restituantur pristinæ evacuationes. Opportunè præcipiuntur cathartica, aliaque auxilia quæ alvum liberam servare valent. Hæc dum geruntur, haud prætermittendus est diluentium & demulcentium usus; feri nimirum lactis, aquæ pulli, emulsionum, &c. Suas laudes merentur mitiora diaphoretica; dummodò haud obstat sanguinis plus æquo æstuantis impetus. Hùc etiam coincidunt topica emollientia & anodyna pleuritidi

spuriæ dicata , sed his præcellunt frictus , & irrigationes ab alto cum aquis thermalibus , vel quovis decocto resolvente paratæ. Suis viribus etiam pollent fots & cataplasmata ejusdem indolis , quæ spiritu vini camphorato acui solent : pars demùm affecta villosis pellibus probè muniatur. Sed omnibus hisce auxiliis palmam sanè præripit lumborum motus , primò ob summam quam infert molestiam levis , qui dein sensim adauctus hunc morbum arcere solet.

LUMBO-
RUM
MORBI.

Quantùm discrepet *lumborum dolor febrilis* à lumbagine , nemini haud obvium : sed *alter* est *lumborum dolor seivissimus* , qui propiùs ad nephritidem spuriam accederet , ni subitò ingrueret & à notissimâ causâ externâ contraheretur ; nempè à motione lumborum violentâ , vel à pravo quodam musculorum extensorum situ ; dùm corpus inflexum & incurvatum erigitur. Itaque nil aliud est quàm certa organorum moventium *distorsio* ; quâ fit ut à levi nisu exsurgant cruciatus ferocissimi , donec partes à suâ genuinâ sede dimotæ pristinum situm recuperent , quod spontaneâ naturæ vi , vel simplicissimâ arte perficitur. Nescio quo fato in hujusce morbi medelâ , non secùs ac in distorsione pedis planè fermè cæcutiant , vel peritiores Chirurgi , ni operationem simpliciorē perperam despiciant , quæ ut plurimùm hominibus rudioribus , qui artem Chirurgicam ne quidem à limine salutarunt , vel quibusdam mulierculis quotidie , nec infelici successu committitur , quæ scilicet solo frictu partis oleo inunctæ , cum pollice , vel manu integrâ , motu juxtâ dorsi longitudinem recto , absolvitur.

Haud prætereundum censemus , dùm de affectibus dorsum spectantibus differimus , *tumorem* quemdam *adiposum* , qui non solùm è dorso , sed etiam ex scapulis protuberat , & in tantam molem sæpiùs attollitur ut cucurbitæ majoris amplitudinem assequatur. *Natta* apud Authores vocitatur hæc cuti concolor , & mollis intumescencia , quæ in tumorum cysticorum classi locum jure sibi vindicat. Nil præter adipem colligit hic folliculus nullius doloris particeps , etsi nonnunquàm macie confectis gestatur. Laterem lavant qui remediis internis huncce morbum expugnare tentant : imò & futilia sunt omnia , vel exquisitiora , topica resolventia adversùs morbum solâ extirpatione domandum , quæ operatio insuper facillimè absolvitur , & periculo planè vacat. De tumore aqueo spinali infantum , de quâ suo loco , nil addimus.



VENTRIS
INTUMES-
CENTIA.

VENTRIS INTUMESCENTIA.

IN aprium sanè quidem venit hic *morbis multiplex* ; sed sapiùs in obscuris latet ejus genuina indoles ; ut de causâ , ut plurimùm inextricabili , fileamus. Numerosissimos morbos , de quibus passim in hoc opere , respicere hanc morbosam corporis conditionem , nemo non intelligit ; quos in memoriam revocandos , quasi per transfennam , sub hocce titulo colligere , haud incongruum fore cogitavimus ; facem præferente autopsiâ anatomicâ : versantur circâ viscerum abdominalium intrâ & extrâ peritonæum sitorum infarctum , inflammationem , purulentiam & putredinem ; tumores multiformes , è prædictis visceribus erumpentes , è corpore celluloso prodeuntes , processibus membranosis & involucris adnatos , vel in ipsismet arteriis , aliisque vasis sedem habentes : ingentem adipis copiam ; flatulentiam demùm & stagnationes diversæ sortis. Quibus addere licet varios uteri , ovariorum & tubarum affectus ; ut de genuinâ graviditate fileamus , quæ sapissimè in pseudo-virginibus pro morbo medicabili ab incautis habetur.

Equidem in *evisceratis cadaveribus* annotatur ventriculus mole ingens , vel flatu , aquâ & sanguine hùc effuso , distentus ; ac nonnunquàm lapides recondens. Patent intestina flatulenta , facibus obstructa , piritâ vel humore quodam mucoso infarcta , phlogosi tacta , skirrhosa & invicem accreta. Occurrit hepar ingentis molis , inflammatum , infarctum , tuberculosum , skirrhosum , steatomatosum , calculosum , abscessum fovens , hydatidibus fœtum , sideratum & putre : vesicula fellea numerosissimis calculis biliaribus nonnunquàm tumet. Lien conspicitur ingens , skirrhosus , tuberculosus , putridus & è sede dimotus. Deregitur pancreas phlogosi læsum , amplissimum , skirrhosum & putridum. In aprium veniunt mesenterium adipe obrutum , tumens , skirrhosum & pus colligens ; epiploon crassissimum , skirrhosum , sideratum , disruptum , convolutum & nodosum : renes lotio distenti , inflammati , pure turgidi , lapidibus fœti ; non secùs ac ureteres : vesica à retento lotio ultrâ modum distenta ; uterus portentosus molam recondens , cartilagineus , skirrhosus vel hydrope affectus : ovaria à collecto sero mirè tumentia , ingentia , variis concretionibus infarcta ; vel fœtum continentia : tubæ aquâ distentæ , ingentes , skirrhosæ , fœtum recondentes , &c. Inveniuntur tumores carnei , steatomatosi , cancrofi , cystici & purulenti ; è mesenterio vel peritonæo erumpentes ; vesicæ , intestino recto , utero , &c. adnati. Se produnt flatulentia intrâ & extrâ viscera ; stagnationes feri & sanguinis , bilis à vulneratâ vel disruptâ vesiculâ ; chyli à dilaceratis ductibus lacteis ; fordidæ , purulentæ , ichorosæ & fœculentæ : hydatides postremò in peculiaribus capsulis reconditæ , vel in abdomine fluitantes.

E præhabitis

E præhabitis luce clarius patet abdominis intumescantiam chronicam curatu esse difficilem; & plerumque indomabilem; recentem verò, vel spontaneâ naturæ vi evanescere; vel opportunis remediis evinci posse; dummodò tamen apprimè innotescat ejus genuina indoles: aliàs futilis est curatio, vel lethifera; ni obsecundet fortuna. Inter hanc dubiam & intricatam rerum conditionem, judicio & scientiâ opus est; cùm plerumque lateat recta curandi methodus. Haud vetantur sub hisce angustiis cautæ periclitationes: sed vitanda incondita remediorum farrago: imò & nonnunquam ab omni curatione, recto instituto regimine, abstinere præstat; cùm nonnunquam tædio potius quàm dolore molestus sit hic status morbosus, qui aliàs haud rarò ad decem, vel viginti annos, & ultrà prorelatur.

VENTRIS
INTUMES-
CENTIA.

HERNIÆ ET AFFINES.

(I.) **N**EMINEM vel rudem & inexpertum latet hoc nomine insigniri tumorem è quâvis abdominis parte erumpentem, à delapsu vel exitu cujusdam visceris ortum. Huic morbosæ depulsioni obnoxia sunt intestinum ileum, epiploon, ventriculus, vesica, &c. Tubus intestinalis exitum sibi parat per annulos inguinales; per arcus crurales; per foramina ovalia; per emarginationes ischiaticas; per vaginæ parietes; per umbilicum, præsertim in recens natis; aliasve abdominis partes: hinc prodeunt *hernia inguinalis, cruralis, ovalaris, ischiatica, vaginalis, umbilicalis & abdominalis*. Scire juvat has singulas species esse duplicis sortis; in processu scilicet peritonæi producti, quem saccum herniosum vocant, continentur; vel extrâ peritonæum sitæ à dilaceratione vel disruptione hujusce membranæ originem ducunt: primæ indolentes sensim protuberant & lentè procedunt; secundæ verò, nostratibus *ruptures*, vivido dolore primùm stipatæ, brevi incrementum sumunt, & sacco carent hernioso. Simili fermè modo extrâ abdominis cavum detruduntur epiploon, ventriculus & vesica; hinc *herniæ intestinales, epiploicæ, gastricæ, & vesicares*; nunc simplices, nunc compositæ. Vulgatior sanè *inguinalis*, nunc ab intestino, nunc ab epiploo; aliàs ab utrâque parte prognata; in inguine coërcita *bubonocèle* vocitatur; ad scrotum verò devoluta, *enterocèle*, vel *hernia scrotalis* audit; quæ postrema tantam sæpiùs molem assequitur ut parùm absit quin ad genua usquè propendeat. Sed ægrè sæpiùs dignoscitur nùm intestinum, epiploon, vel utrumque contineat prædictus tumor: nec faciliùs innotescit *hernia vesicaris*, quæ haud ab similem situm obtinet. Herniam intestinalem etiam mentiuntur bubo, & testiculus annulo hærens; hinc errores emergunt sæpiùs lethales. Peculiaribus tamen signis assequi possunt horumce tumorum differentiæ; *hernia scilicet intestinalis*, magis

 HERNIÆ
ET
AFFINES.

ad amussim orbiculata, peculiari elatere donatur: *epiploica* verò, *cujus* ambitus est inæqualis, flaccidior apparet. *Vesicaris* à compressione evanescit, sequente meiendi desiderio. Bubo suis peculiaribus signis innotescit: testiculus verò, inani scroto, se prodit. Herniæ verò ex umbilico, aliisve musculosis abdominis partibus erumpentes per se patent, de herniâ vaginali alibi. Ductum intestinale inflexum vel geminatum reperiri in herniis vulgatissimis nemo nescit, sed alia occurrit herniæ intestinalis species, rarissima quidem, & à Ruischio primùm, ni fallor, observata; quæ à producto, sacci instar, uno intestini latere efformatur; *cujus* ratione, canalis liberum semper aditum materiebus alvinis in abdomine concedit: sed ægrè distinguitur inter vitam hæc herniæ species, quæ tantummodò deprehenditur in exenteratis *cadaveribus*. Nec facilè etiam nunquam innotescit *hernia cruralis*, cui obnoxie sunt puerperæ, bubonis sedem, faciemque obtinens; cur minime mirum si incauti vel imperiti affinitate decepti ad sectionem commentitii bubonis sese accingentes in errorem lethiferum se præcipites ruant.

Labores ardui vel violenti, corporis nifus, lapsus ab alto, clamores immodici, tussis vehemens, sternutatio crebra, partus difficilis, &c. totidem audiunt *causæ* herniam promovere solitæ, quæ aliàs peculiari vel congenitæ corporis constitutioni natales debet. Herniam facillimè curari in juvenili ætate nemo nescit; sed aliter se res habet in adultâ & senili. Tædio potiùs quàm dolore molestus tandiù existimatur hic affectus, quandiù laxatus annulus abdominalis ingressum & regressum largitur fœcibus alvinis; sed secùs evenit, si morbosâ constrictione afficiatur prædictus aditus; adeò ut planè sufflaminetur materierum intestinalium circuitus; quod infortunium, herniam intestinale legitimum præsertim respiciens, presso pede sequitur *morbus iliacus*, sub quo diutiùs protracto imminet inflammatio & gangræna. Hunc *infelicem exitum* prænuntiant vel patefaciunt sæviora tormina, singultus, sudores frigidi, pulsus obscurus & intermit-tens, &c. quæ omnia symptomata pro mortis præconibus habentur.

Nil præter solitum accidente, intestinum delapsum blandè propelli debet, ut intrà remeet; quod facilè vel ab ipsomet agrotante decumbente absolvitur, dummodò tamen haud immensa sit tumoris moles, quo in casu expertâ Chirurghi manu *reponi debet intestinum*. Sed ubi nimis constrictus annulus huic repulsioni obstat; eò enitendum ut flexilitas ipsi concilietur: hanc opem præstant venæ sectiones, & ipsamet hypnotica, quæ inflammationi, dolores cicurando, occurrunt; constrictionemque spasmodicam solvere queunt: profunt etiam sub hâc rerum conditione, enemata emollientia, fœtus & cataplasmata ejusdem sortis, semicupia, &c. Reposito intestino *subligaculis* notissimis muniri debet pars, ne in posterum relabatur canalis debito repagulo coercitus. In subsidium veniunt varia emplastra adstringentia officinalia, vel cataplasmata è farinâ fabarum, radicibus sigilli Salomonis, consolidæ majoris, &c. parata. Nec despicienda infusa vulneraria intùs exhibita; ptisana è radicibus symphyti, &c. Nescio

quâ ratione ab usu ferè recessit spiritus salis ore sumptus; remedium scilicet, *Prioris*, ut inquiunt, *de Cabrieres*, tandiù celebratissimum, quandiù pro arcano venditabatur; quod tamen multis, etiam adultis, optimè cessisse experienciâ edocti asserere minime dubitamus. Sed necessum est ut æger, inter ejus usum, per quadraginta dies ad minimùm in lecto quietus decumbat.

Ubi verò in annosis herniis partes extrà abdominis cavum depulsæ hærentiam contraxerunt, vel plus æquo constrictus annulus dilatarî minime patitur; adeò ut incassum moliatur Chirurgus intestini repulsionem, & urgeant symptomata; ad *sectionem* solitam nullâ morâ devenire expedit; quæ sanè ingentem artificis solertiam & dexteritatem expetit. Moò hæc nûs invaluit ut impedito intestini regressu, incideretur annulus ad patentiore viam: sed aliam faciliorem, & minùs ærurnosam methodum proponit solertissimus LE BLANC; quæ versatur in simplicissimâ prædicti annuli dilatatione, ope digiti vel cujusdam instrumenti quod delineandum curavit de re chirurgicâ benè meritus Author. Hâc equidem enkeiresi, longè blandiori, declinantur dolores acerbissimi, quos parit sectio partis aponeuroticæ, & tutiùs præcavetur reditus: hinc fit ut curatio per hanc methodum planè absolvatur, quæ multos jam fauto beavit eventum. Sed infelicem habet exitum hæc utraque operatio, si intestinum phlogosi vel gangrænâ corripiatur: quale infortunium accersere solent incauta intestini repellendi pertractatio, vel diuturnior cunctantium mora. Nec desunt tamen sub hâc luctuosâ rerum conditione artis præsidia, quæ scilicet fatum procrastinant; sed rarissimè avertunt. Consultiùs sanè & facillimè celebratur hæc operatio, intacto tamen annulo, vel leviter faucio, inter morbi inducias, ut opportunâ cicatrice, sacco hernioso, vel ipsimet annulo hærente, quasi obturetur, vel angustetur hæc via, quæ hinc lapsuris intestinis & omento præcluditur. Tùm enim periculi expers censerî debet hæc sectio, dummodò tamen vires ferant: aliàs pro arduâ & summè periculosâ jure habetur. Circâ quam obiter notare expedit haud absolum fore, aliam fortè tutiorem & *faciliorem* experiri *methodum* sub urgentiori casu; dirigendo scilicet ferrum, ità ut rescindatur annuli constricti pars superior: postea stylo striato notissimo per hoc vulnus in saccum herniosum immitteretur, cujus beneficio aditum sibi pararent forcipes in prædictum saccum, qui intrà exiguum momentum salvo intestino aperiretur: hinc *tutò*, ni fallor, & *summâ celeritate* perficeretur, quod haud citrà ingentes cruciatus, & maximum vitæ discrimen absolvitur: sed hanc methodum in solis cadaveribus, ni fallor, exploratam solertiorum Anatomico-Chirurgorum examini submittimus; quos scilicet solos respicit hoc judicium.

Post hernias inguinales & crurales, frequentiùs observantur *umbilicales*, vel juxtâ lineam mediam aponeuroticam imi ventris sitæ; rariùs verò occurrunt cæteræ *abdominales*. *Stomachus* extrà situm simili etiam modo depellitur, sed sæpiùs fortè diaphragmatis repagulum quàm musculorum abdominalium obicem solve re hoc viscus, autopsiâ anatomicâ edoctus facile

HERNIÆ
ET
AFFINES.

 HERNIÆ
ET
AFFINES.

crediderim. Quamcumque partem occupent herniæ abdominales, magis inter tussim & à cohibitâ respiratione prominent, quâ præsertim notâ, à cæteris tumoribus ritè distingui solent. Quod tamen non impedit quominus nonnulli imperiti illas pro abscessu habuerint & pessimo agrotantium damno secuerint: quod etiam sæpiùs evenisse sub tumente vesiculâ felleâ suprâ inculcavimus. Difficiliùs tamen innotescit hernia *umbilicalis epiploica*, & vulgatissima; eò quod hærentiam sæpiùs contrahat, & nullam in plerisque protuberantiam extùs pariat; quod herniæ genus crebrò reperiri in sectis *cadaveribus* neminem anatomicum fugit. Notare juvat herniam umbilicalem, vel *omphalocелеm*, in immensum crescentem, præter omentum plerumque skirrhosum, quamdam stomachi vel intestini coli portionem haud rarò recondere; undè emergunt distractiones molestissima, vel quædam cardialgiæ species in quâ planè cæcutiunt plerique medentes, qui præpostero medicaminum multigenorum usu morbum exasperant, nedùm levent. Minus portendunt periculum herniæ umbilicales, cæteraque abdominales; quæ aliàs difficiliùs cohibentur: sed strangulationis infortunium rarissimè incurrunt, & hinc nusquàm ferè operationi Chirurgicæ & cruentæ submittuntur. Ad has postremò procliviores esse mulieres post partus difficiles vel numerosos, docet praxis.

Hernia vesicæ utrumque sexum respiciens, frequentior sanè quàm vulgò fertur, hydroceles in viris faciem præ se fert: sed quâvis adhibitâ pressione complanatur hæc herniæ species, & plures ægri propriâ experienciâ edocti haud aliâ arte mingere solent. Nonnunquàm tamen implicita occurrit hernia vesicæ; præter enim cætera viscera in aliis herniis observari solita, vaginæ partem quandòque recondit: hoc docent secta cadavera. Minime mirum si in hoc elongato vesicæ processu sæpiùs occurrant lapides, de quibus commemorant varii Scriptores. Minime reticendum hanc vesicæ partem extrâ situm nativum depulsam brevi partibus ambientibus agglutinari; hinc nullâ arte evinci potest hic affectus, ni maturè ipsi prospiciatur: circà hoc herniæ genus, adire juvat alterum Academia Regiæ Chirurgicæ volumen, cujus Authores hanc materiam penitùs exhaustisse videntur.

Ad herniam *vesicæ* referri debet ejus tunicæ internæ *inversio*, vel prolapsus, nostratibus la *vessie renversée*; rarus sanè morbus utrumque sexum respiciens; sed in solis feminis conspicuus. Occurrit enim sub hoc infortunio quædam protuberantia ad ovi columbini, vel gallinacei magnitudinem accedens, quæ cystidem refert tenuem & subdiaphanam; quodam latice fœtam, extùs clausam, è meatu urinario erumpentem. Tum urinæ planè sufflaminantur, vel guttatim stillant circà tumoris ambitum. Dolet tensum abdomen; accedit vomitus ac tandem ingruunt convulsiones, quæ ad ultimam rerum lineam, ducunt. Autopsia anatomica detexit ureteres in suâ insertionem obstructos, & lotio inibi retento itâ dilatatos, ut intestini crassioris amplitudinem aquarent: in conspectum venit membranæ interioris vesicæ *inversio*, & per urethram extrusio. Hunc morbum planè

immedicabilem esse nemini haud obvium. Facile quidem repelli valet in utroque sexu hæc membrana è suâ sede dimota; sed nullâ arte retineri potest in situ, ob solutam hærentiam. Sed hæc, experienciâ deficiente, meris conjecturis innituntur.

Suam etiam in gravidis *hernia speciem præbet uterus*, quæ à cæteris ratione formæ multum discrepat, & hinc facillimè innotescit, ac simplicissimâ arte coercetur, dummodò tempestivè ipsi occurratur. Nonnunquam tamen irrita sunt quævis tentamina, & in solâ *seção*, ut inquirunt, *cesareâ* opportuno tempore celebratâ versatur parturientium spes, quam operationem pluriès sub hisce circumstantiis ritè successisse experienciâ constat. Præter viscera memorata, lien, aliæve abdominis partes extrâ situm & extùs nonnunquam propelluntur, ac simili curandi rationi submittuntur. Nec à solo ambitu abdominis muscolari prorumpunt herniæ, sed juxtâ Scriptores intactæ fidei, foramina ovalia, alique pelvis osseæ hiatus, intestinis & omento exitum largiri queunt; sed hæc insolita vel rarissima prætereunda esse censemus.

(2.) Huc coincidit quædam *hernia notha umbilicalis*, quæ ob humorem aqueum inibi collectum, *HYDROMPHALUS*, vel *exomphalus aqueus* audit. Quandam pelluciditatem obtinet prædictus tumor, cujus ratione ab herniis discrepat. Huic obnoxios esse infantes, neminem practicum fugit: sed ab ascite haud rarò profapiam ducit in adultâ & provectâ ætate, adeò ut colluvies serosa abdominalis per laxatum vel submotum umbilicum egressum sibi parans, cute flexili & extensili coercetur, inibique tantâ copiâ sæpiùs colligatur ut tegumenta ulteriùs elongari nescia dilaerentur & disrumpantur: adeò ut evacuato per hanc rimam sero, non solum subsideat tumor: sed etiam totum complanetur abdomen. Hinc fit ut sub hoc morbo implicato dum cogitatur de paracentesi, opportuniùs in hocce tumore umbilicali sit celebranda. Nec desunt postremò umbilici protuberantiæ flatulentæ, cruentæ vel purulentæ, quæ non secùs ac congenere pertractari solent.

(3.) Superest ut, coronidis loco, alium & inauditum abdominis morbum externum à nobis haud procul abhinc annis observatum adumbremus; qui, ob præcipuum quem habet situm, *hypogastroceles* nome nfortiri potest. A pravâ adipis abdomen circumvolventis constitutione, ab skirrhosâ haud multum abludente, ejusque stupendâ crassitie sobolescit hic tumor pendulus, ab herniis summè discrepans. Tardi fuere hujusce morbi progressus in muliere nobilissimâ quinquaginta circiter annorum: sub primis temporibus, sensim & citrà dolorem in altum elevabatur abdomen; sed in dies molestus evasit hic tumor, & febrem lentam concitavit. Stupenda tegumentorum extensio ab ingenti corporis adiposi totum abdomen obvolventis mole, non impedivit quominùs in hypogastrio ulteriùs proterderentur & bronchoceles instar, ad media crura, duplicata propenderent. Intereà cæteræ partes marcescebant, quasi ab ingenti adipis abdominalis subministratâ copiâ exhaurirentur. Hoc morbo decumbebat præclara

HERNIA
ET
AFFINES.

HERNIÆ
ET
AFFINES.

inter optimates mulier, quæ post tres quatuorve menses, à primo morbi, uti videbatur, exordio, macie & doloribus confecta fatis cessit. *Aperto cadavere* in aprium veniebat miranda corporis adiposi crassities, quæ circa ilia septem superabat pollices: visendum etiam se præbuit epiploiphalon, extus minime protuberans & umbilico accretum. Maximam insuper stragem passa fuerant viscera abdominalia, non solum skirrhusa reperta, sed purulentiâ & putredine defœdata. Nos sanè minime latebat hæc labes viscerum; sed huic impugnandæ imparia fuerunt quæcumque præsidia: varia enim & innumera à Medicorum & Chirurgorum cohorte excogitata fuerunt remedia, quæ planè inertia, haud semper innoxia fuerunt; cur his recensendis haud immorabimur. Similis fermè affectus historiam, sed parum accuratam, tradidit AMATUS LUSITANUS; tumoris scilicet viginti quinque librarum, ex inguinibus prognati, & supra crura propendentis: num tamen eadem sit utriusque morbi indoles dubitare licet.



MORBI GENITALIUM.

(I.) CHOREAM ducunt *phimosis* & *paraphimosis*, morbi inter vulgatiores recensendi. Præputium, vel hic tegumentorum processus qui glandem obteggit, inflammatione sæpius corripitur, ejusque ora nunc supra, nunc infra glandem constringitur; undè prodit differentia inter phimosis & paraphimosis. E parte inflammata sub utroque casu, non secus ac ab ambustione, emergunt *phlyctenæ*, quæ apud nostros *crystallines* audiunt. Virûs venerei sæpius est particeps hæc phlogoseos species, quæ aliàs à violento congressu cum virgine defloranda, vel cum cynædis ortum ducit. Nonnunquam ita obvolvitur & coarctatur penis apex, ut urina ægrè profiliat, & vix mederi liceat ulcusculis sub tumente præputio latitantibus. Aliud portendit periculum paraphimosis, glandis nempe gangranam, à nimia scilicet, quasi ab injecto vinculo, constrictione ortam.

Aliarum inflammationum instar pertractari debent phimosis & paraphimosis: ideò conducunt *venæ sectiones*, nec minorem opem conferunt diluentia, demulcentia, paregorica, aliaque tralatitia remedia sub hac rerum conditione usurpari solita: in quorum subsidium veniunt *topica* emollientia & resolventia, cataplasma scilicet è micâ panis, floribus sambuci & chamæmeli paratum, quod cæteris sanè, experienciâ judice, præstat; simili modo adhibetur aqua althææ, vel ipsomet lac, quo crebrò & repidè fovetur pars. Suas laudes pro re nata meretur emplastrum de mucaginibus, aliudve similis efficaciam. A nonnullis deprædicatur emplastrum de Vigo, cum balsamo peruviano, vel oleo guaiaci subactum. Prodest glandis lotio cum propria urinâ, quæ inter exitum compressis præputii

marginibus ad hoc opus sistitur : vel injiciuntur vinum tepidum , decocta vulneraria & detergentia , &c. Quorum præsidio non solum prædictarum partium ulcerationi prospicitur ; sed etiam harum præcavetur adglutinationio. Sub re urgentissimâ scarificatur , circumciditur , aliâve sectione expeditur tumens præputium , ut soluto obice imminens avertatur periculum. Quod phlyctænas spectat , foveri solent cum spiritu camphorato , vel aquâ calcis fale ammoniaco imprægnatâ , alterove liquore simili efficacîâ prædito adversus proximam gangrænâ , cui obnoxia esse organa genitalia , neminem expertum latet.

(2.) *Variis tuberculis* , ut incepta prosequamur , defœdantur utriusque sexûs genitalia , quæ ratione formæ varia fortiuntur nomina : *pori* scilicet , *cristæ* , *condylomata* , &c. vocitantur. Glandi , vel præputio , insidentia , nunc sicca , nunc humida , numerosissima quandôque occurrunt ; parùm tamen afferunt incommodum ; sed haud levem luis venereæ suspicionem movent. Ideò priusquàm ineatur curatio , probè inquirendum , nùm à delitescente viru venereo profapiam ducant ; quo in casu ad suprâ traditam , & specificam methodum se conferre expedit. Nec tamen hisce præsidiis vel exquisitoribus evanescunt prædicta tubercula , quæ medelam externam etiam expostulant. Hæc verò brevi absolvitur extirpatione cum forcipibus peractâ , vel simplici ligaturâ , si sinat tumoris basis. Tardiores curationem præbent catharetica , alumen scilicet ustum , inter mitiora recensendum ; pulvis sabinae , præcipitatus ruber , &c. quæ parti salivâ madenti insperguntur ; vel cum unguento basilico immiscentur. Nonnulli aquam phagedænicam in eundem scopum adhibent ; vel butyrum antimonii , lapidem infernalem , aliaque id genus , quæ cautè sunt admovenda , ne viciniore partes exquisitissimo sensu præditas lacessendo phlogosim accersant.

Alia observatur in genitalibus tumoris species , rara quidem , sed non prætermittenda. *Nodi* nomine innotescit hæc intumescencia , à nimio æstuantis tentiginis ardore plerùmque contracta , quæ corporibus cavernosis insidet , nulloque stipatur dolore. Nec nisi ab erecto pene in propatulum venit hic tumor , qui aliàs incassum exploratur. Nihil aliud est quàm quædam prædictorum tumentium sacculorum , herniæ instar , protuberantia , quæ nullam fermè curam admittit , cùm pars affecta cuilibet compressioni , genuino horumce dilatationum remedio , nusquàm submitti possit. Nonnulli suadent emplastrum stypticum *Crollii* : sed inutilem operam ludunt topica adstringentia vel validiora , cùm etiam levis teli tentigo horum exquisitorum viribus obstat.

(3.) Quibusdam *exulcerationibus* obnoxia sunt utriusque sexûs genitalia , vix , ut opinor , discrepantibus ab ulcusculis quæ puerorum lactantium os , vel nutricum papillas invadere solent. A viru venereo recenti vel antiquo ortum plerùmque habent hæc *ulcera* , quæ aliàs à solâ spurcitie sobolescunt. Cancris nomine designantur in castris venereis contracta , quorum alia indolentia & subalbicantia , certisque cancellis coercita haud ultrâ superficiem excavantur ; alia profundiora & latius serpentina , dolore

MORBI
GENITALIUM.

stipata, & sanie fœtidâ plerûmque conspurcata, quorum oræ inflammatae vel callosae se præbent. Nec desunt ulcera præputii frænum obsidentia, quæ foveam ad urethræ cavum sibi cudunt. Hunc affectum sæpiùs comitantur gonorrhœa virulenta, bubones, aliaque luis venereæ symptomata; cur fit ut pertinacissimus quandòque evadat. Alterius sanè sortis sunt *rha-gades* & *fissura* genitalium, tum virilium, tum muliebrium, quæ oleo ovorum, cerato Galeni, aliove linimento demulcente brevi sanantur: ut de pustulis simplicibus è prædictis partibus nonnunquam erumpentibus, brevi evanescentibus, & suppurationis plerûmque nesciis; hinc à venereis summè discrepantibus, fileamus.

Ulceræ haud latè penetrantia, licèt à neglectâ mûnditie sobolescant, vel à quâdam labe venereâ progerminentur, *simplicissimâ lotionē* cum vino tepido, aquâ Bellilucanâ, aliâve thermali, brevi fugantur: sed *aliis telis* impugnari debent *ulceræ mali moris*: conducit nempe venæ sectio, si horum ambitus phlogosi corripitur: nec minùs profunt sub hâc conditione fœtus & cataplasmata emollientia. Sedatâ inflammatione, purulentia favendum, ope unguentorum ad hunc usum comparatorum. Quibus peractis alumen ustum, pulvis sabinae, præcipitatus ruber; & id genus alia exsiccantia & detergentia, expertis notissima, in usum vocari debent. Ubi nil proficiunt prædicta topica, ad unguentum neapolitanum, ad suffitum è cinnabari paratum, aliaque efficaciora confugere expedit. Catharticis validioribus attingi solent *ulceræ callosæ*, aquâ nempe phagedænicâ, vel divinâ Fernellii, collyrio Lanfranci, butyro antimonii, vel lapide infernali: cavendum tamen ne hisce stimulis irritentur crabrones & accersatur phlogosis. Sedatis doloribus ab acriorum applicatione abortis, curationem claudunt digestiva, unguentum nempe mundificativum de apio, rubrum exsiccans, diapompholygos, &c. quibus addere licet oleum myrrhae per deliquium, quod nonnullis de re Chirurgicâ benè meritis magis arridet. Hæc dum geruntur, sanguini prospiciendum, congruo scilicèt victûs regimine, catharticis mercurialibus identidem repetitis, medicaminibus sudorificis, vel genuinis antivenereis; quæ scilicèt remediis extris adhibitis obsecundant.

(4.) Quid sit intelligendum per *priapismum* vel *satyriasmum* in viris, & *furorem uterinum* in feminis, nemo literis eruditus nescit. Tantam sæpiùs tyrannidem exercet hæc pruriginosa genitalium libido, ut ægros blandimentis & increpationibus obsurdescentes, in furorem rapiat. Utrumque sexum respicit, mutato nomine, hic turpissimus morbus, qui solâ feminis emissionē paululū compescitur. Sed tanto veneris æstu incenduntur ægri, ut etiam repetitis congressibus, minime fatiari valeant. Juvenes plerûmque *invadit* satyriasis, cujus stadium sub hâc ætate haud diū protelatur: sed tanto imperu quandòque insurgit hoc fœdum malum, ut missellos ægros brevi ad libitinæ rationem ducat. Nec parcat ætati provec-tæ satyriasis, sub quâ haud ominosa, sed longè pertinacior censetur. Huic obnoxii sunt admissarii, amoris æstro perciti, qui lepidissimis, lascivioribusque

ribusque colloquiis cum amasiis inebriantur; qui librorum obscœnorum lectioni assiduè incumbunt, qui cantharidibus utuntur, ut ad petulantiorē venerem cieantur; ac demùm lautè victitantes, vel vino, exquisitissimisque dapibus indulgentes. Hanc etiam libidinofam promovent tēiginem ulcera vesicæ cancrofa, ingens renum moles, geminata vasa spermatica: in sequiori verò sexu uterus sanguine infarctus, & quasi inflammatus; ovaria ingentia; stupenda clitoridis moles; aliaque nonnulla vitia organica, quæ exhibet *sectio cadaverum*.

Sub hoc rerum statu, danda est opera ut compescatur efferus spirituum impetus, & lymphatæ menti monitis, vel minis prospiciatur. Quapropter largâ manu *mittendus est sanguis*; nec dissimili ratione propinantur refrigerantia & demulcentia in quorum censum veniunt lac, ejusque serum, succus limonum aquâ temperatus, hordeatum & emulsiones, juscula pulli vel carnis vitulinæ, aqua nitro imprægnata, &c. Præsentaneam opem ferunt sedantia è camphorâ & nymphæâ; non secùs ac è feminibus papaveris albi, lactucæ, portulacæ, & agni casti adversùs hunc morbum famigeratissimi deprompta. Nec omittenda sunt balnea vel semicupia, sub hisce circumstantiis summè proficua. Postremò angue pejus fugiant hoc pudendo morbo correpti, lupanaria, cogitationes libidinofas, lectiones obscœnas, confabulationes cupidineas, quæcumque demùm mentis ludibria, quæ morbum proritare, vel exacerbare queunt.

(5.) Inexplebilem coëundi cupiditatem excipit *impotentia ad venerem*, quam fascino ineptè referunt nonnulli. Si à quâvis labe chronicâ profapiam ducat, fugato primario morbo, sensim evanescit, aliàs omnibus remediis obsurdescit: si à mente præjudiciis obcæcatâ, vel quâdam insulsâ verecundiâ suboriat, bono animo esse jubeantur trepidantes, nec aliâ opus est curatione. Facile demùm evincitur hæc impotentia, quæ belluones libidinosisque oblectationibus solutos invadit; sed immedicabilis censetur, si à quovis vitio organico pendeat. Omnem sapiùs curam absolvunt optima victûs ratio; mens salubrioribus præceptis ad hilaritatem composita, ac gratæ corporis exercitationes, ideò opportunè exhibentur lac vaccinum, ova sorbilia, carniū gelatinæ, columbæ assatæ vel elixæ, amygdalæ, avellanæ & nuces pistaciæ; vinum generosum, chokolatum, aliaque refarciendis viribus apta. Sunt qui pessimo sanè consilio cantharidum usum, ganeonibus & luxuriæ perditis familiariorem, suadent; sed fugaces vires impertitur hoc remedium, quod aliàs mictum cruentum, dolorem nephriticum, aliamve noxam inferre solet. Sunt demùm qui blanditiis ab amasiis notis, improbâ mammarum tractatione, osculis ori impressis, vel verberibus lustrato veneris campo, ad dulcissimam voluptatem se componant; sed hæc libidinosa potiùs flagitia sapiunt, quàm genuina Medicinæ præcepta.

(6.) *Gonorrhæa*, vernaculè (*chaudepisse*) etsi familiarissima, inter morbos intricatissimos recenseri debet. In obscuris sapissimè latet ejus indoles, cum ægrè evolvantur causæ, & genuinus morbi fomes nostræ sub-

trahatur indagini; ac postremò multùm faceſſat negotii ejus medela. Nec dilucidius patent gonorrhœæ discrimina, etiam rudiori modo ſpectata; quæ tamen pro viribus enucleare expedit. Itaque quadruplicem occurrere gonorrhœæ ſpeciem, experientiâ edocti, jure conjicimus; *virulentam* nempè *internam* & familiariorem; *virulentam externam*; *simplicem*; & *ſpuriam*. Sed quævis ſpecies ſuos ſubit modos, diverſosque gradus aſſequitur; ac demùm alterius conſortio ita ambigua evadit, ut ſæpiùs Œdipo opus eſſet. Hic eſt tamen morbus quem deſpiciunt artis proceres, & cujus cura imperitis & ineptis, plerùmque traditur.

Gonorrhœa virulenta interna, ut propoſitum proſequamur, circà quartum diem à concubitu impuro, & rarò ultrà duodecimum ſe prodit. Hâc ineunte, ſtillat è pene latex quidam ſerofus qui in dies flavescit, vel quamdam viriditatem contrahit; lentior evadit, ac nonnunquàm fœtet. Minime dubitare licet quin puris ſit particeps hæc materia; cùm ejus etiam uberior proventus non impediât quominus accedente congreſſu copioſum ſemen erumpat; quod ſanè aſſerti veritatem ultrà omne dubium arguit. Dolore & ardore inter mingendum ſtipatur hæc gonorrhœæ ſpecies; atque in extremo glande ſedem habere falſò videtur prædictus dolor, qui tamen in nonnullis per totum urethræ tractum, vel juxtà radicem penis ſævit. Intereà ægrè fluit lotium, imò & nonnunquàm ſuſflaminatur: cruciatus qui hinc emergunt, exacerbantur ab arrecto pene, qui in quibuſdam funis inſtar contorquetur; cur ſit ut gonorrhœa hoc ſymptomate ſtipata (*chaudepiſſe cordée*) apud noſtrates audiat.

Gonorrhœæ virulentæ ſæpiùs ſociantur varii alii morbi ab eâdem cauſâ oriundi, *præputii* nempè *inflammatio* & *tumores*, ut inquiunt, *crystallini*; ulcera paſſim occurrentia, bubones, ophthalmia, &c. Familiariffimus prætereà eſt ſub hâc gonorrhœæ ſpecie hic *humorum deſluxus in teſtes*, eorumque involucra, qui vulgò dicitur (*chaudepiſſe tombée dans les bourſes*). A ſuſflaminato laticis virulenti profluviò natales debet hoc ſymptoma, quod promovere ſolent equitatio, ſoluta vivendi norma, injectiones adſtringentes, à nonnullis ſciolis adhibitæ, &c. *Gonorrhœa ſicca* perperàm à quibuſdam vocitatur hæc morbi conditio; cùm rectius, opinor, hoc nomine inſigniatur *dysuria venerea*, acerbioribus doloribus & ardoribus inter meiendum ſtipata; quæ ſcilicèt, ſi humoris fluxum excipias, eandem ac gonorrhœa virulenta faciem præ ſe fert, ſimiliaque poſt ſe trahit ſymptomata.

Gonorrhœa virulenta recens & opportunis remediis impugnata facilè evincitur; ſed *pertinaciſſimam* eſſe inveteratam nemo neſcit; cùm ſcilicèt inter innumeros morbos venereos ſola occurrat, quæ hydrargyroſi etiam pleniori domari recuſat. Ubi uno tenore, vel nullo accedente gravi ſymptomate ſua percurrit tempora; atque haud ultrà quadraginta vel quinquaginta dies producit, rariffimè luem veneream impertitur; ſed ſi intempèſtivâ curatione citius quàm par eſt ſiſtatur gonorrhœa, vel curantium ægrorumve ſocordiâ chronica evadat, pro luis venereæ indicio ha-

betur, exquisitoribusque præsiidiis sæpiùs obsurdescit. Annosa demùm atrophiam accersit, & ad ultimum fatum nonnunquàm protrahitur. Hujusce morbi fomitem in prostatâ exhibent *cadaverum sectiones*, quæ etiam patefaciunt vesicularum seminarium labem, renumque purulentiam; non secùs ac exulcerationem in urethrâ, è cujus vetustioris coalitu emergit cicatrix callosa, & non nil protuberans, quæ canalem angustando liberum urinæ exitum præpedit. Hæc est commentitia sarcosis, ad quam referri solet dysuria chronica quæ diù post sublatam gonorrhœam ægros manet.

Curatio è venæ sectione plerùmque auspicatur: sedatis doloribus egregiam opem præstant cathartica mercurialia; sed haud antè quatuordecimum morbi diem sunt exhibenda; pluriès verò hoc elapso tempore iterari debent. Intereà danda est opera per totum morbi stadium, ut injiciantur enemata demulcentia & emollientia, quæ non solùm alvum servant liberam, sed etiam, instar balnei interni, dolores leniunt. Proficue adhibentur sub eodem curriculo diluentia, demulcentia & aperientia blandiora; inter quæ usitatoria audiunt lac ejusque serum, emulsiones, aqua nitro imprægnata, ptisana è radicibus althææ, graminis, fragariæ, nymphææ, &c. Suas laudes quoque merentur aquæ minerales aperientes, tùm frigidæ tùm thermæ, quæ cæterorum medicaminum vices explere valent. A nonnullis deprædicantur diaphoretica; sed haud priùs exhiberi debent, quàm omnia ad alcyonium statum redigantur. Idem esto judicium de vulnerariis & detergentibus, inter quæ præstat aqua calcis lacte temperata; sed solerti manu pertractari debet illud remedium. Cautè etiam præscribi debent hypnotica; laudanum nempè, diacodium, pilulæ de cynoglossò, &c. sed urgentibus doloribus succurrendum. Tutiùs sanè usurpatur camphora, quæ etsi tantâ efficaciam pollet, effectum tamen minùs fugacem edit. Ubi opportuno prædictorum remediorum usu pacantur omnia symptomata, & debitus purulenti laticis proventus, latentis ulceris medelæ prospiciendum. Faustè in hunc scopum præcipiuntur balsamum Copahu, Canadense, terebinthina Chia, & id genus affinia: quibus incassum tentatis, ad sanguinem draconis, alumen, catechu, aliaque adstringentia interna, cæteris consentientibus, confugere nil vetat. Eundem effectum, ac minori discrimine, exerere valent aquæ Forgienfes, Passienses, cæteræque martiales, quæ intimiora corporis penetralia lustrare queunt. Si verò omnibus hisce exhaustis præsiidiis nequaquàm morrem gerat gonorrhœa, haud incongruum judicamus quoddam experiri remedium à GARIDELLO, differente de cisto in Historiâ plantarum Gallo-Provinciæ, traditum; cujus compositionem subeunt hypocistis, gummi guaiaci, coccinilla & cantharides: hoc remedium minime despiciendum sub hâc solâ rerum conditione usurpare licet, adversùs nempè gonorrhœam pertinacissimam, quæ nullâ aliâ arte domari potuit.

Nec posthaberi debent, ut incœpta prosequamur, *remedia externa*, quorum nonnulla internis palmam præripiunt. Inter quæ nil sanè efficacius

MORBI
GENITALIUM.

reperitur quàm inunctio mercurialis , scrôto , partibusque vicinioribus admota ; una circiter drachma unguenti neapolitani ad hoc opus adhibetur ; quod tribus aut quatuor diebus interpositis , quater , quinquiesve iteratur per totum morbi curriculum. Si sub primis morbi temporibus sæviant dolores inter penis tentiginem , sedari queunt fotu è lacte , decocto althææ , aliove emolliente parato. Faustè adversùs ischuriam usurpantur femicupia ; vel lenitur illud symptoma in urethram injiciendo lac , oleum amygdalarum dulcium , decoctum althææ , feminum lini , &c. Morbo decrescente & fugatis symptomatibus , humore demùm , quo madet glandis apex , lento & albicante , proficuè adhibentur *injectiones è panacæâ* , vel aquilâ albâ , in aquâ plantaginis paratæ. Faustè etiam simili modo usurpantur aquæ Bellilucanæ , Baregieneses , aliæve thermæ cognatæ. Quibus nil proficientibus , ad injectiones adstringentes confugere licet , quas ingrediuntur bistorta , tormentilla , equisetum , balauftia , cortex granatorum , alumen , sanguis draconis , &c. sed , ut verum fatear , haud citrà periculum adhibentur hæc postrema remedia adstringentia , sanioribus clinicis semper invisa.

Inter veteris gonorrhœæ reliquias , nil sanè magis ægros angit , quàm hæc *urethræ coarctatio* , quæ dysuriam vel ischuriam post se trahit : hanc à chronicorum ulcerum cicatrice nonnihil protuberante & callosâ , nequaquàm verò à sarcosibus , uti fertur , oriri suprâ notavimus : nunc superest ut rationalem medendi methodum , multiplici experienciâ confirmatam , candidè aperiamus. Itaque si planè sufflaminetur lorium , præmissis præmittendis , catheteris ope educatur , cùm urgentiori sit succurrendum. Postea composito regimine congruo , diluentibus & demulcentibus internis diù inhærendum ; nec minùs prosunt injectiones , fots & femicupia ex emollientibus parata. Quibus nihil proficientibus , ad *virgulas plumbeas* , vel *cereolos* diversæ crassitie , quæ catheteris instar cautè in urethram , oleo priùs lubricatam immittuntur , confugere expedit ; quorum ope sensim dilatatur canalis , & obliteratur obex ; cur fit ut proficienti lotio liberior paretur via. Si morbo superando repagulo imparia sint hæc simplicissima auxilia ; alii adhiberi debent *cereoli è catharticis & maturantibus conflati* , quorum ope cruentatur cicatrix , quæ dein purulentiâ absimitur ; quibus peractis , præcipuum curationis momentum in eo versatur ut diutiùs protracto cereolorum simpliciorum usu præcaveatur altera à recenti cicatrice angustia. Neminem postremò , vel rudem & inexpertum fugit quid sit peragendum in *gonorrhœâ siccâ* , sub quâ eò sanè collimandum , ut rigidiora & constricta organa emollientur & laxentur ; quam opem præstant venæ sectiones , diluentia , demulcentia & pægorica interna ; non secùs ac femicupia , fots , injectiones , enemata , &c.

Gonorrhœa virulenta externa , glandi & præputio incumbens , à phlogosi & exulceratione inter utramque partem delitescens promovetur ; è quibus pariori copiâ manat humor purulentus qui adhibita pressione uberius prorumpit. Etsi levissimus videtur hic affectus , haud tamen peri-

cūlo planè vacat ; atque eandem fermè curam , gonorrhœæ scilicèt internæ dicatam , sibi vindicat ; si tamen excipias injectiones in urethram cujuscunque labis immunem ; aliaque remedia dysuriam & stranguriam respicientia , quæ hanc gonorrhœæ speciem nusquàm concomitantur. Præsenteaneam insuper opem fert lorionum vulnerariarum & detergentium usus , quorum vices nonnunquàm explet vinum tepidum sincerum. Prosapiam sæpè ducit hic affectus à gonorrhœâ internâ , cum quâ tùm implicatur : ubi scilicèt quidpiam humoris virulenti à phimosi nativâ vel contractâ sufflaminatur , & sub præputium colligitur ; à cujus morâ emergit prædicta harumce partium labes : sub quo rerum statu , nil omittendum ex emollientibus ut glans detegatur ; vel congruis injectionibus jam recensitis huic vitio occurritur ; quod plerumque faustè absolvitur.

Gonorrhœa simplex nil aliud est quàm genuini seminis stillicidium , quod nullo dolore stipatur , nec luis venereæ est particeps. Antè aut post mictum , vel unâ cum lotio spontè & parco proventu fluit hic latex albicans ; qui aliàs inter egerendum , ab injecto enemate , vel quovis tempore excernitur. Nonnunquàm suboritur à luxuriante semine in lautè victitantibus , cælibemque vitam trahentibus ; præsertim si lectioni , colloquiis , vel cogitationibus obscænis delectentur ; sub quâ causâ levem incutit metum hic affectus : sed periculosior censetur , si organorum laxitati vel atoniæ natales debeat ; uti nonnunquàm evenit in debilibus & phlegmaticis. Pro ominosâ habetur hæc gonorrhœæ species , quæ à pravâ sanguinis diathesi prosapiam ducit ; ad quam proni sunt cachectici & scorbutici , quorum ad atrophiam prope rantium vires sensim exhauriuntur. Nec minorem impertitur terrorem quæ à labe quâdam organicâ progerminatur ; quod vitium impendet his qui an nosâ gonorrhœâ virulentâ laborant , vel qui petulantiori venere se addixerunt. Ut omnia in unum contraham , si hæc gonorrhœæ species nullum vitium in seminis receptaculis vel emissariis , nec in humoribus agnoscat , periculo planè vacat , & faciliè domatur ; aliàs grave curantibus facessit negotium hæc fluoris species.

Rarò inter *curandam gonorrhœam simplicem* sanguinis missione opus est : cathartica verò summè proficua censentur ; sed rheum duntaxat , cassia , tamarindi , magnesia , aliaque blandiora usurpari debent. Conducunt , cæteris consentientibus , temperantia & demulcentia , lac nempè , ejusque serum , emulsiones , aqua succo limonum vel nitro imprægnata , camphora , &c. Nonnullis opitulantur depurantia , antiscorbutica , vulneraria , diaphoretica , &c. Non secùs ac ad gonorrhœam virulentam etiam profunt vulneraria & roborantia , balsamum nempè Copahu , vel Canadense , & terebinthina , rosæ rubræ & balauſtia , cortex peruvianus , sanguis draconis , martialia vel aquæ minerales ejusdem indolis , &c. Parùm verò conferre videntur topica adstringentia ; nil tamen impedit quominus explorentur : nec despicienda balnea aromatica , roborantia frigida , &c.

Gonorrhœa spuria doloris æstûsve pruriginosi expers , agrè sapiùs à postremâ distinguitur. Diversum tamen exitum habent prædicti morbi :

MORBI
GENITALIUM.

gonorrhœa scilicet simplex, uti jam innuimus, diutius producta, atrophiam minatur; nec mirum, cum sit genuinum feminis profluvium: notha verò, etsi chronica, leve incommodum parit, ob discrimen scilicet manantis laticis, qui à prostaticâ glandulisque vicinioribus suppeditatur. Cognata videtur gonorrhœa notha fluori albo muliebri, nec facilius se expugnari patitur. Ad hanc speciem referri debet gonorrhœa quæ ab haustâ cerevisiâ recenti promovetur, cui tantillum aquæ vitæ medetur. Quamcumque causam admittat gonorrhœa spuria, congruis præsiidiis abigitur, dummodò haud altas egerit radices; aliàs pertinacissima censetur. Itaque præmissis generalibus, si res expostulet, in usum vocantur temperantia & aperientia blandiora, inter quæ primatum sanè ducunt aquæ minerales acidulæ, quas ritè sæpiùs successisse multiplici experienciâ constat. Suas laudes merentur diaphoretica, quæ materiam morbosam sanguini immixtam ad cutis spiracula ciere solent. Hinc fit ut in ancipiti versetur balsamicorum & adstringentium usus; cum ab intempestivâ hujusce excretionis sufflamine graviores concitari queant morbi, ni inusto cauterio divertantur: sed paucis arridet hoc tædiosum præsidium adversus morbum periculi expertem, qui aliàs nullum parit incommodum.

Absolutis quæ de variis gonorrhœæ speciebus erant dicenda, ordinis ratio expostulat ut nonnulla de *pollutione nocturnâ* subnectamus. A somniis libidinis plerumque concitatur hæc venus involuntaria: hanc etiam inter vigilandum promovent mulieris formosæ conspectus, amasiorum blanditiæ, &c. Periculo minime vacat hic affectus, si diutius proteletur, cum sæpiùs in gonorrhœam simplicem facessat, quæ sub hisce circumstantiis ægrè domatur, & tabem minatur. Familiarissimè invadit hoc morbi genus juvenes amoris æstu percitos, vel qui inverecundis lepidissimisque colloquiis plus æquo indulgent. Hinc fit ut in cujusvis libidinosæ consuetudinis interdicto, præcipuum versetur curationis momentum: nec aliâ sæpiùs opus est medelâ. Intereâ profunt juscula refrigerantia, aqua nitro vel succo limonum imprægnata, emulsiones, &c. Maximi æstimantur anodyna, nympha scilicet, camphora, aliave satyriasi dicata; quorum vires æmulari videtur liquor anodynus mineralis. A quibusdam, penès quos sit fides, deprædicantur bursa pastoris, aliave adstringentia: nonnullis arridet cataplasma è vino & fragariâ paratum, pubisque regioni admotum. Nec demùm despicienda balnea roborantia, imò & frigida, quæ aliis auxiliis egregiè obsecundare valent. Nonnulli demùm saccharum saturni inconsultò adhibent, ad sistendas crebriores pollutiones: hoc enim præpostero remedio plures enecatos fuisse constat.

(7.) Expedit, priusquàm ulteriùs progrediamur, ut de *hæmorrhagiâ penis* breviter agamus; qui fluxus è vasis sanguineis ipsiusmet partis prodiens, ritè distingui debet à mictu cruento è vesicâ & renibus ortum trahente, sub quo sanguis intimè miscetur cum lotio; dum sincerus stillat in genuinâ hæmorrhagiâ, de quâ in præsentiarum. Haud alterius fortè est naturæ hoc sanguinis ex urethrâ profluvium, rarissimum verò, quod cata-

meniorum instar patiuntur nonnulli viri, & non secus ac in sequiori sexu à pubertate ad quadragesimum vel quinquagesimum ætatis annum producit: sed maximum occurrit discrimen inter utriusque statûs causas & stadia. Ad genuinam penis hæmorrhagiam proni sunt juvenes petulantiori veneri addicti; ganeones qui pessimo sanè consilio cantharidibus utuntur, ut ad venerem cieantur, & voluptatibus se immergant. Hoc periculum incurrunt admiffarii qui inter gonorrhœam virulentam lupanaria sectantur; quibus nonnunquam accidit ut lubricitate diffuentes, sanguinem, vice feminis, inter coitum fundant. Gravem incutit metum hæmorrhagia urethræ, præsertim si diutius proteletur: cum exhinc non solum emergat canalis exulceratio, sed etiam immineat tabes. Aliarum hæmorrhagiarum instar pertractari debet hic morbus, qui insuper injectiones è lacte saccharato, decocto hordæi, rosarum rubrarum, &c. paratas expostulat.

(8.) *Phlogosis testium & scroti*, de quâ jam per transfennam egimus, à laticis virulenti sub gonorrhœâ defluxu in has partes, ut plurimum promovetur. Sed aliam profapiam quandôque ducit, à lue scilicet venereâ, ab ictu, vehementi compressione, vel tralatitiâ cæterarum defluxionum causâ. Si à supressâ gonorrhœâ ortum mutuetur hic infarctus, hæc in integrum restitutâ, brevi evanescit tumor. De hæc morbi vulgatissimâ solutione haud dubitare licet; etsi quo ritu procedit haud in promptu sit exponere: nec tamen, gonorrhœâ nequaquam recurrente, domari recusat hic morbus, qui primam & postremam sedem habet in epididymide, quæ sæpius, fugato morbo, diu tumida & indolens perstat. Testium, eorumque involucrorum inflammatio resolutione plerumque solvitur: nonnunquam tamen purulentiam, ulcus fistulosum, skirrhum & gangrænam, hydrocelem, sarcocelem, &c. post se trahit. Si à testium contusione oriatur, vomitum ciet, convulsionem, aliaque graviora symptomata concitat: ubi à purulentiâ peritonæi foveretur, omnem curam respuit. Sub hæc rerum conditione gangrænâ sæpius absimitur scrotum; adeo ut testis quasi nudus appareat; sed stupendâ naturæ vi, intra breve tempus, progerminatur hoc involucrum, & contractius redintegratur.

Æquè ac cæteræ inflammationes, *vena sectiones* efflagitat horumce organorum infarctus. Depletis vasis & sedatâ phlogosi proficue adhibentur cathartica blandiora; præsertim si gonorrhœæ sufflaminatæ innitatur hæc intumescencia. Præsentaneam opem ferunt sub primis morbi temporibus cataplasmata ex emollientium & resolventium connubio parata, conferuntque maturantia, si incusetur causa externa. Inter resolventia plurimum decantatur, nec immerito, *terra cultrariorum*, è cote scilicet versatili decidua, oleo & aceto rosaceo subacta, & cataplasmatibus instar admoda. Nonnulli folia hyoscyami sub cineribus cocta suadent; sed haud citrà quoddam periculum parti ad siderationem proclivi topicum stupefaciens imponitur. Sed omnibus recensitis palmam sanè præripiunt inunctiones mercuriales in ipsomet scroto, vel partibus vicinioribus cautè

MORBI
GENITALIUM.

celebratæ, si luis venereæ sit particeps hæc intumescencia: harum vicēs explere valet suffitus è cinnabari. Admoveretur demùm emplastrum de Vigo, ad delendam reliquiam epididymidis protuberantiam. Ubi verò cuiusvis contusioni adscribitur hic humorum decubitus, faustè adhibentur emplastrum diabolitanum, de cicutâ, aliave id genus resolventia. Hæc dùm geruntur, minime prætermittenda enemata emollientia & anodyna, congrua victûs ratio, &c.

(9.) Ad *alias tumorum species* proclivia sunt prædicta organa, inter quos primum locum sanè sibi vindicat *hydrocele*, quæ tumor audit cysticus, vel, ut inquiunt, tunicatus, testibus, eorumque involucris accretus. Nullum sub exordio incommodum parit hic affectus, qui aliàs plerumque occultatur, adeò ut sæpiùs ab insciis ægrotantibus diù gestetur, donec adauctâ mole veniat in propatulum. Sub quo statu à cæteris tumoribus quâdam fluctuatione distinguitur hydrocele, quæ serum ut plurimum limpidum; sed nonnunquàm cruentum recondit. Alia observatur hydroceles species cui obnoxii sunt herniosi ascite laborantes; sedem habet hæc postrema in hoc peritonæi processu, qui intestinum vel epiploon extrâ abdomen recipit. Hinc patet quàm facilè sit inibi collectum laticem in abdominis cavum, vel levi adhibitâ pressione propellere; & hæcce nota prædicti tumoris characterem prodit, dummodò de herniâ & ascite constet; cùm idem accidat, uti jam annuimus, in herniâ vèsicæ; sed urina hâc pressione per urethram prosiliens utrumque statum ritè distinguit: de rarissimo scroti tumore à lotio, cui denegatur reditus ad vesicam, nil addimus. Superest demùm scroti tumor aquosus, cæteris vulgator ab infarctu scilicèt œdematoso, quem hydrocelem spuriam nonnulli vocitant: hydropem minatur, vel sequitur hæc tegumentorum sacciformium intumescencia, quæ ad penem, sæpiùs portentosum, propagatur, phimosisque vel paraphimosis, agris molestissimam, accersit.

Hydrocele legitima inter morbos pertinacissimos numeratur, præsertim si sit annosa: parùm enim proficiunt cathartica & diuretica, cæteris colluviei serosæ speciebus dicata: nec magis opitulantur topica discutientia & resolventia: utraque tamen cautè experiri nil vetat. Quibus nil juvantibus ab omni curatione abstinere præstat; donec tumorem majori incremento molestum agrè ferant ægrotantes. Tùm punctione ope instrumenti congrui & notissimi evacuatur folliculus; qui tamen successu temporis iterùm turget, & pristinam adipiscitur molem; cur fit ut identidem iterari debeat hæc operatio. Sub hâc rerum conditione unica patet medendi via; cystidis nempè extirpatio, periculosâ sectione celebratâ; vel ejus consumptio cathartecorum præsidio, inter quam tantis cruciatibus torquentur ægri, ut nonnulli in furorem rapiantur. Hinc patet utriusque methodi exitum in ancipiti versari; cur fit ut anxii hæreant solertiores, vel curæ pallia rivainherere malint.

Cùm *hydrocele spuria* cujuscumque hydropis symptoma audiat; haud diversam medelam internam, ac morbus primarius sibi vindicat. Proficuè
etiam

etiam adhibentur topica resolventia & roborantia; fofus nempè è vino aromatico, fpiritu vini, aquâ calcis, lixivio cineris farmentorum, abfinthii, &c. parati; necnon cataplafmata, è vino, eupatorio AVICENNÆ, agrimoniâ, &c. confecta. Pluris habetur fal marinum, priùs decrepitationi commiffum, facculo linteo reconditum; quod ubi quamdam humiditatem contraxit, renovari debet. In tantam quandôque affurgit molem fcrotum, non fecùs ac *penis œdematofus*, ut ad fcarificationes fit deveniendum, quorum ope brevi fubfidet pars affecta: fed hanc operationem nonnunquàm excipit gangræna, quæ fpiritus vini camphorati fofu tepido præcaveri vel fugari folet. Summas etiam laudes fub hoc infortunio meretur cataplasma è cortice peruviano paratum, jam multiplici experienciâ comprobatum. Setaceum poftremò per cutem in parte decliviori trajectum, hunc infarctum œdematofum tutiùs exhaurire potest; hinc minime mirum fi fcarificationibus periculofis, apud folertiores, anteponantur.

(10.) *Pneumatocele*, noftratibus (*hernie venteufe*), eft tumor flatulentus alterutrius fcroti lateris. Adultos rarò invadit hic affectus, infantibus familiariffimus. Peculiari pelluciditate ab hydrocele diftinguitur: hæc prætereà tardè progreditur; illa verò celerrimum incrementum fumat. Periculo planè vacat pneumatocele, & facilè ut plurimum curatur remediis difcutientibus & resolventibus; fofubus nempè ex ariftolochiâ, menthâ, falviâ, floribus chamæmeli, fambuci & vino paratis; vel cataplafmatibus è farinâ cumini, fecalinâ, &c. confectis; quibus addere licet aquam calcis, ftercus vaccinum, aliaque confimilia pro curantium lubitu eligenda. Si verò hisce præfidiis obfurdefcat tumor ad paracentefim devenire expedit: fed ut verum fatear, hâc operatione chirurgicâ rariffimè opus eft.

(11.) *Varicocele* vafis fpermaticis infidet, & fub confpectu tumoris, variis prominentiis varicofis, racematim quafi congestis, exasperati fe præbet; qui per prædictorum vafculorum tractum propagatur; adeò ut haud exigua ejus pars in abdominis cavo fæpiùs delitefcit; fub quo ftatu levis fanè emergit curationis fpes. Doloribus plerùmque ftipatur varicocele; nec rarò ad cancrum vergit; præfertim fi præpofterâ curatione impugnetur. Ad hanc morbi fpeciem proclives cenfentur qui omnem abdicant venærem: à quâvis etiam contufione contrahitur: fed fæpiùs à lue venereâ, fcorbuto, aliâve fanguinis labe profapiam ducit. Quod ad medelam attinet, omnem implent paginam diluentia, temperantia & aperientia blandiora: quibus præmiſſis ad afellos & martialia devenire licet. Quid valeant nafturtium, cochlearia, mercurialia, &c. fub viru fcorbutico, vel venereo, nemo non intelligit. Sunt prætereà qui partem affectam aquâ frigidâ fovere folent: alii fofus & cataplafmata adstringentia admoveri curant: fed futilia plerùmque funt hæc omnia interna vel externa remedia; adeò ut curationis fpes verferetur in folâ tumoris, & ipfufmet testis amputatione: quæ tamen operatio rarò fuccedit; imò & exitialis evadit, fi tumor partim in abdomine occultetur: fub quibus anguftiis ab omni curatione

MORBI
GENITALIUM.

abstinere consultius videtur. Affinem morbum concitat *semen retentum* ; quò turgent canales deferentes , non secùs ac vesiculæ seminales ; è quâ labe variè sæpiùs prodeunt morbi ; imò & epilepsia lethalis : nonnullos post petulantiozem veneris usum , castimoniz addictos , hoc fatum subiisse experièntiâ constat.

(12.) Superest ut ad finem properantes , de *Sarcocele* breviter agamus. Hoc nomen sortitur hæc protuberantia skirrhusa , non solum testibus , sed etiam eorum vasis & involucris incumbens. Non secùs ac varicocele , ab ictu , lapsu ab alto , aliâve contusione ortum mutuatur hic affectus ; qui aliàs luis venereæ , scorbuti , &c. particeps censetur. Pluriès ab imperitis vel sciolis Chirurgis pro herniâ habetur , maximo sanè ægrotantium damno ; cum scilicèt variis tentaminibus , in herniâ adhiberi solitis , proritetur & exacerbetur morbus. Ægrè etiam nonnunquam distinguitur ab hydrocele ; sed à benè perspecto tumoris ambitu eruitur utriusque morbi discrimen ; ut de fluctuatione quæ ad solam hydrocelem pertinet ; nil addam. Indolens plerùmque est sarcocèles exordium : sed ratione incrementi , tardè sanè progredientis , molesta evadit ; imò & cancri naturam nonnunquam induit hæc intumescencia , quæ sub primis incunabulis opportunè impugnari valet ; aliàs verò planè indomabilis censetur.

Ut nil omittatur eorum quæ *cura* profutura videntur ; præmissis generalibus ; nimirum venæ sectione , catharticis diluentibus & balneis : aperientium , sudorificorum , incidentium , aliorumve remediorum scrophulis dicatorum , vires explorare licet. Extùs admoventur resolutentia , emplastrum nempè saponaceum , de cicutâ , de ranis cum mercurio , inunctiones mercuriales , &c. Sed nil plerùmque conferunt hæc præsidia , nec major spes affulget ab extirpatione ; cùm feralem sæpiùs habeat exitum ; præsertim si de servando teste incolumi cogitetur ; quod nusquam perfici potest citrà molestissimam dissectionem , quæ graviora accersit symptomata ; convulsiones nempè lethales , & præcipuè hanc speciem , quæ apud Authores tetanos audit ; uti pluriès observasse memini. Nec minùs reformidanda tumoris absumptio ab admotis cathæreticis ; cùm inter horum actionem tantis cruciatibus torqueantur ægri , ut hisce ferendis planè impares , ad æthereas sedes convolent.



M O R B I A N I.

MORBI
ANI.

(I.) **P**RÆCIPUUM fanè in hâcce classe locum merentur *Hæmorrhoides*, quæ in venis cognominibus, è mesentericis, vel hypogastricis oriundis, tam internis, quàm externis sedem habent. *Hæmorrhoides tumida*, de quibus in præsentiarum, hæc audiunt tubercula varicosa, nunc solitaria, nunc stipato agmine anum obsidentia, cum minori vel majori doloris gradu; ac nonnunquàm inter alvum adstrictam furentia. Oculis visenda se præbent externa: in proptulū etiam quandòque veniunt, dūm egeritur, interna; vel opè explorantis digiti in anum adacti innotescunt. *Hæmorrhoides* nunc molles & rugosæ, ac crystarum instar propendentes se sistunt; aliàs tumentes, lividæ & nigricantes conspiciuntur. Diversa est earum moles; nunc enim pisi magnitudinem vix superant; aliàs ovi gallinacei amplitudinem nonnunquàm assequuntur. Quasi herpetis participes, pruritu molestæ sæpius evadunt; sed infidum est illud *signum*, eò quòd, uti jam inculcavimus, ascarides etiam respiciat. *Hæmorrhoidum* dolor pulsans, gravativus, lancinans, &c. ità sæpius exacerbatur, ut vix affari possit. Familiares censentur hæmorrhoides melancholicis; his præsertim qui crebras hæmorrhagias sub juvenili ætate patiebantur: has *promoveant* liberalior cupediarum, vel liquorum ardentium usus, equitatio diuturna, vita deses & umbratilis, balnea calida, graviditas, partus difficilis, alvus adstricta, aloëtica; solitorum fluxuum sanguineorum suppressio, dysenteria & tenesmus, &c.

Ne minimum quidem incommodum pariunt hæmorrhoides pannuceæ, quæ ut plurimum ab insciis gestantur. Parum præterea *molestæ evadunt tumida*; dummodò certis cancellis contineantur: sed acerbissimos inferunt cruciatus phlogosi correptæ, tantamque tyrannidem quandòque exercent, ut febrem vehementiorem, affectum iliacum, delirium, convulsiones, apoplexiam, &c. accersant; quibus truculentioribus symptomatibus ægrum in vitæ discrimen trahi, vel rudibus & inexpertis obvium fit. Alia ab hâcce inflammatione impendent *infortunia*, nempè purulentia; quæ sæpissimè in fistulam pertinacissimam facessit; vel infarctus skirrhus, qui haud rarò canceri naturam induit; ut de gangranâ sub hisce circumstantiis semper imminente nil addam. Pro comperto habemus, *anatomicâ autopsiâ* edocti, hæmorrhoidum, vel externarum, phlogosim & gangranam in intestina, mesenterium, aliave abdominis viscera sæpissimè propagari: quid tūm de eventu statui potest, nemo non intelligit.

Ubi phlogosi tentantur hæmorrhoides, vel plus æquo sæviunt, repetitis venæ sectionibus auspicanda est *curatio*. Nonnunquàm profuit in re urgentissimâ, sanguinem mittere ad animi deliquium. Opportunè præscribuntur *axantia* blandiora; oleum nempè amygdalarum dulcium, dilutum cas-

MORBI
ANI.

fiæ , &c. Intereâ largâ manu propinari debent diluentia , demulcentia & temperantia , videlicet serum lactis , aqua pulli , emulsiones , juscula refrigerantia cum cancris fluviatilibus , carne vitulinâ , &c. quibus præmissis , & sedatis symptomatibus , aperientia imò & incidentia in usum vocare licet ; nimirum martialia , athiopem mineralem , &c. Sed cautè diù & refractâ dosi exhiberi debent prædicta remedia. Sulphuris usus , tum internus , tum externus , plures sub hoc casu fausto beavit eventu. Furentibus doloribus inducias sanè impetrant narcotica interna ; sed summam noxam inferre queunt : quod sanè minime fugit solertiores clinicos , qui cum hisce medicaminibus cautè mercari solent. Hæc de remediis internis dicta sufficiant ; ad altera , in quorum congruâ administratione præcipuum versatur curationis momentum , devenimus.

Præsentaneam sæpiùs opem fert aqua tepida , vel decocti verbasci ; alteriusve herbæ emollientis vapor. Eundem effectum præstant *fotus* è lacte , decocto althææ , caricarum pinguium , &c. parati ; qui insuper injectionum materiam suppeditant. A nonnullis , penès quos sit fides , deprædicatur suffitus è pulvere scrophulariæ concitatus. Opportunè prætereâ admoventur *cataplasmata* emollientia , nimirum è micâ panis , è pulpâ pomorum , aliisque consimilibus confecta ; quæ excipere solent resolventia è floribus chamæmeli , sambuci , &c. deprompta. Nullum fortè euporistum præstantius excogitari potest vino tepido , quo crebrò foveri debet pars affecta. Suas laudes merentur linimenta demulcentia & anodyna , extrus imposita , vel in anum immissa ; qualia sunt oleum ovorum , vel lini , cremor vel butyrum lactis , unguentum populeum , nutritum , aliaque id fortis ; quibus pro re natâ immisceri queunt camphora , sal saturni , vel ipsummet opium. Summis laudibus extollitur aqua golardiana , vel pomatum saturni. Sed inter præstantiora resolventia & anodyna primatum sanè ducit unguentum Neapolitanum , quod omnium aliorum *topicorum* vires explere , multiplici experientiâ edocti , asserere minime dubitamus. Aliud etiam exquisitissimum topicum præbet malum citreum sub cineribus coctum , adversus hæmorrhoides tumentes & dolentes ; ejus nempe succo tepido pluriès per diem irrigatur pars affecta : molestissimum sanè est illud remedium ; sed majori sanè efficacîâ pollet. Nec desunt alia topica à quibusdam celebrata ; oleum nempe buxi , folia nicotianæ viridia & contusa , &c.

Ubi verò hæc omnia adminicula , tum interna , tum externa , morbi pertinaciam superare nequeunt ; ad aliam methodum se conferre expedit ; quæ in prædictorum tuberculorum depletionem versatur. In hunc finem admoventur *hirudines* , quarum suctu brevi marcescunt hæmorrhoides , & hinc compescuntur dolores. Sunt qui hoc opus celerius absolvere velint ope *phlebotomi* , ut ab inflicto vulnere sanguis stagnans illicò exitum sibi paret : quænam sit præstantior methodus , solertioribus examinandum relinquimus. Alia est , fortè tutior , medendi via ; nimirum *extirpatio* , quæ facillimè sanè quidem absolvitur , & faustè quotidie celebratur adversus hæmorrhoides numerosiores ; dummodò tamen una aut altera ad sentinam

hæmorrhoidalem fervetur ; aliàs haud leve periculum ægris impenderet. Maximi postremò est momenti inter curandas hæmorrhoides tumentes , quæcumque adhibeatur methodus , ut alvus fervetur libera , tam diætæ refrigerantis auxilio , quàm laxantium & enematum blandiorum opè : hæc enim posthabitâ cautelâ , futilem sæpiùs operam ludunt cætera præsidia.

(2.) *Profluvium hæmorrhoidale* , ut inchoatum ordinem prosequamur , sub quo venæ cognomines sanguinem sincerum eructant , salubre censerì debet , & nonnullis viris æquè necessarium , ac feminis menses , si periodicè recurrat , certisque cancellis contineatur , facilèque à quovis fluore cruento distinguatur : sed parcum & indefinente fluxu stillans , pro dysenteriâ scorbuticâ nonnunquàm habetur : sanguis tamen dysentericus semper dilutus , vel materiebus mucosis intimè mixtus se præbet , ac nusquàm nisi inter egerendum excernitur ; dùm cruor hæmorrhoidalis sincerus antè vel post scybala ejicitur. Fluxum etiam hepaticum nonnunquàm mentitur profluvium hæmorrhoidale ; sed solus dejectionum conspectus ab errore vindicat ; ut de cæteris signis , de quibus alibi , nil addam. *Immodicum* censetur profluvium hæmorrhoidale , si plus æquo proteletur , crebriùsque quàm par est recurrat ; vel demùm si sanguis pleno gurgite erumpat : nonnunquàm enim ad viginti vel triginta dies prorogatur ; aliàs bis , ter , quaterve per mensem se sistit : vel majus sit sanguinis dispendium singulis diebus ; ejus copiâ ad libram unam vel alteram nonnunquàm accedente : de quodam libras duas sanguinis per sex hebdomades dejiciente mentionem subjecit MONTANUS. Fluxum immodicum prænuntiant dolores gravativi in dorso vel circâ pelvim , tormina , æstus internus , febris , vertigines , crurum torpor , &c. Hunc excipiunt vires prostratæ , fœdus faciei pallor , cachexia , &c. Hæmorrhoidibus fluentibus obnoxii sunt temperie sanguineâ vel melancholicâ præditi , lautè victitantes , vitam inertem vel otiosam ducentes ; has *promovent* alvus plus æquo adstricta , equitatio diuturna , &c. Hæc morbosa corporis dispositio sæpiùs à parentibus in prolem transmittitur ; nec desunt infantes septem vel octo annorum qui hunc fluxum ad ultimam rerum lineam protrahendum jam patiuntur ; qui aliàs juvenibus parcit.

Salubrem esse fluxum hæmorrhoidalem certis terminis coërcitum , jam suprà notavimus : imò & nonnunquàm nil sanitati demere videtur hoc immane profluvium , quod ad uncias duas vel tres , quotiès alvus exoneratur , sine noxâ in nonnullis accedit. Imò & prostat historia cujusdam qui per quatuor annos libram circiter unam , singulis diebus , secundâ valetudine dejiciebat. Scitur insuper nonnullas occurrere mulieres , quæ brevi temporis spatio viginti circiter libras sanguinis per hæc vias amiserunt , incolumi sanitate : sed hæc à publico rerum ordine aliena , vel rarissima , censerì debent. *Periculo* enim minime vacat fluxus hæmorrhoidalis , tùm copiâ , tùm diuturnitate immodicus ; cùm sæpissimè vires exhauriat , febrem lentam accersat , tabem vel phthisim pulmonarem mineretur. Ab eâdem causâ etiam suboriuntur cachexia & hydrops ; non secùs ac hepatis ,

MORBI
ANI.

aliorumve viscerum abdominalium infarctus skirrhosus, aut altera vitia organica quæ exhibent *cadaverum sectiones*.

Aliarum hæmorrhagiarum instar *curatur fluxus hæmorrhoidalis nimius*; mittitur nempè sanguis è brachio: in usum vocantur refrigerantia & temperantia; prifana scilicèt nitrosa, lac vel serum lactis, emulsiones, cremores hordei, oryzæ, &c. A nonnullis, Veterum opinione fortè ductis, summè deprædicatur pimpinella: sed cæteris præsiidiis præstare videntur aquæ minerales acidulæ, vel martiales; variæque ferri præparaciones; quæ scilicèt cuncta permeando obstructions referant; adeò ut sanguis ex inferioribus, redux solitum alveum faciliùs petat. Haud nisi re urgentissimâ adhiberi debent adstringentia validiora, uti sanguis draconis, alumen, essentia Rabel, &c. Sed citrà periculum usurpari queunt prifana è consolidâ majore; succus urticæ, tinctura rosarum, catechu, &c.; angue pejus fugienda cathartica stimulantia & aciora; sed opportunè præscribuntur rheum, cassia & tamarindi. Conferunt inter paregorica crocus orientalis, camphora; & liquor anodynus mineralis; nec verantur cæteris consentientibus, urgentibus doloribus, diacodium, tinctura anodyna, aliave narcotica; sed cum cautelâ præscribi debent, ne, uti solent, foveant hæmorrhagiam. Suum etiam symbolum conferre valent externa; immersio nempè manuum in aquam tepidam, frictus in artubus superioribus celebrati, vincula in brachia injecta, &c.; haud nisi summâ cautelâ extùs admovere licet plantaginem, bursam pastoris, bistortam & malicorium sub decocti formâ; bolum armenam, sanguinem draconis, sarcocollam, aliave adstringentia; quæ nusquàm, nisi præsentì vitæ discrimine, ab artis proceribus usurpantur. Nonnullis demùm optimè cessit spongia spiritu vini, vel aceto calido imbuta, & ano admota.

(3.) Ex eo quòd *fluxus hæmorrhoidalis* periodicus & solitus sit salubris; sequitur periculosa esse alex *suppressionem*: imminet enim infarctus venæ portæ; è quo emergit hepatis, aliorumque viscerum, quibus prospiciunt prædicti vasis propagines, labes varia, quam patefaciunt *secta cadavera*, ex quibus deprehenduntur phlogosis, purulentia, infarctus & stases; omentum præsertim crassum, densum & tuberosum, ubique cum peritonæo connatum, nonnunquàm in se revolutum, & quasi cartilagineum; hepar, ventriculus & intestina inflammata; mesenterium infarctum vel purulentiam conspurcatum; pleura variis granulis exasperata, non secùs ac peritonæum; pulmones pleuræ accreti, tuberculosi, pure scatentes; hydrops demùm pectoris & abdominis, non secùs ac cerebri & medullæ spinalis. Ex eodem fonte prodeunt innumeri morbi, inter quos crebriùs occurrunt vertigines, apoplexia & paralyxis, asthma & catarrhus suffocans, affectus hypochondriacus, anxietates, nephritis, mictus cruentus; cachexia, hydrops, arthritis, &c. hinc patet quàm sit pertimescendum inhibitum illud consuetum vel annosum profluvium. Quod infortunium accersunt incondita victûs ratio, terror, frigus subitò contractum, præposterus adstringentium usus, intempestivæ venæ sectiones, &c. è qui-

bus causis evidentibus orta suppressio ægros in majus vitæ discrimen trahit. Minus verò ominosa censetur, si à peculiari humorum vel organorum constitutione pendeat; quæ scilicet haud reluctante naturâ, accidit.

E præhabitis facilè intelligitur cur *cûratio fluxûs hæmorrhoidalis* perennis circâ duntaxat *suppressionis* infortunium versetur: cum ab exsiccata hæc sentinâ, sanguis fœculentus excerni solitus, in vasa refluens omnium viscerum labem minetur; & hinc truculentiora promovere queat symptomata. Idèò nil non movendum ut revocetur, & in integrum restituatur coërcitus fluxus: quid valeat sub hoc rerum statu sanguinis missio è sapientiâ nemo non novit. Pluris intereà habentur temperantia & aperientia; fumaria nempe, lingua cervina, cichorium, &c. suas laudes merentur amara; non secus ac emmenagoga: conducunt demùm si nil obster cathartica, ex aloe & colocynthide præsertim petita. Remediis internis nil proficientibus, in subsidium vocanda externa; inter quæ summis præconiis jure celebrantur hirudines podici admotæ: nonnullis profunt cucurbitulæ: proficuè celebrantur frictus cum linteis asperis; ad huncce usum etiam inserviunt folia ficûs. Postremò opportunè injiciuntur enemata è colocynthide, aliisque acrioribus, parata: juvant suppositoria ex iisdem materiebus confecta; sed hæc omniâ, ut verum fatear, incassum usurpantur remedia, ni obsequiosa natura in suppetias veniat.

(4) Alterum laticem mucosum, subalbicantem vel flavescentem, haud rarò striis sanguineis remixtum eructant vasa hæmorrhoidalia, quem *hæmorrhoides albas* nonnulli vocitant; qui juxtâ aliàs *mucus* vel *sudor hæmorrhoidalis* audit. Nonnunquam cum hæmorrhoidibus legitimis, quas fortè supplet, alternare videtur hic fluxus; adeò ut quemdam esse consensum inter utrumque profluvium inferre liceat; ni potiùs fluoris albi muliebris indolem sapiat. Ichorosam naturam redolent, vel puris specie fallunt hæc sordes mucosæ, quæ nunc è vasis internis, nunc ex externis transudant: fluidiores videntur quæ è venis externis prodeunt; internæ verò, ob moram quam trahunt in intestino recto, spissiores observantur. Leve quândoque incommodum parit hic affectus, qui aliàs pruritus molestissimus, exulcerationes, phlogosim vel ipsammet fistulam ani post se trahit. Hanc excretionem antecedunt affectus torminosi, vel quædam alvi perturbatio, flatulentia, anxietas abdominalis, & quædam spastica recti contractio. Hunc concomitari solent quidam lumborum dolor gravativus, cum urinâ parciori & saturatori, torpor animi, crurum debilitas, pedumque refrigeratio; dejectiones frequentes, & tenesmus, vermium excretio, &c. Insuper sunt in quibusdam fissuræ & rhagades in ano, quas nonnunquam excipiunt ulcus & fistula, vel infarctus recti skirrhosus cum excrescentiis carnosus, haud rarò extrâ anum propendentibus: hæc exhibent eviscerata cadavera. Aliàs efflorescunt pustulæ miliares, serpiginis instar, summe pruriginosæ, &c. Per vices repetit, & hæmorrhoidales periodos plerumque servat hæc exsudatio; ad quam proni existimantur cachectici & melancholici, qui præcipuè legitimum fluxum experti sunt. Contrahitur

MORBI
ANI.

à vitâ inertî & otiosâ , à lautioribus dapibus , à vino & venere , ab incon-
sulto aloëticorum usu , &c. Non secus ac hæmorrhoidum fluxus vulga-
rior , salubris nonnunquam fit hic sudor hæmorrhoidalis , qui diù sæpius
protelatur ; nec rarò usque ad ultimum fatum. Hæmorrhoidum legitima-
rum , & fluoris albi instar , haud citrà periculum , posthabitis præmitten-
dis , cohibetur : hic enim humor sanguini remixtus summam in viscera
labem inferre , hydropem accersere , & arthriticos , nephriticosve insul-
tus promovere potest.

Tutò tamen impugnari potest sudor hæmorrhoidalis , dummodò ad
benè perspectam & trutinatam morbi causam *curandi judicium* dirigatur.
Proficua fore laxantia & cathartica mitiora , experientia testatur : sed de
stimulantium & hydragogorum efficacîâ , à nonnullis celebratâ , dubitare
licet. Egregiam opem præstat diuturnus diureticorum & diaphoreticorum
usus ; quorum scilicet præsidio materia quæcumque morbosa per renes
vel cutis spiracula è vasis sanguineis excutitur : nec minùs conferunt de-
purantia , quæ humorum dyscrasiam emendare queunt : utrorumque mu-
nia præstare videntur aquæ minerales , tum frigidæ , tum thermæles. His
præmissis ad martialia & tonica , diù & refractâ dosi exhibita , devenire
licet ; nec omittenda , per totum curationis curriculum , diluentia & lubri-
cantia è diætetico fonte perita. Suam etiam opem conferunt enemata emol-
lientia & demulcentia ; linimenta ex oleo ovorum , butyro , &c. parata ;
injectiones vel lotiones è decocto althææ , verbasci , aliorumve affinium
conciunatæ. Sunt postremò qui inulto circà vicinia cauterio hanc exuda-
tionem exhaurire tentant ; sed hanc sentinam molestius ferre solent ægri
quàm ipsummet morbum ; hinc paucis artidet hæc medendi methodus.

(5.) *Tubercula anum infestantia* pro peculiari quam referunt facie ,
vel curantium lubitu diversa sortiuntur nomina : ex hoc fonte prodeunt
verruca , *mariscæ* , *condylomata* , *ficus* , &c. Sed notare expedit quòd hæc
cujusvis sortis tubercula sæpius mentiantur hæmorrhoides rugosæ , quibus
sæpius decipiuntur incauti vel imperiti. Nullo plerumque dolore sti-
pantur hæc sarcofes ; sed quandoque phlogosi corripuntur ; quæ molestissi-
mæ evadunt ; imò & canceri speciem referunt. Non solum extus protube-
rant hæc tubercula callosa ; sed haud rarò intrà rectum reconduntur ,
atque hunc tubum tanto agmine obsident , ut liberum facum exitum præ-
pediant , ut docent *cadavera*. Ad has exiguas prominentias proni viden-
tur melancholici & scorbutici , quæ aliàs inter luis venereæ symptomata
recensentur. Mariscæ numerosissimæ podicem cynædorum infestant ; è ne-
fando scilicet & præpostero concubitu. Insuper hæc cujusvis sortis tuber-
cula sæpius concomitantur rhagades , quæ simili causæ adscribi solent.

Parum profunt unguenta exsiccantia adversus prædictas sarcofes adhi-
beri solita. Nec magis conducit linimentum ex aceto & cinere sarmento-
rum confectum ; etsi à pluribus decantatur. Solâ sanè *extirpatione* doman-
tur hæc tubercula. Hæc est clava herculeæ , quâ averruncari patiuntur ;
ad quòd opus adhibentur ferrum & ligatura , dummodò in apicem ve-
niat

niat morbus : haud defunt qui hunc cathartecis aggredi velint , sed hic curandi ritus longior & molestior jure censetur . Parum tamen aut nil proficiunt prædicta auxilia , ni debitâ remedium internorum administratione sanguinis & humorum dyscrasie prospiciatur . Nec alia patet curandi via erga tubercula intrâ tubum intestinale recondita , quæ haud citrà periculum cathartecis , viciniora exquisitissimo sensu prædita laceffentibus impugnari queunt , nec ferro ob situm abscindi patiuntur : ita enim sæpius occultantur , ut explorantes digitos fugiant ; nedum in conspectum veniant , adeò ut meris duntaxat conjecturis hæc sæpius assequi licet .

(6.) A prægressis phlogosi & purulentia ani emergere *fistulam* nemo nescit . Haud omnes tamen podicis abscessus in fistulam facessunt , cum aliorum instar nonnunquam curentur : præsertim si brevi erumpant , dolore & febre stipentur , ac veniant in propatulum : sed ubi tardè & tacitè progrediuntur , dolore scilicet obscuro , adeò ut materia purulenta , diutius quam par est inibi moram trahens foveas & cuniculos sibi cudat , haud declinatur fistula : imò & usus invaluit apud Chirurgos ut hoc nomine insigniatur abscessus hujusce notæ nondum apertus , ob labem quam jam vicinioribus partibus intulit , qui scilicet solitam curationem respuit ; eò quodd tortuosorum sinuum fundum attingere nusquam liceat : cur fit ut tabum inibi aggestum , ob defectum declivitatis , solitis injectionibus everri minime patiatur , & altius sensim penetret . Notare expedit fistulam ani à genuinâ vel legitimâ phlegmone profapiam ducentem , profundiores cuniculos dextrâ , lavâque excavare , & majus hinc curantibus facessere negotium . Quæ verò ab hæmorrhoidibus inflammatis oritur intrâ intestini recti tunicas ut plurimum coercetur , & facilius evinci solet .

Fistula ani recentis curatio simplicioribus plerumque peragitur , vel spontaneo naturæ molimine absolvitur ; nec defunt exempla hujusce fausti exitûs : sed chronica , profunda , & callosa omnibus remediis obsurdescit , solâque *sectione* domatur ; dummodò tamen minime foveatur à carie vertebrarum lumbarium , imò & dorsaliûm ; uti patet ex autopsiâ anatomicâ . Cæterum ulcus ani fistulosum luis venereæ particeps specificis nonnunquam cedit ; quibus si reluctetur , ejus cura chirurgica facilius evadit . *Fistula* annosa , non secus ac ulcera , sentinam nonnunquam salubrem præbent , quam citrà ingens periculum nusquam exhaurire licet . Plures enim occurrunt senes , qui illius præsidio vegetâ fruuntur sanitate , quâ deficiente res est periculosa aleæ ; imò & mors præ foribus imminet ; uti observavi paucis ab hinc annis in homine quinquaginta annos circiter nato ; cujus fistula vetus , ad quam secandam sese accingebant Chirurgi , subito exaruit , & ostium ita ferruminatum fuit , ut vix perciperetur cicatrix : interea ita benè se habebat æger per duos aut tres menses ab illo , uti autumabat , felici eventu superstes , ut de medicaminibus prophylacticis parum curaret : inter quam securitatem vires subito deficiunt , & quasi fulmine percussus repentinâ morte abripitur , cujus sectum cadaver colluviem ferosam , tam in cerebro , quam in medullâ spinali patefecit .

MORBI
ANI.

(7.) Superest ut de *ani procidentia* (*chûte de boyau*) breviter dicamus. Prolapsus intestinum quandôque spontè retrocedit; sed secùs evenit si ad certam longitudinem propendeat. Hæc enim procidentia à geminato tubo producta ad quinque vel sex pollices sæpiùs accedit; rarò ulteriùs, ad unum scilicèt vel alterum pedem gallicum, & ultrà, ut nonnulli tradunt, elongatur. Huic morbo obnoxios esse infantes haud fugit mulierculas: sed hunc accersunt in quâvis ætate tenesmus & diarrhœa; non secùs ac alvus plus æquo adstricta, clamores, ac inter mingendum, egerendum vel parturiendum molimina. Promovetur insuper ab hæmorrhoidibus, ascaridibus, calculo vesicæ, prægressâ lithotomiâ, &c. Hisce causis innixus ani prolapsus in pristinum situm facilè restituitur; sed si partium atoniam, vel paralysem agnoscat, in senio confectis, vel dysentericiâ chronicâ laborantibus, nullam fermè curam admittit. Notare expedit intestini partem à situ dimotam humorum decubitu nonnunquam intumescere, & non rarò in skirrhum vergere; cur sit ut in pristinum situm ægrè restituantur. Inflammatione etiam & gangtânâ in quibusdam corripitur propendens intestinum; sub quo statu haud cunctanter amputari debet pars affecta; quod facillimè & citrà magnùm discrimen absolvitur. Expedite tamen in nonnullis reponitur intestinum foràs prolapsus; sed illud in nativâ sede cohibere, hoc opus, hic labor est: parantur in hunc scopum foci adstringentes cum catechu, acaciâ, gallâ, cortice granatorum, &c. coctis in vino austero, vel aquâ aluminosâ, quibus imbuuntur lintea & spongiæ, podici admovenda, congruâque fascinatione coërcenda. Futilia sunt adstringentia interna, quæ aliàs alvum comprimendo, vel egerendi conatus ingravescendo, noxam inferre queunt. De *rhagadibus* ani nil addimus, cum haud aliam expostulent medelam ac fissuræ genitalium, de quibus suprâ.



MORBI ARTUUM.

DOLORES extremorum, qui claudicationem post se trahunt, arthriticos nempe, rheumaticos, venereos, scorbuticos, &c. de quibus alibi, consultò prætermittimus: nec tremori, convulsionibus & paralyfi, cerebri morborum ordinem subeuntibus inhærebimus. Luxationes, fracturas, &c. ad morbos ossium ablegamus: similique ratione tumores scrophulosos, ganglia, elephantiasim, &c. prætereunda censemus. De morbo coxari infantes præcipuè respiciente, suo loco. Haud desunt tamen quamplures affectus hoc capitulo comprehendendi; nimirum *perennis artuum contractio*, eorundem peculiaris *atrophia*, *tumor œdematosus*, leucophlegmatix minime particeps; *tumores albi*, ossium connexionibus insidentes, *paronychia*, *perniones*; hæc crurum pustulæ quæ *roseolæ saltantes* vocitantur,

clavi pedum, dolor ischiadicus, crurum stupor spasmodicus, infortunia à venæ sectione; extremorum distorsio, ac demùm *pedum fætor*: de quibus sigillatim, suo ordine, breviter differere consultiùs fore judicavimus.

(1.) Per se patet *contractio artuum chronica*, quæ vulgò *contractura* audit; atque non à musculorum convulsione; sed ab horumce organorum peculiari exsiccatione, vel emaciatione, suam sortitur originem. Flexores & extensores musculi hoc morbo æquè corripiuntur; sed flectentes antagonistarum vim superant; adeò ut utrorumque artuum digiti semper incurvi & adunci se præbeant, nec latet anatomicos hujusce phænomeni ratio. Hunc affectum cuivis obvium promovere solent spasmodici insultus crebriùs recurrentes, paralytis annosa, dolores chronici, rheumatici vel arthritici, ambustiones & vulnera, venenati halitus è fodinis, specubus, aliisve locis subterraneis erumpentes, diathesis scorbutica, colica spasmodica, &c. Facile evincitur hic morbus incipiens; sed planè immedicabilis censetur adultus vel inveteratus. Itaque præmissis generalibus, propinantur diluentia & demulcentia, inter quæ primum locum obtinent lacticia; dein profunt diaphoretica blandiora; suas laudes etiam merentur depurantia & antiscorbutica; sed hisce omnibus palmam præripiunt, experientiâ teste, aquæ minerales, quæ, intimiores vasorum contractorum recessus adeundo, liberum sanguinis circulum restituant, fibrisque corrugatis flexilitatem conciliant.

Præcipuus tamen *curationis* cardo, primarii morbi habitâ ratione, in opportuno emollientium externorum usu versatur. Varia in hunc scopum parantur linimenta, ex oleo lumbricorum, chamæmeli vel laurino, ex axungia humanâ, gallinæ, ursi, &c. ex unguento de althæâ, aliisque innumeris similis efficaciam. Obvolvitur etiam pars affecta pelle calidâ vervecis, vituli, alteriusve pecudis recens mactati, vel immittitur in imum ventrem bovis vitali calore haud defraudati. Insuper proficue immergitur membrum contractum in decoctum emolliens, sanguinem cujuscumque animalis tepidum, jusculum omasorum, lac excalesfactum, &c. sed nil fortè efficacius reperitur quàm irrigatio ab alto ex aquis Plumberianis, Granensibus, Montis Aurei, Borboniensibus Anselmiansibus, Diniansibus, cæterisque thermalibus, quæ etiam vapores & balnea efficacissima præbent. Nonnulli lutum aquarum Amandinarum, aliarumque mineralium, tum nativarum, tum artificialium deprædicant. Præclara munia ob-eunt aqua Golardiana, & pomatum saturni. Maximi demùm est momenti inter prædictorum topicorum usum, ut pars contracta sensim porrigatur, vel cautè moveatur, ac contrà frigus externum probè muniatur.

(2.) *Atrophia* vel *aridura artuum* è peculiari nervorum, vel medullæ spinalis vitio, post obitum duntaxat detegendo, plerùmque pender; quæ aliàs à causâ evidente promovetur; à tumore scilicet premente nervos extrà cerebri & medullæ thecam sitos, partem affectam irradiantes; à luxatione eundem effectum exerente, &c. Sensu & motu sæpiùs orbatur pars macie confecta; è quâ etiam haud rarò erumpunt phlyctænæ quæ

MORBI
ARTUUM.

imminentem gangrænam denuntiant. Si causæ internæ innitatur hic affectus, omnem plerumque curantium industriam superat; sed domari patitur, si evidentem agnoscat causam, quam scilicet impugnare licet. Nec verantur tamen sub primo casu tentamina, quæ nonnunquam, ancillante fortunâ, faustum habent exitum. Itaque præmissis generalibus, si opus sit, in usum trahuntur diluentia & demulcentia, temperantia & aperientia mitiora: explorari etiam solent diaphoretica nonnunquam proficua. Quibus incassum adhibitis ad aquas minerales frigidas vel thermales, pro re natâ feligendas devenire expedit, quæ scilicet cætera remedia interna cujuscunque sortis longè antecellunt. Nec inutilem opem præstant emollientia externa, balnea scilicet è jusculo omaforum, è decocto malvæ, althææ, verbasci, alteriusque herbæ emollientis, parata; inunctiones cum oleo lumbricorum vel chamæmeli, cum unguento rosaceo, de althæâ, &c. celebrata: sed cæteris præstare videntur irrigationes ab alto ex aquis thermalibus nativis vel artificialibus. Parùm postremò proficiunt cucurbitulæ siccæ, quæ sub hâc rerum conditione à nonnullis proponuntur.

(3.) *Tumor crurum œdematosus*, qui rariùs brachia etiam invadit; haud semper à cachexiâ & hydrope pendet: nemo enim nescit huic obnoxios esse prægnantes, nonnullos asthmaticos, &c. Promoverur præterea à mensium vel hæmorrhoidum suppressione; non secùs ac à quâvis hæmorrhagiâ immodicâ, ab erysipelate, à vinculis, vel ipsismet periscelidibus plus æquo constrictis, aliâve quâcumque causâ venas comprimente. Diutius quàm par est etiam stando, ambulando & equitando contrahitur hoc crurum œdema; quod denique accersunt morbi chronici, sub quibus tamen pro hydropis prænuntio haberi solet. Manè evanescit recens & levis hic affectus, qui aliàs nullum incommodum parit: sed gravis & diuturnus torporem artubus infligit; horumque motum nonnunquam præpedit. Ubi in immensum crescit hic infarctus; tegumenta haud amplius obsequiosa dilacerantur, variisque rimis hiant, è quibus proficue nonnunquam stillat serum: sub quo eventu brevi detumescit pars; sed tùm cave gangrænam: quod infortunium minantur dolores profundiores & acutissimi. Facile evincitur crurum infarctus œdematosus, si à causâ externâ & fugaci, à virium defectu vel recenti humorum labe profapiam ducat: ubi verò ab intempestivè sôpitâ febre quartanâ sobolescit, solo febris reditu profligatur. Sed omnibus remediis obsurdescit, si à quodam morbo chronico immedicabili foveatur.

Non secùs ac cachexia & hydrops, habitâ tamen ratione causæ, pertractari solet œdema crurum; hinc crambem reperitam minime apponemus: sed sæpiùs solis *remediis externis* peragitur, vel absolvitur hæc medela, ni spontaneis naturæ viribus committatur. Inter topica egregiam opem ferunt fots è decocto eupatorii, tanaceti, florum sambuci & baccharum juniperi; ex aquâ calcis & lixivio cinerum sarmentorum; ex aquâ aluminosâ, vel fabricæ ferrariæ, &c. parati. Nonnullis prodest vapor spiritûs vini dēflagrantis: aliis confert cataplasma è fimo columbino.

fale & aceto conflatum. Suas etiam laudes merentur folia ebuli cum spiritu vini contusa & cataplasmatibus instar admota. Pars insuper affecta proficue immergitur in cineres calidos: haud improbantur lateres calefacti plantis pedum impositi: opportunè quandòque celebrantur frictus cum linteis calidis; sed cavendum ne efflorescentiam erysipelaceam accersant. Haud inutilem postremò opem ludunt ergà morbum levem & recentem tibialia è pelle caninâ confecta, vel fasciatio cautè injecta, quæ scilicet cruribus ab omni infarctu liberis manè admota recurrentem intumescientiam præcavere queunt: sed haud omnibus congruunt hæc repellentia; nunquàm aliàs adhibenda extrà usum diureticorum & hydragogorum, quæ devium ferunt ad renes vel sentinam intestinalem amandare queunt: aliàs imminet penis, & scroti tumor œdematosus, vel colluvies serosa in pectoris & abdominis cavo, quod pluriès accidisse norunt practici. Nonnunquàm, ultimò, faustè succedunt in casu urgentiori scarificationes, quæ cæteròquin gangrænam inferre queunt.

(4.) In obscuris latet *Tumoris albi* artus, ac præsertim gēua & cubitos obsidentis genuina indoles. Virus scrophulosum sæpiùs redolet hæc protuberantia, etsi haud rarò à contusione, aliàve causâ externâ, paritur. Diversa est ejus moles, quæ sæpiùs ità in immensum crescit ut atrophiam partìs inferioris accersat. Sub exordio indolens, successu temporis molestus evadit tumor albus; imò & à sævientibus doloribus sæpissimè movetur febris lenta, quam brevi excipit marasmus. Hæc tamen tumoris species mollis, & cuti concolor, nullo plerumque æstu, nec dolore stipatur; adeò ut ossium connexionem in plerisque obvolvens, œdematis faciem præ se ferat, vel ejus naturam redoleat; cur sit ut nonnulli pro quâdam hydropis specie illam habuerint: sed refragatur *sectio anatomica*, quæ exhibet materiam quamdam gelatinosam à synoviâ prognatam, ac fibrarum contextui impactam vel congestam, nunc in capsulas ligamentosas, nunc extrà hæc involucra: farcoses fungosas diversæ sortis, vel glandulosas concretiones, materiam quamdam adiposam, vasa lymphatica conspicua cum hydatidibus, &c. E quibus perspicuum manet tumorem album magis ad skirrhi, quàm ad œdematis naturam accedere; vel potiùs neutrius esse participem.

E præhabitis jure colligitur *solutu difficillimam esse hanc tumoris speciem*, præsertim si quicumque latex, uti sæpissimè accidit, in capsularibus connexionum ligamenti stagnet. Præterea ad purulentiam sæpissimè vergunt tumores albi, atque à disrupto abscessu suboritur fœdissimum ulcus fistulosum, quod scilicet ligamentorum putrescentiam, vel ossium cariem post se trahit, & laticem quemdam limpidum & albuginosum, nil ab artuum synoviâ discrepantem, unà cum ichore fundit. Cur minime mirum si hæc exhaustâ arefiant ligamenta, rigiditatem contrahant artus, & omni motu orbetur pars. Hic morbus contumacissimus, vel Medicorum & Chirurgorum artes eludere solitus, nonnunquàm tamen remediis, tum externis, tum internis obtemperat, dummodò illibata sint ossa & ligamenta, & in simplici humorum decubitu versetur. Ubi verò altas egit radices, oleum & operam perdunt ad hanc curationem sese accingentes.

MORBI
ARTUUM.

Hinc intelligitur cur *interna cura* inhærentibus grave incumbat munus ; cum sæpius etiã exhaustâ remediorum farragine , haud hilum proficiant ; adeò ut ægri moræ impatientes , vel diuturniori curatione pertæsi omnibus remediis valedicere cogantur. Usitatiora , è cathartico , diuretico , aperientium & incidentium classibus depromuntur ; quibus addere licet depurantia & sudorifica : ab hisce auxiliis , quantumque sint horum vires , nil promovetur , ni in subsidium veniant *topica* , quæ sanæ hîc efficaciora censeferi debent : hæc audiunt roborantia & resolventia ; fots nempè aromatici spiritu vini tartarifato , aliove liquore ardente acuti , vel alumine & vitriolo imprægnati. Faustè etiã in eundem usum adhibentur acetum , bolus armena , myrrha , mastiche , &c. Nonnunquàm prodest sub primis morbi incunabulis compressio à congruâ fasciatione peracta. Conducunt eodem tempore frictus cum linteis calidis celebrati , suffitus à karabe vel olibano , irrigationes ab alto cum aquâ simplicissimâ , vel quâcumque minerali ; nonnullis demùm profuit præcept aquæ lapsus moletrinarum , quem etiã quosdam podagricos fausto beasse eventu per transfennam notare expedit. Haud defunt ultimò qui inunctiones mercuriales in parte affectâ celebratas deprædicant , quas sanè quidem sub quibusdam circumstantiis proficuas esse ; sed haud omnibus congruere , experienciâ constat.

Ubi verò incassum hæc omnia cujusvis fortis adhibentur præsidia , ad aliam *methodum* merè nempè *Chirurgicam* se conferre expedit ; quæ versatur circà sectionem , vel causticorum administrationem , ut postea notissimis adminiculis ad suppurationem cogatur patens tumor : sed peritum artificem exoptulat uterque medendi ritus , ne scilicet ladanur tendines & ligamenta ; dein inflictum vulnus tralatitiâ arte pertractatur ; topicis nempè digestivis , detergentibus & catharteticis : inter unguenta , magis sub hisce circumstantiis comprobata , primum locum obtinent basilicum , ægyptiacum , &c. Laticem quemdam albuginosum , vel synoviae artuum æmulum suppeditare prædictum ulcus jam supra notavimus : hinc consultum videtur ut diutiùs protrahatur hæc curatio , ne intempestivâ ulceris ferruminatione , nondum exhaustus morbi fomes inibi incarceretur , & æger recidivæ periculum incurrat ; quo infortunio plures plecti neminem sanè praxi edoctum latet. Ad tumorem album proximè accedit *tumor flatulentus artuum* , genua præsertim obsidens , de quo RIVERIUS & ZACUTUS LUSITANUS. Mollis & fluctuans , ac cuti concolor observatur hæc prominentia , nonnunquàm pulsans & claudicationem sæpiùs post se trahens ; adeò ut de quodam humore hûc collecto tum cogitetur ; nec nisi post sectionem quâ flatus erumpit , in apricum veniat hujusce morbi character ; quo apprinè noto intelligitur curandi processus.

(5.) *Paronychia* , (vernaculè *panaris* , ou *mal d'aventure*) hæc est phlogosis digitorum manûs , rarissimè pedis , extremum apicem obsidens , quæ calore deurenti , & atrociori dolore , plerumque stipatur. Nunc mitis & fugax , singulosque digitos haud rarò pervadens ; nunc deterrimus , & parti primò affectæ pertinaciter hærens : hinc ratione sedis , minùs magisve pro-

fundæ, diversos, ut inquiunt, malignitatis gradus præbet, peculiaremque induit characterem. Facillimè à paronychiâ unguem circumambiente distinguuntur tumores phlogodei & scrophulosi digitorum ob aliam scilicèt quam obtinent sedem. Per totum brachium sæpiùs propagantur paronychiæ dolores, quod ab eâdem causâ haud rarò etiam tumet, vel tabum ad volam manuum per vaginas tendineas pervadens, summam inibi perniciem edit. Levis hic morbus, vel tegumentis coërcitus facillimè sanatur; sed secùs se res habet si profundas radices egerit; adoritur nempè tendines, ligamenta, periosteum, vel ipsamet ossa: sub quo rerum statu de dolore urente & lancinante sævissimo conqueruntur ægri: nec ex alio fonte prodeunt febris vehemens, vigiliæ pertinacissimæ, lipothymia, delirium, convulsiones, &c. Utriusque notæ paronychia ad suppuratum vergit; sed gangrænam & ossium cariem minatur, si sit mali moris: hæc impendent infortunia, si dolorum sævitiei haud consonet partis intumescencia. Sapissimè promovetur utriusque partis paronychia à puncturâ, contusione, immersione manûs in aquam frigidam, &c. quæ aliàs à plus æquo æstuante, vel exuberante sanguine nonnunquàm progerminatur.

Paronychiæ levis *curatio* simplicioribus maturantibus peragitur, cataplasmate scilicèt è micâ panis, vel caricâ pingui, lacte, si lubeat, muliebri madidâ. Ubi in suppuratum abiit, incunctanter incidi debet, ut puri sternatur via: quo evacuato, unguento fusco, vel basilico, brevi absolvitur medela. Sed grave curantibus facessit negotium *paronychia mali moris*, quâ incipiente pluriès tundenda est vena, inter usum diluentium & demulcentium: nec vetantur sævientibus doloribus narcotica, cautè tamen exhibenda. Intereà danda est opera, ut congruis topicis promoveatur purulentia: ad hoc opus usurpantur maturantia suprà laudata; cataplasma scilicèt è micâ panis, unguentum fuscum, diachylon cum gummis, & id genus alia vulgatiore. Pure confecto, quantocyùs aperiri debet abscessus, ne pûs suâ morâ subjacentes partes lædat: nec inter sectionem partibus mollibus parcendum, si labes ossa attigerit: imò & nonnunquàm expedit ut una aut altera phalanx vel digitus amputetur, ne totum brachium labefactetur & æger in vitæ discrimen trahatur. Dein pertractatur vulnus cum balsamo Arcæi, unguento de styrace, tincturâ myrrhæ & aloës, aliisque selectioribus antiputridis. In usum etiam vocantur, pro rerum statu, exsiccantia & cathæretica: oleum nempè guaiaci, alumen ustum, euphorbium, aliaque in ulcerum fordidorum curâ adhiberi solita.

Paronychiis obnoxii, propriâ experientiâ edocti, hunc morbum in ipsis incunabulis præfocare solent, digitum per vices immittendo in aquam ferventem; hæc enim brevissima & pluriès repetita immersio ineuntem morbum sistere, ejusque progressum præpedire solet. Aliud est *prophylacticum*, haud minori, me iudicè, efficaciam præditum, quod meticulosius magis arridet; nempè lixivium calidum è cineribus sarmentorum paratum, in quo diutiùs, vel per plures horas detinetur digitus. In eundem etiam usum trahuntur spiritus vini, decoctum chamædryos è lacte, &c.

MORBI
ARTUUM.

quæ omnia vi resolvente pollent, dummodò sub primâ morbi invasione admoveantur, quæ aliàs, inter scilicèt puris confectionem, noxia evaderent. Haud absimili ratione præcaveri vel impugnari potest paronychia pedum; morbus cæteróquin rarissimus; sed periculosioris est aleæ, cum rarò sospitentur digiti affecti phalanges.

(6.) *Perniones*, (*mules*, ou *engelûres*) infantibus & juvenibus, præfertim sequioris sexûs, familiares, non solum pedes & manus, sed etiam nasum, aures, &c. obsident. Colore subcæruleo, vel pruritû molestissimo à cæteris distinguitur hic tumor phlegmonodeus, latus & sessilis, qui in suppuratum nusquam abit. Sed variis fissuris nonnunquam hiat in totidem ulcera facessentibus, quæ pravum sæpiùs characterem induunt; horum enim lividæ & tumentes oræ, sanies fœtida quâ conspurcantur, phlyctenæ ex horum ambitu erumpentes, haud levem gangrænæ, ossiumque cariei metum incutiunt. Nusquam ferè hyemali tempestate domari patiuntur perniones, quæ grato veris reditu spontè evanescent, initio subsequenti hyemis reversuræ. Harum reditum nonnulli præcavere solent antè hyemis adventum, pluriès immergendo partem affici solitam in sanguinem bovillum calidum; alii in eundem scopum adhibent lotiones, vel irrigationes ex aquis thermalibus sulphureis: nec desunt qui morbi jam contracti incrementum eluctantur; qui scilicèt imminentes à suscepto intensiori frigore perniones prævertere solent frictu partis cum nive celebrato; vel repetitis lotionibus cum aquâ frigidissimâ; vel in hanc immersionibus. Minimè despiciendum est illud præsidium, quod aliàs, uti suprà innuimus, gangrænæ etiam ab eâdem causâ genitæ obviam it.

Sed ubi adolevit hic morbus, præcluduntur, inter frigus hyemale, omnes ferè medendi viæ: hinc curæ merè palliativæ tum inhærendum. Egregiam in hunc finem opem præstant topica demulcentia, oleum nempè olivarum, vel amygdalarum dulcium, medullæ & axungie officinales, spermaceti, cerata vulgatiora & simpliciora, &c. Haud exiguam insuper laudem merentur resolventia diversæ sortis; suffitus nimirum è seminibus hyoscyami paratus, vapor aceti; lotiones ex urinâ tepidâ, vino calido, aquâ vitæ, vel spiritu vini; quibus addere licet camphoram, theriacam, &c. irrigationes ex spiritu salis, vel solutione aluminis, pernionibus duntaxat integris dicatæ. Proficue cæterum celebrantur inunctiones cum balsamo copahu, petroleo, oleo terebinthinæ, &c. Nonnullis demùm confert emplastrum saponaceum; aliudve similis efficaciz. De ulcere, gangrænâ & carie nil addimus, cum suam vulgatissimam curam expostulent; nec de variâ humorum labe quæ hunc morbum fovet & exasperant.

(7.) Quædam è cruribus erumpunt *pustulæ phlogodæ*, fabæ magnitudinem ferè æquantes, à tuberculis venereis & epinyctidibus vix ratione formæ absimiles; de quibus AURELIUS SEVERINUS primus, ni fallor, mentionem subjecit sub titulo *roseolarum saltantium*; nomine ducto ab areolâ intensè rubrâ, & à molestissimo pruritu qui ægros ad inconditas crurum motiones cogit, adeò ut saltare videantur. Juvenes utriusque sexûs
invadere

invadere solent roseolæ saltantes, quæ plerumque resolutione, ope simplicissimorum topicorum ad hunc usum comparatorum, vel spontaneis naturæ viribus, judicantur, ni intempestivâ curatione in ulcuscula pertinacissima facebant: adeò ut vix curam medicam exposculent prædicta tubercula, ni de præcavendo horum frequentiori reditu cogitetur, ad quod opus, congruâ compositâ victûs ratione, & præmissis generalibus, in opportunum usum vocantur refrigerantia, temperantia, depurantia, aliaque notissima præsidia morbis cutaneis dicata.

(8.) Nemo non novit *clavos pedum* (*les cors*); nec latet tubercula hæc callosa, periosteo plerumque incumbentia, à diuturnâ compressione suboriri, eorumque dolores ab eâdem causâ foveri; quibus occurritur angustiorum calceorum fatuam venustatem deponendo: vel clavus cerâ molli, aut quovis emplastro muniatur; retinent enim prædictæ materies impressum clavi vestigium, & ideò eum ab omni attritu tuentur. Præterea cautè secatur quidquid prominet, vel unguibus evellitur. Huic extractioni favent emollientia priùs admota; cataplasmata scilicet & emplastra hisce viribus pollentia, non secùs ac frustum carnis bubulæ, folia sedi majoris & telephii; vel immersio in aquam tepidam, quæ cæteris præstare videtur. Quibus præmissis facillimè averruncatur & aufertur nucleus callosus. Sunt qui clavorum resolutionem tentant ope pediluvii cum lixivio cinerum sarmentorum parati: quidam allium, emplastrum è gummi ammoniaco, de Vigo, &c. ad hoc opus adhibent. Inter præstantiora resolventia laudatur cortex nucis acajou, qui acrior & quasi causticus viciniore partes sæpiùs laceffit, phlogosimque & purulentiam promovet; cur sit ut hoc topicum averterentur haud inferioris notæ practici: quod tamen summâ cum cautelâ, & præmissis emollientibus, experiri licet, cum sæpiùs faustè successisse pro comperto habeamus.

(9.) *Ischias*, nostratibus (*la sciatique*) quam antecedere solent partis stupor & formicatio, à materiâ rheumaticâ vel arthriticâ, profapiam ducere solet. Neminem enim fugit arctam esse inter utrosque morbos affinitatem. Lumbos in plerisque primò adoriuntur dolores ischiadici, non secùs ac in verâ lumbagine, à quâ parùm aut nihil discrepat, è quibus ad latus cruris externum se spargunt, & huic defiguntur, ad tibiam imò & pedem nonnunquam propagandi: hinc colligitur fasciam latam, vel hunc latissimum processum aponeuroticum hæce partes peragrantem genuinam esse morbi sedem. Hic morbus, etsi pertinacissimus, & nonnunquam acerbissimus, febris ut plurimum expers occurrit, ac periculo vacat. Ab annofo tamen, vel senescente, debiliior fit pars affecta, hinc claudicationem post se trahit: nec rarò crus marcescit & contrahitur. In nonnullis erumpit tumor in hâc vel illâ cruris parte, & pus conficitur, quo scalpelli ope opportunè evacuato, morbus præter expectationem sensim evanescit: dummodò tamen putredine minime inquinetur femoris connexio. Ischiadem promovere solent fluxûs hæmorrhoidalis suppressio: huic obnoxii sunt melancholici, ærumnosi, amoris æstu perciti, ac severiori-

MORBI
ARTUUM.

bus meditationibus intenti; non secùs ac scorbutici, arthritici, calculosi, &c. A causâ demùm externâ & fugaci nonnunquàm contrahitur; à frigore nempè, dùm pars æstuabat, suscepto, ab immersione in aquam frigidam, à nisu violento, contusione, &c.

Curandi methodus, rheumatismo & arthritidi dicata, etiam adhiberi solet, servatis servandis, adversùs ischiadem. Ideò nonnullis confert sapphenæ sectio; eundem effectum præstare valent hirudines podici admotæ: sed nil magis proficuum censeretur quàm largus diluentium, demulcentium & temperantium potus. Quibus præmissis, nonnunquàm opitulantur diaphoretica; etsi inter horum actionem sapiùs recrudescunt dolores. Intereà alvus servanda est libera, tùm laxantium, tùm enematum emollientium beneficio. Cautè præscribi debent hypnotica quæ inducias impetrando morbi pertinaciam augment. Opportunè præscribuntur, procedente morbo, pilulæ saponaceæ vulgatiores, vel *Starkei*; flores sulphuris cum lacte, & spiritus terebinthinæ cum melle, quæ omnia sub hocce casu inter præstantiora resolventia interna numerantur. Insuper pars affecta probè contrà frigus muniat, nec quieti tradatur; quemcumque dolorem inter illam movendam experiantur ægri. Suum etiam symbolum conferunt remedia externa; frictus nempè cum panno laneo calido; linimenta emollientia, resolventia & anodyna omnibus notissima; cataplasma è radice bryoniæ & oleo lini paratum; suffitus resolventes, balneum vaporis, irrigationes ab alto cum aquis thermalibus, &c. Plures postremò fausto bearunt eventu vesicatoria, & series septem vel octo cucurbitularum; aut setaceum per cutem inferioris femoris trajectum: nec despiciendum ipsummet cauterium actuale, ferro candente, vel moxæ conflagratione inustum, à Veteribus haud immeritò deprædicatum, ab ipsomet BOERHAAVIO plurimùm decantatum, non secùs ac ab omnibus ferè recentioribus plus æquo meticulosus; quod sanè cæteris quibuscumque remediis palmam fortè præripit.

(10.) Vix inter morbos numeratur hic molestus & *spasticus*, sed fugax, *crurum stupor*, qui vernaculè dicitur (*la crampe*) cujus genuina indoles in obscuris latet. Tam vehemens sub hoc statu nonnunquàm exsurgit dolor, ut huic diutiùs ferendo impares essent ægri. Nunc spasmi, nunc stuporis participem esse hanc molestam sensationem quæ decumbentes, & in pravo situ sedentes afficit, conicere licet: merè spasmodicam esse noctu in lecto invadentem asserere minime dubitamus; sub altero casu à solâ nervorum compressione ob pravam situm suboriri evidens est; hinc torporis naturam redolet, etsi vehementi dolore stipatur. Primæ speciei medentur frictus & deambulatio; alteri occurritur solâ sitûs mutatione. Sed distinguendus est hic crurum torpor spasticus, à dolore illo *acutissimo*, & fugaci, suras præsertim invadente, quem, inter peculiarem artuum extensionem, patiuntur lecto decumbentes, quæ fortè ad *distorsionem* proximè accedit, cum à levi musculorum tendinumve è suâ sede depulsione pendere videatur, cui obviam itur admotam manum juxtâ musculorum longitudinem blandè mo-

vendo, quæ operatio ab ægris peragenda, anatomîâ instructis celerius absolvitur.

(11.) *Infortunia à venæ sectione*, ad quæ devenimus, circà *arteriæ*, *aponeuroseos*, *tendinis* & *nervi* fauciationem versantur, quæ graviora, uti neminem latet, post se trahit symptomata. Alii prætereà occurrunt affectus qui etiam à sectâ venâ suboriuntur; *ecchymosis* nempe, *thrombus* & *tumores lymphatici*, à quibus exordium capiemus. Sanguis contextum cutis cellulosum subiens *ecchymosim* præbet; qui latex, si tumorem concitet, *thrombum* gignit: ab eâdem fermè causâ promoventur *tumores lymphatici*. Haud periculo vacat quæcumque stasis sanguinis intrâ contextum partium, cum ad phlogosim haud rarò vergat, quam excipit purulentia; ac nonnunquam gangræna. Nil verò pertimescendum à tumore lymphatico, qui plerumque spontè evanescit. Resolventibus spirituosus plerumque cedunt prædicti alterutrius fortis tumores, hinc faustè admoveri solent splenia aquâ vitæ, vulnerariâ, Hungariæ, &c. imbutâ: suam etiam opem præstat sal contusum & sacculo madido inclusum, ut sileamus de innumeris aliis topicis, quæ pro curantium lubitu seligi queunt; quibus tamen supersedere expedit, ubi quædam se sistunt purulentix indicia; sub quibus conditionibus proficuè adhibentur emplastrum diachylon, unguentum fuscum, &c. Si demùm pars livorem contrahat & quemdam gangrænæ metum incutiat, ad scarificationes nullâ morâ devenire expedit. Reliquum verò curæ probâ digestivorum & antisepticorum vulgatiorem, sub formâ fortis vel cataplasmatidis, administratione absolvendum.

De *sectâ arteriâ inter phlebotomiam* haud dubitandum, si sanguis cum impetu & subsultum profiliat; sed ægrè innotescit, nullo erumpente cruore, unius vel alterius arteriæ involucri vulnus, è quo prodit aliquantò post *aneurisma*, de quo alibi; quod prævertere solent Chirurghi parti læsæ admovendo globulum papyri masticati, debitâ fasciatione cohibitum, vel quamvis aliam compressionem adhibendo. Ubi verò secta est arteria, haud cohibendus est sanguis liberè fluens; imò cæteris consentientibus mittendus est ad animi deliquium; postea methodo suprà traditâ comprimenda est arteria. Si verò ægrè fluens cruor partium ambientium contextum subeat, illicò sisti debet simili adhibitâ pressione: quibus absolutis, vena alterius brachii statim tundenda. Facile uno verbo despectitur imminens aneurismatis periculum, si Chirurgus mente constet, cum neminem fermè lateat quid opus sit factu in hoc præcipiti medelæ tempore.

Haud minùs ominosa censetur *punctura aponeuroseos vel tendinis*, quæ se prodit à quodam renixu, quem inter venæ sectionem experiuntur Chirurghi, & dolore acutissimo, qui plerumque hanc infausam vulnerationem presso pede sequitur. Nonnulli tamen haud nisi paucis elapsis horis de hoc dolore conqueruntur, qui per totum brachium usque ad axillas vulgò propagatur. Interea exsurgit è parte læsâ intumescencia phlogodea molestissima, rigore & febre stipata, ac nonnunquam convulsiones, aliaque sæviora symptomata promovens. Ad purulentiam vergit hic phlogodeus humorum

MORBI
ARTUUM.

decubitus : abscessus & ulcus indè prodeuntia nil præter pus saniosum vel ichorosum præbent ; fœdissimamque putredinem brevi contrahunt : nec rarò imminet gangræna quæ medentibus grave facessit negotium , ægrumque in vitæ discrimen trahit.

Numerosis venæ sectionibus haud incunctanter celebratis auspicari debet *curatio* , inter quas largâ manu propinanda veniunt diluentia , demulcentia & anodyna , totiès decantata : sed præcipuus medelæ cardo in congruâ topicorum administratione versatur. Primò scilicet , & nullâ morâ , priusquàm nimirum tumeat pars læsa , admoveantur topica resolventia , inter quæ usitatiora audiunt oxycratum , albumen ovi , bolus armena , &c. Parte verò jam protuberante , alia est ineunda medendi via , nimirum adhibentur foris & cataplasinata emollientia , resolventia & anodyna : ubi verò annotantur purulentia indicia , in usum trahi debent cataplasmata è lacte & micâ panis confecta , è radicibus liliorum parata , &c. Sed quantocyùs aperiri debet abscessus , ne diutiùs quàm par est stagnans tabum viciniora lædat. Insuper inter exquisitiora topica *adversùs tendinis vel aponeuroseos sauciationem* phlebotomo factam recensentur balsamum peruvianum , terebinthina , spiritus vini , balsamum Fioraventi , aqua Reginae Hungariæ , aliaque consimilia , quorum nonnullæ guttæ in primum & alterum vulnus instillantur. Varia demùm digestiva & exsiccantia ; unguentum nempè fuscum , diapompholygos , de cerusâ , &c inter hanc medelam opportunè pro re natâ adhiberi queunt.

Superest ut de *nervi puncturâ* , nil plerùmque mali portendente , breviter agamus. Hoc periculum incurrit furculus nerveus cutaneus , quem comitem habet vena brachii magis conspicua , dextrâ lavâque , suprâ vel infrâ , situm ; adeò ut de illo aufugiendo nulla tradi possit norma , & fortuitò phlebotomi cuspidi se objiciat. Nil metuendum , si transversim secetur hæc exilis & cutanea nervorum brachialium propago , levissimumque , si quemdam torporem excipias , emergit incommodum : sed aliter se res habet à vulnerato hocce funiculo : dolores enim hinc exsurgunt , qui ad carpum vel extremum digitum auricularem propagantur , & nonnunquàm ità sæviunt , ut totum brachium intumescat , febris incandescat , aliaque exordiantur graviora symptomata , quæ integrâ nervi sectione brevi compescantur : quam brevissimam medendi methodum norunt solertiores Chirurghi. Aliàs partem læsam oleo amygdalarum dulcium , vel lumbricorum , inter frictum , inungere solent. Alii aquam vitæ , balsamum Commendatoris , Fioraventi , alterumve topium spirituosum admovent : sed , ut verum fatear , plerosque fugit ge-
c uinamorbi causa.

(12.). Suboritur *pedis distorsio* , (vernaculè *entorse* ,) à violentâ tendinum vel ligamentorum distractione vel elongatione , quæ tanto quandoque fit imperu , ut quamdam dilacerationem patiantur involucria membranacea , & à situ dimoveantur tum tendines , tum ipsamet ossa , quæ postrema spontaneo ligamentorum nisu in pristinam sedem restitui solent ;

aliàs emergit mera luxatio, de quâ infrâ. Sed hùc coincidit *offis sesamoides* pollicis pedis *luxatio*, ab eâdem causâ contracta, quæ atrociora nonnunquàm promovet symptomata, rarò absque pollicis amputatione sedanda. Immanem dolorem comitem habet pedis distorsio, quem brevi sequitur intumescencia phlogodea tarsum circumambiens, quæ impedit quominùs tactu deprehendatur genuina morbi causa. Ad purulentiam nonnunquàm venit hic humorum decubitus, ni opportunè ipsi occurratur: ex eodem fonte prodit ulcus fistulosum, ob manantem synoviam pertinacissimum, ligamentorumque putredinem, ossium cariem, vel ankylosim, febrem lentam & marasimum post se trahens. Vulgatissimam *sedem* habet distorsio in connexione pedis; sed haud immunes censerì debent carpus & cubitus. Non solùm à lapsu ab alto vel ictu, sed etiam à pravo quodam situ inter ambulandum vel saltandum promovetur vulgarissima distorsio.

Nullâ morâ, vel priusquàm ingruat intumescencia, immergi debet *pars affecta in aquam frigidam*: nix verò, glacies, albumen ovi, oxycratum, succus limonum, alumen, aliaque *repercutientia* parem opem præstare queunt; sed ipsis jure præfertur euporistum, ubique obvium. Hæc tamen singula tempestivè admoveri debent, ne noxia evadant, & morbum contumaciorem reddant: elapso quidem opportuno tempore, vel vigente inflammatione, in usum vocanda veniunt roborantia & resolventia, rosæ nempè rubræ in vino generoso coctæ; vel vinum rubrum simplicissimum; aqua sale culinari saturata; decoctum aqueum florum sambuci, foliorum absinthii, vel baccarum juniperi; aqua vitæ cum balsamo peruviano immixta, spiritus vini camphoratus, &c. quandòque etiàm pro re natâ adhibere licet emollientia, digestiva & anodyna, &c. Sed sæpiùs accidit ut pertinacior intumescencia hisce remediis haud morem gerat; tùm ad irrigationem ab alto cum aquis Plumberianis, Viciensibus, Vervonensibus, Baregiensibus, aliisque thermalibus devenire expedit. Sunt qui sub hâc rerum conditione partem affectam in ventrem bovis recens mactati, haud infelici successu, immittunt; quod pluriès iterari debet. De venæ sectione, laxantibus temperantibus, aliisque remediis generalibus, quæ pro variis circumstantiis, sub hoc casu adhiberi queunt, nil addimus.

(13.) *Sudor pedum*, præter fœtorem, omnibus sanè invisum, nullum incommodum parit; cur sit ut solâ munditiæ huic sit prospiciendum: nec citrà periculum imminuatur hæc assueta corporis conditio. Hinc vè illis qui se curandos tradunt quibusdam ineptis & Balatronibus, qui *adstringentibus topicis* hanc saluberrimam excretionem sufflaminare tentant, immersione scilicèt pedum in decoctum adstringens vel aluminosum, aut partem inspergendo pulvere quocumque absorbente vel styptico: è quorum *præposterâ administratione* innumeri prodire queunt graviores morbi, vertigines scilicèt labem cerebri minantes, suffocatio, tussis, cardialgia, viscerum

infarctus, dolores tùm interni, tùm externi, &c. quibus nonnullos ægros in vitæ discrimine versari, neminem fermè clinicum fugit. Quod præfens periculum avertitur, si eò collimetur ut consueta excretio incunctanter revocetur, & in integrum restituatur. Hanc opem ferunt pediluvia calida, vapor aquæ ferventis, suffitus, &c. Quibus nil proficientibus, ad sinapismos & vesicatoria confugere expedit, ut de venæ sectionibus, catharticis, aliisque evacuantibus, pro re natâ usurpari solitis, fileamus.



MORBI OSSIUM.

(1.) **D**E luxationibus & fracturis, atque ossium distorsionibus, breviter sanè & quasi per transfennam agemus, ne falcem nostram in alienam messem immittere videamur. Quomodò à situ dimoveantur vel frangantur ossa nemini haud obvium; nec latet Anatomicos quid sub utroque casu opus sit factu. Rarissimè occurrunt capitis vertebrarum, & coccygis luxationes: sed frequentius à genuinâ sede recedunt maxilla inferior, claviculæ, humerus, radius & cubitus, carpus & tarsus, &c. Ab ictu, casu ab alto, nisu violento vel convulsionum impetu, abduci vel frangi queunt ossa; sed aliis causis submittuntur luxationes, relaxationi scilicèt ligamentorum, majori synoviae proventui in foveam articulare, ossium intumescentiæ, &c. Facile restituuntur ossa à quâvis causâ externâ dimota: sed ægrè reponuntur, difficiliusque continentur, si incusetur quoddam vitium organicum, præsertim sub cachexiâ scorburicâ & paralyfi. *Coxa è suo acetabulo depulsa* nullâ ferè ad sedem dirigi, inibique retineri potest: sed rariùs quàm vulgò fertur occurrit hæc luxatio: frequentiores verò & curatu etiàm difficillimæ censerì debent cervicis coxæ fractura, & epiphyseos ab ejusdem ossis capite divulsio, quæ semper ab imperitis Chirurgis pro luxatione habentur, ut pluriès pro comperto habui inter *secanda cadavera*. Grave fa-cessit negotium tarsus è sede depulsus: luxatio denique vertebrarum pro lethali habetur. Singulis patent ossium distorsiones, tibias præsertim respicientes, quæ diversimodè incurvantur & inflectuntur; vel à naturali situ recedunt; quod vitium præsiidiis merè mechanicis submittitur: scitur hoc deturpatos *compernes* vocitari; aliàs valgos, varos, &c.

Eò collimandum non solùm ut ossa luxata & fracta ad genuinam vel pristinam sedem dirigantur, sed etiam ut inibi detineantur: ut scilicèt distracta ligamenta nativam sub luxatione firmitatem adipiscantur, vel commissi ossium fines in fracturâ, accedente callo, coëant: hoc est præcipuum & difficilius curationis momentum. Insuper prospiciendum contusioni, vulneri, phlogosi, doloribus & gangrænæ, non secùs ac febri, convulsionibus, &c. quæ luxationes & fracturas concomitari solent. Ad pri-

stinam fedem depulsa ossa congruâ fasciatione coërceri debent : à laxiori enim deligatione alterius lapsûs impendit periculum : si arctiûs quàm par est constringatur pars læsa , imminet infarctus œdematosus vel phlogodeus ; imò & gangræna alterutrum excipere potest. Nonnullam opem conferunt sub utroque casu topica adstringentia & roborantia : sed ossium coalescentia , vel agglutinatio , solis naturæ viribus perficitur ; & ideò hoc unum duntaxat Chirurgis incumbit munus , ut scilicet laqueis cantè injectis , alteram partium dimotionem præpediant , donec firmiora ligamenta vel agglutinata ossa , ab omni recidivæ metu vindicent : scire enim expedit quòd brevi restituuntur minorum ossium ligamenta : sed tardiùs pristinum statum recuperant ligamenta ossium crassiorum : ac pari fermè ratione intrà quindecim circiter dies coalescunt minora ossa ; dùm crassiorum ferruminatio haud antè quadragesimum diem , imò & tardiùs absolvitur.

(2.) *Ankylosis* audit hic ossium invicem occurrentium coalitus , quo motu planè orbantur. Ubi verò quemdam motum vel obscurum servant artus , sola ligamentorum exarescentia vel rigiditas incusari debet , perperamque ad ankylosim refertur hic status : quapropter expedit ut ritè distinguatur uterque affectus , quem promovere solent contusiones , luxationes , fracturæ & distorsiones. Hunc etiam pariunt ossium intumescencia , vel caries , puris stagnatio , ligamentorum labes , synoviæ defectus , vel morbosa conditio , &c. Ad ankylosim proni censentur scorbutici , quorum præsertim artus quemdam inter motionem strepitum edunt ; non secùs ac scrophulosi , syphilitici & arthritici. Si à ligamentorum vel synoviæ labe , alterove connexionum vitio ortum trahat affectus articularis , ægrè expugnari patitur ; curationis tamen spes elucescit : ubi verò absolutâ ferruminatione coalescunt ossa , nulla patet medendi via : sed in ancipiti sæpiùs versatur genuina hujusce morbi indoles.

Quamdam ligamentis rigidioribus flexilitatem conciliare valent *emollientia* , fofus nempè & cataplasmata hisce viribus pollentia & vulgatiore , linimenta è medullis & axungiis parata , balnea cujusvis fortis , irrigationes ab alto cum aquis thermalibus , vel aquâ fale marino aut ammoniaco imprægnatâ , &c. quæ sanè egregiam opem præstant sub spuria ankylosi : sed incassum hæc omnia adhibentur topica adversùs jam adultam ossium ferruminationem. De incipiente verò haud planè desperandum ; sub quâ inunctionum mercurialium , emplastrorum de Vigo , de sapone , diabolani , &c. vires explorare nil vetat. Si verò irrita fuerint hæc tentamina , nil superest præter amputationem ; sed paucis arridet hæc medendi ratio , cùm remedium ipsomet morbo deterius videatur. Ankylosim postremò tùm legitimam , tùm spuriam , imminente prævertere valet cautela & diuturna partis motio , quâ non solum impeditur ossium coalitus , sed etiam levigantur asperi horum fines , & ligamentorum arefcentiæ prospicitur.

(3.) *Exostosis* vocitatur quævis ossium protuberantia morbosa , diverso

MORBI
OSSIIUM.

densitatis gradu ; exostoses enim familiariores duritiem ossium sanorum contrahunt ; aliæ verò molles & tactu cedentes observantur : *gummata* audiunt hæ postremæ è gangliis primâ fronte vix discrepantes , quæ è cranio & crassioribus ossibus erumpentes , pro luis venereæ symptomate habentur. Alia est species medium , ratione duritiei , inter utrumque locum obtinens , quæ virûs venerei etiam soboles *nodus* vocitatur. Sed inter exostoses minime recenseri debent topi arthritici , calli præminentie post ossium fractorum ferruminationem , nec ossificationes tendinum sub senio familiares. Quamdam ossium majorum partem occupant exostoses ; sed in minoribus integrum os afficitur & intumescit , uti crebrò in manibus & pedibus annotatur. Præterea hæc tumoris species nunc est indolens , nunc doloribus , vel etiam febre lenrà stipatur : quod discrimen à peculiari partis fabricâ , vel à causæ internæ indole erui debet. Exostoses enim aliæ sunt benignæ , & nulla post se trahunt symptomata ; aliæ verò malignæ audiunt ; & à diathesi cancrôsâ , scrophulosâ , scorbuticâ & syphiliticâ oriuntur ; inter quas recenseri debet spina ventosa , de quâ infra : nonnunquam sunt variolarum reliquie ; ut de exostosi rhachiticâ sileamus. Obscura plerumque sunt exostosum rudimenta , & tardè fiunt harum progressus : haud defunt tamen quæ intrâ exiguum temporis spatium in conspectum veniunt , & brevi stupendum incrementum sumunt : sed recondita sæpius & intricatissima est harum natura , quæ sæpius hæc non nisi sectione cadaverum in propatulo se sistit. Nonnullarum contextus , uti jam innuimus , à nativâ ossium fabricâ vix discrepat. Quædam crustâ , nuclei instar , densissimâ & durissimâ obductæ se præbent : aliæ cariosæ recondunt substantiam mollem & carnosam , materiam quamdam albugineam vel gelatinosam , laticem purulentum sincerum , sed sæpius saniosum & foetidissimum , &c.

Per totum vitæ curriculum gestantur nonnullæ exostoses : aliæ resolutione *judicantur* , aut purulentia & carie conficiuntur. Si opportunis remediis cedat hæc protuberantia , nil *metuendum* ; sed ubi spontè evanescit , res periculosa est aleæ. Tumoris involucra rubedinem phlogodeam contrahentia , doloresque sævissimi & profundi , purulentie notas præbent : sub quâ rerum conditione mollior cum nonnullâ fluctuatione evadit exostosis , & carie exeditur. Ab omni curatione abstinere præstat , si exostosis congenita , vel à causâ externâ prognata , nullum pariat incommodum , nec partem conspicuam foedit. *Remediis* verò *specificis* submittitur à causâ internâ sobolescens ; quibus si indolens obsurdescat , naturæ etiam committi debet ; alia tentanda est resolutio *topicis* ad hunc usum comparatis , emplastro nempe diaborano , de cicutâ , de Vigo , &c. Egregiam sub hoc scopo opem fert irrigatio ab alto cum aquis thermalibus , eodem tempore etiam propinandis. Hisce auxiliis incassum adhibitis , ad artem Chirurgicam confugere licet , quæ in tumoris sectione , vel cathartecorum administratione versatur : sed periculo nusquam vacare alterutram methodum experiëntiâ constat.

(4.) Caries ,

(4.) *Caries*, vel ulcus ossium, sub duplici conspectu se præbet: nunc scilicet *sicca*, nunc *humida* occurrit; prima, quæ præsertim respicit ossa detecta, vel periosteo denudata; hinc aëris vel puris contactui subjecta, ossis colore subflavescente, fusco vel nigro innotescit; & tùm pro quâdam gangrænæ specie haberi potest; cùm, non secus ac carnes sideratæ, spontaneo naturæ motu à sanis dissociantur; pari ratione, ossium lamellæ, etsi nativum contextum præ se ferant, ab illæso & subjacente corpore ut plurimum disjunguntur. *Exfoliationis* nomine venit hæc separatio, quæ brevi absolvitur in pueris & juvenibus, tardiùsque procedit in ætate proVectâ: imò & quandoque evenit ut ossa denudata hanc minime subeant. Nullis cancellis continetur exfoliatio, quâ non solum lamellæ ossæ adimuntur, sed etiam præcipua majorum ossium pars è suâ sede depellitur; quod sæpissimè observatur in tibiâ, cujus potior pars à binis extremis secedit. Hinc obvium fit exfoliationem, cariem duntaxat siccam respicere. Caries enim humida ab illâ multùm abludit; non solum enim genuini ulceris instar contextum ossis edit, sed etiam carnes fungosas procreat, faniemque foetidissimam præbet.

A causâ internâ nonnunquàm sobolescit *caries humida*, à labe scilicet venereâ, scrophulosâ, &c. Hanc promovent medullæ purulentia, exostosis, &c. exemplo sit *spina ventosa*, de quâ infrâ. Inter causas externas utriusque speciei numerantur contusiones, fracturæ, aneurismata, variique alii tumores; sed frequentius suboritur ab ulcere mali moris. Os hâc labe contaminari conjicere licet, si sanie oleosâ, subnigricante & sordidâ madeant ulcera; si ex osse erumpant carnes fungosæ, pallidæ & indolentes. Hanc produnt asperitates stylo, vel explorante digito, detegendæ. Ubi verò econtrâ succrescentes carnes, densæ, granulosa & sensu præditæ observantur, de laeso osse nulla movetur suspicio: hoc præcipuè minantur infortunium ulcera oris, narium, commissuræ palpebrarum & artuum. Opportunis remediis facilè cedit caries recens; sed vix curationem admittit annosa: haud periculi expers censetur à causâ externâ sobolescens; sed internam agnoscens, majorem jure terrorem incutit.

Sub *carie sicca*, spontaneâ naturæ vi plerumque peragitur exfoliatio: aliàs in subsidium venit *ars Chirurgica*, quâ scilicet, instrumentis ad hoc opus comparatis, quidquid carie tactum everritur: nec minùs congruit hæc *medendi ratio cariei humide*; atque sub utrâque eò præcipuè collimandum, ut ab stagnante sanie haud ulteriùs confodiantur ossa; quod frequentiori ulceris abstersione facilè præcavetur. Varia insuper admoventur medicamina, tam ad promovendam exfoliationem, quàm ad cariem coercendam: leviori congruunt spiritus vini, aqua Regina Hungariæ, aliufve liquor spirituosus. Sed si profundior sit caries, ritè confosso, uti jam inculcavimus, vel deraeso osse, opportunè adhibentur pulvis aristolochiæ, vel ireos florentinæ, myrrha & aloës, euphorbium, oleum cinnamomi, caryophyllorum & guaiaci, quæ scilicet non solum ulteriorem cariei progressum impediunt, sed etiam exfoliationi favent. Alia sunt

MORBI
OSSIUM.

præsidia, præsertim adversus cariem humidam efficaciora, quæ pravæ carni generationi officere, & quidquid labefactatum occurrit absumere queunt. Id genus sunt oleum camphoræ, spiritus nitri, aqua phagædenica, &c. quibus demùm nil juvantibus, ad cauteriũ actuale, osse priùs ritè derafo, confugere expedit. Sed minime reticendum, haud citrà periculum adhoveri ferrum candens cranio, sterno, costis, aliisque ossibus spongiosis; nec minùs reformidandum, si proxima occurrant ligamenta, tendines, nervi, &c. quorum ambustio periculosissima evadit.

Neminem latet carnes optimæ notæ ex ossis superficie prodire, & pravæ fortis esse ex ore ulceris erumpentes: cur ex accurato ulceris conspectu dilucidè patet quid sit sperandum, vel *metuendum* à quâvis inchoatâ methodo: sed nullâ arte domari patitur caries quæ ulcus cancrosum concomitatur; sub quo rerum statu, omni curationis spe ablatâ, ad partis *amputationem*, quasi ad sacram anchoram confugere expedit. Nec desunt aliæ caries à sanguinis & humorum labe prognatæ, quæ illud extremum remedium etiam efflagitant; ni fovens causa specificis præsidiis eradiceretur: crebrò enim se objiciunt ulcera carie stipata, quæ à viru venereo, scorbutico, scrophuloso, &c. suboriuntur, & idè suâ duntaxat methodo subigi queunt, incidentium scilicèt, mercurialium, antimonialium, sudorificorum, antiscorbuticorum usum respiciente. Aliàs inertia esse cætera præsidia; nec profuturam ipsammet partis amputationem nemini haud obvium.

(5.) Ad *Spinam ventosam* devenimus, quæ pro genuino ossis cancro, à lue venereâ ut plurimùm oriundo, nonnulli habent. *Innotescit* hic dirus morbus protuberantiâ quâdam, propè ossium connexionem sita, dolore acutissimo, tactu exacerbando stipata; etsi cutis sub primis temporibus à nativo colore minime recedat. Hoc morbo procedente in consensum trahuntur & tument circumambientes partes; atque hæce prominentia flarulenta apparet. Sub hâc rerum conditione, dolor in angustissimo spatio, vel in quodam puncto coercetur, quasi periosteum ab spinâ pungeretur; undè nomen latino-barbarum sortitur hic affectus. Causæ, uti jam innuimus, internæ submissa spina ventosa tantam sævitiem exercet, ut hinc truculentiora sæpiùs promoveantur symptomata; ni tempestivè & incunctanter ipsi occurratur; quæ aliàs inter morbos *pertinaciores* recensetur; imò & nonnunquàm planè immedicabilis evadit. Ossa pedum vel manuum spongiosa plerùmque obsidet: rariùs verò connexiones cubiti, genu, & maxillæ inferioris afficit. Nulli ætati parcit hic affectus; sed pueros, juvenes, & præsertim rhachiticos, frequentius invadit: huic demùm obnoxii jure censentur scrophulosi, scorbutici, syphilitici, &c.

Ex arte chirurgicâ depromitur præcipua *spina ventosa curatio*: aperitur nempe tumor, sectionem ad ipsummet os dirigendo; adè ut in apricum veniat caries, solitis præsidiis impugnanda: dein vulnus vulgatiore mendendi methodo submittitur. Intereà haud omittuntur *remedia interna*; profunt nempe cathartica sæpiùs repetita; proficuè adhibentur mercurialia;

egregiam opem præstant antimonium , guaiacum , sassafras , aliaque sudorifica , incidentia & depurantia suprâ laudata. Corticis peruviani usum , tùm internum , tùm externum , summis laudibus extollit clar. DE HAEN , de praxi Medicâ benè meritus ; de cujus remedii viribus nonnulli tamen dubitant. Faustè nonnunquàm adhibentur inunctiones , vel suffitus mercuriales ; ac nonnullis arridet emplastrum de Vigo. Sed inter hæc præsidia interna vel externa inutilem sæpiùs operam navant medentes ; adeò ut unica in partis amputatione supersit spes : quæ tamen operatio nusquàm faustè succedit , si sanguis & humores à suâ naturâ desciscant ; vel horum dyscrasiæ haud priùs prospectum fuerit. De *ossium mollitie* , morbo rarissimo & intricatissimo , Arabibus noto , & fortè scorbuti , vel luis venereæ sobole , etsi utriusque morbi specificis minime cedit , nil addimus ; cùm aliàs in ejus curatione omnes hæctenùs cæcutierint. *Ossium* postremò *strepitum* , adversùs quem laudatur usus medullæ ossium pro alimento , inter symptomata scorbutica jure recensendum , consultò etiam prætermittimus.

MORBI
OSSIUM.



S E C T I O I V .

D E M O R B I S C U T I S .

S U D O R I S V I T I A .

INTRICATISSIMA prostat apud Authores morborum cutaneorum historia; eò quòd quisque pro lubitu finxit nomina; & varii affectus ab invicem discrepantes sub eodem titulo comprehenduntur; dùm unus & idem morbus, sub absimili facie se præbens, variam sortitur *nomenclaturam*: adeò ut exhinc emergat doctrina, quæ animum scientiæ avidum minime explet. Itaque missis quisquiliis quibus scatent libri, selectiora duntaxat ex eodem fonte depromemus, facem præferente propriâ praxi. Ad morborum sanè cutaneorum classem pertinent icterus, paralysis, vulnera, ambustiones, gangræna, aliæque nonnullæ ægitudines, quarum pro instituti ratione alibi meminimus. Quapropter ab omni repetitâ crambe alieni, illos duntaxat affectus cutaneos qui in traditis ordinibus nullum locum obtinent, sub hâc sectione colligimus. Id genus sunt *sudoris vitia*, *morbis pedicularis*, *maculae* & *exanthemata*, *herpes*, *scabies*, *impetigo* & *lepra*; de quibus sigillatim, à sudoris vitiis, initio ducto, differendum incumbit.

Sudor ab aëris æstu vel corporis exercitatione erumpens, & à naturali normâ minime deflectens, in morborum censum nequaquam venit. Sed haud levem incutit metum illius excretionis *subita sufflaminatio*; cùm hinc prodeant variæ defluxionum catarrhalium species, capiti & pectori incumbentes; cephalalgia nempe, vertigines & affectus comatosi, coryza, odontalgia & angina, raucedines, tussis & suffocationes. Ab eâdem causâ suboriuntur febris, syncope, cardialgia; tormina intestinalia, lassitudines spontaneæ, dolores rheumatici, insultus arthritici, &c. Nec leviora impendent mala ab intercepto sudore febrili: præter enim primarii morbi pertinaciam, ingruunt phlogoses internæ, cardialgia, lipothymia, convulsiones, &c. quæ in posterum haud rarò post se trahunt febrem lentam & hydropem. Ubi igitur in utroque casu *intempestivè cohibitus fuit sudor*, nil non movendum ut *revocetur*; vel *alia promovenda est evacuatio*, quæ sudoris vices explere valeat. Prima adimpletur indicatio opportuna cardiacorum, vel *sudorificorum* administratione: hunc peroptatum effectum sæpius præstant haustus the & caffè, jusculum apprimè calidum, &c. sed cutis spiracula felicius referant calor lecti, balnea calida & sudatoria,

corporis exercitatio, &c. In alterum verò scopum adhibentur *vena sectiones*, *cathartica*, *diuretica*, aliaque cujusvis fortis evacuantia, quæ devium latitatem è variis emunctoriis prolicere queunt.

Nil *metuendum* à sudoribus fugacibus, vel qui intrà naturæ limites continentur: haud aliam sortiuntur indolem, qui inter difficilem digestionem noctu invadunt. At *ancipitis* sunt *alea sudores chronici*, præsertim sub febre lentâ: vires enim sensim exhauriunt, & latentis cujusdam labis suspensionem movent. Sudor inter febrem acutam, pro criticâ & salutarî sæpius habetur; nonnunquàm tamen symptomaticus censerî debet; hinc cautè sub hoc casu vaticinandum. Neminem praxi edoctum latet febres intermittentes sudore judicari, si ægri lecto se contineant; sed ubi citiùs quàm par est surrexerunt, vix madet cutis, vel planè occluduntur cutis spiracula; sub quâ conditione minime mirari subit, si morbus pertinacior evadat. Cæterùm eò magis *pertimescendi* sunt *sudores*, quò magis à nativo statu recedunt; ni tamen pateat evidens hujusce phænomeni causa: varia enim prostant exempla sudorum luteorum & subviridium, cæruleorum & nigricantium, lacteorum & sanguineorum, oleosorum, gelatinosorum, terreorum, &c. qui à peculiari & innoxia corporis conditione, vel à quodam latente morbo suam ducunt profapiam. Idem esto judicium de *sudore frigido*, nunc à causâ fugaci concitato, nunc inter exitialia symptomata, omnes ferè ægritudines respicientia, numerando. De sudore demùm Anglico, ad febrium malignarum classem attinente, nil addimus.


Sudoris vitia à primario quodam morbo prognata suprâ traditis medendi ritibus submittuntur; sed *sudor chronicus* peculiarem sibi vindicat *curationem*, quæ versatur circà demulcentia & temperantia; inter quæ usitatoria audiunt lacticia, cremores hordei & oryzæ, emulsiones vulgatiores, aqua succo limonum imprægnata, nitrum, arcanum duplicatum, pulvis tempetans, &c. quæ omnia sanguinis impetum retundere, ejusque fervorem reprimere solent. Insuper proficuè adhibentur laxantia quæ serum è parietibus tubi intestinalis eliciendo, ejus liberiores ad cutem proventum præcavent. Eandem, renes emungendo, opem præstant diuretica; nec inefficacia sunt alterius fortis evacuantia. Ubi verò *sudores periodicè recurrentes* delitescantis febris intermittētis suspicionem jure movent, opportunè servatis servandis, in usum vocantur cortex peruvianus, aliaque febrifuga. Præterea ægri haud diutiùs quàm par est lecto affigantur, & levioribus stragulis cooperiantur, æstuantem aërem fugiant, quieti se componant, severioribus diætæ præceptis obtemperent, &c. Hæc de uberiori sudoris proventu, vel pertinacitate dicta sufficiant; his nonnulla de sudore graveolente adjicere expedit.

Vulgatissimus est axillarum & pedum *fætor*, à *sudore*, ut neminem lateret, profapiam ducens: nec rara sunt totius corporis ambitûs tetra effluvia, quæ halitui simili ratione inquinato plerùmque sociantur. Sudorum graveolentia cui præsertim obnoxii sunt rufi, nullius periculi est particeps, & curæ medicæ nusquàm submitti debet. Porro, quidam sub variolis, variisque

SUDORIS
VITIA.

SUDORIS
VITIA.

febris, erumpunt sudores fœtidi, clinicis notissimi, qui faustum pollicentur exitum. Sed secius se res habet ergà teterrimum vel cadaverosum odorem, quem spirant nonnulli ægri ad incitas redacti; sub quo rerum statu ad tibicines mittere licet. Sanioris Medicinæ præcepta convellunt qui ad prædicti fœtoris chronici internam *medicationem* sese accingunt; cum hæc graveolentia à nullo morbo procedens, solâ munditie impugnari debeat, lotionibus nempe diurnis, balneis, crebrâ linteorum mutatione, &c. Cavendum præterea ne vino liberalius sumpto, calidiorum ciborum esu, &c. ingravescat hæc corporis conditio. Pessimo etiam incedunt consilio, uti supra notavimus, qui sudorem fœtidum coercere tentant lintea inspergendo pulvere aluminis, limaturâ ferri, aliove adstringente; cum haud citrà præsens vitæ discrimen sufflaminari queat hæc salubris excretio; quod sanè neminem vel rudem & inexpertum latet.



P H T H I R I A S I S.

DE pediculis à pædore & squalore progenitis, indusia lanea gestantibus, egentibus & ærumnosis familiarissimis, hîc non agitur; sed de morbo quodam peculiari rarissimo, qui nulli ordini parcens, ipsosmet Optimates etiam invadit. Fertur enim potentissimum, invictissimumque Philippum secundum, Hispaniarum, vel utriusque orbis regem, huicce spurcissimæ progeniei victas manus præbuisse. *Pediculi* sub hoc ægritudinis genere non solum stipato agmine cutem externam obsident, sed etiam sub *tegumentis*, & ipsosmet pericranio, *latitant*; imò & utramque cranii tabulam, non secus ac meninges, perforantes ad cerebrum appellant: quod stupendum phænomenum exhibuerunt *secta cadavera*. De pediculis aut vermiculis è diversis corporis locis exiturientibus, oculis nempe, naribus; cum sputo, urinâ & fœcibus; quibus miserè torquentur & emaciantur ægri, etiam mentio subicitur apud Authores; sed de illis alibi. Feralem habet exitum hic morbus fœdissimus, de quo in præsentiarum, cum in obscuris hæctenus latuerit genuinus curandi ritus. Nil tamen impedit quominus explorentur vires pulverum aloës, feminum staphisagriæ & cevadillæ, qui scilicet vulgatissimos pediculos ab spurcitie prognatos brevi fugant: sed inertia censerî debent hæc *præsidia* adversus pediculos intrâ corpus latitantes: sub quâ rerum conditione, si quoddam sit remedium, id sanè quærendum in mercurialibus, quæ cuncta permeando hostes illos infensissimos aggredi & evincere queunt: etenim haud legibus medicis cautum est inter hæc angustias, ne vela, servatis servandis, fortunæ committantur.

Alterius sunt naturæ *pediculi inguinales*, nostris ganeonibus sub nomine *morpions* apprimè noti. Vulgò inter coïtum traducuntur, qui aliàs à quovis

contactu, alterove modo contrahi queunt. Molestissimum pariunt pruritum hæc obscœna infecta, quæ ita cuti hærent & infiguntur, ut hinc avelli vix patiantur. In immensum propagantur pediculi inguinales, qui non solum utriusque sexûs genitalia obsident, sed etiam in superciliis, axillis, cute capillitiâ, &c. nidulant: nullum tamen portendunt periculum, & facillimè enecantur: hoc opus præstant sapo niger & cinis nicotianæ: sed cæteris topicis palmam sanè præripit unguentum Neapolitanum, quo semel bisve admoto omnia quotquot sint, enecantur; imò & planè extinguitur illius fœdæ progeniei seminarium.

De quibusdam pediculis aut vermiculis, ut nil intactum relinquamus, mentio subjicitur apud Authores, qui *cironum* titulo innotescunt. Sub epidermide latitant hæc animalcula, quæ tantâ tenuitate gaudent, ut visum ferè effugiant. Pueros & juvenes duntaxat respicit hic morbus, aliàs rarissimus, qui plerumque volam manuum plantamque pedum afficit; è quibus erumpunt pustulæ vesiculares & pruriginosæ, recondentes vermiculum qui aciculâ auferri potest. Sed danda est insuper opera ut delitescentes enecentur, vel nova præcaveatur progerminatio; quam opem ferunt topica amara, absinthium nempe, sub fotûs vel cataplasmatibus formâ; tinctura myrrhæ & aloës, aliaque id genus: opportunè etiam admoventur oleosa & sulphurea; at efficaciora censerì debent hydrargyrofa, unguentum nempe Neapolitanum, emplastrum de Vigo, &c. quæ altius penetrando, morbum radicitus extirpare valent.

PHTHIRIASIS.

CUTIS MACULÆ ET EFFLORESCENTIÆ.

(1) **D**E maculis purpureis febrilibus & scorbuticis suprâ actum fuit: itaque cæteras minoris momenti, sed per se existentes, hoc capitulo comprehendemus. 1^o. Facies & cervix gravidarum maculis fuscis & lividis, nonnunquam defœdantur, quæ *ephelides* vocitantur, & post partum plerumque evanescent; aliàs per totum vitæ curriculum gestantur. 2^o. Notissimæ sunt *lentigines* (*taches de rousseur*), faciei, cervici & manibus duntaxat insidentes; quam ephelidis speciem contumacissimam esse nemo nescit. Variis cosmeticis impugnari solent utriusque sortis maculæ, lacte scilicet virginali, oleo tartari per deliquium, oleo myrrhæ, &c. sed futilia plerumque sunt hæc remedia. 3^o. *Maculæ hepaticæ* (*taches hépatiques*) à colore rubro-fusco hepatis nomine ducto, cervicem, pectus & dorsum vulgò invadunt; nonnihil asperæ & pruriginosæ ad herpetem accedere videntur, & iisdem fermè telis impugnari solent, sed plerumque incassum, ni in subsidium veniant refrigerantia, depurantia, aliaque medicamina interna, de quibus infrâ. 4^o. His addere licet *navos maternos* (*marques de naissance*), qui macularum vel tuberculorum multififormium.

CUTIS MA-
CULÆ ET
EFFLORES-
CENTIÆ.

faciem præ se ferunt : ab utero sortiri hæc stigmata vulgò perhibetur ; quâ enim , inquit , corporis parte se attrectarunt mulieres gravidæ , dum expetitæ cujusdam rei imagine tentantur , in eâdem embryonis parte ejusmodi rei character suboritur & exprimitur ; ad quas impressas notas delendas imparia esse quæcumque remedia nemo nescit. 5°. Hûc etiam coincidit *ephelidis species ab insolatione* , vel hic cutis color fuscus (*le hâle*) , à sole contractus ; qui recens inter vitam umbratilem facilè evanescit ; aliàs proficuè usurpantur succus limonum , spiritus vini camphoratus , varii saponēs cosmetici , &c. sed pertinaciter hæret hic color jam annosus. De maculis scorbuticis , de quibus suprà , nil addimus.

(2.) Vix intelligitur quid sibi velint Scriptores per *exanthemata* ; utpotè hoc nomine insigniuntur , non solùm maculæ cujuscumque sortis , sed etiam variæ eruptiones prominentes & pustulosæ ; phlyctenæ nimirum , purpura alba vel vesicularis , papulæ à sudore , aliæque cutis efflorescentiæ , de quibus mox agemus. Usus tamen invaluit apud solertiores ut exanthematum nomine veniant stigmata scorbutica , maculæ purpureæ febriles , aliæque eruptiones simplicibus maculis tantillùm prominentiores , sed affectibus pustulosis maculis magis depressæ , quæ præsertim per se minime existunt , sed à primario morbo suam ducunt prosapiam ; cur sit ut nullam peculiarem medelam sibi vindicent : sed huicce nomenclaturæ , pro cujuscumque arbitrio immutandæ , haud diutiùs inhærebimus , ut ad saniora vel minùs futilia properemus.

(3.) *Ecchymosis* , vel suggillatio , nostratibus (*contusion* , *meurtrissure*) , audit hæc cutis macula , paululùm prominens , ab stasi sanguinis intrâ tegumentorum contextum prognata , post casum ab alto , ictum , aliamve contusionem , puncturam , distractionem , compressionem , vincula , &c. nec desunt ecchymoses à causâ internâ sobolescentes , à quâdam scilicet sanguinis & humorum labe , vel à peculiari partium subjacentium infarctu. *Ecchymosi* à *contusione* familiarissimæ præsertim inhærebimus ; sub quâ primò rubet pars contusa , dein colorem subcœruleum vel lividum contrahit : dolore & febre sæpiùs stipatur ecchymosis à contusione ; imò & nonnunquàm ad suppuratum vergit , nec gangrænæ expers est. Notandum tamen haud semper cutem post contusionem à nativo dolore recedere , cum suum effectum exerat in subjacentes partes : sub quâ conditione periculosior evadit *contusio* , ob imminentem scilicet puris confectionem , quæ sæpiùs per mensem integrum delitescit. Nil præter aquam vitæ , aliudve quodcumque resolvens , contusioni leviori admovetur : hanc opem sæpiùs præstant aqua frigida , vel simplicissima ; aut sale culinari saturata , ex quâ charta madens parti apponitur ; vinum calidum , &c. sed aliter se res habet sub gravi , quæ febrem & phlogosim post se trahit ; quibus obviamitur nonnullis venæ sectionibus. Intereà intùs adhibentur vulneraria & resolventia ; inter quæ usitatiora audiunt succus cerefolii vel urticæ , sperma ceti , terebinthina , lapilli cancerorum fluviatilium , antimonium diaphoreticum , &c. Incunctanter etiam admoventur aqua vitæ sincera , vel globulo

globulo martiali imprægnata, spiritus vini camphoratus cum fale ammoniaco, aqua Reginae Hungariæ, balsamum peruvianum in terebinthinâ solutum, styrax, balsamum Commendatoris, &c. Suas laudes merentur emplastrum de spermate ceti, cataplasmata è radicibus polygonati, consolidæ majoris, chelidonii, bardanæ, tamni, &c. confecta: sin verò pus colligatur, tralatitiæ methodo submittitur abscessus. Inter contusionum reliquias frequentius occurrunt maculæ atro-lividæ sæpius contumacissimæ, ad quas delendas egregiè conducit cataplasma è radice tamni confectum. Aliæ insuper ecchymoses, ab alterâ scilicet causâ contractæ, simili fermè methodo pertractari solent.

(4.) Non infimum inter cutis efflorescentias obtinent locum variæ *purpure*, ut inquiunt, *species*; alba nempè, rubra & urticata. *Alba* pustulis miliaribus & vesicularibus innotescit; *rubra* papulis vel maculis purpureis se prodit: utraque morbus per se nonnunquam audit, nullâque febre stipatur: aliàs inter febrium malignarum symptomata numeratur, quæ hinc à quibusdam dicuntur miliares. Sed alterius sortis est *purpura urticata*, apud nonnullos (*porcelaine*) vocitata, quam produnt latiores, instar vibicum, & fugaces cutis prominentiæ, ardore & pruritu stipatæ, non secus ac evenit post urticationem, vel plures culicum tinnulorum morsus: per universam cutem subito exoriuntur hæc depressa tubercula, quæ sæpius promovet calor lecti; adeò ut brevi, ægris assurgentibus, evanescant, iterum proditura: veluti primæ binæ species inter febrium malignarum symptomata recensetur *purpura urticata*: aliàs febre haud ominosâ stipatur, de quâ mentionem subjecit SYDENHAMUS, sub nomine febris erysipelacæ; quod pace tanti viri incongruum judicamus: sed in plerisque febre planè caret hæc *purpure* species, post esum astacorum, mytulorum, echinorum, cancrorum, aliorumque affinium, nonnunquam erumpens; quæ tùm periculi expers, haud ultrà triduum vel quattriduum vulgò protelatur; ni incautè hanc intempestivis remediis aggrediantur.

(5.) *Anonymæ* sunt ceteræ cutis eruptiones minoris momenti; si excipias *sudamina*, quæ sudorem excipere, tùm ab æstu corporis sani erumpentem, tùm à febre concitatum; *pustulas venereas* faciem deturpantes, papulas ardentes eidem parti insidentes, sub *guttæ rosacæ* nomine notas, &c. Nonnullæ verò febris expertes sub latissimo & vernaculo nomine *échauboulures*, quæ sæpius à calore aëris & insolatione suboriuntur, sed etiam varias alias causas agnoscunt. Si ab æstuante sanguine concitetur compar eruptio, faciem, pectus & brachia præsertim obsidens, vix à sudaminibus discrepans; apud Nostrates (*ébullition*) audit: *febrem*, quam nescio quâ ratione ductus *morbillosam* vocitavit SYDENHAMUS, plerumque comitem habet hic levissimus affectus cutaneus; quâ cessante, evanescit. Juvenes & præsertim pueros invadere solent hæc *pustulosa efflorescentia*, haud ultrà biduum plerumque vigentes: cutem vix supereminent, quam squamosam sæpius relinquunt. Notare expedit quòd *effera* nomine intelligatur apud Arabes quævis pustulosa & anonyma eruptio. Periculo

CUTIS MA-
CULÆ ET
EFFLORES-
CENTIÆ.

CUTIS MA-
CULÆ ET
EFFLORES-
CENTIÆ.

planè vacant prædictæ efflorescentiæ , & earndam fermè curam exposcunt , quæ præmissis generalibus circa temperantia , depurantia & diaphoretica versatur. Sed naturæ plerùmque committitur horum levissimorum affectuum medela , ni tamen crebriùs recurrentes , de latente quâdam sanguinis labe suspicionem moveant : quid tùm factu opus sit , nemo non intelligit. De efflorescentiis à morfu vesparum , apum & culicum , ab urticatione , &c. nil addimus : nec de hâc specie , nostratibus (*peau de poule*) quæ à suscepto frigore subitò contrahitur , & brevi evanescit ; sub quâ cutis , anserinæ instar , exiguis granis fugacibus exasperatur.

HERPES ET PRURITUS.

HERPES , Nostratibus (*dartre*) , vocitatur hæc pustularum exiguarum & prurientium congeries , vel area diversæ latitudinis nonnihil prominens , quæ faciei , manibus , cæterisque corporis partibus insidet. Hic est morbus qui licet primo intuitu videatur levissimus , curantium mentem torquet , tam in intellectu pathologico , quàm in suspiciendâ curatione. Variæ occurrunt *herpetis species* , quæ dilucidioris methodi gratiâ ad quatuor redigi queunt ; ad *fugacem* scilicet , *farinosam* , *miliarem* & *serpiginosam*. *Herpes fugax* (*dartre volante*) omnium levissimus , cujus pustulæ rarò coeunt : brevi in suppuratum abeunt & arescunt , faciem plerùmque impetit ; spontè judicatur , vel remediis simplicioribus fugatur. Secunda *herpetis species* , vel *farinacea* (*dartre farineuse*) in hanc vel illam partem ingruens , ex innumeris papulis exquisitissimis , vixque conspicuis exsurgit ; è quibus coeuntibus emergunt maculæ rubro-fuscae , pulvere quodam subalbicante & squamoso interspersæ : parùm aliàs discrepare videntur à sequenti specie , cujus crustulæ tantâ sæpiùs siccitate gaudent , ut ad squamas furfuraceas proximè accedant.

Tertia species , vel *miliaris* , innumeras pustulas exiguas præbet , è quibus quasi congestis emergunt latiores areæ , in pectus , lumbos , inguina , scrötum , coxas , &c. se spargentes. Per contagium facillimè propagatur , linteis scilicet , novaculis , poculis , &c. herpes miliaris , qui summam concitat pruriginem , atque scalptu laticem serosum , non secùs ac scabies , fundit ; qui humor in crustas herpetem deturpantes facessit. Pertinacissima hæc est herpetis species ; quæ nonnunquàm , uti videtur , sublata , incogitantes iterùm invadit. Quarta species audit *serpigo* , à serpendo sic dicta ; vel *herpes ferus* & *exedens* , Nostratibus (*dartre vive rongeante*) : cudit ulcuscula quæ sanie acerrimâ madent , qui latex in crustas humidus , sub materiæ furfuraceæ formâ deciduas , facessit. Variam sedem occupat , sed sæpiùs zonæ instar corpus cingit , & ideò hoc nomen sortitur. Immani pruritu stipatur serpigo , acremque doloris morsum concitat : ægrè de-

mum domari patitur, ejusque sanatio cicatricem, vel quamdam partis intumescentiam nullâ arte solvendam post se trahit. Neminem fugit herpes pertinacior, vel mali moris, à labe sanguinis venereâ, scorbuticâ vel scrophulosâ foveri: sed plerisque latet consensus inter hepar & cutem, adeo ut raro eveniat sub gravioribus & diuturnis affectibus cutaneis, ut illâsum occurrat prædictum viscus; imò & lien sæpius labefactus deprehenditur: hoc docet *autopsia anatomica*. Spontè, uti jam innuimus, vel simplicioribus remediis evanescit herpes fugax: ægrè domatur farinaceus: sed pertinacissimæ censerì debent cæteræ species. Herpes demum in infantibus, accedente adultâ ætate, fugatur.

Ad hunc scopum dirigenda herpetis chronici cujuscunque indolis *curationis*, ut sanguinis dyscrasie prospiciatur: ideo præmissis generalibus, & rectâ compositâ victus ratione, opportunè præscribuntur refrigerantia & demulcentia, lac nempe, ejusve serum, emulsiones, cremores hordei & oryzae, &c. Hæc excipiunt depurantia, amara & sudorifica; fumaria scilicet, pimpinella, lapathum, nasturtium & carlina, juscula è cancris fluviatilibus, è viperis parata, antimonialia, &c. Nec posthabenda sunt aperientia & incidentia, si nil obstat; hisce viribus pollent aselli, martialia, & ipsamet mercurialia; quæ cuncta permeando organa, excretoria referant, & morbosos latices foras amandant. Sed hæc munia felicius absolvent aquæ minerales, tum martiales & acidulæ, tum thermales, quæ quasvis humorum moleculas ad excretionem paratiores movent, & sæpius curationem claudunt. Nec omitti debent, dum hæc geruntur, cathartica sæpius repetita, quæ devios succos ad sentinam intestinale proliciunt.

Insuper egregiam, cæteris consentientibus, opem præstant balnea: nec posthaberi debent cætera topica, etsi minoris efficacie: pruritus enim compescitur cremore lactis, butyro, oleo ovorum, butyro de cacao, cerato simplici, sale saturni in aquâ plantaginis soluto, &c. Resolventium & detergentium vires obtinent aquæ Plumberianæ, Bellilucanæ, Vicienses, Baregieneses, Granenses, Vervonenses, &c. Nec suis laudibus defraudanda aqua falsa, vel ipsamet marina. Præclarum effectum edunt pomata, cum præcipitato albo vel sulphure, & pulpâ lapathi parata. Nonnunquam conducunt exsiccantia; atramentum nempe, pompholyx, album Rhasis, ceratum è lapide calaminari, &c. Cæteris fortè præstat aqua Golardiana, vel pomatum saturni. Nec improspere demum adhibentur sub quibusdam circumstantiis, arsenicum, sublimatum corrosivum, aliaque cathæretica, cum quibus tamen cautè mercari expedit. Si demum omnibus hisce præsidiiis internis vel externis obsurdescat herpes; cauterii, in opportunâ parte inusti, efficaciam explorare nil vetat. Sed cautè usurpari debent prædicta remedia ne ab intempestivè repulso herpete varii vel graviores exsurgant morbi, quos sola quandoque herpetis insitio curare valet.

Reliquum est ut de morbo quodam cutaneo, prioribus cognato, *pruritu* scilicet simplici, breviter agamus, qui, etsi nulla se objicit labes conspicua, ad herpetem tamen proximè accedere videtur. Hujusce enim instar siccus

 HERPES
 ET
 PRURITUS.

ut plurimum occurrit; aliàs rore quodam madet: imò & erumpunt, ægrīs scilptui plus æquo indulgentibus, quædam pustulæ, numero fanè minores quàm in genuino herpete, sed laticem saniosum etiam eructantes. Ad pruritum proni censentur macilenti, biliosi, melancholici, & præsertim senes quiescentes; qui hoc noctu diuque torquentur. Inter contumaciores morbos recensetur pruritus qui sub hoc conspectu herpeti minime cedit: imò & pro immedicabili habetur in senio confectis. Itaque haud recta in utroque morbo tenetur *curandi methodus*¹, ni priùs accurata causæ foventis habeatur ratio: ideò hùc coincidunt jam tradita præsidia interna, adversùs herpetem adhiberi solita; sed cæteris præstare videntur sub pruritu diluentia, refrigerantia & temperantia, quæ excipere queunt, si res expostulet, depurantia & sudorifica. Cæterùm nil fortè efficacius reperitur diuturno balneorum simpliciorum usu inter congruas corporis exercitationes. Suas etiam laudes merentur topica demulcentia, olea nempè, axungia, medullæ, cerata, &c.

Notare expedit, priusquam manum è tabulâ amoveamus, nusquam sub hisce *affectibus pruriginosis* in usum vocanda esse topica cujuscumque sortis, ni priùs opportunis auxiliis ritè impugnata fuerit *morbi causa*, in sanguine vel humoribus delitescens; quâ posthabitâ, gravior à cohibitâ virûs excretionem impenderet morbus, præsertim sub jam senescente herpete: sed ritè adhibitis remediis internis, tutò morbi sedem aggredi licet. A veri fanè deflectunt tramite qui vulgi præjudiciis obcæcati nusquam citrà irgens periculum sanari hosce annosos morbos cutaneos arbitrantur, cùm experientia quotidiana contrarium arguat: ubique enim occurrunt homines hoc morbo vetustiori jam diù liberati, qui congruæ victûs rationi indulgentes, vegetiori fruuntur valetudine. Verum quidem est quòd maximum immineat *periculum*, si vetus herpes spontè evanescat, vel *intempestivis remediis* retrocedat; sub quâ rerum conditione, nil non movendum ut revocetur morbus, vel alia paretur sentina; quâ devius latex exitum sibi parare queat: nec sub hoc discrimine omittenda cujusvis sortis evacuantia interna. Hæc sunt quæ suprà traditis subnectere haud incongruum fore visum fuit.



S C A B I E S.

PUSTULIS summè prurientibus inter digitos, & circa carpum sitis, *innotescit* hic vulgatissimus affectus, *la Gale*, qui aliàs corporis ambitui minime parcit. Sed notandum occurrit faciem, variis herpetis speciebus sæpiùs deturpatam, scabiei planè immunem esse. Hunc morbum omnibus invisum, plebis colluviei familiarissimum, facillimè propagari, non solum contactu, sed etiam linteis, vestibus, lecto, &c. nemo nescit. Ægrè sæpiùs distinguitur sub primis temporibus ab hisce papulis anonymis, de quibus suprà: sed immanis pustularum pruritus, & harum assignata sedes, quibus addere licet contagium, brevi hujusce morbi characterem produnt. *Scabies*, non secùs ac herpes & pruritus, nunc *humida*, nunc *sicca* occurrit: prima minùs pruriginosa ulcuscula cudit pus faniosum eructantia, è quo concreto emergit crusta in pulverem deciduum facessura; sicca immani pruritu stipata, hinc molestissima, nullo latice maderet, ni scalpentibus unguibus incideretur. Utraque cute coërcetur, nec altiùs defigitur.

Scabies præter contagium quo latè diffeminatur, ab incultâ munditiæ vel pædore, & ab ædibus humidis *contrahitur*. Hanc etiam accersunt & foveant virus venereum & scorbuticum, febris quartana, hepatis labes, &c. Facile curatur recens scabies, præfertim humida & sub juvenili ætate; sed *pertinacissima* censetur inveterata, imprimis inter senectutem. Brevi judicatur quæ à causâ externâ suam sortitur originem; sed vix expugnari se patitur ab humorum dyscrasiâ prognata, quæ scilicèt lepræ faciem haud rarò induit. Si scabies pravæ notæ spontè vel intempestivis remediis *retrocedat*, *periculosa* res est *alea*: hinc graviores emergunt morbi; febris nempe ominosa, tussis indomabilis, suffocationes calamitosæ, phthisis, epilepsia, apoplexia, &c. Ad quæ infortunia præcavenda opportunè adhihantur, *post* infaustum *scabiei retrocessum*, *venæ sectiones* & *cathartica*: nec minorem opem conferunt diuretica, sudorifica, aliaque evacuantia, quæ devium & virulentum laticem ad diversa colluviaria amandando, sanguinem repurgare valent. In usum vocantur sub eodem scopo balnea calida, referandis cutis meatibus apta. Suas laudes etiam merentur sinapismi, vesicatoria, &c. Opportunè demùm intùs exhibentur, sub eodem rerum statu, flores sulphuris, mercurialia, cæteraque adversùs vigentem scabiem præsidia, quæ supersunt recensenda. Sed his omnibus longè præstat induta cujusvis scabiosi tunica.

Nemo nescit *sulphur*, intùs & extrùs usurpatum, tanquàm *specificum* jure decantari, & ex hoc parari vulgatissimum unguentum, quo, præmissis

SCABIES.

generalibus, bis per diem illinitur pars affecta. Rarò ultrà triduum vel quadriduum protelatur hujusce unguenti usus; nec aliâ plerùmque, nullâ foyente causâ internâ, opus est curatione. Sed ubi incusatur quæcumque sanguinis labes, ad aliam methodum se conferre expedit, quæ scilicèt versatur circà diuturnum temperantium, *depurantium* & *aperientium* usum; inter quæ magis comprobata audiunt cichorium, borrago, pimpinella, lapathum, fumaria, lupulus, canceri fluviales, aselli, &c. quæ excipere solent *diaphoretica*; inter quæ primatum ducunt juscula viperarum. Nec omittenda, dum hæc geruntur, cathartica identidem repetita. Insuper nonnullis congruunt *lacticia*, quæ è temperantibus & depurantibus sibi paria fortè non habent. Quibus peractis ad sulphur, tùm per os assumptum, tùm cuti admotum, devenire expedit. Huic sanè præcellunt mercurialia sub viru venereo; aliàs specificâ vi defraudari videntur, ni nociva evadant. Curationem demùm claudunt *aquæ thermales* juxtà normam medicam epotæ, quæ sæpiùs, cæteris incassum adhibitis præsidis, agrorum vota explent.

Præter *unguentum officinale* è sulphure & axungiâ confectum, & tanquàm præsentissimum sub hocce morbo remedium suprà laudatum, alia pro re natâ admoveri queunt medicamina, tùm demulcentia, tùm resolventia, camphora nempe, sal saturni, lithargyrus, sapo niger, oleum ovorum vel papyri, oleum tartari per deliquium, nutritum, unguentum è pulpâ radice lapathi conflatum, Neapolitanum, &c. etenim à juvantibus & lædentibus sæpiùs dirigenda est medela; & nil in morbo pertinacissimo omittendum eorum quæ curæ profutura videntur. Postremò minime reticendum præsentaneam, inter prædictorum remediorum usum, opem conferre *balnea domestica*, vel ex aquis thermalibus parata, quæ postrema non solùm vigentem scabiem faustè impugnare queunt, sed etiam fugato morbo proficua & necessaria censentur.



I M P E T I G O.

IMPETIGO.

Sic vocitatur hæc *fæda scabiei species*, quam gradu duntaxat intensiori à legitimâ discrepare nonnulli autumant; quæ potiùs, ratione ferocioris indolis, ad lepram proximè accedere videtur. Numerosiores erumpunt, sub hoc affectu pustulæ; hinc congestæ & confluentes, quæ acriter pruriunt, & sanie fœtidissimâ madent, facesturâ in crustas squamosas. Non intrâ digitos sitæ observantur prædictæ pustulæ, uti solemne est in genuinâ scabie; sed in universam cutem disseminantur. Impetiginis characterem præsertim produnt tubercula mobilia, skirrhosa & indolentia quæ faciem, legitimâ scabie, uti jam inuimus, immunem præcipuè deturpant. Intereà, procedente morbo, exsurgunt dolores latè se spargentes, vel singulas corporis partes obsidentes: vocem raucam & inconditam, vel mœstam edunt ægri; dentes nigredine defœdantur, halitus fœtet & ossa passim tument, &c. E quibus patet quantum distet impetigo altiora penetrans à genuinâ scabie cute coërcitâ. Minime sanè mirum si *scabies leprosa* tantam labem inferat, utpotè à viru venereo vel scorbutico profapiam ducere videatur.

E præhabitis colligitur contumacissimam esse impetiginem; imò & planè indomabilem; ni congruis præfidiis emendetur prava sanguinis & humorum diathesis. In usum vocari solent omnia *remedia* suprâ tradita: at præmissis præmittendis, cæteris præstare videntur sudorifica & mercurialia, non secus ac antiscorbutica; prout luis venereæ emergit suspicio, vel scorbuti se præbent indicia. Nec, dum hæc peraguntur, posthabenda cathartica blandiora, identidem repetita. Insuper opportunè exhibentur aquæ thermales & martiales, aliaque aperientia & diuretica; quorum efficacia in omnium fermè chronicorum curatione toties fuit explorata. Summè à quibusdam deprædicatur, nec immeritò, diuturnus balnei maris usus; dummodò latens morbi causa congruis auxiliis priùs præcidatur; & è vasis sanguineis excutiat: ac demùm, eâdem cautelâ, cætera in usum vocari queunt topica.



LEPRA.

L E P R A.

HÆC ægritudinis species antiquitus vulgatissima, quæ primò intuitu ex scorbuto, lue venereâ, & scrophulis, quorum fortè est particeps, constare videtur, vix nostrâ ætate innotescit: adeò ut nonnulli de ejus existentia planè dubitarint; hisce ducti rationibus, quod in hisce priscis temporibus lues venerea, tunc inaudita, pro leprâ haberetur; & idè hanc postremam meram esse syphilidem sui juris factam, vel à propriâ indole descendentem, rationi consentaneum ipsis visum fuit. Plures tamen hæc lue conflictatos nobis fors obtulit in locis maritimis, quò hanc profugisse videtur; pluraque ab expertis Medicis quorum curæ committebantur ægri didicimus: opera demùm solertiorum Scriptorum, quos non latebat utriusque morbi discrimen, sedulò pervolvimus, ut aliquid certi de hac re traderemus. Itaque nil aliud esse videtur *fædissimus* hicce morbus quàm scabies crustacea & squamosa, per totum corporis habitum diffusa, vel scorbutica, ut inquiunt, ad ultimum gradum dejecta: nec desunt qui hunc dirum affectum ad herpes malignas referant. Utrique opinioni adversatur autopsia anatomica: quâ patet viscera haud minorem, quàm corporis habitus labem contraxisse.

Et si hicce morbus in propatulum venit; rarò tamen animadvertitur, priusquàm se sistat horrenda cutis, partiumque subjacentium labe, nec nisi pluribus elapsis à primo exordio annis, huncce gradum assequi solet: antehac sub specie herpetis vel scabiei delitescit; quæ vitia cutanea sensim incrementum capeffentia, nil mali primùm portendere videntur; donec ad acmen perducta *cancris universi faciem* præ se ferant. Primam favitiem exercet lepra in facie, manibus & pedibus: curis tunc temporis est squamosa, maculis diversi coloris signata; pustulis siccis vel humidis exasperata; ulceribus sordidis exesa, crustis furfuraceis & squamosis obsita: nec sensu destituitur sub hoc primo stadio; quin potius pruriginè vix leniendâ afficitur: porrò in dies fit crassior & asperior, subtumida & hiulca, callosa & quasi unguine oblinita, ac demùm frigida & sensûs expers; adeò ut illam pun gere, incidere vel urere liceat, absquè agrotantium molestiâ: sed haud sic se habet, uti plerique cogitarunt, de partibus subjacentibus, musculis nempe, tendinibus & membranis, quæ acu altius adactâ sensibiles deprehenduntur; quidquid in contrarium adducant Authores, haud plagii infantes, qui scilicet traditis vetustis fabulis fidem inconsultò adhibuerunt.

Facies, *vigente morbo*, colore livido vel plumbeo perfunditur; guttâ, ut inquiunt, rosaceâ inficitur, vel erumpunt pustulæ fædissimæ, quæ haud rarò nucis juglandis molem assequuntur; præsertim in fronte, genis & mento: oculi fiunt torvi; nasus suprâ modum crescit: tument labia & in-

vertuntur,

vertuntur, lingua crassior & scabra vix in situ continetur: ceteræ oris partes variis prominentiis exasperantur: nec melius se habent larynx & glottis; undè vox rauca & clangosa, ac ejulatibus intercepta. Seriùs ocyùs in tumorem attolluntur cubiti & genua, horumque motus impeditur. Crura œdematosa & varicosa ingravescent: manus & pedes subtumidi & hiulci segnitie & torpore tenentur. Exsurgunt è variis partibus tumores in ulcera facessuri putrida, virulenta, phagedænica, vermibus nonnunquàm scatentia; ac sæpiùs ad ipsamet ossa pertingentia, quæ exhinc carie læduntur. Leprosi odorem spargunt fœtidissimum, vel teterrimum, tam ex ore quàm è corporis ambitu: plerique de pruriginosâ libidine, quâ tentigine quasi rumpitur penis, conqueruntur; cur minime mirum siquidam Anthores morbum de quo agimus, meram esse *satyriasm* autumarunt. Comæ demùm & superciliorum defluvium; nasus, manus & pedes gangrænâ correpti & decidui, sunt totidem *symptomata letho finitima*. Sub hisce ærumnis, quâcumque curâ soluti ægrotantes animum despondent; mœrore confecti hominum congressus fugiunt; & sibimet invisi, alios vel parentes & familiares, odio quasi prosequuntur: donec febre hecticâ & marasmo consumpti, mortali vinculo aventes exsolvantur.

E præhabitis colligitur multùm *discrepare genuinam lepram ab elephantias* partibus internis parcente, quæ scilicèt sola crurum tegumenta invadere solet; nec profundius immergitur & rarò ultrà proserpit. Hanc tamen per totum corporis ambitum, exceptâ facie, semel observasse mihi contigit in viro nobili quadraginta annorum. Hic morbus *elephantiasis* nempè apud Ægyptios endemius, tædio potiùs quàm dolore molestus, haud obest functionibus, & licèt contumacissimus periculo plerùmque vacat: cutis hoc vitio tacta atro-livet & tumet, squamis obducitur & exasperatur, prurit & nonnunquàm dolet; nedùm sensu orbetur: procedente morbo prominent venæ varicosæ, exsurgunt tubercula, haud rarò in ulcus facessura; aliæque se sistunt cutis læsiones cutanæ, in leprâ observari solitæ; sed multùm remissiores.

Lepram per contagium propagari ultrà omnem controversiæ aleam positum esse videtur; sed inopes & egenos, sordidos & squalore obritos, plerùmque invadit. *Ægrè domatur ferina hæc lues*, etiam in primâ periodo; licèt viscera, uti conjicitur, intacta tùm maneant, & sola corporis peripheria offendatur. Si nonnunquàm accidat, ut secundâ tempestate averruncari videatur, haud rarò redeunte hyeme recrudescent. In alterâ periodo, ubi scilicèt altas in viscera egit radices, omnem curam, si excipias palliativam, respuit. Nec minùs *contumax*, licèt minorem metum incuriat, *elephantiasis*, ad certum gradum deventa, quam etiàm lautissimis minime parcere, experientiâ compertum habuimus. Etsi raræ sunt *cadaverum* hoc morbo denatorum historiæ: liquet tamen nullam esse partem internam à viru leproso immunem; excepto tamen corde, quod ut plurimùm illæsum deprehenditur. Cetera verò organa, tùm pectoralia, tùm abdominalia, arida & contracta, infarcta vel phlogosi correpta, purulentiâ conspurcata, putre-

LEPRA.

dine & sphacelo absumpta, ulceribus erosa, &c. comperiuntur. Trachea imprimis & bronchia corrugata, ulcerosa, tuberculis referta, aliove modo labefactata, se oculis visenda obtulerunt: ut nil addam de quibusdam ossium, cartilaginum & ligamentorum vitiis, haud semper ante obitum conspicuis.

Curandi methodus præcipuè versatur, non secùs ac ad luem veneream, circa incidentia & sudorifica, præmissis tamen generalibus, diluentibus nempe, demulcentibus, refrigerantibus, temperantibus & depurantibus; inter quæ serum lactis & ipsummet lac, cremores farinacei, juscula pulli, carnis vitulinæ, testudinis, ranarum, &c. usitatoria sunt, nec minùs conferunt plantæ cichoraceæ & acidæ, lapathum & fumaria, nasturtium, cæteræque herbæ antiscorbuticæ. Suam opem præstant balnea domestica, quæ emollientibus internis manus auxiliatrices præbent. Horum ope, accedente congruâ victûs ratione, nec posthabitis blandioribus catharticis, ut primis viis prospiciatur, ad efficaciora patet aditus; inter quorum usum eò collimandum censemus ut materia morbose visceribus impacta subigatur; & expedita foràs elutrietur. In hunc duplicem scopum præcipi solent mercurialia, panacea nempe, aquila alba, æthiops mineralis, &c. ligna sudorifica notissima, antimonium, viperæ, &c. quibus utendi ratio pro opportunitate & circumstantiis dirigitur. Sulphur per os sumptum, vel foris adhibitum per se, vel suffumigii formâ, inter incidentia exquisitoria, haud immeritò à pluribus deprædicatur. Nil efficacius reperiri decocto ulmi, nonnulli, penès quos sit fides, tradiderunt. Incidentium & sudorificorum vires æmulari videntur aquæ thermæ intùs & extùs usurpatæ, quas pluriès emolumento fuisse experienciâ constat. Nil demùm omittitur è *topicis* scabiei & herpeti dicatis, quæ cæteris adminiculis obsecundare queunt: à recto enim deflectunt tramite qui hæc omnia remedia externa pro nihilo habent; cùm solerti manu tractata haud inutilem sæpiùs opem contulerint: aliàs haud citrà periculum adhiberi credere par est. Aliud demùm est præsidium, quod fortè alia antecellit, nempe castratio; quâ scilicet morbum planè eradicari fertur; dummodò tamen haud altiores egerit radices: quod nec rationi nec experientiæ adversari videtur; cùm nullum sit dubium, annuente observatorum choro, quin castrati hoc morbo nusquam corripiantur.

Ex eo quòd *elephantiasis* ad lepram accedere videtur, usus invaluit ut iisdem remediis, habitâ ratione gradûs impugnetur; quapropter præmissis generalibus, refrigerantibus, nitrosis, depurantibus & antiscorbuticis; in usum internum trahuntur *sulphur*, *mercurialia* & *sudorifica*. Haud ab simili consilio adhibentur linimenta & suffumigia sulphurea vel mercurialia: insuper usurpantur vulneraria, detergentia, cæteraque *topica* ulcerum medelæ dicata. Sed non secùs ac genuina lepra, ad omnia quacumque remedia ut plurimum furda elephantiasis, licèt visu & tactu conspicua, domari planè recusat.

E R Y S I P E L A S.

ERYSIPE-
LAS.

NEMO nescit hoc nomine insigniri hunc tumorem phlogodeum, latum & depressum, dolore acri & æstuoso stipatum, atque colore rutilante præditum. *Variae* occurrunt *erysipelatis species* infra recensendæ, quorum vulgatiores & *legitima* à rigore & febre orditur; & non nisi post biduum, triduumve *se prodit* cutis inflammatio, cujus color cinnabarinus, vel roseus & splendens, à premente digito subterfugit, statim rediens ubi amovetur: è quâ, non secus ac sub ambustione, prodeunt pustulæ vesiculares. Suam acmen brevi assequitur hic tumor, cujus stadium intrâ septem circiter dies continetur; ultrâ quos cutis squamosa evadit. Nulli parti parcit erysipelas; sed faciem & crura sæpissimè invadit; nec rarò ex unâ parte serpit in alteram. *Zoster* vocitatur, si cinguli instar corpus ambiat. Diverſa est, uti jam innuimus, erysipelatis indoles: sub mitiori, febris paucis elapsis diebus evanescit; etsi tumor sua solita percurrit tempora; sed sub graviore diutiùs protelatur febris, & truculentiora emergunt symptomata. Febrem prætereà putridam, malignam & pestilentialem nonnunquam concomitatur; & circâ quartum morbi diem, vel tardiùs erumpit, accedente euporiâ: at sub hâc conditione longior sit ejus decursus; nec rarò in suppuratum abit, vel gangrænâ post se trahit. Alterius sunt sortis, aliisque typum præ se ferunt defluxiones erysipelaceæ, quæ spontè vel vulgatiores res solventibus intrâ biduum vel triduum fugantur: nonnullæ tamen ejusdem indolis, vulnera circumambientes; & œdematis sæpiùs participes, segniores observantur: haud alterius etiam commatis esse videntur infarctus erysipelacei crura hydropicorum infestantes; qui à genuini erysipelatis stadio planè recedunt.

Alia occurrit erysipelatis *species*, nempe universalis, quæ pustulis pruriginosis, in squamas facessuris exasperatur; & *erysipelas pustulosum*, nostratibus *Erésipele boutoné*, apud quosdam Authores audit; quod sæpiùs promoveant vini, liquorumque ardentium liberalior usus. Sed alia annotatur species, cui hoc nomen rectiùs congrueret, & *rosalia* apud Authores nuncupatur; sub cujus exordio erumpunt pustulæ, à morbillis vix absimiles: sed illarum areolæ rubræ subtumidæ ampliantur, & invicem coeunt; adeò ut hinc emergat infarctus erysipelaceus totum corporis habitum occupans, qui ad nonum diem producit, & squamas totum corpus obducentes post se relinquit. Ipsismet morbillis, pro quibus sæpiùs ab incautis habetur, periculosior cenſeri debet hic affectus, infantibus & juvenibus familiaris; qui apud nonnullos variolarum spuriarum nomen sibi vindicat: sed à plerisque tanquàm anonyma eruptio pertractatur.

Corporis constitutio sanguinea, & præsertim biliosa, æstus æris, immodicæ exercitationes, vigiliæ diutiùs protractæ, vehementiora animi

ERYSIPE-
LAS.

pathemata, vinum meracius, cupediarum esus, &c. sunt totidem erysipelatis, cujuscumque indolis, *causæ*. Inter scorbuti symptomata etiam numeratur; sub quâ condicione diutius protrahitur; & nonnunquam cruribus insidens in ulcus pertinacissimum faceffit: nec rara se offerunt apud senes hujusce infortunii exempla. Erysipelas capitis & faciei eò *calamitosius* censetur, quò immanior est intumescencia. In ancipiti etiam versatur eventu, si in partes glandulosas & præsertim mammas irruat: nec minùs portendit periculum Zoster. Neminem postremò fugit luctuosum esse erysipelatis retrocessum; cùm symptomata hinc emergentia funeris metum nonnunquam incutiant.

A benè perspectis ætate, temperie & morbi gradu, *curandi judicium* dirigitur. Haud sanè dubitare licet quin plurimùm conferat venæ sectio; si ægri vires ferant, & cætera consentiant: sed ab hâc plus æquo repetitâ, intrò nonnunquam recurrit erysipelas, & fatum acceleratur. A recto deflectunt tramite qui à conspecto sanguine, ut inquiunt, inflammatorio, numerosas celebrandas fore sanguinis missiones inferunt: de tralatitio hoc errore sciolis familiarissimo, alibi satis superque actum fuit. Dein opportunè præscribuntur diluentia & demulcentia; serum nempe lactis, aqua pulli, emulsiones, potus lacteo-aqueus, &c. diaphoretica in regionibus septentrionalibus summè commendata, noxia sub nostro cælo evadunt; ni tamen erysipelatis recessûs immineat periculum: nec salubriora censentur refrigerantia. Insuper præsentaneam, ineunte morbo, opem fert emeticum, si stomachus pravis sordibus scateat: cathartica verò haud tutò præcipiuntur, nisi sub morbi finem. Alvus tamen solitâ arte servanda est libera per totum morbi curriculum: urgentiori tamen succurrendum, si ob nidulantem in primis viis saburram graviora emergant symptomata, delirium nempe, affectus comatosus, &c. Postremò proficuè sæpiùs in usum trahuntur hypnotica; cum hisce remediis cautè tamen mercandum, ne fallaces inducias impertiantur.

Quod *curam externam* spectat, varia pro lubitu admoventur resolutentia; inter quæ usitatiora audiunt aqua florum sambuci, spiritus vini camphoratus, aqua calcis, &c. opportunè adhibetur epithema SYDENHAMI ex aquâ vitæ, theriacâ & aromatis paratum. Aliud deprædicat RIVERIUS è decocto scilicet salviæ & saponis veneti confectum: pluris demùm habetur aqua Golardiana; ut alia innumera ab Authoribus tradita missa faciamus. Sed angue pejus vitentur topica repercutientia, refrigerantia & narcotica: nec minùs periculosa censerì debent axungia, olea & mucagines, quæ ab imperitis sæpiùs usurpantur; cùm ab horum præposterâ administratione intùs recedat erysipelas, vel gangrænâ corripitur. Imò & topica cujuscumque indolis omitti debent, si erysipelas caput aut faciem occupet; ne materia morbofa ad cerebrum vel fauces, undè phrenitis & angina, pellatur. Ubi verò tardiùs quàm par est progreditur hæc eruptio; si tempore incrementi subsideat; aut absoluto stadio minime evanescat; plura impendent infortunia, quibus prævertendis opportunè præcipiuntur cardiaca &

diaphoretica. Egregiam etiam opem confert venæ sectio, si materia morbosa devia cerebrum impetat; vel quodvis calamitosum symptoma excitet. Sub hâc rerum conditione cæteris fortè præfidiis palmam præripiunt vesicatoria, cruribus vel dorso admota. Erysipelata demùm crebrò recurrentia præcaveri solent venæ sectionibus, catharticis blandioribus, temperantibus & aperientibus minoribus, depurantibus & antiscorbuticis. Faustè in eundem scopum adhibentur lacticia & aquæ minerales: nec posthabenda balnea tùm domestica, tùm à thermalibus parata; quibus prophylacticis morbi fomes eradicari solet.

ERYSIPE-
LAS.

RUBOR SCARLATINUS.


PROXIMÈ ad erysipelas universale accedit rubor scarlatinus, totum corporis ambitum subtumidum colore cinnabarino inficiens, cum eo tamen discrimine ut nullis papulis exasperetur morbus, de quo in præsentiarum. Hanc eruptionem præeunt rigor & febris, dolor capitis & oculorum; illa-crymatio cum conjunctivæ rubore & palpebrarum gravitate; angina spuria, tussis, spirandi difficultas, anxietates, &c. quæ vigent donec circa quartum morbi diem facies rubore perfundatur, & paulò post truncus & artus pari modo afficiantur. Exanthemata seorsim erumpentia brevi expanduntur & in unum coeunt, quæ septimo à primâ invasione die evanescere solent, cute remanente nonnihil asperâ & squamosâ, vel furfuraceâ; adeò ut non secùs ac erysipelas, morbilli & variolæ, peculiari stadio submittatur rubor scarlatinus. Ab erysipelate universali haud discrepare videtur quædam ruboris species à nonnullis Authoribus tradita, sub quâ emergunt pustulæ miliares vel vesiculares, nunc exiles, nunc latiores quibus tota cutis exasperatur; sed illud dubium in medio relinquimus. Ad genuinum ruborem scarlatinum proni sunt infantes & juvenes, sed frequentius invadit hæc efflorescentia virgines & mulieres haud ritè menstruatas. Non secùs ac morbilli, quibus proximè accedere videtur, epidemice grassatur hic affectus & etiam per contagium propagari videtur; non solum ergà infantes, quibus familiaris censetur; sed etiam ergà adultos, quibus sub constitutione epidemicâ proximè parcit.

Minorem tamen metum incutere solet rubor scarlatinus, qui aliàs simili ritu, sed placidiùs sua percurrit tempora. Haud tamen periculi expers est, ob reliquias quas nonnunquam post se trahit; obstructions nempe & infarctus viscerum, tùm pectoris, tùm abdominis, quæ grave sanè curantibus faceffunt negotium; præsertim si accedant spirandi difficultates, & imi ventris intumescencia, quæ colluviei serosæ in pectoris vel abdominis cavo jam stagnantis suspicionem movent. Sed rarò, ut verum fateamur, impendent hæc infortunia, ni à rectâ vivendi normâ deflectant ægri, vel

RUBOR
SCARLATI-
NUS.

præposteris remediis impugnetur hic affectus, qui sub hoc conspectu, haud minùs fortè calamitosus, ac variolæ & morbilli, censerì debet.

Simplicioribus peragitur ruboris scarlatini *curatio*. Itaque nonnunquàm, ineunte morbo, conducit venæ sectio; nec vetatur post eruptionem, si pulsus vehementior, & dolor capitis gravativus sanguinis exuberantiam arguant. Sub quo rerum statu, urgentiori succurrendum esse, apud omnes metu retrocessionis minime obcæcatos, in confesso manet. Intereà largâ manu propinari debent per totum morbi curriculum diluentia & temperantia vulgatiore. Quoad diaphoretica, aliave remedia, quæ sub variolis & morbillis adhibere solent isti, qui uni quæstui inservientes, ad altantium nûtum se componunt, haud nisi summâ cautelâ præscribi debent. Præsentaneam opem ferunt vesicatoria dorso, cruribusve admota, si cerebrum quocumque modo lædatur. Faustè etiam ad eundem scopum præcipiuntur cathartica, &c. Aliàs haud priùs quàm decidant squamæ, in usum trahuntur hæc postrema, quæ tùm pluriès iterari debent ad prævertenda infortunia, quæ, uti jam innuimus, non secùs ac post morbillos & variolas, pessimum sæpiùs habent exitum.



M O R B I L L I.

HANC, pro solito Scriptorum more morbillos, vernaculè (*la rougeole*) & variolas, uno & eodem capite complectimur, cùm haud minùs ab invicem discrepent hîc morbi, quàm efflorescentiæ, de quibus suprà, tùm ratione indolis, tùm ratione faciei & progressûs. Attamen similis fermè morbillorum & variolarum *invadendi modus*, imò & sæpiùs agrè distinguuntur, tàm inter prodromos, quàm sub primâ eruptione, hî affectus; adeò ut præcipiti iudicio haud rarò deludantur vel soleriores clinici, nî notâ constitutione epidemicâ suffulciantur. Haud defunt tamen indicia quibus uterque morbus innotescere valet: prima enim morbillosa exanthemata lenticularia, & in areolas plerùmque congesta numerosiora observantur, quàm in variolis, etiam confluentibus. Nec alia fortè differentia inter utriusque morbi papulas erumpentes; sed morbo progrediente spectabiliores se produnt notæ, adeò ut in propatulum veniat utriusque morbi character, uti è mox recensendis patebit. De morbillis spurii ad genus erysipelaceum referendis suprà egimus.

Frigore tremulo, quod excipit calor febrilis, *exordium capiunt morbilli*; ac nonnunquàm alternant primo die alior & æstus. Dein excandescit febris, gravatur caput & urget somnolentia; accedente in plerisque sternutatione vel hæmorrhagiâ narium cum solamine. Intereà tument palpebræ; illacrymant flammei & coruscantes oculi, cum dolore mordaci. Inflammatorius rubor & ardor decumbit in fauces, cum siti & anginosâ de-

glutitione : exurgit tussis sicca cum spirandi difficultate : porrò plures vomitu , torminibus & alvi fluxu torquentur : his addere lubet anxietates , lumborum dolores , &c. quæ eruptionem prænuntiant. Circà quartum morbi diem se prodit efflorescentia, maculis lentiformibus , vel papulis depressis , quæ passim & confertim erumpentes diversas areas , tactu asperas præbent. Hæ pustulæ humiles , suppurationis nesciæ , in facie & cer-vice primò conspiciuntur : dein brevi se diffundunt ad pectus , & juxtà ruboris scarlatini & variolarum normam , ad alias partes propagantur. Ab eruptione variolosâ compescuntur symptomata denuò recurrentia ; sed perstant hæc phænomena , peractâ efflorescentiâ morbillosâ , quæ ruboris scarlatini instar post triduum evanescit ; cute remanente squamosâ , vel pulvere quodam farinaceo quasi interspersa : nec semper ab ejus extinctione reprimitur morbus , cum non solùm febris , tussis & spirandi difficultas aliquandiù producantur ; sed nonnunquàm etiam ingruant pectoris phlogosis , diarrhœa , aliique affectus , primario morbo prægresso longè periculosiores. De commentitiâ illâ febre morbillosâ quatuordecim dierum de quâ mentionem subjecit SYDENHAMUS , nil addimus ; cum è genere sit febrium miliarium , putridarum , &c. de quibus suo loco , & nullam , pace tanti viri , affinitatem habeat cum morbillis legitimis.

Nemo nescit morbillos , quibus præsertim obnoxii sunt infantes & juvenes , *rareò ominosos* cenferi ; ni inconditâ victûs ratione , vel præposterâ medicatione , à suâ indole desciscant. Ab inconsulto enim usu cardiaco-rum aliorumque remediorum stimulantium , urgente tussi , sub spe promovendæ eruptionis , sæpiùs sobolescit peripneumonia , quæ sub hac conditione plures illuc mittit undè negant redire quemquam , vel phthisim , aliumve morbum calamitosum & chronicum post se trahit ; adeò ut morbillorum reliquiæ sint ipsomet morbo magis pertimescendæ. Faustum exitum hariolari licet , si efflorescentiæ accessio & recessus , constitutæ à naturâ normæ suprâ exarata , submittantur. Haud inanem econtrâ metum incutit maturior vel tardior eruptio : ægros etiam in vitæ discrimen trahit , si ultrâ quattiduum producat , si renascantur papulæ novæ , si maculis gangrænodeis defœdentur. Sinistri demùm sunt augurii quævis symptomata , quæ de affectis cerebro , pulmonibus , visceribusque abdominalibus , suspicionem movent ; cum nullum fermè sit dubium quin copiosiori pustularum morbillosarum proventu labefactentur organa interna , veluti docent *secta cadavera* ; quæ aliàs exhibent viscera tuberculosa ; abscessus cerebri ; pulmones pure scatentes ; omentum putridum & dilaceratum , &c.

Simplicissimam vel nullam *medelam* expostulant morbilli , juxtà constitutum à naturâ ordinem sua tempora percurrentes : sed secùs se res habet , si graviora se proferant symptomata , ad quæ divertenda egregiam opem præstat , post primam invasionem , venæ sectio , cujus beneficio declinatur phlogosis : opportunè etiam sub eodem tempore exhibetur emeticum , quo everitur primarum viarum saburra , quæ , procedente mor-

MORBILLI.

bo, labem sanguini inferre solet. Rarò iteranda est venæ sectio, ni urgeant faucium & pulmonum inflammatio, spirandi difficultas, febris vehementia, &c. Aliàs non solùm supervacaneæ, sed noxiæ cenferi debent numerosæ venæ sectiones; quidquid obganniant contrariam methodum sectantes, qui suis hypothesebus ducti, nil præter inflammationem vident in omnibus fermè morbis acutis: pluriès enim haud citrà cordolium observavi sub constitutionibus epidemicis agros naturæ commissos evadere, dùm huic inconsultæ methodo submissi, stipato agmine, ad æthereas sedes convolabant.

Inter usitatiora & efficaciora *præsidia* numerari debent diluentia & temperantia; nonnullisque profunt nitrosa. Quoad cardiaca & alexiteria, olim plus æquo celebrata, & ab insciâ plebe etiamnùm comprobata; in desuetudinem fermè abierunt, tùm in morbillorum, tùm in variolarum curatione: haud tamen, me iudice, planè exulare debent, si vires deficiant, si haud ritè procedat eruptio, vel insolita pustularum remora. Aliàs blandiora duntaxat diaphoretica usurpare licèt, scorzoneram scilicèt, borraginem; flores papaveris rhœados, sambuci, &c. Urgente tussi conducunt pectoralia, demulcentia & anodyna. Profunt decoctum album, diascordium, &c. si solutior alvus vires emungat: sub ejus verò nimia contractione in usum vocanda sunt enemata emollientia & laxantia. Antispasmodicis impugnantur affectus convulsivi: nec vetantur narcotica urgentibus vigiliis, tussi & doloribus; sed cum hisce postremis à SYDENHAMO plus æquo fortè decantatis cautè mercandum, præsertim sub infantili ætate. Postremò anginx spurix prospicitur gargarismatibus demulcentibus, & cataplasmatibus emollientibus: foveantur oculi laci aquâ rosarum, plantaginis, &c.

Notare expedit *peffimum morem* invaluisse, ut hoc morbo decumbentes inter lectorum cortinas includantur, & sub stragulis quasi sepeliantur; hinc minimè mirum si majori perspirationis dispendio obrutis viribus, res in deteriora ruant, & plures illius lethiferi præjudicii luant pœnas. Quapropter ab assuetâ decumbendi ratione minime deflectant morbillis & variolis correpti, eâdemque culcitrà cooperiantur. Alius viger, sed sanior, mos, ut *sublato morbo*, curationem claudant *cathartica*, bis, terve repetita: multiplici enim experienciâ ratum manet saluberrimam fuisse hanc methodum; & caveant, qui hanc posthabent, ne quid humanitùs ipsis accidat; nec desunt sanè hujusce infortunii exempla. Morbilli demùm, non secùs ac variolæ, aliæque eruptiones cutaneæ, nonnunquàm intùs recurrunt; sub quo rerum statu nil non movendum ut declinetur viscerum infarctus phlogodeus, & devia materia morbosa ad cutem vel sentinam intestinalem revocetur. Hanc opem præstant venæ sectiones, cardiaca & diaphoretica; sed his palmam præripiunt vesicatoria, nec suis laudibus defraudantur cathartica.

V A R I O L Æ.

VARIOLÆ.

NEMO nescit variolas *discretas* nuncupari quarum pustulæ distinctæ, & ab invicem remotæ conspiciuntur; *confluentes* verò, quarum papulæ invicem hærent, vel plures in unam conflunt, quasi in corymbos aggestæ. A veritatis, ni fallor, scopo aberrant qui variolas *discretas* & *confluentes* multùm ab invicem discrepare autumant; adeò ut duplex exhinc emergat curandi ratio. Multiplici experienciâ edocti asserere minime dubitamus illud commentitium discrimen, in solo unius & ejusdem morbi gradu versari. Nec desunt exempla discretarum, ipsismet confluentibus, contrà vulgariùs placitum, graviorum; ràm ratione uberioris popularum proventûs, quàm respectu truculentiorum symptomatum. Licèt per se pateat hic morbus, qui ex traduce propagatur, ægrè tamen nonnunquàm innotescit ob innumeras efflorescentias quæ hunc mentiri, incautosque decipere solent. Notare expedit priusquàm variolarum adumbrationem aggrediamur, pustulas solitarias magis prominentes & fastigiatas observari; confluentes verò & congestas magis depressas esse, sed cuti subtumidæ insidere. Ex universo corporis ambitu erumpunt variolæ, haud exceptis palmâ manuum, plantâ pedum & genitalibus: nec parcent oculorum albo, internis naribus, ori & faucibus. Lubuit SYDNHAMO regulares vocitare, quas nulla graviora concomitantur symptomata; pro irregularibus verò habere quæ sub malignâ, ut inquiunt, facie se produnt, licèt discretarum, vel confluentium ordinem subeant.

Quatuor stadiis continetur hic affectus, præludio nempè, eruptione, suppuratione & exsiccatione. Rigorem & febrem quibus exordium capit primum variolarum stadium, excipiunt cephalalgia, somnolentia vel delirium, sternutatio, ructus nidorosi, nausea & vomitus, cardialgia & ventris tormina, dolores dorsi, lassitudines, stranguria, &c. quorum vehementia morbum graviolem prænuntiat. *Eruptionem* nonnunquàm pruriginosam prægredi solet sudor plus minùsve conspicuus. Exanthemata, pulicum morsui primò simillima, circà quartum morbi diem, incipiente scilicèt secundo stadio, se produnt in facie, manibus, cervice & pectore, dein per totum corpus propagando. Febris hâc eruptione compescitur, vel planè fugatur: hæmorrhagia narium, infantibus præsertim familiaris, hanc efflorescentiam præit vel concomitatur. Intereà oculi flammei lumen refugiunt, nec rarò procedente morbo, palpebris ultrà modum tumentibus, planè clauduntur. Tunc temporis totum caput & cervicem occupat intumescencia nonnullis molestissima, quæ juxtâ eruptionis ordinem universum corporis habitum peragrat; adeò ut erysipelas universale basim præbere videatur papulis variolosis, quæ, uti jam innuimus, os, fauces & nares etiam infestare solent; sub quâ rerum conditione ægrè, vel summâ

VARIOLÆ.

cum molestiâ deglutiunt ægri, & quodam ptyalismo laborant adulti, quo nonnunquàm excoriatur lingua, cum variis oris partibus; dùm alvus solvitur in infantibus. Prominentiores papulæ in suppuratum dein abeunt; quo tempore, tertio scilicèt stadio, febris excandescit, pulsusque plenior evadit: *febris secundaria*, apud nonnullos, audit hic status; nec desunt qui suis hypothesibus ducti, commentitiam putredinem incusarunt. Nusquàm tamen desinit febris in confluentibus mali moris, quæ sub purulentiâ tantummodò exacerbatur. Delirium & somnolentia sæpiùs, uti suprâ inculcavimus, eruptionis prodromi, per totum morbi curriculum etiam ingruere queunt, non secùs ac convulsiones, alvi fluxus dysentericus, &c. sub quibus circumstantiis ægri circà undecimum & decimumquartum ab invasione diem, vel sub quarto morbi stadio, in vitæ discrimine versantur, antè scilicèt crustarum casum, qui inter duodecimum & decimumquintum accidere solet; servato eruptionis ordine; adeò ut pustulæ faciei sæpiùs evanescant, cum papulæ pedum vix in suppuratum abeunt.

Neminem fugit *variolas ominosiores* esse sub ætate provectâ, quàm in infantili vel juvenili. E faciei conspectu, & ab spirandi modo, vulgò erui solet *prognosis*: stupenda enim capitis & cervicis intumescencia, cum uberrimo pustularum proventu & anhelatione, summam incutit formidinem. Si primo alterove morbi die erumpant pustulæ variolosæ, res est ancipitis aleæ, nec minùs periculosa censetur tardior eruptio. Felicem eventum hariolari licet, si pustulæ phlogodæ ritè promineant: inter verò exitialia signa numerantur pustulæ confertim erumpentes, exiguæ vel depressæ, crystallinæ vel verrucosæ, necnon atro lividæ, quæ demùm agrè maturescunt & in crustas vertuntur. Haud minus portendit periculum harum retrocessus, nullâ remanente cutis intumescenciâ. Febris post eruptionem persistens morbum gravem minatur, nec vano metu clinicos terrent efflorescentia morbillosa, alteriusve generis, & exanthemata atro-livida vel gangrænodea, linguæ labiorumque nigredo, &c. Mali est ominis, ineunte morbo, uberius urinæ proventus. Pro exitiali habetur mictus cruentus; at minùs pertimescendæ aliæ hæmorrhagiæ, præsertim in infantibus, & labis scorbuticæ planè expertibus: innoxia demùm censentur catamenia inter morbi curriculum erumpentia. Funestum eruitur indicium ab immani sudore sub primis diebus, pulsu debili erumpente; inter calamitosa symptomata etiam recensentur alvi fluxus, præsertim dysentericus, alteriusve prævæ sortis, ob pustularum subsidentiam quam post se trahit. Haud levem metum etiam incutiunt ischuria & dysuria; convulsiones post eruptionem accedentes; ptyalismus sufflaminatus in adultis, vel diarrhœa suppressa in infantibus, &c. Nec sublato morbo, uti suprâ notavimus, incolumes evadunt ægri, cum alia ipsis impendeant infortunia; abscessus nempe, non solùm partes externas invadentes; sed sæpiùs intrà viscera delitescentes, gangrana & caries, alii-que effectus exitiales, ut de cæcitate, surditate, crurum resolutione, &c. nil addam.

E præhabitis colligitur variolas clades & funera post se trahere; nùm hanc stragem avertere possit *insitio*, apud nonnullos gentes recepta, de quâ tamen multùm apud nos controversitur? dubitare licet. Verum quidem est, si experimentis hætenùs publici juris factis adhibenda sit fides, quod vix unus inter trecentos insertis variolis laborantes, fatis cedat; dum variolæ legitimæ unum è decem neci dant; ut sileamus de egregiâ vultûs formâ fœdis cicatricibus & foveis à variolis legitimis immutatâ & deturpatâ: quod sanè, primâ fronte, probare videtur hanc morbum lethalem præcavendi methodum, summam laudem mereri, & medicinæ praxim ditare: sed silentio minime premere debemus quod constet è nuperrimis observationibus plures post peractam insitionem, ab omni metu solutos, hoc morbo iterum, haud sine præsentis vitæ discrimine, conflictatos fuisse; quod sanè quidem, ultrâ omne dubium, arguit inefficacem esse hanc prophylaxeos speciem. Præterea pro comperto etiam manet non minùs per contagium propagari variolas insitas, quàm legitimas; cur minime mirum si grassetur hic morbus, & majorem stragem exerceat, ubi adhibetur & viget insitionis ars; adeò ut, ni fallat tradita computatio in Angliâ capta, plures à variolis occubuerint post admissam hanc encheiresim quàm antea. Quid hinc sit inferendum, solertissimis iudicibus sub quibus lis est pensitandum relinquimus; ut ad *cadaverum extispicia* deveniamus, quibus in apricum veniunt viscera, pulmones nempe, hepar, pancreas, ventriculus, intestina, &c. papulis variolosis, à cutaneis vix absimilibus, obducta: hisce etiam pustulis nonnunquam scatent trachea & bronchia. Præterea passim occurrunt infarctus & inflammationes, gangrænæ & putredines. Cerebrum & cerebellum in sese subsidentia reperiuntur, horumque vasa sanguine turgentia & varicosa conspiciuntur. Obvia fit nigredo duræ meningi impressa & cerebri substantiam attingens. Reperiuntur abscessus intrâ pyxidem osseam, nonnunquam carie læsam. Visenda se præbent cor aridum; vasa flatu turgida; hydrops pericardii; stomachus ulcusculis exesus; omentum laciniatum & putridum, &c. Detegitur colluvies serosa, sanguinea vel saniosa; tùm intrâ cerebri recessus, tùm in pectoris & abdominis cavo, &c.

Ad variolarum *curationem* sese accingentes, primò aëris frigidioris, vel fervidioris inclementiæ prospicere debent; posthabitis insulsæ plebeculæ præjudiciis. Simplicioribus peragitur variolarum optimæ notæ medela; ni consultiùs naturæ planè committatur: sed ubi suprâ traditis phænomenis exacerbatur morbus, arte medicâ opus est. Itaque hoc ineunte ancipitis moris affectu, sub ætate juvenili vel adultâ, unâ vel alterâ venæ sectione deplenda sunt vasa: dein nullâ morâ, emetico vel cathartico foràs exturbanda primarum viarum saburra; quæ aliàs inter morbi stadium grave clinico facessit negotium: mirari sanè quidem subit altum BOERHAAVII de exquisitissimo hocce præsidio silentium. Notare expedit numerosas *venæ sectiones*, quarum morem, reluctante experienciâ, inducere tentarunt quidam inassuetorum cupitores, inutilem plerùmque operam ludere;

VARIOLÆ.

sæpiusque, calorem nativum restringendo, noxias vel lethales evadere. A copioso enim sanguine detracto hæmorrhagiis & viscerum infarctui minime occurritur, uti autumarunt huicce methodo addicti: quod dilucidè patet è propriis observationibus, & autopsiâ cadaverum. Haud tamen quovis morbi tempore vetatur, cæteris consentientibus; venæ sectio; si urgeat suffocatio; cohibeatur ptyalismus: aliudve atrox suboriatur symptoma: sub quibus sanè, vigente febre secundariâ, sanguinem mitti jubebat ipsemet SYDENHAMUS: sed scire juvat inefficaciorem fore hanc evacuationem adversus mictum & sputa cruenta, aliamve hæmorrhagiam; & angue pejus fugiendam sub variolis, ut inquirunt, malignis. His de venæ sectione præmissis, ad cætera præsidia devenimus: inter quæ usitatiora & magis proficua censeretur debent diluentia, temperantia, & diaphoretica blandiora; prisanæ scilicet è gramine, liquiritiâ, borragine, scorfonerâ, floribus papaveris rhæados, &c. In familiarissimum usum venit decoctum lentium, ni fallor, innoxium; licet ea opinio vetustissimæ superstitioni, à formâ lentium papulis variolosis consimilium depromptæ, inniti videatur. Profunt, urgente siti & corpore plus æquo æstuante, aqua pulli vel carnis vitulinæ, emulsiones, aqua succo limonum imprægnata, &c. Sed haud citrà periculum usurpantur hæc postrema; si morbus lentiùs quàm par est progrediatur: nec vetatur, sanguine ultramodùm incandescente, spiritus vitrioli, quem summis laudibus extollit exercitatissimus TISSOT: sed solerti manu pertractari debet illud remedium.

Cathartica inter morbi curriculum, haud nisi urgente necessitate, vel suppresso ptyalismo præscribi debent: sed *variolis declinantibus*, circà scilicet crustarum casum tutò usurpantur; imò, non secùs ac in morbillis, pluriès sunt repetenda, ad præcavendas morbi reliquias sæpiùs immedicabiles vel lethiferas. Intereà alvus per totum morbi decursum servanda est libera; præsertim si plus æquo tumeant facies & cervix, sub quo statu opportunè adhibentur serum lactis, pruna damascena, cassia, aliaque laxantia blandiora; vel congrua injiciuntur enemata. Aliàs à catharticis abstinere debent, qui ægrorum saluti consulunt: ab hâc enim methodo ne lato ungue recedebant artis proceres, fortè huic plus æquo addicti, quàm tamen inconsultò posthabent nonnulli, inter recentiores polypharmacos, quos pudet veterum vestigia premere. Mirum sanè, in gravissimos scopulos quotidie impingentes, ab infelici medelâ suis opinionibus obcæcatos, minime desistere. Nec feliciùs, me judice, collineant, qui alvum ignaviorem enematis emollientibus referare recusant; hisce rationibus ducti quòd puris confectioni plurimùm faveat alvus compressa; nec hocce errore immunis erat ipsemet SYDENHAMUS; aliàs præclarus praxeos medicæ arbiter.

Narcotica cautè & tempestivè adhibita haud infimum locum, annuente clar. DE HAEN, obtinent in variolarum curatione. Nùm tamen erroris arguere licet ipsummet SYDENHAMUM? juxtà quem opium æquè specificum pharmacum in variolis confluentibus censeretur debet, ac cortex peruvianus sub febribus intermittentibus; qui scilicet post absolutam eruptionem,

diacodium bis, terve singulis diebus exhibere solebat; etiam vigente delirio: quod, pace tanti viri, incongruum arbitramur. Hypnotica sanè, humorum ferociam reprimendo, doloribus occurrunt, somnum accersunt; sed morbum quodam velamine obducunt, & producant: delirium prætereà hisce remediis in furorem sapiùs vertitur; nedùm compescatur; & alvus comprimi solet. Ideò cavendum ne alvina excretio, nonnunquam saluberrima, ab opiatís intempestivè sistatur. Aliter sentiendum de pyralismo, qui ab hypnoticis, experiètiâ teste, haud imminuitur; quin potiùs fovetur, & sufflaminatus restituitur. Insuper reformidanda esse hæc remedia sub delirio, convulsionibus, tumore faucium & difficili respiratione, pro inconcusso manet apud solertiores practicos. Opportunè verò exhibentur adversùs tussim ferociorem pectoralia demulcentia: conferunt, imminente hæmorrhagiâ, aqua oryzæ, ptisana consolidæ majoris, emulsiones, nitrosa, &c. nec vetantur adstringentia & styptica externa ad illam cohibendam. Profunt alexiteria & cardiaca inter eruptionem difficilem, vel pustularum remoram, pulsu perstante debili; inter usitatiora recensentur pulvis comitissæ, vel viperarum; syrupus de tunlcis, lilium, confectio alkermes, &c. sed cæteris, sub hac rerum conditione, fortè præstat vinum generosum vel Hispanicum: meminisse autem oportet hoc naturæ opus esse. Si verò pustulæ variolosæ retrocedere videantur; præter postrema remedia, quæ semper cum cautelâ adhiberi debent, ad vesicatoria furis ad-mota confugiendum. Prodest sub hoc rerum statu, annuente clar. Tissot, infusum florum sambuci, ptisanæ instar propinatum: nec vetatur in urgentiori casu venæ sectio.

Alvo plus æquo solutæ, in adultis, medentur nitrosa & absorbentia: sed nil fortè sub hoc statu, uti jam notavimus, reformidando, efficacius ipsomet emetico reperitur; post cujus actionem tutò usurpantur *stomachica* adstringentia, rosæ nempe rubræ, sumach, cortex granatorum, sanguis draconis, aliaque id sortis quibus proficuè sociantur hypnotica. Nil verò movendum in infantibus alvi fluxu correptis; hanc enim evacuationem ipsis saluberrimam fore jam suprà notavimus. Profunt acida sub mictu cruento: ischuriam respiciunt gramen, dens leonis & parietaria, sal Glauberi, spiritus salis dulcis, &c. Suas laudes merentur sub convulsionibus pulvis de gutteta, cæteraque antispasmodica. Si quædam putriditatis in primis viis, vel in vasis sanguineis se præbeant indicia; juvant spiritus sulphuris, vitrioli, aliaque antiseptica. Sin autem ritè depleto ventriculo urgeant nausæ & vomitus; proficuè adhibetur succus limonum cum sale absinthii commistus. Ubi deniquè variolas excipit febris duplex tertiana, aliave intermittens, ad corticem peruvianum confugere licet, cujus sub hoc casu efficacia, multiplici experiètiâ constat. His de curâ internâ absolutis; *ad remedia externa* pro instituti ratione devenimus.

Anginam spuriam inter molestiora & frequentiora variolarum symptomata numerari jam inculcavimus; hinc danda est opera ut leniatur; hanc opem præstant *gargarismata* è lacte, decocto caricarum pinguium, &c.

VARIOLÆ.

parata. Nimiùm æstuentes faciei pustulæ foveri solent, cum solutione spermatis ceti in oleo amygdalarum dulcium, cremore lactis vel alio quocumque demulcente: nonnulli sunt inter medicinæ proceres, qui illas ad maturitatem perductas refecare, vel acu argenteâ perforare velint; sed incongrua, ni fallor, hæc est methodus; quâ tardior fit crustarum casus; vel altiores cuduntur foveæ. Si exsiccatione opus sit, conducunt creta, cerusa, aliaque consimilia cum cremore lactis, vel unguento rosaceo mista: sed hæc topica haud semper adhibere fas est. Oculis opitulantur collutiones cum lacte, aquâ althææ, aliove demulcente: parùm juvare videtur tralatitium illud collyrium ex aquis rosarum, plantaginis & croco, paratum: danda præsertim est opera ut minime agglutinentur palpebræ; ne inibi stagnans tabum coërcitum, ulcera tùm in bulbo oculorum, tùm in facie internâ palpebrarum, infligat; quæ erosiones grave dein curantibus facessunt negotium; ni admoto lapide infernali deurantur. Jure celebrantur *balnea calida*, si ægrè erumpant variolæ; nec inutilem sub eodem scopo opem ferunt pediluvia, vel fots cruribus admoti. Vesicatoria, suprâ laudata, non solum eruptionem retrogredientem revocare; sed etiam caput affectum levare queunt: ac sub hoc duplici conspectu, in frequentissimum usum veniunt. Nonnulli demùm de minimis solliciti, maculas cutis pertinaciores, quas relinquunt variolæ, delere tentant oleo ovorum, vel myrrhæ per deliquium, aliove cosmetico: sed parùm cum hisce topicis proficitur; hinc rectiùs, ni fallor, tempori committitur horumce stigmatum, nil sanitati dementium, extinctio. Quod ad cæteras *variolarum reliquias* attinet; cibi nempè fastidium, febrem lentam, parotides, furunculos, corneæ ulcuscula, fistulam lacrymalem, tumorem œdematosum, &c. haud peculiarem efflagitant medelam: sed suam quisque morbus curam alibi traditam, sibi vindicat.

Absolutis quæ de variolis legitimis erant dicenda; ad *aliam* quamdam species, *variolas* scilicet *nothas*, vernaculè *petite verole volante*, devehimur. Multùm tamen ab invicem discrepant, si primam faciem excipias, prædicti affectus cognomines; cùm ratione indolis & stadii, ad ruborem scarlatinum, & morbillos, propiùs accedat morbus de quo in præsentiarum. Quod tamen non impedit quominus incanti vel imperiti, primo conspectu decepti, variolas spurias pro legitimis habeant. Si verò accuratiori examini submittantur papulæ variolarum spuriarum, pellucidæ vel crystallinæ, ob apicem vesicularem deprehenduntur; nihilque præter serum recondunt. Prætereà intrâ triduum circiter solvuntur variolæ spuria; quas præire solet levis febricula. Quod curam spectat; composito congruo victûs regimine; parùm aut nil, inter hujusce morbi curriculum, opus est factu. Sed ficcis papulis, unum vel alterum catharticum præcipere juvat: nusquam enim hanc simplicissimam cautelam posthabent artis proceres. Superfluum sanè foret his minoris momenti diutiùs immorari.





PRAXEOS MEDICÆ

PARS PRIMA.



LIBER TERTIUS
MORBOS SEQUIORIS SEXUS,
ET INFANTUM COLLIGENS.



SECTIO PRIMA.
DE MORBIS VIRGINUM ET MULIERUM.



H Y S T E R I S.

HYPOCHONDRIASI cognatam esse hystericam, virginibus & mulieribus familiarem, è mox dicendis patebit: nec aliud inter utrumque morbum occurrit discrimen, nisi quòd à peculiari alterutrius sexûs temperie, vel notissimæ genitalium fabricæ adscribendâ, eruitur. Inter ægritudines frequentiores jure numeratur hystericus, quæ solis viraginibus, vel difficilem, laboriosamque vitam ducentibus, ferè parcit. Larvatus sæpiùs incedit *affectus hystericus*: aliorum scilicèt morborum faciem induit, gravioresque mentitur: cur minime mirum, si sæpiùs perperam incusetur ab

HYSTERIS.

imperitis ; quotiès scilicèt de morbi charactere anxii , nesciunt quò se ver-
tant. Tantâ tamen ludunt varietate hystericis & hypochondriasis : torque
morbis sociantur , tantâque symptomatum plerumque fugacium catervâ se
proferunt , ut illa recensere vix liceat ; & summis difficultatibus prematur
utriusque *diagnos*. Vita iners & otiosa , mœrores & sollicitudines , zelo-
typia , morbosa in venerem propensio , iracundia , aliæque mentis pertur-
bationes ; inedia diuturnior ; immane sanguinis alteriusve humoris dispen-
dium , hæmorrhagiæ , catameniorum , lochiorumque sufflaminatio , &c.
vulgatiores audiunt *causæ* affectûs hysterici. Fluxum menstruum nonnun-
quàm præit , vel presso pede sequitur hystericis : hanc promovent variorum
horrendorum conspectus ; nonnulli odores , etsi plerisque gratissimi , &c.
sed ab adversis vulgatiorem profapiam ducit ; de quâ ægram , vel adstantes
semper percontari expedit. Systemati nervoso , illæsis utero , cæterisque or-
ganis genitalibus , sapiùs insidere hunc morbum proteiformem & intrica-
tissimum haud dubitare licet : sed etiam à quâdam uteri & ovariorum labe
promoveri hanc morbidam nervorum constitutionem , docent praxis & au-
topsia anatomica : utero enim gerentes & puerperæ ad hystericim *proniore*s
esse nemo nescit : hanc accersunt partus numerosi , mensium vitia , lochia
retenta , &c. Sed hystericim , æquè ac hypochondriasm ab aliorum viscerum
læsione , vel à peculiari lymphæ morbosæ indole nonnunquàm foveri , ultra
omnem dubii aleam positum esse videtur.

Tot signis se prodit *hystericis* ; tantoque symptomatum agmine stipatur ,
ratione grādûs , ætatis , temperiei & victûs generis summè discrepantium ,
ut *morborum ilias* dici mereatur : hinc patet intricatissimam fore hujusce
morbi historiam , quam tradendam suscipimus. Ut à partibus superioribus
exordium capiamus , *caput diversimodè afficitur* ; sapissimè nimirum grava-
tur , cum vertigine & quâdam mentis segnitie : etsi familiaris est dolor
acutus angusto spatio coërcitus , qui *clavus hystericus* vocitatur. Plures
præterea de temporalium pulsatione , de frigore syncipitis & tinnitu au-
rium , conquerruntur. Artus tremore spasmodico nonnunquàm concutiun-
tur ; vel horrendis convulsionibus torquentur , quas excipiunt molestæ lassitu-
dines. Mœrore insuper anguntur hystericæ , quandoque mentis minime
compòtes , nunc alta ducunt suspiria , vel tristitiâ obrutæ illacrymant ;
nunc canentes risu ilia dissolvunt ; adeò ut tùm à maniacis parùm discre-
pent. Nonnullæ perpetuò quasi *pavore* plectuntur , vel à levissimâ causâ :
nimirum si quidpiam delabatur ; si fores ex improvise pulsantur ; si au-
diatur tonitru , clamor , vel quivis inexpectatus strepitus , terrore & cordis
palpitatione corripuntur. Interea erumpunt flatus , ructus acidi vel nido-
rosi , cum sputatione frequenti , nonnunquàm accedente odontalgia. Ter-
rorem injiciunt crebræ *suffocationes* à laryngis & pharyngis constrictione
prognatæ ; adeò ut tumente cervice strangulari videantur ægræ. Plerasque
urget tussis sicca & molestissima : frequentissimæ sunt *cordis palpitationes* ,
quarum tanta quandoque est vehementia , ut adstantium visum & auditum
afficiant : præterea aortæ abdominalis , cœliacæ vel mesentericæ superioris
pulsatio

pulsatio ab admotâ manu in pluribus percipitur: pulsus tamen explorari solitus, nunc exilis & tardus; nunc inæqualis & intermittens; aliàs velox & frequens, deprehenditur; imò & nonnunquàm planè obliteratur. *Febris* quandòque exsurgit, quæ semel, bisve singulis diebus recurrens, intermittentium typum præ se fert. Hæc sunt præcipua symptomata, caput & pectus respicientia; ad abdominalia, &c. devenimus.

Anxietatibus & nauseis vexantur hysterica; imò & sæpiùs erumpunt vomitus enormes ad ileum proximè accedentes. Frequentiores sunt borborygmi & dolores interaneorum; nec rarò saviunt dolores colici, è genere spasmodicorum, qui sæpiùs summam exercent tyrannidem. In nonnullis *inflatur & tumet abdomen*, in quo persentitur quidam *motus undulatorius*, qui non solùm, uti ipsis videtur, ab utero ad regionem epigastricam globuli instar ascendentis, dirigitur; sed etiam ad fauces propagatur; quæ hinc constrictione, uti jam innuimus, spasmodicâ & vehementiori tentantur; de quo phænomeno, nonnullos etiam conqueri hypochondriacos, per transfennam notare juvat. Nonnullæ hysterica potum averfantur, non secùs ac in hydrophobiâ, quæ tùm in suspicionem venit. Urina copiosa & decolor plerumque mingitur; ac nonnunquàm fusca, instar cerevisiæ; alvus nunc solvitur, sed sæpiùs occluditur. Alternant æstus & albor; atque per universam corporis compagem oberrant; crebròque recurrunt oscitationes & pandiculationes: doloribus insuper dorsi, spasmodicâ & molestissimâ crurum sensatione conflictantur hysterica. Emergit demùm crurum intumescencia, quæ decubitu haud evanescit, & digitorum vestigia minime retinet; quibus notis ab œdemate planè discrepare nemo non intelligit.

Suas plerùmque patitur *accessiones* ægritudo hysterica, quæ nonnunquàm stasis periodis, vel certis temporum intervallis redeunt. Has prænuntiant oscitatio, pandiculatio, singultus, borborygmi, æstus & rubor quos excipiunt frigus & pallor, quædam uteri sensatio, &c. Exordium plerùmque capiunt constrictione spasmodicâ faucium & laryngis, quâ læduntur respiratio & deglutitio; ingruunt artuum convulsiones, succedente linguæ intumescencia & aphoniâ. Plures sopore profundo, cum omnium sensuum abolitione corripuntur; non secùs ac in apoplexiâ, pro quâ ab imperitis habetur hic status, sui insciæ jacent: sed maxillæ contractio insultrûs hysterici characterem prodit; sub quo respiratio anhelosa, cum roncho, apoplecticis familiaris, planè deficit. Sed minime reticendum *hystericam invasionem* ad certum gradum provectam, haud rarò in genuinam apoplexiam, imò & hemiplegiam facessere: attamen ab antecedentium accurato examine patet utriusque morbi discrimen: paroxysmum enim hystericum præeunt, uti suprâ notavimus, interaneorum spasmus undulatorius cum abdominis inflatione; linguæ & cervicis intumescencia, convulsiones epilepticis vix absimiles; quibus non solùm artus, sed etiam pectoris & abdominis muscoli corripuntur, qui sanè prænuntii planè desunt in apoplexiâ.

HYSTERIS.

Syncopes etiam typum, quo nonnulli decipiuntur, præ se fert *injuvatus hystericus*; sed fœdus faciei pallor, & sudores frigidi, syncopes characterem produnt; quæ prætereà brevi fugatur; dùm accessio hysterica ad plures dies protelari potest. Pulsus tamen in nonnullis hystericis, non secus ac sub syncope, planè obliteratur; imò & pectoris munia aboleri videntur; adeò ut haud obscuretur speculum ori & naribus admotum; nec nutet proximi cerei flamma: cur sit ut sub hâc rerum conditione frigida hysterica animam egisse videantur, & pro mortuis habeantur; atque pessimo sanè fato sepulturæ nonnunquam tradantur. Attamen solo conspectu oculorum qui post obitum suo nitore planè defraudantur, erui possunt latentis vitæ indicia, quod sanè benè notandum: huicce signo addere licet phlyctænas ab imposito vesicatorio, quod sanè ne minimam quidem actionem exerit in cadavera. Insuper scire expedit quasdam hystericas, etsi immobiles jacent, & nullam vocem edunt, visus tamen & auditus quodammodò esse compotes; nec intellectu defraudari; cum nonnullæ cogitationes nutibus exprimere queant: adeò ut ab iracundiâ, aliove vehementiori animi pathemate nonnunquam exsuscitentur & expergiscantur: quod observasse memini in nobili muliere quæ pluribus abhinc diebus immota jacebat: solitis sub hoc statu incassum adhibitis præsidiiis; de admovendo vesicatorio, quod suprâ modum averfabatur experta ægrotans, opus erat: dùm Chirurgus ad hanc operam sese accingit, irâ percita decumbens, quasi collectis viribus exsurgit, validioremque colaphum obstupenti Chirurgo infregit, ac in pristinum statum incidit; qui aliis auxiliis, vel spontaneis naturæ viribus, paulò post cessit. Nunc brevi fugatur, nunc ad plures dies protelatur paroxysmus hystericus; qui haud rarò, præmissis altis suspiriis, sudore solvitur: quo superato, imaginatio in plerisque læditur: plures enim in effusissimos cachinnos solvuntur, milleque gestus ridiculos edunt: donec mente sanâ, de dolore capitis gravativo & quâdam obnubilatione, ac totius corporis molestâ segnitie, æquè ac verberibus contusæ fuissent, conquerantur.

Hysteris, licet curatu difficillima, & omnium industriam superet, plerumque tamen *plus infert terroris, quàm mali*. Nihilominus ab insultu vehementiori nonnullæ rapiuntur hystericæ; cum hic affectus, uti jam inculcavimus, ad summum acuminis gradum increscens, in soporem profundum, vel genuinam apoplexiam facessere queat, cujus characterem ultra omne dubium prodit haud rarò succedens hemiplegia. Aliàs diuturnior & annosus hic morbus multum affert incommodi & tædii; imò & sæpius clancularias vitæ ostruit insidias. Iterum etiam accessionem hystericam sæpius excepisse constat; nùm tamen huic causæ innitatur hæc hepatis læsio? cæteris examinandum relinquimus. Idem esto judicium de nonnullis aliis affectibus, fortuitò post hystericum caput exerentibus. Aliud impendet malum à diuturniori hysteri, nempe atrophia planè immedicabilis, cui obviam ire minime licet; si à vitio quodam organico uteri, alteriusve visceris, primarius foveatur morbus.

Seções cadaverum exhibent ovaria mole ampliora, aliove modo labefactata; continent nempe laticem, nunc limpidum, nunc subluteum, nigricantem, sordidum, purulentum, &c. Materiam recondunt sebaceam, caseosam vel gypseam, pilos, ossa, &c. Ex hisce organis skirrhosis erumpunt tubercula, hydatides, aliive tumores cystici, ad pugni magnitudinem & ultrà, nonnunquam accedentes. Simili ferme ratione contaminata deprehenduntur uterus, tubæ fallopianæ, & ipsamet vasa spermatica; quæ scilicet substantias diversæ indolis, æquè ac viscera, colligunt. Cervix uteri cicatrice planè obturata quandòque detegitur: frequentius, quàm vulgò cogitatur, occurrit illud vitium, post hujusce ostii dilacerationem, à partu difficili. De duplici utero, aliisque genitalium vitiis congenitis, sed rarissimis, nil addimus; ut ad viscerum læsiones multò frequentiores deveniamus. Itaque se obtulit ventriculus à sede depulsus, & pelvim ferè attingens: obvium fit duodenum ultrà modum ampliatum, à constrictâ quasi ab injecto vinculo ejus sine: deprehenduntur colon & rectum fæcibus induratis & albicantibus infarcta & obstructa: mesenterium, pancreas, aliave viscera abdominalia inflammata, skirrhosa, hydatidibus fœta, purulentiâ tacta, putrida, &c. se præbent: nec rara est hernia epiploica. Pulmones occurrunt skirrhosi, tuberculosi, aliove modo læsi. Cor nonnunquam mole amplissimum, in conspectum venit: cruore atro & lento turgent ejus thalami; nec desunt polyposæ, ut inquiunt, concretiones, &c. Adinveniuntur postremò stagnationes diversæ sortis, tum in abdominis & pectoris cavo, tum in ipsâmet cerebri pyxide.

Ut ad *curationem* deveniamus, conducit venæ sectio, si adsint plethoræ indicia, vel sufflaminentur catamenia; aliàs inanem operam ludit, vel noxam infert. Proficue sæpius adhibentur emetica & cathartica; sed cave ne hoc plus quàm par est repetito stimulo irritentur crabrones; quod haud rarò evenire neminem praxi edoctum latet. Nonnunquam profunt, ritè depletis primis viis, hypnotica sub dolore colico, aliove atrociori; si urgeat alvi fluxus; & vigiliis pertinacioribus torqueantur ægræ: haud innoxia tamen censerì debent hæc remedia; nec nisi summâ cautelâ in usum sunt vocanda: narcoticis opportunè sociantur antihysterica, & præsertim tinctura castorei. Summè inter paregorica haud immeritò deprædicatur usus internus & externus camphoræ; quam tamen ægrè ferunt plures hysterica: opportuniùs tum exhibetur liquor anodynus mineralis. Suas laudes meretur cortex peruvianus per se exhibitus, vel antihystericis sociatus; quæ postrema omnem implent paginam; inter quæ usitatiora & magis comprobata audiunt valeriana, helenium, melissa, salvia, ruta, artemisia, matricaria, flores tilia, crocus, succinum, castoreum, & assa fœtida; aqua florum aurantiorum, melissæ composita, guttæ angelicæ, spiritus salis ammoniaci succinatus, &c.

Alia pro re natâ in usum vocantur *remedia*; aperientia nempe & emmenagoga, amara, martialia, aromatica & roborantia simplicia, ac officinalia; mithridatium nempe, theriaca, &c. Sed omnibus ferme palmam

HYSTERIS.

præripiunt diluentia largâ manu propinata; quorum classem subeunt aquæ minerales Passienses nempe, Forgienses, Monferinenses, Cranenses, Spadanae, Sedlicenses, Merienses, Baregienses, Amandinae, &c. quibus addere licet aquam simplicissimam affatim haustam, serum lactis, &c. Suas laudes etiam meretur ipsummet lac, quod plures fausto beat eventu. Nec posthabenda *remedia externa*, balnea subfrigida vel frigida, tum domestica, tum fluminum; semicupia, enemata simplicissima, vel carminantia & antihysterica, &c. Interea nil proficiunt hisce peragendis intenti, ni ægrarum fidem sibi concilient: danda enim est opera ut mœrorem & tristitiam excutiant hystericae, ut à severioribus cogitationibus quibus sunt proclives, retrahantur, & in otio minime recumbant; ut demum vehementioribus animi pathematibus, è quibus exurgit morborum ilias, quâvis arte prospiciatur, & uno verbo harum mens ad hilaritatem componatur. Pavor quo ægræ acerrimè commoventur, hunc morbum nonnunquam fugavit; de quo stupendo phænomeno vide Historiam Academiæ Regiæ Scientiarum anni 1752. Similem effectum exerere queunt insolens gaudium, vehemens iracundia, graves curæ, &c. Neminem demum fugit affectum hystericum à morbosâ in venerem propensione sæpissimè foveri: quid tum factu opus sit, singulis obvium.

Absolutis quæ de curâ prophylacticâ dicenda erant, ad præsentem devenimus: alia enim, vel *extemporanea*, efflagitant *remedia vigentes insultus* hysterici, quibus opitulatur venæ sectio, sub jam traditâ rerum conditione; aliàs futilem vel noxiam fore experienciâ didici; quam tamen è pede, brachio & cervice, à SYDENHAMO, aliisque famigeratissimis practicis fuisse comprobata, minime reticendum. Dubium etiam censeri debet emeticum, quod nunc prodest, nunc perniciem infert; & hinc haud nisi summâ cautelâ exhibendum. Proficue etiam usurpantur, vigente accessione, antihysterica interna; tinctura nempe castorei, succini, &c. Haud defunt sanè præsidia externa, quæ paroxysmum reprimere queunt: hoc munere fungitur fumus cujuscvis chartæ, plumarum, cornuum, veterum coriorum, &c. eandem opem præstat odor rutæ, aceti, spiritûs salis ammoniaci, sinceri, vel succinati, guttarum anglicarum, vel salis ejusdem indolis, &c. Ab inspersâ aquâ frigidâ in faciem nonnunquam exulat insultus; non secus ac abiguntur manuum convulsiones ab harum immersione in aquam frigidam. Insuper varia parantur epithemata, à mulierculis præsertim celebrata & umbilico imponenda: inter quæ usitatiora audiunt emplastrum galbani, atque scutum è myrrhâ & aloë gossypio exceptis, confectum; quibus addere licet petroleum, oleum croci & succini, axungia castorei, &c. Præterea vincula in artus injiciuntur, frictus in cruribus celebrantur, vellicatur planta pedum, cui etiam admovetur later calidus; vel crura in aquam calidam immerguntur; cucurbitulæ siccae umbilico & artubus admoventur; injiciuntur enemata terebinthinacea, stimulantia, cathartica, antihysterica, &c. quæ singula tempestivè adhibita egregium effectum obire solent.

PICA ET MALACIA.

PICA ET
MALACIA.

NULLUM, vel rudem & inexpertum fugit virgines & mulieres prægnantes cuidam *appetitui depravato* obnoxias esse, quo *insueta* vel *absurda* expetunt; uti salis, piperis, aceti, &c. insolitam quantitatem; fructus immaturos, carnem cruentam, pisces incoctos, lacertas viventes, bufones & araneas; testas, terram, gypsum, calcem vivam, cineres, carbones, nivem, glaciem, chartas fordidas, gossypium, veteres pannos, coria putrida, ipsumque stercus, aliaque innumera, quæ in tantis deliciis habent, ut ab illis ægrè dimoveri patiantur. Aliæ odoribus fœtidissimis delectantur: nonnullæ terram, gypsum, cretam, aliudve corpus friabile digitis conterere gestiunt, &c. *Pica* dicitur hic morbus virgines invadens, qui chlorosi plerumque sociatur, & viro maturas præcipuè afficit; etsi minime parcat junioribus. Si prægnantes corripiat, *malacia* audit, quæ ultrà quatuor primos graviditatis menses raro protelatur. Nonnulli morbofi utero gerentium appetitus versantur circa cibos usitatiores, quos quasi esurientes flagrantissimè capiunt; quibus denegatis plura impendent mala, lipothymia nempè, abortus, vel quædam labes organica in tenello embryonis corpore; quem stupendum eventum vetustissima & multiplex experientia ultrà omne dubium arguere videtur.

Licet hic pravus & morbosus appetitus minime per se sit ominousus, haud tamen *periculo* planè vacat; ubi scilicet circa absurda, & ad nutritionem inepta versatur; quæ certâ copiâ, vel per diuturnum tempus ingesta, non solum digestionis organa pessundare & subvertere; sed humorum massæ labem inferre queunt: hinc minime mirari subit, si hinc sæpiùs emergant morbi chronici, & nullâ arte domandi, qui ferius ocyùs misellas chloroticas ad ultimam rerum lineam ducunt. Quod verò hanc insulsam cupiditatem spectat, quæ tactu vel olfactu expleri valet, nil ferè minatur, præter chlorosim, quam sæpiùs post se trahit. Nec prædictâ morositate immunes censerì debent pueri qui ramenta papyracea, aliaque obvia corpora summo oblectamento digitis conterunt & volvunt; nec defunt qui varia absurda, uti humum, mortarium, gypsum, aliaque præsertim vetita, edere voluptati ducunt, cui monitis, increpationibus & minis medetur.

In primo *curationis* limine danda est opera monitis, increpationibus, aliove quovis modo, ut qualibet objecta morbum foventia amoveantur; aliàs incassum præcipiuntur, vel exquisitiora medicamina. Quibus peractis, primis viis prospiciendum: idèò opportunè exhibentur, præmissis diluentibus, emetica & cathartica, quæ omnes ventriculi & tubi intestinalis recessus adeundo, pravæ digestionum reliquias, vel quævis absurda huc collecta everrere, & foràs eliminare queunt. Roborantibus dein refo-

PICA ET
MALACIA.

cillandus venit ventriculus; quam opem præstant mentha & melissa, cortex malorum citreorum vel aurantiorum, syrupus cydoniorum, vel limonium, extractum juniperi & theriaca, &c. His præmissis in pravam humorum diathesim converti debent clinicorum curæ; sub quo scopo præscribuntur aperientia, diuretica & emmenagoga, quæ intimiora corporis penetralia lustrando prævos succos subigere, obstructa vasa referare, renes emungere, & uteri vasa deplere valent. Sed virginibus duntaxat congruit hic curandi ritus; rarò enim artem medicam efflagitant pueri; quæ aliàs inutilis est prægnantibus; cùm malacia post quartum imprægnationis mensem, & ad summam post partum, spontè solvatur, & planè evanescat.



CHLOROSIS VEL FEBRIS ALBA VIRGINUM.

HÆC *cachexia species*, nostratibus *pâles couleurs*, virgines nullis inquinatas amplexibus, ubi præsertim fororiantur mammae; ac præcipuè puellas amore vel mœrore percitas, mulieresque viduas, vel in conjugio sterili viventes, crebrò *invadit*. Quodam pallore *innotescit* hic affectus, febriculâ noctu nonnihil exacerbandâ, stipatus; quæ hinc *feb. is alba* vocitatur. Præter faciei, totiusque corporis ambitûs colorem pallidum, & nonnunquàm subviridem, qui hunc morbum vulgatissimum prodit; alia occurrunt indicia; nempè corporis debilioris gravitas, & inertia ad motum, dolor capitis cum propensione ad somnum, crurum inquietudines, quibus vexantur decumbentes, respiratio difficilis, quotiès præcipiti cursu incedunt, vel acclivia scandunt; cordis palpitationes, pica, anxietates & lipothymia, meteorismus hypochondriorum, totiusque abdominis, &c. Prætereà subtrument facies, & præsertim palpebræ; crura & malleoli simili modo afficiuntur; nec manè, uti mos est œdematis, evanescit hic tumor. Chlorosim legitimam concomitatur mensium suppressio; aliàs de obstructis visceribus cogitandum. Periculi planè expers hic est morbus, qui fluentibus catameniis planè fugatur: nonnunquàm tamen in genuinam cachexiam facessit, vel hydropem accersit. Secta enim cadavera exhibent aquæ copiam stagnantem, in pectore, pericardio, & abdomine; ventriculorum intestini instar contractum; lienem ingentem; hepar obstructum; concretiones biliales in vesiculâ felleâ. Postremò chlorosi correptas infecundas esse nemo nescit.

Eo collimandum, æquè ac in cachexiæ *curatione*, ut præmissis præmittendis, crassiores succi subigantur, & obstructi tubuli referentur. Primò scilicèt plethoræ occurritur sanguinis missione è saphenâ; dein emetico & cathartici sæpiùs repetitis, primis viis prospicitur, ne saburra inibi latrans à pravis eduliis, vel materiebus absurdis prognata ad sanguinem appellat. Quibus peractis, viriatæ sanguinis crassi medendum; sub quo

scopo ad hepatica, stomachica, amara, aperientia, tonica & emmenagoga devenire expedit. In subsidium etiam vocantur antihysterica; faustè usurpantur remedia officinalia è tartaro & marte confecta: nec, pro re natâ, inutilem opem præstant absorbentia & sudorifica: sed omnibus hisce auxiliis fortè præcellunt aquæ minerales, tum acidulæ & martiales, tum thermæ, Vallenfenses putâ, Passienses, Forgienses, Vicienses, &c. Aliquid fert auxilii pediluvium tepidum: nonnullas etiam laudes merentur frictus in cruribus celebrati: nec desunt qui post BARBEIRACUM celeberrimum Medicum Monspeliensem, balnea suadent. Hic demùm affectus in plerisque spontè inter nuptias solvitur.

CHLOROSIS
VEL FEBRIS
ALBA
VIRGINUM.

MORBI A CATAMENIIS.

SCITUR hoc sanguinis *profluvium* statis certisque periodis, vel *singulis mensibus recurrens*, inter quinque & decem uncias contentum, à tribus ad octo dies protelari. Circà decimum tertium ætatis annum se prodit hæc evacuatio menstrualis, & ad quadragesimum quintum vel ad quadragesimum octavum producit: quod verò maturius erumpens citius desinere solet, & vice versâ: adeò ut *quinque septenniis* contineri videatur. Ab hac tamen naturæ normâ nonnullæ deflectunt mulieres viragines, agrestes, saltatrices, vel laboriosam vitam ducentes, quæ nihilominus fecundæ censerì debent, cum insensibilis perspiratio & sudor periodici profluvii vices suppleant. Sed sub vulgari corporis conditione singula catameniorum vitia pro totidem morbis haberi debent; si tamen excipias suppressionem à graviditate pendentem, quæ hinc è morborum albo est expungenda. Quapropter de hisce fluxûs menstrualis læsionibus sigillatim & breviter pro instituti ratione differere expedit.

(1.) Inter frequentiora *mensium* vitia recensenda est *suppressio*, ritè distinguenda à sufflamine propter graviditatem, & naturali cessatione post absolutam horum periodum; quæ tamen ni sensim, intrâ scilicet unius vel alterius anni spatium peragatur, varia in plerisque post se trahit symptomata, insultus nempe hystericos, hæmorrhagiam uteri, fluorem album, &c. Suppressionem mensium morbosam concomitari solent chlorosis, cum cute, præsertim faciei & crurum, nonnihil œdematosâ; dolor lumborum gravativus, cephalalgia, vigiliæ; respiratio difficilis, palpitationes, cardialgiæ, flatulentia, hypochondriorum inflatio, colicus dolor, &c. Pulsus sub hisce circumstantiis debilis exploratur, alternant calor & frigus, aboletur vel depravatur appetitus, urgent nausæ & vomitus, erumpit sanguis è naribus, pulmonibus, ventriculo, renibus, &c. Sed plus terroris quàm mali affert hæmorrhagiæ species. Nonnullæ anginâ corripuntur vel in ophthalmiam incidunt; sed crebrius prodeunt

MORBI
A CATAMENIIS.

erysipelata, aliave cutis efflorescentiæ. Omnes ferè demùm meticulosæ; & quâdam mentis segnitie laborantes, steriles evadunt. Imus venter ab expanso utero in nonnullis tumet; adeò ut *graviditatis suspicionem* quandoque moveat, & plures incauti vel imperiti, virginum pudicarum famæ labem impesserint. Notare expedit haud è genuinâ mensium suppressione ortum trahere *abdominis intumescentiam*, sed potiùs à jam secreto sanguine menstruali intrâ uteri cavum cohibito: cur minime mirum si reaseratis claustris uberiori proventu erumpat hic latex retentus, & brevi hâc evacuatione, pro abortu à quibusdam habitâ, complanatur abdomen.

Majora post se trahunt incommoda *mensēs inter fluxum illicò sufflaminati*, à terrore scilicet, iracundiâ, aliave animi pathemate; à manuum vel pedum immersione in aquam frigidam, à vehementiori frigore contracto, ab alvi fluxu, ab intempestivâ, fluentibus catameniis, venæ sectione è brachio, aliave causâ quâvis externâ. Ab hoc enim infortunio sæpiùs promoventur febres continuæ vel intermittentes pessimi moris; phlogoses internæ, cephalalgia atrociore, apoplexia, delirium, vertigines, epilepsia, insultus hysterici, tremores, suffocationes & dolores ad hanc vel illam partem pertingentes, artubusque præsertim sævitiùs insidentes. Ab eâdem causâ progerminatur cachexia, hydrops, aliussve affectus chronicus. Opportunis remediis plerùmque obtemperat mensium suppressio, si sola incusetur plethora: aliter se res habet, si sanguinis penuriæ innitatur, ubi verò à quâvis læsione organicâ fovetur, vix expugnari se patitur. In ancipiti versatur quæ circâ quadragesimum quintum annum accidit, etsi à naturæ normâ minime recedit: sævissimi enim ab hâc insolitâ corporis conditione sæpiùs emergunt affectus; præsertim si quædam in humoribus delitescat labes, quæ tunc temporis in apicem venire solet.

Plura notatû digna se præbent inter *lustranda cadavera*, impervius nempè uterus ab hâc carunculâ integrâ, *hymen* vocitatâ, vel à cicatrice post harum partium vulneratarum ferruminationem, aliudve conformationis vitium: ulcera cervicem, vel cavum uteri occupantia; excrescentiæ fungosæ, colluvies serosa intrâ uterum coërcita, hujusce visceris gangrana. Quibus addere licet infarctum skirrhosum uteri & ovariorum; tubarum purulentiam; tumores vaginæ adnatos, viam uteri præcludentes, &c. In consensum etiam trahuntur cætera pectoris & abdominis viscera: occurrunt nempè pulmones diversimodè labefactati; inflammati nempè, perduri, tuberculosi, skirrholi & subnigricantes: obvia fit cordis moles, nunc amplior, nunc contracta; in conspectum venit colluvies serosa in pericardio, vel pectoris cavo stagnans; lapides nonnunquam continet cordis involucrum: ante oculos versatur hepar decolor, infarctum, mole amplissimum, tuberculis obsitum, tabum recondens, putredine & gangranâ defœdatum. Se offert lien stupendæ magnitudinis, putredine confectus, & pultis instar contrectatus diffuens. Comperitur mesenterium skirrhosum & purulentiam conspurcatum. Annotatur epiploon deforme, necrosi corruptum vel putredine absumptum; ut sileamus de colluvie serosâ vel sanguineâ

sanguineâ de diversis tumoribus, innumerisque aliis læsionibus, nunc inter causas recensendis, nunc pro producto morbo habendis.

Probè inquirere debent ad hujusce morbi *curationem* animum intendentes, nùm quædam sit graviditatis suspicio: cùm innumeræ occurrant pseudo-virgines, vel protervæ meretriculæ, imprægnatæ, quæ omni arte hunc turpissimum statum occultare student, & saphenæ sectionem sub spe futuri abortûs, specie curationis commentitii morbi, efflagitant; adeò ut quotidie decipiantur, vel oculatiores. Haud desunt tamen quæ, etsi viro compressæ, imprægnationis nesciæ, se genuino morbo laborare arbitrentur. Si verò post accuratum examen res dubia & anceps videatur, consultius sanè censeretur cunctari & supersedere, usque ad quintum vel sextum mensem: quo tempore in propatulum veniunt graviditatis notæ, tùm enim mammæ & venter intumescunt, & ab admotâ manu frigidâ abdomini quædam in utero persentitur motio. Ubi igitur, nullis perspectis imprægnationis indiciis, constat de morbi genere, haud ulterius procrastinanda est curatio; inter quam inchoandam, sibi par non habet saphenæ sectio ad avertenda symptomata, è suppressione emergere solita. Nonnunquàm prodest, si casu cohibita fuerint fluentia catamenia, sanguinis missionem è brachio præmittere, quam summè proficuum pluriès inter praxim novi. Curantium vota explere solet sanguinis detractio, si sola inculpetur plethora: aliàs in usum trahenda *emmenagoga* & aperientia alterius fortis; non secùs ac roborantia ex amaris & aromaticis deprompta: utriusque ordinis usitatoria audiunt lingua cervina, dens leonis, asparagus, bruscus & rubia tinctorum; marrubium album, rosmarinus, bacca juniperi, radices aristolochiæ & angelicæ; myrrha, borax, limatura ferri, vel crocus martis, tartarus chalybeatus, elixirium proprietatis, &c. *Sub casu urgentiori*, fabianam, vel ipsasmet cantharides, nonnunquàm usurpare licet, sed cautè cum hisce remediis mercari expedit. Solerti etiam manu tractari debent aloë & colocynthis, aliaque cathartica acriora quæ egregium effectum edere queunt, nec posthabenda sunt blandiora. Optimum præstant auxilium antihysterica; camphora nimirum, crocus, castoreum, &c. Omnibus demùm innotescunt aquarum mineralium & præsertim martialium vires.

Ut ad *externa* deveniamus, prosunt hirudines vulvæ vel podici admotæ quæ venæ sectionum vices explere valent: nec inutilem opem præstant cucurbitulæ coxis vel inguinibus affixæ. Conducunt suffumigia ex antihystericis parata; sed plurius habetur vapor horum decocti, vel aquæ simplicissimæ. Opitulatur pediluvium, balnea & semicupia calida: nec despicendi fetus emollientes artubus inferioribus admoti; præsertim si à terrore, frigore suscepto, vel quâvis aliâ causâ externâ vicens fluxus cohibitus fuerit, sub quo casu etiam conducit haustus vini generosi incunctanter exhibitus. Opportuniùs sanè usurpantur hæc præsidia, proximè accedente consueto futuræ eruptionis tempore, dùm scilicet soliti exsurgunt prodromi; veluti dolor lumborum gravativus, quædam ventris tormina,

MORBI
A CATAMEN-
IIS.

æstus febrilis, &c. simili fermè curandi ritu, habitâ ratione gradûs morbi, pariori mensium proventui prospicitur; licet longiora sint accessionum intervalla, vel haud solitâ copiâ procedat hæc evacuatio. Quod ad naturalem mensium cessationem attinet; nullâ opus est curatione, ni plethora in posterum nonnullas venæ sectiones, cum congruo vitæ regimine, expostulet.

(2) A naturali & notissimâ viâ nonnunquam recedunt menses, vel per aliena loca, quàm consueta, exitum sibi parant, & *menses devii* audiunt. Equidem erumpunt è naribus, oculis & auribus: hos eructant organa salivaria, gingivæ & dentium alveoli, uti crebrò observatur in scorbuticis. Prodeunt è mammis, pulmonibus, ventriculo, renibus, vesicâ, ano, ulceribus, &c. Cutis contextum quandôque etiam subeunt; his enim exitum largiuntur sinciput, genæ, umbilicus, inguina, brachia, manus, pedes, &c. Exsurgit nempè è prædictis partibus tumor phlogodeus, dolens & renitens; è quo spontè aperto profilit quædam sanguinis copia, quâ exhaustâ brevi ferruminatur vulnus, singulis mensibus renovandum. Benè perspectâ igitur illius præternaturalis & periodici fluxûs indole, danda est opera ut divertatur, & ad sua genuina incernicula revocetur. Hanc opem præstant sanguinis missio è saphenâ, hirudines vulvæ admotæ, cucurbitulæ inguinibus, vel internis femoribus aptatæ, vapor aquæ tepidæ, vel decocti cujuscumque emollientis, genitalibus exceptus, aliaque præsidia externa suprâ tradita, adversus scilicet suppressionem adhiberi solita, quibus superfedemus ut ad cognatum morbum deveniamus.

(3) Ad suppressionem proximè accedit *mensium difficultas*, quâ scilicet profluvium illud periodicum, haud sine molestiâ erumpit: varia symptomata post se trahit hic affectus; lumborum scilicet & coxendicum dolores, vasa hæmorrhoidalialia tumentia, dolores & tormina in utero, appetitum prostratum, pravas digestionem, subsultum variarum partium, horripilationes, insultus hystericos, &c. quæ symptomata nunc fluentibus mensibus, nunc ante vel post fluxum exsurgunt. Hanc aggritudinis speciem præsertim antecedunt quædam imi ventris tormina, dolores lumborum gravativi, æstus febrilis, cephalalgia, spirandi difficultas, &c. sub quibus circumstantiis suppressionem minantibus, *urgentiori* primò *succurrendum*, nempè doloribus, qui leniri solent demulcentibus & anodynis internis; infuso nempè florum althææ vel feminum lini, aquâ pulli, sero lactis, oleo amygdalarum dulcium, &c. Rarissimè fallit sub re urgentiori, cæteris consentientibus, saphenæ sectio. Profunt etiam antihysterica hypnoticis sociata; nec vetantur theriaca & mithridatium. Egregiam insuper opem præstant enemata carminantia vel terebinthinacea: profunt cucurbitulæ inguinibus & femoribus admotæ. Sed sub casu duntaxat graviore hæc in usum trahere licet præsidia; aliàs naturæ committi debet hoc opus; quo absoluto ad curam prophylacticam se conferre expedit, quæ versatur in opportuno usu emmenagogorum, aliorumque medicaminum adversus suppressionem adhiberi solitorum, de quibus satis superque actum fuit.

(4.) Sub duplici conspectu se præbet *mensium fluxus inordinatus*, ratione scilicet dierum intercalarium numeri, à solitâ periodo, excessu vel defectu recedentis, vel ratione copię, nunc parioris, nunc uberioris. Plures enim occurrunt virgines & mulieres, quę pluriès, intrâ mensis curriculum, hunc fluxum patiuntur, quem alię haud nisi post plures menses subeunt. Quoad verò copiam, plures de hęc plus æquo imminutâ conqueruntur, dum cęterę mensium nimietatem vel luxuriam ægrè ferunt. Frequentiùs accidit hęc inordinatio circà quadragesimum quintum ætatis annum, quo compleri solet periodorum menstrualium summa. Experientiã constat mulieres juniores huicce morbo obnoxie, ad abortum esse procliviores: aliàs diutiùs protractus febrem lentam, marasimum, cachexiam & hydropem post se trahit. Notare haud abs re erit nonnunquam erumpere, è vaginę vasis varicosis nonnunquam conspicuis, *profluvium quoddam hæmorrhoidale*, quodam dolore stipatum, nulli normę submissum, quod pro fluxu menstruali habere solent mulieres; è quarum scilicet relatu decipiuntur vel oculatiores practici; ni attendant ad consuetos catameniorum prodromos, qui sub hoc casu desiderantur. Hęc etiam pertinent menses ultrâ solitum terminum, quinquagesimum scilicet annum protracti, qui tùm pro statu morbofo, sub quo imminet ulcus vel cancer uteri, haberi debet.

Quandòquidem plus æquo immunita evacuatio menstrualis parùm à suppressione discrepat; consecrarium est eadem *curandi methodo*, habitâ ratione gradûs, impugnandum esse utrumque statum: & ideò crambem repetitam non apponemus. Quòd ad uberiores mensium proventum attinet, reprimi solet remediis hæmorrhagię dicatis, haud tamen nisi summâ cautelâ, casuque urgentiori, hęc sunt usurpanda: cùm, nullis se præferentibus gravioribus symptomatibus, soli congruę victûs rationi committendus sit hic uberior fluxus. Ubi verò viribus deficientibus emergit febris lenta, & imminet marasmus; vel se produnt cachexię, hydropisve indicia, nil non movendum ut reprimatur vel coërceatur prædictus fluxus. Præmissis igitur præmittendis, venę sectionibus nempe inter inducias celebratis, demulcentibus & temperantibus, lacte scilicet, cremore hordei vel oryze, emulsionibus nitrolis, &c. absorbentia & adstringentia usurpare fas est: nec hisce incassum tentatis, vetantur styptica, quę tamen haud nisi refractâ dosi & summâ cautelâ sunt exhibenda, ne subitaneâ & intempestivâ sufflamine, quid humanitùs accadat. Sunt qui inter has angustias suffimenta parant è thure, succino & mastiche; sed pro ficulneis habentur apud solertiores hęc præsidia. Porrò danda est opera ut uberiori mensium profluvio laborantes curis solvantur, & quieti tùm mentis, tùm corporis se tradant; imò & expedit ut in situ horizontali decumbant.

(5.) Parùm discrepat, ratione faciei, *mensium fluxus immodicus* ab hæmorrhagiâ uteri: sed diversam habent prosapiam prædicti affectus. De illo sanguinis dispendio quod partum vel abortum concomitatur hic non agimus, sed de illâ cruoris profusione longè periculosiori quę aliam quamcumque causam agnoscit. Pleno gurgite erumpens latex sanguineus

MORBI
A CATAMENIIIS.

MORBI
A CATAMENIIS.

nonnullam statim patitur in utero & in massulas cogitur, quæ unâ cum fluido cruore exitum per vulvam sibi parant, quod sanè rariùs evenit sub mensibus immodicis. Præterea nulli periodo submittitur hæmorrhagia uteri, etsi non rarò chronica evadit: sed tantâ, ut verum fatear, ludunt varietate prædicti affectus, ut sæpiùs vix pateat discrimen, & Œdipo opus esset. Hanc hæmorrhagiæ speciem præire solent acerbi lumborum & dorsi dolores, pallor faciei, inflatio hypochondriorum, horripilationes, &c. Huic obnoxia censentur phlegmaticæ, cachecticæ & scorbuticæ: *hanc promovent* æstus aëris, non secus ac frigus subitò contractum, immanis iracundia, liberalior vini, liquorumque ardentium potus, inconsultus caffè usus, emmenagoga acriora, validiora corporis molimina, improbæ exercitationes, casus ab alto, &c. Concitatur à febre vehementiori, ab erumpentibus morbillis & variolis. Hoc stupendum sanguinis dispendium nonnunquàm oriri à mensibus intrâ cavum uterî cohibitis suprà inculcavimus. Porro mulieres post hoc insolitum sanguinis profluvium fecundiores evadere per transfennam notare expedit.

Calamitosas sæpiùs fore immanes sanguinis ex utero profusiones neminem fermè latet, præsertim ergà annosas mulieres, quibus tùm impendit ulcus vel cancer uteri; præter marasimum, cachexiam, hydropem, &c. Præterea sanguis confertim erumpens syncopem, convulsiones, vel ipsummet lethum sæpiùs accersit. Hæmorrhagia uteri sub primis graviditatis mensibus erumpens, abortum minatur: aliàs, ultrâ scilicèt sextum mensem partu excipitur; quem obstetricantis manu sæpiùs promovere expedit, dummodò tamen cruor è venis vaginæ varicosis, uti nonnunquàm evenit, minime profiliat: sed nihil planè confert obstetricandi ars ante sextum imprægnationis mensem; iners etiam censerî debet adversùs graviditatem notham, quæ etiam enormem hæmorrhagiam concitare potest. Summis, ut verum fatear, difficultatibus premitur hæc curandi ratio, graveque clinicis incumbit onus, qui sæpiùs vitatâ Charybdi, in Scillam delabuntur.

Sectis cadaveribus inter hunc morbum extinctorum, in conspectum veniebant pulmones perduri, tumidi, sanguine infarcti, & pure exesi: inveniebantur intestina contracta, purulentiâ tacta & putrida. Mesenterium se præbebat infarctum, tumens & induratum. Hepar erat mole maximum & skirrhosum: detegebatur lien durus, ingens & sanie conspurcatus. Se sistebat pancreas mole maximum & skirrhosum. Annotabantur renes calculosi & sede dimoti; quorum arteriæ erant quasi oblitteratæ. Uterus conspiciebatur sanguine scatens, skirrhosus & quasi cartilagineus, pure conspurcatus, exesus & disruptus. Occurrebant postremò stagnationes ferosæ & sordidæ, tùm in pectore, tùm in abdomine; hydrops ovariorum & tubarum; tumores ingentes, skirrholi, steatomatosi; circà uterum, ovaria, &c.

Aliorum morbosorum sanguinis profluviorum instar *curari* solet hæmorrhagia uteri extrâ graviditatem. Itaque præsentaneam opem ferunt venæ sectiones è brachio, quas magis proficuas fore, si solita sanguinis copia

partitis vicibus educatur, experientia docuit. Auxilium præstant consolidæ majoris & pimpinellæ decoctum, succus plantaginis & urticæ, tinctura rosarum, catechu, aqua spiritu vitrioli imprægnata, aliave adstringentia interna; quibus addere licet corallum, testacea, aliaque absorbentia. Majori sanè efficaciam prædita sunt styptica, sanguis nempe draconis, alumen, essentia Rabel, pulvis Helvetianus, &c. sed solerti manu pertractari debent; non secus ac hypnotica à nonnullis haud infimi ordinis laudata, quæ, etsi quamcumque hæmorrhagiam fovere videntur; urgentibus tamen doloribus, vigiliis, cæterisque symptomatibus, experientiam teste, nonnunquam proficue adhibentur. Haud immerito decantantur ipecacuanha & simarouba, quæ cæteris præstare praxi edocti asserere haud gravamur. Varia insuper in usum trahuntur remedia externa; manus scilicet linteis aquâ frigidâ imbutis involvuntur; lumbi cum aceto foveantur; admoventur cucurbitulæ circa mammas; vinculis constringuntur artus; injiciuntur enemata demulcentia, vel merè aquea, ut faeces liberiùs excernantur.

Haftenus de curâ præsentē, quæ scilicet inter paroxysmum congruit; nunc ad *prophylacticam* devenimus. Itaque hunc morbum præcavent venæ sectiones, inter inducias celebratæ, non secus ac diæta demulcens è lacte scilicet, cremoribus farinaceis, &c. petita. Opportunè dein exhibentur refrigerantia & temperantia: hisce viribus pollent aqua nitro vel succo limonum imprægnata, serum lactis, juscula cancrorum fluviatilium, pulvis temperans, &c. Egregiè se gerunt aquæ minerales, Passienses nempe, Forgienses & Spadanæ, Baregienses, Bonenses, Granenses, &c. quæ obstructions referando, stases sanguinis intrâ vasa uteri præpedire valent. Eundem effectum præstare queunt martialia, & præsertim crocus martis STAHL, quæ scilicet non solum aperientium classē subeunt, sed etiam in roborantium ordine recipiuntur. Huc etiam pertinent cætera adstringentia quæ, præmissis præmittendis, proficue adhiberi queunt. Nonnunquam etiam pro re natâ in subsidium veniunt vulneraria, diaphoretica & anodyna. Curis postremò solvantur ægræ, & quieti, præsertim vigente fluxu, se tradant.

MORBI
A CATAMENIIIS.



STERILITAS

S T E R I L I T A S.

NEMO nescit infecundas esse mulieres ad ultimam mensium periodum adductas : aliàs plethora , obesitas , catameniorum suppressio , fluor albus , cachexia , virus scorbuticum , lues venerea , &c. sunt totidem *sterilitatis causa* , quæ etiam contrahitur à solutâ vivendi normâ , nimîâ scilicet lubricitate & ingluvie ; à vino , liquoribus ardentibus & haustu caffè liberaliùs sumptis , &c. Hisce causis apprimè notis , facîle impugnari posse sterilitatem nemini haud obvium : sed aliter se res habet , si incusetur vitium quoddam organicum , clitoridis nempè & nympharum adaucta moles , vaginæ obturatio ab adglutinatione vulnere partu difficili , variolis , lue venereâ , ambustione , &c. inflictorum , atresia vel hymen impervium , quod mensibus exitum denegat ; undè prodeunt dolores acutissimi cum uteri intumescentiâ , tumores è vaginâ erumpentes , eundemque effectum exerentes , vaginæ nimia flacciditas , &c. Pro immedicabili demùm habetur sterilitas quæ pendet à pravâ uteri conformatione , ab ejus infarctu skirrhuso , ariditate , atoniâ , occallescentiâ vel ossificatione , à tumoribus ejus cavum replentibus , à tubarum obstructione , à tumore vel hydrope ovariorum aliisve genitalium internorum læsionibus conceptum præpedientibus , quas exhibet *autopsia anatomica*.

E præhabitis colligere datur haud inchoandam sterilitatis *curationem* , ni priùs probè inquiratur morbi causa , arte medicâ sæpiùs domari nescia , quæ , ut verum fateamur , in cimmeriis plerùmque latet tenebris , adeò ut in hisce angustiis , dùm scilicet de genuinâ sterilitatis prosapiâ haud constat , iteratis tentaminibus viam ad curationem sibi parare non sit incongruum , ni apprimè innotescat genuina uteri conditio , quæ nunc frigida , nunc calida medicamina expostulat. Quapropter , probè compositâ victûs ratione & præmissis præmittendis , refrigerantium , temperantium , aperientium , emmenagogorum & roborantium vires sunt explorandæ ; inter quæ usitatiora audiunt juscula refrigerantia simpliciora , & balnea domestica , quæ sæpiùs curantium vota explent. In subsidium nonnunquam vocantur veronica , mentha , melissa , feniculum , radices & semina eryngii ; semina erucæ & nasturtii hortensis ; nux moschata ; aliave roborantia. Sed his præcellunt varia medicamina , tùm magistralia , tùm officinalia è tarraro & marte confecta. Omne demùm ferunt punctum aquæ minerales acidulæ & ferrugineæ , vel thermæ , inter quas valdè de prædicantur Vallenfes & Meinenfes , Borbonienfes Anselmienfes & Granenfes ; quæ tamen omnia haud indiscriminatim præscribi debent , sed pro re natâ & ritè perspectis œconomix animalis viribus , hæc vel illasunt usurpanda ; nilum enim proficit clinicus qui naturam ducem & restricticem suorum consilio-

rum minime habet. De imperforatione, aliove vitio organico nil addimus; cùm hoc læsionis genus opem chirurgicam expostulet; vel planè sit immedicabilis.

STERILITAS

MORBI PRÆGNANTIUM.

VARIA post se trahere incommoda graviditatem, imò & graviores morbos haud rarò promovere vel mentiri neminem fermè fugit. Hinc patet quanti sit momenti ut genuinum uteri statum sæpiùs dubium & intricatissimum, ritè assequantur clinici, ne nubem pro Junone amplectentur, & temeritatis notam incurrant. Ubique enim se proferunt virgines spuriae vel meretriculæ virtutis simulatrices, quæ de abortu cogitantes, de commentitio morbo conqueruntur, ut saphenæ sectionem, emeticum, emmenagoga, aliave remedia stimulantia fœtum foràs deturbare solita, impetrent. Nec desunt in legitimo conjugio viventes, quæ fallere nesciæ, sub nonnullis incommodis deceptæ, se perperam curandas tradunt, utpote dubia & infida sæpiùs sint *impregnationis signa*. Ab illorum tamen syndromè quidpiam certi eruere licet, à retento scilicèt in coïtum semine, vel à quâdam horripilatione quam emuncto telo virili experiuntur, à cibi fastidio vel appetitu depravato, nausæâ & vomitu, cardialgiâ & lipothy-miâ, quodam inguinum & lumborum dolore, mammis dolentibus & tumidis, cum papillarum livore, & nonnullâ lactis excretionem, uteri ostio occluso, &c.

His addere licet ventris intumescientiam quarto vel quinto mense conspicuam, cum quâdam dein circà umbilicum prominentiâ, quæ in morbofis abdominis tumoribus desideratur, ætatemque congruam suprâ indicatam; etsi nonnulla prostant exempla mulierum quinquagesimo, sexagesimo, imò, si Scriptoribus sit fides, septuagesimo ætatis anno imprægnatarum, quod sanè altâ mente tenendum. Præterea, *mulieres ingravidatæ* ad motum tardiores, inertiam quâdam insolitam laborant, nonnullaque amplexus viriles averfantur: ut de motione fœtûs quarto vel quinto mense manifestâ, solâ imprægnationis veritatem adstruente fileamus. Catameniorum suppressio inter infida signa recenseri debet, cùm symptomatum innumeros morbos respicientium agmèn subeat, præterquàm quòd in quibusdam fluunt catamenia sub primis à conceptu mensibus; nec desunt quæ hanc menstrualem purgationem per totum gestationis curriculum patiuntur, atque utrasque ad abortum procliviores esse experientia testatur. Solâ altiori abdominis protuberantiâ internoscitur graviditas à *gemellâ prole*; nec tamen certum est illud *indiciu*m; cùm multum absit quin omnes ventrem mole stupendum gestantes geminum partum edant. Nec dilucidius innotescit *superfœtatio* à primâ ingraviditate remota, quæ abor-

MORBI
PRÆGNAN-
TIUM.

tum concitat, incolumi fœtu primogenito, quem scilicet solito tempore eniti solent mulieres.

Nemo non novit opportunam *sub graviditate vivendi rationem*; nec latet venæ sectionem circa tertium, septimum & nonum mensem celebratam pluribus opitulari: sanguini tamen parcendum, si morbo acuto corripiantur prægnantes, nec severiori diætæ inhærendum, ne fœtus suo pabulo defraudetur. Lautè tamen minime victitent, ne vasa majori quàm par est sanguinis copiâ turgeant; undè produnt innumeri morbi quibus conflictari solent gravida: nec elapsis duobus vel tribus primis mensibus, quieti plus æquo indulgeant. Caveant præsertim vehementiora animi pathemata, quæ sub hâc conditione summam generi nervoso labem inferre queunt: cathartica, ni urgeat necessitas, inter quatuor primos graviditatis menses, & imminente partu, vetantur. Aliàs cautus horum usus innoxius censeretur debet. Nonnullis demùm prosunt stomachica. Hæc sunt HIPPOCRATIS, procerumque placita, quibus adstipulari negant nonnulli suis hypothesebus obcæcati recentiores. Insuper *varios morbos post se trahit graviditas*, qui singuli peculiarem curationem sibi vindicant: in hunc censum veniunt malacia vel appetitus depravatus, nausæ crebrò recurrentes, & vomitus, dolores colici, aliæ ventris tormina, alvi profluvium, sudores insoliti, lipothymia frequentiores, insultus hysterici & convulsivi, odontalgia, tussis nunc sicca, nunc humida, cordis palpitaciones, ischuria vel mingendi difficultas, hæmorrhoides molestissimæ, cum alvo adstrictâ, varices ex artubus inferioribus erumpentes, cutis abdominalis à nimia expansione fissuræ, tumor crurum œdematosus, hæmorrhagia uteri, abortus, partus difficilis, &c. quæ singula breviter & fasciculatim prosequi operæpretium duximus.

(1.) *Depravatum prægnantium appetitum vel malaciam*, haud ultra quartum vel quintum graviditatis mensem protelari jam supra notavimus, & idè nullam expetit curationem. Idem fermè esto iudicium de *nausæâ & vomitu* sub eodem stadio vigentibus, cum nil tùm à vomitione sit pertimescendum: secùs verò se res habet circa postremos gestationis menses, cum metus sit ne inter enormes vomendi conatus, fœtus ex utero excutiat; idè nil non movendum ut compescantur hæc symptomata: venæ sectio in hunc finem aliquandò celebratur: proficuè etiam adhibentur laxantia, & præsertim rhabarbarum: nec inutilem operam ludunt absorbentia, lapilli nempe cancerorum fluviatilium, corallium, &c. Suas postremò laudes merentur aqua florum aurantiorum, syrupus absinthii, diascordium, mixtura extemporanea è succo limonum & sale absinthii parata, aliæque stomachica interna vel externa. Leniuntur *ventris tormina* aquâ florum aurantiorum & cinnamomi, cæterisque carminantibus & anodynis sub hoc casu usurpari solitis. Haud levem terrorem incutit *diarrhœa* sub ultimis gestationis mensibus ingruens; hinc danda est opera ut coercetur: hoc munus præstant cathartica, stomachica & absorbentia; quibus memorandis haud inhæremus, ne recoctæ crambes arguamur.

mur. Addere juvat quod rarò ad narcotica confugere liceat, cùm sub hâc rerum conditione haud planè innoxia cenferi debeant.

(2.) Proficui sub graviditate *sudores* certis cancellis coërciti; sed periculo nusquàm vacant, si suprà modum excefferint: ideò uberiores sunt reprimendi opportuno notissimorum temperantium usu. Parùm pertimescentur *lipothymia*, quæ plus æquo recurrentes, solitis præsiidiis fugantur: sed summum terrorem incutiunt *convulsiones*, sub quibus partum obstetricantis manus promoverè expedit: aliàs curam alibi traditam expostulant. Sedantur *dentium dolores* emplastro de tacamahacâ, aliove topico anodyno. *Tussi pertinaciori*, non secùs ac spirandi difficultati, ut plurimum medetur sanguinis detractio: non alio opus est remedio adversùs cordis palpitaciones; quod præsidium *mammarum & lumborum dolores* etiam compefcere solet. *Ischuria* ab ingenti uteri mole, vesicæ cervici incumbente, sæpiùs solvitur à solo situ horizontali; raróque in usum trahitur catheter. Difficiliùs sanè impugnatur *urinae incontinentia*, quæ aliàs nil mali portendit; & ubi fœtus in lucem prodit, spontè fugatur.

(3.) *Fissuris abdominalibus*, ob ultrà modum expansa tegumenta, occurrunt oleo ovorum, vel quovis unguento demulcente: his addere licet cerussa, saccharum saturni, &c.. Quod ad *tumorem crurum œdematosum* partu solvendum attinet; ab omni curatione abstinere præstat: nil tamen impedit quominùs in immensum accrescens, decocto aromatico, aquâ calcis, lixivio cinerum sarmentorum, aliisve cognatis, quibus nonnulli addunt aquam vitæ, vel Reginae Hungariæ, spiritum vini camphoratum, foveatur. Insuper nil metuendum de œdemate solos artus occupante; sed si ad lumbos & ultrà propagatur, res sanè periculosa est alea; cùm ab hoc infortunio immineant ascites & hydrops uteri: haud rarò etiam sociatur graviditas colluviei serosæ internæ, quam tùm vix antè partum aggredi licet. Leniri solent *hæmorrhoides*, nonnunquàm molestissimæ, fotu è decocto foliorum verbasci, florum sambuci, feminum lini, capitum papaveris albi, &c. parato. *Narium* denique curatio naturæ committitur; vel alibi tradita adhibetur methodus.

(4.) Futilia omnia sunt auxilia adversùs *hæmorrhagiam uteri*, ubi partim solvitur placentæ adhæsió; sub quo statu nullâ arte declinatur partus vel abortus: aliàs prosunt venæ sectiones; laudatur ipecacuanha, &c. Circà finem tertii mensis plerúmque erumpit hæmorrhagia, quæ abortu excipitur: hanc prænuntiant cephalalgia atrocissima, horripilationes, mammarum & imi ventris subsidentia, dolor gravativus lumborum & iliorum, frequens micturitió, tardiores fœtûs motiones; hians uteri osculum; &c. Nemo nescit *abortum* ancipitis esse aleæ, ob graviora quæ post se trahit symptomata, immanem scilicèt sanguinis profusionem, lipothymias, febrem, delirium, affectum comatosum, convulsiones, &c. Ægrè sæpiùs distinguitur larga illa sanguinis per plures menses intrà cavum uteri cohibiti profusio, tàm in virginibus quàm in mulieribus, ab hæmorrhagiâ abortûs prænuntiâ; à benè tamen perspectis traditis utriusque statûs signis,

MORBI
PRÆGNAN-
TIUM.

patet discrimen. Falsum plerumque incurrit terrorem hæmorrhagia à retentis mensibus: periculosior sanè censeretur abortum prænuntians, præsertim sub primâ graviditate, & circâ ultimos gestationis menses: multiplici enim observatione constat rarò lethalem esse sub primis graviditatis mensibus, & majus imminere periculum à septimo ad nonum mensem. Calamitosior verò censetur abortus sub quovis morbo acuto graviore; funestum enim tum præfagit eventum variis cladibus confirmatum.

(5.) Inter vulgatiores *abortus causas* numerantur vita deses & otiosa, sanguinis ex utero profluvium, cathartica acriora, vomitus & alvi fluxus, tenesmus & alvus compressa, calculus vesicæ, immodicæ corporis exercitationes, conamina vehementiora, ictus & lapsus ab alto, animi pathemata graviora, odores ingrati, immoderatus caffè, vini, liquorumque ardentium usus, quædam pharmaca meretriculis nota, &c. Quibus addere licet morbosam uteri conditionem; virus venereum, vel scorbuticum; morbos acutos, &c. Ubi quædam se proferunt imminentis hujusce infortunii *indicia*, omni ope enitendum ut præcaveatur: hunc effectum præstare queunt venæ sectiones circâ consueta mensium tempora celebratæ: quieti insuper indulgeant mulieres, vel lecto se contineant imminente periculo, coitum fugiant, &c. Haud inutilem sub hoc casu opem conferunt aqua oryzæ, ptisana consolidæ majoris, succus urticæ; pulvis veronicæ, semina plantaginis; adstringentia, opiata, aliave medicamina adversus fluxum mensium immodicum usurpari solita. Jure etiam deprædicantur, sub eâdem rerum conditione, aquæ minerales ferrugineæ, præsertim apud mulieres ad abortum proclives. Ut de inepto quodam remedio, apud mulierculas celebratissimo; serico nempè crudo, ut vocant kermesino, minutissimè secto, & ex ovo sorbili sumpto, fileamus. Ubi verò, confertim jam erumpente sanguine, in propatulum venit abortus, futilia sunt omnia adstringentia interna & externa, cum experienciâ quotidianâ constet à solâ embryonis, placentæ, vel grumorum sanguineorum expulsionem pendere *morbi solutionem*, quæ naturæ viribus committi solet, ni sævientia truculentiora symptomata funeris metum incuriant; sub quo casu obstetricantis manu, vel quâvis aliâ arte, urgentiori succurrendum. Sed notare expedit quod sub tribus quatuorve graviditatis mensibus solis naturæ viribus extrudi possit placenta, ni solutâ hærentiâ, ad osculum uteri propellatur; sub quâ rerum conditione valet ars chirurgica.

(6.) Maturî *partus terminum* circâ finem noni mensis à naturâ constitutum fuisse, nemo nescit: nonnulli tamen occurrunt partus septimestres & octimestres. De decimestribus, duodecimestribus, & sexdecimestribus mentionem subjiciunt Authores penès quos sit fides: sed per plures annos gestatur *fœtus mortuus*: prostant enim exempla graviditatum viginti, triginta vel quadraginta annorum: sub quo tamen statu fœtus extrâ uterum ut plurimum collocatur. *Sectis cadaveribus* repertus fuit in tubis fallopiæ, vel in ovariis: aliàs in abdominis cavo hospitat, placentâ cuius


obviæ parti hærente. Fœtus mortui compages tandiù incolumis servatur, quandiù intactis involucris probè obducitur: sed si vicinarum partium labe, aliâve quâcumque causâ solvantur, emergunt phlogoses & purulentia, quibus fœtus putredine solvitur: intereâ stagnans tabum foveas sibi cudit, & fœtus ramenta secum rapiens, exitum sibi parat per sentinam intestinalem, per umbilicum, aliasve abdominis partes. Hunc morbosum *fœtus extrâ uterum* situm à vitioso conceptu profapiam ducere nemo non videt: nonnunquàm in abdominis cavum delabitur ovum imprægnatum, ubi beneficio accretæ placentæ vivit & crescit. In nonnullis moratur infans, cum solito incremento in ovario aut tubâ, donec ob majorem molem in abdomen decidat. In utroque casu seriùs ocyùs extinguitur fœtus: dein quandôque exsiccatur; vel crustâ tartareâ obducitur. Sic fiunt graviditates viginti & triginta annorum. Hæc docent secta cadavera. Aliquando tamen evenit ut à dilaceratione plus æquo expansi uteri, infans in abdominis cavum devolvatur: sed rarò procrastinatur hæc graviditatis species, quin potiùs ægram brevi in orci fauces præcipitem trahit.

(7.) *Partus*, etsi maturus, *haud periculi expers* censerì debet, si uteri ostium & vagina debitâ flexibilitate & lubricitate defraudentur; cùm hinc dilatari nescia fœtus exitui obstitit; ad quem promovendum varia parantur enemata, fœtus, injectiones, aliaque emollientia & lubricantia externa. Sed præter hanc causam annosis mulieribus familiarem, alia vulgatior eruitur ab exhaustis parturientis viribus, vel à debilitate ipsius fœtus; sub quo rerum statu opportunè adhibentur roborantia & cardiaca, vinum scilicet, aqua imperialis, cinnamomi, &c. Nonnunquàm etiam conferunt emmenagoga, aristolochia nempè, borax, &c. Suas laudes merentur aqua florum aurantiorum, tinctura castorei, succini, aliave antihysterica; sed haud nisi casu urgentiori narcotica præcipere licet. Egregiè se gerunt enemata emollientia & carminantia; sed inter ficulnea præsidia numerandum epithema è pulvere foliorum lauri, & oleo confectum atque umbilico admovendum, ut alia topica à mulierculis deprædicata missa faciamus. Hæc sunt auxilia adversùs *partum difficilem* adhiberi solita, quæ tamen futile censerì debent, si incusetur prava ossium pelvis conformatio, vaginæ & uteri occallescentia, tumores horumce organorum cavum occupantes, hernia uteri, fœtus extrâ uterum, &c. quæ ægritudines planè immedicabiles censentur, vel peculiarem curam alibi traditam sibi vindicant: ut nihil addam de lapide ætite, quem gravidis in nixu admotum, partum maturare ineptè creditur.

(8.) Quantumcumque metum injiciat fœtus debilis; res fanè periculosioris est alex, si vitâ orberetur. Eruuntur *extincti fœtus indicia* à cessatione motûs quem prægnantes persentire solent; à frigidâ quâcumque sensatione & pondere in hypogastrio; à dysuriâ & tenesmo; à quâdam

MORBI
PRÆGNAN-
TIUM.

horripilatione insolitâ , ab insultibus convulsivis ; & demùm ab erumpente fœtido latice. Naturæ viribus plerùmque committitur fœtus demortui exitus : supervacanea enim vel noxia sunt medica auxilia , diuretica nempè , & emmenagoga à pluribus adhiberi solita : de viribus filicis nuperrimè decantatis dubitare licet. Ubi fœtus mortui in utero hospitantis involucri solvuntur ; prorumpit aqua & brevi omnia detruduntur : sed infans , integris hisce membranis , putredinem arcentibus , à situ deturbari minime patitur : hinc ad *obstetricantium artem* confugiendum ; quâ nil proficiente , una manet matribus salutis spes circâ *partum cesareum* , aliàs periculissimum , qui tamen tempestivè , & solerti manu celebratus plures jam ad incitas redactas ex orci faucibus eripuit. Crebriùs adhibetur hæc sectio *post prægnantis obitum* , inter scilicet ultimos gestationis menses , ut salutis infantis consulatur ; qui aliàs mortem minime effugeret. Sub *partu* etiam *impedito* ad hanc operationem sese accingere debent chirurgi , *matre & fœtu viventibus* ; si incassum adhibitis aliis omnibus artis præfidiis , nil à naturæ viribus sit expectandum : tùm enim haud aliâ methodo utriusque vitæ prospicitur : sed non nisi priùs omnia à solertioribus ritè perpensa fuerint , hanc sævissimam & luctuosam operationem , circâ legitimum partus terminum , instituere fas est : plura de hac re accurata & elaboratissima præstant in primis binis voluminibus Acad. Chirurg. Parisiensis.



MORBI PUERPERARUM.

ÆRUMNOSAM sæpiùs esse *puerperarum valetudinem* neminem fermè latet : nullus enim error minoris momenti , sub hoc statu , in vivendi ratione committitur : truculentiora quidem portendunt symptomata frigus intempestivè susceptum , iracundia , terror , insolens gaudium , cæteræque graviores animi perturbationes ; liberalior ciborum & cupediarum usus , &c. Innumeri exhinc prodeunt morbi mammas & uterum respicientes ; qui ægras in vitæ discrimen sæpiùs trahunt. Inter frequentiores , occurrunt stupendum cruoris ex utero profluvium , diarrhœa , tormina , placentæ re-
rentio , lochiorum suppressio , vel fluxus immodicus ; variæ læsiones ad lac , vel mammas , attinentes ; insultus hysterici vel convulsivi , febris miliaris , &c. Variis infortuniis , quæ ab obstetricatione suam ducunt originem , à nostro instituto planè alienis , recensendis non immorabimur , ne falcem in alienam messem immittere videamur.

(1.) Ad *hæmorrhagiam uteri* pronæ cenferi debent mulieres plethoricæ ; præsertim si inter graviditatis stadium venæ sectiones inconsultò post haberint. Hunc etiam uberiolem sanguinis proventum accersunt procerioris

fœtus exitus; incauta placentæ evulsio; vel ejus dilaceratio, remanendo quâdam portione utero affixa; grumofus fanguis intrâ uteri latebras coërcitus; falsus conceptus, vel mola, &c. Ubi igitur pleno gurgite prorumpit fanguis, danda est opera ut reprimatur ejus ad uterum imperus: hunc effectum præstat sanguinis missio è brachio, si ægrotantis vires ferant: aliàs in situ horizontali paululùm elevatis clunibus se componat & quieti se tradat puerpera: caveat aërem plus æquo æstuantem, vel adstantium frequentiam inquinatum: imò & sæpiùs expedit ut referentur fenestræ, & cubiculi renoveretur aër. Interea lintea oxycrato imbuta lumbis, & proximioribus genitalium partibus, admoveri queunt: opportunè intus exhibentur succus portulacæ; ut cætera utriusque ordinis præsidia, de quibus suprâ, prætermittamus. Sed notare juvat futilia hæc omnia censerî, si quodvis corpus recondat uterus; cùm in solâ ejus extractione versetur curationis cardo.

(2.) Haud levem metum injicit *alvi fluxus puerperarum*, ob imminentem lochiorum sufflaminationem, quam post se trahere solet, si contumax evadat, vel naturæ limites prætergrediatur: ideò in hunc converti debent clinicorum curæ. Proficue sub hoc casu injiciuntur enemata è lacte cum ovi vitello parata, è jusculo omasorum, &c. Egregia sæpiùs obeunt munia hypnotica, dummodò cùm cautelâ adhibeantur: minime enim reticendum hæc à pluribus, VEDELII vestigiis inhærentibus, planè vitari; eò quod lochia, uti perhibent, sistant; sed refragatur experientia. De venæ sectionis, à multis deprædicatæ, efficaciam jure dubitandum; cùm si quid contulisse visum fuerit illud auxilium, id minùs huic, quàm naturæ & tempori tribuendum esse censemus. Cautè etiam cum medicaminibus alvum comprimantibus mercari expedit; cùm lotiorum excretioni sæpiùs officere experientiâ constat: si tamen frequentiores sint egerendi conatus, hujusce infortunii etiam prænuntii, urgentiori succurrere fas est.

(3.) *Puerperarum tormina* intrâ biduum, triduumve, cum nonnullis intermissionibus vel remissionibus contineri solent; & rarò ad septimum, vel octavum diem protelantur. Hujus symptomatis immunes esse primum partum enixas vulgò traditur; sed reluctatur experientia. Cruciatus partum excipientes nonnunquàm implicantur cum genuino affectu colico; adeò ut ægrè sæpiùs distinguantur prædicti dolores. Si certis cancellis contineantur puerperarum tormina, & à constitutâ naturæ normâ minime recedant; nullam medelam expostulant; cùm uterum ad saluberrimam excretionem sollicitare videantur: sed si modum excefferint, illa compescere licet. Usus invaluit apud mulierculas, ut oleum amygdalarum dulcium cum syrupo capillorum Veneris exhibeant, ad hæc præcavenda vel sedanda: nec despiciendum illud præsidium. Eamdem opem præstant flores althææ & chamæmeli, sperma ceti, &c. Notissima est sub hoc casu efficacia tincturæ castorei vel succini, alteriusve medicaminis antihysterici:

MORBI
PUERPERA-
RUM.

nec vetantur diacodium, laudanum, tinctura anodyna, aliave hypnotica, quæ scilicet, servatis servandis, oppidò conferre valent.

Interea paulisper in lecto erigantur puerperæ, ut uterus in loco decliviori situs facilius expurgetur: sed maximi est momenti ut sub primis diebus tenuis componatur diæta. Præterea *linthea calida* abdomini, vel regioni hypogastricæ admoventur solent. Plures hanc partem illinunt oleo amygdalarum dulcium: aliæ frixam ovorum intritam, imo ventri imponendam, cum oleo nucum parant; ut alias cautelas à sequiori sexu comprobatas, haud semper despiciendas, missas faciamus. Insuper præsentaneam opem ferunt *enemata* emollientia & demulcentia, quibus additur oleum, vel butyrum; nec alius patet modus alvum servandi liberam; cum inter lochiorum fluxum omnia cathartica exulare debeant; quæ tamen, absoluto horumce purgaminum stadio præscribi queunt, si res expostulet: aliàs haud nisi post mensem integrum, & ultrà, exhiberi solent; dummodò haud obstant internorum catameniorum prodromi, qui antè tertium à partu mensem sæpiùs se proferunt; sub quibus sanè nil citrà periculum movetur.

(4.) Post felicem fœtus exclusionem, alia naturæ, vel obstetricanti, incumbit cura; nempe *secundinarum ejeçtio*, vel extractio: ab *hiscè enim retentis* graviores exsurgere morbos nemo nescit. Equidem hoc infortunium presso pede sequuntur febris vehemens, dolores singulas corporis partes, ac præsertim uteri viciniore, invadentes; hæmorrhagia immanis nullâ arte reprimenda, pectoris angustia, lipothymia, convulsiones, &c. Si lochia suprâ modum fœteant, de *secundinarum putredine* cogitandum; è quâ maximum impendet malum; uteri nempe exulceratio. Haud desunt tamen exempla variarum puerperarum quæ haud nisi per plures hebdomadas, imò & menses hanc farcinam incolumes deposuerunt. Hoc sanè quidem opus naturæ viribus committitur; quibus tamen deficientibus, haud vetantur nonnulla præsidia adversus partum difficilem adhiberi solita; veluti crocus, castoreum, succinum, borax, sabina, &c. quibus nil proficientibus ad *obstetricantis manum* confugere expedit; priusquàm uteri ostium occludatur. Ubi verò adsunt putredinis notæ; opportunè usurpantur injectiones detergentes cum hordeo, rosis rubris, summitatibus hyperici, scordio, absinthio minori, melle, &c. cautâ enim horumce detergentium administratione præcaveri potest imminens uteri ulcus.

(5.) *Lochiorum profluvium* ab octo ad quindecim dies in plerisque protelari neminem practicum latet: nonnunquàm tamen intrâ biduum vel triduum continetur, cæteris benè se habentibus; vel ad viginti, triginta, quadraginta dies producitur. Vix etiam definiri potest illius profluvii quantitas, in quibusdam parcissima, in aliis verò uberrima; nec desunt mulieres hujusce purgationis, non secùs ac catameniorum, planè nesciæ. Summum sæpiùs terrorem incutiunt hi diversi puerperarum status præter solitum accidentes: sed parùm metuendum, si nullo alio symptomate

conflictantur puerperæ. Merus sanguis primò excernitur; dein cruenta hæc purgamenta sensim albicant, & in materiam crassiolem, lactis quasi æmulam, faceffunt. Eâdem ratione paulatim imminuitur juxta consuetam naturæ normam illius excretionis proventus, donec planè exhauriatur. Has vicissitudines altâ mente tenere debent clinici, ne specie morbi decipiantur, & ad intempestivam medelam sese accingant; quâ nil calamitosius excogitari potest.

Inter graviores morbos recenferi debet *lochiorum suppressio* ob atrociora, quæ post se trahit, symptomata: molestissimam nempe abdominis prominentiam; mammarum phlogosim; lumborum, inguinum, partiumque intermediarum dolores atrociores; pulsationis sensationem in æstuante utero; anxietates, tormina acerbissima, affectum iliacum; febrem prævio algore, nunc inflammatoriam, nunc purpuratam vel miliarem; horrendos insultus hystericos, delirium, convulsiones, affectum comatosum, vel ipsammet apoplexiam; hæmoptysim & suffocationem, sudores frigidos, syncopem, &c. Fiunt præterea congestiones, stasesve lacteæ vel purulentæ, quæ pro mortis præconibus haberi debent, ni falso naturæ molimine per quamcumque viam exitum sibi parent. Hinc dilucidè patet nullum esse fluxum cujus suppressio tantum terrorem incutiat; cùm ab illâ de quâ in præsentiarum, antè decimumquartum morbi diem plerumque rapiantur ægræ. Horumce *purgaminum suppressionem* nonnunquam accersunt uberior sudoris proventus, diarrhœa, cæteræque evacuationes, quæ aliàs harum vices nonnunquam supplent. Frigus insuper incautè admissum, iracundia, terror, cæteraque vehementiora animi pathemata, accessiones hystericae, odores averfi, errores in diætâ, &c. hunc luctuosum morbum inferunt, qui sanè exitialem visceribus labem minatur: exhibent enim secta cadavera ascitem lacteam vel purulentam, tumores folliculatos eâdem materiâ turgentes, hydropem peritonæi & hydatides, uterum infarctum, phlogosi correptum vel tuberculis obsitum, skirrhum, sanguine concreto turgentem, & perforatum; ejus oris labia coalita; placentam ejus osculo inhaerentem; ovaria ingentia: quibus addere licet phlogosim, putredinem & gangranam omenti, tubi intestinales, peritonæi, &c.

Neminem expertum later intricatissimam esse hujus morbi *curationem*: equidem de sanguinis missione multùm controvertitur; nonnulli enim venam pluriès tundendam esse arbitrantur, dùm cæteri vel minimam sanguinis detractionem averfantur. Nec minùs dissentiunt primi circà vas secandum; plures ex alterutro brachio sanguinem educendum esse pronuntiant; alii verò saphenæ sectionem depradicant: sed contrarias has sententias, potiùs hypothesibus, quàm genuinâ praxi suffulciri, nemo non videt; hæc enim docet phlebotomiam haud nisi casu urgentiori & summâ cautelâ esse celebrandam, pro rerum conditione, nunc in brachio, nunc in pede. Cæterùm multa de hâc re lepida, & dilucidè tradita, prostant apud Scriptores, quæ tamen inter praxim implicatissima deprehenduntur;

MORBI
PUERPERA-
RUM.

adeò ut anxii hæreant vel oculatiores clinici, quibus notum manet venæ sectiones in potiori ægrarum parte feralem habuisse exitum, licet morbo vel remedio tribuatur hoc infortunium.

Inter hæc angustias, opportunè quandòque exhibentur *mensæ scientia*, bardana nempè, aristolochia, crocus, zedoaria, castoreum, borax & elixirium proprietatis: sed vetantur sæviente febre acutâ & inflammatoriâ, sub quâ conditione tutius præscribuntur demulcentia, temperantia & aperientia blandiora; aqua scilicèt pulli, vel serum lactis, oleum amygdalarum dulcium & sperma ceti, gramen, cichorium, asparagus, radix arundinis, nitrum, &c. Aliquando profunt, ni obstat sanguinis æstus, kermes minerale, antimonium diaphoreticum, aliave remedia perspirationem moventia. Egregiam opem præstant hypnotica, licèt à pluribus prohibeantur, hisce rationibus ductis, quod narcotica omnes secretiones sistant, exceptâ diaphoresi, quod effatum *Vedelianum* pluriès falsum inter ægros versantes deprehendimus. *Enemata* è sero lactis, vel lacte & saccharo parata, cæteraque emollientia & antihysterica, haud inanem sub hoc casu operam ludunt. Suas laudes etiam merentur fots & cataplasmata emollientia regioni hypogastricæ admovenda; vesicæ lacte tepido turgidæ eidem parti impositæ, emplastra & epithemata antihysterica umbilico dicata, ac demùm cucurbitulæ interioribus femoribus affixæ. Prætereà frictus in artubus inferioribus celebrantur, decocta emollientia in uterum injiciuntur, &c.

Ad contrarium *lochiorum* statum, seu *uberiorem proventum*, multò minùs periculofum devehimur, qui sub primo conspectu ægrè à naturali distinguitur, cùm plures mulieres, ratione ætatis, temperiei & vivendi generis, stupendum lochiorum profluxum absque noxâ patiantur, dùm aliæ illud dispendium ægrè ferunt; nec alio modo innotescit hæc ægritudinis species, nisi à benè perspectis symptomatibus quæ post se trahit; inter quæ vulgatiore censentur imi ventris intumescencia, cum renitentia & dolore; visûs obnubilatio, lipothymia, convulsiones, tumor crurum œdematosus, &c. Huic largiori lochiorum profusioni occurritur calore, quiete & congruâ diætâ, cibis scilicèt euchymis & incrassantibus, vitellis ovorum, &c. quæ omne sapiùs punctum ferunt. Opportunè etiam præcipiuntur temperantia & demulcentia; cichorium nempè, pimpinella & borrago, emulsiones, cremores hordei, oryzæ, &c. Egregia in plerisque munia obeunt antihysterica & anodyna; nec vetantur in re urgentiori adstringentia, cum quibus tamen cautè mercari expedit; ne intempestivâ sufflamine in pejus ruant ægræ. Premente necessitate, ad opium confugere fas est; sed nitro sociari debet, quod illius vim sanguinem commoventem cicurando, anodynâ prorsùs intactam relinquit. Postremò notare juvat uberiores lochiorum fluxum, hæmorrhagiæ instar, nonnunquàm foveri à placenta frusto, aliove quovis corpore in utero recondito, cui medetur obstetricantis manus.

(6.) Infans in lucem editus, solito more curatus & somno instauratus,

tus, post quindecim vel viginti horas mammis maternis admoventur, ut exhinc eliciat alimoniam solò naturæ beneficio paratam, quâ juxtà naturæ normam excretâ omnia benè se habent. Sed quandoque uberior se profert, aliàs parciior; vel planè deficit. Ubi *majori lactis proventu*, haud sine lactantium molestiâ, turgent mammae, ita ut etiam robustioribus infantibus depleri minime queant; præcipienda est diæta tenuis, ut minor chyli copia appellat ad hæc organa. Sunt qui sub hoc casu evacuantia diversæ fortis in usum trahunt, ut aliò deriventur humores ad mammas irruentes; nec infauستا est hæc methodus. Suas etiam merentur laudes quævis topica adstringentia, necnon cauta mammarum compressio ad arcedandam ulteriorem lactis secretionem. *Imminuta lactis copiae* consulitur, causam quâ sistitur hæc secretio abigendo; sed nonnunquàm in obscuris latet. Scitur largiori cibo refocillandam esse nutricem alimentorum penuriâ debilitatam. Haud inutilem fortè opem præstant semina anisi & fœniculi, aliaque consimilia diuturno usu quasi comprobata. Nonnunquàm demùm prodest mammarum frictus cum panno aspero, ut alias artes, apud insciam plebem vigentes, missas faciamus.

A lactis motu versùs mammas quo tument & dolent, circà tertium, quartumve diem à partu, febricula quædam emergit, quæ *febris lactea* audit, & levi sudore post biduum vel triduum in plerisque, ephemeræ instar, solvitur. Nullam medelam expostulat, si ritè fluant lochia; aliàs diutius protelatur, aliamque faciem induit; & opus est præsidiis medicis. *Lac*, uti suprà notavimus, tanto sapiùs impetu irruit ad mammas ut *molestissimam expansionem*, dolore stipatam, subeant hæc organa, in genuinam phlogosim haud rarò facessuram; ad quam procliviores esse mulieres, quæ nativum pabulum propriis infantibus denegant, nemo non intelligit: hanc morbosam mammarum conditionem præcavent diæta tenuissima, & fæcum alvinarum, congruo enematum usu, evacuatio; quæ auxilia naturali lochiorum fluxui etiam egregiè favent. Intereà mammis admoventur lintea calida, identidem cum cautelâ renovanda, ne aëri frigido committantur hæc organa. Nec desunt topica à mulierculis, adversùs utrumque affectum, decantatissima, qualia sunt petroselinum, apium palustre, mentha, cerefolium, brassica, farina fabarum, semina cumini vel coriandri, mel, fæces vini, butyrum insulsum in aquâ vitæ solutum, oleum menthæ, unguentum populeum, emplastrum diachylon, vel de spermate ceti, &c. quæ omnia nusquàm despicienda esse censemus.

Hisce tamen auxiliis, tametsi diuturno usu comprobatis, minime fidentum: quapropter efficaciora in usum vocari debent remedia; *diuretica* nempè quæ lac miammis subducere solent, hujusce laticis devii motum ad renum incernicula dirigendo: hanc opem præcipuè præstant terebinthina chia, cum pulvere asellorum; dummodò haud obstat nimia sanguinis incallescencia; sub quo casu vulgatiore sunt præscribenda; quæ recensere superfluum judicamus. Suas laudes merentur succus menthæ aut cerefolii; vel earundem plantarum decoctum. Usus invaluit apud nonnullas mu-

MORBI
PUERPERA-
RUM.

lieres ut potuim ex avenâ, vel radice lapathi parent; quorum efficacia multiplici experienciâ comprobari videtur. Sed ubi *mammæ* siccae suprâ modum *tument & dolent*, tundenda est vena, ut declinetur phlogosis. Plurimum etiam conferunt, cæteris consentientibus, cathartica blandiora, inter quæ præstare videntur arcanum duplicatum, sal Rupellenſe, cum aquis Viciensibus, &c. His omnibus incaſſum uſurpatis ubera alumno, catellis, vel ſuctrici, ſunt præbenda; & ſic infarctui & doloribus brevi occurritur, donec cætera præſidia ſuum effectum exerant.

(7.) Sæpius evenit ut poſthabitâ, vel quâvis adhibitâ curâ, *lac ſanguini remixtum* labem humorum maſſæ imprimat; è quo fonte innumeri & intricatiſſimi progerminantur morbi, eò magis pertimeſcendi, quò tardiùs in propatulum veniunt, & obſcurior eſt horum indoles. *Lait épanché ou répandu*, à noſtratibus vocitatur hoc ægritudinis genus, ſub quâ ſe produnt materiæ cujuſdam lactæ, nunc intrâ folliculum collectæ, nunc contextum ſolidorum afficientis, in hanc vel illam partem decubitus: in apicum veniunt tumores externi, œdematis ſpeciem præ ſe ferentes, renitentes, dolore ſtipati; ad phloſim & abſceſſum nonnunquàm vergentes: ſed meris duntaxat conjecturis aſſequi licet labem meſenterii, thymi, pulmonum, &c. ejuſdem cauſæ ſobolem, quam deſignant varia ſymptomata, cachexia nempè ſcrophuloſa, ſcorbutica, alteriuſve indolis, leucophlegmatia, aſcites, hydrops pectoris, alvi fluxus pertinaciſſimus, uberimi ſudores fœtidi cum urinis turbidis; inſultus aſthmatici vel ſuffocationes, pulmonum tubercula, aliæve deſœdationes; inſarctus viſcerum, furunculi, herpetes, aliæve eruptiones cutanæ; dolores incertæ ſedis & reconditæ naturæ, febres indomabiles, tremores & convuſiones, ſtupor & paralyſis, &c. Hinc intelligitur quid mali portendat hic corporis ſtatus, ni maturè ipſi occurratur. Hunc *præcavere* vel *impugnare* queunt diuturnus evacuantium multigenorum uſus & congrua victûs ratio: ideò præmiſſis venæ ſectionibus, opportunè præcipiuntur laxantia, diuretica & ſudorifica; ut materia morboſa ad varia corporis emunctoria devehatur: egregiam opem conferunt ſerum lactis, nitrum, ſal de duobus, magnesia, aquæ minerales, &c. De paregoricis, aliisve remediis ſingulos morbos, pro re natâ reſpicientibus, nil addimus: nec de tumoribus externis & ulceribus hinc oriundis, quæ vulgatori methodo ſubmittuntur.

Quanquàm hæc præſertim impendent infortunia puerperis, quæ peſſimo ſanè conſilio, à conſtitutâ naturæ normâ recedunt, & matris munia obire negant: haud tamen hiſce immunes cenſeri debent *lactantes*, vel nutrices, quæ ab ſtagnatione lactis intrâ mammarum tubulos phloſim hanc vel illam horumce organorum partem obſidentem haud rarò patiuntur. *Inſarctum mammarum phlogodeum* æſtu & dolore ſtipatum concomitantur febris nonnunquàm vehemens, ſitis, cephalalgia, ſpirandi difficultas, &c. Hunc promovent contuſiones, animi pathemata graviora, frigus incautè admiſſum, &c. Ægrè reſolvitur hæc phlogofeoſ ſpecies, à lacte congruato, ut inſpiciunt, ſoboleſcens; quin potiùs ad ſuppuratum vergit. Ita-

que latex purulentus in abscessum colligitur, nunc profundum, nunc extrinsecus erumpentem; qui nusquam ferè declinatur, si inflammatio ultra quinque vel sex dies producat: nec rarò à diuturniori puris morâ in fistulam contumaciorē abit. Aliud insuper impendit infortunium à prædictâ sanguinis stasi; nempe skirrhus & carcinoma, de quibus mox dicendum.

Non secus ac aliæ inflammationes, venæ sectionibus, tum in superioribus, tum in inferioribus artubus celebratis, *reprimitur mammarum phlogosis*: varia insuper admoveri solent topica è resolventibus, emollientibus & anodynis parata: inter usitatiora & magis comprobata numerantur forus ex aquâ vitæ, vel aquâ calcis cum sale ammoniaco; vapor aceti conflagrari, cataplasinata è farinâ oryzæ, tritici, fecalis & melle confecta; terra cultriorum cum oleo subacta, folia brassicæ rubræ melle oblita, folia hyoscyami sub cineribus cocta, emplastrum diachylum cum gummis, vel de spermate ceti; sacculi calidi sale, sulphure, floribus sambuci vel chamæmeli repleti; vesica prædictorum florum decocto semi-turgida, pellis agni recens mactati, &c. alvus demum notissimis auxiliis servetur libera. Sed consultius videtur sub hac rerum conditione lactis appulsum ad mammas præcavere; aliàs procrastinatur morbi curatio: in hunc finem uberibus imponi solent folia apii, petroselini, cerefolii & menthæ, semina anisi & feniculi, mel, axungia serpentis, oleum chamæmeli, unguentum de althæâ, &c. Interea præcipuè attendendum ad lochiorum fluxum, qui decantatis præsidiiis egregiè obsecundat. Ubi postremò nullæ circa quintum diem se præbent resolutionis notæ, ad maturantia infra indicanda devenire expedit.

Inter leviores sanè quidem nutricum morbos recensendæ sunt *mammarum*, vel *papillarum rimæ & fissuræ*, quibus tamèn nonnullæ torquentur ob exquisitissimum sensum quo præditæ sunt partes affectæ; imò & nonnunquam pertinacissima est hæc ægritudinis species; ni notissimis præsidiiis præpediatur motus lactis ad mammas; & exhauriantur hujusce laticis fontes. Sed alia primò est ineunda medendi via, quæ versatur circa topica demulcentia & anodyna; hisce viribus pollent butyrum vel cremor lactis, oleum ovorum, mucago seminum cydoniorum, &c. quæ excipiunt detergentia & exsiccantia, mel nempe rosatum, oleum myrrhæ per deliquium, unguentum album Rhasis, pompholyx, emplastrum de cerussâ, &c. Sed futilia sæpius sunt, uti jam innuimus, hæc præsidia, si nutrices ubera infantibus præbere pergant; cum haud dubitare liceat quin ab illâ repetitâ suctione non solum hic foveatur morbus, sed etiàm exasperetur.

(7.) De tempore quo se prodit *febris miliaris puerperarum*, nil certi statui potest; sed plerumque cum febre lacteâ implicatur. Inter varia symptomata quibus stipatur hæc febris species, solitum typum præ se ferens, ominosa censentur dolor capitis gravativus cum tinnitu aurium, suffocatio, pulsus debilis & inæqualis, &c. Haud levem metum incutit sub hac conditione alvi fluxus, ob imminentem lochiorum suppressionem: plures neci dat delirium, vel in maniam vix domabilem facessit; tunc rem,

MORBI
PUERPERA-
RUM.

quocumque modo se vertat, in ancipiti versari facillè intelligitur. Quod curationem spectat, pluris habentur temperantia & depurantia: cichorium nempe, borrago, cerefolium & nasturtium; quibus præmissis proficue sæpius adhibentur diaphoretica & cardiaca; inter quæ primatum fermè ducit kermes minerale: cavendum tamen ne ægras refocillando sanguis plus æquo concutiat, & omnia in pejus ruant. In usum etiàm pro re natâ vocari queunt absorbentia, non secùs ac hypnotica; sed solerti manu pertractari debent hæc postrema, quæ sæpius, haud sine decumbentium periculo, morbum quodam velamine obducunt.

De *venæ sectionibus* multùm inter se dissident clinici: pluribus enim arridet saphenæ sectio, quam tamen praxi edoctus haud citrà periculum celebrari facillè crediderim, ob metum inflammationis abdominis, quam sæpius hanc sanguinis detractionem pressò pede sequi experiëntiâ constat. Haud tamen planè vetari debent venæ sectiones sub hoc morbo, si vires sinant, & urgeant graviora symptomata: sed metus est ne depletis vasis œconomix animalis salubria pervertantur conamina; quid enim mali hisce deficientibus impendeat, nemo non videt. Nec minùs pertimescenda cathartica acriora: comprobantur verò laxantia blandiora; non secùs ac enemata emollientia & demulcentia, quorum ope alvus servatur libera, & lochiorum fluxui favetur. Præclaram postremò opem conferunt vesicatoria coxis & cruribus admota, quotiès caput vel sensorium commune gravè læditur: nec minùs levamen impertiuntur ergà pectus plus æquo impeditum prædicta topica; adeò ut inter præstantiora remedia sub hâc rerum conditione numerari debeant.

(8.) Superest ut de *affectu hysterico puerperis familiarissimo* breviter agamus; qui morbus proteiformis falsum terrorem sæpius incutit: etenim innumera ex hoc fonte prodeunt symptomata, è quibus malè perspectis in errorem, haud rarò lethiferam, se præcipientes ruunt incauti vel imperiti: imò & sæpius evenit ut hujusce phænomeni genuina indoles ipsismet mulierculis apertiùs elucescat, quarum increpationibus ab infelici & intempestivâ medelâ nonnunquàm desistere coguntur vel pervicaciores, affinitate decepti. Nec sub hâc rerum conditione diversam expostulat curationem insultus puerperarum hystericus, quam suprà tradidimus: ideò huic superfedere haud incongruum judicamus, ne crambem recoctam apponamus.



MAMMARUM MORBI.

MAMMA-
RUM
MORBI.

PRÆTER causam è suprâ traditis lactis vitiis depromendam, aliæ occurrunt virginibus & mulieribus communes, quæ affines læsiones, phlogosim nempe & abscessum, skirrhum & cancrum promovere queunt: de quibus sigillatim pro instituti ratione breviter differere operæpretium judicamus: sed priusquàm ulteriùs progrediamur; haud abs re erit nonnulla præmittere de *mammis virginum sororiantibus*; licet prædictorum organorum sub pubertate incrementum à consueto rerum naturalium ordine minime alienum è morborum albo expungi debeat. Irruunt humores ad ubera pubescentium vel nubilium; ità ut exhinc emergat dolor, de quo nonnullæ virgines delicatulæ conqueri coguntur. Huic occurritur congruo regimine & partem affectam probè cooperiendo: adhibentur venæ sectiones, si dolor mammarum increscentium acutissimus evadat: nec inutilem sub hoc casu opem præstant cathartica. Per transfennam notandum *nonnullos* reperiri *pueros*, qui sub idem tempus, similem fermè in mammis patiuntur expansionem, quodam dolore etiam stipatam; cui haud aliâ arte consulitur. His præhabitis expedit, ut propositum persequamur.

(1.) Præter lactis moram & concretionem in puerperis, de quibus suprâ, causam internam rarò admittit *mammarum infarctus*, vel *inflammatio*: sed sæpiusquàm à quâvis contusione trahitur hæc phlogoseos species, quam concomitantur æstus, dolor & renitentia; imò & sæpiùs febris excandescit. Resolutione agrè judicatur; sed plerùmque in suppuratum abit; ni skirrhi & cancri naturam induat. Curatio pro more à venæ sectionibus auspicatur; dein danda est opera ut sanguis remediis alibi traditis attemperetur. Sed circà topica versatur præcipua medela; inter quæ selectiora audiunt emplastrum de spermate ceti, quod demulcendi & resolvendi vi pollere videtur; sal marinum urinâ imprægnatum & sacculo conclusum, cataplasmata è floribus sambuci, micâ panis, farinâ secalinâ, aliisve tùm resolventibus, tùm maturantibus, confecta; qualia tradidimus adversùs inflammationem à lactis stasi progenitam. Ubi verò quâdam prominentiâ, fluctuatione, aliisque signis se prodit *abscessus*, mera emollientia & maturantia imponi debent: præter vulgatiore cataplasmata, laudatur emplastrum basilicum, divinum, &c. Ubi de puris debitâ confectio constat, phlebotomo incunctanter incidi debet abscessus, ne tabum, suâ morâ foveas cudens, fistulam promoveat: ulcus denique solitâ methodo pertractatur. Sunt qui velint cauterium prædicto abscessui admove-
vere; sed dubius hic curandi ritus à sanioribus abdicatur.

MAMMA-
RUM
MORBI.

(2.) Inter morbos frequentiores & calamitosos recensetur *skirrhus mammarum*, tum totius corporis glandulosi, tum unius vel alterius glandulæ; ob scilicet imminentem cancerum: nec integram securitatem parit hic tumor mobilis & indolens, cutique concolor; cum plura observentur carcinomata, quæ sub primis temporibus eandem faciem referebant. Imò & illuc res rediit, ut plures haud infimi ordinis, quemvis mammarum tumorem contumacem pro cancro habeant; quod nec rationi, nec experientia, consentaneum videtur; cum innumera occurrant mulieres quæ prædictum mammarum infarctum, certis cancellis coercitum, leveque incommodum parientem, per totum vitæ curriculum gestant: quem affectum (*glande au sein*) vocitant Nostrates. Mammarum skirrhus, circa quadragesimum quintum vel quinquagesimum ætatis annum sæpius ingruens, à mensium suppressione *prosapiam* ducere solet; aliàs à contusione progerminatur: huic præsertim obnoxia censentur melancholica, curarum æstu fluctuantes & ærumnosæ. *Periculosa* esse quamvis *curationem externam* vulgò fertur; quod tamen non impedit quominus emollientia & resolventia à pluribus admoveantur, emplastra scilicet de mucaginibus, de spermate ceti, de cicutâ, de Vigo, diabotano, &c. Nec infauusta est hæc methodus, præmissis præmittendis, *demulcentibus* nempe *internis & temperantibus*; inter quæ præstantiora audiunt lac, ejusque serum, cichorium & borrago, nasturtium aquaticum & lapathum, &c. Nec inutilem opem conferunt aperientia & incidentia refractâ dosi & cum cautelâ exhibita, qualia sunt aristolochia, aselli, flores martiales salis ammoniaci, præparata mercurialia, &c. Haud dubitare licet quin skirrhus recens hisce præfidiis sæpius cedat; sed omnibus obsurdescit annosus, & solâ extirpatione vincitur. Inter utriusque curationem angue pejus vitanda sunt maturantia, quæ lethalem noxam inferre experientia quotidiana testatur.

(3) Parùm discrepat ab skirrho *cancer occultus*, vel nondùm apertus; utrumque per triginta annos & ultra nonnunquam gestari absque molestiâ apud omnes ferè in confesso manet: sed si intempestivis topicis proritur *cancer*, brevi in *ulcus horrendum* facessit: hunc infaustum eventum etiam in plerisque promovet mensium sufflaminatio. Luctuosam canceri expansionem minatur pruritus insolitus, dolores acuti & pulsantes, tumoris livor, tumentes venæ circa ambitum nodosæ, & febris excandescencia. Interea ichor acerrimus & virulentus à tumore exudat, ac sensim excavatur ulcus sordidum & phagedænicum, è cujus lateribus prodeunt carnes fungosæ, quæ putredine absumptæ brevi repullulant. Insuper invertuntur ulceris labia & callosa evadunt; ac nonnunquam erumpunt hæmorrhagiæ vix sistendæ: ex stupendo demùm hujusce diri morbi incremento luce clariùs patet ejus indoles. Tamen si cancerum mammarum planè indomabilem esse experientiâ constat; nonnulla tamen experiri licet *præsidia*. Opitulatur nimirum diætâ lactea, vel quævis alia affinis. Suas laudes merentur serum lactis, vel aquæ minerales, ut inquiunt, acidulæ; nonnihil

profunt temperantia , hepatica , diaphoretica , &c. quæ etsi curationem rarò promovent , haud tamen inutilem operam ludunt , inducias scilicèt agendo & fatum procrastinando. Sed cæteris auxiliis internis palmam fortè præripiunt *antiseptica* , & præsertim cortex peruvianus à clarissimo DE HAEN , praxeos diligentissimo excultore , haud immeritò deprædicatus. Haud defunt alia celebratissima remedia interna suprà tradita , dùm de cancro generatim scilicèt agebamus ; de quorum tamen efficaciam dubitare licet : inter quæ primatum sanè ducit cicuta à famigeratissimis Practicis summè decantata ; de cujus tamen viribus sub nostro cœlo nondùm constat.

Innumera etiam prostant *topica* , quæ tempestivè , præmissisque præmittendis , adhibita , plures sanè fausto bearunt eventu , belladonna , cicuta , hyoscyamus , geranium Robertianum & nicotiana ; radices dauci fativi , symphyti & aristolochiæ , mel aquâ papaveris rubri , plantaginis vel rosarum , dilutum , sabina , præcipitatus albus vel ruber , arsenicum , viride æris , sublimatus corrosivus , aliaque cathæretica ab agyrtis venditata , quæ tamen gravem noxam inferre valent , ni solerti manu tractentur. Porrò incassum adhibitis hisce auxiliis , expedit ut cauterii vires explorentur : aliàs unica salutis spes versatur circà tumoris , ab omni viciniorum partium nexu liberi , *extirpationem* : sed infelicem habet exitum hæc operatio , si tumor subjacentibus musculis hæreat , si glandulæ axillares infarctæ & tumidæ se præbeant : nec ritè succedit , si sanguis & humorum massa quodam viru inquinentur ; cùm delitescens hæc causa seriùs ocyùs post sublatum tumorem , alterius progerminationem foveat : hoc præcavetur infortunium congruâ victûs ratione , cauto blandiorum cathartorum usu , temperantibus , depurantibus , diaphoreticis , aliisque remediis alibi traditis , quæ morbi fomitem impugnare queunt.

MAMMA-
RUM
MORBI.



MORBI
GENITALIUM.

MORBI GENITALIUM.

IN hunc sensum veniunt *fluor albus*, & gonorrhœa, satyriasis, vel *furor uterinus*, *uteri inflammatio* & *skirrhus*, *ulcus* & *cancer*, *eiusdem visceris* & *vaginæ prolapsus*, ac demùm *graviditas notha*, quæ non solum comprehendit diversas molarum solidarum species, sed etiam æris, aquæ vel sanguinis collectionem, quæ sæpius graviditatem ita mentitur, ut vel solertiores decipiantur, præsertim si primus conspectus præbeat mendacio fidem. De herniâ uteri sub graviditate suprâ actum fuit; de rhagadibus, verrucis, condylomatibus, &c. utrumque sexum infestantibus, alibi etiam mentionem subjecimus. Pravas uteri & vaginæ conformationes, tumores, aliasque prædictarum partium obturationes, quæ liberum catameniorum fluxum præpediunt, & generationis muniis obstant, etiam prætermittimus; cùm hæ omnes læsiones organicæ inter sterilitatis causas, suo loco traditas, recenseri debeant.

(1.) *Fluor albus*, Nostratibus (*fleurs blanches*), virgines & mulieres, intrâ vel extrâ conjugium viventes, vel utero gerentes, invadit. Rarò antè pubertatem ingruit: haud tamen planè immunes sunt puellæ vel quatuor annorum. Nunc continuus, nunc intermittens, lacteus vel lymphaticus, serosus vel mucosus; nonnunquàm cruentus, vel purulentus, alteriusve indolis, quam produnt inspecta lintheamina; inter fluxum catameniorum plerumque sistitur. Nonnunquàm statis temporibus ante & post fluxum menstrualem erumpit; aliàs nullo ordine recurrit. Urina, vigente fluore albo, sedimentum præbet quasi pituitosum, vel innatantes floccos congeneres. Non secus ac gonorrhœa, pruritu & stranguriâ, sed mitioribus, stipatur hic affectus, cuiusdam cachexiæ particeps, quam produnt in plerisque lassitudines spontaneæ, dolores lumborum gravativi, crurum inquietudines, cibi fastidium, faciei pallor, tumentes palpebræ & œdema partium inferiorum. A labe etiam scorbuticâ sæpius promovetur fluor albus, vel ab ipsâmet luë venereâ suam ducit scaturiginem: sed à genuinâ gonorrhœâ discrepat tùm ratione sedis, tùm respectu indolis; licèt primâ fronte proximè accedant prædicti affectus; adèò ut vel oculatiores decipiantur. Verumtamen latex in fluore albo erumpens post catamenia uberior, blandus & inodorus sub primis temporibus se profert; sed successu temporis tantam fœtiditatem & acridinem contrahit, ut viciniora erodat; undè oriuntur ulcera, quæ quaquaversus propagantur, nec utero parcunt.

Hinc patet quantis difficultatibus prematur illius morbi *diagnosis*: adde quòd usus fermè invaluit apud mulieres primi subsellii, ut gonorrhœam virulentam, morbum indecorum & obscœnum, pro fluore albo, affectu haud ignobili, habere velint; adèò ut qui ex harum intricatissimo relatu,

&

& rarò candido, verum à falso extricare animo intendunt, lucem in tenebris quærant. Ubi verò, quod sæpiùs evenit, implicantur prædicti affectus, res est sanè altioris indaginis. Suis tamen signis internoscitur uterque affectus, dummodò tamen ægrè nil percontantibus celent. Præter jam tradita cachexiæ signa, probè attendendum ad naturam exudantis laticis, qui sub primis temporibus fluoris albi, pituitam mucosam, blandam & inodoram, colorem subalbicantem, vel pallido-luteum præ se ferentem redolet: sed procedente morbo, acrior & fœtens, uti jam annuimus, evadit. Prætereà, intermissionem, erumpentibus catameniis, patitur fluor albus, qui aliàs his imminentibus exasperatur. Gonorrhœam verò concomitantur pruritus & stranguria, quibus rarò stipatur fluor albus: stillans sub gonorrhœâ latex, primò parcior, albicat; dein colorem subluteo viridem induit, purisque acrioris nonnunquàm fœtentis faciem præ se fert. Gonorrhœa insuper fluentibus mensibus haud sistitur, eò quòd sedem habet circà urethræ ambitum, dùm vagina & uterus fluorem album suppeditant. Gonorrhœa paulò post coïtum cum viro inquinato in proparulum venit; & intrà quadraginta vel quinquaginta dies tempestivis remediis impugnata, sensim judicatur: pertinacior verò est fluor albus, & ad annos protelatur. Ulcus demùm uteri, fluxum suppeditans à fluore albo vix discrepantem, doloribus acerbissimis & latice pejoris notæ, præter signa alibi tradita, innotescit.

Inter morbos *contumacissimos* & curatu difficiliores jure numeratur *fluor albus*; præsertim in mulieribus libidinosi, quæ hinc steriles evadunt: periculo tamen vacat fluor albus recens, nullo dolore stipatus, parciore copiâ stillans, ac nonnullas intermissiones subiens. Aliter verò se res habet de annofo, continuo, molesto, & uberiori proventu erumpente; sub quâ rerum conditione, mulieres quamdam gonorrhœæ speciem intrà septem circiter dies solvendam viris impertire posse, vulgò fertur; quod sanè, etsi rationi minime absonum videtur, accuratiori tamen solertiorum examini submittendum esse censemus. Indomabilis ferè evadit fluor albus circà quadragesimum quintum aut quinquagesimum ætatis annum, post scilicèt fluxûs menstrualis absolutam periodum, & præsertim in provectiore ætate, & cachecticis: sæpiùs enim sub id tempus marasimum & ulcus uteri minatur; inter quod infortunium nonnunquàm erumpunt hæmorrhagiæ vix compescendæ, quæ nonnullas mulieres ad libitinæ rationem ducunt. Non rarò tamen salutare est illud profluvium quibusdam cachecticis; cùm hâc sentinâ, æquè ac è fonticulo varii latices pravæ indolis, vel sanguinis & humorum sordes exitum sibi parent, quæ aliàs summam labem visceribus impertirentur. Postremò fluor albus hæreditarius, vel à pueritiâ contractus sterilitatem post se trahit.

Innumeris propemodùm *causis* atrâ plerùmque caligine immerfis, submittitur fluor albus, cui obnoxias esse mulieres curarum astu fluctuantes, mœrore confectas, vitamque ærumnis asperam trahentes, experientiâ constat. Hunc etiam promoyent aër nebulosus, variis halitibus inquinatus.

MORBI
GENITALIUM.

MORBI
GENITALIUM.

tus; incondita victus ratio; multigena sanguinis & humorum labes, hæreditaria vel adventitia; virus nempe venereum, scorbuticum, scrophulosum, &c.; diathesis hysterica, menses inordinati, partus difficilis, abortus, hæmorrhagia uteri, alique prægnantium & parturientium morbi; ac præsertim lochiorum uberior proventus, vel intempestiva sufflaminatio; peculiaris demum & morbosæ uteri dispositio, quæ ægrè dignoscitur: nec facilius innotescunt quædam viscerum læsiones quæ haud rarò hunc fluxum impertiuntur & foveant.

Cadaverum scrutatio hujusce intricatissimi morbi indolem parum elucidat: quidquid enim inter dissectionem oculis subjicitur, nil aliud est quàm effectus morbosus à genuinâ causâ multum discrepans: id genus sunt uteri, ovariorum, tubarum, cæterarumque partium generationi famulantium læsiones; horum nempe organorum infarctus, vel insolita crassities, exulcerationes, putrescentia, gangræna, &c. Nec major lux affulget ex introspectis visceribus, quæ diversimodè labefactata se præbent; hepar præcipuè inter abdominalia sæpius pessumdatum deprehenditur: varia etiam annotatur spurcities in omento & renibus, ut de cæteris nil addam.

Ardua, uti suprà inculcavimus, & intricata est *curandi methodus*; nec mirum, si infausta succedat, cum hujusce morbi radices ægrè præcidantur. Rarò congruit venæ sectio, ni adsint plethoræ indicia. Opportunè, ineunte curâ, præscribuntur emetica; ipecacuanha sub hoc casu cæteris præstare videtur. Cautus debet esse catharticum usus, inter quæ magis comprobantur rheum & mercurius dulcis. Sed præcipuus curationis cardo versatur circà temperantia & depurantia; cichorium nempe, agrimonia, hepatica, lingua cervina, lapathum, nasturtium, alchymilla & hypericum, cancri fluviatiles, serum lactis, vel ipsummet lac, &c. Sed his procul dubio palmam præripiunt aquæ minerales, Vallenenses nempe, Forgienses, Merienses, Plumberianæ, Borbonienses Anselmenses, Vicienses, Bellilucanæ, Amandinæ, &c. Proficuè etiam adhibentur stomachica & absorbentia, si haud ritè perficiantur digestiones, uti sæpius accidit sub vitreâ valetudine, & post morbos acutos; in hunc censum veniunt cerefolium, melissa, abrotanum, absinthium, chamædrys, flores chamæmeli & rorismarini, enula campana, rheum, baccæ juniperi, catechu, corallium, &c. Haud exiguam etiam laudem pro re natâ merentur sudorifica & aperientia; scilicet falsa parilla & china radix, camphora, gummi ammoniacum, aselli; sal glauberianum, arcanum duplicatum, aqua calcis cum lacte mixta, martialia, antimonialia, &c. Conferunt denique antivenerea, antiscorbutica, &c. si cujusdam humorum labis moveatur suspicio.

Hisce remediis, quæcumque sit horum efficacia, rarò obtemperat fluxus albus; adeò ut ægrè exhauriatur illud stillicidium, ni curationem claudant *adstringentia* & *tonica interna*, quæ vasorum vires firmando, organorum atoniæ medentur: sed haud nisi post diuturnum præmittendorum usum

tutò adhiberi queunt prædicta medicamina, ne intempestivâ sufflaminatione ægrotantium res in pejus ruant. Nec vetantur sub eâdem rerum conditione adstringentia *externa*, herba nempè vulnerariæ, agrimonia, plantago, consolida major, mel, &c. è quibus parantur decocta, injectionum beneficio, parti affectæ admovenda. Nonnullis arrident suffumigia cum olibano, succino, racamahacâ, mastiche, &c. parata: sed haud nisi summâ cautelâ adhiberi debent sub fluore albo jam diuturno; anginam enim, pectoris abdominisve inflammationem, febrem purpuratam vel lentam, arthritidem, hydropem, phthisim, &c. ab intempestivâ sufflaminatione sæpiùs promoveri, apud omnes praxi edoctos in confesso manet.

(2.) *Gonorrhœam muliebrem* sæpiùs pro fluore albo haberi, jam suprà notavimus: signaque, quibus uterque morbus dignoscitur, tradidimus. *Gonorrhœa recens contracta*, & inter morbos acutos numeranda, evidentissimis signis se prodit paucis post diebus à concubitu impuro: madent scilicet genitalia insolito rore, haud sine quodam pruritu: dein accedunt calor & ardor in sinu pudoris; nonnihil tument vulvæ labia & ipsamet nymphae; molestus fit coïtus ægris, etsi tentigine laborant; ac mictus difficilior & ardens evadit. Intereà copiosior fit fluxus genitalis, acer & mordax, flavus & subviridis; dein subcruentus & purulentus; & feminalis humoris corrupti faciem præ se ferens. Sub morbi remissione mitescit dolor; latex genitalis fit candidior; & flocci quidam pituitosi annotantur in urinis; donec planè cesset illud profluvium.

Gonorrhœa verò chronica vix discrepat, primo intuitu, à fluore albo; ni apprimè attendatur ad sedem morbi, quæ sub gonorrhœâ versatur in genuinis feminis conceptaculis, circa viciniam urethræ, quæ ulcerosam labem sæpiùs contrahit. Autopsiâ cadaverum constat prostatam, aliasque glandulas propè urethram sitas, inquinari sub gonorrhœâ, inculpatis utero & vaginâ, si excipias pudoris sinum: hinc patet cur gonorrhœâ laborantes concipere, prolemque sanam edere valeant; dummodò tamen morbi diuturnitas luem veneream minime accersat, quod sæpiùs accidisse tam in feminis, quàm in viris, tradit observationum chorus. Prætereà uberior est fluxus à fluore albo, quàm in gonorrhœâ; in hâc, continuus; in illo, inter decubitum suppressus; cum ob situm horizontalem moram trahat in vaginâ latex morbosus; qui hinc manè, ubi à cubili stant, copiosius erumpit. Fluore insuper albo laborantes, de quâdam molestiâ in lumbis plerumque conqueruntur, cujus immunes censentur gonorrhœâ conflictatæ. Ubi verò annosi implicantur prædicti affectus, uti sæpè evenit, *Œdipo* opus esset. Non secus ac in viris primùm phlogosi & ardori congruis & notissimis præsidiiis consulendum; dein mercurialibus, catharticis & sudorificis, domandum vel foràs abigendum venit virus venereum: ac demùm temperantibus, aperientibus mitioribus, diureticis, traumaticis, &c. de quibus suprà, absolvitur cura.

(3.) *Furor uterinus* vel *satyriasis* est, uti nemo nescit, inexplibilis

MORBI
GENITALIUM.

coëundi cupiditas, quâ scilicet tùm virgines, tùm mulieres æstro venereo percitæ, in amplexus viriles, omni deposito pudore, intemperanter ruunt; quibus denegatis, crebras patiuntur pollutiones, tàm vigilantes, quàm dormientes, vel in umbrâ voluptatis ludunt. Quæ verò pudori litant, tacitâ Veneris cupiditate ardentius flagrant: adeò ut eò magis sæviat hic affectus, quò accuratius tegitur. A furore uterino multùm discrepat hæc salacitatis species quæ ab stupendâ clitoridis mole pendet, quæ ubi libidinis æstu fervet, vel tentigine corripitur, mentulam virilem quasi æmulatur; undè lascivæ illæ mulieres, *tribades* dictæ, alias ejusdem sexûs quas depereunt, subigere tentant, atque haud sine nefandâ voluptate inanem virilium muniorem speciem obire queunt. Haud semper, ut ad propositum revertamus, obscœnis sermonibus & turpibus factis, in propatulum venit furor uterinus, cùm plures à pudore & verecundiâ minime liberæ, hunc turpissimum statum occultare studeant, & suæ turpitudinis conscia, nefandum æstum reprimere conentur. Ad satyriasm *proclives* censentur temperamento sanguineo donatæ, virgines juvenes & viro maturæ, vel mulieres libidinosa & opiparè viventes, viduæ aut frigido senî conjunctæ: cæteris tamen ætatibus minime parcit hic affectus, cùm prostant exempla nonnullarum mulierum, circa sexagesimum vel septuagesimum ætatis annum hoc turpissimo morbo corruptarum: de puellâ trium annorum hoc affectu hæreditario conflictatâ mentio etiam subjicitur. Hunc foveant lectiones, confabulationes vel cogitationes venereæ, cibi euchymi & acriores, ac præsertim frequens masturbationis usus. Rarò periculosa est satyriasis, quæ tamen tantas sæpius exacerbationes patitur, ut mulieres Veneris impotentes in furorem rapiantur, quosvis obvios ad amplexus venereos sollicitent, ac cunctantes pugnīs & unguibus imperant, sinum pudoris petulcis digitis perpetuò contrectando, donec maniacæ evadant, & vinculis coërceri debeant, ne violentas manus sibi, vel adstantibus, inferant. Exhibent cadavera uterum inflammatum, clitoridem mole ampliore, tubas & ovaria diversimodè labefactata, phlogosim nempè, purulentiam, steatomata, hydatides, skirrhus, &c. renes etiam stupendæ magnitudinis deprehenduntur, &c.

Præmissâ diætâ congruâ, præsentaneam opem ferunt *venæ sectiones*, tùm in brachiis, tùm in pedibus celebratæ. Multiplici enim observatione constat hunc morbum solvi, & veneris sensum retundi ab uberiori mensium vel hæmorrhoidum profluvio. Depletis vasis faustè usurpantur emetica; proficue etiam identidem adhibentur cathartica blandiora: sed largâ manu exhiberi debent refrigerantia, lactuca nempè, cichorium, portulaca, viola & nymphæa, emulsiones, serum lactis, sal prunellæ, aliaque anti aphrodisiaca. Rarò conducunt sedantia narcotica; sed pluris habentur camphora, succinum, castoreum, sal sedativum, &c. Juvant tartarus, martialia, aquæ chalybeatæ, cæteraque emmenagoga, si sufflaminentur menses: nonnunquam etiam opitulantur absorbentia. Suas laudes demùm merentur

varia alia præsidia adversus phrenitidem & maniam adhiberi solita. Nec despicienda, inter *remedia externa*, enemata ex oxycrato parata, aliave refrigerantia; sed cæteris antecellunt balnea subfrigida domestica, quibus crebrò pro viribus insidere debent. Ut nil addam de monitis & adhortationibus, increpationibus & minis, omnibusque remediis ex ethicæ sinu petitis, quæ multis optimè cedunt, dummodò tamen morbus ad acmen minime pervenerit.

(4.) Inter morbos graviores numerantur *uteri phlogosis*, frequentior sanè quàm vulgò fertur apud clinicos, quos plerumque latet, etsi prostat ejus historia apud varios Authores. Non desunt tamen spectabilia hujusce morbi *signa*, molestissimus nempe hypogastrii æstus, ejusdem regionis renitens prominentia totum abdomen sæpiùs occupans, lumborum, inguinum & coxarum dolores, qui à levi coporis motu exacerbantur, & ad dorsum, scapulas & ultrà propagantur; febris ardens cum pulsu inæquali, horroribus inordinatis, òs aridum, spirandi difficultas, cardialgia; lipothymia, dolor capitis in fundo orbitæ sævissimus, stridor dentium, delirium & convulsiones, quibus addere licet stranguriam, tenesimum, nauseas & singultum, tumentium mammarum dolores, mensium & lochiorum suppressionem, &c. Sed sub diversis gradibus se profert hic truculentus morbus, ratione scilicet phlogoseos, nunc totum uterum, nunc exiguam hujusce visceris partem occupantis. Rarissimè resolutione judicatur hic dirus affectus, qui in plerisque accedente gangranâ, *feralem* intra septimanam habet *exitum*: aliàs diutiùs protelandus hic infarctus in suppuratum abit, vel in skirrhum, cancrumve exulceratum, de quibus infra, facessit: hæc exhibent *introspecta cadavera*: reperiuntur etiàm ovaria, tubæ, partesque viciniore pari labe defœdata, ut de cæteris visceribus diversimodè labefactatis nil addam. Ad uteri inflammationem proclives censerì debent mulieres floridæ ætatis, & temperiei sanguineæ: *hanc promoveri* solent lapsus ab alto, vel quævis alià contusio, animi pathemata vehementiora, catameniorum subitanea sufflaminatio, abortus, lochiorum suppressio, secundinarum retentio, alique morbi à difficili vel infausito partu oriundi & suprà traditi.

In tempestivâ vasorum sanguineorum depletione versatur præcipuum *curationis momentum*; ideò incunctanter tundenda est vena, & pluriès iterari debent venæ sectiones, quæ tamen haud ultrà tres vel quatuor primos morbi dies protelari debent. Intereà largâ manu propinantur diluentia & demulcentia, serum nempe lactis vel aqua pulli, infusa florum malvæ, feminum lini, &c. Suas laudes etiàm merentur oleum amygdalarum dulcium, sperma ceti, aliaque affinia. Conducunt laxantia blandiora, sed vetantur cætera cathartica. Nonnullis profunt antihysterica & paregorica; sed cautè mercandum cum narcoticis. Cætera remedia quæ pro re natâ, vel ratione morborum implicatorum in usum trahi queunt, silentio prætermittimus. Quoad externa, præsentaneam opem ferunt enemata refrigerantia &

MORBI
GENITALIUM.

demulcentia, è jusculo omaforum, fero lactis, aquâ pulli, emulsionibus, &c. parata. Proficue etiam admoventur fofus & cataplasmata emollientia. Huc demum pertinent quaecumque auxilia quæ adversus alias inflammationes internas adhiberi solent.

(5.) Ordinis ratio expostulat ut ad *skirrhum uteri*, obstructionis vel inflammationis sobolem, deveniamus. Multum curantibus faceffit negotii hic affectus, quem meris duntaxat conjecturis sæpius assequi valent. Haud defunt tamen *indicia*, quibus ritè perpenfis, aliquid certi statui potest; videlicet, ubi de prægressis infarctu & phlogosi constat; morbi characterem exhibent prominentia & pondus in regione hypogastricâ, cum dolore gravativo circa podicem, & quâdam mingendi difficultate, de quibus conqueri solent agræ; lumborum, iliorum & crurum obscurus dolor, parvus vel inordinatus mensium fluxus, horum suppressio, vel stupendus proventus. Insuper skirrhus uteri, non secus ac cæterorum viscerum, ascitem vel leucophlegmatiam infert, accessusque febriles post se trahit. Haud dubitare licet quin sub primis temporibus expugnari & evinci queat hic affectus: sed ut plurimum, uti supra innuimus, atrâ caligine obruitur, ac demum se prodit, jam *immedicabilis* evasit, sæpiusque sub hâc conditione ulceris cancrofi naturam induit.

Scitur è relatu naturæ rimatorum skirrhum uteri frequentiore esse quàm vulgò cogitatur; quibus autopsiâ satis superque edocti assentimur. Exhibent enim *secta cadavera* uterum, non solum densiorem & firmiorem vel cartilaginis speciem referentem; sed etiam ossium vel lapidum duriem ferè æmulantem, adeò ut vix scalpello incidi patiatur. Varia insuper deprehenditur uteri skirrholi moles: sæpius scilicet à naturali minime recedit, imò & contractus nonnunquam conspicitur; aliàs deformis occurrit & stupendæ magnitudinis, adeò ut prostant exempla úterorum qui triginta vel quadraginta librarum pondus æquabant. Infarctui skirrholo etiam obnoxia sunt ovaria, & dilucidius sanè innotescit hic morbus, summe, uti nemo nescit, familiaris, sed diversum habens exitum.

Ægrè sanè distinguitur cancer ab ulcere uteri, ni pro uno eodemque morbo, uti nonnullis visum fuit, consultius habeantur. *Ulcus uteri* accersunt fluor albus annosior, violenta placenta extractio, vulnus ab unguibus vel obstetoris instrumento inflictum, fœtus putrescens, &c. Fovetur à lue venereâ, scrophulis, scorbuto, &c. Celebrior est hujusce diri morbi progressus sub menstruatione, quàm post ejus absolutam periodum. Hunc produnt dolores acerbissimi & lancinantes, qui non solum sæviunt in regione hypogastricâ, sed etiam viciniore, lumbos scilicet & coxas obsident, latèque se spargunt: hos concomitantur eluvies saniosa, purulenta & fœtidissima, quæ sæpius tantam contrahit acredinem, ut vulvam & viciniore erodat. Præterea erumpunt hæmorrhagiæ & crebrò recurrunt: suam tyrannidem exercent tenesmus & stranguria, exsurgit febris lenta cum inordinatis exaerbationibus, &c. Colligitur ultimò è *cadaveribus evisceratis* uterum

ulcere & cancro tactum, putredine & gangrænâ sæpissimè confici: ad viciniore partes propagatur hæc labes, quam presso pede sequitur ascites, ut plurimum saniosus & purulentus, vel fœtidissimus, qui scilicet quamvis salutis spem excludit.

Omnes Medicorum artes evincere solent *skirrhus* & *cancer uteri*: inanem enim operam ludunt aperientia & incidentia, vulneraria & detergentia exquisitiora, interna vel externa; eò quòd seriùs quàm par est, uti suprà notavimus, in usum trahuntur. Haud desunt tamen exempla variarum curationum, apud Authores infimi subsellii, penès quos fit fides. Cur nil impedit quominùs, fervaris fervandis, explorentur prædicta *auxilia*; quibus, uti mos est, incassum adhibitis, *cura* merè *palliatiæ* inhærendum. Hæc versatur circà lactinia, cremores hordei & oryzæ, emulsiones, cæteraque demulcentia; in eundem scopum proficuè adhibentur aquæ minerales frigidaë, quæ lacti sociari queunt. Juvamen præstant pro re natâ, absorbentia; magnesia scilicet, lapilli cancrorum fluviatilium, &c. Sed omne punctum ferunt hypnotica, quæ inducias impetrando dirum huncce morbum quodam velamine obducunt. Quidpiam etiam ferunt solarii balnea & semicupia, enemata emollientia, injectiones demulcentes, anodynæ, vulnerariæ & detergentes, suffitus ex styrace, succino, aliisque consimilibus, parati, &c.

(6.) *Vagina prolapsus* frequentissimus, partum difficilem plerumque sequitur. Hanc etiam partem inferiora versùs deturbant validiora corporis conamina, vel ponderum graviorum elevatio, saltatio, rursus vehemens, ingensque clamor. Promovetur demùm ab hydrope, fluore albo, calculo vesicæ, &c. parùm sub primis temporibus protuberat vagina è suâ sede depulsa: sed sensim increscit hic tumor, adeò ut ingens quandoque è pudendis propendeat, basi foramine perviâ, nec rarò ad medias coxas accedit, vel caput virile æmulatur. Mulieres respicit vaginæ procidentia: haud tamen ab hocce incommodò planè immunes sunt virgines, quod etiam, si Authoribus sit fides, puëllis trium vel quatuor annorum minime parcat. Latissimus erat error apud Veteres, circà partem è sede depulsam, quam pro utero habebant: atque tantùm valent præjudicatæ opinioniones, ut plures referant se vidisse mulieres imprægnatas, & felicem partum enixas, post amputatum uterum; sed tædet tales nugas, anilesque fabellas prosequi. *Rara* sanè *uteri procidentia*, vel *inversio*, ad puerperas duntaxat pertinet, tenesmo & alvi fluxu laborantes, præsertim post partum difficilem, vel incautum obstetricum inter evellendas secundinas attractum.

Præter conceptionis impedimentum *varia parit incommoda* hic tumor pendulus, tensivum nempe lumborum dolorem, incessum difficilem, dysuriam, alvi adstrictionem, & tenesimum. Aliàs prodit sanguis è tumen-
tibus vasis, vel à nimia attrectatione, aërisque frigidioris accessu, fiunt phlogoses & exulcerationes cum saniei effluxu & fœtore intolerabili, fæ-

piùs imminentibus gangranâ & sphacelo. Intereâ moventur febris, delirium, convulsiones, aliaque truculentiora symptomata, quæ pro mortis præconibus habentur. Recens tamen hic morbus faciliè curatur, præsertim in junioribus; sed aliter se res habet de annoso, & sub ætate provectâ: fœdissimâ tùm humorum colluvie ita conspurcatur vagina, foràs jamdudum propulsa, ut putridam exhalet mephitim. Multò sanè *periculosior* est *uteri descensus*; si enim fuerit attractum & inversum hoc viscus inter difficilem partum, parùm abest quin conclamata sit puerpera: equidem paucissimæ sub hoc infortunio lethum evadere queunt.

Vagina extùs prominens ad pristinum & naturalem, si nil obstat, *revocari debet situm*, inibi que detineri; quod opus, hic labor est. Nil aliud tamen requiritur præter quietem & decubitum pro recente juvenum procidentia: aliàs adhibetur *peffarium*, vel circulus uterinus è subere confectus & cerâ oblitus, qui per quoddam tempus inibi relinqui debet. Suum symbolum conferunt injectiones & fots roborantia: nec despicienda *adstringentia* & tonica interna, amara & martialia; dummodò haud immineat mensium fluxus. Sed ubi extrà situm depulsa vagina inflammatione & exulceratione corripitur; repositio tentari minime debet, priusquàm solitâ methodo pertractentur prædictæ læsiones. Sub hoc rerum statu omnem implent paginam venæ sectiones, enemata emollientia & refrigerantia, fots è vino tepido aquâ diluto, ex aquâ florum sambuci, &c. parati. Remediis postremò suprà traditis, & scarificationibus gangrenæ consulitur: quibus nihil proficientibus, ad partis *extirpationem* deveniendum, nec ut plurimum infaustra est hæc operatio, dummodò ramen tempestivè celebretur. Curari potest inversio uteri, si celerrimè fiat repositio, quæ sanè, nullâ interpositâ morâ, pro facili habetur apud Chirurgos: sed si procrastinetur hæc cura, operosior fit encheiresis, mulieribusque molestissima; adeò ut plures inter hæc tentamina animo linquantur, vel convellantur: cur sit ut sub hisce angustiiis occultetur uterus, quantum licet intrà vaginam; dein hic loci peffariorum beneficio retinendus.

Haud abs re erit, colophonem huic capiti imponendo, nonnulla adjicere circa *polypos*, tam ex utero, quàm è vaginâ erumpentes. Exulceratis partibus adnasci solent carnes illæ fungosæ, quæ in locis illis udis ità luxuriant, ut meatum naturalem occludant. Cur sit ut impeditis viis muliebribus, non solum denegetur hastæ virilis ingressus; sed etiam ægrè fluant menses, vel planè retineantur. Nunc intrà sinum pudoris latent prædictæ excrecentiæ, nunc extùs prominent; adeò ut ab incautis vel imperitis pro vaginæ vel uteri procidentia habeantur. Facillimè ramen distinguuntur prædicti affectus; cùm tumor è vaginæ prolapsu basim præbeat, foramine perviam: deest sanè illud ostium in utero inverso; sed parturientes duntaxat respicit illud infortunium, quod aliàs subito quasi se profert, dùm *tardissimum* sit *polypi incrementum*. Ægrè extrahi & eradicari patiuntur excrecentiæ fungosæ, alius implantatæ; sed inter has angustias,

gustias, quod magis prominet, abscindi debet; ut reliquum pulveribus exsiccantibus & catharteticis absumi queat. Sed haud nisi summâ cautelâ, hæc sunt peragenda, ne nimîâ irritatione concitentur inflammatio & gangræna, qua sanè curantibus grave facessunt negotium.

Alius in sinu pudoris observatur tumor, qui pro polypo, vel sarcomatè, ab incautis habetur; etsi toto cœlo ab illo discrepat: est scilicèt hernia intestinalis, trans latera vaginæ, plus æquo laxatæ, vel partu multiplici labefactatæ. Hæc protuberantia albida & mollis, primò intrâ vaginam coërcetur, dein extrâ sinum pudoris prorumpit, variâ mole, herniarum more. Haud multùm abludit hic tumor vulvæ labia supereminens, ratione faciei, ab uteri prolapsu: sed à signis prægressis optimè distingui queunt hæ prominentiæ: scitur præterea solas ad uteri prolapsum proclives esse puerperas. *Hernia vaginalis*, de quâ in præsentiarum, encheiresim chirurgicam expostulat, quæ in repositione intestini versatur; quod sanè faciliè absolvitur; dein operæpretium est ut admoveantur pessaria simplicia vel adstringentia, ut morbi reditus præcaveatur: hoc opus, hic labor est.

MORBI
GENITALIUM.

GRAVIDITAS NOTHA.

NEMO nescit varios occurrere morbos, mulieres ætatis congruæ invadentes, qui legitimam prægnationem mentiri solent; *molæ* nempe *carneas* & *vesiculares*; *sanguinis menstrui*, *seri* & *flatuum collectionem* in uterum; ac demùm *tumores ovariis*, vel *tubis fallopianis insidentes*: quæ singula æquâ lance expendere juvat, à molâ initium faciendo. Diversa est *molæ carneæ magnitudo*: sola cavum uteri occupat, vel legitimæ graviditati sociatur. Contextum fibrosum præbet, nunc mollem, nunc densum & firmiorem, ac nonnunquàm ratione vetustatis, cartilaginum vel ossium duriem æmularur. A falso conceptu oriri jure conjicitur hæc massa carnea diversæ magnitudinis; quæ in plerisque paululum seri colligit cum nonnullis embryonis reliquiis, adeò ut has corripit hic morbus, quæ cum viris rem habuerunt: de quo tamen nonnulli dubitant, qui virgines & viduas castissimas, citrà scilicèt virorum commercium, hoc morbo confictatas fuisse asserunt. Rationi & experientiæ adversari videtur hæc opinio, quam tamen admittere haud incongruum, eò scilicèt ut virginum & nonnullarum viduarum detorqueatur culpa, vel incolumis tueatur fama; ni prædictas offas carneas, ad sarcofes uteri polyposas, à genuinâ molâ planè discrepantes, referre magis arrideat.

(1.) Ægrè distinguitur *mola carnea*, non solùm à cæteris corporibus in utero reconditis, sed etiam à verâ prægnatione. Uterus tamen molam recondens, mobilior & ponderosior inter motum decumbentium videtur,

GRAVIDI-
TAS
NOTHA.

manuumque impulsioni faciliùs cedit, abdomen in gestatione legitimâ quasi fastigiatum, magis circâ umbilicum prominet, quod verò sub molâ æqualiter in orbem distenditur: tumor abdominalis citiùs se prodit à molâ cujuscumque fortis, quàm à fœtu. Præterea symptomata quibus conflantur prægnantes sub primis mensibus vehementiora, circâ ultimos menses leniuntur, vel planè desinunt; sub molâ verò in eodem statu perstant, imò & exasperantur. Nitor faciei minime obscuratur in utero gerentibus; secùs verò se res habet in falsâ graviditate. Molâ laborantium catamenia circâ quintum vel sextum mensem inordinate erumpere solent, quod nusquàm vel rarissimè evenit fœtum gestantibus. Sed præcipuum naturalis graviditatis *signum* peti debet ab infantis motu, circâ quartum vel quintum mensem notabili, quem planè desiderari in quâvis spuria graviditate evidens est. Mola demùm ultrâ legitimum pariendi tempus protrahitur; imò & per plures annos gestatur, vel per totum vitæ curriculum, & leviora duntaxat parit incommoda, si molestiam à tædioso pondere excipias. Haud periculi expers est molarum excretio; præsertim si tardiùs expellantur; tum enim erumpunt hæmorrhagiæ vix compescendæ, gravioraque exsurgunt symptomata, è quibus mortis auguria desumuntur.

Haud dubitare licet quin uterus quamdam *placentæ*, incautâ obstetricum manu evulsæ, *portionem* nonnunquàm retineat, quæ dein *pro molâ* habetur: imò & nonnullis observationibus constare videtur has secundinarum reliquias in corpus cellulosum, à genuinâ tamen molâ vesiculari discrepans, facessere; cujus tantum est incrementum, ut, non secùs ac in ultimis graviditatis temporibus, tumeat uterus. Quasdam etiam sanguinis congrumati massas, morâ & indefinente pressione densas & firmas retinet uterus, quæ postea sub conspectu molarum foràs exturbantur. Horumce corporum in utero reconditorum exitus solis naturæ viribus plerùmque committitur: parùm ad hoc opus profunt *venæ sectiones*; sed summam opem conferre queunt balnea, semicupia, fœtus, injectiones & linimenta ex emollientibus parata. Aliquid ferre valent auxilii emetica & cathartica drastica, non secùs ac *enemata stimulantia*, & pessaria ex helleboro, fabinâ, colocynthide, aliisque materiebus acrioribus parata. Proficuè quandòque adhibentur remedia menses ducentia, & adversùs fœtum mortuum usurpari solita. Sed silentio premere minime debemus, non solum sæpiùs ad hunc effectum peragendum inepta esse prædicta *remedia*; sed etiam nocentissima fore. Rarò demùm à solertioribus adhibetur obstetricantis manus, ni urgeat hæmorrhagia.

(2.) *Mola vesicularis* vel aquosa, cui obnoxia sunt mulieres cachecticæ, nil aliud est quàm congeries hydatidum, racematim connexarum, nunc in utero fluitantium, nunc peculiari vel multiplici folliculo obductarum; adeò ut quamdam hydropis cystici speciem haud malè referat hic affectus, qui rarò innotescit, ante prædictarum hydatidum ejectionem, solo naturæ beneficio, paulò post solitum partûs terminum, in ple-

risque absolvendam. Tantâ sapiùs copiâ excluduntur hydatides uterinæ, ut integras pelves repleant, quod nonnunquàm accidisse notarunt practici. Hæmorrhagia hanc excipit excretionem, nunquàm sedanda ante harumce vesicularum exitum. Ubi cum genuinâ graviditate implicatur hic affectus, partu legitimo plerumque solvitur: aliàs *periculo* minime vacat. Simplicioribus peragitur ejus *curatio*, ni satiùs sit ab omni remedio abstinere. Itaque danda est opera ut diætâ congruâ ægrarum vires refocillentur; imò & quandòque medicamina roborantia usurpare licet, dummodò haud obstet uberius cruoris profluvium. Insuper reperiuntur in utero sarcofes, tumores anomali, concretiones lapideæ, &c. Hæc se offerunt in *denatarum extispiciis*, quæ, dùm viverent, in cimmeriis latebant tenebris.

(3.) Insulso *mola ventosa* nomine venit uteri inflatio, vel aëris collectio intrâ ejus cavum, quæ non secùs ac aliæ species, graviditatem etiam mentitur; sed imus venter æqualiter prominet. De molesto uteri pondere minime conqueruntur ægræ, stabiliusque observatur hoc viscus; quod sanè rationi consonum est. Præterea accuratiori examini subjectum abdomen certis diebus subsidet, dùm aliis tumidiùs apparet. De hujusce morbi stadio, nil certi statui potest; sed feriùs ocyùs flatuum expulsionem solvitur. Hæc tamen eruptio, quâ abdomen statim complanatur, circa legitimum partûs terminum accidere solet, adeò ut plures mulieres, specie imprægnationis delusæ, statò tempore, dùm obstetrix ad fœtum excipendum sese accingeret, inexpectato sanè eventu, strepente *crepitu* per genitalia exploso, scenam comicam absolverint: diuturnior tamen in posteriori parte est hic affectus, qui ad plures annos nonnunquàm protelatur. Simplici *osculi uterini dilatatione* evinci potest *mola flatulenta*; sed futile est illud præsidium ergà morbum obscurum, qui ut plurimùm nequidem in suspicionem venit. Profunt quibusdam cathartica acriora, & enemata stimulantia, quæ in alium scopum adhibita, hunc effectum sapiùs præstitisse constat: de carminantibus ab Authoribus perperam decantatis, nil addimus. Postremò ad molam flatulentam minime referri debet hæc corporis conditio, quæ flatuum genesim in utero fovet; qui identidem, non secùs ac à podice, haud tacitè foràs eliminantur; cum eo tamen discrimine, ut nusquàm voluntati submittatur hic exitus, quod sanè benè moratas mulieres, de turpi hoc strepitu anxias, torquet.

(4.) De *mensibus in utero retentis* suprâ actum fuit, huncque affectum graviditatem, quoad abdominis protuberantiam, accuratissimè mentiri notavimus; adeò ut ab hocce errore haud immunes sint, vel solertiores. Re tamen accuratiùs pensitatâ, patet utriusque statûs discrimen: etenim venter magis prominet circa quartum vel quintum mensem à molâ, ut inquiunt, sanguineâ, quàm sub genuinâ graviditate; circa quod tempus fœtûs motio, quam experiuntur utero gestantes, planè in ægrotantibus deficit; ritè etiam perficitur hæc periclitatio ab impositâ manu frigidâ, & aquâ madidâ. Hujusce morbi solutionem merum esse naturæ opus, jam

GRAVIDI-
TAS
NOTHA.

suprà declaravimus : haud defunt tamen nonnulla præsidia , quæ in subsidium venire queunt , vel ægrarum vires refocillando , vel vias uterinas laxando & referando ; sed hisce alibi jam traditis haud diutiùs inhærebitur , ne recoctæ crambes insimulationis periculum incurramus.

(5.) Haud minoribus difficultatibus premitur *hydropis uteri diagnosi* , ad quem pronæ censentur infecundæ , cachecticæ & scorbuticæ. Prædictorum morborum instar , graviditatis etiam faciem præ se fert ; quam aliàs sæpiùs concomitatur , non secùs ac ascitem. Nulla eruitur cognitio à fluxu mensium , qui in singulis illis corporis conditionibus erumpere queunt. Haud perſentitur sub hocce morbo aquæ fluctuatio , veluti in ascite : abdomen , uti pluriès inculcavimus , orbiculatim tumet , subsident ubera , & nitor faciei pallore obscuratur ; ac demùm de quodam uteri pondere conqueruntur ægræ , quo planè expertes sunt gravidæ. Uterus ab hâc hydropis specie in tantam molem quandòque assurgit , ut quadraginta vel quinquaginta aquæ libras coërceat : imò & de utero , cujus aquæ quantitas ad centum quinquaginta libras accedebat , mentionem subjicit VESALIUS. Notare juvat quod uteri morbosè expansi involucra ratione molis extenuentur ; aliter verò se rem habere in genuinâ graviditate nemo nescit.

Remedia asciti & leucophlegmatix dicata , vel vitiata hæmatosi occurrentia , opportunè etiam adhibentur *adversus uteri hydropem* : sed ubi constat de morbi indole , simplicior & expeditior se offert curatio , quæ versatur in liquidi stagnantis evacuatione , quam promover , præmissis injectionibus vel suffumigiis emollientibus , ostii uterini dilatatio , catheteris , vel intromissi digiti beneficio peracta. Hoc opus plerùmque præstat natura , præsertim si implicetur legitima prægnatio ; sub quibus circumstantiis instanti partu prorumpit aqua , vel citiùs se profert hæc evacuatio ; adeò ut haud , nisi post mensem ab hoc eventu , nonnunquàm enitantur gravidæ , & partum incolumem edant. Nec periculo vacat uberius prædictæ aquæ profluvium ; quod nonnullas , quovis tempore accidat , ad ultimam rerum lineam ducit ; ideò deficientibus ab hocce laticis dispendio , prægnantium viribus , vel procrastinato partu , opportunè in usum vocantur emetica , cathartica drastica & enemata stimulantia : nec inutilem opem præstant sub hoc casu borax , sabina , crocus , aliave emmenagoga. Nonnunquàm solvitur *hic morbus* vomitu , sternutatione , tussi vehementiori , saltatione , lapsu ab alto , ictu , &c. quæ uterum concutiendo stagnantem aquam foràs propellere valent. Postremò conferunt ad quamvis uteri colluviem balnea , semicupia , aquæ tepidæ vapor , injectiones & fœtus emollientes ; quorum ope laxatum uteri ostium nidulanti latici exitum nonnunquàm largitur.

Hydropem ovarii & tubis etiam *insidere* suprà inculcavimus : familiariùs ovaria aggreditur hic morbus , rariùs verò tubas invadit. In tantam molem sæpiùs assurgunt ovaria , ut centum aquæ libras , teste autopsiâ , continere

queant. Hæc hydropis species, graviditatem etiam æmulantes, & de quibus supra, cognitu & curatu difficiles censerī debent; adeo ut sæpius ægrè distinguantur, non solum à legitimâ prægnatione, sed etiam à quâvis aliâ spuria. Obscūra est liquidi inibi reconditi, etsi quandoque uberrimi, fluctuatio, in genuinâ ascite, uti omnibus notum manet, manifesta; eò quod crassitiem & visciditatem contrahit, vel intrâ varios folliculos colligitur prædictus latex. Notare expedit uteri membranas à quâcumque, ut jam notavimus, colluvie expansas extenuari: aliter verò se rem habere ergà ovaria, docet *autopsia anatomica*: horum enim contextus econtrâ crassior evadit, adeo ut nonnunquam post integram liquidi stagnantis evacuationem, viginti vel triginta libras adhuc pendeant; nec semper aquâ turgent prædicta organa, sed materiam gelatinosam, butyrosam, sebaceam, melliformem, &c. haud rarò recondunt. Difficillimè innotescunt prædicti morbi, qui aliàs inter rimanda cadavera in aprium veniunt: si tamen accuratius perpendatur incessus & progressus, horum extricari potest *diagnosīs*.

Inter morbos diuturniores numeratur ovariorum & tubarum hydrops: haud defunt enim exempla virginum & mulierum quæ per triginta, quadraginta, imò & quinquaginta annos, hosce tumores citrà grave incommodum, si molem & pondus excipias, gestarunt. Pro immedicabili habetur hæc ægritudinis species, ad quam pronæ censentur mulieres steriles & annosæ. Num clinici, iteratis & tempestivis, uti par est, tentaminibus viam ad curationem sibi paraverint, vel indiligentiùs hunc morbum pertractaverint, solertioribus examinandum relinquimus. Haud dubitare licet quin adhiberi queant omnia remedia asciti dicata; sed inanem plerumque operam ludunt: hinc ad laticis stagnantis evacuationem, ope instrumenti congrui, confugiendum esse censemus. Incausum celebratur vulgarissima punctio, si humor latitans viscidior glutinosiorve evadat; vel pluribus folliculis recondatur: prostat enim historia cujusdam mulieris, quæ intrâ quadriennium hanc operationem quinquagesies infelici successu passa fuerat, è quâ aquæ bis mille libras & ultrâ eductas fuisse fertur. Tutior sanè est sectio quâ vulnus sat patulum infligitur, ut materiebus crassioribus egressum largiatur, & tumor sensim exhauriatur: equidem mulierem quinquaginta quinque annorum hæc methodo curatam traditur.

Alii sunt ovariorum morbi qui solâ *cadaverum scrutatione* obvii fiunt: præter enim phlogosim & skirrhum, de quibus suo loco, in abscessus haud rarò stupendæ molis, vel in tumores folliculatos & anomalos factunt prædicta organa, quæ aliàs fœtum cujusvis ætatis, usque ad decimestres, corpora, nunc integra, nunc putredine confecta, ossa, capillos, concreciones lapideas, innumerasque alias materies, quarum obscura & intricata est genesis, continent. Ex hisce cujusvis naturæ ovariorum defædationibus sæpius emergunt putredines, quæ longè la-

GRAVIDI-
TAS
NOTHA.

téque serpendo , viciniore partes contaminant , & in consensum trahunt. Cur minime mirum , si diversæ hæ materies per sentinam intestinalem egressum haud rarò sibi parent. *Simili* fermè modo , sed rariùs , deturpantur *tubæ fallopianæ* , quæ non secùs ac ovaria , planè quandoque absumuntur : sed ægrè à cæteris distinguitur hic affectus ; qui aliàs haud absimilem habet exitum. Plura ad finem properantes , *de morbis mulierum* addere superfluum fore judicamus , cùm de hâc re nuperrimè prodiit Tractatus elaboratissimus & inexhaustæ eruditionis , qui tamen rebus merè physicis plus æquo fortè refertus , haud omnibus clinicis arridet ; cujus Author clarissimus Astruc ætatem inter experimenta consumpsit , & inter præclaros Scientiæ Medicæ Authores jure numeratur.



S E C T I O I I .

DE MORBIS INFANTUM.

G E N E R A L I A .

QUANTI interest ut puro lacte nutriatur infans, nemo non intelligit. Optandum fanè foret ut honestæ matres proprios alerent liberos, aliàs conductitiis nutricibus sæpiùs impuris, iracundis, ebriosis & falacibus tradendos. Sed cùm usus fermè invaluit, ut mulieres delicatulæ & cuiusvis curæ impatientes, hæc materna munia cæteris committant, danda est opera ut *congrua* eligatur *nutrix*. Optima quidem cénsetur, post absolutum sui corporis incrementum, inter scilicèt vigesimum quintum & trigessimum quintum ætatis annum, habitâ tamen ratione ætatis matris, ad quam expedit ut proximè accedat. *Lac* congruum existimatur post unum vel alterum mensem à felici partu, si uberiori proventu appellens ad ubera firma, pyramidalia & mediæ molis sit *album*, *subfrigidum*, *saccharatum*, *butyrosûm* & *mediæ consistentiæ*: hinc abdicatur subflavum, calidum & falsum, crassius & serosum. Linguae vel oculis admovetur ut dignoscatur acritudinis species: innotescit crassitie gradus, si gutta ungui vel cochleari excepta aquæ instar haud statim diffluet, nec firmiùs hæreat. Sed infidæ, ut verum fatear, sunt hæ probationes; cùm lac exquisitoris, uti videretur, notæ, labem sæpiùs recondat solis noxiis effectibus dignoscendam. Rufis, ingratum ut plurimùm odorem spirantibus, anteponuntur subfusæ: haud arident corpulentiores & mammosæ, nec macie plus æquo confectæ. Fastidiuntur quibus, inter os explorandum, desunt nitor dentium & roseus gingivarum color. Pluris habentur floridæ, posthabitâ tamen venustate, hilares, benè moratæ & à virorum commercio solutæ, cultæ mundicie, & quorum haud res est angusta domi: respuuntur verò valetudinariæ, curis anxie & ærumnosæ, amoris æstro percitæ, squalore obsitæ, inopes, &c. Haud citrà periculum adhibentur quæ menses vel fluorem album circà prima lactationis tempora patiuntur; circà finem verò nil sanitati demere solent prædicti fluxus. Præstant demùm nutrices expertes, quæ scilicèt alios alumnos jam curarunt. Insuper robustiores sunt infantes in agrestibus locis, quàm in urbibus; hinc sequitur nutrices ruri esse eligendas, vel ablegandas: imò & expedit ut victu rustico alantur & solitis laboribus, cum nonnullo moderamine, indulgeant; ad præcavendam scilicèt infantum debilitatem, vel corrigendam hereditariam.

GENERA-
LIA.

Ubi in dias luminis auras erupit infans, accuratè ligari debet funiculus umbilicalis, ne subsequatur hæmorrhagia, quam sæpiùs obstetricum incuriâ, vel imperitiâ, accessisse compertum habemus. Ope tepidi lavacri à fordibus emundatur infans, priusquàm blandâ linteorum & cingulorum convolutione adversùs frigus muniatur. Vitam ejulatibus auspicatur, quos alere videntur *tormina* à retento meconio concitata, quibus obviam itur materiæ illius fæculentæ & subnigræ excretionem sollicitando. Hanc opem tutiùs præstat colostrum, vel ipsummet lac ex uberibus recens enixæ stillans: hoc est remedium à providâ naturâ comparatum, quod ventriculi & intestinorum sordes abstergendi vi pollet. Sed ubi propria mater genuinum suæ progeniei pabulum denegat, & de nutrice conductitiâ opus est, in usum vocanda sunt præsidia medica, circa scilicèt sextam à natiuitate horam exhibenda, mel scilicèt rosaceum, manna, syrupus rosarum pallidarum, de cichorio cum rheo, florum persicorum, &c. quibus *levis* moveretur *catharsis*: vel induntur suppositoria quorum vellicatione noxiæ meconii moræ consulitur.

Sunt qui velint ut nutrix, sex à partu elapsis horis, *mamas infanti* præbeat; sed abiit fermè in defuerudinem hæc methodus, cùm consultiùs sit ut expurgentur primarum viarum sordes, priusquàm lac infantis stomacho committatur; adeò ut nonnisi post viginti quatuor circiter horas à solertioribus exhibeatur hæc alimonia. Solo lacte nutriri debent infantes sub quatuor vel sex primis ætatis mensibus; dein puls è pane albissimo, vel è farinâ & lacte confecta à plerisque conceditur; dùm alii anni integri finem expectant. Circà decimum quintum vel decimum octavum ætatis mensem, quo gradi incipiunt, à mammis detrahi solent alumni: attamen pro re natâ, & vario infantum statu, citiùs vel tardiùs instituenda est *ablaçtatio*; sed pani, jusculis, offis, cremoribus, aliisque usu comprobatis alimentis, infantes præmaturiùs sensim assuefacere juvat; ab immutato enim regimine marcescunt, & variis cutaneis eruptionibus, periculi sanè expertibus, affici solent. Hîc inquirendum foret an tutò lacte caprino vel vaccino nutriri possint infantes; partim assentiuntur, partim abnuunt: primi scilicèt lac animalium à viru venereo, scrophuloso, &c. immunium, & cupiditatum nesciarum, salubrius deprædicant; alii, uti nonnullorum experienciâ compertum manet, ferinos mores induere infantes contendunt: sed hanc litem dirimendam, quibus plus otii superest, relinquimus.

Intricatissimi sunt *infantum morbi*, cùm solis vagitibus suas querelas exprimere queant; sed plura è muliercularum vel adstantium relatu erui possunt: nùm scilicèt vomituriant, & quasnam materies rejiciant; nùm alvus sit libera, & quænam sit fæcum natura; nùm tussiant, plus æquo vigilant, convulsionibus afficiantur, &c. Inter infantum morbos minime recenseri debet lactis, quo ingurgitantur, rejectio; nec in hunc censum veniunt dejectiones subvirides sub quatuor primis mensibus familiarissimæ; quem colorem foveri ab oleis, quæ sæpiùs infantibus ad sedandam tussim, vel ad compescenda tormina exhibentur, per transennam notare juvat.

Sed

Sed aliter se res habet de facibus griseis & argillofis, quæ sanè arguunt impedita esse bilis incernicula. Ægrè exploratur *pulsus* infantum, non solum ob ingentem velocitatem vel celeritatem, sed etià propter indefinientes brachiorum motiones; adeò ut incertum de hâc re à plerisque proferratur iudicium. Præterea attendendum ad os quod aphthas exhibet, & quasdam dentitionis notas, ad spirandi modum, ad abdomen sæpiùs renitens & protuberans, ac demùm ad varias cutis eruptiones.

Neminem clinicum latet varios esse *morbos* qui à parentibus in prolem transmittuntur; epilepsiam nempe, luem veneream, scrophulas, arthritidem, lithiasim, phthisim, &c. Hæc omnia in memoriam sunt revocanda, ut variis indagationibus elucidentur; cum sæpiùs obscure se prodant prædicti morbi congeniti & familiarissimi. Quod ad matrem attinet, inquirendum nùm ingesta fuerint inter prægnationem alimenta pravæ notæ, vel materies absurdæ; nùm sub idem tempus, vehementioribus animi pathematibus indulserit. Suo examini etià submitti debet *nutrix*; respectu morum, vivendi generis, & morborum adventitiorum. A notâ demùm *constitutione epidemicâ*, morbillosâ scilicet, variolosâ, catarrhali, &c. expiscari potest morbi indoles. Insuper altâ mente tenendum quod à *dentitione* & *vermibus*, necnon acidâ primarum viarum colluvie, progerminentur morborum acutorum iliades; & de *viru venereo*, *scorbutico*, *scrophuloso* & *rhachitico* sub chronicis semper sit cogitandum, è quibus benè perspectis eruitur morbi character, aliàs inextricabilis. Nunc superest ut nonnulla circa curationem generalia addamus, ad frequentiores & fastidiosas earumdem rerum geminationes effugiendas.

Simplicioribus, inter hanc tenellam ætatem, peragitur *morborum medela*, cujus præcipuum momentum in solâ victûs ratione sæpiùs versatur: nec ante vel post ablactationem, alio in plerisque opus est remedio; illud suadet ratio & docet experientia. Nec dubitare licet, notante BAGLIVIO, quin plures infantes, præcipuè in optimatum ædibus, à majori potiùs remediorum apparatu, quàm ab ipsismet morbis neci dentur: quod monitum sanè quidem notatu dignum videtur. Haud tamen omnia posthabenda *presidia*; sed solerti manu pertractari debent. Ut à *venæ sectione* initium capiamus, sanguinem mittere licet, si urgeant spirandi difficultas, tussis convulsiva & febris inflammatoria, sub gravioribus contusionibus, &c. sed haud nisi summâ cautelâ iterari debet phlebotomia: nec minus enim portendunt periculum numerosæ venæ sectiones, ac hæmorrhagiæ frequentes, quibus obnoxii sunt nonnulli infantes, qui post pubertatem & peripneumoniam, sputum cruentum & phthisim proni evadunt; atque in ætate provectâ ad fluxum hæmorrhoidalem, insultus spasmodicos, arthritidem, calculum, &c. proclives fiunt. Rarò adhibentur *emetica*, sed latissimus est *catharticorum usus*, quorum magis comprobata audiunt rheum, jalapium, mechoacanna, flores persicorum, pulvis *Cornachini*, mercurius dulcis, syrupus de cichorio cum rheo, de pomis, &c. Haud ritè succedunt salia cathartica, nec expectatum effectum exerunt manna,

GENERA-
LIA.

cateræque materiæ pingues; hinc fit ut nonnisi cogente necessitate, dùm scilicèt cætera verantur, usurpari soleant. Pluris habentur sub hâc ætate absorbentia, quæ sedantium vim obtinent: horum enim ope compeſcuntur dolores, leniuntur inquietudines & promovetur somnus: sed expedit inter absorbentium usum ut alvus sit libera; aliàs plura impendent incommoda, cur fit ut magnesia, quæ alvum referare solet, cæteris congeneribus præſtet.

Ut incœpta proſequamur, exulare debent acida, præſertim inter lactis usum. A ſolettioribus improbantur narcotica, ni urgeant vigiliæ & vomitus enormes: etſi ab incautis & quibusdam mulierculis, reluctante experientiâ, in familiarissimum usum trahuntur: sed tutò adhibentur *paregorica*, emulsiones nempè è seminibus papaveris albi paratæ, syrupus de papavere rubro, &c. *Antivenerea*, aliave specifica, quæ haud citrà periculum sub primis ætatis mensibus infantibus exhiberi queunt, nutrici præbentur, ut lac imprægnatum horumce medicaminum vires expleat. Nemo sanè nescit lac ingestorum vires retinere; etenim nunc croci, cassiæ & rubiæ tinctorum colorem præ se fert; nunc allii, cepæ, & absinthii saporem obtinet: ideò vim catharticam, antiveneream, antiscorbuticam, traumaticam, adstringentem, &c. huic impertiri licet. Nec rarò adhibetur ergà infantes hæc curandi ratio. Insuper plurimùm conferre, ad tuendam infantum sanitatem, munditiem; nemini non obvium: egregiam ad hoc opus opem præstant lotiones frigidæ, vel ipsamet balnea frigida, quorum vires aliàs summis præconiis certatim quasi efferuntur ab Authoribus primi ordinis; sed obstant præjudicatæ muliercularum opiniones, quas impugnare, arduum & difficile. Nonnulla, hisce generalibus finem imponendo, subjungere lubet de *dosi remediorum*, circà quam ſcioli & inexercitati, in gravissimos scopulos impingunt: hanc ratione ætatis instituendam fore nemo nescit; sed nec arithmetica, nec geometrica est hæc inter utrumque proportio; sed è solâ experientiâ depromenda; semper habitâ ratione temperiei, aliarumve circumſtantiarum. Ex observatis igitur colligere licet decimam vel octavam partem doseos cujusvis medicaminis sufficere paulò post nativitatem; sextam expleto primo ætatis anno, quartam post triennium, dimidiam postremò partem circà septimum circiter annum: & sic deinceps.



C O L O S T R A T I O.

COLOSTRATIO.

LABIUM leporinum, latus linguæ franulum, clausuram ani, alioque infantum affectus, qui solam manum chirurgicam expostulant, silentio prætermittimus, ne faciem in alienam messem immittere videamur. Itaque has duntaxat ægritudines, quæ scientiam medicam respiciunt, recensebimus; inter quas plures occurrunt singulis ætatibus communes, & nonnullæ solos infantes invadunt, in quarum postremarum censum venit *colostratio*, à quâ exordium capere expedit.

Colostrum, ne error sit in verbis, duplicem habet intellectum: hoc nempe nomine insignitur lac ab uberibus matris recens enixæ stillans, præ tenui consistentiâ seri lactis vulgatissimi æmulum; quod sanè, uti jam innuimus, ventriculi & intestinorum sordes abstergere, & alvum reserare valet. Aliud est colostrum, lac scilicet novâ nutricis imprægnatione inquinatum; quod sub primis lactationis mensibus, pessimam præbet alimoniam: è quo fonte innumeri prodeunt morbi quibus plectuntur tenelli infantes. Hanc causam in obscuris, conductitiarum curâ, latentem suspicari licet; si infantes torminibus plus æquo conflictentur: vel pertinaciori alvi fluxu laborent; quibus macie sensim conficiuntur, donec sæviora exsurgant symptomata quæ præmaturam necem portendunt, quam si effugerint, vitream per totum vitæ curriculum valetudinem trahere solent. Nonnulli tamen forti constitutione præditi, nullum, si lactis & casei horrorem excipias, incommodum dein patiuntur. Ubi igitur constat de morbi genere, novum lac incunctanter exhiberi debet; nec aliâ plerumque opus est *medicatione*. Nonnunquam tamen conferunt, sub hâc rerum conditione, *cathartica* blandiora; quorum præsidio everruntur pravarum digestionum reliquæ; quæ aliàs, vel exquisitissimum lac inquinarent. Mantissæ instar addere lubet, quod infantes hoc infortunio tacti *inganas* audiant apud Occitanos & Gallo-Provinciales, ab Italo verbo *ingannare*, quod sibi vult *fallere*; eò quod quasi decipiantur miselli infantes, qui lac improbum & *adulterinum*, loco genuini & congrui, è mammis eliciunt.



FEBRIS.

FEBRIS.

SOLA pulsûs exploratione vix innotescit febris infantum; sed hanc *produnt* intensior cutis calor, faciei rubor, sitis & solitæ inquietudines. Variæ sub hâc ætate febrium species, tùm acutæ, tùm lentæ, merè symptomaticæ audiunt. Inter acutas frequentius occurrunt *febris ephemera*, familiaris efflorescentiæ cutaneæ prodromus vel comes; *febris ardens*, quam promovent praviæ digestionis; *febris catarrhalis*, *verminosa*; à *dentitione* prognata, aliæque tumoribus criticis sæpius judicandæ. *Febres lentas* fovēt labes scorbutica, virus scrophulosum, diathesis rhachitica; obstructions mesenterii, infantibus familiarissimæ; aliorumque viscerum læsiones; &c. Nec à febribus *intermittentibus* immunes sunt infantes, etiam lactentes, quæ solitis auxiliis faciliè cedunt; sub quibus falsum terrorem incutere solet tumidum abdomen, quod pro signo salubri in plerisque haberi debet: idem esto iudicium de pustulis, labia, partesque viciniores defœdantibus; non secus ac de eruptionibus cutaneis passim erumpentibus; quæ etiam febris discessum pollicentur.

Rarò *inter curandam* infantum *febrem continuam* adhibetur venæ sectio, ni graviora urgeant symptomata: nonnunquam conducunt emetica; sed egregiam opem, cæteris consentientibus, præstant cathartica. Intereà largo pulli, decocti oryza, emulsionum, aliorumve diluentium & demulcentium potu reprimendus est æstus febrilis, & sitis compescenda. Proficue adhibentur absorbentia adversus acidam & familiarissimam primarum viarum saburram. Aquilâ albâ, æthiope minerali, aliisque anthelminticis domatur progenies verminosa. Suas laudes merentur blandiora diaphoretica, si incusetur eruptionum cutanearum retrocessus: intereà alvus usitatoribus præsidiiis fervetur libera. Quod verò ad *febrem intermittentem* attinet, congruo regimine, & consulto catharticum usu, subigi solet; aliàs adhibetur cortex peruvianus, aliudve febrifugum; cæteris sub hâc ætate præstat syrupus kinakinæ, & hujusce corticis extractum siccum, quod vulgò *sal de la Garraie* audit; quorum dosis ratione ætatis, juxta traditam methodum componitur. Pluris demùm habentur enemata febrifuga, si infantes delicatuli remedia palato ingrata plus æquo aversentur.



VARIOLÆ ET MORBILLI.

VARIOLÆ

ET

MORBILLI.


QUONIAM sub infantiâ simili fermè ritu pertractari solent hi affines morbi; hos, brevitati studentes, uno & eodem capitulo comprehendere haud incongruum fore judicavimus. Obscura sunt prædictorum affectuum *signa prænuntia*, eò quòd diversis efflorescentiarum & pustularum cutanearum speciebus obnoxii sunt infantes, quæ primo intuitu ab erumpentibus variolis & morbillis minime discrepare videntur: adeò ut inter judicandum hæreant vel solertiores. Sed omne dubium solvit horum progressus & exitus: licèt plures scioli, vel præjudiciis obcæcati, non secus ac varii nebulones gloriolam aucupantes, & errorem confiteri nescii, primo stent judicio: cur minime mirum si plures occurrant quí variolas se pluriès passos fuisse arbitrentur; quòd tamen rarissimè evenire pro comperto manet apud solertiores. Haud dilucidius patent *indicia*, quibus ineunte eruptione distinguí queant *variola à morbillis*: sed cùm de his satis superque suprà actum fuit, recoctam crambem minime apponemus. Nonnulla duntaxat circa prognosim & curandi modum, habitâ ratione, in medium adducere haud abs re fore putavimus.

Minus fanè portendunt *periculum* variolæ & morbilli sub infantiâ, quàm inter alias ætates, licèt funeris merum injiciant nonnulla, quæ non infrequenter sub prædictorum morborum stadio, se proferunt symptomata, cerebrum præsertim & pulmones respicientia. Hæmorrhagiæ tamen in infantibus familiares minùs ominosæ censerì debent, quàm in provectâ ætate; somnolentiamque solvere solent. Diarrhœa in adultis calamitosa, inter salubria infantum phænomena numeratur, eò quòd ptyalismì, variolas adutorum confluentes stipantis, vices explet: cur sit ut majorem formidinem incutiat alvus durior. Convulsiones, sub primo stadio, nil mali portendunt: summum verò terrorem incutiunt inter suppurationem, vel exsiccationem papularum. Sed quocumque modo se res vertat cautè vaticinandum, cùm plures infantes, qui cum morte colluctari videntur, superstites evadant, dùm alii inter fallacem alcyonium statum rapiuntur.

Rarò adhibenda venæsectio inter variolarum & morbillorum curationem, præsertim sub lactatione, ni urgeat spirandi difficultas & impendeat pulmonum phlogosis. Haud me latet, plures nomen Medici falsò sibi arrogantes, de hac re insanire, contrà quos, sui temporis audaciores, sanguinis missionem, sub hac conditione, familiarìus præcipientes, acriter, ni fallor, insurgit RIVERIUS, de praxi medicâ optimè meritis. Et si juvat alvus lubrica, rarissimè tamen, procedente morbo, adhiberi debent cathartica, quæ aliàs summè proficua circa finem censentur; imò & pluriès iterari debent ad præcavendas morbi reliquias. Haud tamen vetantur inter morbi curriculum enemata & suppositoria, si alvus sit compressa. Narco-

**VARIOLÆ
ET
MORBILLI.**

rica angue pejus sunt fugienda, licet haud desint scioli, qui illa in familiarem usum trahunt. Nec minus reformidanda cardiaca & diaphoretica, inepto popello summè arridentia, ni urgeat summa virium debilitas. Insuper opportunè propinantur, per totum morbi stadium, diluentia & demulcentia. Quoad cætera præsidia alibi, dum de variolis & morbillis auctororum agebamus, recensita, pro re natâ & cautè usurpari queunt.



A T R O P H I A.

RITÈ distinguenda *atrophia essentialis* infantum ab illâ emaciatione quam post se trahunt lues venerea, scorbutus, alterve morbus chronicus. *Marasmus*, de quo in præsentiarum, comitem habet renitentem abdominis prominentiam; atque faciei pallore, cibi fastidio vel immani appetitu; tussi siccâ & nonnunquàm spirandi difficultate, virium prostratione, alvi fluxu & urinis crassis vel rubris stipatur. Intereà abdomen ulteriùs distenditur, & dolet; exsurgit febris lenta, quæ noctu & inter digestionem alimentorum suas exacerbationes patitur, cum siti inextinguibili: hæc excipit frigus extremorum letho finitimum. Parcior lactis ad mammas proventus, vel ejus prava indoles, inconsultus absorbentium vel salium usus, alimenta crassiora & calidiora, &c. sunt totidem *causæ* quæ hunc morbum inferre valent; sub quo nobiliora labefactantur organa. In conspectum enim veniunt inter *cadaverum sectionem* venarum lactearum obstructions, & glandularum mesentericarum infarctus skirrhus; amurca nigra in intestinis flatu distentis contenta; vel lumbricorum copia. Hepar deforme & decolor, densum & mole amplius; pulmo versicolor, pleuræ accrerus, tuberculis scatens, purulentia tactus, putredine defædatus, &c. è quibus exitialem plerùmque esse hanc atrophie speciem colligere datur.

Tempestivæ tamen *curationi*, priusquàm scilicet altas egerit radices, cedere valet hic morbus, aliàs planè indomabilis: pro variâ causâ, diversam instituendam esse nemo non videt. Ideò, si incusetur lactis defectus, vel ejus prava indoles, alia incunctanter seligenda est nutrix, cæteræ verò causæ in obscuris plerùmque latent; quod tamen non impedit quominus varia, & cum cautelâ, experiantur præsidia. Itaque plurimùm quandoque confert diluentium, blandiorumque aperientium usus, tam pro lactentibus, quàm pro ablactatis. Summè deprædicatur sub hoc rerum statu rheum, cæteraque laxantia; sed à catharticis validioribus abstinendum. Haud inutilem opem ludunt amara, cautè exhibita; nec vetantur post ablactationem martialia, refractâ dosi adhibita. Intereà suas laudes merentur terra foliata tartari, arcanum duplicatum, oleum tartari per deliquium, &c. Opportunè demùm nonnunquàm exhibetur liquor anodynus mineralis. Suis viribus etiam pollent remedia externa, linimenta

nempè lubricantia, ex oleo chamæmeli parata; fœtus emollientes, & enematia simpliciora; quibus addere juvat balneæ, quæ cæteris præsertim antecellunt, si marasmus à crinonibus cutem infantum laceffentibus, de quibus infra, suboriatur.

ATROPHIA

HYDROPS ET TUMOR AQUEUS SPINALIS.

A LEUCOPHLEGMATIA, ascite, abdominis & scroti tumore œdematoso, aliisque hydropis speciebus haud immunes sunt infantes: sed rariores sub hac ætate censei debent prædicti morbi. Parùm mali portendit *anasarca* opportunis remediis impugnata; sæpiùsque uberiori lotii proventu, vel spontaneo alvi fluxu judicatur. Difficilior & longior est *ascitis medela*; sed solitis præfidiis plerùmque obtemperat. Nullius periculi particeps est abdominis & *scroti tumor œdematosus* à morbo acuto profapiam ducens: sed pro calamitoso habetur, si marasum & diarrhœam concomitetur: nec minùs demùm periculosus censei debet hydrops à redundante bile sobolescens. *Cadavera* cultro anatomico subjecta summam viscerum labem patefaciunt, proximè sanè accedentem ad stragem in adultis hoc morbo extinctis observari solitam. Mantissæ instar addere licet quamdam proflare historiam de binis infantibus hydropicis, è quorum sectione ante oculos versabatur inversus & perturbatus viscerum situs, apex scilicet cordis latus dextrum occupabat; non secùs ac lien, hepate ad lævum translato: eadem ratione stomachus & intestina, pancreas, &c. contrarium situm obtinebant: nùm tamen hæc viscerum transpositio pro causâ morbi habenda sit jure dubitandum.

Summam in *colluvie ferosâ* opem ferunt *cathartica*, rheum scilicet, jalapa, pulvis cornachinus, &c. Nec inefficacia censentur *stomachica* & amara, radix nempè helenii, baccæ juniperi, folia chamædryos, absinthii & centaurii minoris: inter quorum usum profunt temperantia, uti cichorium, agrimonia, dens leonis, adiantum, cæteræque herbæ capillares, &c. Hæc opportunè excipiunt aperientia & diuretica: qualia sunt lingua cervina, radices asparagi, brusci, apii palustris & petroselini, salia tamarasci & absinthii, aselli, &c. Martialia verò solis ablactatis congruere suprà notavimus. Suas laudes merentur vesicatoria sub colluvie ferosâ; ab inflictò enim hoc vulnuscùlo, serum in quâvis parte stagnans, exitum sibi parare valet, & ab hoc profluvio haud levis subit sanitatis spes.

Similibus fermè remediis impugnatur *scrotum œdematosum*: sed egregia sub hoc morbo, præsertim à contusione inter partum, obeunt munia *topica roborantia* & resolventia; fœtus nempè è decocto vinoso rosarum

HYDROPS
ET
TUMOR
AQUEUS
SPINALIS.

rubrarum, florum chamæmeli, rutæ, feniculi, &c. His addere licet aquam vitæ; aquam calcis, vel aluminosam; aliaque salina & spirituosæ quæ horumce fotuum vires intendere valent. Pluribus arridet cataplasma è farinâ fabarum confectum: alii deprædicant linimentum ex oleo laurino paratum; ut alia innumera remedia à mulierculis comprobata, haud semper posthabenda, prætermittamus. Quibus incassum adhibitis profunt vesicatoria vel scarificationes, quæ, uti innuimus, stagnanti sero egressum largiri queunt: sed solerti manu pertractari debent hæc remedia, quæ aliàs haud citrà periculum adhibentur. Addere licet, ergà lactentes, quòd utrumque morbum sæpius eximat novum lac; nec minorem etiam efficaciam adscribendam esse aëris mutationi, neminem practicum latet.

Huc coincidit *tumor aqueus spinalis* recens natorum, de quo apud Authores, sub incongruo & obscuro *spinæ bifidæ* nomine. Vertebris lumbaribus hæret prædictus tumor, diversæ magnitudinis; nunc nucem castaneam æquans, nunc ad ovum columbinum accedens; latice aqueo scatens, mollis atque sub digitis fluctuans; fuscus vel cuti concolor. Hunc morbum congenitum, quem pro herniâ spinæ nonnulli habent, merum esse productum morbosum docet autopsia cadaverum: ab hydrope scilicet cerebri & medullæ spinalis sobolescit; sub quo statu stagnans serum ad infimam thecæ vertebralis partem irruens, medullæ, vel caudæ, ut inquiunt, equinæ involucrum in tumorem cogit, qui per posticas vertebrarum intercapedines exitum molitur; & soluto repagulo, herniæ instar erumpit. Exhinc patet hunc morbum esse immedicabilem; qui ut plurimum artuum inferiorum paralytim, spirandi difficultatem cum stertore, convulsionesque lethales post se trahit. Nonnulli infantes hâc protuberantiâ signati, hydrocephalo etiam laborant: repertum enim fuit inter sectionem capitis hoc morbo denatorum, stagnans serum ad libras quatuor: in quibusdam deficiebat pars posterior thecæ vertebralis, ossi sacro conterminæ: in aliis occurrebat horum ossium prava conformatio, quæ hujusce cystidis aquosæ exitui favebat. Nulla patet medendi via: plures enim, qui hujusce morbi characterem nequidem subolfaciebant, intempestivo inhærentes ministerio, ad sectionem devenisse traditur; quâ brevi enecabantur miselli infantes.



ICTERUS.

I C T E R U S.

FLAVO cutis & oculorum colore singulis obviis hicce morbus nonnullos recens natos invadit; nec cæteris infantiae ætatibus parcit. Pro immedicabili habetur congenitus; nec periculi expers censeretur debet post nativitatem contractus; cum colluviem serosam in quâcumque parte minetur; & summum curantibus facessat negotium. Auriginem in infantibus, non secus ac in adultis, dolores & tormina ventris, necnon vomitus pertinacissimos, accersunt: nusquam tamen ab hepatis labe organicâ oriri videtur morbus regius, sub hâc tenellâ ætate; sed à meconio, vel à colostro caseoso, duodenum infarciens in recens natis; undè præpeditur bilis effluxus in rubum intestinalem; vel ab spasmo stomachi, qui fortè cæteras abdominis partes in consensum trahit ergà infantes ablactatos, vel natu majores, sobolescit.

Alia est *curatio* lactentium; alia ablactatorum: sub primo casu leni cathartico per alvum expurganda venit saburra duodeno impacta: hæc obeunt munia syrupus de cichorio cum rheo, vel de pomis; jalapium, pulvis Cornachini, &c. Superato repagulo, hepatis redundante bile infarcto & sanguini eodem humore conspurcato prospiciendum, ope blandioribus hepaticis & temperantibus; id genus sunt dens leonis, cichorium, herbæ capillares, agrimonia, &c. Suas etiam laudes merentur aperientia, & diuretica mitiora; uti lingua cervina, radices asparagi & apii palustris, sal tamarasci, &c. Aselli verò & martialia, necnon saponacea, biennes duntaxat, & provectiores respiciunt, ac summâ cum cautelâ exhiberi debent; nec minùs sub hâc rerum conditione deprædicantur sal succini & pulvis viperarum, quæ solerti manu tractata præclaros præstant effectus.

Omniis infantiae ætatibus, servatis servandis, conducunt, congruâ dosi, prædicta remedia: sed haud semper licet illa adhibere, ob indomabilem vomitum, sub quo ipsamet alimonia ipsis denegatur. Ideò omni ope primò compescendus est vomitus: ad quem scopum sæpiùs mira præstat ipecacuanha, aliudve emeticum; quod tamen haud semper ritè succedit; quin potiùs ejus actione irritari queunt crabrones. Tum solis diluentibus & demulcentibus, syrupo florum aurantiorum nonnihil imprægnatis, haud posthabitis pulvere de gutteta, aliisque absorbentibus inhærendum; donec sedato spasmo, cathartica propinare liceat; quorum beneficio referantur bilis receptacula, & brevi fugatur morbus; juvantibus sanè aperientibus & diureticis suprâ traditis; quibus faustè sociantur amara & stomachica. Curam deniquè, si res expostulet, absolvunt aquæ minerales, Vicienses nempe, Vallenses, Forgienses, &c.

LUES
VENEREA.

LUES VENEREA.

A MATRE vel nutrice infantibus traducitur virus venereum, quod *se prodit* maculis vel exanthematibus cutaneis; eruptionibus herpetiformibus, pustulis & tuberculis passim occurrentibus, acoribus & favis pravæ indolis; aphthis os defœdantibus, ulceribus hanc vel illam partem occupantibus, quæ labem ipsismet ossibus nonnunquam inferunt; ophthalmiâ purulentâ, atrophîâ, &c. quibus addere licet erysipelas quoddam universale, quod recens natos duntaxat respicit. E cutis læsionibus conijcere licet hanc labem in utero contractam fuisse; sed inquinatâ nutrice cogitandum, si os labefactetur. Lues venerea in infantibus periculosus audit morbus; eò quod ægrè sub hâc tenellâ ætate innotescit, & difficiliùs curatur. Nec ante secundum à nativitate mensem, etiam in re urgentissimâ inchoari potest hæc medela, quæ summam cautelam expostulat, aliàs ad quartum annum remittenda, ut robustiores infantes hanc sine vitæ discrimine ferre valeant.

Haud aliâ methòdo impugnatur lues venerea in infantibus, ac in adultis: ætatis duntaxat habenda est ratio, ut congrua componatur specifi-
 dosis. Præmissis scilicet generalibus in usum veniunt *sudorifica antivenerea*, vel medicamina *mercurialia*: paratur nempe ptisana è guaiaco, præcipitur pulvis falsæ parillæ panatellæ immiscendus, &c. Aliàs quotidie exhibentur panaceæ nonnulla grana per viginti circiter dies; vel celebrantur frictus cum drachmâ semisse unguenti Neapolitani, octavam vel decimam duntaxat mercurii partem recipientis. In alterutrum latus decumbere debent infantes inter mercurii usum, tum internum, tum externum, ut saliva uberiori proventu stillans per locum declivem fluat; ne inter somnum œsophagum vel pharyngem haud sine præsentis vitæ periculo subeat. Eluuntur oris ulcera cum aquâ mulsâ, &c. erga verò debiliores lactentes, quibus haud citrà piaculum exhiberi potest mercurius, usus invaluit, ut nutricis lac, uti jam innuimus, hoc remedio imprægnetur: sed suis premitur difficultatibus hæc methodus, quæ anceps censeretur debet, & infanti nutrici, nec perperam reluctanti, perniciem sæpiùs infert.



S C O R B U T U S.

SCORBUTUS


INFANTES nonnunquam corripit hic morbus, cujus historiam alibi tradidimus; sed rarius quàm vulgò fertur. Tantùm valet præconcepta opinio, ut sæpius præbeat mendacio fidem. Scorbutum in utero materno contrahunt nonnulli infantes, qui etiam à lacte vel pravis alimentis sobolescit: frequentius tamen à quovis alio morbo chronico profapiam ducit. *In propatulo se sistit* scorbutus, si gingivæ afficiantur, & cutis notissimis exanthematibus signetur: sed tardius in quibusdam se produnt hæc signa, adeò ut alia inquirenda sint indicia; è quorum tamen syndrome meræ plerumque emergunt conjecturæ; donec prodeuntibus signis, ut inquiunt, pathognomonicis, certiùs constet de morbi genere.

Infantes scorbuto laborantes, desidiofi, nugas, motumque localem, ob crurum debilitatem, averfantur: inflatur inter digestionem horum stomachus: torminibus sæpius anguntur: dolores incertæ sedis, & somnum arcentes, patiuntur. Pulsus varias mutationes subit; donec febris insurgat; pulmones & viscera abdominalia, hoc morbo procedente, sæpius læduntur. Passim demùm erumpunt tubercula gangliiformia quæ pro signo pathognomónico à nonnullis habentur. Quotquot tamen sint prædictæ notæ, omnibus morbis chronicis ferè communes latentis scorbuti suspicionem duntaxat movent: sed *morbi characterem* dilucidè produnt gingivæ tumidæ; exulceratione defœdata, cruentæ & sanie conspurcata, ac fœtorem spargentes; ecchymoses purpuratæ passim occurrentes; eruptiones pustulosæ certi generis; tumores exigui & indolentes qui paucis elapsis diebus spontè evanescunt. Intereà debiliores infantes agrè obambulant: tument in plerisque genua; donèc crura suis obeundis muniis imparia planè evadant. Ad huncce gradum proventus scorbutus marasimum, ossium cariem, hæmorrhagias, & insultus epilepticos post se trahere solet; ni opportunâ medicatione impugnetur.

Eadem fermè est *curandi methodus* sub infantiâ, ac in ætate provectâ, dummodò cuique ætati congrua exhibeatur medicaminum dosis. Itaque præmissis generalibus & diluentibus, inter quæ cæteris præstat serum lactis, in usum vocantur *antiscorbutica* vulgatiore & magis comprobata, succus nimirum nasturtii aquatici & cochleariæ, syrupus antiscorbuticus, vinumque ejusdem generis. Cætera specifica quæ ex inexhaustis materiæ medicæ fontibus depromi queunt, & rarissimè adversus infantum scorbutum usurpantur, consultò prætermittimus. Sed alia alterius fortis sunt medicamina, quæ pro re natâ in subsidium venire queunt, fumaria nempè, chamædrys, cortex peruvianus, aliaque stomachica amara. Nec posthabenda blandiora cathartica identidem repetita. Sed futilia forent hæc

SCORBUTUS

omnia, vel exquisitiora præsidia, ni congruum componeretur regimen, quod ingredi solent raphanus, sinapi, aurantia, limones, aliaque id genus alimenta ex antiscorbuticorum ordine petita: quæ omnia etiam nutrices respiciunt pro lactentibus.



SCROPHULÆ.

HUNC affectum potius infantes quam adultos respicere, suprà notavimus. Obscura sanè est genuina scrophularum *prosapia*: plures enim illas habent pro morbo sui generis: alii verò luem veneream & scorbutum, morbos scilicèt à parentibus vel nutrice transmissos ad infantes, scrophularum faciem induere contendunt; quod sanè rationi & experientiæ nequaquam adversatur. Nemo nescit scrophulas, sub juvenili ætate, *sedem* præcipuam habere in glandulis cervicalibus & mesentericis, nec cæteris lymphaticis parcere. Manibus etiam & pedibus, aliisque artuum connexionibus insidere solent scrophulæ, quæ insuper oculos, nares, labia, &c. aggrediuntur. Sæpiissimè hiant *tumores scrophulosi*, qui phlogoseos & skirrhi participes esse videntur, & in ulcera sordida, à cancris vix discrepantia, facessunt. Intereà febre lentâ conficiuntur miselli ægri, quam presso pede sequitur marasmus: sub quâ rerum conditione imus venter in tumorem attollitur, ab infarctu scilicèt mesenterii. Nullus fortè occurrat morbus inter praxim scrophulis *pertinacior*; imò & sæpiùs pro immedicabilibus planè habentur.

Sæpiùs expedit in limine *curationis* ut vomitus cieatur, in quem finem opportunè exhibetur ipecacuanha, profuntque cathartica identidem repetita. Intereà largâ manu propinantur diluentia, temperantia & demulcentia, ut remediis efficacioribus paretur via. Opitulantur magnesia, cæteraque absorbentia; faustè etiam usurpantur amara, & præsertim cortex peruvianus. Mira sæpiùs præstant antiscorbutica: suas laudes merentur sudorifica: sed *specificæ* quasi audiunt aperientia & incidentia, quæ intimiora corporis penetralia lustrando, obstructa vascula referare, & materiam inibi impactam auferre, solitisque incerniculis tradere queunt: hanc opem præcipuè præstant aquæ Bonenses, Baregieneses, aliaque minerales saponaceæ & sulphuræ. Nonnulli deprædicant frictus cum unguento Neapolitano; sed haud citrà periculum adhiberi potest illud remedium: etsi, ut verum fatear, plures fausto beavit eventu. Haud inanem denique operam ludunt cauteria & fetacea; cum sæpiùs virus scrophulosum, unà cum pure per hanc sentinam foràs amanderetur. Multùm postremò deprædicantur plantaginis folia extris admota; sed de hujusce stirpis, aliàs innoxia, viribus ulteriùs inquirendum.

T U S S I S.

TUSSIS.

IN obscuris plerumque latet tussis infantum indoles, quam ideò meris conjecturis assequi licet. Dilucidius sanè patet *tussis catarrhalis*, cæteris frequentior; quam præeunt sternutatio, coryza & febricula, potiùs corporis æstu, quàm pulsûs frequentia notabilis. Expectoratio quæ catarrhum in adultis solvere solet, planè deficit, vel ægrè exercetur in infantibus: sed huic evacuationi suppleant aliæ excretiones. Tussis infantum catarrhalis, *vehementior* & epidemica, quæ *coqueluche* apud Nostrates audit, suis exacerbationibus, vel paroxysmis, à cæteris speciebus ritè distinguitur. Tantâ enim ferociâ sæpiùs insurgunt hujusce tussis ferinæ & clangosæ insultus; ut facies colore atro violaceo suffundatur; & sanguis ex ore & naribus erumpat: cur minime mirum, si tunc temporis cieatur vomitus; urinæ profiliant, & solvatur alvus. Tussis infantum catarrhalis, blanda vel molesta, à simplici pulmonum vel bronchiorum vellicatione oritur: sed sub aliâ rerum conditione *alterius morbi est soboles tussis*; & symptomatica audit. Scitur enim tussim promoveri à peripneumoniâ, phthisi, aliâve pulmonum labe organicâ: nec latet scorbutum, luem veneream, scrophulas, rhachitidem & marasimum, tussî plerumque stipari. Sed cùm summis difficultatibus sæpiùs prematur horumce morborum *diagnosîs*, minime mirari subit, si sæpiùs inextricabilis sit genuina tussis causa: quæ aliàs nonnunquam concitatur à dentitione, à vermibus in primis viis nidulantibus. Sed *inter varias tusses symptomaticas*, crebriùs sanè occurrit *stomachalis*, nulli ætati parcens; sed infantibus familiarissima; à saburrâ scilicèt acidâ, mucosâ & glutinosâ, ventriculum laceffente, prognata: se prodit hic morbi fomes cibi fastidio, ructibus fœtidis, inflatione stomachi, &c. Ubi postremò, re manente dubiâ, opitulatur vomitus spontaneus, vel quocumque modo concitatus; tussim à sordibus in ventriculo reconditis foveri credere par est.

Feralem sæpiùs habet *exitum tussis vehemens*, & convulsiva, non modò sub variolis & morbillis, sed etiàm inter dentitionem. Præter suffocationis metum, alia ab hac sævissimâ tussî impendent mala, herniæ nempe, ani prolapsus; ac nonnunquam spinæ inflexio. *Catarrhus* infantum ad certum gradum provectus, *periculi* nusquam expers censetur; nec falsum terrorem incutit, si febre intensiori, roncho & sibilo stipetur. Sub hâc tussis specie & constitutione epidemicâ, haud rarò erumpunt efflorescentiæ pustulosæ, vel sudores, è quibus felicem *eventum* hariolari licet. Facile evincitur tussis catarrhalis simplex & recens: sed si à quâvis organorum respirationis indicatorum læsione, in obscuris sæpiùs latente, foveatur, res sanè periculosæ aleæ. Quoad alias tussium symptomaticarum species, à primarij morbi indole eruendam esse prognosim nemo non intelligit.

Haud dubitare licet quin *medela ad morbi causam*, uti solenne est in cæ-

TUSSIS.

teris morbis, sit *dirigenda*. Sed cùm in cimmeriis sæpè lateat tenebris hæc causa; & nil certi de hac re ab exarata, apud Authores, hujusce morbi historiâ eruere liceat; generalem duntaxat curandi methodum proponemus; quæ recto adhibito moderamine, à benè perspectis morbi phanomenis eruendo, utrique casui, tussi nempe catarrhali & stomachicæ, congruere valet. Hunc verò articulum minime respiciunt cæteræ tusses symptomaticæ, quæ medicaminibus primario morbo adscriptis impugnari debent. Consultò etiam prætermittimus tussim à phlogosi, exulceratione, alioque pulmonum vitio, prognatam; ne à repetitâ crambe proluxius emergat opus.

Ut ad *curationem* deveniamus; sævientibus febre, & spirandi difficultate, sanguinem mittere licet: aliàs furilis & noxia est *venæ sectio*. Saluberrimum esse ergà infantes tussientes *vomitum* spontaneum jam supra notavimus: hinc patet cur opportunè exhibeantur tartarus stibiatus, radix brasiliensis & kermes minerale. Hæc munia ergà nauseabundos obire queunt alia mitiora & vulgatiora; sperma nempe ceti in jusculo solutum, pharyngis vellicatio à pennâ oleo inunctâ, &c. Summum etiam præstant auxilium *cathartica* pluriès repetita, inter quæ familiariùs usurpantur rheum & aquila alba. Intereà propinari solent diluentia & demulcentia; serum nempe lactis, aqua pulli, decoctum napi, sperma ceti, syrupus de althæâ, &c. Suas laudes etiam meretur syrupus de erysimo: sed parùm aut nil prosunt cætera bechica vulgatiora. Haud immeritò deprædicatur corallii, lapillorum cancerorum fluviatilium, absinthii, corticis citri, elixirii proprietatis, aliorumque absorbentium & stomachicorum usus. Faustè etiam usurpantur antispasmodica, pulvis nempe de guttèrâ, pæonia, viscum quercinum, succinum, crocus, castoreum, &c. haud posthabenda sunt hypnotica; sed summâ cautelâ exhiberi debent. Pluris habentur denique inter *tussim chronicam*, aperientia & sudorifica; aselli nempe, arcanum duplicatum, terra foliata tartari, sal absinthii, antimonium diaphoreticum, &c. Sed cavendum ne hisce intempestivis præsidiiis irritentur crabrones. Laudantur etiam sub eâdem rerum conditione vesicatoria, cauterium & setaceum; præsertim si ab eruptionum cutanearum retrocessu profapiam ducat tussis. Quibusdam arrident linimenta cum axungia humanâ, oleo amygdalarum dulcium, chamæmeli, &c. pectori admovenda. A nonnullis demùm summè deprædicatur oleum scorpionum, quo illinuntur lumbi, si lotium sufflaminetur.



 ANHELITUS ET SUFFOCATIO.

ANHELITUS

ET

SUFFOCATIO.

VARIAS notissimasque anhelationis & suffocationis species, nulli ætati parcentes, de quibus alibi, missas facimus; ut de his duntaxat quæ infantes, vel recens natos, corripere solent agamus; inter quas binæ præsertim recensendæ veniunt: prima scilicet ab infarctu bronchiorum oriri videtur; & pro *catarrho suffocante infantum* haberi potest; altera à linguæ ad fauces devolutione promovetur. Hæc catarrhi suffocantis species, de quâ altum apud Authores silentium; cui anteire solent maximus muci proventus & alvi profluvium; nullo aliàs notabili prodromo, ablactatos plerumque invadit. Noctu sub primo somno, *incubi* instar, ingruens insultus vehementi se profert spirandi difficultate cum strepitu & stertore. Pulsus parvus, durus & ferocior exploratur: facies insolitum pallorem induit: expansæ nares muci copiâ replentur. Intereâ, imminente suffocationis periculo, diversimodè agitur infans & quasi convellitur; crebris productis suspiriis & quasi irritis tussiendo conatibus: aliàs tussi ferociori corripitur. Sub hisce angustiis pulsus nonnunquam obliteratur, & friget corporis habitus; donec congruis præsiidiis, vel spontaneâ pituitæ mucosæ excretionem solvatur paroxysmus; qui tamen inordinatis intervallis recurrere solet, semper periculosa alea. Quidpiam spasmodici latere in hocce morbo conjicere licet; qui ab exuperante muco oriri videtur: nares enim, fauces, laryngem & tracheam, hæc glutinosâ materiâ impeditas exhibet sectio cadaverum.

Hinc patet *curandi processus*, qui in evacuatione illius humoris viscidissimi versatur; quod sanè quidem agrè perficitur, ni organa movenda fuerint obsequiosa & flexibilia. Ideò nullâ morâ propinandum emeticum, quo educi solet ingens materiæ viscidæ copia; cujus ejectione liberior exercetur respiratio; vel mirè compescitur morbus. Pulsus tum plenior observatur, & ingruit febris, in plerisque, quæ ad triduum protelatur; sub cujus finem, egregiam opem præstant cathartica, quæ secessum mucosum copiosissimum movere solent. Hisce præsiidiis evictò morbo; aliud medentibus incumbit munus, ut scilicet ejus reditum præcaveant; & hæc est præcipua curandi meta; quam assequi licet, materiam morbosam ad sentinam intestinale identidem amandando: & ideò propriâ experientiâ constitit oppidè conferre cathartica blandiora, bis terve, per mensem adhibita. His obsecundant stomachica, roborantia & aperientia, quibus nil efficacius ad præcavendam pituitæ viscidioris geneseos: hisce viribus pollent cichorium, fumaria, abrotanum, absinthium; rheum, ipecacuanha; crocus martis, syrupus mercurialis, extractum juniperi, &c. Hunc effectum felicius exerunt, si vires ferant, aquæ minerales, Forgienses nempe, Vicienses, Bonenses, Baregieneses, &c. quæ cuncta permeando, corporis sentinas & colluviaria referant.

ANHELITUS
ET
SUFFOCATIO.

Alia, nec minùs reformidanda observatur suffocationis species, quæ recens natos duntaxat respicit, de quâ fusè PETITUS, præclarus artis chirurgicæ arbiter, in actis Acad. Reg. Scientiarum. A *lingua* quasi voratæ devolutione ad fauces suboritur hic affectus, ad quem procliviores cenferi debent quibus præposterè, vel plus æquo, sectum fuit frænus linguæ. E suâ sede depulso hoc organo, insolitos deglutitionis motus edit infans, quasi à bolo faucibus hærente; quos brevi sequitur suffocatio, ob denegatum scilicet aëris ingressum intrâ pulmones, à depressâ epiglottide. Plures sub hocce infortunio, cujus causam nequidem suspicantur mulierculæ, extinguuntur. Huic morbo, si innorescat, facilè occurritur: fatumque avertitur linguam reponendo, solâ ope digiti in os immissi; quæ dein congruo spleniolo, vel quâvis aliâ arte, in ore retineri debet: diùque est protelanda hæc cura mechanica, ne infans denuò linguam deglutiat, & idem periculum incurrat. Fertur Nigritas laboris impatientes, & ærumnis pertæsos, linguam pro arbitrio vorare, ut suppresso spiritu ad ineluctabile fatum properent.



VOMITUS.

CONDUCIBILEM esse vomitum ab ingurgitatione ortum, præsertim ergà lactentes, neminem fermè latet: sed si diutiùs proteletur & singultu stipetur, res est periculosæ aleæ. E suprà traditis colligere datur vomitum sæpiùs moveri à *tussi vehementiori*, & tussim concitari à sordibus in stomacho nidulantibus; quod sanè quidem consensum inter respirationis & digestionum organa prodit, è quo benè perspecto, sæpiùs eruitur legitimus curandi ritus. Vomitus prætereà tam in infantibus quàm in adultis, inter variolarum, morbillorum, febrium continuarum & intermittentium, &c prodromos numeratur. A malâ stomachi, partiumque ambientium conformatione nonnunquàm oritur; sub quo casu planè indomabilem esse nemo non intelligit. Aliàs vel sponte sedatur, vel simplicioribus remediis obtemperat. Solo enim regimine ritè composito *vomitui ablaçtatorum* consulitur. Curantur alii merum lac rejicientes, si rariùs ipsis præbeantur ubera, & moderata fiat suçtio, nec aliâ opus est medelâ.

Sub cæteris casibus, præmissis diluentibus, opportunè usurpantur *evacuantiâ per alyum* blandiora; familiarissimè in hunc scopum præscribitur syrupus de cichorio cum rheo, præsertim pro lactentibus. Dein præsentaneam opem ferunt *absorbentia*, ni fœtorem subacessentem spiret os, & materies per vomitum rejectæ, non secùs ac fœces alvinæ cruditarum acidarum indicia præbeant. Suas laudes etiam merentur, post debitas evacuationes, *stomachica* & carminantia; syrupus nempè cydoniorum, the-
riacæ,

riaca, anisum, nux moschata, oleum macis, &c. Haud vetantur sub urgentiori casu hypnotica; dummodò solerti manu tractentur. Notare juvat quod maximi sit momenti ut alvus, inter usum prædictorum remedium, fervetur libera; intestina enematum ope sæpiùs eluendo, cum cathartica crebriùs adhibere minime liceat. Insuper haud despicienda *robora- rantia externa*, quæ internis mirè obsecundant: itaque regioni epigastricæ, vel scrobiculo cordis, faustè admoventur lintea infuso rosarum rubrarum vinoso, cinnamomi, caryophyllorum, &c. imbuta. Eidem parti proficuè etiam imponuntur pulpa cydoniorum, theriaca, panis assatus vino generoso irroratus, & aromaticis conspersus, &c. Quantæ enim sint efficaciæ prædicta topica, norunt sanè quos non latet magis in infantia patulos esse corporis porulos, quàm sub aliâ ætate.

VOMITUS.

T O R M I N A.

HAUD dubitare licet quin torminibus sæpiùs torqueantur lactentes: sed indicio sat manifesto minime *innotescit* hic affectus, aded ut huicce molestiæ perperam haud rarò referantur infantum ejulatus. Præter meconium, quod recens natos duntaxat respicit, *suboriuntur cruciatus abdominales* à pravâ lactis indole, ab spissiori vel incoctâ puliculâ, à fructibus horæis vel immaturis, à saccharatis, non secus ac ab stimulantibus catharticis. Hæc præterea promovent flatulentia & vermes, pedum & imi ventris refrigeratio, dentitio, &c. Sed ritè sunt distinguendi à torminibus, de quibus in præsentiarum, abdominis dolores à pertinaci mesenterii, aliorumque viscerum labe oriundi. In ancipiti sæpiùs versari torminum legitimorum indicia, suprà notavimus. Hæc tamen denuntiant inquietudines nullâ arte compescendæ, ejulatus, corporis distorsiones, ventris inflatio, flatuum expulsio, fæces subvirides & diversæ consistentiæ, alvi compressio, &c. *Periculo* plerumque vacat hic affectus, qui aliàs febrem, spirandi difficultatem, convulsiones, &c. post se trahit.

Omnem paginam implent *demulcentia*; aqua nempè pulli, oleum amygdalarum dulcium, sperma ceti, aliaque consimilia; quorum ope obtunduntur & cicurantur vellicantes & lancinantes materies, & hinc leniuntur tormina. Nec minùs profunt inter horum dolorum remissionem, laxantia blandiora; cassia nempè, manna, rhabbarum, &c. Cautè verò cum catharticis mercari expedit, præsertim validioribus, nonnunquam tamen post debitum diluentium usum efficacissimis. Nec minorem fortè perniciem inferre potest latissimus, vel crebrior oleorum usus, quo sensim debilitatur stomachus, variique progerminantur morbi, quorum causa in obscuris latet; hinc à nonnullis prioris notæ practicis planè abdicatur; quod tamen cum grano salis accipiendum esse censemus; cum experientiâ iudice, nil mali è cauto hujusce remedii usu oriri videatur. *Carminantia*

TORMINA.

à multis immeritò despecta, haud suis viribus defraudantur, cùm sedantium vices gerant, inter quæ usitatiora audiunt iris florentina, pulvis & oleum anisi, aqua menthæ, &c. Præsentaneam opem ferunt *absorbentia*, corallium nempè & corallina, testacea, &c. si acida incusetur colluvies, nec minus auxilium præstant semen fantonicum, cæteraque anthelmintica, ubi de progenie verminosâ moveretur suspicio. Cautus debet esse hypnoticorum usus, etsi apud nonnullas mulierculas, sedandis importunis vagitibus intentas, familiarissimus. Nemo non novit enematum anodynorum, carminantium & laxantium efficaciam; quorum compositionem ingredi solent, lac, saccharum, anisum, flores chamæmeli, oleum, butyrum, cassia, &c. Nec posthabenda linimenta ex axungii; oleo rutæ & chamæmeli, adjectis nonnullis olei anisi guttis, parata. Suas laudes etiam merentur vesicæ lacte tepido semiturgidæ; frixa cum oleo nucum ovorum intrita; aliaque innumera à mulierculis acceptissima, quorum censum prætermittimus, ne nauseabundum emergat opus.



ALVI FLUXUS.

INTER vulgatiores *diarrhææ* & *dysenteria infantum causas* recenferi debent dentitio, lac inquinatum, & incondita victûs ratio. Alvi fluxus legitimus, absque febre, aliove gravi symptomate, periculi expers est; imò & salubris audit inter dentitionem: sed metum incutit, si vigiliis, tussi, cibi fastidio, vomitu, torminibus cum dejectionibus suprâ modum fœtentibus stipetur. Calamitosus censetur, si vigente febre lentâ, renitens abdomen in altum elevetur: sub quâ rerum conditione vix de mesenterii infarctu skirrholoso dubitare licet. Idem fermè esto iudicium de alvi fluxu cruento, quem per plures menses citrà grave incommodum ferre queunt infantes; qui tamen ominosus evadit si aphthis, inappetentiâ, abdominis protuberantiâ, torminibus, tenesmo, vigiliis & febre lentâ societur. A fluxu cœliaco haud immunes etiam sunt, ut alibi notavimus, infantes; quem fovere videtur uberior muci intestinalis proventus.

Inter efficaciora *remedia* adversùs utrumque alvi fluxum infantum, ab acidâ lactis corruptelâ sæpiùs ortum, recensentur emetica & cathartica; si sinat pulsûs & abdominis conditio: circâ quæ notare licet quòd ipecacuanha, rheum, cæteraque laxantia dysenteria magis congruant. Intereâ opportunè exhibentur diluentia & demulcentia, aqua nempè pulli, aut carnis vitulinæ, ptisana oryzæ, serum lactis, oleum amygdalarum dulcium, &c. Nonnullam opem præstant diaphoretica, papaver nempè rhœas, scorfonera, aliaque affinia. Profunt quoque absorbentia: adstringentia verò, uti syrupus cydoniorum, granatorum, &c. nunc juvant, nunc noxam inferunt: idèò consultò sunt adhibenda. Haud minorem cautelam efflagitant narcotica, quæ sub hisce casibus necrotica evadere

queunt; nonnunquàm tamen proficua, si opportunè usurpentur. Insuper haud mammis diutiùs hæreant lactentes; aliàs crebriùs ipsis admovendi; quod sanè norunt solertiores nutrices. Diætæ congruæ submittantur ab-lactati, & à carnibus præsertim abstineant. Intereà cæteris medicaminibus palmam præripiunt enemata è mero lacte, cui nonnulli addunt mel viola-ceum, aut vitellum ovi; è jusculo omaforum, vel capitis vervecini; è fero lactis, decocto oryzæ, &c. Quoad fots vel epithemata ex ad-stringentibus parata, pro ficulneis præfidiis à potiori clinicorum parte habentur.

ALVI
FLUXUS.

VENTRIS SEGNITIES.

ALVUS sub primo ætatis anno bis, terve per diem, juxtà sancitas à naturâ leges, exonerari debet. Plura enim impendent mala ab ejus nimiâ compressione; inquietudines nempè quibus arcetur somnus, abdominis inflatio, tormina, spirandi difficultates, insultus epileptici, &c. Sub dentitione præsertim lubrica debet esse infantum alvus, cùm majorem dentientibus molestiam creet ejus segnities. A lacte calidiori, vel crassioris consistentiæ, originem ducere valet hic affectus; sed sæpiùs à peculiari infantum temperie *sobolescit*: nec rarò utramque causam agnoscit ventris stipticitas. *Nutricibus prospiciendum*, si inculpetur prava lactis indoles: ipsis scilicèt præcipiuntur ptisanæ vel juscula refrigerantia: danda præcipuè est opera ut à calidioribus cibus, & cupediis abstineant, & à vino temperent; ut negotiis & curis valedicant; ac in hisce præceptis præcipuum ver-satur curationis momentum.

Reliquum curæ simplicioribus absolvitur. Sollicitatur nempè alvus *suppositoriis* è cereolo, porro; betæ, vel mercurialis, caule; è lardo, sapone, aut melle cocto paratis; quibus addere licet, ad majorem stimulum, sal gemmeum vel ammoniacum; jalapium, agaricum, aloen, colocynthidem, &c. atque in eundem scopum injiciuntur *enemata* emollientia, & nonnihil cathartica; quibus nil proficientibus ad laxantia ore sumpta devenire expedit; qualia sunt oleum amygdalarum dulcium, manna, rheum, &c. sed nusquàm innoxius censerì debet horum usus diutiùs protractus. Nonnullis lactentibus prodest ad alvum referendam succus parietariæ ad drachmam unam vel alteram exhibitus. Suas laudes etiam merentur *linimenta* è butyro, vel oleo amygdalarum dulcium parata & umbilico admovenda, quibus addere licet, si nil obster, colocynthidem, scammonium, trochiscos alhandal, &c. Haud despiciendum unguentum de arthanitâ, quod in officinis ad hoc opus prostat; cujus tamen, nescio quo fato, usus fermè eviluit. Nonnunquàm optimè cessit aqua frigida, forûs instar, clunibus & coxis admota; haud dubitare licet quin alvus hâc arte plerûmque solvatur; sed pro comperto eriam manet tormina nonnullis in-fantibus infligere hanc methodum; quæ hinc cautè est adhibenda.

VERMES.

V E R M E S.

RARO hisce conflictantur lactentes, sed familiarius cæteros *invadit verminosa progenies*, præsertim à sexto ætatis anno ad pubertatem. Variis signis se prodit hic affectus, sed haud semper spectabilia se proferunt: hinc fit ut sæpius ægrè expiscetur ejus indoles, quam meris conjecturis assequi licet. Inter progeniei verminosæ, in primis viis nidulantis, *indicia* numerantur ructus acidi, quos prodit peculiaris oris fœtor; ptyalismus; vomitus, singultus, tussis, sitis, appetitus nunc exquisitus, nunc prostratus; imi ventris inflatio, tormina, alvi fluxus, dejectiones mucosæ & fœtidæ; facies nunc pallida, nunc florida, narium pruritus, pavores nocturni, stridor dentium, dolores artuum acutissimi vix à rheumaticis discrepantes; lotium pallido-turbidum, &c. quibus addere licet vermium excretionem, quâ morbus in ancipiti haud ampliùs versatur. Graviora à vermibus nonnunquàm suscitantur symptomata, anxietates nempè, lipothymia, febris acuta & irregularis, convulsiones, somnolentia, &c.

In quovis fermè ab lactatorum affectu reconditæ naturæ, cogitatur de vermibus, qui tamen *sæpius immeritò incusantur*: non secùs ac dentitionis vel torminum movetur suspicio sub quovis lactentium morbo intricatæ indolis. Prætereà insultus verminosi rariores sunt quàm vulgò fertur: nec ab errore planè vindicat ipsoꝝmet lumbricorum expulsio, cùm ratum maneat, vermes tùm infantum, tùm adutorum, sæpissimè in primis viis hospitari, & per alterutram viam foràs eliminari, ne minimâ quidem prægressâ molestiâ. Pro *febre* mali moris habetur *verminosa*, cùm in plerisque, putridæ vel malignæ faciem induat; sub quâ difficilis respiratio, renitens ventris tumor, oculi convulsi, frigus extremorum, pulsus obliterated, &c. inter ominosa, uti solemne est in cæteris febribus, symptomata numerantur. Alia occurrit febris verminosa, hæctica nempè, quæ sæpissimè alvi fluxum comitem habet: aliàs cinerea vel grisea dejiciuntur excrementa, & urinæ turbidæ sedimentum limosum deponunt. Vermes trans ventriculi, intestinorum, muscutorum & corporis involucrorum contextum, circà umbilicum, inguina, &c. exitum nonnunquàm sibi parare, alibi notavimus. Addere juvat hunc casum infantibus familiarem esse; eò quòd laxior prædictarum partium contextus faciliùs perfodatur.

Haud dubitare licet quin *cathartica*, *mercurialia* præsertim, cæteris vermifugis longè præstent; usitiora audiunt jalapa, diacrydium, syrupus florum persicorum, pulvis cornachinus, aquila alba, aliaque innumera è materiæ medicæ penu depromenda. Ex observatis constat convulsiones à vermibus nonnunquàm ope emetici fugatas fuisse; sed si huic symptomati

superando impar sit illud remedium, præceps exitum afferre potest : hinc non nisi summâ cautelâ in usum vocandum. De *anthelminticorum* viribus multum controvertitur : sed cum haud nostrum sit lites tantas componere, selectiora à potiori clinicorum parte comprobata in medium adducemus : hæc sunt semen fantonicum, aliaque amara, corallina, cum cæteris absorbentibus ; limatura ferri cujus usus protelari debet ; petroleum, aliave diversæ fortis olea ; mercurius crudus ; ejus decoctum, vel præparata officinalia, quæ opportunè cathartici sociantur. Nec inutilem, pro re natâ, opem præstant antispasmodica, nonnullaque alia remedia, de quibus suprà in capitulo cognomine. In subsidium demùm veniunt *enemata* è decocto caricarum, è lacte & saccharo parata ; aliaque demulcentia quibus vermes alliciuntur, & inferiora versùs deturbantur. Nec despicienda *linimenta* è petroleo, oleo chamæmeli vel absinthii, laurino, &c. adversùs infantum vermes proficuis ; cum secretiora intestinorum adyta trans laxiorem partium contextum penetrare valeant.

Priusquàm manum è tabulâ amoveamus, haud abs re erit notare, infantes *ascaridibus* minime esse obnoxios ; rarissimumque esse sub hâc ætate *lumbricum latum* ; adeò ut de illo nusquàm fermè cogitetur, ni quædam frustra unà cum fæcibus excreta fuerint per podicem. Frequentiùs sanè in conspectum veniret hæc vermis species ; si, uti nonnulli opinantur, esset congenitus, vel hominis coætaneus ; quod rationi & experientiæ adversari videtur. De remediis adversùs taniam vel *lumbricum latum* adhiberi solitis, satis superque alibi actum fuit : cum igitur haud absimilia, habitâ ratione ætatis, infantibus præcipiantur ; hisce recensendis haud diutiùs immorabimur. Insuper mentio etiam subjicitur, inter morbos infantum numerandos, de vermibus umbilicalibus, qui nil aliud sunt quàm *lumbrici* per umbilicum, uti suprà notavimus, exitum sibi parantes. *Crinones* demùm & *cirones* ad morbos cutaneos spectant.



TUMOR
ET
INFLATIO
ABDOMINIS.

TUMOR ET INFLATIO ABDOMINIS.

A D U P L I C I ut plurimum *causâ* ultrâ modum tumet imus venter infantum ; à flatulentia nempè, vel à viscerum infarctu : utriusque statûs *signa* alibi tradita consultò prætermittimus. *Periculo* vacant *flatus* in tubo intestinali incarcerati , dummodò certis terminis coërceantur ; sed ab hisce plus æquo luxuriantibus hernia tum umbilicalis , tum inguinalis promoveri potest ; ut de aliis in abdomine læsionibus , de quibus satis superque actum fuit , nil dicamus. *Ominosior* censerî debet renitens abdominis prominentia , ab infarctu skirrhuso viscerum ; quæ apud nostrates *carreau* audit. Vulgatissimam in mesenterio sedem habere hunc morbum neminem fermè latet : cur fit ut obturata , aut plus æquo constricta vasa lactea appellenti chylo ingressum planè denegent. Hinc minime mirum , si infans hoc rore nutritio orbatus sensim macie conficiatur : sub quâ rerum conditione subtumida pallet facies , cum habitu corporis œdematoso. His accedunt tristitia , inappetentia , tarditas ad motum , pervigiliæ , dolores circa umbilicum , sitis & febricula serotina. Nonnulli demùm in rhachitidem incidunt. Alvus sub primis morbi temporibus dura , sensim solvitur , succedente alvi fluxu pertinacissimo , qui pro symptomate letho finitimo jure habetur.

Rheo , aliisque *blandioribus catharticis* , domari solet ventris *protuberantia à flatibus* : nec inutilem opem præstant , quidquid in contrarium adducant nonnulli recentiores , vulgatiore *carminantia* ; pulvis nempè florum chamæmeli , vel seminum anisi , oleum ejusdem seminis , aliaque id fortis , quæ sedantium vices explendo , flatuum expulsionem egregiè favent. Intereà haud posthabenda sunt diluentia , quæ cæteris præfidiis obsecundare videntur. Profunt insuper fœtus emollientes , non secus ac enemata ex iisdem plantis parata. Quod spectat tumorem abdominis , vel infarctum viscerum skirrhusum , à fructibus immaturis , aliisque pravis alimentis , à verminosâ progenie , eruptionibus retropulsis , vel scrophulosâ labe prognatum ; alius adhibetur *curandi modus* : præcipiuntur scilicet alibi tradita remedia quæ obstructions referare valent , inter quæ , priùs instituto congruo regimine , primatum ducere videtur , sub infantia , sal martis Riverii. Identidem præscribi debent blandiora cathartica ; rheum scilicet , manna , tamarindi , sal glauberianum , arcanum duplicatum , &c. aquæ demùm minerales , præsertim martiales , hanc curationem claudere solent. Opportunè etiam admoventur , inter morbi decursum , fœtus emollientes & resolventes ; epithemata cum felle bovillo , fuligine & aloë parata , varia emplastra officinalia incidendi vi prædita , &c. Nec omittendum ergà lactentes nutricis conductitiæ examen , cum à lacte pravi indolis originem plerùmque trahat hic affectus.

HERNIÆ ET UMBILICI PROMINENTIA.

HERNIÆ ET
UMBILICI
PROMINEN-
TIA.

AB ejulatibus & gannitibus, à tussi, flatulentiâ, &c. intestina sub infantili ætate à propriâ sede sæpiùs dimoveri, jam suprà inculcavimus. Nil mali portendit *intestini delapsus*: facillimè enim repellitur hisce tubus, & vulgatissimis *subligaculis* continetur. Sed opus est cæteris præsidiiis, ut præcaveatur alter descensus. Proficuè in hunc scopum imponitur cataplasmata è farinâ fabarum & oxymelle paratum: nemo nescit celebratissimum, sub hoc rerum statu, olim fuisse emplastrum, ut inquiunt, *du Prieur de Cabrieres*; nec desunt alia adstringentia, quæ ejus vires æquare valent. Sed inefficacia censerì debent hæc topica vel exquisitiora, ni infantes per mensem integrum & ultrà, quantum licet, decumbant. Pluris olim etiam habebatur spiritus salis ad nonnullas guttas potui mixtus, dùm pro arcano à prædicto Authore venditabatur: sed ubi regis munificentia publici juris fuit, brevi, mirum dictu, ab usu fermè recessit.

Ad *umbilici prominentiam* pronos esse recens natos nemo nescit, præsertim si funiculus umbilicalis, obstetricis incuriâ, haud ritè deligatus fuerit. Haud rarò congenitus est hic tumor à prolapsu intestini ortus, adeò ut sub hoc casu eveniat, ut quædam tubi intestinalis portio ligatura ab insciis mulierculis constringatur, quæ scilicèt cum putrescente funiculo decidit: hinc emergit *foramen patulum*, quod fecibus alvinis egressum largitur, cui infortunio vix mederi potest ars chirurgica sub primâ infantia, sed ubi labentibus annis robustiores evadunt infantes, hoc tædioso morbo facilè liberantur, prædictum vulnus cruentando, ut in suppuratum abeat; & dein solitis auxiliis accedente glutine nutritio ferruminatur. Ubi verò, ut in orbitam revertamus, *phlogosis corripitur tumor umbilici*, proficuè imponuntur cataplasmata emollientia vulgatiora, emplastrum de spermate ceti, unguentum rosaceum, album Rhasis, populeum, ceratum, &c. Si in ulcus facessat prædicta prominentia, in usum vocantur collutiones ex aquâ calcis, aquâ plantaginis aluminosâ, &c. Admoventur etiam unguentum diapompholygos, emplastrum de cerusâ, pulvis ligni cariosi, aliaque exsiccantia. Non secùs ac demùm in herniâ umbilicali, congruo subligaculo munitur pars extùs prominens.



CALCULUS
ET
ISCHURIA.

CALCULUS ET ISCHURIA.

A *LITHIASi* haud immunes esse ipsosmet lactentes, & à parentibus in prolem transmitti hunc dirum morbum, multiplici experienciâ constat. Sed ægrè innotescit hæc ægritudinis species sub hâc tenellâ ætate, ni adhibeatur *catheter*, vel *digitus in anum* immittatur. Calculum in vesicâ latitantem conjicere licet, si stranguriâ torqueantur infantes, & nonnisi guttatim inter fletus & clamores prorumpat urina. Sexennes, & natu majores, penem tandiù manibus distrahunt & torquent, quandiù urgent dolores; adeò ut hâcce *notâ* sæpissimè in propatulo se sistat hic affectus; aliàs obscurus, & reconditæ indolis; ni traditis explorationibus submittantur ægri. Nil proficiunt exquisitiora lithontriptica sub infantili ætate: solâ *lithotomiâ* domari potest hic sævissimus morbus. Sed hâc arte sublato calculo, extrâ aleam minime ponuntur infantes, cùm alterius lapidis impendeat genesis, ni congruo regimine & largo præsertim aquæ potu prævertatur.

Ischuriam sæpiùs post se trahere calculum vesicæ, neminem vel rudem & inexpertum fugit; quid tùm opus est factu suprâ declaravimus. Sed à variis aliis causis altioris sanè indaginis sufflaminatur lotium, quas assequi sæpiùs minime licet: cur fit ut, hisce inextricatis, medendi judicium dirigi nequeat. Inter hæc angustias viam ad *curationem* variis tentaminibus sibi parare solent clinici. Pluribus sanè infantibus mingendi difficultate conflictatis prosunt demulcentiæ: sed noxam inferre potest largus aquæ potus, si obici solvendo impar sit; sub quâ conditione solus catheter cruciatibus infantum occurrere potest: summè deprædicatur, nec immeritò cataplasmata è parietariâ confectum; suis etiâ viribus pollent cepæ contusæ & hypogastricæ regioni admotæ. Nonnullis arridet linimentum ex oleo scorpionum paratum, ut innumera alia remedia suprâ tradita, interna vel externa missa faciamus.



ANI PROLAPSUS ET HÆMORRHOIDES.

ANI PRO-
LAPSUS ET
HÆMOR-
RHOIDES.

ANI *procidencia* obnoxios esse infantes neminem fugit : nec latet facillimè in pristinum situm reponi intestinum , solâ scilicèt clunium compressione , vel beneficio digiti butyro vel oleo inuncti. Sed aliud incumbit munus , ut scilicèt laxiorum partium tonus restituatur in integrum ; hanc opem præstant infusum vinosum rosarum rubrarum , decoctum plantaginis & absinthii , gallæ & corticis granatorum , quibus addere licet alumen ; vel immittitur suppositorium è gossipio confectum , sanguine draconis , mastiche , aliisque materiebus *adstringentibus* in pulverem redactis conspersum. Requiritur postremò ut infantes è cunis excessi , recto corpore , quantum licet , alvum exonerent. Hæc sunt auxilia adhiberi solita adversùs hunc podicis morbum ; cujus tamen curatio à solertioribus naturæ plerùmque committitur ; cùm haud dubitare liceat quin labentibus annis sponte coërceatur hic affectus , qui aliàs nulli ætati parcit.

Inter morbos hæreditarios nonnunquàm sunt recensendæ *hæmorrhoides* : hinc minime mirari subit , si quidam infantes hoc morbo corripiantur. Rarissimè sub hæc ætate extrùs prominent hæmorrhoides ; sed situm internum plerùmque habent ; cur sit ut ægrè innotescant ; ni sanguinem inter egerendum fundant. Nec semper morbi characterem prodit hoc cruoris profluvium , quod pro fluxu dysenterico habere solent incauti , vel imperiti. Nullam aliam præter diæteticam expostulat curationem hic morbus ; cur , ritè composito victûs regimine , danda est opera , ut quieti se tradant , quantum fert ætas , infantes. Nec tamen vetantur *demulcentia externa* , si pruritu & doloribus divexentur ægri , uti in plerisque accidit : sub quâ conditione adhibentur fots ex aquâ tepidâ , è decocto emolliente , vel lacte parati. Hanc etiam molestam sensationem compescere licet cum butyro & oleo ovorum , unguento de althæâ , populeo , &c. Hæc de affectibus levissimis dicta sufficiant ; ad graviores deveniamus.



EPILEPSIA
ET
CONVULSIO.

EPILEPSIA ET CONVULSIO.

NUM distinguendi sint in infantibus hinc affectus, jure dubitarunt plures primi subsellii Authores. Usus tamen invaluit, ut *epilepsia*, Occitanis & Gallo-Provincialibus *goutteto* vocitata, hæc audiat convulsionis species, quæ intra septem primos à nativitate annos periodicè recurrit, & à causâ pertinaci pendere videtur: dùm *simplex convulsio* causam fugacem agnoscit, atque omnes ætates respicit. Hunc pertinent *pavores nocturni*, ab incubo fortè minime discrepantes, quibus obnoxii sunt lactentes: apud omnes enim ratum & sufflaminatum manet merè spasmodicum esse hunc affectum; licet pectori vel stomacho referatur; vel à quâvis nervorum læsione oriatur. Liquet porrò inter *epilepsia prodromos* numerari pavores nocturnos; non secus ac oscitationes, vigilias, urinam viridem, &c. Brachiorum tremor, concussio & rigiditas; inconditus oculorum motus, cum integrâ sensuum abolitione *epilepsiam produunt*; quæ septennes rarissimè invadit: sed si prius accesserit, ad pubertatem protrahi solet. Hujusce morbi stadium septem mensibus, vel totidem annis, contineri, sunt qui velint. De quâdam convulsionis specie, recens natis familiari, mentionem subjiciunt Authores, quæ maxillæ inferioris musculis insidet, & *trismus* vocitatur: sed hunc spasmus presso pede sequitur tetanos; hinc malè distinguuntur prædicti affectus, ut plurimum lethales.

Epilepsiam & convulsiones promoyent dentitio, vermes, aliæque materies intestina laceßentes. Sed solas convulsiones concitare videntur cathartica aciora, acerba tormina, morbi acuti & graviores, &c. Utrumque morbum spasmodicum à dentium progerminatione oriri haud falsò conjicitur, si infantes vomituriant, & fæces subvirides, inter alvum solutum, egerant, &c. Infantes molliter curati, & quorum alvus est adstrictior, ad *epilepsiam procliviores* videntur. Natales etiam sumit hic affectus ab inconditâ matris, inter prægnationem, victûs ratione: contrahitur demùm à nutricibus hysteris, utero gerentibus, mœrore confectis, irâ percitis, &c. Notare juvat plures infantes in hunc morbum incidere à terrore, quem suis figmentis, & fabellis, illis incutiunt mulierculæ. Acoribus & favis laborantes rarò *epilepsia* corripuntur; ni intus repellatur hæc eruptio. Postremò eò periculiosior censeretur epilepsia, quò minùs à nativitate recedit; paroxysmis præsertim crebrò recurrentibus.

A benè perspectis causis evidentibus, uti solemne est in cæteris morbis, dirigi debet *curandi ritus*. E præhabitis colligitur hunc affectum sæpissimè promoveri, vel foveri à faburrâ in primis viis nidulante, hinc patet cur inter præstantiora remedia numerentur *emetica*; tartarus nempè stibiatus, kermes minerale & ipecacuanha: sed extrâ paroxysmum exhiberi debent, ni urgeat necessitas, & periculum sit in morâ: ratione ætatis

componendam esse dosim evidens est; ideò præscribuntur quarta, tertia, dimidia, &c. pars grani emeticorum mineralium: ut nonnulla radicis brasiliensis grana: pluris habentur cathartica, inter inducias etiam usurpanda, in quorum censum veniunt diacrydium, jalapa, pulvis cornachinus, mercurius dulcis: ad everrendas enim pravarum digestionum reliquias inepta videntur laxantia, quæ lubricas intestinorum vias celerius peragraræ solent. Faustè demùm nonnunquàm succedit venæ sectio sub insultu; nec mirum, cum convulsiones ab spontaneâ hæmorrhagiâ sæpiùs solvantur: rarissimè tamen adhibetur illud præsidium pro lactentibus.

Absorbentia & anthelmintica, ut in eâdem pergamus, mira præstare solent; usitatoria audiunt testacea, corallium & corallina, lapilli cancrosum fluviatilium, putamina ovorum calcinata, & magnesia. Circà usum prædictorum remedium notare expedit, quod, etsi alvum comprimendi vi pollent, contrarium tamen sub infantia effectum exerant: quod phænomenum à quodam sale neutro, ob coëuntia absorbentia cum materiebus acidis, in primis infantum viis stabulantibus, pendere videtur. Consultum evacuantium & absorbentium usum opportunè excipiunt *antispasmodica* vulgatiore; flores nimirum tilie & galli lutei; radix valerianæ sylvestris, cortex peruvianus, castoreum, succinum & theriaca; sed pulvis de gutteta in omnibus officinis prostantes ceteris præstare videtur. Notare juvat circà hæc postrema remedia, nutricibus nonnunquàm exhibenda fore, pro infantibus ætate, temperie, vel quâvis agitudine, debilioribus; uti de quibusdam aliis medicaminibus, jam suprà inculcavimus.

Hæc sunt auxilia, quæ imminuentem accessionem avertere queunt: sed allaborandum *vigente paroxysmo*, ut fugetur vel leniatur. *Prodest* sub hoc statu spiritus succini vel cornu cervi, è quâvis aquâ cephalicâ intus exhibitus: sed efficaciora videntur *remedia externa*. Naribus nempe insufflatur pulvis florum tilie, radicis lilii convallium, foliorum betonicæ, salviæ, lavandulæ, &c. Proficue injiciuntur enemata acriora & purgantia, vel antiepileptica; faustè admoventur cucurbitulæ, nec posthabendum linimentum ex axungia castorei paratum, & seriei vertebrarum admoventum, &c. Quod ad vesicatoria, cauterium & setaceum attinet, futilia censerì debent adversùs vigentem paroxysmum, eò quòd suum effectum tardiùs exerceant: sed pluris habentur inter inducias, & nil fortè efficacius excogitari potest. Futilia insuper censerì debent omnia præsidia medica, si constet de pravo lacte: quid tùm sit agendum nemo non videt.



APHTHÆ.

A P H T H Æ.

SIC nuncupantur *ulcuscula*, passim *in ore occurrentia*, quæ pustulas subalbicantes & vesiculares excipiunt. Latiùs quandòque propagantur aphthæ, quæ œsophagum, ventriculum & intestina, non secùs ac tracheam & bronchia, haud sine præsentis vitæ discrimine, nonnunquàm invadunt. Aphthæ, quibus præsertim *obnoxii* sunt recens nati, pro periculi experibus habentur, si circà limbum rubeant; pessimi verò moris censentur, si nigrescant & latiùs serpent, & altiores foveas sibi cudant; adeò ut ipsamet ossa nonnunquàm attingant: sub quâ rerum conditione imminet gangræna, quâ sanè itur ad astra. Aphthæ igitur vulgatiores & ore coërcitæ, minimè sunt *pertimescendæ*, & faciliè evincuntur: sed ubi œsophago infiguntur, ad ventriculum & intestina se spargere solent; hinc suboriuntur febris, tormina, diarrhœa, dysenteria, aliique graviores morbi: si verò laryngem subeant, & ad tracheam, bronchia & pulmones diffundantur; tussim ferociorem, spirandi difficultatem, aliaque truculentiora symptomata concitant. Vinum à nutricibus liberaliùs sumptum; harum atræ curæ, gravioresque animi perturbationes, fordes in stomacho infantum nidulantes, verminosa progenies, &c. sunt totidem hujusce morbi levioris *causæ*. Sed periculosior cenferi debet, si à viru venereo, scorbutico, &c. ortum mutuetur.

His præmissis facilis patet ad *curationem* aditus. Ritè igitur composito nutricis regimine, danda est opera ut foràs eliminentur primarum viarum fordes: hoc munus sanè præstant emetica, si vires sinant, exhibenda. Aliàs egregiè & blandiùs se gerunt *cathartica*; inter quæ rheum, vel syrupus ex hac radice paratus, cæteris antecellere videtur. Multùm profunt *absorbentia*, sub primarum viarum saburrâ acidâ: nonnulli conferre queunt hypnotica cautè adhibita; ac pro re natâ, vel benè perspectis morbi phænomenis, in usum vocantur diaphoretica & antivenerea, antiscorbutica, &c. Sed rarò, ut verum fatear, adhibentur prædicta remedia adversùs affectum, qui vel sponte evanescit; vel nonnullis topicis faciliè domatur: hæc versantur circà *detergentia* & *exsiccantia*: itaque paratur lotio è vino tepido, aquâ hordei, vel decocto foliorum pervinçæ; quibus opportunè adduntur mel rosaceum, syrupus de rosis siccis, spiritus vitrioli, &c. Aliàs prædicto spiritu, aut essentiâ Rabel, penicilli ope, attinguntur hæc ulcuscula. Imminente verò gangrænâ, simili modo admoveretur balsamum myrrhæ, oleum tartari per deliquium, &c. Adhibetur demùm tinctura laccæ, adversùs aphthas scorbuticas. De anginâ gangrænôsâ, aphthis mali moris contemînâ, ad quam etiam proclives sunt infantes, satis superque suo loco.

D E N T I T I O.

NEMINEM latet dentes incisivos, caninos, & binos molares frequentes, in utrâque maxillâ, intrâ spatium duorum circiter annorum, sub nomine *dentium lacteorum*, nostratibus *dents de lait*, numero viginti erumpere: tertium molarem utrimque circâ septimum annum forâs prominere: cæteris verò in propatulum venientibus circâ undecimum vel duodecimum ætatis annum; si tamen excipias postremos molares, qui haud se produnt ante decimum octavum vel vigesimum annum; imò & seriùs: nec desunt in quibus per totum vitæ curriculum planè desiderantur. Scitur etiam viginti primos dentes renovari à septimo ad decimum quartum vel decimum quintum ætatis annum. Circâ sextum vel septimum à nativitate mensem prodeunt, in plerisque primi incisivi, & dein cæteri, suo ordine; à quo tamen nonnunquàm deflectunt canini: notare insuper juvat, dentes maxillæ inferioris, superiores vulgò anteire. Hic est *genuinus naturæ processus*; quæ aliàs circâ dentium eruptionem diversimodè ludit; adeò ut de hac re nil certi tradere liceat. Nec certiora sunt dentitionis phænomena: in pluribus enim molestissimum est illud naturæ conamen; dùm faustè & placidè, vel insciis nutricibus, in aliis perficitur.

Acerbissimis doloribus plerùmque torquentur infantes, dùm *dentium rudimenta* incrementum in alveolis capeffunt; sub quo rerum statu, non-nihil *tument gingivæ*. Haud tamen hisce cruciatibus indefinenter anguntur infantes; cum identidem sedentur & efferantur, donec à gingivâ planè liberentur dentes. Majorem sævitiem exercent canini præsertim maxillæ superioris: cur minime mirari subit si atrociora in quibusdam emergant symptomata tribus vel quatuor antè conspicuam eruptionem mensibus; sub quibus circumstantiis tument & dolent gingivæ; os æstuat, & sitis urget. Spontaneo naturæ motu, digitum gingivis admovent infantes; vel puerile crepitaculum mordent; nec papillæ nutricis parcunt. Saliva inter dentitionem uberiori proventu manat, promovetur vomitus, concitantur tormina; alvus solvitur cum dejectionibus subviridibus. In nonnullis excandescit febris; gingivæ & amygdalæ phlogosi corripuntur; nec rarò in suppuratum abeunt: erumpunt pustulæ quæ in aphthas facessunt; tument labia, & fissuris defœdantur; atque exsurgit tussis: quibus addere licet ejulatus nullâ arte compescendos, pavores inter somnum, vigilias, convulsiones, &c. ut de imminente rhachitide fileamus. His sic se habentibus, rem esse *periculosa aleæ*, nemini haud obvium: sed in majori vitæ discrimine versari infantes obesos, plethoricos;

DENTITIO.

quorum caput est mole amplius , & aivus compressa , experientiâ constat.

Dentitionem merum esse naturæ opus , quod haud citrà periculum perturbare licet , nemo non intelligit : sed haud vetantur *auxilia* quæ huic favere queunt. Primò gingivarum relaxationi & mollitiei studendum : in quem scopum adhibentur butyrum , medulla vituli & axungia gallinæ , quæ sint instar omnium. Cerebrum leporinum deprædicant nonnullæ mulierculæ , plusquàm decet sciolæ. Suas laudes merentur aqua mulsa , mucilago seminum cydoniorum , & caricarum decoctum , ad oris lotionem. Cautè admoto digito per vices premitur gingiva ; vel infantibus mandenda præbentur frustum liquiritiæ , vel radices althææ ; cereolus , puerile crepitaculum , &c. Sunt qui velint in re urgentiori gingivam incidere ; & dein aquam mulsam lotionis instar adhibere : sed hæc duntaxat congruit operatio circà postrema dentitionis tempora ; dùm scilicèt imminet dentis exitus ; aliàs impendet gangræna : nec desunt temerarii Chirurghi qui ad hanc scarificationem inconsultò sese accingentes hoc accersunt infortunium. Intereà sub febre vehementiori & truculentis symptomatibus , sanguinem mittere juvat : profunt sanè *blandiora cathartica* , *silentibus doloribus* : suam opem etiam præstare valet emeticum in re urgentiori : sed haud nisi summâ cautelâ , & inter inducias , in usum trahenda veniunt hæc præsidia ; quæ aliàs gravem noxam inferre queunt. Narcotica à nonnullis decantata à sanioribus planè vetantur ; hinc cautè esse adhibenda , consuetarium manet. Pluris habetur sub hoc statu infusum florum tilia pro potu , cui addere licet tantillum lactis. Tutiùs verò præscribitur syrupus de papavere rubro , qui hypnoticorum vices supplere valet. Haud nostratibus arridet spiritus cornu cervi , quem ad guttas duas vel tres familiarissimè sub hac conditione adhibebant SYDENHAMUS & BOERHAAVIUS ; de quo tamen remedio ulteriùs inquirendum esse censemus.



HYDROCEPHALOS.

HYDROCE-
PHALOS.

NIL aliud est quàm *colluvies serosa*, quâ *caput in majorem*, ac nonnunquàm stupendam, *molem* assurgit; adeò ut nonnunquàm portentose rumens caput residuo corpori præponderet. Infantes præcipuè respicit hic affectus; licet ab hoc haud planè immunes sint adulti, imò & senes. Sed hoc nomine minime insigniri debet hydrops cerebri vulgatissimus, quo caput nusquàm ampliorem magnitudinem assequitur. A capitis contusione, inter partum difficilem, vel ab aliâ causâ suboriri solet hydrocephalos; qui aliàs natalitia ducit à dentitione, vermibus, convulsionibus, &c. *Variam sedem* habet hæc feri stagnatio; quod nunc sub cute capillitiâ colligitur; nunc intrâ pyxidem osseam, inter scilicet cranium & duram meningem, & curationem admittit; vel cerebri involucris coërcetur, circâ hoc viscus fluctuans; vel omnes ejus recessus implens; & pro immedicabili habetur. Debiliores & languentes, somnolenti & stupidi sunt infantes hoc morbo laborantes; pallet horum facies; dentes tardiùs erumpunt; prominent oculi, cum pupillâ ampliore: quasdam motiones spasmodicas patiuntur os & palpebræ: sæpiùs strident dentes. Nonnulli cæci evadunt, quidam spinâ bifidâ laborant. Hæc omnia demùm excipit somnolentia, quæ stagnationem per cerebrum diffusam arguit.

Variam capitis stragem exhibet *sectio cadaverum*. In conspectum enim veniunt hiantes ossium vacillantium commissuræ: nec rarò accidit ut quædam ossa facilè extrahi queant, ab hærentiâ duræ matris & pericranii planè libera. Reperiuntur meninges solito crassiores, & septum falci-forme, non secùs ac cerebelli sepimentum, planè callosum. Oculis sub-jicitur cerebrum nunc uvidum & flaccidum; nunc à circumambiente aquâ densum & firmiter ita contrahitur, ut mali magnitudinem vix superet: aliàs ventriculis ab aquâ hùc collectâ ultrâ modum dilatatis utrumque cerebri hemispherium in fastigium ità attollitur, ut ejus compages circâ ambitum vix sex linearum crassitudinem assequatur, & depressa medulla oblongata quasi oblitteretur: tanta est quandòque cerebri extenuatio à comprimente aquâ, ut in nonnullis planè deficere videatur hoc viscus. Nec medullæ spinali parcit serosa colluvies, usque ad os sacrum effusa, circâ quod nonnunquàm erumpit tumor aqueus. Reperitur insuper plexus choroïdes in glomeramen contractus, & hydatidibus refertus. Se offerunt glandula pinealis mucaginosa & avulsione diffuens; glandulaque pituitaria compacta & skirrhosa, &c. è quibus luce clariùs patet *periculosum* imò & lethalem esse hunc affectum; multi-

HYDROCE-
PHALOS.

plici experiētiā constat infantes hoc morbo correptos in utero materno ; inter partum ut plurimum enecari. Ut omnia postremò in unum contrahamus , indomabilis sanè est hydrocephalos , ubi cerebrum aquā obruitur : sed si sedem externam habeat , opportunis remediis impugnari , & evinci potest.

Circà evacuantium , aperientium & roborantium usum versatur , ut alibi fusè tradidimus , cujusvis hydropis speciei *curatio*. Haud absimili methodo pertractatur hydrocephalos : inter cathartica sub hoc casu usitatoria recenseri debent rheum , jalapium , diacrydium & mercurius dulcis. De diureticis , aperientibus , hepaticis & roborantibus , de quibus satis superque suprà , nil addimus. Nec improbantur nonnulla *medicamina externa* : admoventur scilicèt resolventia & discutientia ; hisce viribus pollent foris ex aquā calcis sincerā , vel cum aquā vitæ mixtā , è decocto florum chamæmeli , sambuci , stœchados , betonicæ , &c. parati. A multis deprædicatur unguentum ex oleo chamæmeli & sulphure confectum ; ut de aliis innumeris , ex scriptis medicis eruendis , sileamus. Sed levem vel inutilem , ut verum fateamur , opem præstant hæcce topica ; quibus sanè præstant vesicatoria , cauteria & setacea , quæ , præmissis congruis remediis internis , egregium effectum edere queunt.



R H A C H I T I S.

AD hunc morbum proclives sunt infantes à nono ætatis mense ad tertium annum ; rarissimè enim citiùs vel tardiùs ingruit hic affectus , quo igitur planè immunes censerì debent qui annum quartum incolumes assequuntur. *Rhachitis* , nostratibus *Noeure* , *prænuntiatur* crurum debilitate , quodam omnium partium torpore , præmaturo ingenio , capitis amplitudine , artuum extenuatione , molestâ & longiori dentium eruptione , qui ubi in conspectum veniunt , brevi defœdantur. *Hunc produnt affectum* nodi , vel artuum prominentiæ , protuberantes vertebrarum apophyses , tumores in connexionibus costarum cum sternò ; coxarum , crurumque incurvatio , ac prava pectoris conformatio : intereà læduntur pulmones , exsurgit tussis , urget spirandi difficultas , febris excandescit , alvus solvitur , ossa carie læduntur , æger macie conficitur , in hydropem incidit , & ad ultimam rerum lineam properat. Sed rhachitidem haud semper concomitantur hæc infortunia , quin potiùs leve incommodum in plerisque creat , & post solitum stadium sponte curatur , vel auxiliis medicis facilè cedit. Infantes verò , qui ab hoc affectu minime liberantur ante septimum ætatis annum , vitream per totum vitæ curriculum trahunt valetudinem , atque deformes vel distorti remanent. Hanc ægritudinis speciem

speciem *prosapiam* ducere à parentum vel nutricis , viru scrophuloso , venereo vel scorbutico , variis rationum momentis conjicitur , nec adversatur experientia. A patre senescente , valetudinario , ærumnoso , voluptatibusque soluto , nati ad rhachitidem *proclives* censentur. Contrahitur demùm ab achorum & favorum , non secùs ac affinium eruptionum cutaneorum retrogressu ; ac demùm à præposterâ variolarum , alteriusve gravioris morbi medicatione. Multiplicem patefaciunt stragem *secta cadavera* ; viscera scilicèt , tùm pectoris , tùm abdominis deprehenduntur infarcta , phlogodea , skirrhusa & putredine confecta. Hanc labem imprimis ostendunt pulmones pleuræ accreti , & tuberculis scatentes : deteguntur stagnationes in cerebro , medullâ spinali , thorace , &c. visenda se præbent intestina ultrâ modum distenta , mutuò connexa , &c.

Rarò venæ sectionem efflagitat rhachitis , sed præsentaneam opem ferunt *emetica* & *cathartica* , identidem repetita ; rheum præcipuè inter hæcce postrema primatum ducere videtur. Pluris habentur *aperientia* , rubia nempè tinctorum , curcuma , aselli & martialia : hæc sæpiùs opportunè excipiunt *incidentia* ; antimonialia nimirùm & mercurialia : suis etiam viribus pollent cassia lignea , elixirium proprietatis , cæteraque *roborantia*. Pro re natâ in subsidium trahuntur veronica , tussilago , herbæ capillares , aliaque bechica. Suas laudes etiam merentur nasturtium , cochlearia & cætera antiscorbutica. Nec despicienda , si nil obstet , diaphoretica , guaiacum scilicèt , china radix , &c. His obsecundant *remedia externa* ; conferunt scilicèt enemata emollientia & demulcentia , si renitens abdomen in altum elevetur. Celebrantur frictus in dorso & artubus , cum linteis aromatum funio imprægnatis. Proficuè adhibentur fots & balnea è decocto salviæ , thymi , rorismarini , lavandulæ , baccharum juniperi & lauri ex vino parata. Suis viribusetiam pollent linimenta ex oleo laurino , unguento martiato , aliisque roborantibus confecta. Inter præstantiora demùm topica numerantur cauteria & vesicatoria , occipiti vel dorso admota. His addere licet balnea frigida à pluribus celebrata ; sed experientiâ constat noxam nonnunquàm intulisse. Pluris postremò interest , sub rhachitidis curatione , ut infantes congruo submittantur regimini , & variis obambulationibus in loco edito & aprico se exercean , &c.



MORBUS
COXARIS.

MORBUS COXARIS.

SUB hoc titulo intelligi volumus, facem præferente clarissimo exper-
tissimoque DE HAEN, hunc multigenum *coxendicis affectum*, nulli ætati
parcentem; sed infantes præcipuè respicientem, qui non solum *clau-
dicationem* vel *cruris impotentiam* post se trahere; sed plures etiam ad
ultimam rerum lineam ducere solet. Morbum coxarem minantur con-
tusiones à casu ab alto, ictu, aliâve quâcumque causâ: hunc etiam *pro-
movent* improba virium conamina, saltationes, aliave ludibunda corpo-
ris exercitia. Hoc infortunium denuntiant dolores artui insidentes, quos
nonnunquam excipit partis intumescencia. *Causis internis* etiam submit-
titur morbus coxaris; hunc enim pariunt affluxus humorum in hanc
partem sub morbis acutis, nec rara est hæc metastasis in variolis; labes
rhachitica, scrophulosa, scorbutica & venerea; ac demùm in provectâ
ætate diathesis arthritica & rheumatica: aliàs à causâ externâ concitatus
ab humorum dyscrasiâ fovetur. His addere licet ossium pelvis diductio-
nem; præsertim respicientem infantes rhachiticos; non secus ac mulie-
res sub ultimis graviditatis mensibus: non solum à se invicem sejungun-
tur ossa pubis; sed etiam ossa innominata ab osse sacro, cui arctissimè
hærebant, etiam dimoventur; undè fit claudicatio alterutrius, vel utrius-
que lateris: imò sæpiùs sub hoc infortunio, motu planè orbantur artus.
À ligamentorum contusione, collisione, distractione, quâvisve violentâ
elongatione, non secus ac luxatione & fracturâ dolorem emergere acu-
tum, quem sequitur humorum defluxus, vel genuina phlogosis, ne-
mini haud obvium. *Resolutione* plerumque *solvitur* hic affectus, dum-
modò haud naturæ viribus obstant inopportuna remedia: aliàs pus inibi
conficitur, undè dolores ferociores, febris lenta & tabes. Difficiliùs re-
solutione judicatur hic humorum decubitus à materiæ morbosæ transla-
tione inter morbos acutos, variolas nempè, febrem malignam, putri-
dam, &c. vel à rhachitide, scrophulis, alterove viru progenitus: undè
emergit tumor plùs minùsve conspicuus, qui seriùs ocyùs purulentiam pro-
moveret ad exteriora vergentem. Cur minime mirum, si abscessus in plerisque
ingens ossis connexioni, partibusque huic famulantibus, summam labem
inferat. Solutis ab hâc putredine ligamentis, è suâ sede sensim deturbatur
femoris caput, & crus ab hâc luxatione paululùm primò elongari solet, ut
brevius postea evadat. Claudicationem oriri à breviori crure nemo non
videt; sed alia est causa, nempè dolor, præ quo, cruri affecto incumbere
nequeunt agri.

Obscura sanè & intricatissima est, inter vitam, hæc genuina labes

organica, quæ in aprium venit post obitum: exhibent enim *cadavera* femoris luxationem; cujus caput, ligamento terete plus æquo elongato vel disrupto, ex acetabulo depulsum, diversam obtinet sedem, superiorem vel inferiorem, anteriorem vel posteriorem. Foveæ crepidini plerumque hæret prædictum caput, & ankylosi in unum corpus cum acetabulo coalescit. Hoc cavum nonnunquam replet, quoddam corpus glandulæ faciem præ se ferens. Ab accubitu colluviei purulentæ ad prædictas partes, ossa suis cartilaginibus & periosteo orbantur, carie læduntur, & in fœdissimam putrilaginem haud rarò abeunt. Simili ratione conficiuntur ligamenta, quorum sæpius ne minimum quidem vestigiumprehenditur. Longè latèque in plerisque serpit hæc spurcicies; quâ totum femur haud rarò defœdatur. Notare tamen expedit pus nonnunquam inibi stagnare citrà vicinorum erosionem, ob fortè blandiorem hujusce laticis indolem, vel breviorē moram. Reperitur demùm præter traditam stragem, femur in cervice fractum, capite in acetabulo remanente: frequentius verò occurrit in juniorum cadaveribus epiphysis ab osse soluta. Insuper deprehenduntur ossa pelvis mobilia; ossium scilicet pubis connexio soluta; os ilium ab osse sacro dimotum; exostosis è prædictis ossibus erumpens; ac caries vertebrarum, ossis sacri, &c. Pulmonum denique, hepatis, pancreatis, omenti, mesenterii, cæterorumque viscerum læsiones, à pure sanguini remixto, uti videtur, ortas, consultò prætermittimus.

Omni Medicorum industriam superat hic morbus ad certum gradum provectus, dum scilicet de purulentiâ & ossium carie constat: sub quo statu sensim conficiuntur miselli ægri, donec ad plures abeant. Sed haud levis *sanitatis spes* elucescit sub primis temporibus, dum pars à naturali formâ minime recedit, & solo inter cruris motum dolore conquerruntur ægri. Nullâ tamen medicatione egent, sed quieti tradantur, imò & decumbant per unum aut alterum mensem, & ultrà, si res expostulet; ubi scilicet cautè exploratis cruris viribus adhuc claudicant, vel quidam inter motum cruris superest dolor: in subsidium etiam vocandam esse diætā congruam nemini haud obvium. Quibus addere licet balnea frigida, quæ inter roborantia externa principem locum obtinent; quæ præsertim congruunt ubi ligamenta femoris capiti implantata flexilia elongantur; & ossa pelvis ab invicem dimoventur: sub quâ rerum conditione, in suo situ contineri debent ossa præter naturam mobilia probâ deligatione vel fasciatione. Nec despicienda cætera roborantia externa, ut vinum aromaticum, vel mastiche imprægnatum; aqua Reginæ Hungariæ; unguentum martiatum, emplastrum stypticum, &c. Quod verò ad alia *præsidia* medica, vel *chirurgica* attinet, multiplici experiētiâ edocti, asserere minime dubitamus, quòd omnia vel exquisitiora topica resolventia, & præsertim usitatissimæ irrigationes ab alto, non solum humorum affluxui nusquam medentur; sed

MORBUS
COXARIS.

illos potiùs ad hanc partem allicere videntur. Hæc minime latent medicinæ proceres qui totum negotium naturæ committere solent ; dùm scioli , ineptâ & petulanti securitate suis tralatitiis remediis hunc morbum aggrediuntur ; donec ægris in deteriora ruentibus , ab infelici medelâ desistere cogantur.

Omnis verò salutis spes ferè præcluditur , si adsint purulentia notæ , cùm à diuturniori puris stagnatione , cartilagine & ossa carie absumantur , vel fœdissimâ putredine labefactentur. Sub quo casu nil non movendum ut tabum versùs cutem alliciatur ; quam opem præstant *emollientia & maturantia*. Ubi verò quidam fluctuatione , aliisve signis innotescit morbi fomes , nullâ morâ latum infligatur vulnus , ut pus foràs prorumpat. Sunt qui cauterium ad hoc opus adhibere velint ; sed hæc inustione tardiùs promovetur puris exitus , & debitæ sordidissimi ulceris fistulosi deterfioni obstat aditus angustior. Infaustum tamen in plerisque habet exitum uterque modus , ni incolumes sint partes abscessum ambientes ; quod rarissimè accidere suprâ noravimus. Inter hæc angustias pauca novimus *remedia interna* , si diætam lacteam excipias : silentio tamen minime premendum quod exquisitissimum sub hoc casu *antisepticum* præbeat cortex peruvianus ; quo scilicèt ad unciam semissem singulis diebus cum lacte caprino adhibito hunc desperatum affectum intrâ quatuor menses domavit suprâ laudatus DE HAEN , de praxi medicâ benè meritus : sed hunc corticem minime ferre queunt tussientes , quamcumque dosi exhibeatur. Lintea etiam hujusce corticis decocto imbuta admoveri jubet præclarus Author ; quod sanè citrà periculum experiri posse , credere par est. De cæteris præfidiis internis diversam humorum labem respicientibus , nil addimus.



MORBI CUTIS.

MORBI
CUTIS.

(I.) **H**AUD minùs obscura & intricata est in infantibus, eruptionum & efflorescentiarum cutanearum natura, quam sub aliâ ætate. Inter familiariores *TINEA*, nostratibus *la Teigne*, quæ variis apud Authores titulis insignitur: nunc enim *crusta lactea*; nunc *ignis volaticus*; *porrigo*, *furfuratio*, *scabies capitis*, *achores* & *favi*, &c. vocitatur. Nil aliud esse videtur tinea, quàm quædam herpetis squamosæ & corrodentis species, tetrum odorem in plerisque spargens; non solùm lactentium cutem capillitiam & faciem invadens; sed etiam in alias partes serpens. Sunt pustulæ vel vesiculæ, quæ ruptæ exulcerantur & in crustas diversi coloris, humidæ & siccas facessunt: ut plurimum confluunt in amplos corymbos quibus cutis, tum faciei tum capitis deturpatur. Hâc tamen eruptione rarò defœdatur ablactatorum facies, quæ præcipuam in teneriori ætate morbi sedem exhibet; sub suâ conditione, *rache ou feu volante* apud nostrates audit: sed sæpissimè exulcerata in utrisque prostat postrema aurium vicinia, quæ ichore perpetuò madet. Notare expedit quòd pro crustâ lacteâ à quibusdam habeantur hæ sordes pingues & humidæ, capiti recens natorum hærentes, quæ sensim in furfurem deciduum facessunt, nonnihil juvante olei vel butyri linimento.

Tinea, quæ omnes hos affectus cutaneos comprehendit, superficiem duntaxat cutis plerumque occupat, & *periculo planè vacat*. Variis vicissitudinibus vulgò submittitur, huic vel illi parti insidens; nec rarò periodo lunari inniti videtur; aliàs inordinate remittitur & recrudescit. Cuti capillitiæ incumbens foveas sæpius sibi cudit usque ad cranium, quod tum carie læditur. Hoc præsertim imminet infortunium, si à viru scorbutico, venereo vel scrophuloso foveatur tinea, quæ aliàs inter morbos salubriores recenseri debet; quâ scilicet vigente, aliis gravioribus affectibus immunes sunt infantes, imò & pancraticè valent. Cur sit ut ejus cura naturæ committatur, & omnia verentur topica exsiccantia. Majorem enim incutit metum ejus *subitaneus recessus*, vel spontaneus; cum plura ex hinc impendeant mala, tussis nempe ferociore, febris acuta, ophthalmia, diarrhœa torminosa, insultus convulsivi, tabes, phthisis, &c.

E præhabitis colligitur tineam duntaxat mali moris, quam *rascofino* vocitant Gallo-Provinciales, & à viru scrophuloso & syphilitico haud rarò pendet, *auxiliis medicis* impugnandam fore. Præmissis igitur generalibus, si opus sit, præscribi debent hepatica & depurantia; uti agrimonia, lappathum, fumaria, veronica, nasturtium aquaticum, &c. nec veratur sulphur, quod, uti nemo nescit, specificam vim obtinet, adversus varios

MORBI
CUTIS.

adultorum cutaneos morbos chronicos. Conducunt *cathartica* blandiora, epithymum nempè, syrupus de cichorio cum rheo, mercurius dulcis, &c. Post cautum & diuturnum horumce medicaminum usum, morbi primariâ habitâ ratione, ad exquisitiora devenire juvat; *diaphoretica* scilicèt & incidentia: hæc munia præstare valent scabiosa, carduus benedictus, vipera, kermes mineralis, antimonium diaphoreticum, sal volatile cornu cervi, æthiops mineralis, aliaque variam sanguinis & humorum labem respicientia. Huc etiam pertinent absorbentia, si fabutra acida in primis viis niduletur. Insuper quæcumque adversùs tineam adhibeantur remedia, procrastinanda est curatio, ne citiùs quàm par est evanescat hic affectus; sub quo casu nil non movendum ut revocetur: inter has angustias admove-
veri solent vesicatoria, ut humores noxii, sanguini remixti ad cutem all-
ciantur, & tineæ vices expleant.

Cautè inter hujusce morbi curationem adhiberi debent *topica*: planè exulare debent cujusvis sortis repercurientia: sed tutò admoventur emol-
lientia & demulcentia, si sæviat pruritus & crustæ obnixiùs hæreant: pro-
ficiè in hunc scopum usurpantur aqua althææ, oleum amygdalarum dul-
cium, cremor lactis, butyrum insulsum, folia betæ oleo rosaceo inun-
cta, &c. Haud improbantur insuper lotiones è decocto fumariæ, lapathi,
veronicæ, & chelidonii paratæ. Nonnulli deprædicant unguentum ex oleo
amygdalarum dulcium, & oleo tartari per deliquium simul ritè subactis
confectum. Prostant demùm in officinis varia unguenta cum sulphure &
mercurio parata, quæ solerti & cautâ manu pertractata, suas laudes me-
rentur. Notare juvat quòd materies pingues & oleosæ, à temerariis mu-
lierculis usurpari solitæ, haud citrà periculum faciei admoveantur, si cre-
morem lactis & butyrum excipias. Dùm hæc peraguntur apprimè atten-
dere debent nutrices ad manus infantum, ne inter pruritum hæc vulnus-
cula scalptu plus æquo cruentent.

Usitatissimum est in variis nosocomiis emplastrum è merâ *pice* confe-
ctum, quod derafis capillis capiti admoveretur, & post viginti quatuor
horas evellitur, haud sine magno infantum clamore; cum huic agglutinati
capilli hâc vi eradicentur. Dein demulcetur hoc vulnus cruentum cum
oleo ovorum, vel foliis betæ butyro oblitis; solitâ demùm arte exsiccan-
dum: iterùm si opus sit, imponitur prædictum emplastrum, quod fortè,
præmissis præmittendis, cæteris topicis palmam præripit. Si tineæ altiores
foveas sibi cudat, & uberiolem præbeat faciei proventum; cretam, tu-
thiam, cerussam, lapidem calaminarem, aliosque pulveres exsiccantes
adhibere fas est: aliàs angue pejus virari debet quodvis medicamen ex-
siccans. Si *morbis pedicularis* tineæ, uti crebrò evenit, societur, inspergi
solet caput cum pulvere staphisagriæ, cevadillæ, coccularum officina-
rum, &c. qui pulveres etiam axungis vel pulpâ pomorum coctorum
excipiuntur, ut exhinc emergat unguentum eidem usui dicatum. Non-
nullis postremò arridet decoctum staphisagriæ è lixivio vulgatiore paratum,
quo probè eluitur caput.

(2.) Absolutis quæ ad tineam spectant; superest ut cæteros infantum morbos cutaneos paucis complectamur. Itaque quâdam ægritudinis specie familiarissimè laborant infantes, quæ ratione indolis, ad tineam proximè accedit. Hæc est *puris* vel *saniei per meatum auditorium stillicidium*; quod nunc à simplici humorum defluxu, vel à causâ tineæ communi sobolescens, nunc à genuinâ phlogosi, quæ prius vehementi, doloribus atrocioribus, convulsionibus, &c. innotuit. Leve sanè portendit periculum hoc profluvium in primo casu: sed sub alio pertimescenda est ossiculorum tympani caries; aliave auris strages, è quâ plerumque emergit surditas immedicabilis. Huic morbo phlogosim excipienti, sub primis temporibus molestissimo, *occurritur*, lac, vel oleum amygdalarum dulcium in meatum auditorium stillando; dein latitantibus ulcusculis prospiciendum injectionibus ex urinâ, infusis amaris, detergentibus & antiputridis. Quod ad remedia interna attinet, minime discrepant ab his quæ adversus tineam suprâ tradidimus: cur hisce recensendis superfedere haud incongruum judicamus.

(3.) *Essera infantum*, Nostratibus (*la gale des enfans*) parùm ratione indolis à capitis porrigine discrepat: sed sub aliis circumstantiis ingruit; & hanc vel illam partem corporis ambitus occupat. Pro morbo saluberrimo haberi solet hæc esseræ species, ab scabie adultorum toto cælo distans; proficua præfertim censei debet lacte calidiori, vel pravæ notæ; enutritis. Post ablactationem plerumque se prodit hic affectus cutaneus; ni sub eodem tempore alvi fluxu corripiantur infantes. Universam in nonnullis cutem invadit; adeò ut erumpentium morbillorum faciem haud malè referat: nec errorem deflecterent clinici, vel solertiores, ni ad signa prænuntia attenderent. Pustulæ exiguæ, nunc parciores, nunc numerosissimæ; in locis calidioribus paulò ampliores; circâ umbilicum pertinaciores, immanem sæpius pruritum pariunt, quo divexantur infantes: aliàs levem molestiam creant; nihilque sanitati demunt. Totum curationis opus naturæ plerumque committitur: vetantur quævis topica resolventia, è sulphure & mercurio deprompta; etsi à nonnullis incautis, vel sciolis, haud sine præsentis discrimine, adhibentur. Prætereà notare juvat quòd à dentitione sæpissimè foveretur hæc eruptio, quæ ideò haud nisi post hanc absolutam desinit.

Tanti est momenti ad sanguinis & humorum expurgationem hæc opportuna eruptio, ut plura septennibus, hujusce morbi expertibus, impendere infortunia, apud omnes praxi-edoctos in confesso maneat. Hinc; morbo in solito statu perstante, nil temerè tentandum; quin potiùs salubri huic naturæ molimini succurrendum, congruâ victûs ratione, donec circâ finem *blandiora cathartica*, infusum nempè rhabarbari, syrupum de cichorio compositum, aliaque id genus infantibus dicata præscribere liceat. Si tamen urgeat pruritus, & hinc somnus arceatur, *demulcentia* admoveri queunt; cremor nempè lactis, butyrum recens, oleum amyg-

MORBI
CUTIS.

dalarum dulcium, ceratum simplicius, &c. aliàs ab omni curatione abstinere præstat. Urgentiori tamen succurrendum, si essera pravum induat characterem, & graviora accersat symptomata: sub quâ rerum conditione conducunt cathartica blandiora, identidem repetita: nec inutilem opem præstant stomachica & amara. Dein sanguini prospiciendum cauto *depurantium* & *diaphoreticorum*, aperientium & *incidentium*, ad nauseam alibi traditorum, usu: nec prohibentur post debitam horumcè remediorum administrationem, unguenta mercuralia; vel è sulphure & pulpâ radicis lapathi confecta: summam semper efflagitat cautelam hic medendi ritus.

(4.) Ad alium affectum cutaneum proclives sunt infantes intrâ cunas; qui omnes *partes lotio madidas vel facibus alvinis conspurcatis*, inquinat. *Rubor* primò ex hâc spurcitie emergit, latissimis areolis se præbens & erysipelatis faciem haud rarò præ se ferens: dein erumpunt *pustulæ* quæ nunc herpetem, nunc ambustionem æmulantur. Jure sub hoc statu incusantur acrius lotium, & sanguis plus æquo æstuans; sed aliam quandòque habet genesim hic morbus, è pravâ lactis indole depromendam. Simplicioribus remediis, sub utroque casu peragitur *curatio*; munditiei primò danda est opera, lotionem ex aquâ althææ, vel lacte tepido paratam crebrò adhibendo: dein admoventur demulcentia; cremor nempè lactis, butyrum, &c. Nonnunquàm etiam opportunè usurpantur lotiones detergentes; inter quas pluribus arridet aqua plantaginis cum quartâ aquæ calcis parte. Sed parùm conferre videntur cerata, album Rhasis, aliaque unguenta à mulierculis comprobata.

(5.) *Intertrigo*, vulgò *écorchure*, sub infanti ætate familiarissima non solum interfemineum, vicinioresque partes sordidas occupat; sed etiam axillas, cervicem, aliasve partes quæ quamlibet *cuticulæ attritionem* patiuntur, invadit. Etsi pro levissimo morbo habetur hæc excoarationis species; haud levem tamen in quibusdam molestiam creat, quæ demulcentibus leniri solet. Cum hic affectus præsertim pendeat à linteorum sordidorum usu; munditiei primò studendum esse nemo non intelligit. Dein pars affecta, cum aquâ althææ, vel vino tepido priùs probè lota, pulvere ligni cariosi spargitur: ac nullo alio plerùmque opus est *remedio*. Eundem affectum præstant creta, tuthia, lapis calaminaris, aliaque absorbentia & exsiccantia in pulverem redacta. Si doloribus divexentur intertrigine laborantes; usurpari solet unguentum album Rhasis, pompholyx, nutritum, de cerussâ, aliaque id sortis, vi demulcente & exsiccante pollentia.

(6.) *Rimis & fissuris* sæpiùs etiam deturpatur cuticula infantum; quæ scilicet præcipuam sedem habent in naso, labiis & digitis. Humorū defluxum in partem affectam sæpiùs accersunt hæc vulnuscula; è quo humorum decubitu pars in tumorem attollitur; undè nonnunquàm emergunt occallescentiæ ægrè solvendæ. E frigore, inter hyemem asperam contracto,

tracto, subnasci solent fissuræ cutaneæ; haud rarò tamen à sanguinis vel humorum labe oriundæ. Simplicissimus est huncce levissimum affectum *curendi modus*: parti scilicet læsæ, priùs vino tepido probè lotæ, admoventur oleum amygdalarum dulcium, vel ovorum; axungia & medullæ præparatæ, ceratum Galeni, aliudve pomatum vulgatius; nec aliâ opus est medelâ; cui inhærendum donec horumce vulnusculorum labra ad mutuum contactum ducantur. De pernionibus, ambustionibus, aliisque morbis cutaneis, omnes ætates respicientibus, satis superque alibi; idèò repetitam crambem minime apponemus. Sed de nævis maternis nonnulla adjicere, haud abs re fore putavimus.

MORBI
CUTIS.

(7.) Obscura & intricatissima est *nævorum maternorum*, Nostratibus (*signes de naissance*), indoles. A denegatis rebus quas flagrantissimè cupiebant matres inter prægnationem oriri hæc stigmata vulgò fertur, sed multis difficultatibus premitur hæc opinio, quam validioribus argumentis impugnarunt nonnulli recentiores; adeò ut adhuc sub judice lis sit. Innumeras formas præ se ferunt *nævi materni*, quæ maculis & sarcofis exprimuntur. Occurrunt *macula* diversæ latitudinis, rubræ, purpuro-violaceæ, fusæ, subatræ, &c.; vino cujus colorem referunt, tribuuntur vulgatiores. *Sarcoses* verò etiam multiformes æmulari videntur fraga, mora, ficus, uvas, aliosve fructus; non secùs ac frustum hepatis, carnis suillæ, placentæ, casei, aliorumque innumerorum eduliorum, quibus gravidarum imaginatio lædebat: nec desunt quæ cristam galli, murem, mentulam virilem, &c. mentiuntur. Ità hærent maculæ, ut nullâ hætenùs notâ arte deleri queant; ni planè extirpetur cutis, quæ ipsis basim præbet, undè post rædiosam curationem emergeret cicatrix, quæ plus fortè quàm macula partem deturparet. Faciliorem *curam* admittere queunt sarcomata, quæ scilicet arcto vinculo constringuntur, ferro auferuntur, vel caustico absumuntur: sed paucis arrident hæc auxilia chirurgica; ni facies hoc stigmate ultrà modum deturpetur. Haud tamen periculo vacant prædictæ operationes; si tumor nervo, arteriæ, aponeurosi, pericranio & peritonæo insideat; sub quibus conditionibus, nocentissima vel lethifera evadit hæc medela: aliàs singulis ætatibus congruit, sed auspiciatior sub juventute censerì debet.

(8.) Superest, ultimam manum huic operi imponendo, ut breviter agamus de quodam *morbo exotico*, à peculiaribus vermibus, infantum cutem laceffentibus, prognato. *Dracunculi* apud plures audiunt, vel ob stupendam, instar crinium, exilitatem, *crinones* à nonnullis vocitantur. Juxtà alios, vermes caseofos haud malè æmulantur; hos etiam capite nigro instrui fertur, quos tamen nihil aliud esse quàm pilos in fasciculum collectos probare contendit LEUWENHOECKIUS, nec hoc dubium solvit LE CLERC. Progerminantur, si potiori Authorum parti habenda sit fides, in artubus & dorso lactentium; qui savissimo pruritu, & vigiliis pertinacioribus vexati, sensim atrophiam conficiuntur. Oppportunè sub hoc re-

**MORBI
CUTIS**

rum statu adhibentur balnea, quæ cutem laxando, horum insectorum exitui favent; melle dein illinitur pars affecta, ut extûs alliciantur & faciliùs instrumentis congruis abradantur; apertis scilicet pustulis vesiculos, sub quibus latitant. Inter exquisitiora præsidia recensentur lotiones, vel frictus mercuriales, quibus brevi enecari solent. Intereà notissimâ curandi methodo impugnatur marasmus, quem, uti innuimus, post se trahit hic affectus, sub nostro climate planè ignotus. Plura addere vetat instituti ratio, nec finit angustior pagina: ideò vela contrahimus.

Finis primi Voluminis.

*CATALOGUE des Ouvrages de M. LIEUTAUD ,
qui se trouvent chez le même Libraire.*

ELEMENTA Physiologiæ , juxta solertiora novissimaque Physicorum Experimenta , & accuratiores Anatomicorum Observationes , concinnata. *Amstelodami* , 1749. *in-8°*. 4 liv.

Essais d'Anatomie historique & pratique , contenant l'Histoire exacte de toutes les parties qui composent le corps de l'Homme ; avec la maniere de les découvrir , de les démontrer & de les disséquer ; nouvelle édition. *Paris* , 1766. *in-8°*. avec figures. 7 liv.

Historia Anatomico-Medica sistens numerosissima cadaverum extipiscia , quibus in apricum venit genuina morborum sedes ; horumque referantur causæ , vel patent effectus : ex recensione & cum plurimis observationibus Antonii Portal. *Parisiis* , 1768 , 2 vol. *in-4°*. 20 liv.

Synopsis universæ Praxeos Medicæ , in binas partes divisa ; quarum prior omnium morborum conspectum exhibet : altera verò rem medicamentariam , perpetuis Commentariis illustratam , sistit ; nova editio ulterius elaborata , vel cæteris tum Gallicis , tum Latinis , multò amplior & accuratior , cui subjungitur Liber de Cibo & Potu. *Parisiis* , 1770. 2 vol. *in-4°*. 24 liv.

Eadem , cartâ magnâ , 36 liv.

Le même Ouvrage traduit du Latin , sous les titres suivans :

Précis de la Médecine Pratique , troisieme édition. *Paris* , 1770. 2 vol. *in-8°*. 12 liv.

Précis de la Matière Médicale. *Paris* , 1766. *in-8°*. 6 liv.

